


Yesu Kiristito
Wu-Zoŋŋɔɔ (Ghana)



Sisaala-Tumulunɔ NT Ghana

Yesu Kiristito Wu-Zɔŋŋɔɔ (Ghana)
Sisaala-Tumulung NT Ghana

copyright © 2014 Wycliffe Bible Translators, Inc.

Language: (Sisaala, Tumulung)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source files dated 29 Jan 2022
b3eb8618-120f-5a96-8c1c-1dbc16914330

Contents

MATIU	1
MAAK	45
LUUK	71
JƆƆƆ	119
YESU NANZƆƆBA	
TINTINŊAA	152
ROM TINŊAA	195
1 KƆRINŊTI NIAA	216
2 KƆRINŊTI NIAA	236
GALIISIA NIAA	249
EFESIS NIAA	256
FILIPA NIAA	263
KƆLƆSI NIAA	268
1 TESALONAAKA NIAA	272
2 TESALONAAKA NIAA	276
1 TIMOTI	279
2 TIMOTI	285
TAATIS	289
FALIIMƆŊ	292
HIIBURU TINŊAA	294
JEEMS	310
1 PIITA	316
2 PIITA	322
1 JƆƆƆ	326
2 JƆƆƆ	331
3 JƆƆƆ	332
JUUD	333
WIALINŊ WIA SI JONƆ	
DAGE JƆƆƆ	335

WU-ZOMO-LA MATIU SI N̄MUNSA

Yesu doho niaa

Luuk 3.23-28

¹ Yesu doho niaa ne n̄la. U naabal-imaba ne fa n̄aa Abiraham ari Devit.

² Abiraham ne fa lul Aizik. Aizik ma sii lul Jekob. Jekob ma sii lul Juda ari u naan̄biirin̄.

³ Juda ma sii lul Peres ari Zera. (Ba naan̄ yirin̄ ne fa Tama.) Peres ma bira sii lul Hezuron̄. Hezuron̄ ma sii lul Ram.

⁴ Ram ma sii lul Amiinadab. Amiinadab ma sii lul Naasun̄. Naasun̄ ma sii lul Salimon̄.

⁵ Salimon̄ ma sii lul Buas. (Buas naan̄ yirin̄ ne fa Rehab.) Buas ma sii lul Obed. (Obed ma naan̄ yirin̄ ne fa Rut.)

Obed ma sii lul Jesi. ⁶ Jesi ma bira sii lul kuoro Devit. Devit ma fa lul Solomon̄ (Solomon̄ ma naan̄ fa n̄aa Uraya haala ne. Uraya suu an̄ ka Devit jon̄o jaa.)

⁷ Solomon̄ ma sii lul Rihabam, Rihabam ma sii lul Abaaja, Abaaja ma sii lul Asa.

⁸ Asa ma sii lul Jihosafat, Jihosafat ma sii lul Joram, Joram ma sii lul Uzaya.

⁹ Uzaya ma sii lul Jotam, Jotam ma sii lul Ehas, Ehas ma sii lul Hizikaya.

¹⁰ Hizikaya ma sii lul Manaasi, Manaasi ma sii lul Emon̄, Emon̄ ma sii lul Jusaya.

¹¹ Jusaya ma sii lul Jekonaya ari u naan̄biirin̄. Bua-la le ne ba ken̄ Iziral tin̄n̄aa mu Babilon̄.

¹² Ba fa si ken̄ Iziral tin̄n̄aa kaa mu Babilon̄ nii, u nii harin̄ le ne Jekonaya lul Sialitel, Sialitel ma sii lul Zerubabil.

¹³ Zerubabil ma sii lul Abayat, Abayat ma sii lul Elayakim, Elayakim ma sii lul Azɔ.

¹⁴ Azɔ ma sii lul Zadok, Zadok ma sii lul Akim, Akim ma sii lul Elayat.

¹⁵ Elayat ma sii lul Eliyeza, Eliyeza ma sii lul Matan̄, Matan̄ ma bira sii lul Jekob.

¹⁶ Jekob ma sii lul Josef, Josef ne saa jaa M̄eri. U ne lul Yesu, nii-la ba si yire Kirisito.

¹⁷ A suomi Abiraham si he u miisin̄ le a kaa kuko Devit si he u miisin̄ le, ba di u nihilier̄eba kala fa n̄aa fii ari banese ne. Devit si he u miisin̄ le a kaa kuko bua-la le ba fa si kese Iziral tin̄n̄aa kaa mu Babilon̄, Devit nihilier̄eba kala ma fa n̄aa fii ari banese ne, a bira chin̄ bua-la le ba si kese Iziral tin̄n̄aa kaa mu Babilon̄ a kaa kuko bua-la le ba si lul Kirisito, nialin̄ ba si kese kaa mu Babilon̄ nihilier̄eba ma fa n̄aa fii ari banese ne.

Yesu lullun̄ bua le

Luuk 2.1-7

¹⁸ N̄la ne ba n̄aa a lul Yesu Kirisito. Josef ne fa suge u naan̄ M̄eri duu jaa. Ka di ba-na jaa don̄o, M̄eri na duu ken̄ luoron̄ ne. Wia Din̄-zon̄-la ne he pu.

¹⁹ Josef fa n̄aa nipula ne. U fa bi che duu hiise M̄eri niaa tuon̄. Nii ne u ken̄ u tuon̄ le duu viau.

²⁰ U fa sii biine nii, Wia tin̄daara don̄o ko u teen̄ ari duosoo tuon̄ a bula pu a bul, "Josef, Devit doho nuu, si leje di fawullun̄ kenin̄ n̄ sii che di n̄ jaa M̄eri, bee wiaa luoru-la u si kene n̄aa Wia Din̄-zon̄-la ne he pu.

²¹ U jan̄ lul baal, n̄ jan̄ he u yirin̄ Yesu, bee wiaa u ne jan̄ laa u niaa haacheba ta."

²² Wiin̄ deen̄ kala n̄aa di wialin̄ la Tiina Wia fa si bula ku n̄aa wutitii. U fa to u nialin̄ sii bul wiaa, Wia Din̄-zon̄-la dolun̄ le ne a bul nii.

²³ Wialin̄ u fa si bula ne n̄la:

"Ha-tolo kubala ha si bi baal jin̄ jan̄ ken̄ luoron̄ a lul bie.

Ba jan̄ he u yirin̄ Imanuel."

(U yiri-la bubuon̄ ne Wia he la teen̄.)

²⁴ Josef si sii don̄ le, u n̄aa nii Wia tin̄daari-la si bula pu a jaa M̄eri.

²⁵ U si jaau nii, ba duu bi don̄o jin̄, ka u lul u ha-toli-bie. Nii ne Josef he u yirin̄ Yesu.

2

Wu-jinnaa mu na Yesu

¹⁻² Ba lul Yesu Betilehem le ne. Tabie-la fa he Judiya tin̄teen̄ le ne. Bua deen̄ le baal kubala baa yire Herod

ne fa n̄aa tin̄tee-la kuoro. Ba si lul Yesu, wu-jinnaa lii taŋ-bubuŋ a kɔ Jerusalem a pīsɛ, “Juu tin̄ŋaa kuoru-la ba si lula hɛ nii n̄ɛ? La na u chɛŋwulun̄ taŋ-bubuŋ n̄ɛ a kɔ di la chuɔlu.” ³ Kuoro Herɔd fa si nii wiin̄ deen̄, fawullun̄ kɛŋ ba di Jerusalem niaa kala kin̄kɛŋ kin̄kɛŋ. ⁴ Nii n̄ɛ u yirɛ nialin̄ si kpu pusun̄ pipi Wia kuhiasin̄ ari Wia tenin̄ kerichiba-la ba ku hilimi. U pīsɛba a bul, “Nii n̄ɛ ba jaŋ lul Kirisito, nii-la Wia si liisa?” ⁵ Nii n̄ɛ ba bula pu a bul, “Ba jaŋ lulu Betilɛhem, Judiya tin̄teen̄ lɛ. N̄la n̄ɛ nialin̄ s̄ii bul wiaa, Wia Din̄-zɔŋ-la dolun̄ lɛ ŋmun̄sɛ: ⁶ Wia si, ‘Betilɛhem n̄aa ta-bie n̄ɛ Judiya tin̄teen̄ lɛ.

Ama Judiya tin̄teen̄ kala lɛ, Betilɛhem niaa n̄ɛ n̄aa ni-balaa, bɛɛ wiaa ba tuɔŋ n̄ɛ Iziral kuoro jaŋ lii, nii-la si jaŋ beŋ mi niaa, Iziral tin̄ŋaa.’ ”

⁷ Nii n̄ɛ Herɔd luɔra yirɛ wu-jinna-la si lii taŋ-bubuŋ a kaa mu faa a pīsɛba di ba dagu bua-la titia lɛ chɛŋwul-la si lia. Ba daga pu. ⁸ Nii n̄ɛ Herɔd taba di ba mu Betilɛhem, aŋ bula piba a bul, “Má mu chɛ bile ari siifɛsin̄. ‘Di ma n̄ɛ nau, má len̄ di mi ma jin̄ nii niin̄ lɛ, a ma mu chuɔlu.” ⁹ Ba si nii nii, ba lii jon̄ won̄biin̄ aa mu. Chɛŋwul-la ba fa si na taŋ-bubuŋ bira laa ba sipaan̄. ¹⁰ Ba bira si na chɛŋwul-la, ba tuɔŋ kala tɔrɛ, ba jujuɔsɛ. ¹¹ Ba si mu yi lee-la bii-mulo-la si hɛ, chɛŋwul-la chin̄ dia-la nyun̄. Ba mu juu dia-la a na bii-mulo-la ari Mɛeri, u naan̄. Ba tuu kpirimi u sipaan̄ a chuɔlu. Nii n̄ɛ ba puri ba chugusun̄ a liisɛ kiaa pu: Sɛlime, tii-keli-zɔŋ baa yirɛ firan̄kinsɛŋ ari tii-keli-zɔŋ dɔŋɔ baa yirɛ mɛɛ. ¹² Nii n̄ɛ titan̄ŋ Wia bula piba duosoo tuɔŋ ari ba sí miira mu Herɔd teen̄. Nii n̄ɛ ba sii a to won̄bii-wogo a miira mu ba jaŋ.

Josef ari Mɛeri fá mu Ijipiti tin̄teen̄

¹³⁻¹⁴ Ba si miira jon̄ ba won̄biin̄ a viiri, Josef pin̄ don̄ a duosi a na Wia tin̄daara di u kɔ u teen̄ a bula pu, “Sii a jon̄ bii-mulo-la ari u naan̄ a fá mu Ijipiti tin̄teen̄ a hɛ dimɛ see di mi bira bula pin̄ di ŋ lii dimɛ, bɛɛ wiaa Herɔd chɛ di u kpu bii-mulo-la n̄ɛ.” Nii n̄ɛ u sii a jon̄ bii-mulo-la ari u naan̄ a mu Ijipiti tin̄teen̄ titan̄ŋ. U hɛ dimɛ n̄ɛ deen̄ deen̄ Herɔd ku suu. ¹⁵ Wiin̄ deen̄ n̄aa di wii-la Wia fa si to nialin̄ s̄ii bul wiaa, Wia Din̄-zɔŋ-la dolun̄ lɛ ku n̄aa wutitii. U fa bula ari u jaŋ yirɛ u bie duu lii Ijipiti tin̄teen̄ kɔ.

Ba kpu han̄bolibiisi-la Betilɛhem lɛ

¹⁶ Herɔd si na ari wu-jinna-la nyisu n̄ɛ, u faasa na baan̄ŋ. Wu-jinna-la fa si dagu bua-la lɛ ba si lul Yesu, u jin̄ nii. Nii n̄ɛ u ta u laali-yuoroo di ba mu Betilɛhem ta-biisi-la kala si gollu chu a kpu han̄bolibiisi-la kala si ha bi jisin̄ balia kiele. ¹⁷ A tin̄ ŋla wiaa wii-la Jerimaya fa si bula ku n̄aa wutitii n̄ɛ. U fa n̄aa nialin̄ s̄ii bul wiaa, Wia Din̄-zɔŋ-la dolun̄ lɛ dɔŋɔ n̄ɛ. ¹⁸ Wialin̄ u fa si bula n̄ɛ ŋla: U si,

“Niaa níi yel Rama lɛ,
niaa faasa yel n̄ɛ.

Haal kubala ba s̄ii yirɛ Rechil yel u han̄biisin̄ wiaa n̄ɛ.

U yele, u bi tɔrɔ,
bɛɛ wiaa ba kala suba n̄ɛ.”

Josef ari Mɛeri mu Nazaret

¹⁹⁻²¹ Nii n̄ɛ Herɔd ku suu. U si suba nii, Josef bira duoso a na Wia tin̄daara di u kɔ u teen̄ a bula pu, “Sii a kɛŋ bii-mulo-la ari u naan̄ a miira mu Iziral tin̄teen̄. Nialaa fa s̄ii chɛ di ba kpu bii-mulo-la, ba suba n̄ɛ.” Nii n̄ɛ u kɛŋ bile ari u naan̄ a kaa mu Iziral tin̄teen̄ a hɛ dimɛ. ²² Ama Josef si nia ari Herɔd suba, ka u bie Akiliyas dii kuorun̄ Judiya tin̄teen̄ lɛ, fawullun̄ fa kɛnu ari u si jaŋ hɔŋ dimɛ. Nii n̄ɛ Wia bira bula pu duosoo tuɔŋ duu mu hɔŋ Galilii tin̄teen̄ lɛ. ²³ U si mu Galilii tin̄teen̄, u mu hɔŋ taŋ kubala lɛ baa

yire Nazaret. U n̄aa n̄ii di wialin nialin fa sii bul wiaa, Wia Din̄-zon̄-la dolun̄ le n̄aa wutitii n̄e. Ba fa bula a bul,
 “Ba jan̄ kenu yire Nazaret tiina.”

3

*Joon̄ Wia lii-foori-la bul Wia wiaa
 Maak 1.1-8; Luuk 3.1-18; Joon̄
 1.19-28*

¹ Bua-la le Joon̄ Wia lii-foori-la sii ko Judiya tin̄teen̄ a juu giri-bine tuon̄ a suomo bubul Wia wiaa pipi niaa. ² U bula piba a bul, “Má birima lii ma haacheba le, beɛ wiaa Wia kuorii-la kpaga n̄e!” ³ Nialin̄ fa sii bul wiaa, Wia Din̄-zon̄-la dolun̄ le don̄o ma fa bul Joon̄ wiaa n̄e. U yirin̄ n̄e fa Azaaya. U fa si,

“Nuu n̄e chin̄ giri-bine tuon̄ aa heele bul,

‘Má ko a wase won̄biin̄ bil di la Tiina ko a tuto.

Má n̄aa n̄ii duu n̄e ko, u di-venin̄ jan̄ pin̄ worun̄.’ ”

⁴ Joon̄ gennin̄ fa n̄aa bun̄tan̄na punaa n̄e ba kaa sua, a ken̄ ten̄biin̄ voo u tin̄a, u kudiilee ma n̄e fa nyan̄girik̄eba ari tuun̄. ⁵ Niaa lii Jerusalem ari Judiya tin̄teen̄ kala ari tasi-la kala si golli Joodan̄ fuo-la a ko u teen̄. ⁶ Ba dage ba haacheba an̄ tuu Joodan̄ fuo-la, u foba Wii-chuōle liin̄.

⁷ Joon̄ na Farisii tin̄naa ari Sadiusii tin̄naa di ba yuga a kuko u teen̄ duu foba Wii-chuōle liin̄. U si naba, u bula piba a bul, “Ma niaa deen̄ba wu-n̄aalaa nage din̄naa n̄e. Ma biina ma jan̄ wuo fá lel cheɛ-la Wia si jan̄ dii nuu-kala sariyaa? ⁸ Máa n̄aa wialin̄ si jan̄ dage ari ma birima lii ma haacheba le n̄e ⁹ an̄ sí biina a bul Abiraham si n̄aa ma naabalima n̄ii, Wia bi jan̄ dogisema. Mi jan̄ bula pima ari Wia paala jan̄ wuo n̄aa di tabiaa deen̄ba ma si na birime Abiraham doho niaa. ¹⁰ Na ba ken̄ saan̄ jee n̄e a n̄aa siri di ba ker̄i tiisin̄ lo. Tia-la kala si bi nen̄-zon̄on̄o ka nen̄, ba jan̄ kere lo a he nyinin̄.

¹¹ Mi-na foma Wii-chuōle liin̄ a dage ari ma birima lii ma haacheba

le n̄e, ama nii-la si jan̄ to mi harin̄ ko, u n̄e jan̄ jon̄ Wia Din̄-zon̄-la a he ma don̄sun̄ le an̄ jon̄ nyinin̄ he don̄sun̄ ma le. U n̄e yuga kiimi. U paala bi maga di mi kori u nen̄ten̄n̄ee maa. ¹² U jan̄ kori mii-chaari-gban̄a duu nmoo u miaa kala dere, u jan̄ ken̄ gban̄a-la a kaa chaare a liise mii-biin̄ a he u vire le an̄ jon̄ jon̄ a he nyinin̄ le. Nyin̄-la bi jan̄ dise.”

*Joon̄ fo Yesu Wii-chuōle liin̄
 Maak 1.9-11; Luuk 3.21-22*

¹³ Bua-la le Joon̄ fa sii bul Wia wiaa an̄ fufo niaa Wii-chuōle liin̄ n̄ii, Yesu sii lii Galilii tin̄teen̄ a ko Joon̄ teen̄ duu fou Wii-chuōle liin̄ Joodan̄ fuo-la le. ¹⁴ Ama Joon̄ si nii n̄ii, u wiwalime di Yesu ken̄ u tuobiinaa birime. Nii n̄e Joon̄ bula pu a bul, “N̄ n̄e maga di n̄ fomi Wii-chuōle liin̄, an̄ ka n̄ ko di mi n̄e fon̄ Wii-chuōle liin̄ n̄ii.” ¹⁵ Nii n̄e Yesu bula pu a bul, “N̄aa n̄ii mi si bula pin̄. N̄la n̄e la jan̄ wuo to a n̄aa wii-la kala Wia sii cho.” Nii n̄e Joon̄ sei a fou Wii-chuōle liin̄. ¹⁶ Joon̄ si fo Yesu Wii-chuōle liin̄ dere, u guu lii lii-la tuon̄ ku lii di wia nyun̄ kpaa balia. U na Wia Din̄-zon̄-la duu ku tuu a nage kokomo a togiliu le. ¹⁷ Ka u nii nuu yiikoro wia nyun̄ a bul, “Mi Bii-choolun̄ n̄e n̄la, mi tuon̄ t̄ore u nyun̄.”

4

Sitaani magise Yesu

Maak 1.12-13; Luuk 4.1-13

¹ Wia Din̄-zon̄-la si ku togili Yesu le n̄ii, u kenu kaa juu giri-bine tuon̄ di Sitaani magisu. ² Yesu fa si he giri-bine tuon̄ n̄ii, u voo niin̄ titan̄in̄ ari wiiheye kala tapulaa mahin̄ balia, n̄ii n̄e losun̄ kenu worun̄. ³ Nii n̄e Sitaani ko u teen̄ a bula pu a bul, “Di n̄ n̄e n̄aa Wia Bie, n̄aa di tabiaa deen̄ba birime boroboro di n̄ dii.”

⁴ Nii n̄e Yesu bula pu a bul, “Ba nmun̄se Wia tenin̄ tuon̄ a bul, ‘Kudiilee dun̄dun̄a dee bi nuhuobiine miisin̄ ka pa, ama Wia niin̄ wialin̄ u sii bul ní pi nuhuobiine miisin̄.’ ”

⁵ Nii ne Sitaani kenj Yesu a kaa mu Jerusalem a kaa mu jil Wia-dia nyugbaña ⁶ aň bula pu a bul, “Di ń ne ńaa Wia Bie, jonj ń titia a yuo daha a tuu chigisi tinteenj. Ba ńmunse Wia teninj tuonj ari

‘Wia jaň bul ń wiaa a pi u tinđaraa di ba ku cheme keninj, di ń sí jonj ń naan ńmoo tabiaa a kerí.’ ”

⁷ Nii ne Yesu bula pu a bul, “Ba bira ńmunse Wia teninj seme donjo a bul, ‘U bi maga di ń mimagise ń Tiina Wia.’ ”

⁸ Nii ne Sitaani bira kenj Yesu a kaa jil peel-bal kubala nyunj a dagu dunia kuorunj fine ari u zomunj ⁹ aň bula pu a bul, “Mi jaň jonj kiaa deenba kala pinj di ń ne jaň tuu kpirimi a chuolemi.” ¹⁰ Nii ne Yesu bula pu a bul, “Sitaani, mu dime, Wia teninj tuonj ba ńmunsa di ba chuchuole la Tiina Wia dunđuna ne a timaa pu.” ¹¹ Nii ne Sitaani viiri aň ka Yesu. Nii ne Wia tinđaraa ku tima pu.

*Yesu suomi u tinđinńaa Galilii le
Maak 1.14-15; Luuk 4.14-15*

¹² Bua deenj le ba kenj Jonj Wia lii-foori-la kaa mu to dia. Yesu si nii nii, u sii Judiya le a mu Galilii tinteenj. ¹³ U bira bi Nazaret le hono aň sii a mu honj tanj kubala baa yire Kapenam le. Tanj-la kpage Galilii mugi-bal-la ne a he Zebulunj ari Nafitali tinteenj. ¹⁴ Wiinj deenj ńaa di wialinj Azaaya fa si bula ku ńaa wutitiiba ne. ¹⁵ Azaaya fa ńaa nii-la síi bul wiaa, Wia Din-zonj-la dolunj le ne. U fa bul wiaa a pi Zebulunj ari Nafitali doho niaa le a chaase mugi-balinj diiraa, Jonđanj seme, a he Galilii tinteenj le. Ba ńaa nialinj si bi Juu tinńaa ńaa ne. ¹⁶ U bula piba a bul, “Nialinj si he biriminj tuonj, ba jaň na pulun-bal.

Tinđee-la ma le niaa si bi Wia chuole, pulumunj jaň pose piba.”

¹⁷ Yesu si he Kapenam le, u suomi u tinđinńaa a bul Wia wiaa pi niaa a

bul, “Má birima lii ma haacheba le, bee wiaa, Wia kuorii-la kpaga ne.”

*Yesu yire chenfilii-kpuuraa
banese*

Maak 1.16-20; Luuk 5.1-11

¹⁸ Yesu fa si jonj Galilii mugi-balla niinj a vivenj, u na naanbiirinj balia. Ba fa ńaa chenfilii-kpuuraa ne. Donjo yirinj ne fa Saamonj. U yirinj donjo ma ne fa Piita. U naanbie ma yirinj ne Anđuru. U naba di baa kpu chenfilee fuo-la le ari ba jonba.

¹⁹ Nii ne Yesu bula piba a bul, “Má ko mi teenj a to mi harinj. Mi jaň dagema nii ma si jaň kikese niaa.”

²⁰ Lima lima ba jonj ba jonba ta aň to u harinj. ²¹ Nii ne u bira venj a mu na naanbiirinj balia, ba yiraa ne Jeems ari Jonj. Ba fa ńaa Zebidii biirinj ne. U naba di ba di ba nyimma fa he ba liinj daboro tuonj ne. Ba kenj ba jonba ńaa siri di ba yuo. ²² Nii ne Yesu yireba. Ba guu sii a lenj ba liinj daboro ari ba nyimma aň to Yesu harinj.

*Yesu bul Wia wiaa pi niaa aň pe
vaareba*

Luuk 6.17-19

²³ Nii ne Yesu golle Galilii tinteenj kala a didage niaa ba Wii-chuole diisinj le a bubul Wia wu-zomola wiaa ari Wia kuorii-la wiaa a pi niaa aň pe vivaare niaa nyanyal-yiriba kala. ²⁴ Yesu wiaa teeli Siiria tinteenj kala. Nii ne niaa kenj ba nyanyal tinńaa kala ko u teenj. Ba kenj nyanyal-yiriba kala, jin-bonjoo fa kenj donsunj, nialinj donsunj faa tel kunjunsunj, donsunj ma fa ńaa gberikese ne a ko. Yesu vaareba kala. ²⁵ Ni-danj to Yesu harinj. Ba donsunj lii Galilii tinteenj ari ta-gentisinj fii tinđeyee. Donsunj ma lii Jerusalem si he Judiya tinteenj le, donsunj ma lii Jonđanj funj cholo seme donjo.

5

*Nii la si jaň ńaa a kenj tuoturunj
Luuk 6.20-23*

¹⁻² Yesu si na di niaa yuga nii, u jil peelinj nyunj a honj dime. U si hono,

u haritooroo kɔ u teenj. U suomo bul wiaa a didageba aa bul,

³ “Wia jan pɛ nialinj si bi Wia jin worunj lɛ.

Ba nɛ jan dii Wia kuorii-la.

⁴ Wia jan pɛ nialinj sɪi yel lɛ.

U jan lej di ba tuɔsaa pinj di-bala.

⁵ Wia jan pɛ nialinj si bi ba titia ka dage.

Ba jan dii Wia kuorii-la tinjee-falii-la lɛ.

⁶ Wia jan pɛ nialinj si faasa chɛ tuɔ-pula a nage losunj koo lii-nyuasunj si kɛnj niaa nj chichɛ kudiilee koo liinj nii.

Wia jan nɛa di ba kɛnj tuɔ-pula.

⁷ Wia jan pɛ nialinj sɪi fá niaa nennige lɛ.

U ma jan fába nennige.

⁸ Wia jan pɛ nialinj si kɛnj tuɔ-pula lɛ.

Ba jan na Wia.

⁹ Wia jan pɛ nanjejeeree lɛ.

U jan kɛnba yire u biirinj.

¹⁰ Wia jan pɛ nialinj ba sɪi dɔgisu lɛ a tinj wutitii ari tuɔ-pula wiaa.

Ba jan hɛ Wia kuorii-la tuɔnj.

¹¹ Di niaa nɛ tuusema anj pɛ to ma naasinj dudɔgisema anj nyia wunyarinj pipima a tinj ma si nɛa mi haritooroo wiaa, Wia ma jan pɛma lɛ. ¹² Má lej di ma tuɔnj tɔrɛ, di ma jujuɔsɛ, bɛɛ wiaa ma time jan yuge Wia-jan lɛ. Ba si to ma naasinj dudɔgisema nii, nii titia nɛ ba fa dɔgisɛ nialinj si laa sipaanj bubul wiaa, Wia Din-zɔnj-la dolunj lɛ.

Ma nage yisinj a nage chaaninj maa

Maak 9.50; Luuk 14.34-35

¹³ Ma nage yisinj nɛ nuu-kala teenj. Yisinj sima, ama di u nɛ sebise, nj bira bi jan wuo nɛa duu sinj. U nɛa kutɔ nɛ. Ba jonjo ta niaa nunuɔsɛ.

¹⁴ Ma ma nage chaaninj nɛ dunia niaa kala teenj. Tanj kala si chinj peelinj nyunj, u bi wuo faa. ¹⁵ Nuukala sɪi chɛ pulumunj u dia lɛ, u bi jan nyige chaaninj bil u dia lɛ a kɛnj gbanja a chu tɔ, koo u bi jan jonj chaan-la hɛ godo bubuɔnj maa. U yie jonjo bil kua nyunj nɛ, di nuu-kala si

hɛ dia-la tuɔnj nina pulumunj. ¹⁶ Nii titia nɛ ma ma maga di ma chaane niaa teenj di ba wuo na wu-zɔmɔ-la ma sɪi nɛa di ba wuo dɛnnɛ ma Nyimma si hɛ Wia-jan lɛ.

Yesu dage niaa wii-la ba si nmuɔsa bil di ba tuto

¹⁷ Ma biina mi kɔ di mi jonj wialinj Moosis fa si nmuɔsa bil di niaa tuto ta nɛɛ? Koo ma biina mi kɔ di mi jonj wialinj niaa si dagema Wia Din-zɔnj-la dolunj lɛ ta nɛɛ? Ai, mi bi kɔ di mi jonjba ta, ama mi kɔ di mi dage ba bubuɔnj titia nɛ. ¹⁸ Wutitii nɛ mi bulaa pima, dunia ari wia nyunj si jan hɛ dime njii a dieni, wialinj Moosis fa si nmuɔsa bil di niaa tuto, ba bi jan keriba mua ma ta see di kunj-kala si hɛ dunia lɛ dɛrɛ. ¹⁹ Nii wiaa nii-la kala si kerii wialinj mua ma ta anj dage u dɔnsunj tinjɛa di ba to njii, u tiina nɛ jan nɛa ni-bie Wia kuorii-la tuɔnj. Nii-la ma kala sɪi to wialinj a dage u dɔnsunj tinjɛa di ba ma to njii titia, u tiina jan yuge Wia kuorii-la tuɔnj. ²⁰ Mi jan bula pima, see di ma kɛnj tuɔ-pula a kii Wia teninj kerichiba ari Farisii timma-la a njɛa wialinj Wia sɪi chɛ, di njii dee, ma bi jan wuo juu Wia kuorii-la tuɔnj.”

Yesu bul wiaa a tige baaninj naninj lɛ

²¹ Nii nɛ Yesu bira dage u haritooroo a bul, “Ma nia ari faafaa kala nɛ Moosis bula pi niaa a bul di ba sí niaa kpu. U fa bula di nii-la kala nɛ kpu nuu, ba jan kɛnu kaa mu dii u sariya. ²² Ama lɛɛɛ mi jan bula pima, nii-la kala si na baaninj u naanbie nyunj, ba jan kɛnu kaa ku dii u sariya. Nii-la ma kala si yire u naanbie a bul di u nɛa ni-peipei, ba jan kɛnu kaa mu nialinj si hilime vuure wiaa teenj. Nii-la ma kala si yire u naanbie a bul di u nɛa ni-tɔ nɛ, u tiina jan mu juu Wia nyininj. ²³ Di nj nɛ kɛnj puna mu Wia korunj di nj kpu a nyiga pu anj liise mu yi ari nj naanbie tuɔnj cheye nj nyunj, ²⁴ lej puna-la koru-la nyunj anj miira

mu ma di η naanbie siη, ka di η-na miira mu di ba kpu puna-la a pi Wia. ²⁵ Di nuu ne samih a kenih kaa mu sariya didiilin, η ηaa kukeri a bul wii-la wase wonbiin le lima lima an-na mu. Di ηii dee, u jan kenih kaa he sariya didiire nisih le. Sariya didiire ma jan kenih kaa he porisiba nisih le. Ba ne jan kenih mu to dia. ²⁶ Di ba kenih mu to dia, η bi jan wuo lii see η tin chih-la kala ba si kere pin.

Yesu bul wiaa a tige haalaa chenih le

²⁷ Ma nia di ba dagema di ma si niaa haalaa che. ²⁸ Ama mi jan bula pima, nuu-kala si na haala a cho duu kenu pin, u tiina juu Wia haache le ne u tuoh le. ²⁹ Di η na-diiη siih nii che duu kenih he haache le, liisa ta. N si jan juu Wia kuorii-la tuoh ari sii-togo, u ne kpia ba si jonun yuo he Wia nyiniη le ari siaa balia. ³⁰ Di η na-diiη nisih nii che duu kenih he haache le, kere ta. N si jan juu Wia kuorii-la tuoh ari na-kuun, u ne kpia η si keh η yaraa kala an juu Wia nyiniη.

Yesu dage niaa haala vianih wiaa Mat. 19.9; Maak 10.11-12; Luuk 16.18

³¹ Ba bira dagema a bul, 'Di nuu nii che duu via u haala, u maga duu ηmunse tenih pi haal-la ari u jan viau.'

³² Ama leele mi jan bula pima a bul, baal-na kala si via u haala, u ηaa haal-la juu Wia haache le ne, see di haal-la ka ηaa ha-chorun wu-ηaalaa, ka u bala-na viau. Di haal-la ne bira mu jaa baal doη, baal-la si jaau, u ma juu Wia haache le ne.

Yesu bula pi niaa di ba si ηmiesu

³³ Ma bira nia di ba bula pi la naabalimaba a bul, 'Di η ne ηmiesa ari η jan ηaa wii pi Wia, si leηe di wii-la ta, ama ηaa wii-la η si si η jan ηaa a pi Wia.'

³⁴ Ama leele mi jan bula pima, di ma ne che di ma ηaa wii, ma si

ηmiesu. Ma si Wia ηmiesu, bee wiaa u nii beη dunia kuη-kala. ³⁵ Koo ma si tinteen ma ηmiesu, bee wiaa Wia naasih di-wiesih ne ηii. Koo ma si Jerusalem ma ηmiesu, bee wiaa kuori-balih jan ne ηii. ³⁶ Ma paala si ma nyun ma ηmiesu, bee wiaa ma paala bi jan wuo ηaa di ma nyu-punaa biri koo ba pulle. ³⁷ Ama mana yaa bul, 'Oo' koo 'Ai' dunduηa a lii ηii hariη. Di η ne seye, leη u sene ηaa wutitii. Di η bira bi seye maa, leη duu ηaa wutitii. Di ηii dunduηa dee, u lii Sitaani ne.

Di nuu ne ηaa wu-boh η le, si wu-boh-la joho timu

Luuk 6.29-30

³⁸ Ma nia ari Moosis fa bula a bul, 'Di nuu ne too η siih pure, η ma too u siih pure, di nuu ne ηmoo η nyiliη churi, η ma ηmoo u nyiliη churi.'

³⁹ Ama leele mi jan bula pima a bul, di nuu ne ηaa wu-boh η le, si wu-boh-la joho timu. Di nuu ne falle η na-diiη chanƙpanih le, keh η nagua chanƙpanih ma kaa birima pu duu falle. ⁴⁰ Di nuu ne samih kaa juu kooti duu laa η geri-balih, wuri η geri-bie ma pe pu. ⁴¹ Di nuu ne fugun di ma duu ven meel-daa, leη di ma ven meel-daasih balia. ⁴² Di η ne keh kuη, di nuu piese chiche, joho pu. Di nuu ne ko η teen a chiche kuη duu chih, di η ne kene, joho chimu.

Yesu bula ari la cho la diηdoηηoo Luuk 6.27-28, 32-36

⁴³ Ma nia ari Moosis fa si di ma cho ma doηsun tinηaa an bere ma diηdoηηoo. ⁴⁴ Ama leele mi jan bula pima, ma cho ma diηdoηηoo a chuole Wia pipi nialih si to naasih doηgisema. ⁴⁵ Di ma ne ηaa ηii, ma jan wuo ηaa ma Nyimma Wia si he Wia-jan biirin. U leηe Wia pose hihe ni-bohηηoo ari ni-zohηηoo kala le ne a leη duonun nii pipi ni-zohηηoo ari ni-bohηηoo kala. ⁴⁶ Di η ne cho nialih si choh dunduηa, η bi jan keh time Wia-jan le. Lanpoo lilaaraa ma

paala njɔnaa nii nɛ. ⁴⁷ Di η nɛ tuɔsɛ η naanbiirin dunɔna chuchuoɛ, η bi worun ka ηaa. Nialin si bi Wia jin ma paala njɔnaa nii nɛ. ⁴⁸ U maga di ma ηaa tuɔ-pul timma nɛ a sɪ kun-kala chɛ ka, ari ma Nyimma si hɛ Wia-jaŋ si ηaa Tuɔ-pul Tiina nii.”

6

Yesu dagɛla nii la si jaŋ ηaa a jon kiaa pi niaa

¹ Yesu bira dagɛ u haritooro a bul, “Di η nii chɛ di η ηaa wu-zɔŋ a pɛ η dɔŋɔ tiina lɛ, sɪ wu-zɔŋ-la joŋo ηaa lɛ niaa tuɔŋ. Di η nɛ ηaa nii, η bi time kɛnɛ η Nyimma si hɛ Wia-jaŋ lɛ teen. ² Di η nɛ jon kun pɛ nuu lɛ, sɪ lɛnɛ di niaa jin. Nialin sɪi dagɛ ba titia yie ηaa nii Wii-chuoɛ diisin lɛ ari wonbii-porunun lɛ. Ba ηaa nii di niaa bɛsɛba lɛ nɛ. Wutitii nɛ mi bulaa pima, ba laa ba time nɛ. ³ Di η nii jon kun a pɛ nuu lɛ, sɪ lɛnɛ di η nanɔŋ-fiemin paala jin. ⁴ Len duu ηaa wu-faali. Di η nɛ ηaa nii, η Nyimma Wia jaŋ timin. U nii na wii-la η si ηaa.”

Yesu dagɛ nii la si jaŋ chuchuoɛ Wia

Luuk 11.2-4

⁵ Nii nɛ Yesu bira bul, “Di ma nii chuoɛ Wia, ma sɪ nialin sɪi dagɛ ba titia nagu. Ba yie cho di ba chin Wii-chuoɛ diisin lɛ ari wonbiee sɛmɛ a chuchuoɛ Wia di nuu-kala naba. Wutitii nɛ mi bulaa pima, ba paala laa ba time nɛ. ⁶ Ama di ma nii chɛ di ma chuoɛ Wia, mɔ juu ma diisin a kɛŋ borusun tɔ an sul ma Nyimma-la ma si buu na. U-na na wii-la ma si faa njɔnaa nɛ, u jaŋ tinma.

⁷ Di ma nii chuoɛ Wia, ma sɪ faasa bul wiaa yugɛ, ari nialin si bi Wia jin sɪi ηaa nii. Ba biina ari ba sɪi chuoɛ Wia deen deen nii, Wia jaŋ nii. ⁸ Ma sɪba nagu. Ma Nyimma paala jin kialin ma sɪi chɛ nɛ, ka ma-na pipiesu nii. ⁹ Nla nɛ u maga di ma chuoɛ Wia: Mɔ bul,

‘La Nyimma Wia si hɛ Wia-jaŋ,

len di η yirin yirɛ.

¹⁰ Len di η kuorii-la kɔ.

Len di niaa sei η niin tinteen deen lɛ ari ba si sei Wia-jaŋ lɛ nii.

¹¹ Pila la jinin niin kudiilin

¹² an jon la haacheba chɛla, ari la ma si jon la dɔŋsun tinnaa haacheba chɛba nii.

¹³ Liisela wii-la si jaŋ kɛŋla hɛ haache tuɔŋ lɛ,

liisela wu-bɔŋŋɔ lɛ, [bɛɛ wiaa kuorii-la ari dolun ari yiri-la ηaa η kiaa nɛ, lɛlɛ a kaa mu deen deen. Ami.]’

¹⁴ Di ma dɔŋsun tinnaa nɛ ηaa wiaa cheima lɛ an ka ma joŋo chɛba, ma Nyimma Wia si hɛ Wia-jaŋ lɛ ma jaŋ jon wialin ma si ηaa chɛi a chɛma. ¹⁵ Ama di ma nɛ bi wialin ma dɔŋsun tinnaa si ηaa cheima lɛ joŋo chɛba, ma Nyimma Wia ma bi jaŋ jon wialin ma si ηaa chɛi a chɛma.”

Yesu dagɛ niaa nii-vɔbun wiaa

¹⁶ Nii nɛ Yesu si, “Di ma nɛ vɔɔ niin, ma sɪ siaa kaa chɛi a nage nialin sɪi dagɛ ba titia. Ba yie gugolle ari losun a kɛŋ siaa kala chɛi di nuu-kala na a jin ari baa vɔɔ niin nɛ. Wutitii nɛ, mi bulaa pima, ba-na paala laa ba time kala dɛrɛ nɛ. ¹⁷ Di ma nɛ vɔɔ niin, mɔ sɔŋ ma siaa a chaasɛ ma nyun, ¹⁸ di niaa sɪ wuo jin ari maa vɔɔ niin nɛ see ma Nyimma Wia dunɔna, Nii-la ma si bi na. U-na na wii-la ma si faa ηaa nɛ, u jaŋ tinma.”

Yesu dagɛ nii la si jaŋ ηaa a kɛŋ kuorun Wia-jaŋ lɛ

Luuk 12.33-34

¹⁹ Yesu bira bula, “Ma sɪ kiaa chɛ bil ma titia lɛ dunia deen lɛ. Dunia lɛ pugumaa jaŋ dii dɔŋsun an ka dɔŋsun ma su, gaaraa ma jaŋ juu gaa dɔŋsun. ²⁰ Ama mɔ chɛ kiaa bil ma titia lɛ Wia-jaŋ lɛ, lee-la pugumaa si bi jaŋ wuo dii. Ba bi jaŋ su maa, gaaraa ma bi jaŋ wuo gaaba. ²¹ Ma tuɔbiinaa yie hɛ lee-la ma kiaa si hɛ nɛ.

Yesu dagɛ niaa a tigɛ pulun-la lɛ Luuk 11.34-36

²² N siasa ne n̄aa n̄ yaraa pulumun̄. Di n̄ siasa ne zom̄o, n̄ yaraa kala ken̄ pulumun̄ ne, ²³ ama di n̄ siasa bi zon̄, n̄ yaraa kala he birimin̄ tuon̄ ne. Di pulun̄-la ne ko birime birimin̄, birimin̄ lim le ne n̄ he n̄ii.

Yesu dage niaa di ba sí ba titia walimu a tige kudiilee ari gennin̄ wiaa le

Luuk 16.13; 12.22-31

²⁴ Nuukala bi jan̄ wuo tin̄ tin̄tin̄n̄aa a pi kuhiasin̄ balia. U jan̄ cho don̄o an̄ bere don̄o. U jan̄ tuto don̄o niin̄ wiaa worun̄ an̄ via don̄o niin̄ wiaa. N̄ ma saa bi jan̄ wuo to Wia an̄ bira cho dunia kiaa maa.

²⁵ Mi bulaa pima, ma sí ma titia walimu a tige kudiile-la ma si jan̄ dii a ken̄ dolun̄ koo kialin̄ ma si jan̄ nyunyua. Ma sí ma titia ma walimu a tige genni-la le ma síi che di ma lilaale. Ma miisin̄ ne kii kudiilee, ma yaraa ma kii gennin̄. ²⁶ Má bee na diibiisin̄ si he wia nyun̄ a fil̄. Ba bi pere, ba bi kiaa kun̄, ba ma bi kiaa ka tuole virisin̄ le, ka la Nyimma Wia si he Wia-jan̄ le pipiba kudiilee. Ma ne paala ken̄ liiba a kii diibiisin̄.

²⁷ Di ma níi walime ma titia kiaa deen̄ba wiaa, bua-la le ma miisin̄ si jan̄ dere, u bi jan̄ ken̄ tapul-bala ma pe pima. ²⁸ Di ma ne saa bi tapul-bala ma wuo kaa pe ma miisin̄ le tapulii-la ma si jan̄ suu, bee ne saa tii kiaa deen̄ba wiaa wiwalimema? Má bee na tii-filaa si he girin̄ le. Ba bi tin̄, ba bi gennin̄ ma yere a lilaale, ²⁹ ama ba zom̄o ne worun̄. Kuoru kubala ne fa he dime. Baa yire Solom̄on̄. U fa si he u miisin̄ le, u ken̄ kiaa ne worun̄. Ama u gennin̄ fa bi zom̄o mage tii-filaa deen̄ba.

³⁰ Wia ne yie n̄aa yan̄ nyu a waa a zon̄, ka u bi dieni an̄ hihil. Di u ne hila, ba yie nyige nyinin̄. Di Wia ne wuo n̄aa yan̄ zon̄ n̄ii, bee ne tii ma biine ari u bi jan̄ wuo pima kudiilee ari gennin̄? Ma yarida bi yuge. ³¹ Ma saa sí leje di ma walime ma titia kudiile-la ma si jan̄ dii ari ku-la ma si jan̄ nyua ari ku-la ma si jan̄ laale wiaa. ³² Nialin̄ si bi Wia

jin̄ dunia deen̄ le, ba ne yie walima chiche kiaa deen̄ba. Ma Nyimma si he Wia-jan̄ le jima ari maa che kiaa deen̄ba kala ne. ³³ Nii wiaa má laa sipaan̄ a che kialin̄ si he Wia kuorii-la tuon̄ a che n̄ii ma si jan̄ n̄aa a ken̄ tuo-pula u sipaan̄. U jan̄ jon̄ kun̄-kala si ka a pe pima. ³⁴ Ma saa sí ma titia walimu a tin̄ chiemin̄ wiaa. Chee kala ken̄ u wiwalimia ne. Ma sí wii don̄ kala kaa pe chee kala wiwalimii le.

7

Yesu si di la sí la don̄sun̄ tin̄n̄aa wiaa laa jin̄

Luuk 6.37-38, 41-42

¹ Ma sí ma don̄sun̄ tin̄n̄aa wiaa laa jin̄. Di ma ne n̄aa n̄ii, Wia ma bi jan̄ jon̄ cheerin̄ pima. ² Wia jan̄ dii ma sariya ari n̄ii titia ma síi n̄aa ma don̄sun̄ tin̄n̄aa le. Nii titia ma si jon̄o to ma don̄sun̄ tin̄n̄aa le, n̄ii titia ne Wia ma jan̄ jon̄o toma le. ³ Ee ne n̄ jan̄ wuo na daa-bie si tel n̄ naan̄bie siin̄ le an̄ bi daa-bal-la si tel n̄ titia siin̄ le ka na? ⁴ N̄ bi jan̄ wuo bula pi n̄ naan̄bie a bul duu len̄ di n̄ liise daa-bie-la si he u siin̄ le, an̄ ka daa-bal-la si he n̄ titia siin̄ le. ⁵ N̄-na kan̄fugi tiina, laa sipaan̄ liise daa-bal-la si he n̄ titia siin̄ le, ka n̄ siasa wuo na, n̄ii ne n̄ ma jan̄ wuo pe n̄ naan̄bie le a liise daa-bie-la si he u siin̄ le a pu.

⁶ Ma sí ku-zon̄on̄o jon̄o pi vahin̄, ma ma sí ma ku-zon̄on̄o jon̄o bil toonun̄ sipaan̄. Di ma n̄aa n̄ii, ba jan̄ nuose ari ba naasin̄ an̄ toma harin̄ a din̄ma.

Má che kiaa, ma jan̄ na

Luuk 11.9-13

⁷ Sul kiaa, n̄ jan̄ laa. ⁸ Che kiaa, n̄ jan̄ na. D̄u boro, ba jan̄ kaa suro pin̄. Nii-la kala si sul kiaa Wia teen̄, u yie laa ne. Nii-la síi che kiaa, u yie na ne. Nii-la ma si d̄u boro, ba yie kaa suro pu ne. ⁹ Di n̄ bie ne piése a chiche boroboro, n̄ jan̄ sii a jon̄ tabiin̄ puu? ¹⁰ Koo duu ka che chen̄filin̄, n̄ jan̄ jon̄ dimin̄ a puu? Ai, ma bi jan̄ n̄aa n̄ii. ¹¹ Di la ne bom̄o

an jɔŋ ku-zɔŋŋɔɔ aa pi la biirin, ɛɛ nɛ la Nyimma si hɛ Wia-jaŋ a kɛŋ wu-zɔŋŋɔɔ bi jaŋ jɔŋ ku-zɔŋŋɔɔ a pi nialaa si sula chichɛɛ? ¹² Wii-la ŋ si cho di niaa jɔŋɔ ŋjaan ɛ, ŋ ma ŋaa kukeri a jɔŋ ŋii titia a ŋjaaba ɛ. Wialin Moosis fa si ŋmunsa bil di niaa tuto ari nialin fa sii bul wiaa, Wia Din-zɔŋ-la dolun ɛ, wu-nyun nɛ wiin deen.”

Má to boi-bie a mu Wia-jaŋ

Luuk 13.24

¹³ Yesu bira bul, “Má to boi-bie a mu Wia-jaŋ. Boi-la ba si to aa mu Wia nyinin, u jalia nɛ, wonbii-la ma venin bi hei. Niaa yuga nɛ a tuto wonbii-la. ¹⁴ Ama Wia-jaŋ boinini muuro nɛ, wonbii-la ma sii mu leela, u venin heyɛ. Niaa banmenɛ dunɔn nɛ yie wuo na wonbii-la a to.

Yesu bul wiaa a tin nialin si nyia wiaa a bul di ba ŋaa nialin sii bul wiaa, Wia Din-zɔŋ-la dolun ɛ

Luuk 6.43-44

¹⁵ Má pɔ ma titia ɛ ari nialin si nyia wiaa a bul di ba ŋaa nialin sii bul wiaa, Wia Din-zɔŋ-la dolun ɛ nɛ. Ba jaŋ kɔ ma teen ari ni-zɔmɔ ba siaa ɛ, ama ba tuɔŋ ɛ, ba ŋaa ni-bɔmɔ nɛ a nage gunɔgurusun si yie kɛsɛ kiaa chichan. ¹⁶ Ma jaŋ to ba wu-ŋaalaa ɛ nɛ a jinba. Sojaamin bi chichuen ka nen, sɔgun-gbene ma bi tutogo nanbilaa ka nen. ¹⁷ Tia-la kala si kɛŋ yarifiɛlaa, uu nen nen-zɔŋŋɔɔ nɛ, ama tia-la si bi yarifiɛlaa kɛnɛ nii nen nen-lɔrunun. ¹⁸ Tia-la si kɛŋ yarifiɛlaa bi nen-lɔrunun wuo nen, tia-la si bi yarifiɛlaa kɛnɛ ma bi nen-zɔŋŋɔɔ wuo nen. ¹⁹ Tia-la kala si bi nen-zɔŋŋɔɔ ka nen, ba jaŋ kere ta a jɔŋɔ yuo hɛ nyinin tuɔŋ. ²⁰ Nii ɛ nɛ ma jaŋ to a jin nialin sii nyia wiaa a bul di ba nɛ ŋaa nialin sii bul wiaa, Wia Din-zɔŋ-la dolun ɛ.

Nuu-kala dee bi jaŋ juu Wia kuorii-la tuɔŋ

Luuk 13.25-27

²¹ Nuukala si yiremi, ‘mi Tiina, mi Tiina,’ dee bi jaŋ juu Wia kuorii-la tuɔŋ, see nialin sii ŋaa wialin mi Nyimma si hɛ Wia-jaŋ si daga. ²² Di Wia sariya chɛ-diilin nɛ yie, niaa jaŋ yugɛ a bul, ‘La Tiina, la Tiina, la bul Wia wiaa a pi niaa ŋ dolun ɛ an kiri jinɔŋ niaa ɛ ŋ dolun ɛ, la ŋaa wu-magilaa ma a yugɛ ŋ dolun ɛ.’ ²³ Ama mi jaŋ bula piba a bul, ‘Mi paala bima jin. Ma wu-bɔŋ ŋjaaraa, má surisa lii mi teen!’ ”

Yesu mage namaga a tige di-saaraa balia ɛ

Luuk 6.47-49

²⁴ Yesu bira si, “Nii-la kala si kɔ mi teen a jegile nii mi niin wiaa deenba mi si bula pima a tutoba, mi jaŋ dagema nii u si naga. U nage wu-jinna si saa u dia nɛ. U saau kpaginyilin nyun nɛ. ²⁵ Nii nɛ duonun nii. Liin su lerin kala, pelin ma lu a ŋmoo lii-la a yage dia-la, ka dia-la bi tele, bɛɛ wiaa ba saau worun nɛ kpaginyilin nyun. ²⁶ Ama nii-la ma kala si jegile nii mi niin wiaa deenba mi si bula pima an biba to, u nage ni-yaarin si saa u dia nɛ. U saau hagili-bunbugulo tuɔŋ nɛ. ²⁷ Nii nɛ duonun nii. Liin su lerin kala, pelin ma lu a ŋmoo lii-la yage dia-la, dia-la kala tel wuru.”

²⁸ Yesu si bul wiaa deenba dɛɛ, ba ŋaa ni-dan-la kala wu-kpunkpere. ²⁹ U biba daga a nage ba Wia tenin kerichiba sii dageba nii. U si dageba nii, u kɛŋ wii-la dolun nɛ.

8

Yesu vaare gbege

Maak 1.40-45; Luuk 5.12-16

¹ Yesu si bul wiaa deenba dɛɛ, u lii peelin nyun a ku tuu. Nii nɛ ni-dan tuto u harin. ² Gbege kubala ma kɔ u teen a tuu kpirimi u sipaan an sul Yesu a bul, “Kuhian, di ŋ nɛ cho, ŋ jaŋ wuo ŋaa di mi duori.” ³ Nii nɛ Yesu liise u nisin a digu an bul, “Mi cho nɛ. Duori.” Nii nɛ yawiil-la guu len baal-la. ⁴ Nii nɛ Yesu bula pu a bul, “Si wiin deen bula pi nuu-kala.

Ama keŋ η titia mu dage nii-la si kpu pusun pipi Wia duu kpu pusun a pi Wia a pin ari Moosis fa si dagema nii. Di η ne ŋaa nii, niaa jan na ari η bira bi disinnin keŋe.”

Yesu vaare Rom kuhian dia tintinna

Luuk 7.1-10

⁵ Nii ne Yesu sii mu Kapenam di Rom laali-yuoroo kuhian ku chemu a sulu duu peu le a bul, ⁶ “Mi kuhian, mi dia tintinnu ni wiilu a pin dia le. U bi wuo veŋ a nina heŋ worun.” ⁷ Nii ne Yesu bula pu a bul, “Mi jan ku ŋaa duu duori.” ⁸ Ama baal-la bula pu a bul, “Mi Tiina, mi bi maga di η ku juu mi dia. N-na yaa suri η niin dunɗunɗa a bul di mi tintinnila duori, u jan duori. ⁹ Mi ma paala to mi laali-yuoroo nihiasin niin ne. Laali-yuoroo doŋsun ma tuto mi ma niin. Di mi ne bul di nia deen mu daha, u yie mu ne. Di mi ma ne si di nia deen ko daha, u yie ko ne. Di mi ne bula pi mi yomo duu ŋaa deen, u yie ŋaa ne.” ¹⁰ Yesu si nii wiaa deenba, u ŋaa wu-kpunkpere. Nii ne u bula pi ni-dan-la fa sii to u harin a bul, “Wutitii ne mi bulaa pima, mi ha bi yarida deen doho na Iziral tinteen niaa tuon. ¹¹ Mi bulaa pima, niaa jan yuge a lii tan-bubuon ari tan-seme kala a ko a hon Wia kuorii-la tuon di ba di Abiraham ari Aizik ari Jekob dii kudiilee, ¹² ama nialin fa si maga di ba he Wia kuorii-la le an bi jua, ba jan jonba yuo ta jeen harin di ba he birimin tuon a pina yiyel an didin ba nyilaa.” ¹³ Nii ne Yesu bula pi laali-yuori-hian-la a bul, “Mu dia, η si ŋaa yarida ari wii-la, u jan ŋaa.” Bua-la titia le laali-yuori-hian-la tintinni-la duori.

Yesu vaare niaa yuge

Maak 1.29-34; Luuk 4.38-41

¹⁴ Nii ne Yesu mu Piita dia. U si jua, u na di u hiili-haala pina a wiile, u yaraa kala lin. ¹⁵ Nii ne Yesu digi u nisin le. U yaraa fa si lima nii, u fiela. U sii ŋaa kudiilee piba ba dii. ¹⁶ Didaanin si yie, ba keŋ niaa

yuge a kaa ko Yesu teen. Jinsin ne keŋ niaa doŋsun. Yesu bul wiaa a kiri jin-bomɔ-la ta an vaare nialin kala fa sii wiilu. ¹⁷ U ŋaa wiin deen di wialin Azaaya fa si bula ku ŋaa wutitii. Azaaya fa ŋaa nii-la sii bul wiaa, Wia Din-zon-la dolun le ne. U fa bula a bul,

“U ne laa la nyanyalaa kala a chun a kaa mu ta.”

Nialin si maga di ba to Yesu harin

Luuk 9.57-62

¹⁸ Yesu si na di ni-dan-la ku gollu, u ŋaa ba di u haritooroo chol fuon cholo doŋɔ. ¹⁹ Nii ne Wia tenin kerichi kubala ko u teen a bula pu a bul, “Mi kuhian, mi ŋaa siri di mi to η harin a mu lee-na kala η sii mu ne.” ²⁰ Nii ne Yesu bula pu a bul, “Jollun keŋ buasun ne a jujuu, diibiisin ma keŋ dellin a jujuu, ama mi-na Nuhuobiine Bie bi di-pinin keŋe di mi pina wiesi.” ²¹ Niaa doŋsun ma fa sii to Yesu harin, ba tuon kubala ma bula pu a bul, “Kuhian, len mi laa sipaan mu hugi mi nyimma.” ²² Nii ne Yesu bula pu a bul, “To mi harin an len di suunun huhugi ba titia suunun.”

Yesu ŋaa lii-pelin keŋe

Maak 4.35-41; Luuk 8.22-25

²³ Nii ne Yesu juu liin daboro. U haritooroo to u harin a ma mu juu, ²⁴ di pel-duo kubala suomo a lulu nii a ku nmoo liin. Nii ne lii-pelin to liin daboro-la. Liin daboro-la faa che duu tuu liin bubuon. Ama Yesu fa pin don ne. ²⁵ Nii ne u haritooroo mu chisu a bula pu a bul, “La Tiina, laala ta, laa che di la suu ne.” ²⁶ Nii ne Yesu pieseba a bul, “Bee ne tii fawullun keŋma? Ma yarida bi yuge.” Nii ne u sii kpia pel-la le an bula pi fuo-la maa duu fiela pin, lerin kala guu ŋaa fuii. ²⁷ U ŋaa nuu-kala wu-kpunkpere. Nii ne ba pipiese doŋɔ, “Ni-bee ne nla? Pelin ari lii-pelin kala tuto u niin.”

Yesu kiri jinsin baalaa balia le

Maak 5.1-20; Luuk 8.26-39

28 Nii ne Yesu sii mu tinjee kubala baa yire Gadara. Lee-la fa he fuon cholo ne. Di baalaa balia lii vaamaa tuon a ku chemu. Jinsin ne fa ken baala-la. Ba nyinyaase. Nuukala fa bi wonbii-la wuo to. 29 Ba si na Yesu, ba guu nmoo niin a piesu, "Bee ne n chiche di n naala le Wia Bii? N ko di n dogisela nee, ka bua-la ha bi yiee?" 30 Di toonun ma he lee-la a yuge a gollo didii kiaa. 31 Nii ne jinsi-la sul Yesu a bul, "Di n nii che di n kirila di la lii, len di la mu juu toonun deenba." 32 Nii ne Yesu bula piba a bul, "Ma lii." Nii ne ba lii baala-la le a mu juu toonu-la. Nii ne toonu-la kala sii fa a lii peel-la nyun a tuu tel muga tuon a suu. 33 Toodaara-la fa a juu tan-la tuon a bul wii-la kala si naa a pi niaa ari wii-la si naa baala-la fa si ken jinsin le. 34 Nii ne nuukala si he tan-la le lii a mu duu na Yesu. Ba si mu nau, ba sulu duu lii ba tinteen le.

9

Yesu vaare gberike

Maak 2.1-12; Luuk 5.17-26

1 Nii ne Yesu sii juu liin daboro a miira chol a mu u jan, 2 di niaa chun gberiku kubala si pin u bosonyun a kaa ko Yesu teen. Yesu si na ari ba naau yarida worun, u bula pi gberiku-la a bul, "Si fawullun fa mi bii, mi jon n haacheba chen ne." 3 Nii ne Wia tenin kerichiba-la donsun pipiese don a bul, "Baala deen tuuse Wia jonhoo ne." 4 Ama Yesu jin wii-la ba fa sii biinu a pieseba a bul, "Bee ne tii maa biine wu-bomun deen? 5 Mi si jan bul di mi jon u haacheba cheu ne koo mi si jan bul duu sii a chuoli u bosonyun a viiri, ba tuon kubee ne naa moli? 6 Mi jan dagema ari mi-na Nuhuobiine Bie ken dolun dunia le di mi wuo jon haacheba che niaa." Nii ne u bula pi gberiku-la a bul, "Sii a jon n bosonyun a mu dia." 7 Baal-la guu duori a sii a mu dia. 8 Ni-dan-la si na nii, fawullun kenba. Ba denne

Wia ari u si wuo jon dolun nii a pi nuhuobiinee.

Yesu yire Matiu

Maak 2.13-17; Luuk 5.27-32

9 Yesu si lii lee-la aa ven, u na lanpoo lilaaru kubala baa yire Matiu. U fa hon u tintinni-dia le ne. Nii ne Yesu yiru a bula pu duu sii to u harin. U sii a to u harin.

10 Nii ne Yesu juu Matiu dia, ba di u haritoooro kala, a hono didii kiaa. Lanpoo lilaaraa yuga ari haache diiree ma a ko, ba kala didii kialin. 11 Farisii tinnaa donsun naba a piese Yesu haritoooro a bul, "Bee ne tii ma kuhian ari lanpoo lilaaraa ari haache diiree kala hono didii kiaa?" 12 Yesu nii wii-la ba si bula a miira bula piba a bul, "Nialin si ken yarifilaa, ba bi daalusun ninaara ka che, see nialin sii wiilu. 13 Ma mu a ben Wia tenin tuon a na wii-la ba si nmunsa bubun. Ba nmunsa, 'Wia si, mi cho di ma fifa niaa nennige ne a kii ma si kpu pusun pipimi.'

Mi ko di mi yire haache diiree ne di ba len ba haacheba. Nialin si ken tu-pula mi sipan dee mi ko di mi yire."

Yesu dage nii-vobun wiaa

Maak 2.18-22; Luuk 5.33-39

14 Nii ne Jon Wia lii-foori-la haritoooro ko Yesu teen a piesu a bul, "Bee ne tii la di Farisii tinnaa vuvon niin an ka n haritoooro-na bi niin vovon?" 15 Nii ne Yesu pieseba a bul, "Di nuu ne mu jaa haal kaa ko, ka ba duu nanjonsun hon, u nanjonsu-la tuon jan chei? Ai. Ama chee don ne he dime, ba jan ken baal-la kaa mu lee, an ka di u nanjonsu-la vovon niin."

16 Nii ne u bira mage namaga a piba a bul, "Nuu-kala bi jan jon geripe-falin a kaa to geri-binin. N ne naa nii, n jan chei geri-falin-la. 17 Nii titia ne nuu ma bi jan jon si-huon a he pupoi-kpan le. N ne naa nii, pupoi-la jan yere, di sin-la kala bisa

ta. Si-huonj maga di η jonu he pupoi-zomunj le ne, di sinj-la ari pupoi-la kala zonj.”

Yesu chise Juu tinjaa kuhianj tolo suunj le anj pe vaare haal kubala

Maak 5.21-43; Luuk 8.40-56

¹⁸ Yesu fa sii bul wiaa nii, Juu tinjaa kuhianj kubala ko u teenj a tuu kpirimi u sipaanj anj bula pu a bul, “Mi tolo ne yie suu leele, ama ku jonj η nisinj danj le duu duori.” ¹⁹ Nii ne Yesu to u harinj, ba di u haritooroo kala. ²⁰ Ba sii mu nii, di haal kubala ma he dime. U fa kenj tinj jisinj fii ari balia ne, ka u po u bi dere. Nii ne u ko a bal Yesu harinj a digi u gerinj niipininj le ²¹ anj bul u titia le, “Di mi ne digi u gerinj maa, mi janj duori.” ²² Nii ne Yesu miira daase a nau a bula pu a bul, “Mi tolo, si fawullunj fa, η yarida ne nja η duori.” Haal-la guu duori bua-la titia le.

²³ Nii ne ka Yesu-na juu Juu tinjaa kuhianj-la dia. U jua di yo-daaraa china aa yel. ²⁴ Nii ne Yesu bula piba di nuu-kala lii, di tolo-la bi suba, di u ta pinj donj ne. Nii ne ba kala mumomu. ²⁵ Ama ba si kiri nialinj kala ba lii, Yesu mu juu tolo-la dia a kenj u nisinj le, u sii. ²⁶ Wiinj deenj Yesu si nja, u teeli tinjee-la kala.

Yesu vaare nyulimaa balia

²⁷ Yesu si lii Juu tinjaa kuhianj-la dia-la le aa venj, nii ne nyulimaa balia sii a tuto u harinj anj faasa yire a bula pu a bul, “Yesu, Devit nihinj, fala nennige.” ²⁸ Yesu si mu dia, nyulima-la baliaminj ma to u harinj juu dia-la. Nii ne u pieseba a bul, “Ma nja yarida ari mi janj wuo nja di ma duorii?” Nii ne ba bul, “Oo, la Tiina, la nja yarida.” ²⁹ Nii ne Yesu digi ba siaa le anj bul, “Ma si nja yarida ari nii janj nja, mi janj lenj duu nja.” ³⁰ Nii ne ba siaa suri, ka Yesu bula piba ari siifiesinj a bul, “Ma si wiinj deenj bula pi nuu-kala.” ³¹ Ama ba lii Yesu teenj a bul wii-la kala Yesu si nja a teeli lerinj kala.

Yesu vaare tanj

³² Nyulima-la balia si lii dia-la le Yesu fa si he, niaa kenj baal kubala si bi wiaa wuo bul a kaa ko u teenj. ³³ Nii ne Yesu kiri jima-la baal-la le, baal-la suomo bubul wiaa. U nja nuu-kala wu-kpunjkpere. Nii ne ba bul di ba ha bi wiinj deenj yiri na Iziral le. ³⁴ Ama Farisii tinjaa bul ari jinjinj kuoro ne pu dolunj duu kikiri jinj-bonjoo nii.

Yesu fa niaa nennige.

³⁵ Nii ne Yesu sii golle ta-balaa ari ta-biisinj kala a dage niaa Wii-chuole diisinj le a bul Wia wu-zomola a tige Wia kuorii-la le anj pe vaare niaa nyanyal-yiriba kala. ³⁶ U fa si na ni-danj-la, nennige kala kenu. U na di wiaa ne faa walimeba. Ba bi ba titia le wuo pe, a nage piesee si bi pie-daara kene. ³⁷ Nii ne u bula pi u haritooroo a bul, “Ku-kumaa yuga ne baga le di ba kunj, ama tinjinnaa bi yuge di ba kunj kialinj. ³⁸ Ma saa sul baga-la tiina duu he tinjinnaa yuge di ba tinj tinjimii-la.”

10

Yesu yire u haritooroo fii ari balia
Maak 3.13-19; Luuk 6.12-16

¹ Nii ne Yesu yire u haritooroo fii ari balia a he donj le a piba dolunj di ba wuo kikiri jinjinj anj pe vivaare niaa nyanyal-yiriba kala. ² Nialinj u si liisa yiraa ne nja: Saamonj, ba fa kenu yiyire Piita ma ne, ari u naanbie Anduru, ari Jeems, si nja Zebidii bie, ari Jonj. Jonj fa nja Jeems njaana ne. ³ U bira liise Filip, ari Batolomi, ari Tomas, ari Matiu lanpoo lilaari-la, ari Alifyas bie Jeems, ari Tadiyas, ⁴ ari Saamonj Zelot, ari Judas Isikarot, nii-la si ku nja zenbe tiina a yalle Yesu.

Yesu tinj u haritooroo fii ari balia
Maak 6.7-13; Luuk 9.1-6

⁵ Niaa deenjba fii ari balia, Yesu ne tinjba ba lii. Nja ne u bula piba anj ka ba lii: “Ma si nialinj si bi Juu tinjaa nja tinteenj mu. Ma si Samaria tinteenj ma mu. ⁶ Ama ma

mu Iziral niaa teen, niaa deenba lele nage piesee si lele ne a bira bi dia wenin jin. ⁷ Má mu a bul Wia kuorilla wiaa piba a bul duu kpaga ne. ⁸ Má vaare nyanyal tinnaa a chise suunun a vaare gbejin a kiri jin-bonon niaa le. Ma ne naa nii, ma sí time kala laa, bee wiaa ma ma bi kun-kala time an laa. ⁹ Ma sí moribee ma jonon he ma geri-fesinin le. ¹⁰ Ma ma sí sulli-gbanjin koru a kaa ven wonbii-la a sí gennin tun-bulia koo nentanee tun-bulia laalu, ma sí daantiga ma koru. Di tintinna ne tima, u maga di ba timu ne. ¹¹ Di ma ne mu yi ta-bal koo ta-bie, má juu tan-la tuon a bee che nii-la si jan wuo laama bil a chuchua diibala-la le hali di bua-la ma si jan lii tan-la le yi. ¹² Di ma ne mu juu dia kala, má laa sipaan chuole dia-la niaa a bul, 'Dia deen niaa jan hon ari yarifilaa.' ¹³ Di ba ne laama, ba jan ken yarifilaa. Di ba ne bima laa, yarifila-la jan miira ko ma teen. ¹⁴ Di ma mu nuu-kala teen, duu po di ma sí juu a bi ma wialin ma jegilee nii, má lii dia-la le koo tan-la le a kpesi ma naasin hagila ta. Ba jan jin ari ba naa wii ne a cheima le. ¹⁵ Mi bulaa pima ari sariya che-diilin, Wia jan dogise tan-la niaa a kii bua-la le u si dogise Sodom niaa nii."

Hee-la si jan ko

Maak 13.9-13; Luuk 21.12-17

¹⁶ Nii ne Yesu bira bul, "Má jegilee nii, ma nage pie-biisin ne. Mii tinma di ma guoli gunqurusun tuon. Má saa ken wu-jimin a nage dinnaa si ken wu-jimin nii a len di ma siaa fiele a nage kokosun siaa si fiele nii. ¹⁷ Má ken ma titia worun ni-bonon deenba teen. Ba jan kenma kaa mu nialin si yie hilime vuvuure wiaa teen di ba dii ma sariya. Ba jan viirima Wii-chuole diisin le. ¹⁸ A tin mi wiaa, ba jan kenma kaa mu kuoroo ari tan kuhiasin sipaan di ma dii mi dansia, ba di nialin si bi juu tinnaa naa kala teen. ¹⁹ Di ba ne kenma kaa mu di ba dii ma sariya,

ma sí leje di ma boisin jon wialin ma si jan bul le a laa ma titia. Bua-la le Wia jan jon wu-jimin a he ma nyun le. ²⁰ Wialin ma sí jan bul, ma dee bi jan bul. Ma Nyimma Wia jan len di u Din-zon-la toma le a bul wiaa pima. ²¹ Naanbiirin jan ken donon a kaa mu tia di ba kpu. Nyimmaba ma jan naa nii ba biirin le. Biirin ma jan naa nii a ma kee ba nyimmaba ari ba naanba a kaa mu pa di ba kpu. ²² Nuukala jan berema a tin mi wiaa. Ama nii-la kala si nyalime a mu dere, Wia jan laau ta. ²³ Di ba ní dogisema tan-la le, má lii a fá mu tan donon. Mi bulaa pima ari ma bi jan wuo tin tintimii-la dere Iziral tasin kala le, ka di mina Nuhuobiine Bie-na ko.

²⁴ Sukuuri bie bi u kerichi ka kii, nii-la sí tin tintinna nuu donon teen ma bi yuga kii nii-la teen u sí tin tintimii-la. Tintinna bi u kuhian ka kii. ²⁵ Ama di nii-la ne gunne tintimii-la dere, u maga di ba di nii-la si dagu kala mage donon ne. Di ba ne saa ken dia tiina kaa yire Belizibul, nii-na ba jan he yiri-bonon a pi u dia niaa kala.

Nii-la si maga di la fá

Luuk 12.2-9

²⁶ Nii wiaa, ma sí nuhuobiinee fá. Wii-kala si faa jan ku lii pulumun, niaa ma jan nii wii-la si naa wu-faali. ²⁷ Wii-kala mi si bula pima birimin tuon, u maga di ma bulu pulumun tuon. Wii-kala bira ba si munso bula pima birimin tuon, má heele bulu lusun nyun." ²⁸ Nii ne Yesu bira bul, "Ma sí nialin si jan wuo kpu ma yaaraa fá, niaa deenba bi ma dima wuo kpu. Ama má fá Wia. U ne ken dolun duu wuo jon ma yaraa ari ma dinjin kala a he Wia nyinin tuon. Mi bula pima, má fifáu. ²⁹ Zaarikokobiisin balia dee ba yie jonon yalle kobu koo? Ama ba tuon kubala ma bi jan tel tinteen, see ma Nyimma Wia seye. ³⁰ Wia paala jin ma nyu-punaa kala ma niin ne. ³¹ Nii wiaa, ma sí leje

di fawulluŋ keŋma. Ma ne paala kii zaarikokobiisiŋ a yuge. ³² Nii-la kala si jaŋ wuo bul niaa tuoŋ ari u ŋaa mi nuu ne, mi ma jaŋ bul ŋii a tigeu le mi Nyimma Wia si he Wia-jaŋ le sipaan. ³³ Ama nii-la kala si viami niaa tuoŋ, mi ma jaŋ viau mi Nyimma Wia si he Wia-jaŋ le sipaan.

Yesu si duu bi dunia ko di niaa siŋ, see di ba yuo doŋo.

Luuk 12.51-53; 14.26-27

³⁴ Ma fa biina di mi ko dunia di niaa siŋ nee? Ai, yuosuŋ ne mi kaa ko. ³⁵ Mi ko di niaa pore doŋo le ne. Bie jaŋ keŋ u nyimma di ba yuo doŋo. Tolo ma jaŋ keŋ u naaŋ di ba guraa yuo doŋo. Bii-haala ma jaŋ keŋ u bala naaŋ di ba guraa yuo doŋo. ³⁶ Nuu diŋdoŋoŋo paala jaŋ he u dia-niaa tuoŋ. ³⁷ Nii-la kala si cho u nyimma ari u naaŋ a kiimi, u bi maga duu ŋaa mi haritooru. Nii-la kala ma si cho u bie koo u tolo a kiimi, u bi maga duu ŋaa mi haritooru. ³⁸ Nii-la kala si bi u titia daa-gesee baase a to mi hariŋ, u bi maga duu ŋaa mi haritooru. ³⁹ Nii-la kala sii che u titia miisiŋ, u jaŋ joŋ u miisiŋ ta. Ama nii-la kala si via u miisiŋ ta a tiŋ mi wiaa, u jaŋ keŋ miisiŋ.

Time-la Wia si jaŋ joŋo tiŋla.

Maak 9.41

⁴⁰ Nii-la kala si keŋma woruŋ, u tiina keŋmi ma woruŋ ne. Nii-la ma kala si keŋmi woruŋ, u keŋ Tiina ma si tiŋmi woruŋ ne. ⁴¹ Nii-la kala si laa Wia tiŋtinna doŋo a kenu woruŋ u dia le a tiŋ u si ŋaa Wia tiŋtinna wiaa, u jaŋ laa u time. Time-la Wia si jaŋ joŋo tiŋmu, u jaŋ mage time-la Wia si jaŋ tiŋ u tiŋtinni-la. Nii-la kala ma si laa tuo-pul tiina bil a tiŋ u si ŋaa tuo-pul tiina wiaa, time-la Wia si jaŋ joŋo tiŋmu, u jaŋ mage time-la u si jaŋ joŋo tiŋ tuo-pul tiina-la. ⁴² Nii-la ma kala si ŋaa lii-fiela pi mi haritooro deŋba tuoŋ ku-bie a tiŋ u sii to mi hariŋ wiaa, u tiina ma jaŋ laa u time.”

11

Jooŋ Wia lii-foori-la tiŋ niaa ba ko Yesu teen

Luuk 7.18-35

¹ Yesu si bul wiaa deŋba a pi u haritooro fii ari balia-la deŋe, u lii lee-la a mu duu dage niaa aŋ pe bul Wia wiaa tasi-la si kpage lee-la.

² Jooŋ Wia lii-foori-la fa si he sarika le a nii wialiŋ Kirisito fa sii ŋaa, u tiŋ u haritooro doŋsuŋ Yesu teen ³ di ba mu pieŋe Yesu a bul, “Bula pila, ŋ ne nii-la Jooŋ fa si si u jaŋ ko, koo la haa gberɛ nuu ma doŋ nee?” Nii ne ba mu piesu. ⁴ Ba si pieŋe deŋe, Yesu bula piba a bul, “Ma miira mu Jooŋ teen a bula pu wialiŋ kala ma si na a nii maa. ⁵ Ma bula pu di nyulimaa siaa suri ne, gberikee viven, gbeŋsiŋ ma duduori. Tanŋaa ninii wiaa, nialiŋ si suba sisii suuŋ le. Summo ma wuo ninii Wia wuzoŋo. ⁶ Nialiŋ si bi kaa lere ari mi ne ŋaa nii-la Wia si tima, ba tuoŋ jaŋ toŋe.”

⁷ Nii ne Jooŋ haritooro-la viiri. Nii ne Yesu suomo bul Jooŋ wiaa a pipi ni-dan-la. U pieŋeba, “Ma si mu Jooŋ teen tiŋtee-hilii-la le, bee ne ma fa gberɛ di ma na? Ma mu di ma na yaŋ peliŋ si kaa viviisi nee? Ai. ⁸ Bee ne saa ma lii di ma na? Ma lia di ma na nuu si laale geri-zoŋoŋo nee? Ai. Bee na nialiŋ si yie laale genniŋ deŋba, ba yie juu kuori-diisiŋ ne aa nii sima. ⁹ Ma saa dagemi ku-la ma si mua di ma na. Ma mua di ma na nii-la sii bul wiaa, Wia Diŋ-zoŋ-la doluŋ le nee? Oo, mi jaŋ bula pima ari ma na nuu duu kii nii-la sii bul wiaa, Wia Diŋ-zoŋ-la doluŋ le ne. ¹⁰ U-na Jooŋ wiaa ne ba ŋmuŋsa bil Wia teniŋ tuoŋ a bul di Wia si, ‘Ma jegile nii mi teen, mi jaŋ tiŋ mi tiŋdaara duu laa ŋ sipaan a mu a wase wonbiŋ biliŋ le.’ ”

¹¹ Nii ne Yesu bira bula pi niaa a bul, “Wutitii, mi bulaa pima, Jooŋ, Wia lii-foori-la ne kii nuu-kala ba si lula. Ama nii-la si ŋaa ni-bie Wia kuorii-la tuoŋ, u ne yuga kii Jooŋ.

12 A chin bua-la le Joon si suomo bubul Wia wiaa a kaa kuko tapulun deen, niaa ken Wia kuorii-la wiaa yuyuo donjo ne, nii ne ni-duorun wiwalime di ba kaa loriko laa. 13 Ka di Joon-na ko, nialin fa sii bul wiaa, Wia Din-zon-la dolun le fa bul Wia kuorii-la wiaa ne. Wialin Wia si leje ba nmunsa bil di niaa tuto ma dage nii ne. 14 Di ma ne nnaa yarida, ma sei wialin ba si bula. Joon ne nnaa Ilaaja, nii-la wiaa ba fa si bula duu jan ko. 15 Digilaa tinnaa, ma wuoli ma digilaa a nii wiaa deenba.”

16 Nii ne Yesu bira bul, “Bee ne mi jan ken jinin niaa kaa magise? Ba nage hanbiisin sii gbieli yobo tuon ne. Donsun yie kpia donjo le a bula piba a bul, 17 ‘La yii yiilaa ne pima, an ka ma bi gua, la yel yoho pima, an ka ma bi yel.’ 18 Bua-la le Joon si ko ma teen, uu voo niin ne a bi sinin ma nyua. Nii ne ba si di jin-bon ne kenu. 19 An ka mi-na Nuhuobiine Bie ko ma teen a didii kaa an pe nyunyua sinin maa. Nii ne ba bula pi donjo a bul, ‘Baala deen nnaa luobii tiina ne a nnaa si-nyuaru maa an pe ken lanpoo lilaaraa ari haache diiree kala ma kaa dii nandonsun.’ Nialin si sei wujimii-la si lii Wia teen, ba wu-naalaa daga ari ba sene sei ne.”

Tasi-la si bi Yesu wiaa laa dii
Luuk 10.13-15

20 Tasi-la le Yesu si nnaa wu-magilaa yuge, ba niaa bi u wiaa laa dii, nii wiaa ba bi birima lii ba haacheba le. Nii ne u kpiaba le a bul, 21 “Ma Korazin tinnaa, ma jan na heen. Betisaada tinnaa maa, ma ma jan na heen. Wu-magila-la ba si nnaa ma teen, di ba ne fa nnaaba Taya ari Saadon niaa teen nla, ba fa bi jan dieni an hono telle naasin a nnaa tuorun buga ba titia, a didage nii ari ba birima lii ba haacheba le ne. 22 Mi bulaa pima, sariya che-diilin, Wia jan dogise Korazin ari Betisaada tinnaa a kii Taya ari Saadon tinnaa. 23 Ma-na Kapenam tinnaa, ma ne paala chiche di ma ken ma titia a kaa jil Wia-jan. Wia jan jonma yuo

ta ne di ma tuu juu u nyinin. Wu-magilaa deenba kala mi si nnaa ma teen, di mi fa nnaaba Sodom le ne, ba fa jan he dime a kaa kuko jinin. 24 Mi bulaa pima, sariya che-diilin Wia jan fa Sodom niaa nennige a kii Kapenam niaa.”

Yesu bula pi niaa di ba ko u teen a na wiese

Luuk 10.21-22

25 Bua-la titia le Yesu guu yire, “Mi Nyimma, n ne nnaa wia nyun ari tinteen kala Tiina. Mii lollun ari n si ken wialin n si jonjo faa a dage nialin si bi wiaa jin, an bi jonjo dage nialin si ken wujimin. 26 Mi Nyimma, mii lollun. N titia tuotorun le ne n nnaa nii.” 27 Nii ne u bira bul, “Mi Nyimma jon kun-kala dolun ne pimi. Mi Nyimma dunduja ne jin nii mi si naga. Mi ma dunduja ne jin nii mi Nyimma ma si naga. Nu-kala bira buu jin, see nialin dunduja mi sii cho di mi daga.” 28 Nii ne Yesu bira bula pi niaa, “Ma ko mi teen, ma nialin kala si lolu, an ka wiaa nyagama bil. Mi jan pima wiese. 29 Ma laa mi chuga a chun an gunne mi teen, bee wiaa mi ken mi titia muuri ne, mi siaa ma fiela. Di ma nnaa nii, ma jan na wiese. 30 Chuga-la mi si jan jonjo chunma jan nnaa chugi-moli, u bi yun.”

12

Ba piess Yesu che-wiesii-la wiaa.
Maak 2.23-28; Luuk 6.1-5

1 U bi diene an ka Yesu ari u haritooro sii to nyonso бага tuon che-wiesii-la cheen. Losun fa ken Yesu haritooro. Nii ne ba suomo kiile nyonso-la aa chan. 2 Farisii tinnaa si na wiin deen nii, ba piess Yesu a bul, “N bi naa? Che-wiesii-la kisin ne ba chichei nii.” 3 Nii ne Yesu piessaba a bul, “Ma bi wi-la Devit fa si nnaa karimaa? Losun fa si kenu ba di u harin niaa, 4 u mu juu Wia-dia a jon boroboro-la ba fa si kaa ku bil Wia sipaan a chogo dii, an jonjo pi u harin niaa maa,

ba ma dii. U fa n̄aa kisiŋ n̄e di niwogo dii boroboro-la, see nialiŋ si kpu pusun pipi Wia dunđuŋa. N̄iina u fa bi maga di Devit ari u hariŋ n̄iaa dii kudiile-la. ⁵ Koo ma ha bi wialiŋ Moosis fa si n̄mun̄sa bil di la tuto karimaa? Ch̄e-wiesii-la ch̄een kala nialiŋ si kpu pusun pipi Wia kuhiasin fa yie chei la kisiŋ Wia-dia l̄e. Ama ba fa si n̄aa n̄ii ch̄e-wiesii-la ch̄een, u bi haache n̄aa. ⁶ Mi bulaa pima ari kun̄ n̄e h̄e ma tuon̄ l̄eel̄e a yuga kii Wia-dia. ⁷ Wia teniŋ tuon̄, ba n̄mun̄sa di Wia si, 'Mi cho di ma fifá n̄iaa nennige n̄e a kii ma si kpu pusun pipimi.' Di ma n̄e fa s̄en̄e jin̄ wiin̄ deen̄ bubuon̄, ma fa bi jan̄ jon̄ cheeriŋ pi nialiŋ si bi wii cheye. ⁸ b̄ēe wiaa mi-na Nuhuobiine Bie n̄e n̄aa ch̄e-wiesii-la Tiina n̄ii."

Yesu vaare baal kubala nisin si suba

Maak 3.1-6; Luuk 6.6-11

⁹ N̄ii n̄e Yesu lii lee-la a mu juu Wii-chuol̄e dia, ¹⁰ di baal kubala n̄e n̄ii. U n̄isiŋ suba n̄e. N̄iaa d̄on̄sun̄ ma fa h̄e dime a ch̄iche di ba bul Yesu teen̄ ari u cheye n̄e. N̄ii n̄e ba piesu a bul, "U ken̄ won̄biin̄ n̄e di la vaare nyanyal̄ tin̄n̄aa ch̄e-wiesii-la ch̄een̄ koo?" ¹¹ N̄ii n̄e Yesu pieseba a bul, "Di ma kun̄ n̄e ken̄ piesu duu tel viliŋ l̄e ch̄e-wiesii-la ch̄een̄, n̄ jan̄ liisu koo n̄ jan̄ len̄u dime duu suu? Ma jan̄ liise. ¹² Nuhuobiine n̄e paala kii piese. Di la n̄e saa n̄aa wu-zon̄n̄oo ch̄e-wiesii-la ch̄een̄, la bi ch̄e-wiesii-la kisiŋ-la cheye." ¹³ N̄ii n̄e u bula pi na-suu-la tiina a bul, "Ken̄ n̄ n̄isiŋ tīen̄e." U kaa tīen̄e. U fiela a nage u nisi-la d̄on̄o. ¹⁴ N̄ii n̄e Farisii tin̄n̄aa lii lee-la a mu vuure n̄ii ba si jan̄ n̄aa a kpu Yesu.

Yesu bul wiaa a tige u titia l̄e

¹⁵ Yesu si n̄ia di ba vuure di ba kpuu n̄ii, u lii lee-la. Ni-dan̄ to u hariŋ. N̄ii n̄e u vaare nialiŋ fa s̄ii wiilu kala ¹⁶ an̄ bula piba di ba sí len̄ di wiin̄ deen̄ teeli leriŋ kala. ¹⁷ U n̄aa wiin̄ deen̄ di wialiŋ Azaaya fa si bula

ku n̄aa wutitii. Azaaya fa n̄aa nii-la s̄ii bul wiaa, Wia Diŋ-zon̄-la dolun̄ l̄e n̄e. ¹⁸ U fa si,

"Mi Tin̄tinna n̄e n̄la, nii-la mi si liisa, nii-la mi si cho, mi tuon̄ t̄ore u nyun̄.

Mi jan̄ jon̄ mi Diŋ-zon̄-la h̄eu l̄e.

U jan̄ bul mi sariya diiniŋ wiaa a pi dunia n̄iaa kala.

¹⁹ U bi jan̄ kaa lere, u bi jan̄ kpia gon̄ maa.

U bi jan̄ n̄in̄aa gon̄ won̄biee l̄e di n̄iaa ninii.

²⁰ U siaa jan̄ fīel̄e nialiŋ si n̄aa puwuoloo teen̄,

a ken̄ zile ni-pugunun̄ ma teen̄.

U jan̄ pese halii, see wutitii-la Wia s̄ii ch̄e yuo dii leriŋ kala.

²¹ U l̄e n̄e dunia n̄iaa kala jan̄ jon̄ ba yiela h̄e."

Yesu ari Belizibul

Maak 3.20-30; Luuk 11.14-23

²² N̄ii n̄e n̄iaa d̄on̄sun̄ ken̄ baal kubala kaa k̄o Yesu teen̄. J̄insiŋ n̄e fa ken̄ baal-la. U fa nyulima an̄ p̄e tan̄. Yesu vaare baal-la. N̄ii n̄e u wuo wiaa bubul an̄ nina maa. ²³ Yesu si n̄aa n̄ii, u fa n̄aa ni-dan̄-la kala wu-kpun̄kpere. N̄ii n̄e ba pipies̄e d̄on̄o a bul, "Devit bie n̄e n̄laa?" ²⁴ Farisii tin̄n̄aa fa si nii n̄ii, ba bul, di jin̄siŋ kuoro Belizibul n̄e pu dolun̄, n̄ii n̄e tii u wuo kikiri jin̄siŋ n̄ii. ²⁵ Yesu wuo jin̄ ba tuobiinaa a bula piba a bul, "Di tan̄ n̄iaa n̄e h̄e dime a bi nii-bala ken̄e, ba tan̄-la jan̄ tel. Di jan̄ n̄iaa koo naan̄biiriŋ ma n̄e bi nii-bala ken̄e, ba dia jan̄ tel. ²⁶ N̄ii n̄e di Sitaani kiri Sitaani, u ma tan̄ bi jan̄ wuo chin̄." ²⁷ N̄ii n̄e Yesu bira pieseba a bul, "Di Belizibul n̄e pimi dolun̄ mi kaa kiri jin̄-bon̄n̄oo n̄iaa l̄e, kub̄ēe n̄e saa jon̄ dolun̄ pi n̄iaa deen̄ba s̄ii to ma hariŋ ba ma kikiri jin̄-bon̄n̄oo n̄iaa l̄e? N̄iaa deen̄ba titia daga ari maa nyia n̄e. Ba jima ari Sitaani bi u titia wuo guraa yuo. ²⁸ Wia dolun̄ n̄e mi kaa kiri jin̄-bon̄n̄oo n̄iaa l̄e. Wiin̄ deen̄ n̄e daga ari Wia kuorii-la paala k̄o ma teen̄ n̄e. ²⁹ Nuu tuo si jan̄ juu ni-duon̄ dia a gaa u kiaa, see duu ken̄ ni-duo-la

vɔɔ, aŋ-na juu paa u kiaa. ³⁰ Nuu-kala si bi mi nuu ŋaa, u lii mi hariŋ ne. Nii-la kala si bi mi le pe di la kiri kiaa hihɛ dɔŋɔ le, u kaa pisa tita ne. ³¹ Mi bulaa pima ari Wia jaŋ jaŋ niaa haacheba ari wu-bɔmɔ-la ba sii bul a cheba, ama nii-la kala si tuuse Wia Diŋ-zɔŋ-la joŋŋoo, Wia bi jaŋ joŋo che u tiina. ³² Nii-la kala si bul wu-bɔŋŋɔɔ a mu tige mi-na Nuhuobiine Bie le, Wia jaŋ joŋo cheu, ama nii-la kala si tuuse Wia Diŋ-zɔŋ-la joŋŋoo, Wia bi jaŋ joŋo che u tiina lele a kaa mu wuu.”

Tia ari u nenɛɛ.

Luuk 6.43-45

³³ Nii ne Yesu bira bul, “Di ŋ nii che tia neŋ neŋ-zɔŋŋɔɔ, see di ŋ keŋ tia-la si keŋ yarifiɛlaa. Di ŋ ne keŋ tia-la si bi yarifiɛlaa keŋɛ, see duu nineŋ neŋ-lɔrunuŋ. Tia-la nenɛɛ ne yie dage tia-la yiri u si ŋaa. ³⁴ Ma ni-bɔŋŋɔɔ deenba, di ma ne bɔmɔ, ɛɛ ne ma jaŋ wuo ŋaa a bubul wu-zɔŋŋɔɔ? N tuobiinaa si keŋ wii-la ne, u ne ŋ niin bubul. ³⁵ Ni-zɔmun keŋ tuobiin-zɔŋŋɔɔ ne aa ŋaa wu-zɔmɔ-la u sii biinu. Ni-bɔmun ma keŋ tuobiin-bɔŋŋɔɔ a maa ŋaa wu-bɔmɔ-la u sii biinu u tuɔŋ le. ³⁶ Mi bulaa pima ari sariya che-diilin nuu-kala paala jaŋ dage wu-bɔmɔ-la u niin si bula. ³⁷ Wialin titia ma si bula ne jaŋ dii ma sariya a dage di ma keŋ tuɔ-pulaa koo ma bi tuɔ-pulaa keŋɛ.”

Nialin che di Yesu ŋaa wu-magilaa
Maak 8.11-12; Luuk 11.29-32

³⁸ Nii ne Wia tenin kerichiba dɔŋsun ari Farisii tinŋaa dɔŋsun ma ko Yesu teen a bula pu a bul, “La kuhian, laa che di ŋ ŋaa wu-magil ne di la na.” ³⁹ Nii ne Yesu bul, “Jinin niaa ŋaa ni-bɔmɔ ne, ba bi Wia ka fá. Ma si di mi ŋaa wu-magilin. Ai, mi bi ŋaa. Wu-magilin ma sii che, ma bi jaŋ wuo nau, see wu-magil-la Wia fa si ŋaa a tige Jona le. ⁴⁰ Jona fa si he chenfilibal-la tuɔŋ tapulaa batori wiiheye ari titanin kala, nii titia ne mi-na Nuhuobiine Bie ma jaŋ he vaamin tuɔŋ tapulaa batori,

wiiheye ari titanin kala. ⁴¹ Sariya che-diilin, Ninive niaa ma jaŋ sii a joŋ cheerin pima woruŋ. Buala le Jona ma fa si mu bul Wia wiaa pi Ninive niaa, ba birima lii ba haacheba le ne a to Wia. Mi jaŋ bula pima ari nuu ne he ma tuɔŋ a yuga kii Jona, ka ma bi sei di ma jegile nii u wiaa.”

⁴² Nii ne Yesu bira bul, “Haal kubala ne fa he dime. U dii kuoruŋ tintee kubala le baa yire Siiba. U sii lii u jaŋ le a mu di-bolii duu jegile nii kuoru kubala wu-jimin. U yirin ne fa Solomɔŋ. U fa keŋ wu-jimin kinkeŋ kinkeŋ. Sariya che-diilin haal-la jaŋ sii a joŋ cheerin a pi jinin niaa woruŋ. Mi jaŋ bula pima ari nuu ne he ma tuɔŋ, u yuga kii Solomɔŋ, ka ma bi sei di ma jegile nii u wiaa.”

Yesu bul wiaa a tige jin-bɔŋŋɔɔ le
Luuk 11.24-26

⁴³ Nii ne Yesu bira bula pi niaa a bul, “Di jin-bɔŋ ne lii nuu le, u yie gollo tintee-hilin le ne a chiche di-wiesin, aŋ bi na. ⁴⁴ U si bi lee na nii, u yie bul u titia le a bul, ‘Mi jaŋ miira mu lee-la mi si lia.’ U jaŋ miira mumu, di disinin tuo dia-la le, ba wase u kala zɔŋ. ⁴⁵ Nii ne u jaŋ miira lii a keŋ jin-bɔŋŋɔɔ balipe, kialin si bɔmɔ kiiu, ba ma ku juu a peu le. Nii hariŋ le ne baal-la yie kperi a kii bunbun-la. Nii titia ne u ma jaŋ ŋaa ma jinin ni-bɔŋŋɔɔ deenba le.”

Yesu bul wiaa a tige u naan ari u naanbiirin le

Maak 3.31-35; Luuk 8.19-21

⁴⁶ Yesu fa si bul wiaa pipi nialin nii, u naan ari u ŋaanaa ko u teen a ku chin jeen hariŋ a chiche di ba nau. [⁴⁷ Nii ne nuu bula pu a bul, “Bee na, ŋ naan ari ŋ ŋaanaa ne chin jeen hariŋ a chiche di ba nan.” ⁴⁸ Nii ne Yesu miira pieseba a bul, “Kubeɛ ne ŋaa mi naan ari mi ŋaanaa?”] ⁴⁹ Nii ne u liise u nisin a dage u haritooro aŋ bul, “Mi naan ari mi naanbiirin ne ŋla: ⁵⁰ Nii-la kala si ŋaa wii-la mi Nyimma Wia

si he Wia-jaŋ le si cho, u ne ŋaa mi ŋaana ari mi dihaala ari mi naaŋ.”

13

Yesu mage namaga a tige baal-la si duu kiaa le

Maak 4.1-9; Luuk 8.4-8

¹ Tapulii-la titia Yesu lii dia-la le ba di u haritooroo fa si hɔnɔ, a sii mu mugi-baliŋ niin a hɔŋ dime duu dage niaa. ²⁻³ Niaa yuge a ku gollu chu. Ba si yuga nii, u sii mu juu liin daboro tuɔŋ a hɔŋ liin tuɔŋ, ka ni-dan-la chin muga niin. Nii ne u mage namagaba a dageba wiaa yuge. U namagaba-la dɔŋɔ ne ŋla: Yesu si, “Baal kubala ne sie a keŋ u ku-doho kaa lii duu mise. ⁴ U sii mise nii, ku-doho-la dɔŋsun tel wonbiin tuɔŋ. Diibiisin ku tuɔsa dii. ⁵ Dɔŋsun ma tuu tel kpaginyilin nyun. Hagila si bi yuge nii, ka ba guu nyu. ⁶ Ba naapoloo bi tinteen jua. Wia pɔse a kpuba, ba suu, beɛ wiaa ba naapoloo bi tinteen jua. ⁷ Ku-doho-la dɔŋsun ma tel sɔsun tuɔŋ. Ba nyu, sɔsula ma nyu a nyaga kpu. Ba bi wasa. ⁸ Ama ku-doho-la dɔŋsun ma lii tel tintee-zɔmun le a nyu a waa a wase worun. Dɔŋsun he bieɛ zɔɔ zɔɔ, dɔŋsun ma mahin batori batori, dɔŋsun ma mara ari fii fii.” ⁹ Yesu si mage namaga-la dere, nii ne u bul, “Digilaa tinŋaa, má wuoli ma digilaa a nii wiaa deenba.”

Yesu dage u haritooroo wii-la si tii u yie mimage namagaba

Maak 4.10-12; Luuk 8.9-10

¹⁰ Nii ne Yesu haritooroo ko u teen a piesu a bul, “Beɛ ne tii ŋ yie keŋ namagaba a didage niaa?” ¹¹ Nii ne Yesu bula piba a bul, “Ma niaa deenba ne Wia dage u kuorii-la wiaa bubuɔŋ pa, wialin fa si faa, ama ni-dan kala dee. ¹² Nii-la kala si to Wia niin wiaa, Wia jaŋ faasa peu le worun. Nii-la ma si bi Wia niin wiaa ka to, Wia bi jaŋ peu le. U si peu le mua-la maa, u jaŋ laa u kua. ¹³ Wii-la si tii mi yie mimage namagaba ne ŋla: Ba yie nyilimi nyilimi ne an bi

kuŋ-kala wuo na, a jjegili wiaa an bi wii-kala ka nii an bi wialin bubuɔŋ ma wuo jin. ¹⁴ Wia si to Azaaya le a bul wialin, ba wiaa ne u bul nii. Ba ku ŋaa wutitii. Azaaya fa ŋaa nii-la sii bul wiaa, Wia Din-zɔŋ-la dolun le ne. U fa bula a bul,

‘Niaa deenba jaŋ jegili jegili wiaa an bi wii-kala bubuɔŋ wuo jin, ba jaŋ nyilimi nyilimi an bi kuŋ-kala wuo na,

¹⁵ beɛ wiaa ba bi wu-jimin keɛ Wia teen, ba via Wia niin wiaa ne, ba to ba digilaa ma ne di ba si wii-kala nii a keŋ ba siaa ma to di ba si kuŋ-kala na.

Wia si di nii dee, ba fa jaŋ nina, ba digilaa ma fa ninii wiaa.

Ba fa jaŋ jin wiaa bubuɔŋ a birima ko mi teen di mi vaareba.’

¹⁶ Ma-na, ma tuɔŋ tɔɔ ari ma wuo nina wialin kala ma sii na a wuo nii wialin maa. ¹⁷ Mi bulaa pima ari nialin fa sii bul wiaa, Wia Din-zɔŋ-la dolun le, ari nialin dɔŋsun fa sii to Wia, ba yuga a cho di ba nina wialin ma sii na an bi wuo na, a ma fa cho di baa nii wialin ma sii nii, an ka ba bi wuo nii.

Yesu dage ku-duuro namaga-la bubuɔŋ

Maak 4.13-20; Luuk 8.11-15

¹⁸ Má jegili a nii ku-duuro namaga-la bubuɔŋ. ¹⁹ Nialin si yie nii Wia niin wialin a mu tige Wia kuorii-la le an bi ba bubuɔŋ jin, ba nage ku-doho-la si tel wonbiin le ne. Sitaani yie guu ko a keŋ wialin a liiri ba tuɔsaa le. ²⁰ Kialin ma si tel kpaginyilin nyun ma ne ŋaa nialin si yie guu a laa Wia niin wialin dii ari tuɔtorun. ²¹ Ama ba bi boye kene a nage naapoloo si bi tinteen jua. Ba jaŋ sei wii-la a tou mu mage nii. Di heɛŋ ne juuba, koo di ba to naasin dudɔgiseba a tin wii-la wiaa, ba tuɔŋ guu lii wii-la le. Ba joŋo ta. ²² Kialin si tel sɔsun tuɔŋ ma ne ŋaa nialin si yie nii Wia niin wialin, ama dunia kiaa wiaa walimeba, ba cho di ba jigi aa che kuŋ-kala. A

tinj wiaa deenba, ba bi sei di ba to wialinj. Wialinj bi doho kene ba teenj. ²³ Kialinj si tel tinjee-zomunj le ma ne nja nialinj si yie nii Wia niinj wialinj a jinj ba bubuonj, wialinj kenj doho kinkenj kinkenj ba teenj, donsun nej zolo zolo, donsun mahinj batori batori, donsun ma mara ari fii fii.”

Yesu mage namaga a tige baga si kenj yanj le.

²⁴ Nii ne Yesu bira mage namaga donjo a piba a bul, “Wia kuorii-la nage baala si sie ne a duu miirinj u baga le. ²⁵ Titanj kubala niaa kala si pinj donj, u dinjomonj kenj yanj kaa mu duu he baga-la le anj viiri. ²⁶ Miiri-la si suomo nyu a ninenj, yanj-la ma nyu. ²⁷ Nii ne baal-la tintinnaa mu a na baga-la a miira ku bula pi baal-la a bul, ‘La kuhianj, nj duu ku-zonjonj ne nj baga-la le, ka nii ne yanj-la ma nyu baga-la le?’ ²⁸ Nii ne ba kuhianj-la bula piba a bul, ‘U naga ari mi dinjonj ne nja njii.’ Nii ne u tintinna-la piesu a bul, ‘Nj che di la mu a churi yanj-la ta nee?’ ²⁹ Nii ne baal-la bul, ‘Ai, ma lenj di miiri-la bii. Di ma ne mua di ma churi yanj-la leele, ma janj pe churi miiri-la donsun ma ta. ³⁰ Di miiri-la ne bia, mi janj lenj di nialinj sii mu baga di ba laa sipaanj churi yanj-la a voo a nyige, an-na kunj miiri-la kaa ku he mi vire le.’ ”

Yesu mage namaga a mu tige ku-doho kubala baa yire masitad le

Maak 4.30-32; Luuk 13.18-19

³¹ Nii ne Yesu bira mage namaga donjo a bul di Wia kuorii-la nage baal kubala ne si jonj ku-doho kubala baa yire masitad a duu u baga le. ³² Ku-doho-la bi wii maga. U ne muuro kii ku-doho-na kala si he dime. Ama duu ne nyua, u yie waa a birime tia ne a yuga kii baga ku-duuloo kala kala. Nii ne diibiisinj yie sageu le a sua ba dellinj u naakelee le.

Yesu mage namaga a mu tige si-burunj le

Luuk 13.20-21

³³ Yesu bira mage namaga donjo a piba a bul, “Wia kuorii-la nage si-burunj ne ba si kaa hihe mununj le. Haala jonj mununj a he tasi-gbanja tuonj a jonj si-burunj a kaa kuosi. U dieni mua, ka munj-la sii puora su tasi-gbanja-la kala.”

Yesu dage niaa namagaba

Maak 4.33-34

³⁴ Di Yesu ne fa bul wii-kala pipi ni-danj-la, namaga ne u yie mage. U bi janj bul wii di u bi namaga maga. ³⁵ U nja njii di wialinj nuu fa si bula, Wia Dinj-zonj-la dolunj le, ku nja wutitii ne. U fa si, “Di mi ne bul wiaa pipi niaa, mi janj mage namagaba, mi janj bul wialinj si nja wu-faalaa a chinj dunia di-suomunj a piba.”

Yesu dage namaga-la u si maga a tige yanj le bubuonj

³⁶ Yesu si ta ni-danj-la, ba viiri, ka u sii juu dia. Nii ne u haritooroo ko u teenj a piesu a bul, “Dagela namaga-la nj si maga a tige baga yanj le bubuonj.” ³⁷ Nii ne Yesu bul, “Nii-la si duu miiri-la ne nja mi-na Nuhuobiine Bie. ³⁸ Baga-la le u si duu miiri-la, u ne nja dunia. Miiri-la ma ne nja nialinj si janj juu Wia kuorii-la tuonj. Yanj-la ma si nyu baga-la le ne nja Sitaani niaa. ³⁹ Dinjonj-la si duu yanj-la ne nja Sitaani. Miiri-la ma kumunj ne nja dunia diderinj. Nialinj ma si kunj miiri-la ne nja Wia tinjaaraa. ⁴⁰ Nii ba si hiesi yanj-la a nyige, njii titia ne janj nja dunia diderinj. ⁴¹ Mi-na Nuhuobiine Bie, mi janj tinj mi tinjaaraa di ba juu Wia kuorii-la tuonj a tuose nialinj si nja haache tinjaa, ari nialinj kala si nja wu-bonjonj ⁴² a jonj yuo a he Wia nyininj tuonj. Lee-la ne ba janj yel anj pe didinj ba nyilaa. ⁴³ Ka di tuopul tinjaa tutul ari wii-posunj sii tul nii la Nyimma Wia kuorii-la tuonj. Digilaa tinjaa, ma wuoli ma digilaa a nii wiaa deenba.”

Baal-la si pere baga a mol kiaa

44 Yesu bira bul, “Wia kuorii-la nage ɲla ne: Baal kubala ne mu a pipere бага a na di selime he бага-la le. U si na selime-la, u gbaa to, u tuon kala faasa tɔre kinkeɲ. Nii ne u mu yalle u kiaa kala a keɲ moribie-la a kaa mu yoo бага-la.”

Yesu bira mage namaga a mu tige busiin le

45 Yesu bira si di Wia kuorii-la nage bayala si mua di u yoo busiaa ne. 46 U si na donɔ duu faasa zon kinkeɲ, u miira mu jon u kiaa kala u si kene a yalle a yoo busii-la.

Yesu mage namaga a tige jon le

47 Yesu bira si di Wia kuorii-la nage jon ne, ba si jonɔ yuo he mugibalin tuon. U kese cheɲfili-yiriba kala. 48 Di cheɲfilee ne suo, cheɲfili-kpuura-la yie kaa lere lii mugibalin niin ne a tuose cheɲfilie-la. Ba yie tuose ku-zonɲoo he ba kiaa le an jon kialin si bi zon a yuo ta. 49 ɲla ne saa u jan nage dunia diderin. Wia tinɲaaraa jan lii a tuose ni-bonɲoo ni-zonɲoo tuon 50 a jonba yuo he Wia nyinin le. Dime ne ba jan yel an didin ba nyilaa.

Yesu mage namaga a tige baal-la si keɲ kiaa u vire le

51 Nii ne Yesu piɛse u haritooro a bul, “Ma jin wiaa deenba kala bubuon neɛ?” Nii ne ba si, “Oo.” 52 Nii ne Yesu bula piba a bul, “Wiin deen daga ari nii-la kala si gunne Wia tenin worun a ku ɲaa Yesu haritooro a ɲaa siri duu juu Wia kuorii-la tuon, u tiina nage dia tiina si yie chaare mii-binaa ari mii-falaa ne u vire le.”

*Ba via Yesu Nazaret le
Maak 6.1-6; Luuk 4.16-30*

53 Yesu si mage namaga deenba dere, u sii Kapenam le 54 a miira mu Nazaret. Nii ne u mu dage niaa Wii-chuole dia le. Nialin kala si nii wialin u si bula, ba hiriki. Nii ne ba pipiɛse donɔ, “Nii ne baala deen na wu-jimin deen ari wu-duoron deenba kala ɲaanin? 55 Josef,

kapinta-la bie dee nii? Meeri dee bi u naan ɲaa? Jeems ari Josef ari Saamon ari Judas u naanbiirin dee nii? 56 Ba di u dihaalaa kala dee daha nii? Nii le ne saa u na wiaa deenba kala?” 57 Nii ne ba na baanin u nyun. Nii ne Yesu bula piba a bul, “Nii-la sii bul wiaa, Wia Din-zon-la dolun le, duu ne mu lee-kala, ba yie zizilu ne, an ka u jan-niaa siin buu ka su.” 58 A tin ba si bi yarida kene wiaa, u bi wu-duoron wuo ɲaa yuge lee-la.

14

*Joon Wia lii-foori-la suba
Maak 6.14-29; Luuk 9.7-9*

1 Bua-la le ne Galilii kuoro Herod nii Yesu wiaa. 2 U bula pi u nanzooba ari Joon Wia lii-foori-la ne nii. Wia ne chisu suun le, nii ne tii u keɲ dolun a wuo ɲinɲaa wu-magilaa deenba. 3 Herod-la fa sie a mu jaa haal kubala. U yirin ne Herodias. U fa ɲaa u ɲaana Filip haala ne. U laa jaa. 4 Nii ne Joon bula pi Herod a bul, “N si keɲ ɲ ɲaana haala laa jaa nii, u bi wonbiin ɲaa.” 5 Nii ne Herod faa che duu kpu Joon, ama u faa fa Juu tinɲaa ne. Nii wiaa u ɲaa ba kenu to dia. Juu tinɲaa fa si di Joon ɲaa nii-la sii bul wiaa, Wia Din-zon-la dolun le ne. 6 Nii ne Herod che-lullun tapulun bira yi. U yire u niaa di ba ku gbieli. Herodias tolo ma ko a gua ba kala sipaan, Herod ben a chou. 7 Nii ne u bula pi tolo-la a bul, “Mi ɲmiesa, mi jan pin kun-kala ɲ sii che.” 8 Nii ne tolo-la mu bul wiin deen a pi u naan an piɛsu, “Mi bul di mii che beɛ kun ne?” Nii ne u naan bula pu duu bul duu che duu keri Joon Wia lii-foori-la nyun a he pirata le ne a pu. Tolo-la bul nii. 9 Kuoro si nii wii-la, u tuon kala chei. Ama u si ɲmiesa nii, niaa kala nii. Nii ne u bul di ba ɲaa nii tolo-la sii che. 10 U ɲaa ba mu keri Joon nyun sarika le, 11 a he pirata le a kaa ku pi tolo-la. Nii ne u laa a kaa mu pi u naan. 12 Joon haritooro-la si nii

wii-la, ba sii ku laa u ku-suun a kaa mu hugi. Nii ne ba mu bula pi Yesu wialin si naa.

Yesu pi niaa bui banon kudiilee
Maak 6.30-44; Luuk 9.10-17; Joon 6.1-14

¹³ Yesu si nii Joon wiaa, u sii lee-la u fa si he a juu liin daboro a mumu niaa si tuo lee-la, u dunduja. Ama niaa nii Yesu wiaa a lii ba jan le a ven naasin le a kiri u harin. ¹⁴ Yesu si mu lii liin daboro-la le, u na nidan di ba hono gberu. Nennige kala kenu. Nii ne u vaare nialin sii wiilu. ¹⁵ Didaanin ku yi, u haritooro ko u teen a bula pu a bul, "Tan bire ne. Lerin deen naa girin ne. Ta nialin di ba mu tasi-la si kpage daha a yoo kudiilee a dii." ¹⁶ Nii ne Yesu bul, "Ma si leje di ba viiri. Mana mu che kudiilee piba di ba dii." ¹⁷ Nii ne u haritooro-la bul, "Ku-la kala la si kene ne boroboroba banon ari chenfilee balia." ¹⁸ Nii ne Yesu bul, "Ma kaa ko pimi." ¹⁹ U naa nialin tuu hon yan nyun. Nii ne u laa boroboroba banon-la ari chenfilie-la balia a wula ben wia nyun an lolle Wia an kaa choge choge a pi u haritooro. U haritooro laa kpa nialin. ²⁰ Nu-kala dii a voge. Ka u haritooro-la paa ku-kaan-biisin a su sinjin fii ari balia. ²¹ Nialin fa si dii boroboro-la, ba tuon baalaa fa naa bui banon ne.

Yesu ven liin nyun
Maak 6.45-52; Joon 6.15-21

²² Nii ne Yesu len u haritooro laa sipaan mu juu liin daboro a duoro chol muga cholo, an ka duu ta nidan-la di ba viiri. ²³ U si ta nidan-la ba viiri, u mu jil peelin nyun duu chole Wia. Nii ne wia tuu juu, duu dunduja ne ha he peel-la nyun. ²⁴ Bua-la le di liin daboro-la yi liin tutubaanin. Lii-pelin kaa viviisi, ba fa chaase pel-la ne. ²⁵ Siipuraa, Yesu sii ven liin nyun a mumu u haritooro-la teen. ²⁶ Ba si nau duu ven liin nyun, fawullun kenba. Ba bul di ni-dima ne. Fawullun si kenba

nii, ba nmunmoo niin. ²⁷ Nii ne Yesu guu bula piba a bul, "Ma nyire ma boye. Mi-na ne. Ma si leje di fawullun kenma."

²⁸ Nii ne Piita bul, "Mi Tiina, di n ne, bul di mi lii ko n teen lii-la nyun." ²⁹ Nii ne Yesu bul duu ko. U si bul nii, Piita lii liin daboro-la tuon a ven liin nyun aa mu Yesu teen. ³⁰ Ama Piita si bee na lii-pel-la, fawullun kenu. U suomo tutuu lii-la bubuon. Nii ne u faasa nmoo niin a bul, "Mi Tiina, laami ta." ³¹ Yesu guu liise u nisin a yia a kenu an bula pu, "N yarida bi yuge. Bee ne tii n bi mi wiaa laa dii?" ³² Ba si mu juu liin daboro-la dere, pel-la kere. ³³ Nialin kala si he liin daboro-la tuon tuu kpirimi a chole Yesu an bul, "Wutitii, n ne naa Wia Bie."

Yesu vaare nyanyal tiina
Genezet le
Maak 6.53-56

³⁴ Nii ne ba chol a ku yi tan kubala baa yire Genezet. ³⁵ Nii ne nialin si he lee-la yie jin Yesu. Nii ne ba mu paa ba nyanyal tinjaa kala si he tasi-la si golli Genezet a kaa ko Yesu teen. ³⁶ Ba sulu duu len di nialin sii wiilu digi u gerin niipinin le. Di ba ne dige, ba yie duori.

15

Yesu bul wiaa a tige niaa naabalimaba wonbin le
Maak 7.1-13

¹ Nii ne Farisii tinjaa donsun ari Wia tenin kerichiba lii Jerusalem a ko Yesu teen a piesu a bul, ² "Bee ne tii n haritooro chichei la naabalimaba kisinnin le? Bee ne tii ba bi ba nisaa ka son nii la naabalimaba si dagela an didii kudiilee?" ³ Nii ne Yesu ma pieseba a bul, "Bee ne tii ma yie via Wia wonbin an tuto ma naabalimaba wonbin?" ⁴ Wia bula di ma fifa ma nyimmaba ari ma naanba, a bira bul di nuu ne sii a bul wu-bon a tige u nyimma ari u naan le, di ba kpu tiina. ⁵ Ama ma-na daga ari nuu ne ken kun a mage duu jonon

pe u nyimma koo u naanɔ ɛ, tiina mu a bula piba duu jan jon ku-la pi Wia. ⁶ U si ɔaa ɔii, u bira bi maga duu pe u nyimma ari u naanɔ ɛ. A tinɔ ɔii wiaa, ma via Wia niin wiaa an to ma naabalimaba wonɔbiin ɛ. ⁷ Ma ɔaa kanfugi timma ɛ. Azaaya kiaa sima ɛ, wialin u si bula a tigema ɛ. Azaaya fa ɔaa nii-la sii bul wiaa, Wia Din-zon-la dolun ɛ ɛ. ⁸ U fa si, 'Wia si, niaa deenba ken niin ɛ a pipimi zile, ka ba tuon liimi.

⁹ Ba yie chuɔlemi pei ɛ aa dage nuhuobiine wenin an bul di Wia ɛ bula. Nuhuobiine wenin ɛ baa to an via Wia niin wiaa.' "

Kialin si yie ɔaa nuhuobiine ken disinnin

Maak 7.14-23

¹⁰ Nii ɛ Yesu yire niaa ba ko. U bula piba a bul, "Ma jegile nii worun. ¹¹ U bi naga ku-la si yie to nuhuobiine niin tuu ɛ yie ɔaa u ken disinnin, ama ku-la si yie to u niin lii ɛ ken disinnin." ¹² Nii ɛ Yesu haritooro ko u teen a bula pu a bul, "N jima ari n chei Farisii timma-la tuon ɛ n si bul nii?" ¹³ Nii ɛ u bula piba a bul, "Tiala kala mi Nyimma si he Wia-jan si yie bi chonso, ba jan kaa churo ta. ¹⁴ Ma si leɔe di ba wiaa wiima, ba ɔaa nyulimaa ɛ a laa nyulimaa sipaan. Di nyulima ɛ saa ken u nyulun donɔ daan ɛ, ba kala balia jan tuu buoton." ¹⁵ Nii ɛ Piita bul, "Dagela namaga-la bubuon." ¹⁶ Nii ɛ Yesu bul, "Ma ma ha bi wu-jimin kenɛ? ¹⁷ Ma bi wiin deen bubuon jin? Kun-na kala si juu nuhuobiine niin, u yie juu u luorun ɛ a bira to u yaraa lii. ¹⁸ Ama wialin si yie to n niin lii, ba yie lii n tuon ɛ ɛ. Wiaa deenba ɛ yie ɔaa niaa ken disinnin. ¹⁹ N tuon ɛ ɛ n yie biine wu-bonɔon ɔaanin a mu kpu niaa, a mu che niaa haalaa, a ɔaa bachorun ari ha-chorun wu-ɔaalaa, aa gaa, aa nyia wiaa a tige niaa ɛ, a

chichei niaa yirin. ²⁰ Wiaa deenba ɛ yie ɔaa niaa ken disinnin. Ama di nuu ɛ dii kiaa an bi u nisin somo ari ma naabalimaba si dage ɔii, ɔii bi jan wuo ɔaa di tiina ken disinnin."

Yesu vaare Keenan tiina

Maak 7.24-30

²¹ Nii ɛ Yesu sii lee-la a mu Taya ari Saadon tinteen. ²² Di haal kubala si he lee-la ko u teen. U fa ɔaa Keenan tiina ɛ. U si ko u teen, ɔii ɛ u bul, "Mi Tiina Devit bii, fami nennige. Jinsin ɛ ken mi tolo. U nina heen worun." ²³ Ama Yesu bi wii-kala bula u teen. Nii ɛ u haritooro ko u teen a bula pu duu len di haal-la viiri, di u to ba harin a ɔinaa gon ɛ. ²⁴ Nii ɛ Yesu bula piba a bul, "Wia tinmi di mi ko che keɛe piese-la si lele ɛ Iziral tinnaa dunɔun ɛ ɔii." ²⁵ Nii ɛ haal-la ku tel u naasin ɛ an bul, "Mi Tiina, pemi ɛ." ²⁶ Nii ɛ Yesu bula pu a bul, "N ɛ ken hanbiisin, n bi jan jon ba kudiilee a yuo pi vahin." ²⁷ Nii ɛ haal-la bul, "Mi Tiina, u ɔaa wutitii ɛ, ama vahi-la tinnaa sii dii kialin, kialin si tel tinteen ɛ, ba ma jan paa didii." ²⁸ Nii ɛ Yesu bula pu a bul, "N ɔaa haal-la si ken yarida kinken ɛ. Wii-la n sii che, mi jan ɔaa pin." Bua-la titia ɛ u tolo-la duori.

Yesu vaare niaa yuge

²⁹ Nii ɛ Yesu bira sii lee-la a to Galili muga-la diirin mu. U jil peelin nyun a hon dime. ³⁰ Nii ɛ ni-dan ko u teen a ken gberikee ari nyulimaa ari tannaa ari nyanyal tinnaa donsun a kaa ko bil Yesu naasin ɛ. U vaareba. ³¹ Ni-dan-la si na tannaa di ba bul wiaa ari gberikee sii ven, ari nyulimaa siaa di ba bira suro, u ɔaba wu-kpunkpere. Nii ɛ ba didenne Iziral tinnaa Wia.

Yesu pi niaa bui banese kudiilee

Maak 8.1-10

³² Nii ɛ Yesu yire u haritooro a bula piba a bul, "Mi si ben niaa deenba, nennige kenmi ɛ. Ba he mi teen tapulaa batori ɛ nla an bi kudiilee na di ba dii. Mi bi sei di

ba viiri di ba ne bi kuŋ-kala die. Di mi ŋaa ŋii, ba jaŋ mu yiegi wonŋbiin le.”³³ Nii ne u haritooro pieŋu, “Ee ne la jaŋ ŋaa a na kudiilee di ni-dan-la kala dii giriŋ deen tuon?”³⁴ U pieŋeba, “Boroboro baŋmee ne he dime?” Ba si, “Kiaa balipe ne ari cheŋfili-biisiŋ ma mua.”³⁵ Nii ne u ŋaa nialiŋ tuu hon tinteen.³⁶ Ka u jon boroboroba-la balipe ari cheŋfilie-la a lolle Wia an kaa choge choge a pi u haritooro di ba laa kpa ni-dan-la. Ba laa kpaaba.³⁷ Nu-kala dii a voge. Ka ba paa ku-kaan-biisiŋ a su siŋsiŋ balipe.³⁸ Nialiŋ fa si dii kialin, ba yi baalaa bui banese, ka haalaa ari hanbiisiŋ ma he dime.³⁹ Nii ne u ta ni-dan-la an mu juu liin daboro an mu Magadan tinteen.

16

*Nialiŋ che di Yesu ŋaa wu-magilin
Maak 8.11-13; Luuk 12.54-56*

¹ Nii ne Farisii tinŋaa ari Sadusii tinŋaa donsun ko Yesu teen di ba magisu. Ba bula pu duu ŋaa wu-magilin di ba na a jin ari u dol-la lii Wia ne. ² Nii ne u bula piba a bul, “Di wia ni juu, ka ma na wii-mulun siin duu fiesa, ma yie bul di lerin jaŋ fiele. ³ Chichuo-fiele maa, di lerin ne bire, ma yie bul ari duonun jaŋ nii. Ma yie wuo beŋ wia nyun a wuo jin wii-la si jaŋ ŋaa, ama ma bi wuo jin wialiŋ sii ŋaa dunia deen le lele. ⁴ Jiniŋ niaa ŋaa ni-bom ne, ba bi Wia ka fa. Ma si di mi ŋaa wu-magilin. Ai, mi bi ŋaa. Wu-magil-la ma sii che, ma bi jaŋ wuo nau, see Wia fa si ŋaa a tige Jona le.” Nii ne Yesu lenba an viiri.

*Yesu bul wiaa a tige Farisii tinŋaa
ari Sadusii tinŋaa wu-bulaa le*

Maak 8.14-21

⁵ Yesu haritooro-la si juu liin daboro a duoro chol fuon cholo nii, ba yua ba bi kudiilee koro mu. ⁶ Nii ne Yesu bula piba di ba po ba titia le worun ari Farisii tinŋaa ari Sadusii tinŋaa, di ba nage si-burun ba si

jonjo he boroboro le duu puore. ⁷ Nii ne ba suomo bula pipi donjo, “La bi kudiilee koro ko, nii ne tii u bul wiin deen.” ⁸ Nii ne Yesu jin wii-la ba sii bul a bula piba, “Ma yarida bi yuge. Bee ne tii ma hon vuure ari ma bi kudiilee kene? Ma ha bi wu-jimin kene? ⁹ Ma ha bi wiaa bubuon jin? Ma bi biina yi bua-la le mi si jon boroboroba banon kaa choge a pi niaa bui banon ba dii? Ba si die a voge, siŋsiŋ baŋmee ne ma paa ku-kaanaa su? ¹⁰ An ka boroboro balipe-la mi si kaa choge a pi niaa bui banese-laa? Ku-kaanaa siŋsiŋ baŋmee ne ma paa su? ¹¹ Bee ne ma biine ari ma teen ne mii bul kudiilee wiaa? Ma po ma titia le ari Farisii tinŋaa ari Sadusii tinŋaa le. Ba nage si-burun ne.” ¹² Nii ne u haritooro jin ari u bi si di ba po ba titia le ari si-buru-la ba si kaa hihe boroboro le ne, ama u si ba po ba titia le Farisii tinŋaa ari Sadusii tinŋaa wu-bulaa le ne.

*Piita dage nii-la Yesu si ŋaa
Maak 8.27-30; Luuk 9.18-21*

¹³ Nii ne Yesu sii mu Sizariya, Filipa tinteen. Nii ne u pieŋe u haritooro-la a bul, “Kubee ne niaa si di mi-na Nuhuobiine Bie ŋaa?” ¹⁴ Nii ne ba bul, “Donsun si di n ne ŋaa Jon, Wia lii-foori-la. Donsun ma si n ne ŋaa Ilaaja. Donsun ma si n ne ŋaa Jerimaya, koo nii-la sii bul wiaa, Wia Din-zon-la dolun le donjo ne.” ¹⁵ Nii ne Yesu bira pieŋe u haritooro-la maa, “Ka ma maa, ma si mi ŋaa kubee ne?” ¹⁶ Nii ne Saamon Piita bul, “N ne ŋaa Kirisito, Wia-la si weye Bie.” ¹⁷ Nii ne Yesu bul, “Saamon, Jon bie, Wia jaŋ pen le, wu-jimin deen u bi naga nuhuobiine ne pin. Mi Nyimma si he Wia-jaŋ ne pin. ¹⁸ Nii wiaa Piita, mi bulaa pin ari n nage bun ne. Bun-la nyun ne mi jaŋ saa nialiŋ si laa mi wiaa dii dia. Suun ma bi jaŋ wuo yigi dia-la lo. ¹⁹ Mi jaŋ jon Wia kuorii-la boribee pin. Wii-la n si via dunia le, ba jaŋ viau Wia-jaŋ maa. Wii-la ma n si seye dunia le, ba ma jaŋ seyu

Wia-jaŋ.”²⁰ Nii ne Yesu bula pi u haritooro-la ari siifiesiŋ di ba sí bula pi nuu-kala ari u ne ŋaa Kirisito, niila Wia si liisa.

Yesu bul u heeŋ naniŋ ari u sunuŋ wiaa

Maak 8.31–9.1; Luuk 9.22–27

²¹ A suomi bua-la le Yesu chaasa bula pi u haritooroo a bul, “U maga di mi mu Jerusalem a na heeŋ woruŋ juu tiŋŋaa nihiasin ari nialiŋ si kpu pusun pipi Wia kuhiasin ari Wia teniŋ kerichiba nisiŋ le. Ba jaŋ kpumi, ama mi jaŋ sii suun le tapulaa batori cheeŋ.”²² Nii ne Piita kenu kaa suusa lii a kpiau le a bul, “Wia bi jaŋ sei, mi Tiina. Wii-la bi jaŋ ko duu ŋaŋ le.”²³ Nii ne Yesu miira chaase Piita a bula pu a bul, “Sitaani, mu dime! Nŋ che ŋ nyisemi di mi juu haache le ne. Wialin ŋ sii bul, nuhuobiine wonbiin ne. Wia wonbiin dee.”

²⁴ Nii ne u bula pi u haritooroo a bul, “Di nuu-kala nii che duu tomi, see duu via u titia wonbiin aŋ jon u daa-gese baase tapulii-na kala a to mi hariŋ.”²⁵ Nii-la kala sii che duu laa u titia miisin, u jaŋ jon u miisin ta, ama nii-la si via u miisin ta a tiŋ mi wiaa, u jaŋ sene laa u miisin.²⁶ Di ŋ ne dii dunia kala aŋ bi miisin kene, bee kun nyurii ne ŋ na? Dunia deen le, bee kun ne saa ŋ jaŋ wuo kaa yoo ŋ miisin?²⁷ Mi-na Nuhuobiine Bie, mi jaŋ ko a chaane ari mi Nyimma kuoruŋ. La di Wia tiŋdaaraa ne jaŋ ko. Di la ne ko, Wia jaŋ tiŋ nuu-kala a mage nii u si tima.²⁸ Wutitii ne, mi bulaa pima ari niaa doŋsun he dime, ba bi jaŋ suu see di ba na mi-na Nuhuobiine Bie di mi ko ari mi kuorii-la.”

17

Yesu birima

Maak 9.2–13; Luuk 9.28–36

¹ Tapulaa balidu si ku bal, Yesu keŋ Piita ari Jeems ari u naanbie Joon, ba dunduŋa a kaa mu peel-bal kubala nyun.² Ba beŋ ba sipaan a na Yesu duu birima. U siaa kala

tutul a nage wii-poŋsun sii tul nii. U genniŋ ma pulle a tutul.³ Nii ne Moosis ari Ilaaja ku lii ba sipaan. Ba china bubul wiaa Yesu teen.⁴ Nii ne Piita bula pi Yesu a bul, “La Tiina, u ŋaa wu-zoŋ ne ari la si he daha. Di ŋ nii che la jaŋ he leŋhe batori daha, di ŋ keŋ doŋo, di Moosis ma keŋ doŋo, di Ilaaja ma keŋ doŋo.”⁵ Piita ha fa sii bul wiaa nii di duonbilingbaaniŋ ku toba, ka yiikoro kubala lii duonbilingbaani-la tuoŋ a bubul, “Mi Bii-choolun ne ŋla. Mi tuoŋ tore u nyun. Má jegile nii u teen.”⁶ Yesu haritooro-la si nii niila yiikoro, fawullun keŋba, ba tuu tel tiŋteen.⁷ Nii ne Yesu ko ba teen a digiba aŋ bula piba di ba sii aŋ sí fawullun fá.⁸ Ba si sie, ba beŋ, ba bi nuu-kala na see Yesu dunduŋa.

⁹ Ba si lii peel-la nyun ku tuu, Yesu bula piba a bul, “Mi bi che di ma bul wii-la ma si naa a pi nuu-kala, see tapulii-la mi-na Nuhuobiine Bie si sii suun le.”¹⁰ Nii ne Yesu haritooro-la piesu a bul, “Bee ne tii Wia teniŋ kerichiba bul di Ilaaja ne laa sipaan, aŋ ka di Wia Bie-na ko?”¹¹ Nii ne Yesu bul, “Wutitii, Ilaaja jaŋ sene laa sipaan ko a keŋ kun-kala wasa bil.”¹² Ama mi bulaa pima ari Ilaaja paala ko ne, ama niaa bi wuo jimu. Ba ŋaau nii kala ba sii che. Nii titia ne ba ma jaŋ doŋise mi-na Nuhuobiine Bie.”¹³ Nii ne u haritooro-la jin ari Joon Wia lii-foori-la wiaa ne u bul nii.

Yesu kiri jin-boŋ bie le

Maak 9.14–29; Luuk 9.37–43

¹⁴ Nii ne Yesu ari u haritooroo batori-la sii lii peel-la nyun a ku tuu ni-dan-la teen. Di baal kubala ko Yesu teen a kpirimi u sipaan¹⁵ aŋ bula pu a bul, “Mi Tiina, fá mi bie nennige, uu tel kpuŋkpusun ne. Nyanyalii-la kenu ne woruŋ, u yie titel nyiniŋ koo liin le.”¹⁶ Mi kenu kaa ko ŋ haritooroo teen, ama ba bi wuo vaaru.”¹⁷ Nii ne Yesu bul, “Ma leele niaa deenba, ma bi yarida kene, ma ŋaa ni-bomɔ ne. Ee ne mi

jan nyalime a dieni ma teen?” Nii ne u bula pi baal-la duu ken u bile ko u teen. ¹⁸ Nii ne Yesu bul jin-bon-la le duu lii bile le. Nii ne u lii. Bile guu duori. ¹⁹ Nii ne Yesu haritooro-la ko u teen a luora piesu a bul, “Bee ne tii la-na bi jin-bon-la wuo kiri?” ²⁰ Nii ne Yesu bula piba a bul, “Ma yarida bi yuge, nii ne tii. Wutitii, mi bulaa pima, di ma yarida ne fa mage kun biin ba sii yire masitad, ma fa jan wuo bul peelin le duu sii daha a mu seme donjo. U jan sii mu. Wii-kala tuo ma fa bi jan wuo naa. [²¹ Ama Wia bi jan pima dolun di ma wuo kikiri jin-yiri deenba, see ma voo niin an pe chuchuale Wia.]”

*Yesu bira bul u suun wiaa
Maak 9.30-32; Luuk 9.43-45*

²² Nii ne Yesu ari u haritooro kala ku hilimi Galilii le. Nii ne u bula piba di ba jan ken u-na Nuhuobiine Bie a he niaa nisin le ²³ di ba kpuu, ama u harin le u jan sii suun le tapulaa batori cheen a ken miisin. Yesu si bul nii, u haritooro tuon chei.

Wia-dia time

²⁴ Yesu ari u haritooro si ko Kapenam, nialin sii laa Wia-dia time ko Piita teen a piesu a bul, “Ma kuhian ka tin Wia-dia time nee?”

²⁵ Nii ne Piita bul duu tin ne. Piita si bul nii an miira juu dia, Yesu laa sipaan a piesu a bul, “Kubee ne tin moribee koo lanpoo a pipi dunia deen kuoro? U tan-la niaa koo nuhuraa nee? Bee ne n biine?”

²⁶ Nii ne Piita bul di nuhuraa ne. Yesu bira bul, “Nii-na u tan-la niaa bi kun-kala tin. ²⁷ Ama la-na bi che di la maase niaa deenba, nii wiaa ken gian tuu he fuon le a kese chenfilee. Gian-la si ken chenfilibun-bun-la, ken u niin suri. N jan na moribiin u niin le. Jon moribie-la a tin ma ari mi nyun time.”

18

Yesu dage nii-la si yuga Wia kuorii-la tuon

Maak 9.33-37; Luuk 9.46-48

¹ Yesu si bul nii a pi Piita dere, u haritooro ko u teen a ku piesu a bul, “La tuon kubee ne kii u donjo tiina Wia kuorii-la tuon?” ² Nii ne Yesu yire bii-bie kubala a kii ba tutuobaanin ³ an bula piba a bul, “Wutitii ne mi bulaa pima, see di ma ken ma titia muuri a nage hanbiisin, di nii dee, ma bi jan wuo juu Wia kuorii-la tuon. ⁴ Nii-la si ken u titia muuri a nage hanbie, u ne naa ma tuon kuhian Wia kuorii-la tuon. ⁵ Di nuu ne ken bii-bie donjo worun a tin mi wiaa, mi ne u ken worun nii.

Yesu bul wiaa a tige niaa si jan len di niaa juu haache le

Maak 9.42-48; Luuk 17.1-2

⁶ Nii-la kala si na hanbiisi-la sii tomi donjo a nyisu duu naa wubomun, u maga di ba jon nomun a voo laale u banja le a jonu yuo he muga tuon uu nyua liin u suu. Di ba ne naa nii, u ne jan kpia u si weye.

⁷ U jan lore pi nialin si jan naa di niaa juu haache le. U maga di wialin ku bal. Ama nii-la si naa ba juu haache le, u jan na heen. ⁸ Di n nisin koo n naan nii che duu kenin he haache le, kere ta. N si juu Wia kuorii-la tuon ari naa-kuun koo nakuun, u ne kpia n si jan ken napilimee koo naa-pilimee a juu Wia nyinin. ⁹ Di n siin nii che duu kenin he haache le, liisa ta. N si jan juu Wia kuorii-la tuon ari sii-togo, u ne kpia ba si jonun yuo he Wia nyinin ari sii-pilimee.”

Yesu mage namaga a mu tige pielin le

Luuk 15.3-7

¹⁰ Nii ne Yesu bira si, “Ma fiele di ma si hanbiisin deenba kun-kala kaa gbesi. Mi bulaa pima di Wia ta u tin daaraa ne di ba bibenba. Ba he Wia-jan bua-na kala le, mi Nyimma si he lee-la. [¹¹ Mi-na Nuhuobiine Bie ko di mi che a laa nialin si lele ne a ta.”]

¹² Nii ne Yesu mage namaga a bul, “Nuu ne fa he dime a ken piesee zolo, nii ne ba tuon donjo lel.” Nii

ne Yesu piessε, “Eε ne ma biine ari u jaŋ ɲaa? U bi jaŋ leŋ piesee mahiŋ banese ari fii ari nibi-la a ta peelee nyuŋ aŋ lii gollo chiche pie-lelii-laa? ¹³ Duu ne nau, mi jaŋ bula pima ari u tuɔŋ jaŋ tɔre u pie-bala-la nyuŋ a kii piesee mahiŋ banese ari fii ari nibi-la si bi lele. ¹⁴ Nii titia ne saa mi Nyimma si he Wia-jaŋ bi che di haŋbiisiŋ deenba kuŋ lel.”

Yesu dage ɲii la si jaŋ ɲaa di la naaŋbie ne ɲaa wii a cheila le

¹⁵ Nii ne Yesu si, “Di ɲ naaŋbie ne ɲaa wii cheiŋ le, mu a bula pu wii-la u si ɲaa chei, ama ɲaa ɲii ma duu dunɗuŋa balia pege. Di u ne jegile nii wii-la ɲ sii bul, ma di ɲ naaŋbie bira sima ne. ¹⁶ Ama duu ne bi jegile nii ɲ teen, keŋ nuu dɔŋ koo niaa balia pe ɲ titia le di ma mu u teen a bul wii-la u si ɲaa chei duu wase. N si ɲaa ɲii, ɲ jaŋ keŋ niaa di ba ɲaa ɲ danɗia. ¹⁷ Ama di u ne via duu jegile nii ma teen, ɲ-na bul wii-la pi nialiŋ kala si laa Yesu wiaa dii aa hilimi. Duu ne via duu jegile nii ba teen maa, dɔgisu ari ɲ buu jiŋ a nage nii-la si bi Wia jiŋ koo a nage lanɗoo lilaaru ne.

N si via wii-la ari ɲ si sei wii-la

¹⁸ Wutitii ne, mi bulaa pima ari wii-la ma si via dunia le, ba jaŋ viau Wia-jaŋ maa. Wii-la ma ɲ si sei dunia le, ba ma jaŋ seyuu Wia-jaŋ. ¹⁹ Mi jaŋ wasa bula pima ari ma niaa balia ne he dime a keŋ niibala a chuchuoε Wia a chiche kuŋ, mi Nyimma si he Wia-jaŋ, u jaŋ joŋo pima. ²⁰ Lee-la niaa balia koo batori si hilime mi doluŋ le, mi jaŋ he ba teen.”

Tiŋtinni-la si bi chimiŋ joŋo che u dɔŋɔ tiina

²¹ Nii ne Piita ko Yesu teen a piessu a bul, “Mi Tiina, di mi naaŋbie ne ɲaa wii a cheimi le, naaŋsiŋ buŋmεε ne mi jaŋ joŋo cheu? Mi joŋo cheu naaŋsiŋ bulipe koo?” ²² Nii ne Yesu bira bul, “Ai, naaŋsiŋ bulipe dunɗuŋa dee. Joŋo cheu

naaŋsiŋ mahiŋ batori ari fii leree bulipe.”

²³ Nii ne Yesu mage namaga a keŋ Wia kuorii-la a kaa mimagise kuoro ari u tiŋtinnaa a bul, “Kuoru kubala ne sie a chiche duu piessε u tiŋtinnaa u chinɲaa. ²⁴ U si suomo duu piessε, ba keŋ u tiŋtinna dɔŋɔ ko u teen. U dii u chimiŋ siidi bui bui bui ne. ²⁵ U bi wuo tiŋ. Nii ne u kuhiaŋ-la bul di ba kenu ari u haala ari u biiriŋ ari kialiiŋ kala u si kene a kaa mu yalle a tiŋ chin-la bua le. ²⁶ Nii ne tiŋtinni-la tuu kpirimi u naadusuŋ nyuŋ a sulu, ‘Mi kuhiaŋ, ɲaa kenyiri. Mi jaŋ tiŋ ɲ chimiŋ kala.’ ²⁷ U kuhiaŋ-la fau nisusuŋ woruŋ a joŋ chin-la cheu a ɲaa u mu. ²⁸ Nii ne chin tiina-la kuoru-la si joŋ chin-la cheu, u lii a ma na u tiŋtinni dɔŋɔ tiina si dii u chimiŋ siidi bui. U keŋ u geriiŋ baŋɲa le a bul duu tiŋ u chimiŋ. ²⁹ U tiŋtinni-dɔŋ-la ma tuu kpirimi u naadusuŋ nyuŋ a sulu a bul, ‘Naa kenyiri, mi jaŋ timiŋ.’ ³⁰ U via aŋ kenu mu to dia, aŋ bul see duu tiŋ chin-la. ³¹ U tiŋtinni-dɔŋsuŋ si na wii-la u si ɲaa, ba tuɔŋ kala chei. Ba mu bula pi ba kuhiaŋ wii-la kala si ɲaa. ³² Nii ne kuoru-la yiru a piessu a bul, ‘N-na tiŋtinna deen, ɲ ɲaa ni-bɔŋ ne. N si sulmi, mi joŋ chin-la kala ɲ si die a cheŋ ne. ³³ Beε ne tii ɲ-na bi wuo fa ɲ dɔŋɔ tiina-la nennige ari mi si faŋ nennige ɲii?’ ³⁴ Kuoru-la na baaniŋ woruŋ u nyuŋ a ɲaa ba kenu to dia see duu tiŋ chin-la kala.” ³⁵ Nii ne Yesu si, “Di ma bi sei di ma joŋ ma dɔŋsuŋ tiŋɲaa haacheba cheba ari ma tuɔŋ kala, mi Nyimma Wia si he Wia-jaŋ le ma jaŋ dɔgisema ɲii.”

19

Yesu dage niaa di ba si ba haalaa via

Maak 10.1-12

¹ Yesu si bul wiaa deenba dere, u lii Galilii tiŋteen a mu Judiya tiŋteen a chol Joɔdan fuo-la. ² Ni-dan bira to u hariŋ. Nii ne u vaare nialiŋ sii wiilu dime.

3 Nii ne Farisii tinɲaa dɔɲsun ma sii kɔ u teen a chiche di ba magisu a piesu a bul, “Di ɲ ken wii a tige ɲ haala le a chiche ɲ viau, u ken wonbii nee?” 4 Yesu miira pieseba, “Ma bi karima ari bua-la le Wia si bugumo ɲaa dunia, nialin u si ɲaa, ba fa ɲaa baal ari haal nee?” 5 Yesu bira si, “Nii ne tii baal-la jan len u nyimma ari u naan dia an ka ba di u haala mere dɔɲɔ le. Niaa deenba balia jan ken chal-bala. 6 Ba bira bi jan ɲaa niaa balia, see kubala. Nialin saa Wia si kaa mere dɔɲɔ le, u bi maga di nuhuobiine kenba pore dɔɲɔ le.” 7 Nii ne u haritooro-la bira piesu wiin deen a bul, “Bee ne tii saa Moosis fa si di baala nii che u via u haala, duu laa sipaan a ɲmunse tenin a pi haal-la an-na viau?” 8 Nii ne Yesu bira bula piba a bul, “Ma tuɔɲ dolie. Nii ne tii Moosis fa sei di ma via ma haalaa. Ama dunia di-suomun, ba fa bi nii ɲaa. 9 Mi bulaa pima, baala-na kala si via u haala an bira jaa dɔɲɔ, u tiina juu haal-la haache le ne, see di haal-la ka ɲaa ha-chorun wu-ɲaalaa.”

10 Nii ne Yesu haritooro-la bula pu ari nii-na ne he dime, u bi maga di nuu jaa haal. 11 Nii ne Yesu miira bula piba a bul, “Wiin deen bi naga ari nuu-kala jan wuo ɲaa. Nialin Wia si jon dolun pa, ba dundun ne jan wuo ɲaa nii. 12 Wii-la si tii baalaa bi haalaa ka jaa, ba yuga ne. Ba lul dɔɲsun, ba paala bi haalaa wuo pin. Dɔɲsun ma, nuhuobiinee ne ɲaaba nii, dɔɲsun ma bi haalaa jaa a tin Wia kuorii-la wiaa. Nii-la si jan wuo laa wiin deen dii, u sei.”

*Yesu jon nisin dan hanbiisin le
Maak 10.13-16; Luuk 18.15-17*

13 Nii ne niaa sii kɔ Yesu teen a ken ba hanbiisin kaa kɔ duu jon u nisin danba le a chuɔle Wia piba. Nii ne u haritooro-la kpiaba le. 14 Yesu si na nii, u bula piba a bul, “Ma len di hanbiisi-la kɔ mi teen. Ma siba kiru! Niaa deenba yiri ne he Wia kuorii-la tuɔɲ.” 15 Nii ne u jon u nisin danba le an viiri.

Ku-kenni-la kɔ Yesu teen

Maak 10.17-31; Luuk 18.18-30

16 Baal kubala ne ma sie a kɔ Yesu teen. Baal-la ken kiaa kinken. Nii ne u piese Yesu a bul, “Mi kuhian, wu-zɔɲ bee ne mi jan ɲaa a ken miisi-la si bi dere?” 17 Nii ne Yesu piesu a bul, “Bee ne tii ɲ piesemi wu-zɔmɔ-la ɲ si jan ɲɲaa wiaa? Ni-bala dundun ne zɔmɔ. Di ɲ nii che di ɲ ken miisi-la si bi dere, tuto wialin Wia si len ba ɲmunsa bil di maa to.” 18 Nii ne baal-la piesu, “Wu-beeba ne?” Nii ne Yesu si, “Si niaa kpu, si ɲ dɔɲɔ tiina haala che, si gaa, di ɲ ɲaa danɲia wii le, si wiaa nyia pe. 19 Fifa ɲ nyimma ari ɲ naan, a cho ɲ dɔɲɔ tiina ari ɲ si cho ɲ titia nii.” 20 Nii ne baal-la bula pi Yesu, “Mi kuhian, mi to wiaa deenba kala ne. Bee ne saa ka?” 21 Nii ne Yesu bula pu, “Di ɲ nii che ɲ ɲaa ni-zɔɲ a si wii-kala ken, jon ɲ kiaa kala yalle a jon moribie-la a pi summoo an ku tomi. ɲ ne ɲaa nii, ɲ jan ken kiaa Wia-jan le.” 22 Yesu si bul nii, baal-la tuɔɲ chei, u sii viiri, bee wiaa u ken kiaa ne worun.

23 Nii ne Yesu bula pi u haritooro-la a bul, “Wutitii, mi bulaa pima, u ɲaa wu-duo ne ari nii-la si ken kiaa si jan wuo juu Wia kuorii-la tuɔɲ. 24 Mi bira bulaa pima, u bi hei ari buntanɲa si jan wuo to geri-hemin buɔɲ lii ari u si heye nii nii-la si ken kiaa si jan wuo juu Wia kuorii-la tuɔɲ.” 25 U haritooro-la si nii wiaa deenba, ba faasa hiriki a piese Yesu a bul, “U ne nage nii, kubee ne saa Wia jan laa ta?” 26 Yesu miira benba an bul, “Wii-la si jan kperi nuhuobiine, u bi Wia wuo kperi. Wia wuo wii-kala ɲaa ne.” 27 Nii ne Piita bula pu a bul, “Na, la-na len la kuɲ-kala ne an tuto ɲ hariɲ. Bee ne saa la jan na?” 28 Nii ne Yesu bula pi u haritooro-la a bul, “Wutitii ne mi bulaa pima, di dunia falii-la ne yie, mi-na Nuhuobiine Bie jan hon mi kuori-kpasa nyun Wia pulumun tuɔɲ. Bua-la le, ma haritooro-la fii ari balia-la si to mi hariɲ, ma ma

jan̄ hōŋ kuori-kpasinn̄ij̄ fii ari balia nyun̄ a biben̄ Iziral ta-gent̄is̄ij̄ fii ari balia-la a dii ba sariya. ²⁹ Bira nii-la kala si len̄ u diis̄ij̄ koo u naan̄biirin̄ koo u nyimma koo u naan̄ koo u biirin̄ koo u bagis̄ij̄ a tin̄ mi wiaa, u tiina jan̄ bira na kiaa deen̄ba naan̄siin̄ zol̄o an̄ p̄e ken̄ miisi-la si bi d̄ere. ³⁰ Ama kuhias̄ij̄ yuga si jan̄ birime han̄biis̄ij̄. Han̄biis̄ij̄ ma yuga si jan̄ birime kuhias̄ij̄.”

20

Yesu mage namaga a tige бага тинтиннаа л̄

¹ Nii ne Yesu bira mage namaga a piba a bul di Wia kuorii-la nage baal kubala si ken̄ u бага ne chichuofiela. U lii chiche niaa di ba mu p̄ere u бага-la l̄e. ² Ba sei ari ba jan̄ mu p̄ere, ka u tin̄ba che-bala time. Nii ne u len̄ ba mu u бага-la pip̄ere. ³ U ku mage kerifi nibi, u bira lii a na niaa d̄onsun̄ di ba chin̄ yob̄o tuon̄ pei. Ba bi tin̄timii kala ka tin̄. ⁴ Nii ne u bula piba di ba ma mu a p̄ere u бага-la l̄e, ka di u tin̄ba, duu jan̄ piba nii kala si maga. Nii ne ba ma mu. ⁵ Kerifi fii ari balia yi, u bira lii a na niaa d̄onsun̄ a ŋaa ba ma mu u бага-la. U bira lii kerifi batori buala l̄e a bira na niaa d̄onsun̄ a ŋaa ba ma mu u бага-la. ⁶ U bira ku kpage kerifi ban̄on̄, u bira lii yob̄o tuon̄ a na niaa d̄onsun̄ ma di ba ha chin̄ dime. Nii ne u pīseba, “B̄ee ne tii ma chin̄ daha pei chichuon̄ ari wiiheye kala, ma bi tin̄timii kala ka tin̄?” ⁷ Nii ne ba bula pu ari ba bi tin̄tin̄ŋaa na di ba tin̄. Nii ne u bula piba di ba ma mu a tin̄ u бага-la. Ba ma mu. ⁸ Didaan̄ij̄ si yie, nii ne бага-la tiina yire nii-la s̄ii ben̄ u бага-la duu yire nialin̄ si tin̄ u бага-la l̄e a tin̄ba, duu suomi nialin̄ si to harin̄ mu бага-la a tin̄ba an̄-na mu yi nialin̄ si laa sipaan̄ mu бага-la. ⁹ Nialin̄ si to harin̄ mu бага-la, u tin̄ba che-bala time. ¹⁰ Nii ne u si, ka nialin̄ si laa sipaan̄ mu бага-la, di ba ku laa ba time. Ba fa biina ari ba jan̄

laa kii haritooro-la, ama ba tin̄ba ma mage nii ne. ¹¹ Ba ma laa moribie-la an̄ gugurime wiaa nii-la бага-la l̄e ba si p̄ere teen̄. ¹² Nii ne ba bula pu a bul, “Niaa deen̄ba si to harin̄ k̄o, ba tin̄ hawa kubala dundun̄ ne, an̄ ka la-na tin̄ chichuon̄ ari wiiheye kala, an̄ ka ŋ tin̄la kala maga d̄on̄o.” ¹³ Nii ne бага-la tiina bula pi ba d̄on̄o a bul, “Jegile nii, mi bima gura. Ma seye ari ma jan̄ tin̄ di wia juu ne an̄ laa che-bala time. ¹⁴ Má laa ma moribiee a viiri. Mii che di mi tin̄ baalaa deen̄ba si to harin̄ k̄o nii titia mi si tin̄ma ne. ¹⁵ Mi bi won̄biin̄ kene di mi ken̄ mi moribiee tin̄ mi tuot̄ore wiaa? Koo ma yaraa bieru a tin̄ mi si ken̄ zile wiaa nee?” ¹⁶ Nii ne Yesu bula d̄ere, “Kuhias̄ij̄ jan̄ birime han̄biis̄ij̄, han̄biis̄ij̄ ma jan̄ birime kuhias̄ij̄.”

Yesu bul u suun̄ wiaa

Maak 10.32-34; Luuk 18.31-34

¹⁷ Yesu si bul nii di ba he won̄biin̄ l̄e ne aa mu Jerusalem. Nii ne u ken̄ u haritooro fii ari balia dundun̄a a suusa lii a bula piba won̄biin̄ l̄e, ¹⁸ “Má jegili mi teen̄. Laa mu Jerusalem ne. Di la ne yi dime, ba jan̄ ken̄ mi-na Nuhuobiine Bie a kaa mu pi nialin̄ si kpu pusun̄ pipi Wia kuhias̄ij̄ ari Wia ten̄ij̄ kerichiba. Ba jan̄ dii mi sariya a ŋaa di ba kpumi ¹⁹ an̄ ken̄mi kaa mu he nialin̄ si bi juu tin̄ŋaa ŋaa nis̄ij̄ l̄e. Ba jan̄ m̄on̄mi. Ba jan̄ viiremi maa an̄ kpaasemi m̄ere daa-ges̄ee nyun̄, ka di mi sii suun̄ l̄e tapulaa batori cheen̄.”

Zebidii haala sul Yesu a chiche di-honun̄ duu pi u biirin̄ balia

Maak 10.35-45

²⁰ Nii ne Zebidii haala ken̄ u biirin̄ balia k̄o Yesu teen̄ a kpirimi u sipaan̄ an̄ sulu duu p̄eu l̄e. ²¹ Nii ne Yesu pīesu, “Wu-b̄ee ne ŋŋ che di mi ŋaa pin̄?” Nii ne u bul, “N̄ si jan̄ dii Wia kuorii-la a hōŋ ŋ kuori-kpasa nyun̄, len̄ di mi biirin̄ balia ŋaa ŋ bubuon̄ huhon̄n̄o, di d̄on̄o hōŋ ŋ na-diin̄, di d̄on̄o ma hōŋ ŋ na-gua.” ²² Nii ne

Yesu bula pi u biirin a bul, “Ma bi jin ku-la ma sii che. Ma jan wuo nyalima na hee-la mi si jan na? Ma jan wuo fo Wii-chuole liin ari ba si jan fomi nii, koo?” Ba si, “Oo, la jan wuo.”²³ Nii ne Yesu bula piba a bul, “Wutitii ne ma bul. Hee-la mi si jan na, u-na ma ma jan na. Ama mi na-diin ari mi na-gua huhonno-la, mi dee bi jan tuoseba. Wia ne jan liiseba di ba hon dime.”²⁴ Yesu haritooroo fii-la si nii Jeems ari Joon si bul wii-la, ba na baani ba nyun.²⁵ Nii ne Yesu yire u haritooroo kala. Ba mu u teen. U bula piba a bul, “Ma jin nialin si bi juu tinjaa naa, ba hon niaa nyun ne. Ba kuhiasin ma kenba dolun.”²⁶ Ama u bi maga di ma njaa nii. Ma tuon nii-la sii che u naa ma kuhian, u maga duu ne tin tinjinjaa pipima.²⁷ Ma tuon nii-la ma sii che u naa ma tuon kuoro, u maga duu ne naa ma tuon yomo.²⁸ Mi-na Nuhuobiine Bie, mi bi ko di mi che niaa di ba tima pimi, mi ko di mi-na tima piba ne a suu a laa niaa miisaa yuge ta a piba.”

Yesu vaare nyulimaa balia

Maak 10.26-52; Luuk 18.35-43

²⁹ Yesu ari u haritooroo si lii Jeriko le, ni-dan ne to ba harin.³⁰ Di nyulimaa balia hon wonbiin niin a nii di Yesu nii bal. Nii ne ba faasa yire a bula pu a bul, “Yesu, Devit nihii, fala nennige.”³¹ Nii ne ni-dan-la kpiaba le di ba ken gon. Ama ba faasa yire a kii nii a bul, “La Tiina, Devit nihii, fala nennige.”³² Nii ne Yesu chin an yireba a pieseba, “Bee kun ne ma che mi naa pima?”³³ Nii ne ba bul, “La Tiina, laa che di n suri la siaa ne.”³⁴ Nii ne Yesu faba nennige a digi ba siaa le. Ba siaa guu suri, ba tuto u harin.

21

Yesu juu Jerusalem

Maak 11.1-11; Luuk 19.28-40; Joon 12.12-19

¹ Nii ne Yesu ari u haritooroo sii mu Jerusalem. Ba ku yi Betifagi a ku

yi peel kubala baa yire Oliv. Nii ne Yesu liise u haritooroo balia a tinba a bula piba a bul, “Ma mu tan-la si he ma sipaan.² Di ma ne mua, ma jan na kakumo ari u bie di ba vobo a kii. Ma puri a kaa ko pimi.³ Di nuu ne piesema, ma bula pu ari ma Tiina nii che. U jan len di ma kaa ko lima.”⁴ Wiin deen naa di wii-la nii-la fa sii bul wiaa, Wia Din-zon-la dolun le ku naa wutitii ne.⁵ U fa si, “Ma bulaa pi Zaayon niaa di ba bee na, di ba kuoro nii ko ba teen.

U ken u titia muuri ne a jil kakumo a bira jil kakumo bie.”

⁶ Nii ne Yesu haritooro-la mu a naa wii-la Yesu si bula piba di ba naa.⁷ Ba ken kakumo-la ari u bie kaa ko a jon ba gennin dan kakumo-la ari u bie nyun, Yesu jil.⁸ Ni-dan-la jesin jon ba gennin a jere wonbiin le, ka donsun ma keripipaan a ma kaa jere wonbiin le.⁹ Ni-dan-la si laa Yesu sipaan ari nialin sii to u harin suomo njaa gon a bul, “Tabarikala Devit nihii! Wia jan pe nii-la sii ko la Tiina dolun le. Ma len di la denne Wia!”¹⁰ Yesu si muu juu Jerusalem, tan-la kala zigili. Nii ne niaa piese a bul, “Kubee ne nla?”¹¹ Nii ne ni-dan-la bul, “Yesu si lii Nazaret si he Galili tinteen le, nii-la sii bul wiaa, Wia Din-zon-la dolun le, u ne nii.”

Yesu juu Wia-dia

Maak 11.15-19; Luuk 19.45-48; Joon 2.13-22

¹² Nii ne Yesu juu Wia-dia. Nialin donsun he dime a yiyalle kiaa, donsun ma yuyoo kiaa. Yesu kiriba kala ta ba lii. Baalaa ma he dime a yiyere moribee. Yesu nmoo ba teebulba lo. Baalaa donsun ma yalle kokosun. U nmoo ba ma kpasinnin a lo.¹³ Nii ne Yesu bula piba a bul, “Ba nmunsa di Wia si, u dia jan naa leela niaa si jan chuchuele Wia, an ka ma-na miira kaa birime gaari-dia.”

¹⁴ Nii ne nyulimaa ari gbeisin ko Yesu teen Wia-dia le. U vaareba.¹⁵ Ama nialin si kpu pusun pipi Wia

kuhiasinj ari Wia teninj kerichiba si na wu-magila-la u sii n̄aa a bira na han̄biisinj s̄ii n̄aa gon̄ n̄ii Wia-dia le, ba na baaniñ. Han̄biisi-la fa yire, “Tabarikala Devit nihiñ.” ¹⁶ Nii n̄e nialinj si kpu pusun̄ pipi Wia ari Wia teninj kerichiba piẽse Yesu a bul, “N̄ nii wialinj ba s̄ii bul n̄e?” Yesu bul, “Mi nia n̄e.” Nii n̄e Yesu ma piẽseba, “Ma bi Wia teninj karimaa? Ba n̄mun̄se Wia teninj tuon̄ a bul, ‘Wia jan̄ len̄ di bii-mullun̄ didenne Wia.’ ”

¹⁷ Nii n̄e Yesu len̄ba an̄ sii mu Betani a chua dime.

*Yesu kaliba h̄e tutogo le
Maak 11.12-14, 20-24*

¹⁸ Tan̄ si pula, Yesu miira mu Jerusalem. U s̄ii mu, losun̄ kenu won̄biinj le. ¹⁹ U na tutogo duu chin̄ u sipaan̄ won̄biinj niinj. U mu yi tutogo-la bubuon̄ a wula ben̄ di nen̄e tuo, see pipaariñ. Nii n̄e u bul tia-la le a bul, “A lii jiniñ a kaa mumu, n̄ bira bi jan̄ nen̄.” Tia-la guu suu. ²⁰ U haritooro si na wiinj deen̄, u n̄aaba wu-kpun̄kpere. Ba pipiẽse don̄o a bul, “Eẽ n̄e tia-la guu suu lima nii?” ²¹ Nii n̄e Yesu bula piba a bul, “Wutitii n̄e mi bulaa pima, di ma n̄e ken̄ yarida a bi tuosaa balia ken̄e, ma ma jan̄ wuo n̄aa wii-la si n̄aa tutogo-la le. N̄la ma dun̄dun̄a dee, ama ma jan̄ wuo paala bul peelin̄ deen̄ le duu sii a mu tel muga tuon̄. U jan̄ n̄aa pima. ²² Kialinj-na kala ma si chuol̄e Wia a susul, di ma n̄e ken̄ yarida, ma jan̄ naba.”

*Niaa piẽse Yesu u dolun̄ wiaa
Maak 11.27-33; Luuk 20.1-8*

²³ Ba si mu Jerusalem, Yesu mu juu Wia-dia. U si juu Wia-dia-la nii a didage niaa, nialinj si kpu pusun̄ pipi Wia kuhiasinj ari Wia teninj kerichiba ari Juu tin̄n̄aa kuhiasinj, ba kala sii ko u teen̄ a piẽsu a bul, “Dol b̄e n̄e n̄ ken̄ a n̄in̄aa wiaa deen̄ba? Kub̄e n̄e pin̄ dolun̄ n̄ kaa n̄in̄aa nii?” ²⁴ Nii n̄e Yesu bula piba a bul, “Mi ma jan̄ piẽsema wu-bala. Di ma n̄e dagemi u bubuon̄, mi ma jan̄

dagema dol-la mi si ken̄e bubuon̄.”

²⁵ Nii n̄e u piẽseba a bul, “J̄on̄, Wia lii-foori-la dolun̄, u lii nii n̄e? U lii Wia teen̄ n̄e koo u lii nuhuobiine teen̄ n̄e? Má dagemi.” Ba suomo ken̄ wii-la lilere don̄o le aa bul, “Wu-b̄e n̄e laa che di la bul? Di la n̄e bula pu a bul di Wia teen̄ n̄e u lii, u jan̄ piẽsela a bul, ‘B̄e n̄e saa tii ma bi wialinj u si bula laa dii?’ ²⁶ Di la n̄e saa si u lii nuhuobiine teen̄ n̄e, fawullun̄ jan̄ ken̄la a tin̄ ni-dan̄-la si chin̄ dime wiaa. Niaa bula ari J̄on̄ fa sene n̄aa nialinj s̄ii bul wiaa, Wia Diñ-zon̄-la dolun̄ le don̄o n̄e.” ²⁷ Nii n̄e ba bula pi Yesu a bul, “La bi jin̄.” Nii n̄e Yesu ma bula piba a bul, “T̄oo, mi ma bi jan̄ dagema dol-la mi si ken̄e bubuon̄.”

²⁸ Nii n̄e Yesu mage namaga a pi nialinj si kpu pusun̄ pipi Wia kuhiasinj ari Juu tin̄n̄aa a bul, “Baal kubala n̄e h̄e dime a ken̄ han̄bolibiisinj balia. U sii mu u bii-hian̄ teen̄ a bula pu a bul, ‘Mi bii, mu бага jiniñ a tin̄.’ ²⁹ Nii n̄e bile bul, ‘Mi bi jan̄ mu бага jiniñ.’ U nii hariñ le, u tuon̄ chei wii-la u si bula pi u nyimma le an̄ sii mu бага-la. Nii n̄e ba nyimma bira mu a bul u bii-bie-la ma le a bul duu mu бага. Nii n̄e bile bul duu jan̄ mu an̄ via. ³⁰⁻³¹ Han̄biisinj deen̄ba balia tuon̄, kub̄e n̄e to ba nyimma niinj le? B̄e n̄e ma biĩn̄e?” Nii n̄e ba bula pu di u bii-hian̄-la n̄e. Nii n̄e Yesu bula piba a bul, “Wutitii, mi bulaa pima ari lan̄poo lilaaraa ari jagumuloba jan̄ laa sipaan̄ ma le a juu Wia kuorii-la tuon̄. ³² B̄e wiaa J̄on̄ Wia lii-foori-la ko a dagema won̄bii-titii-la n̄e ma si jan̄ to, an̄ ka ma bi u wiaa laa dii, ama lan̄poo lilaaraa ari jagumuloba, ba laa u wiaa dii. Ma si paala na ba si laa u wiaa dii nii, an̄ ka ma ha bi birima di ma laa u wiaa dii.”

*Yesu mage namaga a tige nialinj
s̄ii tin̄ tin̄in̄n̄aa бага le*

Maak 12.1-12; Luuk 20.9-19

³³ Nii n̄e Yesu bira mage namaga don̄o a bul, “Baal kubala n̄e bil бага

a chɔŋsɛ kiaa si kɛŋ nɛnɛɛ yugɛ a nage chichuɛŋ. Ba yiyirɛ gireps. U saa ligɛ baga-la golli nɛ. U lu bua baga-la tuɔŋ di ba chagɛ tii-nɛnɛ-la liiŋ hiɛ. U ma saa lusun nyun dia a hɔnɔ pɔ. Nii nɛ u paa niaa a hɛ u baga-la tuɔŋ di ba titiŋ. Ka u mu taŋ dɔŋ. ³⁴ Tii-nɛnɛ-la biiniŋ si yie, u tiŋ u dia tiŋtinnaa di ba mu tiŋtinna-la teenŋ di ba mu laa tii-nɛnɛ-la kaa kɔ. Ba mu. ³⁵ Ba kɛŋ dɔŋɔ a ŋmobu, a kpu dɔŋɔ, a yagɛ dɔŋɔ ari tabiaa a kpuu. ³⁶ Nii nɛ u tiŋ niaa dɔŋsun a wasa kii bunbun-la. Ba ŋaa ŋii titia nialiŋ ma lɛ. ³⁷ Nii hariŋ lɛ nɛ u tiŋ u bie. U biina duu bie nɛ mua, ba jaŋ zilu. U ma bira mu. ³⁸ Tiŋtinna-la si na bile, ba bula pi dɔŋɔ a bul, ‘Di baga-la tiina nɛ suba, bie deen nɛ jaŋ dii u kiaa. Má kɔ di la kpuu. Di la nɛ kpuu, la nɛ jaŋ miira tii u kialin.’ ³⁹ Ba kɛŋ bile a jonu yuo ta baga-la hariŋ a kpuu.” ⁴⁰ Nii nɛ Yesu piɛsɛba, “Di baga-la tiina nɛ kɔ, ɛɛ nɛ u jaŋ ŋaa baga tiŋtinna-la lɛ?” ⁴¹ Nii nɛ ba bula pu a bul, “U jaŋ kɔ a kpu ni-bɔmɔ-la aŋ jon baga-la a pi ni-tania. Di tii-nɛnɛ-la biiniŋ nɛ yi, ba jaŋ kɛŋ tii-nɛnɛ-la kaa mu pu.”

⁴² Nii nɛ Yesu piɛsɛ nialiŋ si nii namaga-la, “Ma bi Wia ten-la kari-maa? a mu yi lee-la ba si bul ŋla:

‘Tiepii-la dii-saaraa si via,
u nɛ miira ku ŋaa tiepii-duonŋ ba
si jonɔ bil dia gentine.

La Tiina Wia tiŋtiŋŋaa nɛ ŋii.

U ŋaala wu-kpunkpere nɛ.’ ”

⁴³ Nii nɛ Yesu bula pi nialiŋ a bul, “Wia jaŋ kɛŋ u kuorii-la laa ma teenŋ, a jonɔ pi nialiŋ si jaŋ to Wia niin worunŋ a ŋiŋaa wialiŋ si jaŋ dage ari ba birima lii ba haacheba lɛ nɛ. [

⁴⁴ Nii-la si tel tiepii-la nyunŋ, u tiina jaŋ yerɛ muno muno. Di tiepii-la ma nɛ tel nuu-kala nyunŋ, u jaŋ yerɛ u tiina muno muno.]”

⁴⁵ Nialiŋ si kpu pusun pipi Wia kuhiasinŋ ari Farisii tiŋŋaa nii Yesu si mage namaga-la a jinŋ ari ba wiaa nɛ u bubul ŋii. ⁴⁶ Nii nɛ ba wiwalime di ba kenu kaa mu tɔ dia. Ama ba faa fá ni-dan-la si hɛ dime, bɛɛ wiaa

ni-dan-la jonŋ Yesu ari u ŋaa nialiŋ sii bul wiaa, Wia Diŋ-zɔŋ-la dolunŋ lɛ dɔŋɔ nɛ.

22

*Yesu mage namaga a tige ha-jaari
gbiele kudiilee lɛ*

Luuk 14.15-24

¹ Nii nɛ Yesu bira mage namaga dɔŋɔ a didagɛ niaa. ² U si, “Wia kuorii-la nage kuoru kubala nɛ. U bie jaa haala. Nii nɛ u ŋaa ba gbigbieli ha-jaari gbiele a ŋaa ba yirɛ niaa di ba kɔ gbiele-la. ³ Ba si ŋaa kudiile-la dɛrɛ, u tiŋ u tiŋtinnaa di ba mu yirɛ nialiŋ u si yira, ari ba ŋaa siri di ba gbieli gbiele-la nɛ. Ba si mu yirɛba, ba via. ⁴ Nii nɛ u bira tiŋ u tiŋtinnaa dɔŋsun di ba mu bula pi nialiŋ u si yira di ba kpu nɛ-belliŋ ari nɛ-niiniŋ kala nɛ a ŋaa kudiile-la dɛrɛ, di ba kɔ ha-jaari gbiele-la. ⁵ Nii nɛ nialiŋ u si yira bira via di ba mu aŋ titiŋ ba tiŋtiŋŋaa. Dɔŋɔ sii mu u baga, dɔŋɔ ma sii mu u kiaa di-yalliŋ. ⁶ Ka dɔŋsun ma kesɛ kuoro dia tiŋtinna-la a ŋmooba aŋ kpuba. ⁷ Nii nɛ kuoru-la na baaniŋ a ta u laali-yuoroo. Ba mu kpu nialiŋ si kpu u dia tiŋtinna-la aŋ nyige ba taŋ kala. ⁸ Nii nɛ u yirɛ u tiŋtinnaa dɔŋsun a bira bula piba, ‘Mi gbiele kudiile-la ŋaa siri nɛ, ama nialiŋ mi si yira bi maga di ba kɔ gbiele-la. ⁹ Má saa lii mu wonpii-porununŋ a yirɛ nialiŋ kala ma si na dime a bula piba di ba kɔ a dii kudiile-la.’ ¹⁰ Nii nɛ tiŋtinna-la lii wonpii-porunu-la a yirɛ nialiŋ kala ba si na lee-la, ni-zɔŋŋɔ ari ni-bɔŋŋɔ kala. Nii nɛ ba kala ku juu su dia-la lɛ ba fa sii gbieli gbiele-la.

¹¹ Nii nɛ kuoru-la juu duu na nialiŋ si kɔ a na baal kubala duu bi ha-jaari gbiele gerinŋ laala. ¹² U piesu a bul, ‘Mi nanɔŋ, ɛɛ nɛ ŋ ŋaa ku juu daha aŋ bi ha-jaari gbiele gerinŋ laala?’ Baal-la tɔrɛ u niinŋ. ¹³ Nii nɛ kuoru-la bula pi u tiŋtinnaa a bul, ‘Má kɛŋ baala deenŋ a vɔɔ u nisaa ari u naasiŋ a jonu yuo ta jeenŋ hariŋ

birimiŋ tuɔŋ duu pina yiyel aŋ didiŋ u nyilaa.’ ” ¹⁴ Nii ne Yesu bula dɛrɛ aŋ bul, “Ba yie yirɛ niaa yugɛ nɛ, ama ba tuɔŋ ba yie tuɔsɛ niaa banmɛnɛ nɛ.”

Ba bul lanɓoo tɔmiŋ wiaa

Maak 12.13-17; Luuk 20.20-26

¹⁵ Nii ne Farisii tinɓaa sii lii a vuurɛ nii ba si jaŋ magisɛ Yesu a berɛ kenu ari wu-piesaa. Nii ne ba tin ba haritooroo dɔŋsun ari Herɔd ma haritooroo dɔŋsun di ba mu Yesu teen. ¹⁶ Nii ne ba ko u teen a piesu a bul, “La kuhian, la jima di ŋ ken wutitii ne a didage Wia tonuŋ wonbii-titii-la. N sipaan tuo nuu le. N bi ni-bal sɔi ka fá. ¹⁷ Saa bula pila ari u ŋaa wonbii nɛɛ di la tin lanɓoo a pi Rom tinteen kuori-balin ba sɔi yirɛ Siiza? Ɛɛ ne ŋ ma biine?” ¹⁸ Yesu fa jin ba tuɔbiin-bɔmɔ-la ne a bula piba a bul, “Ma kanfugi timma! Bɛɛ ne tii maa magisemi? ¹⁹ Má ken ma lanɓo-la moribiin kaa ko di mi bee na.” ²⁰ Ba ken dɔŋɔ kaa ko. Nii ne u piesɛba, “Kubɛɛ nyuŋ ne he dime? Kubɛɛ yirin ma ne ba tuuro he moribii-la le?” ²¹ Nii ne ba bul di Siiza yirin nɛ. U bula piba a bul, “Tɔɔ, má joŋ Rom tinteen kuori-bal-la kiaa pu aŋ joŋ Wia ma kiaa pu.” ²² Yesu si bul nii, u ŋaaba wu-kpuŋkpere ba sii viiri.

Ba piesɛ Yesu a tigɛ nialin si suba le.

Maak 12.18-27; Luuk 20.27-40

²³ Chɛɛ-la titia nialin dɔŋsun ba sɔi yirɛ Sadiusii tinɓaa, ba ko u teen. Sadiusii tinɓaa yie si di nuu ne suba, u bira bi sii. Ba piesu wiaa a bul, ²⁴ “La kuhian, Moosis fa si di baala ne jaa haala, di haal-la ari baal-la ne bi bii lula, aŋ ka di baal-la suu, u maga di u ŋaana joŋ yo-haal-la jaa nɛ. Di u lul biirin pi u maala-la si suba, biiri-la jaŋ chin u nyuŋ le. ²⁵ Naanbiirin balipe ne fa he dime. Ba kala ŋaa baalaa. Ba naan kubala, ba nyimma kubala. Ba kuhian jaa haala. Ba di haal-la bi bii lula, aŋ ka u suu. U si suba, u ka haal-la a

pi u ŋaana dɔŋɔ nɛ. ²⁶ Liamin ma suu. Torimuŋ tiina ma joŋ haal-la jaa. U ma nii titia nɛ. Naanbiiri-la balipe kala ne jaa haal-la. U bi lula. ²⁷ Nii hariŋ le ne haal-la ma titia suu. ²⁸ Tapulii-la niaa si jaŋ sii suuŋ le, baalaa deenba balipe tuɔŋ, kubɛɛ ne jaŋ tii haal-la? Ba kala balipe ne jaau.”

²⁹ Nii ne Yesu bula piba a bul, “Ma bi Wia tenin jin. Ma ma bi Wia doluŋ jin. Nii ne tii ma yenŋi. ³⁰ Tapulii-la niaa si jaŋ sii suuŋ le, baalaa bira bi jaŋ jaa haalaa, haalaa ma bira bi jaŋ jaa balaba. Ba kala jaŋ nage Wia tinɗaaraa si he Wia-jaŋ le.” ³¹ Nii ne Yesu bula piba a bul, “Na ma piesemi nialin si jaŋ sii suuŋ le wiaa nɛ. Ma bi karime wialin Wia fa si bula pi niaa u tenin leɛ? ³² U fa si duu ne ŋaa Abiraham Wia ari Aizik Wia ari Jekɔb kala Wia. (Buala le u si bul nii di Abiraham ari Aizik ari Jekɔb fa suba nɛ.) Wiaa deenba u si bula, ba bubuɔŋ ne di Abiraham ari Aizik ari Jekɔb bira sii suuŋ le ne a he Wia kuorii-la tuɔŋ. Wia bi jaŋ wuo ŋaa nialin si suba Wia, u ŋaa ni-weyee Wia nɛ.” ³³ Ni-dan-la si nii nii u sɔi dage niaa, u ŋaaba wu-kpuŋkpere.

Wialin si maga di la ŋiŋaa, ba tuɔŋ wu-balin

Maak 12.28-34; Luuk 10.25-28

³⁴ Farisii tinɓaa si nia ari Yesu bul wiaa lo Sadiusii tinɓaa ba ŋaa fuui, ba kala ku pe dɔŋɔ le. ³⁵ Nii ne Wia tenin kerichiba dɔŋɔ wiwalime duu magisɛ Yesu a pipiesu wiaa. ³⁶ U piesɛ Yesu a bul, “Kuhian, wialin Wia si dage niaa baa to, kubɛɛ ne ŋaa ba tuɔŋ siifian wiin?” ³⁷ Nii ne Yesu bul, “ ‘Ken ŋ tuɔŋ kala ari ŋ tuɔbiinaa kala ari ŋ wii-wii-kala a cho ŋ Tiina Wia.’ ³⁸ Wialin Wia si dage niaa baa to, ba tuɔŋ wu-balin ari ba tuɔŋ bunbuŋ ne nii ari ba tuɔŋ siifian wiin ne nii. ³⁹ Wu-liamin ma ne ŋla: ‘Cho ŋ dɔŋɔ tiina ari ŋ si cho ŋ titia nii.’ ⁴⁰ Wialin Moosis fa si ŋmuŋsa bil di niaa tuto

ari wialin kala nialin sii bul wiaa, Wia Din-zon-la dolun le, ba kala lii wiaa deenba baliamin tuon ne."

Ba piese nii-la Wia si liisa wiaa.

Maak 12.35-37; Luuk 20.41-44

⁴¹ Farisii tinjaa ha si hilimi nii, Yesu ma pieseba a bul, ⁴² "Bee ne ma biine Kirisito, nii-la Wia si liisa wiaa? Kubee doho nuu ne u naa?" Nii ne ba bul duu naa Devit doho nuu ne. ⁴³ Nii ne Yesu bira pieseba a bul, "Bee ne saa tii Wia Din-zon-la fa dage Devit duu kenu yire u Tiina?" ⁴⁴ Nla ne u bul:

'Mi Tiina Wia bula pi mi Tiina duu hon u seme, ni-duon di-honun, see duu yuo dii u dindonho kala dere.'

⁴⁵ Devit titia si yire nia deen u Tiina, ee ne saa u jan wuo naa u nihin dunduja?" ⁴⁶ Yesu si bul nii, nuu-kala bira bi wii wuo bul. A chin tapulii-la kala a kaa mu, nuu-kala ma bira bi nyu-duon kene duu piesu wii-kala.

23

Yesu bul wiaa, Wia tenin kerichiba ari Farisii tinjaa teen

Maak 12.38-40; Luuk 11.39-44, 46, 52; 20.45-47

¹ Nii ne Yesu bula pi ni-dan-la ari u haritooro a bul, ² "Wia tenin kerichiba-la ari Farisii timma-la, ba ne naa nialin sii dage wialin Moosis fa si bile di niaa tuto. ³ Nii wiaa ma maga di ma to wialin kala ba si bula pima di ma naa, ama ma si ba wu-naalaa chesu, bee wiaa ba titia bi wialin ba sii dagu ka to. ⁴ Ba yie voo chugi-yunoo ne a kaa chun niaa, ama ba titia bi che di ba peba le a laa chuga-la. ⁵ Ba yie naa wii-kala di niaa naba ne. Ba yie nmunse Wia niin wiaa a he ten-jalaa le a kaa vuvoo ba gennin nisaa le ari ba nyun-chuulun le an len ba gennin juosaa ma duomi duomi. ⁶ Di niaa ne yireba di ba ku dii kiaa, ba cho di ba hon ni-balaa di-honoo. Ba ne juu Wii-chuole diisin maa, ba cho

di ba hon ni-balaa di-honoo. ⁷ Ba yie chiche di niaa chuchuoleba an jujonba jirima niaa tuon an yiyireba kerichiba. ⁸ Ama ma-na si lenje di niaa kenma kaa yire kerichiba. Ma kala naa naanbiirin ne. Ma kala kerichi naa kubala ne. ⁹ U saa bi maga di ma yire nuu-kala ma nyimma dunia deen le, bee wiaa ma Nyimma naa kubala ne a he Wia-jan. ¹⁰ Ma bira si nuu-kala yire ma kuhian, bee wiaa ma kuhian ne naa Kirisito, nii-la Wia si liisa. ¹¹ U maga di ma tuon kuhian ne birime hanbie a tin tintinjaa pipima. ¹² Nii-la kala sii bigisi u titia le, Wia jan kenu muuri, ka nii-la ma si ken u titia muuri, Wia jan naa duu yuge.

¹³ Ma Wia tenin kerichiba ari ma Farisii tinjaa, ma kanfugi timma-la, ma jan na heen. Ma ken Wia kuorii-la dia-boro yage ne di niaa si juu, bee wiaa ma titia bi che di ma juu, an bira po di nialin sii walime di ba juu, di ba ma si juu. [¹⁴ Ma Wia tenin kerichiba-la ari ma Farisii timma-la, ma kanfugi timma-la, ma jan na heen. Ma yie ken yo-haalaa kiaa laa didii a yie fugo chuole Wia didieni. Bua-la le Wia si jan dii ma sariya, ma ne jan na heen a kii nuu-kala.]

¹⁵⁻¹⁶ Ma Wia tenin kerichiba ari ma Farisii tinjaa, ma kanfugi timma-la, ma jan na heen. Ma yie sii a duori liin a mu tinteyee donsun a bul Wia wiaa dime. Di ni-bala ne laa dii, ma yie len u wasa bon a nage ma si nage nii ne. Wia ma jan jonu he nyinin le ari u si jan jonma he nii. Ma nyulun sipaa-laaraa, ma jan na heen. Ma yie bul, 'Di nuu ne nmiese Wia-dia, u bi nmian naa, ama duu ne nmiese selime kialin si he Wia-dia tuon, u chaasa nmiese nmian ne.' ¹⁷ Ma nyulun-toon ne! Selime kialin si he Wia-dia tuon ari dia-la si naa selime-la bi disinnin kene, deenba balia tuon kubee ne yuga? ¹⁸ Ma bira bula di nuu ne nmiese koru-la le ba si kpu pusun pipi Wia, u bi chaasa nmiese nmian, ama duu ne nmiese

ku-la ba si yie joŋo dan koru-la nyuŋ a pi Wia, u chaasa ŋmieŋe ŋmian nɛ. ¹⁹ Ma nyulimaa, ku-la ba si yie joŋo dan koru-la nyuŋ ari koru-la si ŋaa di ku-la bi disinnin kɛnɛ, kiaa deenba balia tuɔŋ kubɛɛ nɛ yuga? ²⁰ Nii wiaa di nuu nɛ ŋmieŋe koru-la ɛ ba si yie kpu pusun pipi Wia, u yie ŋmieŋe ba di ku-la kala nɛ ba si yie joŋo dan u nyuŋ a pi Wia. ²¹ Di nuu nɛ bira ŋmieŋe Wia-dia, u ŋmieŋe Wia dia-la ari Wia kala nɛ, bɛɛ wiaa Wia hɛ dia-la ɛ nɛ. ²² Di nuu nɛ bira ŋmieŋe Wia-jaŋ, u ŋmieŋe Wia kuori-kpasa-la ari nii-la si hoŋ u ɛ ma nɛ.

²³ Ma Wia tenin kerichiba ari ma Farisii tinŋaa, ma kanfugi timma-la, ma jaŋ na hɛɛŋ. Di ma jaa pipaari-la suɔra si sima, ari pipaari-la si heyɛ, ari pipaa-diilee, ma yie kɛŋba kala kaa kpaa leree fii fii a joŋ ba kuŋ-kala lerin doŋo a pi Wia aŋ via di ma to siifian wialin Moosis fa si bile pima di ma tuto. Ba nɛ ŋla: Má to wutitii wonɓiin a fá niaa nennige a laa Wia dii. U maga di ma kpaa ma kialin leree fii fii nɛ a joŋ kubala pi Wia, ama u bi maga di ma via wutitii wonɓiin. ²⁴ Ma nyulun sipaa-laaraa! Ma yie chuori ma sinin a liise nanɗchuɔsun kala ta aŋ bi bunɗanɗaba na aŋ liliŋ.

²⁵ Ma Wia tenin kerichiba ari ma Farisii tinŋaa, ma kanfugi timma-la, ma jaŋ na hɛɛŋ. Ma yie chɛsɛ ma nyunyualusun ari ma gbanŋin hariŋ woruŋ di ba zɔŋ aŋ bi ba tuɔŋ ka tiisi, ka ba tuɔŋ kala birisi. Ma nage nyunyualuŋ ari gbanŋin deenba nɛ. Ma yaraa nɛ zɔmɔ, ama ma tuɔŋ ɛ ma to ma tuɔtoruŋ ɛ a gigaa niaa kiaa. ²⁶ Ma nyulun Farisii tinŋaa, má laa sipaan tiisi ma nyunyualuŋ tuɔŋ aŋ-na tiisi hariŋ ma duu zɔŋ.

²⁷ Ma Wia tenin kerichiba ari ma Farisii tinŋaa, ma kanfugi timma-la, ma jaŋ na hɛɛŋ. Ma nage vaamaa ba si kɛŋ tuɔruŋ bugɛ nɛ. Ba hariŋ zɔŋ, aŋ ka ba tuɔŋ kala su ari hanɗbelee ari ni-suunuŋ. ²⁸ Nii titia nɛ ma ma nage niaa teen. Di ba nama, ba yie

biine di ma ŋaa ni-zɔmɔ nɛ, ka ma tuɔŋ su ari wu-bɔŋŋɔ ari kanfugi wu-ŋaala.

Yesu bul niaa doŋisun wiaa.

Luuk 11.47-51

²⁹ Ma Wia tenin kerichiba ari ma Farisii tinŋaa, ma jaŋ na hɛɛŋ. Ma kpu nialin fa sii bul wiaa, Wia Din-zɔŋ-la dolun ɛ, aŋ ka ma saa ba vaamaa. ³⁰ Ma si, 'Di la nɛ fa he dime bua-la ɛ la naabalimaba fa si hɛ ba miisin ɛ, la fa bi jaŋ ŋaa nii ba si ŋaa a kpu nialin.' ³¹ Ama ma si yireba ma naabalimaba nii, ma sene sei ari ma ŋaa nialin si kpu nialin fa sii bul wiaa, Wia Din-zɔŋ-la dolun ɛ, ba doho niaa nɛ. ³² Má saa mu a dere wialin ma naabalimaba fa si suoma a ŋinɛ. ³³ Ma ni-bɔŋŋɔ ari ma ni-bɔŋŋɔ biirin, ma biina ari ma jaŋ wuo fá kage Wia nyin-la ɛɛ? Ai. ³⁴ Nii wiaa, mi jaŋ bira tin nialin sii bul wiaa, Wia Din-zɔŋ-la dolun ɛ ari wu-jinnaa ari kerichiba. Ma jaŋ kpu doŋsun a kɛŋ doŋsun kpaasa mere daa-geŋɛ nyuŋ, a viire doŋsun maa, ma Wii-chuɔɛ diisin ɛ, a to naasin doŋise doŋsun maa tasin doŋsun ɛ. ³⁵ Wia jaŋ doŋise jinin niaa a tin ba si kpu niaa, a chin bua-la ɛ ba si kpu nialin si bi wii cheye, a suomi Ebil ɛ a kaa ko bua-la ɛ ba si kpu Zekaraya, Berakia bie. Ba kpuu Wia-dia tuɔŋ a kpage koru-la nyuŋ ba si yie nyige pusun pipi Wia nɛ. Ba cheerin jaŋ hɛ ba nyuŋ. ³⁶ Wutitii nɛ mi bulaa pima, doŋisunu-la Wia si jaŋ doŋise ni-kpuuraa deenba, u jaŋ joŋo doŋise jinin niaa.

Yesu bul wiaa a tige Jerusalem niaa ɛ

Luuk 13.34-35

³⁷ Ma Jerusalem niaa, ma kpu nialin sii bul wiaa, Wia Din-zɔŋ-la dolun ɛ a joŋ tabiaa a yage tinɗaara-la Wia si tima di ba ko ma teen. Naanŋiin yuga nɛ mi fa cho di mi chu to ma niaa kala ari jimin si yie chu to u biirin nii, ka ma bi seye. ³⁸ Bee na, Wia jaŋ len ma taŋ pima. ³⁹ Ma bira bi jaŋ nami see bua-la ɛ

ma si jaŋ chuolemi a bul, 'Wia jaŋ pe nii-la sii ko la Tiina Wia doluŋ e.' "

24

*Yesu bul Wia-dia ŋmolonuŋ wiaa
Maak 13.1-2; Luuk 21.5-6*

¹ Nii ne Yesu sii lii Wia-dia-la e a viiri. Nii ne u haritooro ko a bula pu duu bee na Wia-dia-la si zomɔ nii, u jaŋ kala ma saa zomɔ nii ne. ² Nii ne Yesu si, "Oo, ma bee na u si zomɔ nii ne. Wutitii, mi bulaa pima, ba jaŋ ŋmoo jaŋ-la kala lo. Ba bi jaŋ leŋ di tiebii-bala ma ka dan u doŋo e."

*Dogisuŋ ari wiwalimaa.
Maak 13.3-13; Luuk 21.7-19*

³ Nii ne Yesu mu hoŋ Oliv peel-la nyuŋ. U haritooro luɔra ko u teen a bira piesu a bul, "Bua bee e ne ne wiaa deenba jaŋ ŋaa? Bee kaa ne la jaŋ na a jin bua-la e ŋ si jaŋ ko, ari bua-la e dunia si jaŋ deere?" ⁴ Nii ne Yesu bula piba a bul, "Ma keŋ ma titia woruŋ di nuu-kala sima nyisu. ⁵ Niaa jaŋ yuge a ko a joŋ mi yirin he ari ba ne ŋaa Kirisito, a nyise niaa yuge. ⁶ Ma jaŋ nii ari laalin he daha a he di-bolii. Di ma ne ku nii nii, ma si leŋe di ma boye joŋ. Wiaa deenba kala jaŋ ŋaa bal, ama dunia diderin ha dee nii. ⁷ Tinteen doŋo niaa jaŋ sii a mu a yuo tinteen doŋo niaa. Taŋ kuoro ari u niaa jaŋ sii giri a mu yuo kuoro doŋo ari u niaa. Losuŋ ma jaŋ juu. Tinteen jaŋ zigili leree yuge. ⁸ Heeŋ di-suomuŋ ne ŋla.

⁹ Ba jaŋ kesema a joŋma he niaa nisin e di ba dogisema aŋ kpu ma doŋsuŋ. ¹⁰ Tintee doŋsuŋ niaa kala jaŋ berema a tin mi wiaa. Bua-la e niaa jaŋ yuge a joŋ ba yarida ta, ba jaŋ joŋ doŋo yiyalle, a bere doŋo maa. ¹¹ Nialin si nyia wiaa a bul di baa bul wiaa, Wia Diŋ-zoŋ-la doluŋ e, ba jaŋ yuge a ko a nyise niaa yuge. ¹² Wu-boŋŋoo jaŋ purike. A tin nii wiaa niaa fa si cho niaa nii, ba chonu-la jaŋ deere. ¹³ Ama nii-la kala si nyalime a mu deere, Wia jaŋ laau

ta. ¹⁴ Ba jaŋ laa sipaan bul Wia wu-zomɔ-la a tige Wia kuorii-la e lee-na kala di dunia nuu-kala nii, ka di dunia diderin-na yi.

*Yesu bul wiaa a tige ku-loru-la si
jaŋ he dime*

Maak 13.14-23; Luuk 21.20-24

¹⁵ Ma jaŋ na ku-loru-la, u wiaa Daniel fa si bula. Daniel fa ŋaa nii-la sii bul wiaa, Wia Diŋ-zoŋ-la doluŋ e ne. Ba jaŋ joŋ ku-la bil Wia-dia e, lee-la si bi disinnin kee (lee-la nii-la si keŋ disinnin si bi maga duu mu). Ma nialin si karime wiaa deenba, ma jaŋ jin ba bubuɔsaa. ¹⁶ Di ma na nii, ma leŋ di nialin si he Judiya e, di ba fa jil peelee nyuŋ a faa. ¹⁷ Di nuu ne he u lusuŋ nyuŋ a nii wiaa deenba, di u ne ku tuu, duu si u dia juu a chiche duu paa u kaa dia e. ¹⁸ Di nuu-kala ne he u бага e a nii wiaa deenba, duu si miira mu dia a chiche duu paa u gennin. ¹⁹ Nialin si keŋ luoro ari nialin si noŋe biirin, oi, ba jaŋ na heeŋ woruŋ. ²⁰ Ma sul Wia di wiin deen si yibiinin koo che-wiesin ŋaa. ²¹ Wia si ŋaa dunia a kuu lii jinin, nuu-kala ha bi hee-yiri deen na a nage nii, ba bira bi jaŋ na heeŋ nii a kaa mu wuu. ²² Di Wia fa bi tapulia-la kere ta, ni-bala ma fa bi jaŋ ka. Ama nialin Wia si liisa di baa tou, ba wiaa ne tii u keru tapulia-la ta. ²³ Di nuu-kala ne bula pin di ŋ beŋ daha a na Kirisito-la, koo di ŋ beŋ dime a nau, siu yarida ŋaa. ²⁴ Niaa doŋsuŋ jaŋ sii fugo bul di ba ne ŋaa Kirisito, nii-la Wia si liisa. Doŋsuŋ ma jaŋ sii fugo bul di ba ŋaa nialin sii bul wiaa, Wia Diŋ-zoŋ-la doluŋ e ne. Ba jaŋ ŋaa wu-magilaa ari wu-kpunkperisin kala a chiche di ba nyise nialin Wia si liisa di baa toba. ²⁵ Wiaa deenba kala mi laa sipaan bula pima ne, ka di bua-la-na yi. ²⁶ Ma bee na, di niaa ne bula pima ari nii-la Wia si liisa ne he giri-bine tuoŋ, ma si dime mu, koo di ba ne bula pima ari u ne faa daha, ma si laa dii, ²⁷ bee wiaa bua-la e mina Nuhuobiine Bie si jaŋ miira ko, u

jan nage duonun si ligisa, pulumun chaane wia nyun nii a lii wii-posun a tuu wii-juulun. ²⁸ Lee-la kala kupua si pina, duunoo ma yie hihilimi ne.”

*Nuhuobiine Bie koonun wiaa
Maak 13.24-27; Luuk 21.25-28*

²⁹ Nii ne Yesu bira bula piba a bul, “Tapulia-la heen deen si jan dere, u bira bi jan dieni, di tan ne pula maa, lerin jan biri, chene ma bira bi jan pose. Chenwulaa jan lii wia nyun ku tuu titel. Ba jan kiri wia nyun kialin kala si ken dolun di ba lii ba leree. ³⁰ Nii ne ma jan na mi-na Nuhuobiine Bie magilin wia nyun. Di dunia niaa ne nau, ba kala jan yel. Nii le ne ma jan na mi-na Nuhuobiine Bie, di mi to duonbilingbaanaa tuon ku tuu. Mi jan ken dolun yuge a chaane. ³¹ Nii ne ba jan nmuu nyil-balin, a tin Wia tindaaraa di ba mu dunia seme-na kala a ken nialin kala Wia si liisa di baa tou a hilimi.

*Yesu bul tutogo wiaa
Maak 13.28-31; Luuk 21.29-33*

³² Di ma na sojaamin ne kuu tose, ma jima ari linbana yie ne. ³³ Namaga deen dagema wu-jimin ne. Di ma na wiaa deenba kala di baa naa, ma jin di mi-na Nuhuobiine Bie kpagea ne. ³⁴ Wutitii mi bulaa pima, ma leele niaa deenba si he miisin le bi jan suu, ka wiaa deenba naa bal. ³⁵ Wia nyun ari tinteen kala jan dere, ama wialin mi si bula bi jan lel.

Yesu bul duu jan ko bua-la le la si buu yiele

Maak 13.32-37; Luuk 17.26-30, 34-36

³⁶ Ama nuu-kala bi jan jin chee-la wiaa deenba si jan naa. Wia tindaaraa si he Wia-jan ma paala bi jan jin, see mi Nyimma dunduna. ³⁷ Bua-la le mi-na Nuhuobiine Bie si jan miira ko, u jan nage bua-la le Nowa fa si he u miisin le ne. ³⁸ Ka di duonun nii a su dunia, nialin dii kudiilee a nyunyua sinin. Baalaa

ari haalaa ma jijaa dono a mu yi tapulii-la Nowa fa si juu lin daboro-la tuon. ³⁹ Ba fa bi jin wii-la kala si naa see bua-la le lii-la si ku pelle paa ba kala, ba suu. Nii titia ne jan naa bua-la le mi-na Nuhuobiine Bie si jan ko. ⁴⁰ Bua-la le baalaa balia jan pipere бага le. Wia jan jon dono an len dono ta. ⁴¹ Haalaa balia ma jan nunon munun nomun le. Wia jan jon dono an len dono ta. ⁴² Ma saa ken ma titia worun, bee wiaa ma bi jin tapulii-la ma Tiina si jan ko. ⁴³ Di nuu ne fa jin bua-la le gaara si jan ku gaa u kiaa u dia le, u fa jan hono po u dia. U fa bi jan pin don. U jan wei a po di gaaru-la si ku juu a gaa u kiaa. ⁴⁴ Ma saa naa siri, bee wiaa mi-na Nuhuobiine Bie jan ko bua-la le ma si buu yiele.”

Nii-la si naa tintinni-titii ari nii-la si bi tintinni-titii naa

Luuk 12.41-48

⁴⁵ Nii ne la Tiina Yesu miira pieseba a bul, “Kubee ne saa naa tintinni-titii-la si jin wiaa? U ne niila u kuhian si yie liise duu biben u dia, an pe pipi u tintinni-donsun ma kudiilee. ⁴⁶ Di tintinni-la naa wialin u kuhian si dagu duu naa, u tuon jan tore bua-la le u kuhian-la si jan miira ko. ⁴⁷ Wutitii, mi bulaa pima, u kuhian-la jan jon u kiaa kala he tintinna deen nisin le duu biben. ⁴⁸ Ama di tintinni-bomo-la ne bula pi u titia ari u kuhian-la jan dieni ⁴⁹ an suomo nmunmoo u tintinni-donsula, baalaa ari haalaa, an faasa didii kudiilee a nyua sinin bubugi, ⁵⁰ duu naa nii, u bi siri naa gberu u kuhian-la. U kuhian-la jan ko tapulii-la le u si bi yela. ⁵¹ U jan dogisu worun an kenu kaa mu he lee-la kanfugi timma-la si he. Lee-la ne niaa jan yel an didin ba nyilaa.”

25

Yesu mage namaga a tige haalaa fii le

¹ Nii ne Yesu bira mage namaga. U si, “Bua kubala le Wia kuorii-la jan

nage nla: Haalaa fii ne fa he dime. Ba sii a paa ba chaanaa a mu di ba chen ha-falin bala, ha-jaari gbiele-la le. ² Haala-la deenba tuon banon yaare, ka banon ma ken wu-jimin. ³ Banon-la si yaara, ba bi nuun logo kori, di ba chaanaa ne disa, di ba jonon he. ⁴ Ama banon-la si ken wu-jimin, ba loge nuun kori. ⁵ Ha-falin bala-la bi lima ko. Ba gberere gberere lol an jonon pin don. ⁶ Tita-siesee niaa yire, 'Ma bee na baal-la nii ko, ma ku lli chemu.' ⁷ Nii ne haala-la kala sii a ken ba chaanaa milima ta di ba jil. ⁸ Nii ne ni-yaara-la bula pi wu-jinna-la a bul, 'La chaanaa che di ba dise ne, ma pila nuun mua.' ⁹ Nii ne wu-jinna-la bula piba a bul, 'Ai, n bi po nuu-la bi jan yi la kala. Ma mu yoo ma titia nuun.' ¹⁰ Nii ne ba mu di ba yoo. Ba si mua di ba yoo nuu-la, ha-falin bala-la ko. Haala-la banon fa si naa siri, ba to u harin a juu ha-jaari gbiele-la lerin, ka ba ken boin to. ¹¹ U nii harin le haalaa banon-la ku-kaanaa ma ko a bul, 'La Tiina, la Tiina, ken boro suro pila.' ¹² Nii ne u bul, 'Wutitii, mi bulaa pima, mi bima jin.' ¹³ Nii wiaa ma po ma titia le woron. Ma bi jin tapulii-la la Tiina Yesu si jan ko."

Yesu mage namaga a tige tintinnaa batori le.

Luuk 19.11-27

¹⁴ Nii ne Yesu bira mage namaga a tige Wia kuorii-la le. U si, "Bua kubala le Wia kuorii-la jan nage baal kubala si ken u tintinnaa ne. Tapulii kubala u sii duu ven wonbin. Nii ne u yire u tintinna-la ba ko. U jon u kaa he ba nisin le di ba biben. ¹⁵ U ken kalin kaa kpaaba nii nuu-kala si wuo biben. U jon siidi bui zo-balia a pi donon duu biben, a jon siidi bui mahin banese a pi donon maa an jon siidi bui mahin balia a pi donon-la maa. Nii ne ka u ven u wonbin-la. ¹⁶ Tintinni-la si laa siidi bui zo-balia-la, u kaa mu a yoo kaa a yalle a na siidi bui zo-balia nyuuron. ¹⁷ Tintinni-la ma si laa siidi bui

mahin banese-la, u ma ken u kaa bibirime, a ma na siidi bui mahin banese nyuuron. ¹⁸ Ama tintinni-la si laa siidi bui mahin balia-la, u-na kaa mu lu bua a jon moribie-la a hugi. ¹⁹ U diene woron, ka tintinna-la batori kuhian-la ko a yireba duu na ba kun-kala si na nyuuron mage nii. ²⁰ Tintinni-la si laa siidi bui zo-balia-la ken u kaa ku juu an bula pi u kuhian a bul, 'N pimi siidi bui zo-balia ne, mi ma na siidi bui zo-balia ne pe.' ²¹ Nii ne u kuhian-la bula pu a bul, 'N naa tintinni-titii ne. N he donon ne a wuo ben kubie-bie-la nyun woron, mi jan len di n biben ku-kenere. Ku juu di la di n kala ninii sima.' ²² Nii ne tintinni-la ma si laa siidi bui mahin banese-la ma ken u kaa kaa ku juu a bula pi u kuhian a bul, 'N pimi siidi bui mahin banese ne. Mi ma na siidi bui mahin banese ne a pe.' ²³ Nii ne u bula pu maa, 'N ma naa tintinni-titii ne, n ma he donon ne a wuo ben kubie-bie-la nyun woron, mi ma jan len di n biben ku-kenere. Ku juu di la di n kala nii sima.' ²⁴ Nii ne tintinni-la u si jon siidi bui mahin balia pa, u ma ku juu a bul, 'Mi kuhian, mi jima ari n naa ni-tere ne, n yie kukun kalin n si bi duo ne an pipaa kalin lee-la n si bi tima. ²⁵ Nii ne tii mi fifan a jon moribie-la a hugi tinten di n ko. Laa n moribiee.' ²⁶ Nii ne u kuhian-la bula pu a bul, 'N naa tintinni-bon ne a ken yariwin. N jima ari mi yie kukun kalin mi si bi duo ne a paa kaa lee-la mi si bi tima. ²⁷ N si jin nla le, u fa maga di n jon mi moribiee bil lee-la ba sii bil moribiee ne. Mi fa si miira ko nla, mi fa jan laa moribie-la ari mi nyuuron kala. ²⁸ Nii-na ma laa moribie-la u teen a jonon pi nii-la si ken siidi bui zo-banese-la.' " ²⁹ Nii ne Yesu bula piba a bul, "Nii-la si paala ken kaa yuge ne, Wia jan wasa che a pe pu duu kaa yuge kinken, ama nii-la si bi faasa ken kaa yuge, muapilii-la ma u si kene, Wia jan kaa laa u teen. ³⁰ Ma ken tintinni-bomola a jonon

yuó ta birimiŋ tuóŋ. Lee-la ne nialin jaŋ yel aŋ didiŋ ba nyilaa.

Sariya che-diili-la si jaŋ yi

³¹ Di mi-na Nuhuobiine Bie ne dii mi kuoruŋ a kó, mi di Wia tinđaraa kala jaŋ kó. Nii ne mi jaŋ hoŋ mi kuori-kpasa nyuŋ a chaane. ³² Dunia nuu-kala jaŋ ku hilimi mi sipaang. Mi jaŋ kenba kaa kpaa leree balia, ari pie-daara si yie ken u piesee póre buunaa le nii. ³³ Mi jaŋ leŋ di tuó-pul tinđaa chin mi na-diin, ka di tuó-boŋ tinđaa ma chin mi na-gua. ³⁴ Nii ne kuoro jaŋ bula pi nialin si chin u na-diin a bul, 'Má kó. Mi Nyimma Wia ne pema le. Má ku dii Wia kuorii-la ba si wasa bilma le dunia di-suomuŋ. ³⁵ Bée wiaa, bua-la le losuŋ fa si kenmi, ma ŋaa kudiilee pimi mi dii, bua-la le lii-nyuasun ma fa si kenmi, ma ŋaa liin pimi mi nyua ne. Bua-la le mi fa si ŋaa nuhuóru, ma kenmi woruŋ ne. ³⁶ Bua-la le mi fa ken yaribiree ne, ma joŋ geriŋ laalemi. Bua-la le mi fa sí wiilu, ma beŋ mi nyuŋ ne, bua-la le ba si kenmi to dia, ma ku nami ne.' ³⁷ Tuó-pul timma-la jaŋ piesemi a bul, 'La Tiina, che bée ne la naŋ di losuŋ kenin la joŋ kudiilee pin, che bée ne lii-nyuasun kenin la ŋaa liin pin? ³⁸ Che bée ne la naŋ di ŋ ŋaa nuhuóru la kenin woruŋ, koo che bée ne la ma naŋ di ŋ ken yaribiree la joŋ geriŋ laalin? ³⁹ Che bée ma ne la naŋ di ŋ wiilu, koo di ba kenin to dia la ku naŋ?' ⁴⁰ Kuoru-la jaŋ bula piba a bul, 'Wutitii ne mi bulaa pima, bua-la kala le ma si ŋaa wu-zomuŋ a pi mi naanbiirin deenba tuóŋ nii-la si bi lee kene, ma ŋaa nii pimi ne.' ⁴¹ Nii ne u jaŋ bula pi nialin si he u na-gua a bul, 'Má surise mi seme, Wia via ma wiaa ne. Má mu a juu nyin-la si bi dise. Wia he nyin-la bil Sitaani ari u tinđara-la ne di ba ku juu. ⁴² Bée wiaa bua-la le losuŋ fa si kenmi, ma bi kudiilee ŋaa pimi, bua-la lii-nyuasun fa si kenmi, ma bi liin ŋaa pimi. ⁴³ Bua-la le mi fa si

ŋaa nuhuóru, ma bimi kene woruŋ. Bua-la le mi fa si ken yaribiree maa, ma bi geriŋ joŋo laalemi. Bua-la le mi fa sí wiilu maa, ma bi ku nami. Bua-la le ba si kenmi to dia maa, ma bi ku nami.' ⁴⁴ Nii ne ba jaŋ piese kuoru-la a bul, 'La Tiina, che bée ne losuŋ kenin koo lii-nyuasun kenin koo ŋ fa ŋaa nuhuóru koo, ŋ fa ken yaribiree koo, ŋ fa wiilu koo, ba kenin to dia aŋ ka la bi ŋ le pe?' ⁴⁵ Kuoru-la jaŋ bul, 'Wutitii ne, bua-la kala le ma si via di ma pe nii-la si bi lee kene mi niaa tuóŋ, ma via di ma pemi ma le ne nii.' ⁴⁶ Nii ne ba jaŋ juu lee-la hee-la si bi dere, aŋ ka di tuó-pul tinđaa ma juu lee-la miisila si bi dere."

26

Ba vuura di ba kpu Yesu

Maak 14.1-2; Luuk 22.1-2; Joŋ 11.45-53

¹ Yesu si dage niaa dere, u bula pi u haritooro a bul, "Ma jima, ² tapulaa balia ne ka, ka di diisin kieliŋ gbiele-la yi. Bua-la le ba jaŋ ken mi-na Nuhuobiine Bie a joŋmi he niaa nisin le di ba kpaasemi daageese nyuŋ."

³ Nii ne nialin si kpu pusun pipi Wia kuhiasin ari juu tinđaa kuhiasin, ba hilimi Kayafas dia le. Bua-la le u fa ŋaa nii-la si kpu pusun pipi Wia kuhian ne. ⁴ Ba hilimi a vuvuure ba si jaŋ to wonbii-la a luora ken Yesu a kpu. ⁵ Ama ba bul di ba síu ken ba che-bal-la, di ba ne ŋaa nii, niaa jaŋ ŋaa taawei.

Ba ken nuuŋ tise Yesu

Maak 14.3-9; Joŋ 12.1-8

⁶ Yesu fa si he Betani le nii, u mu hoŋ baal kubala dia le baa yire Saamóŋ. Saamóŋ fa ŋaa gbege ne aŋ duori. ⁷ Yesu fa si dii kiaa Saamóŋ dia le, haal kubala kó u teen a ken tulaali ari loŋ a joŋo bise he u nyuŋ le. Tulaalii-la yalliŋ heye. ⁸ U haritooro-la si na nii, ba baaniŋ sii. Ba gurima pipiese doŋo a bul, "Bée ne tii haala deen ken nuu-la kaa chei

ɲla? ⁹ Ba fa jaŋ wuo joŋ tulaalii-la a yalle a na moribiee yuge a joŋo pi summoo.” ¹⁰ Ama Yesu fa jin wiila ba sii bul. Nii ne u pieseba a bul, “Bee ne tii ma wiwalime haala deen? Wu-zoŋ ne u ɲaami le. ¹¹ Ma di summoo jaŋ he dime bua-na kala le, ama la di ma bi jaŋ he dime deen deen. ¹² U bise tulaalii-la hemi le a ɲaa siri di mi ne suba, di ba joŋmi hugi. ¹³ Wutitii ne mi bulaa pima, dunia seme-na kala ba si jaŋ wuo mu a bul Wia wu-zomɔ-la, ba jaŋ liisi haala deen ma wiaa a bul.”

*Judas seye duu joŋ Yesu yalle
Maak 14.10-11; Luuk 22.3-6*

¹⁴ Nii ne Yesu haritooro-la fii ari balia doŋɔ mu nialin si kpu pusun pipi Wia kuhiasin teen. U yirin ne fa Judas Isikarot. U pieseba a bul, ¹⁵ “Di mi ne ken Yesu yalle a pima, bee ne ma jaŋ pimi?” Nii ne ba diise moribii-biin mara ari fii a joŋo pu. ¹⁶ A chin bua-la le Judas suomo chiche wonbii-la u si jaŋ to a ken Yesu yalle a piba.

*Yesu ari u haritooro dii diisin
kielin gbiele-la kudiilee*

Maak 14.12-21; Luuk 22.7-13, 21-23; Joŋ 13.21-30

¹⁷ Gbiele-la le ba si yie dii boroboro-la si bi si-burun kene, ba che-bunbun, Yesu haritooro ko u teen a piesu a bul, “Nii ne ɲ cho di la mu ɲaa diisin kielin gbiele-la kudiilee di ɲ ku dii?” ¹⁸ Nii ne Yesu bula piba a bul, “Ma mu juu tan-la tuon. Ma mu baal kubala teen. Ma mu bula pu a bul, ‘La kuhian si, bua-la le u sii che di ba di u haritooro dii diisin kielin gbiele-la kudiilee yie ne, laa che di la dii kia-la ɲ dia le ne.’” ¹⁹ Nii ne Yesu haritooro-la ɲaa ɲii ari Yesu si dageba a ɲaa diisin kielin gbiele-la kudiilee ba dii.

²⁰ Wia si jua, Yesu ari u haritooro-la fii ari balia-la ku juu hon a didii kudiile-la. ²¹ Ba sii dii kaaa ɲii, ɲii ne Yesu bula piba a bul, “Wutitii ne mi bulaa pima, ma doŋɔ jaŋ joŋmi yalle.” ²² Nii ne u haritooro-la tuon

chei. Ba suomo pipiesu, kun kun. Doŋɔ yie piese, “Mi Tiina, mi nee?” ²³ Nii ne Yesu bula piba a bul, “La di nii-la si chala ken boroboro tuu yuu gbaŋa tuon ne jaŋ joŋmi yalle. ²⁴ Mina Nuhuobiine Bie jaŋ suu ari ba si ɲmunse ɲii a tigemi le. Ama nii-la si jaŋ joŋ mi-na Nuhuobiine Bie yalle, aa, u jaŋ na heen yuge. Ba fa si buu lula ne kpia.” ²⁵ Nii ne Judas zenbe tiina-la piese Yesu a bul, “Mi ne ɲ didagee?” Nii ne Yesu bula pu a bul, “Oo, ɲ ne.”

*Kudiile-la Yesu si si di ba dii a
liliisi u wiaa*

*Maak 14.22-26; Luuk 22.14-20; 1
Kor: 11.23-25*

²⁶ Ba si hono didii kaaa, ɲii ne Yesu sii a joŋ boroboro a lolle Wia an kaa choge choge a joŋo pi u haritooro a bula piba a bul, “Ma laa. Mi yaraa namia ne ɲii.” ²⁷ Nii ne u bira joŋ nyunyuala maa ari sinin. U lolle Wia an joŋo piba a bul, “Ma kala nyua nyunyual-bala-la tuon, ²⁸ bee wiaa mi chalin ne ɲii. Chalin deen wiaa ne tii Wia ta nin ma teen. Mi chalin jaŋ jaase ni-kene wiaa, di Wia joŋ ba haacheba cheba. ²⁹ Mi bulaa pima, mi bira bi jaŋ ko di mi nyua sinin deen, see tapulii-la mi si jaŋ ko, ɲii ne mi jaŋ nyua si-falin mi Nyimma Wia kuorii-la tuon.”

³⁰ Nii ne ba yii Wii-chuole yiilin an sii lii a mu peel kubala baa yire Oliv. ³¹ Nii ne Yesu bula piba a bul, “Titanin deen titia ma kala jaŋ fa viiri a tin mi wiaa. Ba ɲmunse Wia tenin tuon di ba jaŋ kpu pie-daara an ka piesee fa pise. ³² Ama Wia jaŋ chisemi suun le. U ne chisemi, mi jaŋ laa ma sipaan a mu Galilii.”

*Yesu bula pi Piita ari u jaŋ bul u
buu jin.*

*Maak 14.27-31; Luuk 22.31-34;
Joŋ 13.36-38*

³³ Nii ne Piita bula pi Yesu a bul, “Di ba kala fa maa an lenin, mi-na bi jaŋ miire ɲ harin da.” ³⁴ Nii ne Yesu bula pu a bul, “Wutitii ne, jinin titanin deen ɲ-na Piita, ɲ jaŋ

bul naansiin butori ari η bimi jin, ka di ji-bele-na yel.”³⁵ Nii ne Piita bula pu a bul, “La din paala susuu maa, mi bi jan bul ari mi bin jin.” Ku-kaana-la ma kala bul nii.

*Yesu chuɔle Wia Getisemani le
Maak 14.32-42; Luuk 22.39-46*

³⁶ Nii ne Yesu ari u haritooroo mu juu lee kubala baa yire Getisemani. Yesu bula pi u haritooroo di ba hon daha, ka u mu chuɔle Wia an ko.
³⁷ U ken Piita ari Zebidii biirin balia a kaa mu dime. U tuon faasa chei worun. U tuon bi pina.
³⁸ U bula pi u haritooroo a bul, “Mi tuon kala ne cheye a mage di mi suu. Ma hon di la kala po na.”
³⁹ Ba hon. Ka u surisa mu sipaan mua a tuu pina chigi tinteen a sul Wia a bul duu ne ken wonbiin, duu si leje di wiila juu-u le a bira bul, “Mi Nyimma, di η nii che, liise hee-la sii ko mi le. Ama mi-na nla tuotorun le dee, η-na tuotorun le ne.”
⁴⁰ U chuɔla dere an sii ko u haritooroo teen di ba pin don. Nii ne u piase Piita a bul, “N pin nae? N bi don muapilii ma wuo beree a diene yi hawa kubalaa?”
⁴¹ Ma chuɔle Wia a pupo di Sitaani si wuo nyisema. Ma tuon le ma cho di ma naa wu-zonhon, an ka ma bi dolun kene.”
⁴² U bira mu a chuɔle Wia liamin le a bira bul,
⁴³ “Mi Nyimma, di η ne bi sei di η laa heen deen mi nisin le, len di wiila η sii che, duu naa.” U miira ko di ba bira pin don, bee wiaa don kenba ne worun.
⁴⁴ Nii ne Yesu mu chuɔle Wia torimun le a bira bul nii titia.
⁴⁵ Nii ne u miira ko u haritooroo teen a piaseba, “Ma ha pinaa wiesi nee? Ma bee na, bua-la yie ne. Ba jan ken mi-na, Nuhuobiine Bie a pi haache diiree.”
⁴⁶ Ma sii la mu. Nii-la si jan jonmi yalle ka ko ne.”

Ba ken Yesu

*Maak 14.43-50; Luuk 22.47-53;
Joon 18.3-12*

⁴⁷ Yesu ha bi wiaa bula dere, di Judas nii ko nii. U fa naa Yesu haritooro-la fii ari balia don ne.

Niaa yuge a tuto u harin. Donsun kori tokobiee ari tanguloo. Nialin si kpu pusun pipi Wia kuhiasin ari ba tan kuhiasin ne tinba, ba ko.
⁴⁸ Zenbe tiina-la fa pi nialin magil ne a bul, “Nii-la mi si mu guori, u ne nii. Ma kenu.”
⁴⁹ Nii ne Judas ven tegi a mu Yesu teen a bula pu, “Mi kuhian, mii chuɔlun”, an guoru.
⁵⁰ Nii ne Yesu bula pu a bul, “Mi nanhon, bee ne tii η he daha?” Nii ne ba kala guriku a kenu.
⁵¹ Yesu haritooro-la don liise u tokobii a ta nuu digilin keri. Nii-la fa naa nialin si kpu pusun pipi Wia kuhian diayomo ne.
⁵² Nii ne Yesu bula pu a bul, “Jon η tokobii a he u di-heelin. Nii-la si liise tokobii, tokobii ne ba jan kaa kpuu.”
⁵³ N bi jin ari mi fa jan wuo yire mi Nyimma duu pemi lee? Di mi ne fa yiru, u fa jan ta u tindaaraa bui buiba di ba ku pemi le.
⁵⁴ Ama duu ne fa saa naa nii, ee ne wialin ba fa si nmunsa Wia tenin tuon jan ku naa wutitiiba?”
⁵⁵ Nii ne Yesu piase ni-dan-la a bul, “Mi naa gaaru nee? Ma si ken tokobiee ari tanguloo a kuko di ma kenmii? Ma na tapulii-na kala la di ma ne yie hon Wia-dia le mi didage wiaa a pipima. An ka ma bi walima di ma kenmi dime.”
⁵⁶ Ama wiin deen kala naa di wialin nialin fa si bula, Wia Din-zon-la dolun le ku naa wutitii.” Nii ne Yesu haritooro-la kala viau an fa.

*Yesu chin nialin si hilime vuvuure
wiaa sipaan*

Maak 14.53-65; Luuk 22.54-55, 63-71; Joon 18.13-14, 19-24

⁵⁷ Nii ne nialin si ken Yesu, ba kenu kaa mu Kayafas dia. U ne fa naa nialin si kpu pusun pipi Wia kuhian. Di Wia tenin kerichiba ari ba tan kuhiasin kala hilimi dime.
⁵⁸ Piita daa tuto ba harin a to juu nialin si kpu pusun pipi Wia kuhian kaala. U juu kaala-la a mu hon nialin sii po kaala-la teen duu na wiila si jan naa Yesu le.
⁵⁹ Nii ne nialin si kpu pusun pipi Wia kuhiasin ari nialin kala si yie hilime vuvuure

wiaa chiche di ba nyia wiaa a tige Yesu le di ba kpuu. Ba che che wii ka. ⁶⁰ Niaa paala yuge ne a ku nyia wiaa pu, ama ba fa bi wuo na wii-kala u si nnaa chei. ⁶¹ Nii ne niaa balia ku lii a bul, "Baala deen, u si u jan wuo nmoo Wia-dia-la lo an bira saau tapulaa batori pege." ⁶² Nii ne nialin si kpu pusun pipi Wia kuhian sii chin a piese Yesu a bul, "N bi nia niaa deenba si bul wialin a tigen le? N-na bi wii kene n si jan bul?" ⁶³ Yesu tere u niin. Nii ne nialin si kpu pusun pipi Wia kuhian bula pu a bul, "Wia-la si weye yirin le, bula pila, n ne nnaa Kirisito, nii-la Wia si liisaa? N ne Wia Biee?" ⁶⁴ Nii ne Yesu bula pu a bul, "Mi-na ne, ama mi bulaa pima kala, a lii bua deen le a kaa mu, ma jan na mi-na Nuhuobiine Bie di mi hon Wia seme, ni-duon di-honun a to duonbilingbaanaa tuon ku tuu." ⁶⁵ Yesu si bul nii, nialin si kpu pusun pipi Wia kuhian ken u gennin kiese an bul, "N chei Wia yirin. U bi maga di la bira che dansiaba. Ma kala bi nia u si chei Wia yirin nii?" ⁶⁶ Bee ne ma biine?" Nii ne ba bul, "U cheye ne. U maga di ba kpuu ne." ⁶⁷ Nii ne ba tu nanturun he u siaa le a nmobu. Nialin donsun sii nmobu nla ne, ba bula pu a bul, ⁶⁸ "N-na Kirisito, nii-la sii bul wiaa, Wia Din-zon-la dolun le, dage nii-la si nmobun."

Piita si u bi Yesu jin

Maak 14.66-72; Luuk 22.56-62; Joon 18.15-18, 25-27

⁶⁹ Piita si hon kaala-la le, nii ne nialin si kpu pusun pipi Wia kuhian dia tintinni-tolo kubala ku lii a bul, "N ma faa to Yesu harin ne, baalla si lii Galili." ⁷⁰ Nii ne Piita nyia wiaa a bul ba kala nii, "Mi bi Yesu jin. Mi bi wii-la n si paala bubul jin," an sii lii chin zawura tuon. ⁷¹ Piita si chin dime, nii ne tintinni-tolo donon ma bira nau a bula pi nialin si china kpagu a bul, "Baala deen

ma nnaa Yesu si lii Nazaret haritoorola donon ne." ⁷² Piita bira nyia wiaa an nmiesa bul duu dee. ⁷³ Muasuaa nialin si chin dime ma bula pu a bul, "Wutitii ne, n ma nnaa ba donon ne, n yiikoro ne dage nii." ⁷⁴ Nii ne Piita nmiese a bul, "Mi bi baala deen jin." U si bul nii dere di ji-bele yele. ⁷⁵ Nii ne Piita liisi wii-la Yesu si bula pu ari u jan nyia wiaa a pu naansiin butori, nii ne u lii a faasa yel.

27

Ba ken Yesu mu Paalit teen

Maak 15.1; Luuk 23.1-2; Joon 18.28-32

¹ Tan-pul nialin si kpu pusun pipi Wia kuhian kala ari juu tinnaa kuhian hilimi a vuure. Ba kala vuura di ba kpu Yesu. ² Ba kenu a vobu a kenu kaa mu Paalit teen. U ne fa hon Rom kuori-balin nyun Judiya tinteen le.

Judas suba

Yesu nanz. tintinnaa 1.18-19

³ Judas zenbe tiina-la si nia di baa che di ba kpu Yesu ne, u tuon chei ari u si yalle Yesu nii. U miira ken moribii-biin mara ari fii a kaa mu nialin si kpu pusun pipi Wia kuhian ari juu tinnaa kuhian-la teen a bul, ⁴ "Mi nnaa haache ne. Mi jon nii-la si bi wii cheye yalle di ba kpuu." Nii ne nialin bul di ba sipaa kala tuo dime. Di u wii ne. ⁵ Nii ne Judas jon moribie-la a yuo ta Wia-dia tinteen an lii a mu yuo nmenin. ⁶ Nialin si kpu pusun pipi Wia kuhian paa moribie-la an bul, "Chalin moribiee ne nla. La kisin ne la jonba he Wia-dia moribiee le." ⁷ Nii ne ba vuure di ba jin wii-la ba si jan jon moribie-la a nnaa. Ba jon moribie-la yoo tinteen. Lee-la ne ba huhugi nuhura. Ba laa tintee-la yoo pupoi-meere teen ne. ⁸ Nii ne ba ken lee-la yiyire chalin tinteen ari jinin kala. ⁹ Ba si nnaa nii, wialin Jerimaya fa si bul, Wia Din-zon-la dolun le ku nnaa wutitii. U fa si,

“Iziral doho niaa dɔɔnsun sei di ba tɪŋ moribii-biin mara ari fii aŋ keŋ Wia Tuɔ-pul Tiina-la.
¹⁰ Ba jon moribie-la ba si miira laa a yɔɔ tɪnteen pupoi-mɛɛɛ teen. Mi Tiina Wia nɛ fa bula di mi ŋaa ŋii.”

Paalit piese Yesu wiaa

Maak 15.2-5; Luuk 23.3-5; Jɔɔŋ 18.33-38

¹¹ Yesu si chin nii-la si hɔŋ kuoribalin nyun sipaan Judiya tɪnteen lɛ, ŋii nɛ kuoru-la piesu a bul, “Ŋ nɛ ŋaa Juu tɪŋŋaa kuoro koo?” Nii nɛ Yesu bula pu a bul, “Oo, mi nɛ.” ¹² Ama nialin fa si kpu pusun pipi Wia kuhiasin ari Juu tɪŋŋaa kuhiasin si jon cheerin pu ŋii, u bi wii bula. ¹³ Nii nɛ Paalit piesu, “Ŋ bi wiaa deenba kala nia ba si bula a tigen lɛɛ?” ¹⁴ Ama Yesu bi u niin suro, u bi wu-bala ma bula. Wii-la kperi Paalit worun.

Ba si di ba kpu Yesu

Maak 15.6-15; Luuk 23.13-25; Jɔɔŋ 18.39-19.16

¹⁵ Di diisin kielin gbiele nɛ yie-na kala, Paalit fa yie len ba liise nialin ba si kaa tɔ dia dɔŋɔ nɛ, nii-la niaa si cho. ¹⁶ Bua-la lɛ di ba keŋ baal kubala baa yire Barabas a tɔ dia. ¹⁷ Ni-dan-la si hilime, ŋii nɛ Paalit pieseba, “Ni-bɛɛ nɛ ma cho di mi liisa pima? Barabas koo Kirisito, nii-la Wia si liisaa?” ¹⁸ Paalit fa jima worun ari Juu tɪŋŋaa kuhiasin yaraa faa bieru nɛ, ŋii nɛ tii ba keŋ Yesu kaa kɔ u teen. ¹⁹ Paalit fa si hɔŋ sariya didiilin ŋii, u haala tɪŋ tɪndaarin a len di ba bula pu a bul, “Sɪ baala deen wii-kala ŋaa. U ŋaa tuɔ-pul tiina nɛ. Diamin titanin mi duosi wiaa a tigeu lɛ nɛ. U wiaa wiimi worun nɛ.” ²⁰ Nii nɛ nialin si kpu pusun pipi Wia kuhiasin ari Juu tɪŋŋaa kuhiasi-la nyise ni-dan-la hɛ di ba bul di Paalit liise Barabas ta aŋ ka di ba kpu Yesu. ²¹ Nii nɛ Paalit piese ni-dan-la a bul, “Niaa deenba baliamin tuɔŋ, kubɛɛ nɛ ma che di mi liisa pima?” Nii nɛ ba

bul, “Barabas!” ²² Nii nɛ Paalit piese nialin a bul, “Aŋ ka Yesu ba sii yiru Kirisito, bɛɛ nɛ ma si mi kenu kaa ŋaa?” Nii nɛ ba kala bul, “Len di ba kenu kpaasa mɛɛ daa-gɛɛɛ nyun.” ²³ Nii nɛ Paalit pieseba a bul, “Wu-bɔŋ bɛɛ nɛ u ŋaa?” Nii nɛ ba kpia a kii bunbun-la a bul, “Len di ba kenu kpaase daa-gɛɛɛ nyun.”

²⁴ Nii nɛ Paalit na ari gon-la yuga kinkeŋ, ari yuosun jan juu. Nii wiaa u bi wii-kala wuo ŋaa. Di liin chin u semɛ. U ŋaa a sɔŋ u nisaa nialin sipaan aŋ bul, “Mi sipaa tuo baala deen suunun lɛ. U hɛ ma teen.” ²⁵ Nii nɛ ni-dan-la kala bul, “Di la nɛ cheye wiin deen lɛ, len di Wia dɔgisela ari la biirin a tɪŋ la si kpuu.” ²⁶ Nii nɛ Paalit liise Barabas ta a piba aŋ ŋaa ba viire Yesu aŋ jonu piba di ba kaa mu kpaasa mɛɛ daa-gɛɛɛ nyun.

Laali-yuoroo mɔŋ Yesu lɛ

Maak 15.16-20; Jɔɔŋ 19.2-3

²⁷ Nii nɛ Paalit laali-yuoroo dɔŋsun keŋ Yesu kaa juu Paalit dia kaala tuɔŋ. Laali-yuoro-la ku-kaanaa kala ma ku peba lɛ a hilimi. ²⁸ Ba wuri Yesu gennin kala aŋ jon geri-fian laalu ²⁹ a che sɔsun a kaa sua nyun-chuulo a nage kuoro nyun-chuulo a jonɔ chuu a jon daantiga hɛ u na-diin lɛ aŋ tuu kpirimi u sipaan a mɔmu lɛ a bul, “Juu tɪŋŋaa kuoro, laa chuɔɔɔŋ.” ³⁰ Ba tu nanturun a heu lɛ a laa daa-la a ŋmoo u nyun lɛ. ³¹ Ba si mɔmu lɛ dere, ba wuri geri-fian-la aŋ paa u titia gennin a laalu aŋ kenu kaa lii wonbin di ba kpaasu mɛɛ daa-gɛɛɛ nyun.

Ba kpaase Yesu daa-gɛɛɛ nyun

Maak 15.21-32; Luuk 23.26-43; Jɔɔŋ 19.17-27

³² Ba si kenu kaa lilii di ba kpaasu daa-gɛɛɛ nyun ŋii, ba cheŋ baal kubala baa yiru Saamɔŋ. U jan yirin nɛ Sariini. Nii nɛ laali-yuoro-la fugu u laa Yesu daa-gɛɛ-la a baase. ³³ Nii nɛ ba ku yi lee kubala baa

yirɛ Gɔligota. Yiri-la bubuɔŋ nɛ nyu-
kɔŋkogulo. ³⁴ Ba si yi dime, ba jon
siniŋ a guoli ku-haariŋ lɛ a jonɔ pi
Yesu duu nyua. U si lenne di u heye,
u via. ³⁵ Nii nɛ ba kpaasu mɛrɛ daa-
gɛsɛ nyuŋ aŋ tɔŋsɛ Yesu genniŋ
wiaa, di ba paa kpaa dɔŋɔ a jin geri
bɛɛ nɛ nuu-kala jan laa. ³⁶ Nii nɛ
ba hɔŋ dime a bibenu. ³⁷ Ba si si
Yesu ŋaa wialiŋ chei, ba ŋmuŋsa
hɛ daa-gɛsɛ-la lɛ a bul, “Juu tinŋaa
kuoro Yesu nɛ ŋla.” ³⁸ Nii nɛ ba
kpaasɛ gaaraa balia ma a pɛ Yesu
lɛ. Dɔŋɔ hɛ u na-diin, dɔŋɔ ma hɛ
u na-gua. ³⁹ Ba si kpaasu mɛrɛ daa-
gɛsɛ-la nyuŋ nii, nialiŋ si to dime
bibal, ba tutuusɛ aŋ kɛŋ ba nyuŋ
chuchugisi ⁴⁰ a bul, “Oi, ŋ nɛ ŋaa nii-
la si si ŋ jan ŋmoo la Wia-dia lo aŋ
bira wuo saau tapulaa batori pɛgɛ.
Ŋ si ŋaa Wia Bie, lii daa-gɛsɛ-la nyuŋ
a laa ŋ titia ta.” ⁴¹ Nialiŋ si kpu
pusuŋ pipi Wia kuhiasi-la ari Wia
teniŋ kerichiba ari taŋ-la kuhiasin
ma sisieri Yesu lɛ a bula pipi dɔŋɔ,
⁴² “U wuo niaa laa tita nɛ aŋ bi u
titia wuo laa ta. U si si u nɛ ŋaa
Kirisito, Juu tinŋaa kuoro, len duu
lii daa-gɛsɛ-la nyuŋ ku tuu di la na
a laa u wiaa dii. ⁴³ U laa Wia dii
nɛ a bula duu ŋaa Wia Bie nɛ. Tɔɔ,
má len di la na di Wia nɛ jan laau
ta lɛɛɛ.” ⁴⁴ Gaara-la balia ma ba si
kpaasa a pɛ Yesu lɛ, ba ma tuusu nii
titia.

Yesu suba
Maak 15.33-41; Luuk 23.44-49;
Jɔŋ 19.28-30

⁴⁵ Wia ku mage nyu-gbaŋa, leriŋ
kala biri lim a mu yi didaanin, ka
leriŋ bira pullɛ. ⁴⁶ Nii nɛ Yesu faasa
yirɛ u yiikoro lɛ a bul, “Eloi, Eloi,
lama sabakitani.” U bubuɔŋ nɛ: “Mi
Tiina Wia, bɛɛ nɛ tii ŋ jonmi ta?”
⁴⁷ Di niaa dɔŋsuŋ chin dime a jegile
nii wialiŋ u si bula. Nii nɛ ba bula pi
dɔŋɔ a bul, “Ilaaja nɛ baal-la yiyirɛ
nii.” ⁴⁸ Nialiŋ dɔŋɔ fa si chin dime fá
mu jon suosuo a kaa mu yuu siniŋ si
nyala a jonɔ tuu sakeliŋ lɛ a kaa mu
hɛ u niin lɛ duu nyua. ⁴⁹ Nii nɛ nialiŋ
dɔŋsuŋ fa si hɛ dime bul, “Má len

la gberɛ a na ari Ilaaja jan ku soru
daa-gɛsɛ-la nyuŋ koo.” ⁵⁰ Nii nɛ Yesu
faasa yel aŋ wiesi u wiesi kati.

⁵¹ Patiisa nɛ fa hɛ Wia-dia tuɔŋ. Ba
kaa kɛrɛ. U kiesɛ balia a chin nyu-
gbaŋa a kiesa ku tuu. Nii nɛ tinteen
zigili, busuŋ ma yɛrɛ a kpaa kpaa.
⁵² Vaamaa ma suri suri. Nialiŋ Wia
si liisa, ba yuga a sii suuŋ lɛ a lii
vaama-la lɛ. ⁵³ Yesu si sii suuŋ lɛ, ba
mu Jerusalem. Niaa yuga a naba lee-
la. ⁵⁴ Laali-yuoroo zɔɔ kuhian ari
laali-yuoro-la fa si chin dime a biben
Yesu a na tinteen si zigili nii ari
wialiŋ kala si ŋaa, fawulluŋ kɛŋba.
Nii nɛ ba bul, “Wutitii, baala deen
sɛnɛ ŋaa Wia Bii nɛ.”

⁵⁵ Haalaa yuga a ma fa chin di-
bolii a bibenu. Haala-la fa to Yesu
hariŋ nɛ a lii Galilii tinteen a pipɛu
lɛ. ⁵⁶ Ba tuɔŋ Mɛeri Magidaliŋ ari
Mɛeri dɔŋɔ. U fa ŋaa Jeems ari Josef
naan nɛ. Zebidii haala ma pɛba lɛ.

Ba hugi Yesu

Maak 15.42-47; Luuk 23.50-56;
Jɔŋ 19.38-42

⁵⁷ Didaanin si yie, baal kubala a
lii taŋ kubala baa yirɛ Arimatiya ma
kɔ. U fa ŋaa kiaa tiina nɛ. U yirin nɛ
fa Josef. U ma fa ŋaa Yesu haritooro-
la dɔŋɔ nɛ. ⁵⁸ U mu Paalit teen a sul
Yesu ku-suuŋ. Nii nɛ Paalit bul di
ba mu jonɔ pu. ⁵⁹ Nii nɛ Josef laa a
kɛŋ geripɛ-pul-falin a beu ⁶⁰ a jonɔ
hugi u titia bua falii-la lɛ u fa si lɔsɔ
buŋ nyuŋ. U bilimi tabii-balin kaa
kɔ to bua-la niin aŋ viiri. ⁶¹ Ka Mɛeri
Magidaliŋ ari Mɛeri dɔŋɔ-la faa hɔŋ
a chaasɛ bua-la leriŋ.

Laali-yuoroo pɔ vaan-la

⁶² U taŋ si pula, chɛ-wiesii-la
chɛɛŋ, nialiŋ si kpu pusuŋ pipi
Wia kuhiasin ari Farisii tinŋa-la, ba
mu Paalit teen a bula pu a bul,
⁶³ “Kuhian, la liisi wii nɛ. Bua-la lɛ
wu-nyiaru-la si hɛ u miisin lɛ, u fa
bula ari u nɛ suba, u jan sii suuŋ lɛ
tapulaa batori chɛɛŋ. ⁶⁴ Nii wiaa len
di niaa mu a pɔ u vaan-la woruŋ di
tapulaa batori-la yi, di u haritooroo
sí wuo mu a gaa kuusi aŋ bula pi

niaa ari u sii suun ɛ nɛ. Di ba nɛ ɲaa wiin deen, u nɛ jaŋ paala kii wialin kala u si nyia.”⁶⁵ Nii nɛ Paalit bula piba di ba keŋ laali-yuoroo mu di ba pɔ vaan-la niin worun. ⁶⁶ Nii nɛ ba laali-yuoro-la mu a jon bun a tɔ bua-la niin an len niaa pɔ lee-la.

28

Yesu sii suun ɛ

Maak 16.1-10; Luuk 24.1-12; Jɔɔŋ 20.1-10

¹ Ba che-wiesii-la cheen si dɛrɛ, Lahadi cheen siipuuraa, Mɛeri Magidalin ari Mɛeri-la dɔŋɔ mu bua-la niin di ba na lee-la ba si hugi Yesu. ² Ba si yi lee-la, muasuaa di lerin guu zigili. Di Wia tinɗaara lii wia nyun ku tuu a bilimi tabii-la ta an hon u nyun. ³ U sɛe nage duonun si ligisa nɛ, an ka u gennin pulɛ kpul kpul. ⁴ Laali-yuoro-la fa si pɔ bua-la, fawullun kenba. Ba chichel a nage di ba suba. ⁵ Nii nɛ Wia tinɗaari-la bula pi haala-la si he dime a bul, “Ma sɛ fawullun fá. Mi jima ari Yesu nɛ maa che, nii-la ba si kpaasa mɛrɛ daa-gɛsɛɛ nyun. ⁶ U tuo daha, u sie nɛ ari u fa si bul nii pima. Má ku na lee-la ba fa si jonu hugi. ⁷ Má mu lima lima a bula pi u haritooroo ari u sii suun ɛ nɛ. Má bee na, u laa ma sipaan a mu Galilii. Di ma nɛ mu dime, ma jaŋ nau. Mi paala bula pima.” ⁸ Nii nɛ ba lii vaan-la lerin aa tuosi. Fawullun fa kenba nɛ, ama ba tuon ma tɔrɛ. Ba fá mu di ba bula pi Yesu haritooroo wii-la si ɲaa. ⁹ Nii nɛ Yesu guu cheŋba a bula piba a bul, “Ma jaŋ hon ari yarifiɛlaa.” Ba mu u teen a keŋ u naan ɛ a chuɔlu. ¹⁰ Nii nɛ Yesu bula piba a bul, “Ma sɛ leŋe di fawullun kenba. Má mu bula pi mi haritooroo di ba mu Galilii. Ba jaŋ nami dime.”

Nialin si pɔ vaan-la nyia wiaa a tige Yesu ɛ

¹¹ Haala-la si miira viiri, laali-yuoro-la fa si pɔ bua-la, ba dɔŋsun miira mu taŋ tuon a bula pi nialin si kpu pusun pipi Wia kuhiasin wii-la

si ɲaa. ¹² Nii nɛ nialin si kpu pusun pipi Wia kuhiasin ari Juu tinɗaa kuhiasin hon a vuure wii-la ba si jaŋ ɲaa. Ba vuura di ba jaŋ jon moribii-dan a kpal laali-yuoro-la fa si pɔ bua-la an bula piba a bul, ¹³ “Má bula pi niaa ari ma pin don nɛ, an ka u haritooroo ku gaa a kuusi Yesu. ¹⁴ Di nii-la si hon kuori-balin nyun nɛ nii wiin deen, la jaŋ bula pema ɛ ari ma bi wii cheye. Wii-kala bi jaŋ walimɛma.” ¹⁵ Nii nɛ laali-yuoro-la fa si pɔ vaan-la laa moribie-la an nyia wiaa ari nialin si kpu pusun pipi Wia kuhiasin fa si bula piba di ba ɲaa. Wii-la Juu tinɗaa fa si nyia teeli lerin kala a kaa kɔ ari jinin.

Yesu keŋ u titia ku dage u haritooroo

Maak 16.14-18; Luuk 24.36-49; Jɔɔŋ 20.19-23; Yesu nanɗ. tinɗinɗaa 1.6-8

¹⁶ Nii nɛ Yesu haritooro-la fii ari kubala-la mu Galilii tinteen a jil peel-la nyun, ari Yesu fa si bul nii piba. ¹⁷ Nii nɛ ba nau dime a chuɔlu, ama dɔŋsun bi laa dii. ¹⁸ Nii nɛ Yesu ku kpageba a bula piba a bul, “Wia jon dolun kala a pimi nɛ Wia-jaŋ ari dunia kala ɛ. ¹⁹ Má saa mu dunia sɛmɛ-na kala a bul mi wiaa pi niaa a len di ba ɲaa mi haritooroo a foba Wii-chuɔle liin mi Nyimma ari u Bie ari u Din-zon-la dolun ɛ. ²⁰ Má dageba a len di ba to wialin kala mi si bula pima di ma to. Mi jaŋ he ma teen bua-na kala ɛ a kaa mumu dunia diderin.”

**WIA WU-ZOMO-LA
MAAK
SI NMUNSA**

Jooŋ Wia lii-foori-la bul Wia wiaa pipi niaa

Mat. 3.1-12; Luuk 3.1-18; Jooŋ 1.19-28

¹ Wia wu-zooŋoo di-suomun ne ŋla. Wiaa deenba ŋaa Wia Bie Yesu Kirisito wu-zooŋoo wiaa ne.

² Nii-la sii bul wiaa, Wia Diŋ-zooŋ-la dolun le ba sii yire Azaaya fa ŋmunsa ari Wia si,

“Bee na, mi jaŋ tinj mi tinjaara duu laa ŋ sipaan mu a wase wonbiinj bilin le di ŋ ko.”

³ U bira si, “Nuu ne chinj giri-bine tuon a heele bul,

‘Ma ko a wase wonbiinj bil di ma Tiina ko a tuto.

Ma ŋaa nii, duu ne ko, u di-veninj jaŋ pinj worun.’ ”

⁴ Nii ne baala deenj sii. Baa yiru Jooŋ, Wia lii-fooro. U sii ku lii giri-bine tuon a heele bul, “Ma birime a lii ma haacheba le, ka di mi foma Wii-chuoŋe liinj. Di ma ne ŋaa nii, Wia jaŋ jon ma haacheba a chema.”

⁵ U si bul nii, Judiya tinjaa ari Jerusalem tinjaa kala lii a mu u teen a dage ba haacheba an tuu Joodan fuo-la u foba Wii-chuoŋe liinj.

⁶ Buntanja puna genninj ne Jooŋ fa laale a kenj tenbiinj voo u tinja. Nyangirikaba ari tuun ne fa ŋaa u kudiilee.

⁷ U yie bul Wia wiaa pipi niaa a bul, “Nuu don jaŋ to mi harinj ko. U ne jaŋ kiimi. Mi paala bi maga di mi kpagu a kenj u nenjenje ne mesinj ma kaa puri. ⁸ Liinj dunduja ne mi-na kaa fufoma, ama u-na jaŋ jon Wia Diŋ-zooŋ-la hema le.”

Jooŋ fo Yesu Wii-chuoŋe liinj

Mat. 3.13-4.11; Luuk 3.21-22; 4.1-13

⁹ Bua-la le Yesu sii a lii tan-la ba sii yire Nazaret a he Galilii tinteen le a ko lee-la Jooŋ fa si he. U ku

juu fuo-la. Jooŋ fou Wii-chuoŋe liinj.

¹⁰ U miira lii fuo-la tuon ku lii a wula benj, di wia nyun guu kpa baŋa. Nii ne ka Wia Diŋ-zooŋ-la ku tuu heu le a nage kokomo. ¹¹ Ka u nii nuu yiikoro duu lii wia nyun a bula pu a bul, “Mi Bii-choolun ne ŋla. Mi tuon tere ŋ nyun.”

Sitaani ku magise Yesu

¹² U bi diene ka Wia Diŋ-zooŋ-la kenu juu girinj. ¹³ U he dime nii halii tapulaa mahinj baŋa, ba di girinj tuon kiaa dunduja. Sitaani yie ko a magisu. Yesu bi sey. Nii ne Wia tinjaaraa ku tuu tima pu.

Yesu yire chenfilikpuuraa banese

Mat. 4.12-22; Luuk 4.14-15; 5.1-11

¹⁴ U bi diene, ka ba kenj Jooŋ to dia. Nii ne Yesu sii a mu Galilii tinteen a bubul Wia wu-zooŋ-la aa pi niaa ¹⁵ a bul, “Bua-la yie ne. Wia kuorii-la ko ne. Ma birima lii ma haacheba le a laa Wia wu-zooŋ-la dii.”

¹⁶ Nii ne u yi Galilii muga a mu to muga-la niinj a na Saamon ari u ŋaana Anjuru. Ba ŋaa chenfilikpuuraa ne. Uu mu, di ba kenj ba jonba a kaa kikese chenfilee. ¹⁷ U yireba a bul, “Ma sii to mi harinj. Mi jaŋ ŋaa di ma kese niaa pe ma titia le ari ma sii kese chenfilee nii.”

¹⁸ Ba sii a jon ba jonba ta an guu to u harinj. ¹⁹ U jon nii baa mu, di baalaa baŋa ne nii. Baa yire Jeems ari Jooŋ. Ba fa ŋaa Zebidii biirin ne. Ba honj ba liinj daboro le a tuto ba jonba buasanj. ²⁰ U si naba, u yireba. Ba lenj ba nyimma ari nialinj kala ba fa si ŋaa ba tima pipiba an lii liinj daboro-la tuon an mu to u harinj.

Yesu vaare baal kubala fa si kenj jinj-bomun

Luuk 4.31-37

²¹ Ba jon nii aa mu a ku yi Kapenam. Nii ne che-wiesii-la cheen, Yesu sii a mu juu Wii-chuoŋe dia a didage niaa. ²² U sii dageba nii, u ŋaaba wu-kpunkpere. U bi baa daga ari Wia teninj kerichiba si yie

didageba nii. U bul wiaa ari u ne kenj wii-la dolunj.

²³ Nii ne di baal ne nii. Jij-bomunj kenu. U ku juu aa chiire, ²⁴ “Yesu, nj si lii Nazaret, bee ne nj chiche nj naala? Nj ko di nj kpula nee? Mi jiminj ne, nj ne naa Wia Tuo-pul Tiina.” ²⁵ Yesu si nii wialinj baal-la si bula, u kpia jijn-bonj-la le a bul, “Kenj gonj anj ku lii baal-la le.” ²⁶ Jijn-bonj-la kenj baal-la teriki anj faasa chiire kinjenj a lii baal-la le. ²⁷ Nialinj kala miira hiriki a pipiese donjo, “Bee ne nlaa? Wu-falii ne uu dage. U paala kenj dolunj a wuo jijn-bonjoo a bul wiaa piba, ba tuto u niinj.”

²⁸ A lii nii le ne, u yirinj guu teeli Galilii tinteenj kala.

Yesu vaare niaa yuge
Mat. 8.14-17; Luuk 4.38-41

²⁹ Nii ne Yesu guu sii a lii Wii-chuole dia-la le, ba di Jeems ari Joonj, a mu juu Saamonj ari Anduru dia. ³⁰ Ba mua di Saamonj hiili-haala pina wiwiile. U yaraa kala linj. Yesu si ko nii, ba bula pu. ³¹ Nii ne u ku juu a kenj haal-la nisinj le a kaa chuule. U yaraa fa si lima nii, u fiele. U sii naa kudiilee piba ba dii.

³² U didaaninj si yie, ba kenj nialinj kala sii wiilu ari jinsinj si kenj nialinj kala a kaa ko Yesu teenj. ³³ Tanj tinjaa kala gire ko a hilimi Saamonj dia boinjiniinj. ³⁴ Yesu vaare nialinj yuge sii wiilu a kiri jijn-bomola ma a yuge a ta niaa le. Jinsi-la jijn Yesu. Nii ne tii u biba wonjbiinj pa di ba bul wiaa.

Yesu bul wiaa Galilii tinteenj le
Luuk 4.42-44

³⁵ Siipuura Yesu sii lii dia-la le a mu lee-la niaa si tuo a chuchuole Wia. ³⁶ Ka Saamonj ari u nanjonsun ma sii ko a chicheu. ³⁷ Ba si nau, ba bula pu ari nuu-kala ne ko a chicheu. ³⁸ Nii ne Yesu bula piba a bul, “Ma lenj la mu tasinj donsunj di mi bul Wia wiaa dime maa. Nii wiaa ne mi ko.”

³⁹ U saa sii a mu duure Galilii tinteenj kala a juu Wii-chuole diisinj

aa bul Wia wiaa anj pe kiri jinsinj ma niaa le a ta.

Yesu vaare gbege
Mat. 8.1-4; Luuk 5.12-16

⁴⁰ Nii ne gbege kubala ma sii ko Yesu teenj a tuu kpirimi a sulu a bul, “Di nj ne cho, nj janj wuo naa di mi duori.” ⁴¹ Nisusunj kenj Yesu. U liise u nisinj a digu anj bul, “Mi cho ne, duori.” ⁴² Nii ne yawiil-la guu lenj baal-la. U duori. ⁴³ Nii ne Yesu bula pu ari siifiesinj a bul, ⁴⁴ “Viiri anj si wii bula pi nuu-kala. Ama kenj nj titia kaa mu dage nii-la si kpu pusunj pipi Wia duu kpu pusunj pi Wia a piise nj disinninj ta ari Moosis fa si dagema nii. Di nj ne naa nii, niaa janj na ari nj bira bi disinninj kene.”

⁴⁵ Ama baal-la kenj wii-la kaa lii a bula gaare lerinj kala. Nii ne Yesu bira bi wuo chaasa juu tanj kala tuonj, ama u yie honj girinj tuonj ne, ka niaa lii lee-na kala a kuko u teenj.

2

Yesu vaare gberike
Mat. 9.1-8; Luuk 5.17-26

¹ Tapulaa banmene, Yesu miira mu Kapenam. Niaa nii duu miira ko a he dia le. ² Nii ne ba yuge a gire ko a to lee-la kala a to boinjiniinj maa. Ka u bul Wia wiaa pipiba. ³ Nii ne di niaa donsunj ne nii. Ba banese jonj gberiku kubala kaa ko. U pinj u bosole. ⁴ Niaa si to lerinj kala nii, ba bi jijn lee-la ba si janj to a juu. Nii ne ba jil lusunj nyunj a ta luri a jonj bosola ari gberiku-la kala a to bua-la ta u tuu Yesu sipaanj. ⁵ Nii ne Yesu jijn ari ba naau yarida ne worunj a bul gberiku-la le a bul, “Mi bii, mi jonj nj haacheba a chen ne.”

⁶ Di Wia teninj kerichiba donsunj ma honj dime a kenj ba tuosaa pipiese ba titia, ⁷ “Bee ne tii baala deenj bubul nii? Uu tuuse Wia jonjoo nla. Kubee ne janj wuo jonj haacheba che nuu, di Wia dunjuna dee?” ⁸ Yesu wuo jijn ba tuobiinaa a pipieseba, “Bee ne tii ma bibiine wiaa deenba?” ⁹ Mi si janj bul gberiku-la le di mi

jon u haacheba cheu ne, koo mi si jan bul duu sii chuoli u boso a viiri, ba tuon kubee ne naa moli? ¹⁰ Mi jan dagema ari mi-na, Nuhuobiine Bie, ken dolun dunia le di mi jon haacheba che niaa." ¹¹ Nii ne u bula pi gberiku-la a bul, "Sii a jon n boso a mu dia." ¹² Baal-la guu sii a jon u boso a vene lii ba sipaan. Ba kala hiriki a denne Wia yirin a bul, "La ha bi wiin deen dono naa."

Yesu yire Liivai

Mat. 9.9-13; Luuk 5.27-32

¹³ Nii ne Yesu sii dime a miira tuu muga niin. Niaa yuge a ku hilimi, u didageba. ¹⁴ U si kiele mu sipaan, u na baal kubala baa yire Liivai. U nyimma yirin ne Alifyas. U fa naa lanpoo lilaaru ne a hon u tintinjaa dia le. Nii ne u yiru a bula pu duu sii a tuto u harin. U sii to.

¹⁵ Nii ne Yesu mu juu Liivai dia, ba di u haritooroo kala, a hono didii kiaa. Lanpoo laara-la donsun ari haache diiree ma ko, ba kala didii kialin. Ba fa yuga worun a tuto Yesu harin. ¹⁶ Wia tenin kerichiba ari Farisii tinjaa naba a ku piese Yesu haritooroo a bul, "Bee ne tii Yesu ari haache diiree ari lanpoo laaraa, ba kala hono didii kiaa?" ¹⁷ Yesu si nii wii-la ba sii bul, u bula piba a bul, "Nialin si ken yarifielaa, ba bi daalun njaaru ka che, see nialin sii wiilu. Mi ko di mi yire haache diiree ne di ba len ba haacheba. Nialin si ken tuo-pula mi sipaan dee mi ko di mi yire."

Ba bul nii-vobun wiaa

Mat. 9.14-17; Luuk 5.33-39

¹⁸ Chee don Jon, Wia lii-foori-la haritooroo ari Farisii tinjaa haritooroo, baa voo niin. Nii ne niaa sii ku piese Yesu, "Bee ne tii Jon haritooroo ari Farisii tinjaa haritoorona voo niin, an ka n haritoorona bi niin voo?" ¹⁹ Nii ne Yesu pieseba a bul, "Di nuu mu jaa haal kaa ko, ka ba duu nanjonsun hon, u nanjonsu-la jan voo niin? Ai, di baal-la ari u nanjonsun ne hono, ba

bi niin ka voo. ²⁰ Ama chee don ne he dime, ba jan ken baal-la kaa mu lee, an ka di u nanjonsu-la voo niin."

²¹ Nii ne u bira bula piba a bul, "Di n ne ken geri-binin duu luri, n jan jon geripe-falin a too? Ai, n naa nii, ku-falii-la jan kuure di geri-la wasa kiesee kii nii. ²² Di n ne ken pupoi-kpaan, n jan naa si-huon a he duu yel? Ai, n ne naa nii, pupoi-la jan yere, di sin-la kala ta. N yie jon si-huon a he pupoi-zomun le ne."

Ba bul che-wiesii-la wiaa

Mat. 12.1-8; Luuk 6.1-5

²³ Che-wiesin chee kubala Yesu ari u haritooroo sii a mu nyonso tuon. Baa mu nii, u haritooro-la kiile nyonso-la a chichan. ²⁴ Nii ne Farisii tinjaa piesu a bul, "N bi naa? Che-wiesii-la cheen kisin ne ba chichei nii. Bee ne tii?" ²⁵ Nii ne Yesu miira pieseba a bul, "Ma ha bi wii-la Devit fa si naa karimaa? Losun fa si kenu ba di u harin niaa, u mu juu Wia-dia a jon boroboroba-la ba fa si kaa ku bil Wia sipaan a chogo dii an jono pi u niaa maa, ba ma dii. ²⁶ U fa naa kisin ne ari ni-wogo si jan jon boroboro-la dii, see nii-la si kpu pusun pipi Wia dunjuna. Ka u jono dii nii. Bua-la le Abiata ne fa naa nialin si kpu pusun pipi Wia kuhian." ²⁷ Nii ne Yesu bira bula piba a bul, "Wia liise che-wiesii-la pi niaa ne di ba tiu. U bi si di che-wiesii-la ne tii niaa. ²⁸ Mina Nuhuobiine Bie ne saa naa che-wiesii-la tiina nii."

3

Yesu vaare baala u nisin si suba

Mat. 12.9-14; Luuk 6.6-11

¹ Yesu sii a miira mu juu Wii-chuole dia, di baal kubala ne nii. U nisin suu. ² Ba si na Yesu duu jua, ba kala chaare siaa bibenu di ba na ari u jan vaare baal-la che-wiesii-la cheen. Baa che di ba na wii ne a to nii le a ken Yesu a bul u teen duu chei ba kisin le ne. ³ Nii ne Yesu bul na-suu-la tiina le duu

sii kɔ ba tutuɔbaaniŋ. U sii mu.
⁴ Nii ne Yesu piɛse nialiŋ a bul, “Ɛe ne la naabalimaba kisinniŋ bul di la ŋɔnaa che-wiesii-la cheɛŋ? Di la pipe niaa le koo di la dudɔgisɛba? Di la laa niaa miisiŋ koo di la kpukpuba?” U si piɛse nii, ba ŋaa fuui. ⁵ Nii ne Yesu na baaniŋ ba nyuŋ. U tuɔŋ chei a tiŋ ba digilaa si bi nii wiaa. Nii ne u bula pi na-suu-la tiina a bul, “Keŋ ŋ nisiŋ tiɛne.” U kaa tiɛne. U nisi-la fiele a naŋe u nagiŋ.

⁶ Nii ne Farisii tiŋnaa sii lii. Ba di Herɔd niaa mu vuure nii ba si jan wuo ŋaa a keŋ Yesu a kpu.

Yesu bul wiaa a pi niaa aŋ pe vaare niaa mugi-baliŋ niŋ

⁷ Yesu ari u haritooroo sii a mu mugi-baliŋ niŋ. Niaa yuge a lii Galilii tiŋteen a tuto ba hariŋ. Dɔŋsun ma lii Judiya tiŋteen, ⁸ dɔŋsun ma lii Jerusalem ari Idu-miya tiŋteen. Dɔŋsun ma lii Joɔdan fuo-la cholo. Dɔŋsun ma lii Taya ari Saadɔŋ tiŋteen. Niaa deɛba kala fa nii Yesu wiaa a lii ba tasiŋ a kuko u teen. ⁹ Nii ne u bula pi u haritooro-la di ba mu joŋ liiŋ daboro a kaa ku kii liiŋ niŋ duu juu, di nialiŋ si u kaa yigi. ¹⁰ Yesu fa vaare niaa a yuge. Nii wiaa nyanyal tiŋnaa kala ku keŋ u baŋŋa le aa che di ba digu. ¹¹ Di jiiŋ-bɔŋŋɔ keŋ niaa dɔŋsun nialiŋ tuɔŋ. Di ba ne na Yesu kala, ba yie ku tel u naasiŋ le ne a chichiire ari u ne ŋaa Wia Bie. ¹² U bula piba ari siifiɛsiŋ di ba si leŋe di wiŋŋ deɛ teeli lerin kala.

Yesu tuɔse u haritooroo fii ari balia

Mat. 10.1-4; Luuk 6.12-16

¹³ Yesu sii a mu lee-la si keŋ peelee a yire u si cho nialiŋ kala, ba mu u teen. ¹⁴ U bira liise ba tuɔŋ niaa fii ari balia di ba ne he u teen. U liiseba nii di ba ma mu bul Wia wiaa. ¹⁵ U piba doluŋ maa di ba wuo kikiri jiiŋsiŋ niaa le. ¹⁶ Nialiŋ fii ari balia yiraa ne ŋla: Saamɔŋ, Yesu ne he Piita pu, ¹⁷ Zebidii bie Jeems ari Joɔŋ. Joɔŋ fa ŋaa Jeems ŋaana ne. Yesu

keŋba kaa yire Buanaajis. Yiri-la bubuɔŋ ne baaniŋ tiŋnaa. ¹⁸ Ba ku-kaanaa ma ne ŋla: Anɔduru ari Filip ari Batolomi ari Matiu ari Tomas ari Jeems Alifiyas bie, ari Tadiyas ari Saamɔŋ Zelot ¹⁹ ari Judas Isikarot, nii-la si ku ŋaa zenbe tiina a yalle Yesu. U liise nialiŋ dere aŋ miira mu dia.

Yesu mage namaga a mu tige Sitaani le

Mat. 12.22-32; Luuk 11.14-23; 12.10

²⁰ Nii ne niaa bira ku hilimi. U di u haritooroo paala bi chiniŋ na di ba dii kudiilee. ²¹ Nii ne u taŋ niaa nii a sii lii di ba kenu aŋ bul, “Uu che u nyaase ne.” ²² Wia teniŋ kerichiba dɔŋsun ma he dime. Ba lii Jerusalem ne a kɔ. Ba ma bul di jiiŋ-bɔŋŋɔ kala kuoro ba sii yire Belizibul ne kenu. U ne pu doluŋ u kikiri jiiŋsiŋ niaa le nii. ²³ Nii ne Yesu yireba a mage namagaba a pipiba a bul, “Ɛe ne Sitaani jan wuo ŋaa a kiri u titia? ²⁴ Di taŋ niaa ne he dime aŋ bi nii-bala keɛ, ba taŋ jan tel. ²⁵ Di niaa ne bira bi nii-bala keɛ, ba dia jan tel. ²⁶ Di Sitaani niaa saa bi nii-bala keɛ, ba taŋ bi jan chin. U jan tele dere. ²⁷ Nu u si jan juu ni-duoŋ dia a gaa u kiaa see duu keŋ ni-duo-la vɔɔ bil aŋ-na juu paa u kiaa.”

²⁸ Nii ne Yesu bira bula pi niaa a bul, “Wutitii ne mi bulaa pima, di niaa ne ŋaa haacheba kala aŋ pe tuuse Wia joŋŋoo maa, Wia jan wuo joŋba kala cheba. ²⁹ Ama di nuu ne tuuse Wia Diŋ-zɔŋ-la joŋŋoo, Wia bi jan joŋo cheu da. U tiina ŋaa haache-la si maga di u suu ne. Wia jan laa wii-la he u tuɔŋ le.” ³⁰ Nialiŋ dɔŋsun fa bula ari jiiŋ-bɔmuŋ ne keŋ Yesu. Nii ne tii u bul nii.

Yesu naaŋ ari u ŋaanaa kɔ u teen.

Mat. 12.46-50; Luuk 8.19-21

³¹ Muapilii Yesu naaŋ ari u ŋaanaa kɔ a chin di-jaliŋ aŋ tiŋ niaa di ba yiru. ³² Di ni-dan hoŋo gollu chu. Nii ne ba bula pu a bul, “N naaŋ ari ŋ ŋaanaa ne chin jeɛŋ hariŋ aa cheŋ.”

³³ Nii ne Yesu miira pieseba, “Kubee ne naa mi naan ari mi naanbiirin?” ³⁴ U miira ben nialin si hono gollu chu an bula piba a bul, “Mi naan ari mi naanbiirin ne nla. ³⁵ Nii-la kala sii naa wialin Wia si cho, u ne naa mi naana ari mi dihaala ari mi naan.”

4

Yesu mage namaga a mu tige baal-la si duu kaa le

Mat. 13.1-9; Luuk 8.4-8

¹ Nii ne Yesu miira mu hon Galilii muga-la niin a didage niaa. Niaa yuge a ku gollu chu. Ba si yuga nii ne, u sii mu juu liin daboro tuon a hon liin tuon. Ka nialin hon muga niin. ² Nii ne u mage namagaba a dageba wiaa yuge. U namagaba-la dono ne nla: U si, ³ “Ma jegile nii mi teen. Baal kubala ne sie a ken u ku-doho kaa lii duu mise. ⁴ U sii mise nii, ku-doho-la donsun tel wonbiin tuon. Diibiisin ku tuosa dii. ⁵⁻⁶ Donsun ma tuu tel kpaginyilin nyun. Hagila bi yuga, ka ba guu nyu. Ba naapoloo bi tinteen jua. Wia pose a nmooba ba suu, a tin bee wiaa ba naapoloo bi tinteen jua. ⁷ Ku-doho-la donsun ma tuu tel sosun tuon a nyu. Sosu-la ma nyu a nyageba kpu. Ba bi wasa. ⁸ Ku-doho-la donsun ma lii tel tintee-zomun le a nyu a waa a wase worun. Donsun he biee mara ari fii fii, donsun ma mahin batori batori, donsun ma zolo zolo.” ⁹ Yesu mage namaga-la dere, nii ne u bul, “Digilaa tinnaa, ma wuoli ma digilaa a nii wiaa deenba.”

Yesu dage namaga-la bubuon

Mat. 13.10-17; Luuk 8.9-10

¹⁰ Nii ne nialin viiri. An ka Yesu dunduha hon. U haritooro ari nialin si kpage dime, ba ku piese namagaba-la bubuosa. ¹¹ Nii ne u bula piba a bul, “Ma niaa deenba ne Wia dage u kuorii-la bubuon pa. Ama ni-kaanaa-na kala, namagaba ne u yie kaa didageba. ¹² Nii ne ba yie jegili jegili an bi ba bubuosa

wuo jin, a bira nyilimi nyilimi an bi kun-kala ma wuo na. Di ba ne fa jin ba bubuosa, ba fa jan birima to Wia, di u jon ba haacheba cheba.”

Yesu dage namaga-la bubuon

Mat. 13.18-22; Luuk 8.11-15

¹³ Nii ne Yesu pieseba a bul, “Ma bi namaga deen bubuon jin? Ee ne saa ma jan naa a jin namagaba kala bubuosa?” an dage namaga-la bubuon. U si, ¹⁴ “Baal-la sii duu kaa, u nage Wia niin wiaa ne u kaa lii di u duu nii. ¹⁵ Kialin si tel wonbiin le ne naa nialin si yie nii Wia niin wialin. Di ba nii wialin dere, Sitaani yie guu ko a ken wii-la a liiri ba tuosa le. ¹⁶ Kialin ma si tel kpaginyilin nyun ne naa nialin si yie nii Wia niin wialin a guu laa wialin dii ari tuotorun. ¹⁷ Ama ba bi boye kene a nage kialin naapoloo si bi tinteen jua. Ba jan sei wii-la a tou mu mage nii. Di heen ne juuba, koo di ba to naasin dudogiseba a tin wii-la wiaa, ba tuon lii wii-la le. Ba jono ta. ¹⁸⁻¹⁹ Kialin ma si tel sosun tuon ma ne naa nialin si yie nii Wia niin wialin, ama dunia kaa wiaa wiwalimeba, ba cho di ba jigi aa che kun-kala. A tin kaa deenba wiaa ba bi sei di ba to wialin. Wialin bi doho kene ba teen. ²⁰ Kialin ma si tel tintee-zomun le ma ne naa nialin si yie nii Wia niin wialin. Ba nii wialin a laa he ba tuosa le a ken doho, donsun mara ari fii fii, donsun mahin batori batori, donsun zolo zolo.”

Yesu mage namaga a mu tige chaanin le

Luuk 8.16-18

²¹ Nii ne Yesu bira bul, “N nii che pulumun a chol chaanin ku juu dia, n jan ken gbaa a chu too? Koo n jan jono kii godo bubuon? Ai, n jan jono kii kua nyun duu chaane. ²² Wu-faali tuo, see duu ku lii di-jalin. Wii-kala si he birimin tuon ma jan ku lii pulumun. ²³ Digilaa tinnaa, ma wuoli ma digilaa a nii.” ²⁴ U bira bula piba a bul, “Ma fiele ma siao

woruj ari wialinj ma sí nii. Nii titia ma si to ma dõnsun tinjaa le, nii titia ne Wia ma jan jonjo toma le. ²⁵ Nii-la kala sí to Wia niinj wiaa, Wia jan faasa peu le duu to woruj. Nii-la ma si bi Wia niinj wiaa ka to, Wia bi jan peu le. U si peu le mua-la maa, u jan laa u kua.”

Yesu mage namaga a tige kiasa duunuj le

²⁶ U bira bula piba a bul, “Wia kuorii-la nage ari nia si sie a mu di u duu kiasa baga le ne. ²⁷ Tanj biri u miira mu pinj. Tanj pul u bira sii. Tapulaa banmenε u sie di kialinj nyua a waa, ka u bi jinj ba si njaa nii a nyu. ²⁸ Ba yie nyu ba titia le a waa a he nyun a bii ba titia le. ²⁹ Ba bia, u njaa ba jonj sia a kaa mu kunj.”

Yesu mage namaga a mu tige ku-doho kubala ba sii yire Masitad le

Mat. 13.31-32, 34; Luuk 13.18-19

³⁰ Nii ne Yesu bira pieseba a bul, “Bee ne la jan jonj Wia kuorii-la a magise? Wu-bee ne la jan kaa dage u bubuonj? ³¹ U nage ku-doho kubala ba sí yire masitad ne, ba yie jonj a duu. Baa duu, di u bi wii maga. U ne muuro kii ku-doho-na kala si he dime. ³² Ba ne duu dere, u nyu. U yie sii waa a njaa tia a kii baga ku-duuloo kala kala. U naakelee yuge. Diibiisinj yie ku sageu le a saa ba dellinj dime.”

³³ Yesu mage namagaba a yuge a didage niaa. U yie didageba a mage nii ba si jan wuo laa a he ba nyun le ne. ³⁴ U yie bi sei duu bul wii-kala polli see u mage namaga. Ama ba di u haritooro dundunja ne hono, u yie dage namagaba-la bubuonj a piba ne.

Yesu njaa lii-pelinj kere

Mat. 8.23-27; Luuk 8.22-25

³⁵ Chee-la titia didaaninj u bula pi u haritooro-la a bul, “Má lenj di la chol muga cholo.” ³⁶ Ba ta ni-danj-la kala ba viiri, anj ku juu liinj daboro-la u fa si hono a kenu baa mu. Liinj daborusunj dõnsunj ma ne he dime a mumu. ³⁷ Nii ne di pel-duo kubala

suomo njjaa a ku nmoo liinj he liinj daboro-la le u chiche duu su. ³⁸ Ama Yesu fa pinj donj ne daboro-la harinj a yelli nyu-yelle. Ba ku chisu a bula pu a bul, “La kuhianj, nj bi jinj di laa che la suu nee?” ³⁹ Nii ne u sii donj le a kpia pel-la le a bula pi muga-la maa duu fiela pinj. Pel-la kere, ka lerinj kala njaa fuui. ⁴⁰ Nii ne Yesu piese u haritooro-la a bul, “Bee ne tii fawullunj kenja? Ma ha bi yarida njaa?” ⁴¹ Nii ne fawullunj kenja woruj, ba pipiese donjo, “Kubeε ne saa paala njaa nia deenj? Pelinj ari mugisunj kala tuto u niinj.”

5

Yesu vaare baal-la jinj-bõmunj si kene

Mat. 8.28-34; Luuk 8.26-39

¹ Nii ne ba sii chol muga cholo a ku yi Gerasa tinjaa tinteenj a lii liinj daboro le. ² Ba lia di ba chinj, di baal ne nii, jinj-bõmunj kenu. ³ U lii vaamaa tuonj a ko. ⁴ Ba fa yie kenj chorumoo vobu a lol. Ba vobu u kaa kere. Ba yie kenu he kurunj maa, u ta kuru-la yere anj sii mu honj vaamaa tuonj. Nuukala bi dolunj kene duu wuo kenu. ⁵ Wiiheye ari titanj kala u yie he vaamaa tuonj ari peelee nyun a yie sii a duduure. U duure vaama-la tuonj a chichiire a kenj tabiaa pipaase u titia. ⁶ U si na Yesu duu he di-bolii, u fá mu a chemu a kpirimi a chuolu. ⁷⁻⁸ Nii ne Yesu bula pi jinj-bõnj-la duu lii baal-la le. Baal-la chiire a bul, “Yesu, Wii-balinj Bie, bee ne nj che di nj njaami le? Mi jonj Wia chunuj di nj sími dogisu!” ⁹ Nii ne Yesu piesu a bul, “Nj yirinj ne bee?” U si, “Mi yirinj ne ku-kene, bee wiaa la yuga ne.” ¹⁰ Nii ne u sulu kinjenj a bul duu sí lenje di jinji-la lii tinjee-la le. ¹¹ Di toonuj ma he lee-la a yuge a didii kiasa peel-la nyun. ¹² Jinji-la sul Yesu duu lenj di ba mu juu toonu-la. ¹³ U sei. Nii ne ba lii baal-la le a mu juu toonu-la. Toonu-la kala sii a fá lii peel-la nyun

tuu. Ba tuu tel muga tuon a nyua liin a suu. Toonu-la fa yi bui balia.

¹⁴ Nii ne too-daara-la fá mu a ken doworo mu bula pi bagi-daaraa ari tan-la niaa kala. Ba sii ku lii Yesu teen. ¹⁵ Baa ko, di baal-la jin-bomun fa si kene, duu hono a laale gerin a ken yarifielaa. Ba si na nii, fawullun kenba. ¹⁶ Nialin fa si he dime a na wii-la si naa baal-la ari toonu-la le, ba bul wii-la pi nialin. ¹⁷ Ba si nii nii, ba ku sul Yesu a bul duu lii ba tinteen le. ¹⁸ Nii ne Yesu mu duu juu liin daboro. Baal-la jinsin fa si kene sulu a bul duu len duu ko di ba mu. ¹⁹ Yesu bi seye an bula pu duu miira mu dia a bula pi u dia niaa wii-la kala la Tiina Wia si naau le, ari u si fau nennige nii. ²⁰ Baal-la miira mu Dekapolis tinteen a bul wii-la kala Yesu si naau le. Niaa nii, u naaba wu-kpunkpere.

Yesu chise Jaaris tolo suun le an pe vaare haal kubala

Mat. 9.18-26; Luuk 8.40-56

²¹ Nii ne Yesu miira mu juu liin daboro a chol muga cholo a mu hon muga niin. Niaa gire ku chu.

²² Nii ne baal kubala he dime. Baa yire Jaaris. U fa naa Wii-chuole dia kuhian ne. Nii ne u na Yesu a tuu tel u naasin le ²³ a sulu a bul, "Mi tolo ni wiilu a pina kikiiki duu suu. Mii che di n ko a jon n nisin danu le, duu duori ne."

²⁴ Yesu sii to u harin, ba mumu. Niaa ma sii tuto u harin a gollu chu. ²⁵ Baa mu di haal ne nii. Nyanyalii kubala ne kenu. U fa ken tin a ne deen deen jisin fii ari balia. ²⁶ U fa gollo naa daalusun kinken a na heen worun a paala chei u moribiee kala pei. Ka u nyanyalii-la wasa juu-u le. ²⁷⁻²⁸ U si nii Yesu wiaa ne, u ku to niaa tuon a biina u tuon le, "Di mi digi u gerin maa, mi jan duori." Nii ne u piege nialin a mu chin Yesu harin a ken nisin a digi u gerin le. ²⁹ U si digi u gerin le nii, u tin-la guu dere. Nii ne u titia jin ari u tin-la dere ne. ³⁰ Ka Yesu ma jin u tuon

le ari dol kubala ne liiu le. U birime nialin teen a pieseba a bul, "Kubee ne digi mi gerin le nii?" ³¹ Nii ne u haritooro bul, "N bi na niaa si yuga nii a gollun chuu? Ka n pipiese di kubee ne digi n gerin le." ³²⁻³³ An ka Yesu ha biben duu na nii-la si digu. Ama haal-la jin wii-la si naau le ne. Nii ne u ko a chichel a tuu tel Yesu naasin le a bul wii-la kala pu. ³⁴ Nii ne Yesu miira bula pu a bul, "Mi tolo, n yarida ne naa n duori. Mu ari yarifielaa. Nyanyalii-la bira bi jan kenin."

³⁵ Yesu haa bul wiaa nii haal-la teen di tin daaraa lii kuhian Jaaris dia ko a bula pi Jaaris a bul, "N tolo-la suba ne, bira si la kuhian-la walimu." ³⁶ Yesu nii ba si bul nii a bula pi Wii-chuole dia kuhian Jaaris a bul, "Si lenge di n boye jon. Naa mi yarida." ³⁷ Nii ne Yesu sii a bi lenge nuu-kala to u harin see Piita ari Jeems ari u naana Jon. Ba dununa ne to u harin. ³⁸ Nii ne ba ku yi Wii-chuole dia kuhian-la dia. Baa ko di baa naa gon aa nmoo niin bage bage a yiyel. ³⁹ U mu juu a pieseba, "Bee ne tii maa naa gon deen kala? Bile bi suba. U pin don ne." ⁴⁰ Ba kala miira china mumumu. Nii ne u kiriba ta ba lii, an ka u ken bile nyimma ari u naan ari u harin niaa ba juu dia-la bile si pina. ⁴¹ Ba si juu dia-la nii, Yesu mu ken bile nisin le an bul, "Talita kumi." U bubun ne: Hanfolibie, mi si di n sii! ⁴² Bile guu sii aa ven. Bile fa naa jisin fii ari balia ne. U naa wu-kpunkpere ba le. ⁴³ Nii ne Yesu bul ari siifisin di ba si lenge di nuu-kala nii wii-la, an bul di ba naa kudiilee pi bile duu dii.

6

Nazaret niaa via Yesu

Mat. 13.53-58; Luuk 4.16-30

¹ Nii ne u lii dime a mu u tinteen. U haritooro ma to mu. ² Che-wiesii-la cheen u mu juu Wii-chuole dia a didage niaa. Ba si nii, ba jesin kala hiriki a bul, "Ee ne u naa a

jin wiaa deenba? Kubεε ne pu wu-jimiŋ deen? Εε ne u wuo ŋiŋaa wu-duoruŋ deenba? ³ La jimu, kapiŋta dee nii? Mεeri ne u naaŋ. Jeems ari Joozis ari Judas ari Saamŋ, ba ŋaa u ŋaanaa ne. U dihaalaa ma ne he daha ŋla.” Nii ne ba na baaniŋ u nyuŋ. ⁴ Yesu bula piba a bul, “Nii-la sii bul wiaa, Wia Diŋ-zŋ-la doluŋ le, u yie mu lee-kala, ba zizilu ne, aŋ ka u jaŋ-niaa ari u dia-niaa siŋ buu ka su.” ⁵ A tiŋ ba si bi yarida keŋe wiaa, u bi wu-duo kala wuo ŋaa lee-la, u ta joŋ u nisiŋ ne daŋ nyanyal tiŋŋaa baŋmeŋe le ne ba duori.

*Yesu tiŋ u haritooroŋ fii ari balia
Mat. 10.5-15; Luuk 9.1-6*

⁶ U kperi Yesu ari ba si buu yarida ŋaa. Nii ne u sii a mu gŋlle tasiŋ a didage niaa. ⁷ U yire u haritooroŋ fii ari balia a hilimi a tiŋba balia balia a piba doluŋ di ba wuo jin-bŋŋŋ. Nii ne u bula piba a bul, ⁸ “Ma si kuŋ-kala kaa pe veŋ woŋbiila, see ma daantiŋisiŋ duŋduŋa. Ma si kudiilee kaa mu. Ma bira si sulli-gbaŋa ma koru. Ma si moribiee ma joŋo he ma geri-fesiniŋ le. Ma si genniŋ tuŋ bulia ma laalu. ⁹ Ama ma paa ma neŋteŋŋεε he a laale geri-bala-bala aa veŋ.” ¹⁰ U bira bula piba a bul, “Di ma ne mua a juu taŋ kala, ma juu dia-la niaa si cho ma wiaa a he dii-bala le halii di bua-la le ma si jaŋ lii taŋ-la le yi. ¹¹ Di ma mu taŋ kala, di ba po di ma si juu a bi ma wialiŋ jegile nii, ma kiele mu. Di ma lia, ma kpesi ma naasiŋ hagila ta. Ba jaŋ jin ari ba ŋaa wii ne a cheima.” ¹² U tiŋba nii, ba lii a mu bul niaa le di ba birime a lii ba haacheba le. ¹³ Ba kiri jinsiŋ ma a yuge niaa le, ba lii. Ba joŋ nuuŋ mua ma a bisa he nyanyal tiŋŋaa le ba duori.

*Jŋŋ Wia lii-foori-la suba
Mat. 14.1-12; Luuk 9.7-9*

¹⁴ Nii ne Yesu yiriŋ teeli lee-na kala. Kuoro Herod ma nii u wiaa. Niaa doŋsuŋ si, “U ne ŋaa Jŋŋ, Wia lii-foori-la. Wia chisu suuŋ le ne.

Nii ne tii u keŋ doluŋ a ŋiŋaa wu-magilaa deenba.” ¹⁵ Ka doŋsuŋ ma si u nage Ilaaja ne. Doŋsuŋ ma si, “U ŋaa nii-la sii bul wiaa, Wia Diŋ-zŋ-la doluŋ le ne ari faafaa nialiŋ sii bul wiaa, Wia Diŋ-zŋ-la doluŋ le nii.”

¹⁶ Kuoro Herod si nii u wiaa u bul, “Jŋŋ ne nii. U ne nii-la mi si ŋaa ba keri u nyuŋ. U ne sii suuŋ le nii.” Wii-la si tii u ŋaa ba keri u nyuŋ ne ŋla: ¹⁷ Herod fa sie a mu jaa haal kubala. U yiriŋ ne Herodias. U fa ŋaa u ŋaana Filip haala ne. U laa jaa. ¹⁸ Nii ne Jŋŋ fa bula pi Herod, “Ŋ si keŋ ŋ ŋaana haala laa jaa nii, u bi woŋbiinŋ ŋaa.” ¹⁹ U si bul nii, Herodias na baaniŋ u nyuŋ a chiche di ba kpu Jŋŋ. ²⁰ Nii ne Herod ŋaa ba kenu to dia. Ama u na Jŋŋ duu ŋaa tuo-pul tiina a ŋiŋaa wialiŋ sii to woŋbiinŋ. Nii ne tii u fifau a bibenu woruŋ a bi che di ba kpuu. Wialiŋ kala Jŋŋ si bula kperu ne, ari nii kala u ha cho duu jegile nii wialiŋ u sii bul. ²¹ Kuoro Herod che-lulluŋ tapuluŋ ne bira yie. Nii ne u sii a ŋaa kudiilee yuge a keŋ u kuori-biisiŋ ari u laali-yuoro-hiasiŋ ari Galilii kuhiasiŋ kala, ba kala ko a hoŋo didii kiaa. ²² Ba hoŋo di Herodias tolo ne nii. U ku juu gugua. Herod ari nialiŋ kala bibenŋ a chou. Nii ne Herod bula pu di ku-la-na kala u sii che, u jaŋ pu. ²³ U paala ŋmiese a bul, “Ŋ sii che ku-la-na kala, mi jaŋ piŋ. Ŋ nii che mi tiŋteenŋ seŋpeŋ doŋo a yi lebi maa, mi jaŋ poi a piŋ.” ²⁴ Hanŋolibie-la sii lii a piŋe u naaŋ, “Mi bul mii che beε kuŋ?” Nii ne Herodias si, “Bula pu a bul ŋŋ che Jŋŋ Wia lii-foori-la nyuŋ ne.”

²⁵ Tolo-la miire lima lima a mu kuoru-la teenŋ a bula pu a bul, “Mii che di ŋ keri Jŋŋ Wia lii-foori-la nyuŋ a he pirata le a kaa ku pimi.” ²⁶ Kuoro si nii wii-la, u tuoŋ kala chei. Ama u si ŋmiesa nii, niaa kala nii. U bira bi u niinŋ wuo birime. ²⁷⁻²⁸ Nii ne di laali-yuoroŋ china a po ba kuoro. U yire ba doŋo duu mu keri Jŋŋ nyuŋ kaa ko. Laali-yuori-la sii a mu lee-la ba si kenu mu to a

keri u nyuŋ a he pirata le a kaa ko pi tolo-la. U laa a kaa mu pi u naaŋ. ²⁹ Jooŋ haritooro-la si nii wii-la, ba sii ko a laa u ku-suuŋ a kaa mu hugi.

Yesu pi niaa bui banonj kudiilee
Mat. 14.13-21; Luuk 9.10-17; Jooŋ 6.1-14

³⁰ Yesu nanjzooŋba saa sii a miira ko Yesu teenj a bula pu wialinj kala ba si nja ari wialinj kala ba si daga. ³¹ Niaa doŋsuŋ yie lilii, ka doŋsuŋ ku juuu. Yesu ari u haritooro paala bi chininj na di ba dii kiaa. Nii ne u bula piba a bul, "Ma lej di la mu lee-la niaa si tuo di ma wiesi mua." ³² Ba sii a juu liinj daboro a mumu niaa si tuo lee-la. ³³ Niaa yuge a naba a wuo jinj di ba ne. Nii ne niaa lii tasinj yuge a fa mu lee-la Yesu fa sii mu a laa sipaanj yi dime. ³⁴ Ba ma ko a lii liinj daboro le. Yesu si mu lii liinj daboro-la le, u na ni-danj di ba hono gberu. Nennige kala kenu. Nialinj nage piesee si bi pie-daara kene ne. U sii a dageba wiaa yuge.

³⁵⁻³⁶ Didaaninj ku yi, u haritooro ko u teenj a bula pu a bul, "Lerinj deenj nja girinj ne. Ka wia fiela nja. Ta nialinj di ba mu tasinj ari bagisinj si kpage daha a mu yoo kudiilee a dii." ³⁷ Di u si, "Ma mu che kudiilee piba ba dii." Ba piesu a bul, "Nj che di la kenj siidi bui balia a kaa mu yoo kudiilee a kaa ko piba di ba dii?" ³⁸ U pieseba a bul, "Boroboro banme ne he dime? Ma mu na." Ba mu anj miira ku bul, "Banonj ne ari cheŋfilee balia." ³⁹ Nii ne u bul di nialinj kala tuu gulimo honj honj ya-fielinj nyuŋ. ⁴⁰ Doŋsuŋ honj zolo zolo, doŋsuŋ ma mahinj balia ari fii fii. ⁴¹ Nii ne u jonj boroboro-la banonj ari cheŋfilee balia-la a wula benj wia nyuŋ anj lolle Wia anj kaa choge a pi u haritooro. Ba laa a kaa mu kpaa nialinj. U saa jonj cheŋfilee balia-la maa a kaa choge nii, ba kala dii. ⁴²⁻⁴³ Nuu-kala dii a voge. Ka ba mu paa ku-kaanaa, boroboroba ari cheŋfilee-la si ka, a paa su sinjinj fii

ari balia. ⁴⁴ Nialinj si dii kialinj, ba tuonj baalaa fa nja bui banonj ne.

Yesu venj liinj nyuŋ
Mat. 14.22-33; Jooŋ 6.15-21

⁴⁵ Nii ne u lej u haritooro mu juu daboro a laa sipaanj duoro chol muga cholo a mu Betisaada. Ka u ta ni-danj-la ba viiri. ⁴⁶ U haritooro mua, u mu jil peel kubala nyuŋ duu chuole Wia dime. ⁴⁷ Wia tuu juu di liinj daboro-la he liinj tutuobaaninj. Anj ka u dunduŋa ha he muga niinj. ⁴⁸ Nii ne Yesu bee na di pelinj ka lu a po di liinj daboro-la si mu. Ba duori duori liinj daboro-la lol. Siipuuraa u sii a venj liinj nyuŋ a mumu a ku kpageba a chiche duu kieliba. ⁴⁹ Ba nau duu venj liinj nyuŋ. Ba si nau, ba biina di ni-dima ne. Fawullunj kenjba, ba nmoo niinj. ⁵⁰ Nii ne u guu bula piba a bul, "Ma nyire ma boye. Mi-na ne. Ma si leŋe di fawullunj kenjma." ⁵¹ U saa ku juu ba teenj liinj daboro-la le. Pel-la kere. U njaaba wu-kpunj kperere. ⁵² Ba fa na Yesu duu kenj boroboro banonj a kpaa niaa bui banonj, ka ba ha bi u dolunj jinj. Ba siaa ha bi suro.

Yesu vaare nyanyal tinjaa
Genzaret le
Mat. 14.34-36

⁵³ Nii ne ba chol a ku yi tanj kubala baa yire Genzaret a lii liinj daboro-la le anj kaa voo liinj niinj. ⁵⁴ Ba lii didere, di niaa jima ari Yesu ne. ⁵⁵ Ba mu duure ba tinteenj kala a paa nyanyal tinjaa ari ba bosununj a kaa mu lee-na kala ba si nia di Yesu he. ⁵⁶ Lee-na kala Yesu si mua, tabalaa koo ta-biisinj koo bagisinj, niaa yie paa ba nyanyal tinjaa kaa juu yosunj tuonj a sulu duu lej ba digi u gerinj niipininj le. Di ba ne dige, ba yie duori ne.

7

Farisii tinjaa ari Wia teninj
kerichiba bul ba nyimmaba wonjiinj
tonunj wiaa
Mat. 15.1-9

1 Nii ne chεε kubala nialin ba sii yire Farisii tinjaa ari Wia tenin kerichiba dɔnsun si lii Jerusalem kɔ, ba kala sii gire kɔ Yesu teen. 2 Ba kɔ di Yesu haritooroo dɔnsun hɔnɔ didii kiaa an bi liin sɔmɔ. Ba si u nii nɔa disin ne. 3 Farisii tinjaa ari Juu tinjaa kala, ba bi kuɔ-kala ka dii, see di ba sɔn liin, ari ba naabalimaba si dageba nii. 4 Di ba ne yɔɔ kiaa lii yɔbɔ ma kaa kɔ, ba bi dii, see di ba sɔn liin. Ba kisinnin yuga. Ba keɔ wonbii dɔn ne ba sii tiisi ba nyunyualusun ari ba gbanjin ari ba hɔɔn pupoyee kala maa.

5 Nii ne ba ku piese Yesu a bul, "Bεε ne tii η haritooroo chichei la naabalimaba kisinnin le? Bεε ne tii ba bi liin sɔmɔ an didii kiaa?"

6 Nii ne u miira bula piba a bul, "Ma nɔa kanfugi timma ne. Wialin kala Azaaya fa sii bul, Wia Din-zɔn-la dolun le a tigema le nɔa wutitii ne. Ba ηmunse Wia tenin tuɔn ari u bul di Wia si,

'Niaa deenba keɔ niin ne a pipimi zile,
ka ba tuɔn liimi.

7 Ba yie chuɔlemi pei ne aa dage nuhuobiine wenin an bul di Wia ne bula.'

8 Nuhuobiine wenin ne maa to an via Wia niin wiaa."

9 U bira si, "Ma keɔ wu-jimin a via Wia wenin an tuto ma naabalimaba wonbii. Ma sii nɔa nii, ma kiaa simaa? 10 Moosis fa ηmunsa a bul ari Wia si di η fá η nyimma ari η naan, a bira ηmunse di nuu ne sii a bul wu-bɔmun a tige u nyimma koo u naan le, di ba kpu tiina. 11 Moosis fa ηmunse nii ne. Ama ma-na si di nuu ne keɔ kuɔ a mage duu joɔ pe u nyimma koo u naan le, tiina mu a bula piba, ku-la u fa si jan joɔ peba le nɔa kuɔ ne baa yire 'Kooban'. U bubuɔn ne: Wia ne tiu. Nii wiaa u bi jan joɔ piba." 12 Nii ne Yesu bira bula piba a bul, "Ma bira bi sei di nuu nɔa wii-kala pe u nyimma ari u naan le. 13 Ma yie nɔa nii a via Wia niin wiaa an tuto ma

naabalimaba wonbii a bira joɔo dage ma hanbiisin maa. Wu-yiribala yuga ne ma sii nɔa."

Kialin si keɔ disinnin

Mat. 15.10-20

14 Nii ne Yesu bira yire niaa ba kɔ. Ba si kɔ, u bula piba a bul, "Má kala jegili a nii worun. 15 Kuɔ-kala sii tuu η tuɔn bi disinnin keɔ. Ama wialin si he η tuɔn a kuu lii, ba ne keɔ disinnin. [16 Digilaa tinjaa, má wuoli ma digilaa a nii.]"

17 U si bul nii dεε, u mu juu dia an len nialin. Nii ne u haritooroo ku piesu namaga-la bubuɔn. 18 Nii ne u pieseba, "Ma ha bi wu-jimin keɔne? Ma bi jin ari nuu ne dii kuɔ, u bi jan wuo nɔa u keɔ disinnin? 19 N ne dii kuɔ nii, u bi η tuɔn ka tuu see η luorun, a bira to η yaraa lii." (U dageba nii ari kudiilee kisin bira tuo.) 20 Nii ne u bul, "Wialin kala si he η tuɔn a kuu lii, ba ne keɔ disinnin. 21 N tuɔn le ne η yie biine wu-bɔnɔn nɔanin a ηinɔa bachɔrun ari ha-chɔrun wu-nɔalaa, a gigaa niaa kiaa, a bira kpuɔpu niaa, a chiche niaa haalaa, 22 a bira cho η keɔ niaa kiaa lilaa, a ηinɔa wu-bɔn-na kala, a ηmunmoo niaa puo, a nɔa wialin kala si bi maga di η nɔa. N yaraa ma bibieri niaa le. N yie chichei niaa yirin maa, a bibigisi η titia le, a nɔa ni-yaari. 23 Wu-bɔnɔn deenba kala yie lii η tuɔn ne a keɔ disinnin."

24 Nii ne Yesu sii a lii dime a mu Taya ari Saadɔn tinteen a mu juu faa dia kubala le a bi che di nuu-kala jin u wiaa, ka ba via an jin.

Siiria tinjaa haala nɔa yarida

Mat. 15.21-28

25-26 Haal kubala ne he dime. U nɔa nuhuɔru ne a lii Fɔniisia tanla si he Siiria tinteen le. U yiikoro nɔa Giriik. Jin-bɔn ne fa keɔ u tolo. Nii ne u nii Yesu wiaa a sii kɔ a tuu tel u naasin le a sulu duu kiri jin-bɔn-la u bie le. 27 Yesu piesu, "N ne keɔ hanbiisin, η jan joɔ ba kudiilee a pi va-biisin? Ai, η laa sipaan nɔa

kudiilee pi η han̄biisin̄ ne di ba dii. Ba ne die an̄ ka, η saa jon̄o pi vahin̄.”
²⁸ Haal-la si, “Wutitii ne, mi Tiina. N̄ bi jan̄ jon̄ han̄biisin̄ kudiilee a pi vahin̄. Ama han̄biisi-la s̄i dii kialin̄, kialin̄ si tel tin̄teen̄ ne, vahi-la ma jan̄ paa dii.”
²⁹ N̄ii ne Yesu bula pi haal-la a bul, “A tin̄ η si bul wiin̄ deen̄ wiaa, jin̄-bon̄-la lii η tolo le ne. Mu dia.”
³⁰ Haal-la viiri. U mua di u bile pina. Jin̄-bon̄-la liiu le.

Yesu vaare tan̄in̄

³¹ N̄ii ne Yesu miira lii Taya tin̄teen̄ le a mu to Saadon̄ ari tasin̄ fi tin̄teen̄ a mu yi Galilii muga.
³² N̄ii ne di tan̄in̄ he dime. Ba kenu kaa ko a sul Yesu duu jon̄ u nisin̄ dan̄u le.
³³ Yesu kenu kaa lii niaa tuon̄. Ba dun̄dun̄a balia hon̄. N̄ii ne u jon̄ u neniee a kaa mu tuu u digilaa le a tu nan̄tuorun̄ he u nen̄delimin̄ le,
³⁴ an̄ bej̄ wia nyun̄ an̄ faasa wiesi fir an̄ bul baal-la le, “Efata.” Efata bubuon̄ ne: Kaa suri.
³⁵ Baal-la digilaa suri. U nen̄delimin̄ ma birime. U bubul wiaa worun̄.
³⁶ N̄ii ne Yesu bula pi nialin̄ ari siifiesin̄ di ba s̄i wiin̄ deen̄ bula pi nuu-kala. N̄ii titia u sisi di ba s̄i wii-la bula pi niaa, n̄ii titia ne ba ma fiese s̄i a bul wii-la gaara bal.
³⁷ Nialin̄ kala si nii wii-la, ba hiriki a bul, “Wii-na kala ne u n̄in̄aa worun̄. U paala n̄aa tan̄in̄ digilaa suri ne u nin̄ii wiaa a bubul wiaa.”

8

Yesu pi niaa bui banese kudiilee

Mat. 15.32-39

¹ Ni-dan̄ bira ku hilimi bua kubala le. Tapulii kubala, ba bira bi kudiilee kene di ba dii. N̄ii ne Yesu yire u haritooroo a bula piba,
² “Mi bej̄ niaa deen̄ba, nennige ken̄mi ne. Ba he mi teen̄ tapulaa batori ne n̄la, ba bi kudiilee na di ba dii.”
³ Di ba ne bi kuñ-kala die, ka di mi bul di ba viiri, ba jan̄ mu yiegi won̄biin̄ le. Ba don̄sun̄ ma lii di-bolii ne.”
⁴ N̄ii ne u haritooroo piessu, “Ee ne η jan̄ n̄aa a na kudiilee di niaa deen̄ba kala dii girin̄ deen̄ tuon̄?”
⁵ U piessaba,

“Boroboroba ban̄m̄e ne he dime?” Ba si, “Kiaa balipe ne.”
⁶ N̄ii ne u n̄aa nialin̄ tuu hon̄ tin̄teen̄. Ka u jon̄ boroboroba-la balipe a lolle Wia, an̄ kaa choge choge, a pi u haritooroo di ba laa kpa a nialin̄. Ba laa kpaaba.
⁷ Di ba ken̄ chen̄fili-biisin̄ ma mua. U jon̄ba maa a chuole Wia an̄ n̄aa u haritooroo laa kpa a nialin̄.
⁸ Nuukala dii a voge. Ka ba paa ku-kaan̄-biisin̄ a su sin̄sin̄ balipe.
⁹ Nialin̄ fa si dii kialin̄, ba yi bui banese.
¹⁰ N̄ii ne u taba an̄ ken̄ u haritooroo ba mu juu liin̄ daboro a mu Dalimanuuta tin̄teen̄.

Farisii tin̄n̄aa ka che di Yesu dage u dolun̄

Mat. 16.1-4

¹¹ N̄ii ne Farisii tin̄n̄aa don̄sun̄ s̄i ko aa che di ba magise Yesu a ku ken̄ wiaa lilee a bul, “N̄ si ken̄ dolun̄, n̄aa wu-magil di la na a jin̄ ari η dolla lii Wia ne.”
¹² Yesu tuon̄ chei. U faasa wiesi. N̄ii ne u piessaba, “Ma leele niaa deen̄ba, bee ne tii ma yie chiche di mi dage mi dolun̄? Wutitii, mi bulaa pima, mi bi jan̄ n̄aa wu-magil kala di ma leele niaa deen̄ba na.”
¹³ N̄ii ne u len̄ba an̄ miira juu liin̄ daboro a duoro chol muga cholo.

Yesu bul wiaa a mu tige Farisii tin̄n̄aa ari Herod le.

Mat. 16.5-12

¹⁴ Yesu ari u haritooroo si duoro chol muga cholo n̄ii, u haritooroo liisi ari ba yu ba kudiilee ta, an̄ ka boroboro kubala, u he liin̄ daboro le.
¹⁵ N̄ii ne Yesu bul ari siifiesin̄ di ba po ba titia le ari Farisii tin̄n̄aa ari Herod le. U di ba nage si-burun̄ ne. Di η jon̄o he kuñ-kala le, u yie puore ne.
¹⁶ U si bul n̄ii, ba hon̄o vuvuure a bul, “La bi boroboro kene, n̄ii ne tii u bul n̄ii.”
¹⁷ Yesu jin̄ ba s̄i vuure wii-la a piessaba, “Bee ne tii ma hon̄o vuure a bul, ‘La bi boroboro kene?’ Ma ha bi wu-jimin̄ kene? Ee ne ma tuon̄ dol n̄ii?”
¹⁸ Ma ken̄ siaa ne, ba bi naa? Ma ken̄ digilaa ne, ba bi nii? Ma bi wii-la liisee?
¹⁹ Mi jon̄ boroboroba ban̄on̄ a chogo kpa a

baalaa bui banɔŋ. Ma si paa ku-kaanaa, siŋsiŋ banmɛɛ nɛ ma paa su?” Ba si, “Siŋsiŋ fii ari balia.” ²⁰ U bira piɛsɛba, “Mi si jon boroboroba balipe a chɔŋɔ kpaa niaa bui banɛsɛ, ma si paa ku-kaanaa, siŋsiŋ banmɛɛ nɛ ma paa su?” Ba si siŋsiŋ balipe nɛ. ²¹ Nii nɛ u piɛsɛba, “Ma saa ha bi wu-jimin kenɛ?”

Yesu vaare nyulima Betisaada lɛ

²² Yesu ari u haritooroo bira ku yi taŋ kubala baa yirɛ Betisaada. Nii nɛ niaa dɔŋsuŋ sii a ken nyuluŋ kubala a kaa kɔ a sul Yesu duu jon u nisij a digu. ²³ U ken nyuluŋ-la nisij lɛ a lɛru lii taŋ-la tuɔŋ a tu nanɗuɔruŋ hɛ u siaa lɛ a jon u nisaa danu lɛ an piɛsu di uu na lerij nɛɛ? ²⁴ U ben lerij an bul, “Mii na niaa nɛ, ama ba nage tiisij nɛ aa gollɛ.” ²⁵ Nii nɛ Yesu miira ken u nisaa dan u siaa lɛ. Baal-la faasa chaare siaa woruŋ a na kuŋ-kun-kala woruŋ. U siaa bira nina. ²⁶ Nii nɛ Yesu bula pu duu bira sɩ taŋ-la tuɔŋ juu, duu mu u jan.

*Piita si di Yesu nɛ ŋaa Kirisito
Mat. 16.13-20; Luuk 9.18-21*

²⁷ Yesu ari u haritooroo bira sii leela a mumu Sizariya Filipa tinɗeŋ. Ba sɩi mu nii, Yesu piɛsɛ u haritooroo a bul, “Kubɛɛ nɛ niaa si di mi ŋaa?” ²⁸ Ba si, “Dɔŋsuŋ si di ŋ ŋaa Joŋ nɛ, Wia lii-foori-la. Dɔŋsuŋ ma si di ŋ nɛ ŋaa Ilaaja, nii-la fa sɩi bul wiaa, Wia Diŋ-zɔŋ-la doluŋ lɛ nɛ. Dɔŋsuŋ ma si di ŋ nɛ ŋaa nialij sɩi bul wiaa, Wia Diŋ-zɔŋ-la doluŋ lɛ dɔŋɔ nɛ.” ²⁹ Nii nɛ Yesu bira piɛsɛ u haritooroo maa a bul, “Ka ma maa, ma si mi ŋaa kubɛɛ nɛ?” Piita si, “Ŋ nɛ ŋaa Kirisito, nii-la Wia si liisa.” ³⁰ Piita si bul nii, Yesu bula piba ari siifesiŋ di ba pɔ di ba sɩ wii-la bula pi nuu-kala.

Yesu bul nii u si jan na hɛɛŋ an pɛ suu

Mat. 16.21-28; Luuk 9.22-29

³¹ Nii nɛ Yesu didage u haritooroo-la a bul, “Mi-na, Nuhuobiine Bie, mi jan na hɛɛŋ woruŋ. Kuhiasij ari nialij si kpu pusun pipi Wia

kuhiasij ari Wia tenij kerichiba, ba kala jan viami an ŋaa di ba kpumi. Di ba nɛ kpumi, mi jan ŋaa tapulaa batori an bira sii suun lɛ.” ³² U chaasa bul wiin deen nɛ piba. Nii nɛ Piita kenu kaa suusa lii, a kpiau lɛ, a bul u teen ari u sɩ nii bul, u bi woruŋ bula. ³³ Nii nɛ Yesu birime u haritooroo teen an kpia Piita lɛ a bul, “Sitaani, mu dime. Wialij ŋ sɩi bul, nuhuobiine wonbiin nɛ, Wia wonbiin dee.”

³⁴ Nii nɛ u yirɛ u haritooroo ari nialij kala di ba kɔ a bula piba a bul, “Di nuu-kala nɩi che duu tomi, see duu via u titia wonbiin an jon u daa-gesɛɛ baase a tomi. ³⁵ Nii-la kala sɩi che duu laa u miisij, u jan via u miisij ta. Ama nii-la si via u miisij ta a tin mi wiaa ari Wia wu-zomɔ-la wiaa, u jan sene laa u miisij. ³⁶ Di ŋ nɛ dii dunia kala an bi miisij kenɛ, bɛɛ kuŋ nyuurii nɛ ŋ na? ³⁷ Dunia deen lɛ, bɛɛ kuŋ nɛ saa ŋ jan wuo kaa yɔɔ laa ŋ miisij? ³⁸ Ma lɛlɛ ni-bɔŋŋɔ deenba, ma yie fifa hiisij a tin mi wiaa ari mi wu-bulaa lɛ. Ama cheɛ kubala mi-na Nuhuobiine Bie, mi jan kɔ a chaanɛ, ari mi Nyimma si chaanɛ nii. Mi jan ken Wia tinɗaaraa di la kala kɔ. Bua-la lɛ nɛ, nii-la si fa mi hiisij, mi ma jan fau hiisij.”

9

¹ Nii nɛ Yesu bira bula pi u haritooro-la a bul, “Wutitii nɛ mi bulaa pima, niaa dɔŋsuŋ hɛ dime, ba bi jan suu, see di ba na Wia kuorii-la china dɛrɛ ari doluŋ, ka di ba-na suu.”

Yesu birima

Mat. 17.1-13; Luuk 9.28-36

² Tapulaa balidu si ku bal, Yesu ken Piita ari Jeems ari Joŋ, ba dunduŋa, a kaa mu jil peel-bal kubala nyun. Ba ben ba sipaan a na Yesu duu birima. ³ U genniŋ kala pulle kinɗen a tutul. Geri-cheseru kala bi jan wuo chɛsɛ genniŋ di ba pulla nage nii. ⁴ Ilaaja ari Moosis ku lii ba sipaan a china bubul wiaa

Yesu teenj. ⁵ Nii ne Piita bula pi Yesu a bul, "La kuhianj, u n̄aa wu-zonj ne ari la si he daha. Lenj di la he lenjhe batori, di η kenj donj, di Moosis ma kenj donj, di Ilaaja ma kenj donj." ⁶ Fawullunj fa kenjba ne worunj. Nii ne tii u bul nii. U bi jinj wii-la kala u si janj bul.

⁷ Nii ne duonbilingbaaninj ku t̄oba. Ka yiikoro kubala lii duonbilingbaan-la tuonj a bubul, "Mi Bii-choolunj ne n̄la. Má jegile nii u teenj." ⁸ Ba nii yiikoro deenj a miira daase. Ba bi nuu-kala na see Yesu dunjuna.

⁹ Ba si lii peel-la nyunj kuu tuu, nii ne Yesu bula piba a bul, "Mi bí che di ma bul wii-la ma si na, see di mi-na, Nuhuobiine Bie sii suunj le." ¹⁰ Nii ne ba sei a kenj wii-la ba tuonj anj pipiese donj, "U si janj sii suunj le, u bubuonj ne beej?" ¹¹ Nii ne ba piese Yesu, "Bej ne tii Wia teninj kerichiba bul ari Ilaaja ne janj laa sipaanj k̄o, anj ka di Wia Bie-na k̄o?" ¹² U bula piba a bul, "Wutitii, Ilaaja janj sene laa sipaanj k̄o a kenj kunj-kala wasa bil. Ba saa ηmunja bil Wia teninj tuonj a mu tige Nuhuobiine Bie le duu janj na heenj kinjenj, di ba janj benu a nage ni-pei. Bej ne tii ba ηmunje nii?" ¹³ Leele mi janj bula pima ari Ilaaja paala k̄o ne. Ba n̄aa u nii kala ba s̄i che. Ba fa ηmunje nii ne a tigeu le Wia teninj tuonj."

*Yesu kiri jinj-bomunj bie le
Mat. 17.14-21; Luuk 9.37-43*

¹⁴ Ba si ku yi haritooro ku-kaanala di n̄aa yuga a hilimi dime. Ba di Wia teninj kerichiba kenj wiaa lilere. ¹⁵ Nialinj si na Yesu duu k̄o, ba guu hiriki a sii fá a mu chemu a chuolu. ¹⁶ Nii ne u pieseba, "Wu-bej ne ma hilimi nii a kaa lilere?" ¹⁷ Nialinj donj bul, "La kuhianj, mi bie ne mi kaa k̄o η teenj. Jinj-bonj ne kenu. U birime tanj. ¹⁸ U yie ku kenu u tuu tel tinteenj, nantuo-funfuga t̄o u niinj, u chichanj u nyilaa a teriki. La saa sul η haritooro di ba kiri jinj-bonj-la u le, ama ba bi wuo kiri." ¹⁹ Nii ne Yesu bula piba a bul, "Ma

leele n̄aa, ma bi yarida kene. Ee ne mi janj nyalime a dieni ma teenj? Má kenj bile kaa k̄o mi teenj." ²⁰ Nii ne ba kenj bile kaa k̄o u teenj. Jinj-bonj-la si ku na Yesu, u kenj bile teriki, u tuu tel tinteenj a bibilimi, nantuo-funfuga-la ku t̄o u niinj. ²¹ Nii ne Yesu piese u nyimma, "Che bej ne u suomiu le?" U si, "U hanjbiirinj kala le ne u suomi. ²² Bua donj u yie jonj a lulo nyininj le ari liinj le a chiche duu kpuu. N̄na si wuo wii-na kala ηn̄aa, fála nennige anj pela le." ²³ Nii ne Yesu si di nii-la kala si n̄aa yarida, u janj wuo n̄aa wii-na kala. ²⁴ Nii ne bile nyimma sii chinj a faasa bubunsi, "Mi n̄aa yarida, ama u bi yuge. Pemi le di mi yarida yuge." ²⁵ Ba si china bubul nii, n̄aa yuga a fá ku hilimi. Yesu ku na a bula pi jinj-bonj-la ari siifiesinj a bul, "Jinj-tanj, mi ne bula di η lenj bile. Pupo di η maachie bira suu kenj." ²⁶ Jinj-bonj-la chiire anj kenu teriki a ku lenj, ka bile nage duu suba. Nialinj jesinj kala bul di bile suba ne. ²⁷ Ama Yesu mu kenj u nisinj le u sii chinj. ²⁸ Nii ne Yesu ari u haritooro juu dia. Ba luora piesu, "Bej ne tii la-na bi jinj-bonj-la wuo kiri?" ²⁹ U bula piba, "Nuu-kala bi jinj-bonj-la si nage ηii wuo kire tita, see u chuole Wia worunj."

*Yesu bira bul u suunj wiaa.
Mat. 17.22-23; Luuk 9.43-45*

³⁰ Nii ne ba sii lii lee-la a mu to Galilii tinteenj. Yesu bi cho di nuu-kala jinj lee-la u si he, ³¹ bej wiaa uu dage u haritooro ne ari ba janj kenj u-na, Nuhuobiine Bie a he n̄aa nisinj le di ba kpuu, ka duu sii suunj le tapulaa batori cheenj a kenj miisinj. ³² Ama ba fa bi jinj wii-la u si bula bubuonj anj fifá fawullunj di ba piesu.

*Yesu haritooro che di ba jinj ba tuonj kuhianj
Mat. 18.1-5; Luuk 9.46-48*

³³ Nii ne ba sii k̄o Kapenam. Ba si juu dia, Yesu piese u haritoorola a bul, "Bej kunj ne ma fa kaa lilere wonjinj le ηii?" ³⁴ Nii ne ba

tore ba niin, bee wiaa ba fa ken ba tuon kuhian wiaa ne lilee wonbiin le. ³⁵ Nii ne Yesu hon an yire u haritooro-la fii ari balia a bula piba, "Nii-la sii che duu naa ma tuon kuhian, see duu ku naa ma tuon hanbie a timaa pi ma kala!" ³⁶ Nii ne u ken bii-bie a kaa ku bil ba tutuobaanin a guoru an bula piba a bul, ³⁷ "Di nuu ne ken bii-bie deen donjo worun a tin mi wiaa, mi ne u ken worun nii. Nii-la ma kala si kenmi worun, mi dunduja dee u ken worun nii. Nii-la si tinmi ma ne u ken worun nii."

Baala kiri jin-bonjoo Yesu dolun le

Luuk 9.49-50

³⁸ Nii ne Joon bula pi Yesu a bul, "La kuhian, la na baal kubala duu kiri jin-bonjoo niaa le n dolun le. La kiru duu si nii naa, bee wiaa u bi la donjo naa." ³⁹ Ama Yesu bula piba a bul, "Duu nii naa nii, ma bira siu kiru. Di nuu ne naa wukpunkpere kala mi dolun le, u chie bira bi jan chei mi yirin. ⁴⁰ Nii-la kala si bi la harin lia, u naa la donjo ne. ⁴¹ Wutitii mi bulaa pima, nii-la kala si jon gban ari liin a pima a tin ma sii tomi wiaa, u jan laa u time.

Wialin si jan kenin he haache le
Mat. 18.6-9; Luuk 17.1-2

⁴² Nii-la kala si na hanbiisi-la sii tomi donjo a nyisu duu naa wubomun, u maga di ba jon nomun a voo laale u banja le a jonu yuo he muga tuon. Di ba ne naa nii, u ne jan kpia u si weye. ⁴³ Di n nisin nii che duu kenin he haache le, kere ta. N si jan juu Wia kuorii-la tuon ari na-kuun, u ne kpia n si ken na-pilimee an juu Wia nyinin. Lee-la nyin-la bi jan dise. [⁴⁴ Lee-la nanchuolaa jan dii n yaraa deen deen a bi jan suu, ka nyin-la ma bi jan dise.] ⁴⁵ Di n naan nii che u kenin he haache le, kere ta. N si jan juu Wia kuorii-la tuon ari naa-kuun, u ne kpia ba si jan jonun yuo he Wia nyinin le ari naa-pilimee. [

⁴⁶ Lee-la nanchuolaa jan dii n yaraa deen deen a bi jan suu, ka nyin-la ma bi jan dise.] ⁴⁷ Di n siin nii che duu kenin he haache le, liisa ta. N si jan juu Wia kuorii-la tuon ari siitogo, u ne kpia ba si jonun yuo he Wia nyinin le ari siaa balia. ⁴⁸ Lee-la nanchuolaa jan dii n yaraa deen deen a bi jan suu, ka nyin-la ma bi jan dise. ⁴⁹ Wia jan len di n na heen an-na na wu-zomun. ⁵⁰ Yisin sima, ama di u ne sebise, n bira bi jan wuo naa duu sin. Ma len di ma tuosaa sin, ari yisin si sima nii, an len di ma kala ken nii-bala."

10

Yesu dage niaa di ba si ba haalaa via

Mat. 19.1-12; Luuk 16.18

¹ Nii ne Yesu sii a lii dime a mu Judiya tinteen a chol Joodan fuo-la. Ni-dan bira hilimi u teen. U bira dageba ari u si yie dageba nii.

² Nii ne Farisii tinnaa donsun ma sii ko u teen a chiche di ba magisu a piesu a bul, "N si via n haala, u ken wonbiin nee?" ³ Yesu miira pieseba, "Ee ne Moosis dagema di ma tuto?" ⁴ Ba bul, "Moosis si di baala nii che u via u haala, duu laa sipaan a nmunse tenin a pi haala an-na viau." ⁵ Yesu bula piba a bul, "Ma tuon dolie, nii ne tii Moosis nmunse nii pima. ⁶ Ama Wia si bugumo naa dunia, nialin u si naa, ba naa baal ari haal ne. ⁷ Nii ne baal-la jan len u nyimma ari u naan dia [an ka ba di u haala mere donjo le]. ⁸ Niaa deenba balia jan ken chal-bala. Ba bira bi jan naa niaa balia, see kubala. ⁹ Nialin saa Wia si kaa mere donjo le, u bi maga di nuhuobiine kaa pore."

¹⁰ Yesu ari u haritooro miira sii juu dia. Nii ne ba bira piesu wiin deen. ¹¹ U bula piba, "Baal-la-na kala si via u haala an bira jaa donjo, u tiina naa haal-la juu Wia haache le ne. ¹² Di haala ma ne via u bala an ma bira mu jaa baal don, u ma naa baal-la juu Wia haache le ne."

*Yesu jonj nisinj danj hanjbiisinj le
Mat. 19.13-15; Luuk 18.15-17*

¹³ Niaa sii kɔ Yesu teenj a kenj ba hanjbiisinj kaa kɔ, duu jonj u nisinj danjba le di Wia peba le. Nii ne u haritooro-la kpiaba le. ¹⁴ Yesu si na nii, u na baaninj u haritooro-la nyuŋ a bula piba a bul, “Má leŋ di hanjbiisi-la kɔ mi teenj. Ma síba kiru. Niaa deenba yiri ne he Wia kuorii-la tuɔŋ. ¹⁵ Wutitii ne, mi bulaa pima, di ŋ bi Wia to a nage hanjbie si yie to u nyimma ari u naanj nii, ŋ bi janj wuo juu Wia kuorii-la tuɔŋ.” ¹⁶ Nii ne u jonj hanjbiisi-la a nɔge, a jonj u nisinj danjba le, a chuɔle Wia pipiba di Wia peba le.

*Baal-la si kenj kiaa kɔ Yesu teenj
Mat. 19.16-30; Luuk 18.18-30*

¹⁷ Yesu bira sie duu venj wonjbiinj. Baal kubala fá ku kpirimi u sipaanj a piɛsu, “Mi kuhia-zɔmunj, ɛɛ ne mi janj ŋaa a kenj miisi-la si bi dɛɛ?” ¹⁸ Yesu piɛsu, “Bɛɛ ne tii ŋ yiremi kuhia-zɔmunj? Nuu-kala bi zɔŋ see Wia dunɔŋa. ¹⁹ Na ŋ jinj wialinj Wia si leŋe ba ŋmunja bil di niaa tuto. Ba ne ŋla: Sí niaa kpu, sí ŋ dɔŋɔ tiina haala che, sí gaa, di ŋ ŋaa danjsia wii le, sí wiaa nyia. Sí nuu-kala kuŋ girima laa. Fifá ŋ nyimma ari ŋ naanj.” ²⁰ Nii ne baal-la bula pi Yesu, “Mi kuhianj, mi to wiaa deenba kala mi hanjbiirinj le ne.” ²¹ Nii ne Yesu nyilimi u siaa le a chou anj bula pu, “Wu-bala ne ka, ŋ ha bi ŋaa. Jonj ŋ kiaa kala yalle a jonj moribie-la a pi summoo anj ku tomi. Nj ne ŋaa nii, ŋ janj kenj kiaa Wia-janj le.” ²² Yesu si bul nii, u ŋaa baal-la siaa biri, bɛɛ wiaa u kenj kiaa ne woruŋ. U tuɔŋ chei, u sii viiri. ²³ Nii ne Yesu benj niaa anj miira bula pi u haritooro-la a bul, “U ŋaa wu-duo ne ari nialinj si kenj kiaa si janj wuo juu Wia kuorii-la tuɔŋ.” ²⁴ U bul nii, u haritooro-la hiriki. U saa miira bula piba a bul, “Mi nanɔɔŋsuŋ, u ŋaa wu-duo ne ari nialinj si kenj kiaa si janj juu Wia kuorii-la tuɔŋ. ²⁵ U bi hei ari bunɔŋa si janj wuo to geri-heminj

buɔŋ lii ari u si heye nii nii-la si kenj kiaa si janj wuo juu Wia kuorii-la tuɔŋ.”

²⁶ Yesu si bul nii, u haritooro-la faasa hiriki a pipiɛɛ dɔŋɔ, “U ne nage nii, kubɛɛ ne saa Wia janj laa ta?” ²⁷ Yesu miira benjba anj bul, “Wii-la si janj kperi nuhuobiine, u bi Wia wuo kperi. Wia wuo wiikala ŋaa ne.” ²⁸ Nii ne Piita bula pu a bul, “Na, la-na leŋ la kuŋ-kala ne anj tuto ŋ harinj.” ²⁹ Yesu bula pu a bul, “Wutitii ne, ma leŋ ma kiaa kala ne anj tutomi. Mi saa janj bula pima, nii-la kala si janj wuo leŋ u dia koo u naanjiirinj koo u naanj koo u nyimma koo u biirinj koo u bagisinj mi wiaa ari Wia wu-zɔmɔ-la wiaa, ³⁰ u tiina janj bira na diisinj ari naanjiirinj ari naanjba ari biirinj ari bagisinj naanjiirinj zɔɔɔ dunia deenj le. Ba ma janj to u naasinj dudɔgisu. Di u ne ku suu, u ma janj na miisi-la si bi dɛɛ. ³¹ Ama kuhiasinj yuga si janj birime hanjbiisinj. Hanjbiisinj ma yuga si janj birime kuhiasinj.”

*Yesu bira bul u suuŋ wiaa.
Mat. 20.17-19; Luuk 18.31-34*

³² Yesu si bul nii di ba he wonjbiinj le ne aa mu Jerusalem. Yesu laa ba sipaanj. U haritooroo hiriki, fawulunj ma kenj nialinj dɔŋsuŋ sii to ba harinj. Nii ne Yesu kenj u haritooroo dunɔŋa a suusa lii, a bula piba wii-la kala niaa si janj ŋaa le a bul, ³³ “Má jegili mi teenj. Laa mu Jerusalem ne. Di la ne yi dime, ba janj kenj mi-na Nuhuobiine Bie kaa mu pi nialinj si kpu pusuj pipi Wia kuhiasinj ari Wia teninj kerichiba. Ba janj dii mi sariya a bul di u maga di mi suu ne, anj kenjmi kaa mu he nialinj si bi juu tinjŋaa ŋaa nisinj le di ba kpumi. ³⁴ Ba janj mɔŋmi a janj tu nanɔŋuŋ ma hemi le. Ba janj viiremi anj kpumi maa, ka di mi sii suuŋ le tapulaa batori cheɛŋ.”

*Jeems ari Joɔŋ sul Yesu aa che di-
hɔnuŋ Wia teenj
Mat. 20.20-28*

³⁵ Nii ne Jeems ari Jooj sii. Ba fa naa Zebidii biirin ne a mu Yesu teen a bula pu a bul, "La kuhian, laa sulun di n naa wii ne a pila." ³⁶ Nii ne Yesu pieseba a bul, "Wu-bee ne maa che di mi naa pima?" ³⁷ Ba bul, "N si jan dii Wia kuorii-la a ken yirin a hon n kuori-kpasa nyun, len la naa n bubuon huhonnoo, di dono hon n na-diin, di dono ma hon n na-gua."

³⁸ Nii ne Yesu bula piba a bul, "Ma bi jin ku-la ma sii che. Ma jan wuo nyalima na hee-la mi si jan naa? Ma jan wuo fo Wii-chuole liin ari ba si jan fomi nii koo?" ³⁹ Ba si, "Oo, la jan wuo." Nii ne Yesu bula piba a bul, "Wutitii ne ma bul. Hee-la mi si jan na, u-na ma ma jan na. Ba si jan fomi Wii-chuole liin nii, ba jan foma ma nii. ⁴⁰ Ama mi na-diin ari mi na-gua huhonnoo-la, mi dee bi jan tuoseba. Wia ne jan liiseba di ba hon dime."

⁴¹ Yesu haritooro fii-la si ka nii Jeems ari Jooj si bul wii-la, ba na baani ba nyun. ⁴² Nii ne Yesu yire u haritooro kala. Ba mu u teen. U bula piba a bul, "Ma jin nialin si naa nialin si bi juu tinnaa naa kuoro, a fa mage di ba ben niaa worun, an ka ba via an hon ba nyun. Ba kuhiasin ma kenba dolun. ⁴³ Ama u bi maga di ma njanaa nii. Ma tuon nii-la sii che u naa ma kuhian, u maga duu ne tin tinnaa pipima. ⁴⁴ Ma tuon nii-la sii che u naa ma tuon kuoro, u maga duu ne naa ma tuon yomo. ⁴⁵ Mi-na Nuhuobiine Bie, mi bi ko di mi che niaa di ba tima pimi, mi ko di mi-na tima piba, a suu, a laa niaa miisaa yuge ta a piba ne."

Yesu vaare nyulima

Mat. 20.29-34; Luuk 18.35-43

⁴⁶ Nii ne ba ku yi tan kubala baa yire Jeriko. Ni-dan ku hilimi a toba. Ba kala kuu lii dime di nyulima hon wonbiin niin. U naa sullu ne. U yirin ne Batimeyas a naa Timeyas bie. ⁴⁷ U nia di Yesu si lii Nazaret nii ko. U si nii nii, u faasa yire a bula pu a bul, "Yesu, Devit nihin, fami nennige." ⁴⁸ Niaa yuga a kpiu

le duu ken gon, ama u faasa yire a kii nii a bul, "Yesu, Devit nihin, fami nennige." ⁴⁹ Nii ne Yesu chin an bul di ba yiru duu ko. Nii ne ba yire nyulun-la a bula pu a bul, "Nyire n boye an sii ko. Uu yirin ne." ⁵⁰ U si nii nii, u wuri u geri-balin ta an sii fula mu yi Yesu. ⁵¹ Nii ne Yesu piesu, "Bee kun ne n che mi naa a pin?" Nii ne u bula pu, "Mi kuhian, len di mi siaa suri di mi nina." ⁵² Nii ne Yesu bula pu a bul, "N yarida ne naa n duori. Mumu."

Nii ne u siaa guu suri, u tuto Yesu harin.

11

Yesu juu Jerusalem

Mat. 21.1-11; Luuk 19.28-40; Jooj 12.12-19

¹ Nii ne Yesu ari u haritooro-la sii mumu Jerusalem. Ba ku yi Betifagi ari Betani diirin, a ku yi peel kubala baa yire Oliv. ² Nii ne Yesu liise u haritooro balia a tinba a bula piba a bul, "Ma mu tan-la si he ma sipaan. Di ma ne mua, ma jan na kaku-bie di ba voo bil. Nuu-kala ha buu jila. Ma puri a kaa ko. ³ Di ma nii puru, di ba piesema a bul di bee ne tii maa puri, ma bul di 'la Tiina nii che. U ne si la puro kaa ko. La jan miira kenu kaa ko leele.' "

⁴ Ba to wonbiin bibal di ba voo kaku-bie a kii dia kubala boinniin. Ba mu di ba puri. ⁵ Ba sii puri kaku-bie-la, di niaa donsun chin dime a pieseba, "Bee ne tii maa puri kaku-bie-la?" ⁶ Nii ne ba bul wialin kala Yesu si si di ba bul. Ba si bul nii, ba len ba puro mu. ⁷ Ba ken kaku-bie-la kaa mu pi Yesu a wuri ba genni a dan kaku-bie-la nyun. Yesu jila hon. ⁸ Donsun ma jon ba genni a jere wonbiin le. Donsun ma keripiparin a ma kaa lii jere wonbiin le duu viven. ⁹ Niaa donsun he u sipaan. Donsun maa to u harin. Ba kala faasaa naa gon a bubul, "Tabarikala! Wia jan pe baala deen sii ko la Tiina Wia dolun le. ¹⁰ La naabalima Devit kuorii-la

sii kɔ. Wia jan pɛu ɛ duu kɔ. Má len di la denne Wia.”

¹¹ Nii nɛ Yesu mu Jerusalem a mu juu Wia-dia a beɲ kialiɲ kala si hɛ dime. U bene dɛrɛ di taɲ bire. Nii nɛ ba di u haritooro-la fii ari balia miira mu Betani a mu chua dime.

Yesu kaliba hɛ tutogo ɛ

Mat. 21.18-19

¹² Taɲ si pula, ba sii lii Betani a jon wonɓiiɲ mumu. Losuɲ keɲ Yesu. ¹³ U na tutogo duu mu chin sipaan a keɲ pipaariɲ. U mu yi u bubuɔɲ a biine ari nɛnɛ hɛ dime nɛ. U mu wula beɲ, di nɛnɛ tuo see pipaariɲ, bɛɛ wiaa ba neniɲ ha bi yie. ¹⁴ Nii nɛ Yesu bul tia-la ɛ a bul, “A lii jiniɲ a kaa mumu, nuu-kala bira bi jan dii ɲ nɛnɛ.” U haritooro nii Yesu si bul nii.

Yesu kiri nialiɲ sɪ yallɛ kɪaa Wia-dia ɛ

Mat. 21.12-17; Luuk 19.45-48; Jɔɔɲ 2.13-22

¹⁵ Nii nɛ ba mu yi Jerusalem. Ba si yie, Yesu juu Wia-dia. Nialiɲ dɔɲsun hɛ dime a yiyallɛ kɪaa, dɔɲsun ma yuyɔɔ kɪaa. Yesu kiriba kala ta ba lii. Baalaa ma hɛ dime a yiyɛrɛ moribee. Yesu ɲmoo ba teebulba lo. Baalaa dɔɲsun ma yallɛ kokosuɲ. U ɲmoo ba ma kpasinniɲ a lo. ¹⁶ U bi seye di nuu-kala keɲ kɪaa kaa ku to Wia-dia-la tuɔɲ. ¹⁷ Nii nɛ Yesu dageba a bula piba a bul, “Ma bi liise wialiɲ ba si ɲmuɲsa Wia teniɲ lɛɛ? Ba ɲmuɲsa di Wia si, u dia jan ɲaa lee-la niaa si jan chuchuɔɛ Wia, aɲ ka ma-na miira kaa birime gaarid-ia.” ¹⁸ Nialiɲ si kpu pusuɲ pipi Wia kuhiasiɲ ari Wia teniɲ kerichiba, ba kala nii wii-la u si bula. Nii nɛ baa che wonɓiiɲ di ba to kpuu.

Wialiɲ Yesu si daga, niaa yuga a jegile nii, u ɲaaba wu-kpunkpere. Nii nɛ tii fawulluɲ keɲ nialiɲ si kpu pusuɲ pipi Wia kuhiasiɲ ari Wia teniɲ kerichiba. Ba chiche di ba kpuu. ¹⁹ Didaanɲ si yie, Yesu ari u haritooro lii taɲ-la ɛ di ba mu piɲ.

Yesu dage tutogo-la suuɲ bubuɔɲ
Mat. 21.20-22

²⁰ Chichuɔ-fieɓa ba jon wonɓiiɲ aa ven, a bira na tutogo-la duu kala suba a tuu keɲ u naapoloo pɛ. ²¹ Nii nɛ Piita liisi wii-la Yesu si bul tia-la ɛ a bula pi Yesu a bul, “La kuhian, bee na tia-la ɛ ɲ si kaliba hɛ, u suba nɛ.” ²² Nii nɛ Yesu bula piba a bul, “Má ɲaa yarida ari Wia. ²³ Wutitii nɛ mi bulaa pima, di ma nɛ ɲaa Wia yarida a bi tuɔsaa balia kenɛ, ma jan bul di peeliɲ sii mu tel muga tuɔɲ. U jan ɲaa a pima. ²⁴ Nii wiaa kialiɲ-na kala ma si chuɔɛ Wia a susul, di ma nɛ keɲ yarida, ma jan naba. ²⁵ Bua-na kala di ɲ nɛ sii chin a chuchuɔɛ Wia, biina na di ma di nuu keɲ wii. Di u cho duu nage ɲii ma kala, ɲ joɲo cheu. ɲ nɛ ɲaa ɲii, Wia si hɛ Wia-jan ɛ, u ma jan jon ɲ haacheba cheɲ. [²⁶ Ama di ɲ nɛ bi wiaa joɲo che ɲ dɔɲsun tiɲɲaa, ɲ Nyimma Wia si hɛ Wia-jan ɛ, u ma bi jan jon ɲ haacheba cheɲ.”]

Niaa piɛɛ Yesu u doluɲ wiaa

Mat. 21.23-27; Luuk 20.1-8

²⁷ Ba bira kɔ Jerusalem a mu juu Wia-dia. Yesu sii ven Wia-dia tuɔɲ ɲii, nialiɲ si kpu pusuɲ pipi Wia kuhiasiɲ ari Wia teniɲ kerichiba ari Juu tiɲɲaa kuhiasiɲ, ba kala sii kɔ u teen ²⁸ a piɛsu a bul, “Dol bɛɛ nɛ ɲ keɲ a ɲiɲaa wiaa deenba? Kubɛ nɛ piɲ doluɲ ɲ ɲiɲaa ɲii?” ²⁹ Nii nɛ Yesu bula piba a bul, “Mi ma jan piɛsɛma wu-bala. Di ma nɛ dagemi u bubuɔɲ, mi ma jan dagema dolla mi si kenɛ bubuɔɲ.” ³⁰ Nii nɛ u piɛsɛba a bul, “Jɔɔɲ, Wia lii-foori-la doluɲ, u lii Wia teen nɛɛ koo u lii nuhuobiine teen nɛɛ? Má dagemi.”

³¹ Ba suomo keɲ wii-la lilɛrɛ dɔɲo ɛ aa bul, “Wu-bɛɛ nɛ laa che di la bul? Di la nɛ bula pu a bul di Wia teen nɛ u lii, u jan piɛsɛla a bul, ‘Bɛɛ nɛ saa tii ma bi wialiɲ u si bula laa dii?’ ³² La saa jan wuo bul u lii nuhuobiinee teen nɛɛ? Ai.” Fawulluɲ keɲba a tiɲ nialiɲ si chin dime wiaa. Niaa bula ari Jɔɔɲ fa

sene ɲaa nii-la sɪi bul wiaa, Wia Din-zɔŋ-la doluŋ le ne. ³³ Nii ne ba bula pi Yesu a bul, “La bi jin.” Yesu ma bula piba a bul, “Tɔɔ, mi ma bi jan dagema dol-la mi si kene bubuɔŋ.”

12

Yesu mage namaga a tige nialin sɪi tinjɲɲaa бага le

Mat. 21.33-46; Luuk 20.9-19

¹ Yesu bira mage namaga a piba a bul, “Baal kubala ne bil бага a chɔŋse kiaa si ken nene yuge a nage chichuɛŋ. Ba yiyire gireps. U saa lige бага-la gollɪ ne. U lu bua бага-la tuɔŋ di ba chage tii-nene-la liin hihe, a saa lusun nyun dia ma a hono po. U paa niaa a he u бага-la tuɔŋ di ba titin. Ka u mu tan dɔŋ.

² Tii-nene-la bii, u tinj u dia tintinnaa dɔŋɔ duu mu tintinna-la teen a laa tii-nene kaa ko. U mu. ³ Ba kenu a ɲmobu an len u ken na-hillin miira mu бага tiina teen. ⁴ U bira miira tinj tintinna-la dɔŋɔ. U ma bira mu. Ba kenu a ɲmobu a yage u nyun luri a jolimu. ⁵ U bira tinj tori, u bira mu. Ba kpuu. U tinj niaa yuge. Ba ɲaa nii titia nialin ma le. Ba ɲmoo dɔŋsun an kpu dɔŋsun maa. ⁶ Nii-la si ka, u bii-choolun ne nii. Nii harin le ne u timu. U biina u bie ne mua, ba jan zilu. U ma bira mu. ⁷ Tintinna-la si na bile, ba bula pi dɔŋɔ a bul, ‘Di бага-la tiina ne suba, bie deen ne jan dii u kiaa. Má ko di la kpuu. Di la ne kpuu, la ne jan miira tii u kialin.’

⁸ Ba ken bile a kpuu a jonu yuo ta бага-la harin.”

⁹ Nii ne Yesu pieseba, “Ee ne бага-la tiina jan ɲaa? U jan ko a kpu tintinna-la kala, an jon бага-la a pi ni-tania.” ¹⁰ Nii ne Yesu piese nialin si nii namaga-la, “Ma bi Wia ten-la karimaa a mu yi lee-la ba si bul ɲlaa?

‘Tiepii-la dii-saaraa si via, u ne miira ku ɲaa tiepii-duon ba si jonɔ bil dia gentine.

¹¹ La Tiina Wia tinjɲɲaa ne nii.

U ɲaala wu-kpunkpere ne.’ ”

¹² Yesu si bul nii, Juu tinjɲaa kuhiasin chiche di ba kenu kaa mu to dia, bee wiaa ba jima ari u mage namaga-la a tigeba le ne. Ama ba fá nialin si he dime. Nii ne tii ba lenj an viiri.

Ba piese Yesu lanpoo wiaa

Mat. 22.15-22; Luuk 20.20-26

¹³ Ba miira mu an tinj Farisii tinjɲaa dɔŋsun ari Herod haritooro dɔŋsun di ba bira mu Yesu teen a magisu a bere kenu. ¹⁴ Ba ko u teen a bula pu a bul, “La kuhian, la jima di ɲ ken wutitii ne. ɲ sipaan tuo nuu le. ɲ bi ni-bal sɪi ka fá. ɲɲ dage Wia wonbii-titii ne. U ɲaa wonbiin ne di la tinj lanpoo a pi Rom tinteen kuoribalin ba sɪi yire Siiza koo? Dagela.

¹⁵ La timepu koo la sí pa?” Yesu jima ne di ba fugoo bul ne, nii ne u pieseba a bul, “Bee ne tii maa magisemi? Má ken moribii-biin kaa ko di mi bee na.” ¹⁶ Ba ken dɔŋɔ kaa ko. Nii ne u pieseba, “Kubee nyun ne he dime? Kubee yirin ma ne ba tuuro he moribii-la le?” Nii ne ba bul di Siiza yirin ne. ¹⁷ U bula piba a bul, “Tɔɔ, má jon Rom tinteen kuoribala-la kiaa pu an jon Wia ma kiaa pu.” Yesu si bul nii, ba niirin kala maa. Ba lenj an viiri.

Ba piese Yesu a tige nialin si suba le

Mat. 22.23-33; Luuk 20.27-40

¹⁸ Nii ne nialin dɔŋsun ba sɪi yire Sadiusii tinjɲaa, ba ko u teen. Sadiusii tinjɲaa yie si di nuu ne suba, u bira bi sii. Ba piesu wiaa a bul, ¹⁹ “La kuhian, Moosis dagela Wia tenin tuɔŋ ari baala ne jaa haala, di haala ari baal-la ne bi bii lula, an ka di baal-la suu, u maga di u ɲaana jon haal-la jaa ne. Di u lul biirin pi u maala-la si suba, biiri-la jan chinj u nyun le. ²⁰ Naanbiirin balipe ne fa he dime. Ba kala ɲaa baalaa ne. Ba naan kubala, ba nyimma ma kubala. Ba kuhian jaa haala. Ba di haal-la bi bii lula, an ka u suu. ²¹ Liamin tiina jon haal-la jaa. Ba duu ma bi bii lula. Ka u ma suu. Torimun tiina

ma jon haal-la jaa. U ma nii titia ne. ²² Naanbiiri-la balipe kala ne jaa haal-la. U bi lula. Nii harin le ne haal-la ma titia suu. ²³ Tapulii-la niaa si jan sii suun le, baalaa deenba balipe tuon, kubee ne jan tii haal-la? Ba kala balipe ne jaau."

²⁴ Nii ne Yesu bula piba a bul, "Ma bi Wia tenin jin. Ma ma bi Wia dolun jin. Nii ne tii ma yenji. ²⁵ Tapulii-la niaa si jan sii suun le, baalaa bira bi jan jaa haalaa, haalaa ma bira bi jan jaa balaba. Ba kala jan nage Wia tindaaraa si he Wia-jan le." ²⁶ Nii ne Yesu bula piba a bul, "Na ma piesemi nialin si jan sii suun le wiaa. Ma bi karime wialin Moosis si bula Wia tenin tuon, lee-la u fa si bul wiaa a tige tii-bie sii di nyinin lee? Wia ne bula pu duu ne naa Abiraham Wia ari Aizik Wia ari Jekob Wia. (Bua-la le u si bul nii di Abiraham ari Aizik ari Jekob fa suba ne.) ²⁷ Wiaa deenba u si bula, ba bubusaa ne di Abiraham ari Aizik ari Jekob bira sii suun le ne a he Wia kuorii-la tuon. Wia bi jan wuo naa nialin si suba Wia. U naa ni-weyee Wia ne. Ma bi wii-kala jin."

Yesu dage Wia wiaa tuon ku-balin
Mat. 22.34-40; Luuk 10.25-28

²⁸ Wia tenin kerichiba donjo nia ba si ken wii-la lilere. U ko ba teen. U si na di Yesu chaare wiaa siaa worun, u piesu a bul, "Wialin Wia si dage niaa baa to, kubee ne naa ba tuon wu-balin?" ²⁹ U bula piba a bul, "Ba bula pi Iziral niaa a bul, 'Iziral niaa, ma jegile nii mi teen. La Tiina Wia dunduna ne he dime. ³⁰ N ken n tuon kala ari n tuobiinaa kala ari n wii-wii-kala a cho n Tiina Wia.' Ba tuon ku-balin ne nii. ³¹ Wu-liamin ma ne nla: 'Cho n donjo tiina ari n si cho n titia nii.' Wialin Wia si bula, wii-kala tuo a kii wiaa deenba baliamin." ³² Nii ne Wia tenin kerichi-la bula pu a bul, "La kuhian, wutitii ne n bul nii. Wia dunduna ne he dime, kun-kala bira tuo see Wia dunduna. ³³ N si jan

ken n tuon kala ari n tuobiinaa kala ari n wii-wii-kala a cho Wia, a cho n donjo tiina ari n si cho n titia nii, u ne kpia n si jon pusun kpu a nyiga pi Wia, koo n si jon kiaa donsun a bile pi Wia." ³⁴ Yesu na di baal-la ken wu-jimin. Nii ne u bula pu a bul, "Ma di Wia kuorii-la bi bol." U si bul nii dere, nuu-kala bira bi nyu-duon kene duu piesu wii-kala.

Yesu dage niaa a tige Kirisito, nii-la Wia si liisa le

Mat. 22.41-46; Luuk 20.41-44

³⁵ Yesu bira dage niaa Wia-dia tuon a pieseba, "Ee ne Wia tenin kerichiba jan wuo bul ari Kirisito, nii-la Wia si liisa, jan naa Devit nihi dundun ne? ³⁶ Wia Din-zon-la ne fa dage Devit duu bul wiaa a tige Kirisito le. Nla ne u bul, 'La Tiina Wia bula pi mi Tiina duu hon u seme, ni-duon di-honun, see duu yuo dii u dinjonjo kala dere.'

³⁷ Devit titia yire nia deen u Tiina. Ee ne saa u jan wuo naa u nihi dundun?" Yesu sii bul wiaa, niaa yuga a jegile nii u teen ari tuoton.

Yesu dage niaa di ba ken ba titia worun Wia kerichiba le

Mat. 23.1-36; Luuk 20.45-47

³⁸ Yesu bira dageba a bul, "Ma ken ma titia worun Wia tenin kerichiba le. Ba yie gugolle yobo le ari ba geridudosun aa che di niaa jujonba jirima a chuchuleba. ³⁹ Ba yie chiche ni-balaa di-honun Wii-chuole diisin le. Di ba ne yireba di ba ku dii kiaa, ba cho di ba hon ni-balaa di-honoo maa. ⁴⁰ Ba yie fugo chuole Wia didieni a ken yo-haalaa kiaa laa didii. Bua-la le Wia si jan dii ba sariya, ba ne jan na heen a kii ba donsun tinnaa kala."

Yo-haala jon u moribin kala a pi Wia

Luuk 21.1-4

⁴¹ Yesu mu hon lee-la niaa si jon ba moribee bil a pipi Wia a nina nii ba sii he. Nialin si ken kiaa, ba

22 Niaa dɔnsun jan sii fugo bul di ba ne ɲaa Kirisito, nii-la Wia si liisa. Dɔnsun ma jan sii fugo bul di ba ɲaa nialin sii bul wiaa, Wia Diŋ-zɔŋ-la dolun le ne. Ba jan ɲaa wu-magilaa ari wu-kpɔŋkperisin a chiche di ba nyise nialin Wia si liisa di baa tou. 23 Wiaa deenba kala mi laa sipaan bula pima, ka di bua-la-na yi. Má keŋ ma titia worun.”

Yesu bula pi niaa duu jan miira ko
Mat. 24.29-31; Luuk 21.25-28

24 Nii ne Yesu bira bula piba a bul, “Tapulia-la heeŋ deen si kiele, tan jan biri di tan ne pula maa. Chene ma bira bi jan pose. 25 Chenwulaa jan lii wia nyun ku tuu a titel. Ba jan kiri wia nyun kialin kala si keŋ dolun di ba lii ba leree. 26 Nii le ne ma jan na mi-na Nuhuobiine Bie, di mi to duonbilinbaanaa tuon ku tuu. Mi jan keŋ dolun yuge a chaane. 27 Nii le ne mi jan tin Wia tin daaraa di ba mu dunia seme-na kala a keŋ nialin kala Wia si liisa di baa tou a hilimi.

Yesu bul tutogo wiaa
Mat. 24.32-35; Luuk 21.24-33

28 Di ma na sojaamin duu kuu tose, ma jima ari linbaŋa yie ne. 29 Namaga deen le ma jan gunne wiaa. Di ma na wiaa deenba kala di baa ɲaa, ma jin di mi-na Nuhuobiine Bie kpaŋa ne. 30 Wutitii mi bulaa pima, ma leele niaa deenba si he ma miisin deen le bi jan suu, ka wiaa deenba ɲaa bal. 31 Wia nyun ari tin teen kala jan dere, ama wialin mi si bula bi jan lel.

Nuu-kala bi jan jin chee-la wiaa deenba si jan ɲaa
Mat. 24.36-44

32 Ama nuu-kala bi jan jin chee-la wiaa deenba si jan ɲaa. Wia tin daaraa si he Wia-jan ma paala bi jan jin. Mi-na Wia Bie ma bi jan jin, see mi Nyimma dun duna. 33 Má keŋ ma titia worun a po, bee wiaa ma bi wialin si jan ɲaa chee-la jin. 34 U nage baala si sie aa che u ven wonbiin ne. Di u lii dia le, u

jan dage u tintinnaa ba tintin ɲaa an bula pi nii-la sii ben u dia maa duu po worun duu miira ko.

35 Má saa po worun, bee wiaa ma bi jin chee-la dia-la tiina si jan ko, di didaanin nee, di tita-siesee nee, di siipuura nee, koo chichuon nee, ma bi jin. 36 Má biben a po worun, di nii dee, u jan guu ko di ma pin don. 37 Wii-la mi si bulaa pima, u ne mi bulaa pi nuu-kala, má po worun.”

14

Niaa ka che ba kpu Yesu

Mat. 26.1-5; Luuk 22.1-2; Jɔɔŋ 11.45-53

1 Tapulaa balia ne ka duu yi ba che-bal-la: Diisin kielin gbiele-la. Tapulii-la ne ba yie dii boroboro si bi si-burun kene. Nii ne nialin si kpu pusun pipi Wia ari Wia tenin kerichiba, baa che wonbiin di ba luora keŋ Yesu a kpu. 2 Ba bula di ba síu keŋ ba che-bal-la cheeŋ, di ba ne ɲaa nii, niaa jan ɲaa taawei.

Haala jon nuun a bisa he Yesu nyun le

Mat. 26.6-13; Jɔɔŋ 12.1-8

3 U mu Betani a hon Saamon dia le a didii kiasa. Saamon fa ɲaa gbege ne an ku duori. Uu dii kiasa di haal kubala ku juu a keŋ tulaali ari lon. U suora sima, u yalin ma heyee. U keŋ lon-la suri a liise nuu-la a bisa he Yesu nyun le. 4 Ka nialin dɔnsun hono gugurime a pipiese donjo a bul, “Bee ne tii haala deen keŋ nuu-la a kaa chei ɲla? 5 Di ba ne fa yaara jon nuu-la a yalle, u fa jan kii siidi bui balia di ba fa jono pi summoo.” Ba sii tutuuse haal-la. 6 Nii ne Yesu bula piba a bul, “Má len haal-la. Bee ne tii ma wiwalimu? Wu-zon ne u ɲaami le. 7 Ma di summoo jan he dime bua-na kala le. Bua-na kala le ne ma chiche ma ɲaa wu-zomun a pi summo-la, ma jan wuo ɲaa, ama la di ma bi jan he dime deen deen. 8 Haal-la ɲaa kukeri ne. U ɲaa wii-la kala u si jan wuo ɲaa ne. U tise mi yaraa di ba hugi ne, ka mi ha bi

suba. ⁹ Wutitii ne mi bulaa pima, dunia seme-na kala ba si jan wuo mu a bul Wia wu-zomɔ-la, ba jan liisi haala deen ma wiaa a bul.”

Judas seye ari u jan jon Yesu yalla piba

Mat. 26.14-16; Luuk 22.3-6

¹⁰ Nii ne Judas Isikarot sii. U naa Yesu haritooro-la fii ari balia donɔ ne. U sii mumu nialin si kpu pusun pipi Wia kuhiasin teen duu ken Yesu yalla piba.

¹¹ Ba si nii nii, ba tuɔn tɔre. Ba bul ba jan jon moribiee pu. A chin bua-la le u suomo chiche wonjbii-la u si jan to a ken Yesu yalla piba.

Yesu ari u haritooro dii diisin kielin gbiele kudiilee

Mat. 26.17-25; Luuk 22.7-14, 21-23; Jɔɔn 13.21-30

¹² Ba che-bal-la tapul-bunbun ba si yie dii boroboro-la si bi si-burun kenɛ an kpu piese-la ba si yie kaa naa gbiele-la kudiilee, Yesu haritooro-la sii a piesu, “Nii ne n cho di la mu naa diisin kielin gbiele-la kudiilee di n ku dii?” ¹³ Nii ne u tin u haritooro balia a bula piba a bul, “Má mu juu tan-la tuɔn. Di ma ne mua, ma jan chen baal kubala duu chun nyuvie ari liin. Má to u harin.

¹⁴ Dia-na kala u si jua, má to juu bula pi dia-la tiina a bul, ‘La kuhian si, la piesin di nii le ne nuhura dia he di ba di u haritooro juu a hono dii diisin kielin gbiele kudiilee?’ ¹⁵ U jan dagema dii-bal kubala. U naa lusun nyun dia ne. Ba wasu kala. Lee-la ne ma jan naa kudiile-la.” ¹⁶ Nii ne u haritooro-la sii lii a mu tan tuɔn a na wialin kala Yesu si bula piba di ba naa wutitii a naa diisin kielin gbiele-la kudiilee ba dii.

¹⁷ Wia si jua, Yesu ari u haritooro ku juu a honɔ a didii kialin. ¹⁸ Ba sí dii kaa nii, nii ne Yesu bula piba a bul, “Wutitii, mi bulaa pima, ma niaa deenba sí dii kialin, ma donɔ jan jonmi yalle. La duu ne pe donɔ a didii kaa lele.” ¹⁹ Ba si nii wiila, ba tuɔn chei. Ba kala pipiese

kuɔn kuɔn. Donɔ yie piese, “Mi nee?”

²⁰ Yesu bula piba a bul, “Ma fii ari balia deenba tuɔn kubala ne, la kala ne chala ken boroboro tutuu gbanjala tuɔn. ²¹ Mi-na, Nuhuobiine Bie, mi jan suu ari ba si nmunse nii a tigemi le. Ama nii-la si jon mi-na Nuhuobiine Bie yalle, aa, u jan na heen yuge. Ba fa si buu lula, u ne kpia.”

Kudiile-la Yesu si si di ba dii a liliisi u wiaa

Mat. 26.26-30; Luuk 22.14-20; 1 Kɔr. 11.23-25

²² Ba si hono didii kaa, nii ne Yesu sii a jon boroboro a lolle Wia an kaa choge choge, a jonɔ pi u haritooro, a bula piba a bul, “Má laa. Mi yaraa namia ne nii.” ²³ Nii ne u bira jon nyunyuala maa ari sinin a lolle Wia an jonɔ piba. Ba kala nyua nyunyual-bala-la tuɔn. ²⁴ Nii ne Yesu bula piba, “Mi chalin ne nii. Chalin deen wiaa ne tii Wia ta niin ma teen. Mi chalin jan jaase ni-kene wiaa, di Wia jon ba haacheba cheba. ²⁵ Wutitii ne mi bulaa pima, mi bira bi jan ko di mi nyua sinin deen, see tapulii-la mi si jan ko ne, mi jan nyua si-falin Wia kuorii-la tuɔn.”

Yesu bula pi Piita ari u jan bul u buu jin

Mat. 26.31-35; Luuk 22.31-34; Jɔɔn 13.36-38

²⁶ Nii ne ba yii Wii-chuole yiilin a dere an sii lii a mu peel kubala baa yire Oliv. ²⁷ Nii ne Yesu bula piba a bul, “Ma kala jan fá viiri. Ba nmunse Wia tenin tuɔn di Wia jan kpu pie-daara, an ka piesee fá pise. Ba si nmunse nii Wia ten-la, wii-la jan naa. Ma kala jan fá mi teen an lenmi. ²⁸ Wia jan chisemi suun le. U ne chisemi, mi jan laa ma sipaan a mu Galilii.” ²⁹ Nii ne Piita bula pi Yesu a bul, “Di ba kala fá maa an lenin, mi-na bi jan miire n harin.” ³⁰ Nii ne Yesu bula pu a bul, “Wutitii ne, jinin titanin deen, n-na Piita, n jan bul naansiin butori ari n bimi jin, ka di ji-bele-na yel naansiin

bulia.” ³¹ Nii ne Piita bul ari siifiesin a bul, “La din paala susuu maa, mi bi jan bul ari mi bin jin.” Ku-kaanaa ma kala bul nii.

*Yesu chuole Wia Getisemani le
Mat. 26.36-46; Luuk 22.39-46*

³² Nii ne ba mu juu lee kubala baa yire Getisemani. Yesu bula pi u haritooroo di ba hon daha, ka u mu chuole Wia an ko. ³³ U ken Piita ari Jeems ari Joon a kaa mu dime. Yesu tuon kala chei. U tuon bi pina. ³⁴ U bula pi u haritooroo a bul, “Mi tuon kala ne cheye a mage di mi suu. Ma hono po daha.” ³⁵ Ba hon. Ka u suusa mu sipaan mua a tuu kpirimi tinteen a sul Wia a bul duu ne ken wonbiin, duu si leye di wii-la juu u le ³⁶ a bira bul, “Mi Nyimma, n jan wuo naa wii-kala. Liise hee-la sii komi le. Ama mi-na nla tuoton le dee, n-na tuoton le ne.”

³⁷ U chuola dere an sii ko u haritooroo teen di ba pin don. Nii ne u piese Piita a bul, “N pina nee? N bi don muapili ma wuo beree a diene yi hawa kubalaa? ³⁸ Ma chuole Wia a pupo di Sitaani si wuo nyisema. Ma tuon le ma cho di ma naa wuzonoo, an ka ma bi dolon kene.” ³⁹ U bira mu a chuole Wia a bira bul nii titia. ⁴⁰ U miira ko di ba bira pin don, bee wiaa don kenba ne woron. Ba bi jin ba si jan bul wii-la kala a pu. ⁴¹ U miira mu torimon an ku pieseba, “Ma ha pinaa wiesi nee? Ma sii, bua-la yie ne. Ba jan ken mi-na, Nuhuobiine Bie a pi haache diiree. ⁴² Ma sii, la mu. Nii-la si jan jonmi yalle ka ko ne.”

*Ba ken Yesu
Mat. 26.47-56; Luuk 22.47-53;
Joon 18.3-12*

⁴³ Yesu ha bi wiaa bula dere, di Judas nii ko nii. U fa naa Yesu haritooro-la fii ari balia don ne. Naa yuge a tuto u harin. Donsun kori tokobiee ari tanguloo. Nalin si kpu pusun pipi Wia kuhiasin ari Wia tenin kerichiba ari ba tan kuhiasin ne tinba, ba ko. ⁴⁴ Zenbe tiina-la

fa pi nalin magil ne a bul, “Nii-la mi si mu guori, u ne nii. Ma kenu.” ⁴⁵ Judas si yi lee-la Yesu si he, u mu u teen tegi tegi an bul, “La kuhian!” an guoru. ⁴⁶ Ba kala guriku a kenu. ⁴⁷ Ka niaa china biben. Ba tuon don liise u tokobiin, a ta nuu digilin keru. Nii-la fa nalin si kpu pusun pipi Wia kuhian dia-yon ne. ⁴⁸ Nii ne Yesu pieseba a bul, “Mi naa gaaru nee? Ma si kori tokobiee ari tanguloo a kuko di ma kenmii? ⁴⁹ Na, tapulii-na kala la di ma ne yie he Wia-dia le, mi dage Wia wiaa a pipima. An ka ma bi walima di ma kenmi dime. Ama walin kala ba si nmunsa Wia tenin tuon a tigemi le, ba kala jan naa.” ⁵⁰ Nii ne u haritooroo kala viau an fa.

⁵¹ Ka bapوسي kubala baage geriboso a tuto Yesu harin a mumu. Baa walime di ba kenu. ⁵² Ama u wuri geriboso-la a ta an ken yaribiree a fa viiri.

*Ba ken Yesu kaa mu nalin si kpu
pusun pipi Wia kuhian dia*

Mat. 26.57-68; Luuk 22.54-55, 63-71; Joon 18.13-14, 19-24

⁵³ Ba saa ken Yesu a kaa mu nalin si kpu pusun pipi Wia kuhian teen. Ba ko dime di nalin si kpu pusun pipi Wia kuhiasin ari ba Wii-chuole hiasin ari Wia tenin kerichiba kala hilime. ⁵⁴ Ba kenu mumu nii, ka Piita daa tuto ba harin a mu juu nalin si kpu pusun pipi Wia kuhian kaala. U jua di nalin sii po kaala-la hono wiwieni nyinin. U mu peba le.

⁵⁵ Nii ne nalin si kpu pusun pipi Wia kuhiasi-la ari nalin kala si yie hilime wuvuure wiaa chiche di ba na Yesu si naa wii-la chei di ba kpuu a che che wii ka. ⁵⁶ Naa yuga a nya wiaa pu. Ama ba bul nii-lierin ne, ba bi nii-bala bula. ⁵⁷ Nii ne niaa donsun sii chin a nya wiaa pupu a bul, ⁵⁸ “La nia ari Yesu si u jan nmoo Wia-dia-la niaa si saa a lo an bira wuo saa u don tapulaa batori cheen, di niaa dee bi jan saa dia-lana.” ⁵⁹ Ama ba walin kala bi kubala

naa. ⁶⁰ Nii ne nialin si kpu pusun pipi Wia kuhian sii lii chin nialin tutuɔbaanin a piese Yesu a bul, “N bi nia niaa deenba si bul wialin a tigen leɛ? N-na bi wii kene ɲ jan bul?” ⁶¹ Nii ne Yesu tɔre u niin. U bi wii-kala bula. Nii ne baal-la bira piesu, “N ne ɲaa Kirisito, nii-la Wia si liisa? N ne Wia Biee?” ⁶² Nii ne Yesu bul, “Mi-na ne. Ma jan na mi-na Nuhuobiine Bie di mi hon Wia seme, ni-duon di-honun, a to duonbilingbaanaa tuon a kuu tuu.” ⁶³ U bul nii, baal-la ken u gennin kaa kiesɛ an bul, “U bi maga di la bira che danɲiaba. ⁶⁴ Ma kala bi nia u si chei Wia yirin nii? Bee ne ma biine?” Nii ne nialin kala bul di u cheye ne, u maga di ba kpuu ne. ⁶⁵ Donɲsun ma sii a tu nanɲuɔrun a he u siala le an vɔɔ u siala to a ɲmobu an bula pu duu dage nii-la si ɲmobu. Nii ne ka ba kenu kaa mu pi laali-yuoroo. Ba falle u chanɲkanɲaa le.

Piita bula ari u bi Yesu jin
Mat. 26.69-75; Luuk 22.56-62;
Jɔɔɲ 18.15-18, 25-27

⁶⁶ Piita si hon kaala-la le, nii ne nialin si kpu pusun pipi Wia kuhian dia tinɲinni-tolo kubala ku lii ⁶⁷ a na Piita duu honɔ wiwieni nyinin. U benu worun an bula pu a bul, “N ma faa to Yesu harin ne, baal-la si lii Nazaret.” ⁶⁸ Nii ne Piita nyia wiaa a bul, “Mi bi Yesu jin. Mi bi wii-la ɲ si paala bubul jin,” an sii lii chin zawura tuon. ⁶⁹ Piita si chin dime, nii ne tinɲinni-tolo donɔ bira nau a bula pi nialin si china kpagu a bul, “Baala deen ma ɲaa Yesu haritoorola donɔ ne.” ⁷⁰ Piita bira nyia wiaa a bul duu dee. Muasuaa nialin si chin dime ma bula pu a bul, “Wutitii ne, ɲ ma ɲaa ba donɔ ne, ɲ lii Galilii ne.” ⁷¹ Nii ne Piita ɲmiese a bul, “Mi bi baala deen jin.” ⁷² U si bul nii dere di ji-bele yele liamin le. Piita liisi wii-la Yesu si bula pu ari u jan nyia wiaa a pu naanɲiin butori, ka di ji-bele-na yel naanɲiin bulia. U saa ken nyun gure a yiyel.

15

Ba ken Yesu kaa mu Paalit teen
Mat. 27.1-2, 11-14; Luuk 23.1-5;
Jɔɔɲ 18.28-38

¹ Nii ne tan-pul. Nialin si kpu pusun pipi Wia kuhiasin ari ba tan kuhiasin ari Wia tenin kerichiba ari nialin kala si yie hilimi aa vuure wiaa, ba kala ku hilimi a vuure. Ba ken Yesu a vɔbu a kenu kaa mu Paalit teen. ² Nii ne Paalit piese Yesu a bul, “N ne ɲaa Juu tinɲaa kuoro, koo?” Yesu bula pu a bul, “Oo, mi ne.” ³ Nii ne nialin si kpu pusun pipi Wia kuhiasin bul wiaa yuge Yesu si ɲaa chei, ka u bi wii bula. ⁴ Nii ne Paalit bira piese Yesu a bul, “N bi wii kene ɲ si jan bula pibaa? Bee na wiaa si mage nii ba bul di ɲ cheye.” ⁵ Yesu bira bi u niin suro. Wii-la kperi Paalit.

Ba seye ari ba jan kpu Yesu
Mat. 27.15-26; Luuk 23.13-25;
Jɔɔɲ 18.39-19.16

⁶ Ba gbieli-bal-la ne yie-na kala Paalit yie liise nialin ba si kaa to dia donɔ ne a ta, nii-la niaa si sula laa ta. ⁷ Di nialin donɲsun ma fa he sarika le. Ba fa ɲaa taawei ne a kpu niaa. Ba kenba kaa mu to dia. Ba donɔ yirin ne Barabas.

⁸ Nii ne niaa yuge a gire mu Paalit teen a bul duu ɲaa nii u si veneɛ ɲaa piba. ⁹⁻¹⁰ Paalit jima ari nialin si kpu pusun pipi Wia kuhiasin yaraa bieri ne, nii ne tii ba ken Yesu a ko u teen. Nii ne u piese nialin a bul, “Ma cho di mi liise Juu tinɲaa kuoru-la ne a pima?” ¹¹ Nii ne nialin si kpu pusun pipi Wia kuhiasin nyise niaa he di ba sei di ba liise Barabas a ta an len Yesu. ¹² Nii ne Paalit bira piese nialin a bul, “An ka baal-la ma sii yire Juu tinɲaa kuoro, bee ne ma si mi kenu kaa ɲaa?” ¹³ Nii ne ba kala faasa kpia a bul, “Len di ba kenu kaa kpaasa mere daa-geseɛ nyun.” ¹⁴ Nii ne Paalit pieseba a bul, “Wu-bon bee ne u ɲaa?” Nii ne ba faasa kpia a kii bunɲun-la a bul, “Len di ba kenu kpaasa mere daa-geseɛ nyun.”

¹⁵ Paalit che duu n̄aa di nialin tuon t̄ore. U liise Barabas an len ba viire Yesu an bul ba kenu kaa mu kpaasa mere daa-gese nyun.

Laali-yuoroo mon Yesu

Mat. 27.27-31; Joon 19.2-3

¹⁶ Nii ne laali-yuoroo kenu kaa lii ba kuori-balin dia kaala tuon a yire ba laali-yuoroo donsun kala. Ba kala ku hilimi. ¹⁷ Nii ne ba jon geri-fian a laalu a che sosun a kaa sua nyun-chuulo a nage kuoro nyun-chuulo a jon chu. ¹⁸ Ba saa tuu kpirimi u sipaan a zilu a bul, "Juu tinnaa kuoro, laa chuon." ¹⁹ Ba jon sekelin a viire u nyun le, a tu nanturon ma a heu le a tuu kpirimi a zilu. ²⁰ Ba si momu le a dere, ba wuri geri-fian-la an paa u titia gennin a laalu, a kenu kaa lii wonbiin di ba kenu kaa mu kpaase daa-gese nyun.

Ba kpaase Yesu daa-gese nyun

Mat. 27.32-44; Luuk 23.26-43; Joon 19.17-27

²¹ Ba si ku lii nii di ba chen baal kubala baa yire Saamon. U jan yirin ne Siriini. U ne fa n̄aa Alekizanda ari Rufas nyimma. U lii бага a jujuu tan-la tuon. Uu ko nii, ba kenu a fugu u jon daa-gese-la a baase. ²² Ba ken Yesu kaa mu lee kubala, baa yire Goligota. Yiri-la bubon ne nyunkogulo. ²³ Ba si yi dime, ba jon sinin a guoli tii-kelin kubala baa yire mee le a jon pu duu nyua. U via. ²⁴⁻²⁵ Di wia mage ji-lolon, ba kenu kpaase a mere daa-la nyun. Nii ne ba tonse Yesu gennin wiaa di ba kpa, a jin geri bee ne nuu-kala jan laa. ²⁶ Ba si si Yesu n̄aa wialin chei, ba n̄munsa mere daa-gese-la le a bul, "Juu tinnaa kuoro ne n̄la."

²⁷ Gaaraa balia ma ne ba kpaase a pe Yesu le. Dono he Yesu na-diin, dono ma he u na-gua. [²⁸ Ba fa n̄munsa bil Wia tenin tuon a bul di ba jan kenu kaa pe haache diiree le. Lede wiaa deenba kala sene n̄aa.] ²⁹ Ba si kpaasu mere daa-gese-la nyun nii, nialin si to dime

bibal, ba tutuusu an ken ba nyun chuchugisi a bul, "Oi, n̄ ne n̄aa nii-la si si n̄ jan n̄moo la Wia dia lo an bira wuo saau tapulaa batori pege. ³⁰ Lii daa-la nyun a laa n̄ titia ta." ³¹ Nialin si kpu pusun pipi Wia kuhiasi-la ari Wia tenin kerichiba, ba ma sisieri Yesu le a bulaa pi dono, "U wuo niaa laa tita ne an bi u titia wuo laa ta. ³² U si si u ne n̄aa Kirisito, Juu tinnaa kuoro, len duu lii daa-la nyun ku tuu di la na a laa u wiaa dii." Nialin balia ma ba si kpaasa a pe Kirisito le, ba ma tuusu.

Yesu suba

Mat. 27.45-56; Luuk 23.44-49; Joon 19.28-30

³³ Wia ku mage nyu-gbana, lerin kala biri lim a mu yi didaanin, ka lerin bira pulle. ³⁴ Nii ne Yesu faasa yire u yiikoro le a bul, "Eloi, Eloi, lama sabakitani." U bubon ne: "Mi Tiina Wia, bee ne tii n̄ jonmi ta?" ³⁵ Di niaa donsun chin dime a jegile nii wialin u si bula. Nii ne ba bula pi dono a bul, "Na Ilaaja ne u yiyire nii." ³⁶ Nialin dono fa si chin dime mu jon suosuo a kaa mu yuu sinin si nyala a jon tuu sekelin le, a kaa mu he u niin le duu nyua. U si n̄aa nii, u bul, "Ma len la gbera a na ari Ilaaja jan ku soru daa-la nyun koo." ³⁷ Nii ne Yesu faasa yire an wiesi u wiesi kati. ³⁸ Patiisa ne fa he Wia-dia tuon. Ba kaa kere. U kies balia a chin nyu-gbana a kiesa ku tuu. ³⁹ Nii ne di laali-yuoroo zolo kuhian kubala fa chin Yesu sipaan a pou. U si na Yesu duu wiesi u wiesi kati nii, u bul, "Wutitii, baala deen sene n̄aa Wia Bii ne."

⁴⁰ Haalaa donsun ma fa chin diboli a bibenu. Ba tuon Meeri Magidalin ari Saloomi ma fa he dime. Jeems ari Joozis naan ma he dime. Ba fa ken Jeems kaa yire bapusun ne. ⁴¹ Haalaa deenba kala faa to Yesu harin ne a pipeu le Galili le. Haala-la ma fa si to Yesu harin a ko Jerusalem, ba jesin ma fa he dime.

Ba hugi Yesu
Mat. 27.57-61; Luuk 23.50-56;
Jooj 19.38-42

⁴²⁻⁴³ Tapulii-la di ba ɲaa siri di-daanin a gberɛ ba chɛ-wiesii-la, baal kubala ma fa hɛ dime. U yirin nɛ Josef. U lii Arimatiya nɛ. U fa ɲaa nialin si yie hilimi a vuvuure wiaa dɔɲɔ nɛ. Niaa juɲɔnɔ jirima. U ma fa gberɛ Wia kuorii-la nɛ duu kɔ. Nii nɛ didaanin si yie, u kɛɲ nyu-duonɔ a mu Paalit teenɔ a sul Yesu ku-suunɔ. ⁴⁴ Nii nɛ Paalit guu hiriki a pipiesɛ u titia, “Yesu danɔ suba nɛɛ?” Nii nɛ u yirɛ laali-yuoroo zɔɔ kuhianɔ-la a piesu, “Yesu danɔ suba nɛɛ?” ⁴⁵ U bul, “Oo, u suba nɛ.” U si nii ɲii, u pi Josef wonɲiin duu mu sori Yesu ku-suunɔ a kaa ku tuu tinteenɔ. ⁴⁶ Nii nɛ Josef mu yɔɔ geripe-pula a kaa beu a jonɔ hugi. U kɛnu kaa mu hugi bun ba si lɔɔ lɛ. U bilimi tabii-balin nɛ a tɔ bua-la niinɔ. ⁴⁷ Mɛeri Magidalin ari Joozis naanɔ Mɛeri ma hɛ dime a na lee-la ba si jonɔ hugi.

16

Yesu sii suunɔ lɛ
Mat. 28.1-8; Luuk 24.1-12; Jooj
20.1-10

¹ Ba chɛ-wiesii-la si dɛrɛ, Lahadi chɛɛɲ siipuura, Mɛeri Magidalin ari Jeems naanɔ Mɛeri ari Saloomi mu yɔɔ tulaali di ba kaa mu a tise Yesu ku-suunɔ. ² Lahadi chɛɛɲ chichuonɔ, wia si pɔɔɔ, ba sii mu Yesu bua-la lerinɔ. ³ Ba sii mu ɲii, ba pipiesɛ dɔɲɔ, “Kubɛɛ nɛ jan wuo bilimi tabii-la ta bua-la niinɔ?” ⁴ Nii nɛ ba mu kpage bua-la lerinɔ di ba kɛɲ tabii-la suri bua-la niinɔ a bilime ta. Tabii-la fa yuga nɛ worunɔ. ⁵ Nii nɛ ba mu juu bua-la a na bapusi-bie duu hɔɲ bua-la tuonɔ na-diiɲ a laale geri-pula. Ba hiriki. ⁶ Nii nɛ u bula piba a bul, “Ma sí fawullunɔ fá. Mi jima ari Yesu si lii Nazaret nɛ maa chɛ, nii-la ba si kpaasa mɛrɛ daa-la lɛ. U tuo daha. U sie nɛ. Má ku na lee-la ba si jonɔ hugi. ⁷ Má mu a bula pi Piita ari Yesu haritooroo, ari Yesu jan laa ma sipaanɔ a mu Galilii. Di ma

nɛ mu dime, ma jan nau dime ari u si bul ɲii pima.” ⁸ Ba hiriki a chichel a sii lii bua-la lɛ a fá. Fawullunɔ kɛɲba, ba bi wii wuo bula pipi nuu-kala.

[⁹ Yesu sii suunɔ lɛ Lahadi chɛɛɲ siipuura nɛ. U si sie, u leɲɛ Mɛeri Magidalin nɛ laa sipaanɔ nau, nii-la lɛ u si kiri jin-bɔɲɔɲɔ balipe ta. ¹⁰ Nii nɛ Mɛeri sii a mu bula pi Yesu haritooroo wii-la si ɲaa. U mua di ba hɔɲɔ yiyel. ¹¹ Nii nɛ u bula piba ari Yesu sii suunɔ lɛ a hɛ u miisinɔ lɛ, di u-na nau. Ba si nii wii-la, ba bi laa dii.

¹² Nii harinɔ baalaa balia sii lii a jonɔ wonɲiin aa mu tanɔ dɔɲɔ. Ba sii mu ɲii, Yesu bira to wonɲiin dɔɲɔ a kɛɲ u titia ku dageba. ¹³ Nii nɛ ba miira ku bula pi Yesu haritooroo-la ku-kaanaa wii-la si ɲaa. Ba bi laa dii.

¹⁴ Nii harinɔ nɛ Yesu haritooroo-la fii ari kubala hɔɲɔ didii kiaa. Baa dii di Yesu nɛ ɲii. U kpiaba lɛ a tinɔ ba tuonɔ si dolie wiaa ari ba si bi laa dii ari nialin si si ba nau duu sii suunɔ lɛ, di ba bul wutitii nɛ. ¹⁵ Nii nɛ u bula piba a bul, “Má mu dunia sɛmɛ-na kala a bul Wia wu-zɔmɔ-la a pi nuu-na kala. ¹⁶ Nii-la kala si laa mi wiaa dii a leɲ ba fou Wii-chuɔle liinɔ, Wia jan laau ta, ama nii-la si bi mi wiaa laa dii, Wia jan jonɔ cheerinɔ pu chɛɛ-la u si jan dii dunia niaa kala sariya.

¹⁷ Wu-magilaa deenɔba nɛ ma jan wuo na a jin nialin si laa mi wiaa dii. Ba nɛ ɲla: Ba jan wuo kikiri jin-bɔɲɔɲɔ mi dolunɔ lɛ. Ba jan wuo bubul yiikori-yiriba. ¹⁸ Ba jan wuo kukori dinɲaa, a nyua daalusunɔ sii kpu niaa, ka u bi jan ɲaaba wii-kala. Ba jan wuo jonɔ ba nisaa a danɔ nyanyal tinɲaa lɛ di ba duori.”

¹⁹ La Tiina Yesu si bul wialinɔ dɛrɛ, Wia jonɔ a kaa mu Wia-jan, u hɔɲ Wia sɛmɛ, ni-duonɔ di-honunɔ.

²⁰ Nii nɛ u haritooroo sii lii a mu lee-na kala a bubul Wia wiaa. La Tiina Wia peba lɛ ba mu a ɲinɲaa wu-magilaa, di nialin jin wialinɔ ba sii bul ɲaa wutitii nɛ. Ami.]

WIA WU-ZOMO-LA LUUK SI NMONSA

1-2 Mi-na Luuk ne nmonse tenin deen a pipi n-na mi nandono Tiafilas. Niaa yuga a he ba dolun a nmonse wialin kala si naala le. Ba nmonse wialin kala niaa si bula pila. Ba ne na wiaa deenba kala a suomi bunbun kala, a ma bul Wia niin wiaa a pipi niaa.

3 Mi kuhian, mi jegile nii wiaa deenba worun a gunne ba kala ma worun. U naa wu-zon ne di mi nmonse wialin kala a pin. 4 Mi nmonsaa pin di n wuo jin ari wialin kala ba si dagin naa wutitiiba ne.

Ba bul Jon Wia lii-foori-la lullun wiaa

5 Baal kubala ne fa he dime. Baa yire Zakaraya. U fa naa nialin si kpu pusun pipi Wia dono ne. Bua-la le di ba ken nialin si kpu pusun pipi Wia kala kaa kpaal lere mara ari banese ne. Baal kubala ma fa he dime. U fa naa kuhian lee-la Zakaraya fa si he ne. U yirin ne Abija. Zakaraya haala ma yirin ne Elizabet. U ma fa lii nialin si kpu pusun pipi Wia doho niaa tuon ne. Aaron fa naa u nihiere. Bua-la le di Herod ne fa naa Judiya tinteen kuoro. 6 Zakaraya ari u haala kala fa naa tuo-pul timma ne. Ba kala balia fa to Wia niin wialin kala ne worun. 7 Elizabet fa naa ha-piri ne, ba bi bii kala lula, an ka ba di u bala Zakaraya ma kala hiese.

8-9 Nii ne Zakaraya ari u niaa tapulun yi di ba tin tintinnaa nialin si kpu pusun pipi Wia si venee naa. Ba sii tin ba tintinnaa nii, ba yie tonse di ba jin nii-la ba si jan liise duu juu Wia-dia. Ba si naa nii, Zakaraya dii a juu Wia-dia. Nii ne u he nyinin a nyige tii-kelin tulaali a pi Wia, Wia korun le. 10 U si jua nii, nialin si ka, ba he kaala le a chuchuele Wia.

11 Zakaraya si nyige nyinin nii, di Wia tinndaara kubala ko u teen a chin koru-la seme na-diin.

12 Zakaraya nau a chichel. Fawullun kenu. 13 Nii ne Wia tinndaari-la bula pu a bul, "Zakaraya, si leje di fawullun keni. Wialin n si sul Wia teen, u jon pin ne. N haala Elizabet jan lul baal. N jan he u yirin Jon. 14 N tuon jan faasa tere. Ni-dan ma tuon jan tere u lullun wiaa. 15 U jan naa ni-bal Wia teen. U bi jan nyunyua si-duorun. Ba si lulu bua-la le, Wia Din-zon-la jan heu le worun a kaa mu deen deen. 16 U jan wuo naa di Iziral tinnaa yuge a birima to ba Tiina Wia. 17 U jan naa Wia tintinnu a ken dolun ari Ilaaja fa si ken dolun nii. (Ilaaja fa naa nii-la sii bul wiaa, Wia Din-zon-la dolun le ne.) U jan wuo naa di biirin ari ba nyimmaba kala miira sin. U ma jan wuo naa di nialin si bi Wia niin wiaa ka to, di ba birime a to tuo-pul tinnaa wonbiin a len di niaa naa siri di ba Tiina ko di ba tou."

18 Nii ne Zakaraya piase Wia tinndaari-la a bul, "Ee ne mi jan wuo naa, a jin di wialin n si bula naa wutitii? Mi naa ba-nihian ne, mi haala ma naa ha-nihian."

19 Nii ne Wia tinndaari-la bula pu a bul, "Mi yirin ne Gebiral a hon Wia seme. U ne tinmi di mi ku bul wu-zomun deen a pin. 20 Wialin mi si bula pin jan ku naa, an ka n bi laa dii. Nii wiaa n bira bi wiaa jan wuo bul, see tapulii-la si yie di wiaa deenba mi si bula pin naa."

21 Wia tinndaari-la sii bul wiaa Zakaraya teen nii, nialin si gber Zakaraya kaala tuon bi jin wii-la si tii u didieni nii Wia dia-la tuon. U kperiba. 22 Nii ne Wia tinndaari-la viiri, an ka Zakaraya ku lii kaala nialin teen. U bi wiaa wuo bula piba. Nii ne u ken u nisaa a bul wiaa ba teen. U si bi wiaa wuo bubul nii, ba jin ari u na wiaa ari duosoo tuon Wia-dia-la tuon ne. 23 Nii ne Zakaraya tintinnaa tapulaa dere Wia-dia-la le. U miira mu u dia.

²⁴ U bi diene, ka u haala Elizabet kenj luorun. U si kenj luorun nii, u bi dia le lia chensin banon ²⁵ a bul, "Wia diene an leele pemi le nla. U to mi hiisin ne dunia le."

Ba bul Yesu lullun wiaa.

²⁶ Elizabet si kenj luorun u chensin balidu le, Wia bira tin u tin daara Gebiral duu mu Galilii tin teen tan kubala baa yire Nazaret. ²⁷ U timu duu kenj tin daarin a kaa mu pi tolo kubala ha si bi baal jin baa yire Meeri. U faa che duu jaa baal kubala ne baa yire Josef. Josef fa nna kuoro Devit doho nuu ne.

²⁸ Nii ne Wia tin daari-la ko u teen a chuolu an bula pu a bul, "Wia cho n wiaa a pen le worun." ²⁹ Meeri si nii wialin Wia tin daari-la si bula pu, fawullun kenu. U kenj wialin u si bula bubuon bibiine. ³⁰ Nii ne Wia tin daari-la bula pu a bul, "Meeri, Wia cho n wiaa, si leje di fawullun kenin. ³¹ N jan kenj luorun a lul baal. N jan he u yirin Yesu. ³² U jan nna ni-bal. Ba jan kenu yire Wii-balin Bie. Wia jan nna duu dii kuorun ari u naabalima Devit fa si dii kuorun nii. ³³ U jan dii kuorun Jakob doho niaa tuon a kaa mu wuu. U bi jan dere da." ³⁴ Nii ne Meeri bula pi Wia tin daari-la a bul, "Mi ha bi baal jin. Ee ne saa wiin deen jan wuo nna?" ³⁵ Nii ne Wia tin daari-la bula pu a bul, "Wia Din-zon-la jan hen le. N jan kenj luorun Wia dolun le. Nii wiaa bile jan nna Tuo-pul Tiina. Ba kenu yiyire Wia Bie. ³⁶ Na n naanbie Elizabet si hiesa nii. Ba si u bi bii wuo lul, an ka u kenj luorun u chensin balidu ne nla. ³⁷ Wia kenj dolun. U jan wuo nna wii-kala." ³⁸ Nii ne Meeri bula pu a bul, "Mi nna Wia tintinnu ne. Len di wialin n si bula pimi, di ba nna." Nii ne Wia tin daari-la tau an viiri.

Meeri mu chuole Elizabet

³⁹ Nii ne Meeri sii lima lima a mu duu chuole Elizabet u jan le. U fa he Judiya tin teen le ne. Peelee ne golli lee-la chu. ⁴⁰ U si yi dime, u mu juu

Zakaraya dia a mu chuole u haala Elizabet. ⁴¹ U laa Meeri chuola. U si laa nii, bile si he u luorun le sii birime. Nii ne Wia Din-zon-la ku he Elizabet le worun. ⁴² U faasa bula pi Meeri a bul, "Wia pen le a kii haalaa kala. Wia ma jan pe bile n si jan lul le. ⁴³ Mi ma nna kubee ne, Wia Bie naan ko duu chuolemi? ⁴⁴ Mi si laa n chuola nii, bile si he mi luorun le tuon ma tore. U sii fuful. ⁴⁵ N ma laa dii ari wialin Wia si bula pin jan nna wutitiiba. Nii wiaa n tuon jan tore."

Meeri denne Wia

⁴⁶ Nii ne Meeri bula pu a bul, "Mi tuon toro ne. Mi didenne Wia. ⁴⁷ Wia ne nna mi Laataara. Nii ne tii mi jujose. ⁴⁸ Mi nna u tintinni-bii ne, u liisi mi wiaa. A lii leele a kaa mu, nuu-kala jan kenmi yiyire tuotore tiina. ⁴⁹ Wia nna Wii-bal ne a nna wu-kpun kperisin mi le. U nna Tuo-pul Tiina ne. ⁵⁰ Uu fa nialin kala sii fau, nennige, doho-na kala le ne. ⁵¹ U kenj u na-duo-la kaa tiene a nmoo babii-balaa a nna ba wu-nalaa-la kala pugi. ⁵² U kiri ni-balaa ba kuori-kpasinnin nyun an ka ni-biisin hon. ⁵³ U jon ku-zonhon a pi summoo an kiri nialin si kenj kiaa ba ken na-hillin miire. ⁵⁴ U fa bil niin ne a pi la naabalimaba duu jan pe u tintinna Iziral tin nna le. Wii-la u fa si bula ku nna wutitii. U peba le. ⁵⁵ U fa fa Abiraham nennige. U saa jan fa u doho niaa kala ma nennige a kaa mu wuu." ⁵⁶ Meeri si bul wialin dere, u hon Elizabet teen a yi chensin batori ne, an-na miira mu dia.

Ba lul Jon Wia lii-foori-la

⁵⁷ Nii ne Elizabet lullun yi. U lul baal. ⁵⁸ U si lul nii, u donsun tin nna ari u naanbiirin nii nii Wia

si fáu nennige. Ba tuonj kala tɔrɛ, ba jujuɔsɛ.

⁵⁹ Bile si yi tapulaa chori di ba kerɪ u penɪj aŋ hɛ u yirɪj. Ba faa che di ba jonj u nyimma Zakaraya yirɪj nɛ hɛ pu. ⁶⁰ Nii nɛ u naaŋ via aŋ bul di ba hɛ Joonj pu.

⁶¹ Nihiasi-la bula pu ari ba bi naaŋbii kala kɛnɛ u yirɪj dii Joonj.

⁶² Nii nɛ ba kɛŋ nisaa bul wiaa pi u nyimma a piɛsu di yiri bɛɛ nɛ uu che duu hɛ pu.

⁶³ Zakaraya ŋaa ba kɛŋ daa-boribie kaa kɔ duu ŋmunɔsɛ bile yirɪj a piba. Ba jonjo pu. U ŋmunɔsɛ daa-boro-la lɛ di bile yirɪj nɛ Joonj. Ba karimɛ. Ba si karimɛ a na bile yirɪj, u ŋaaba wu-kpunjkpere.

⁶⁴ Zakaraya si ŋaa nii dɛrɛ, u bira suomi a bubul wiaa a didɛnnɛ Wia.

⁶⁵ Nialɪj fa si hɛ dimɛ a na wii-la si ŋaa, fawullunj kɛŋba. Ba kɛŋ wii-la lii a bula gaare Judiya tinteenj sɛmɛna kala, lee-la peelee si gollo chu.

⁶⁶ Nialɪj kala si nii nii, ba kɛŋ wii-la bibiine ba tuɔsaa lɛ aa bul, “Bie deenj saa jan ŋaa kubɛɛ nɛ?” Ba na ari Wia dolunj hɛu lɛ nɛ. Nii nɛ tii ba bul nii.

Zakaraya bul wiaa, Wia Diŋ-zonj-la dolunj lɛ

⁶⁷ Nii nɛ Wia Diŋ-zonj-la ku hɛ Zakaraya lɛ, u bul wiaa, Wia Diŋ-zonj-la dolunj lɛ a bul,

⁶⁸ “Má lenj di la dɛnnɛ Wia, Wia-la Iziral tinŋaa sii to.

U kɔ duu pɛ u niaa lɛ nɛ a laaba ta.

⁶⁹ U liise ni-duonj nɛ pila duu kɔ laala ta.

U lii Devit doho niaa tuonj nɛ.

⁷⁰ Faafaa kala nɛ Wia to u nialɪj fa sii bul wiaa u Diŋ-zonj-la dolunj lɛ, a bula pila

⁷¹ ari u jan laala ta la dɪndɔŋŋɔɔ ari nialɪj kala si bɛrɛla nisinj lɛ.

⁷² U ma bula ari u jan fá la doho niaa nennige, a liise yi wii-la u fa si bula pi la naabalimaba.

⁷³⁻⁷⁴ U fa bula pi la naabalima Abiraham a ŋmiɛsɛ

ari u jan laala ta la dɪndɔŋŋɔɔ nisinj lɛ

a pila wonjbiin di la kɛŋ nyuduonj a tima pu.

⁷⁵ Nii lɛ nɛ la jan wuo to a kɛŋ tuɔpula u teenj, la miisinj kala lɛ.”

⁷⁶ Zakaraya si bul wiaa deenba dɛrɛ, u bul wiaa a pi u bie ma a bul, “N-na mi bii, ŋ jan ŋaa nii-la sii bul wiaa, Wii-balinj Diŋ-zonj-la dolunj lɛ.

N jan laa la Tiina-la si jan kɔ sipaan a wase wonjbiin bilu lɛ.

⁷⁷ N ma jan bula pi nialɪj si ŋaa siri di ba tou, di Wia jonj ba haacheba cheba aŋ laaba ta.

⁷⁸ Wia kɛŋ zile aŋ fifá niaa nennige. U jan laala ta a lenj di la honj pulumunj tuonj.

⁷⁹ Pulunj-la jan lii Wia-jan a pose hɛ nialɪj kala si honj biriminj tuonj a faa che di ba suu.

U jan dagɛla wonjbii-la si kɛŋ yarifiɛlaa di la to.”

⁸⁰ Nii nɛ bile sii waa a hɛ yaraa a kɛŋ dolunj ari wu-jiminj. U mu hɛ giri-bine tuonj a mu yi tapulii-la u si kɛŋ u titia kaa ku lii dagɛ Iziral tinŋaa.

2

*Ba lul Yesu
Mat. 1.18-25*

¹ Baal kubala nɛ fa hɛ dimɛ, baa yire ŋgasitas. U nɛ fa ŋaa Rom tinŋaa kuori-balinj. Bua-la lɛ u bul di ba diise u tinteenj niaa. Ba ha bi nii ŋaa, see lɛɛɛ nɛ ba ŋaa nii. ² Ba si bugumo diise niaa nii, baal kubala nɛ fa chinj kuori-balinj nyun Siiria tinteenj lɛ. Baa yire Kiriinias.

³ Nii nɛ nuu-kala mu u jan di ba diisu dimɛ. ⁴ Josef ma sii Nazaret Galilii tinteenj lɛ a mu Judiya tinteenj, a mu juu taŋ kubala baa yire Betlehɛm. Lee-la nɛ ba fa lul kuoro Devit. Josef fa ŋaa kuoro Devit doho nuu nɛ. Nii nɛ tii u mu dimɛ. ⁵ Ba di Mɛeri kala mu dimɛ. Mɛeri fa ŋaa nii-la si si u jan jaau nɛ, ka u kɛŋ luorunj.

⁶ Ba si yi Betlehem, ba hon dime. Nii ne Mæeri lullun yi, ⁷ an ka ba bi lerin na nuhuraa dia-la le di ba juu. Nii ne tii ba mu juu ja-dia. Dime ne Mæeri lul u bii-bunbun, baal, a ken gerin a beu a jonu bil yan nyun.

Pie-daaraa nii bile lullun wiaa.

⁸ Bua-la le pie-daaraa ne fa he tintee-la semæ donjo a he yan tuon a chua dime titanin aa ben ba piesee.

⁹ Nii ne Wia tin্দaraa kubala ko ba teen. U si ko nii, Wia pulumun chaana heba le. Fawullun kenba.

¹⁰ Nii ne Wia tin্দaraa-la bula piba a bul, "Ma si leje di fawullun kenma. Mi ken wu-zonjon ne ko di mi bula pima. Nii-la kala si nii wu-zomola, u tuon jan tore. ¹¹ Titanin deen ba lul ma Laataara ne Devit jan le. Baa yiru la Tiina Kirisito, nii-la Wia si liisa. ¹² Nla ne ma jan wuo to jin. Di ma mu dime, ma jan na bile di ba ken gennin beu a jonu bil yan nyun."

¹³ Nii ne Wia tin্দaraa yuge a guu lii a pe Wia tin্দaraa-la le a yii yiilaa a denne Wia a bul,

¹⁴ "Ma lejan di la denne Wia si he Wia-jan le.

Wia ma tuon tore nialin si he tinteen le ne. Ba ma jan na yarifielaa."

¹⁵ Nii ne Wia tin্দaraa-la miira mu Wia-jan. Ka pie-daaraa-la bula pi donjo a bul, "Ma lejan di la mu Betlehem a na wii-la la Tiina Wia si to u tin্দaraa le a bula pila."

¹⁶ Ba sii fa lima lima a mu na Mæeri ari Josef. Ba naba an na bile maa di u pin yan nyun. ¹⁷ Nii ne pie-daaraa-la bula pi bile naan ari u nyimma wialin Wia tin্দaraa-la si bula piba a tige bile le. ¹⁸ Nialin kala si nii nii, u naaba wu-kpunkpere. ¹⁹ Mæeri laa wiaa deenba kala a he u nyun le a kaa bibiine.

²⁰ Nii ne pie-daaraa-la miira mu ba pie-daalin. Baa mu a yiyi yiilaa a didenne Wia. Wialin kala Wia tin্দaraa-la si bula piba, ba naba.

Ba he Yesu yirin

²¹ Bile si yi tapulaa chori, ba keru u penin an he u yirin. Ba he Yesu pu, yiri-la Wia tin্দaraa-la fa si daga bua-la le Mæeri fa ha si bi luorun kene.

Ba ken Yesu juu Wia-dia.

²²⁻²³ Wialin Moosis fa si nmunsa bil di niaa tuto donjo ne nla:

"Di baal ari u haal ne lul ba bii-bunbun, duu ne naa baal, u maga di ba mu piise ba disinin ta ne."

Moosis fa bira nmunsa bil Wia tenin tuon di nuu-na kala ne lul u bii-bunbun, di bile ne naa baal, duu jonjo pi Wia. Nii ne Josef ari Mæeri naa nii. Ba sii jon bile a kaa mu Jerusalem a jonu pi Wia. ²⁴ Ba bira nmunsa di ba kpu kokosun balia maa a pi Wia. Nii ne Josef ari Mæeri sii mu Wia-dia di ba naa nii.

²⁵ Bua-la le baal kubala ne fa he Jerusalem le, baa yire Simian. U fa naa ni-zon ne a fifa Wia a fa gbigbere di Wia laa Iziral tinnaa ta. Wia Din-zon-la ma heu le worun.

²⁶ Wia Din-zon-la fa bula pu ari u bi jan suu see duu na Kirisito, nii-la Wia si jan liise duu ko. ²⁷ Nii ne Yesu nyimma ari u naan juu Wia-dia a jonu pi Wia an pe naa nii Wia nin wiaa si bula nii ne. Di Wia Din-zon-la ken Simian ma ku juu Wia-dia.

²⁸ Simian na bile a laau a he u nisaa le an denne Wia a bul,

²⁹ "Mi Tiina, n lejan di wialin n si bula pimi sene ku naa.

N si naa nii, lejan di mi-na n tintinna na wonbin a suu ari yarifielaa.

³⁰ Mi sene na nii-la si ko duu laa dunia niaa ta ne.

³¹ N timu duu ko nuu-kala teen ne, di nuu-kala nau.

³² Bie deen jan nage pulumun a dage nialin si bi juu tinnaa naa wonbin, ka di n niaa Iziral tinnaa ma na."

³³ Simian si bul nii dere, wialin u fa si bula a tige bile le naa bile nyimma ari u naan wu-kpunkpere.

³⁴ Nii ne Simian chuole Wia piba duu peba le an bula pi u naan a bul, "Wia liise n bie deen duu ku dogise nialin si bi u wiaa laa dii, an ma laa nialin si laa u wiaa dii ta Iziral tinnaa tuon. Wia ta bie deen duu naa magil ne. Naa yuge jan jon ba harin yiau. ³⁵ Ka ba tuobiinaa jan lii di-jalin." Nii ne u bira bula pi Mæri a bul, "N titia tuon jan chei worun n bile wiaa a nage ba si jon sia tobuñ."

³⁶ Haal kubala ma ne fa he dime. U yirin ne Ana. U fa naa nii-la sii bul wiaa, Wia Din-zon-la dolun le ne. U nyimma ma yirin ne fa Fanuwel a lii Asa doho niaa tuon. U fa naa hanhian ne. U fa jaa bala jisn balipe ne ka u suu. ³⁷ U bala si suba, u hono a naa yo-haal ne jisn mahin banese ari banese. Bua-na kala le u yie venese mu Wia-dia wiiheye ari titanin kala. U yie voo niin dime an pe chuole Wia. ³⁸ Simian fa sii bul wiaa pipi Mæri nii, di Ana ma ku juu. U na bile a denne Wia an bul wiaa a tige bile le a pi nialin kala fa si gberẽ di Wia laa Jerusalem niaa ta.

Ba miira mu Nazaret

³⁹ Mæri ari Josef si naa wialin kala Wia si si di ba naa Jerusalem le a dere, ba miira mu Galilii tinteen a mu ba jan Nazaret. ⁴⁰ Bile waa a ken dolun a kala naa wu-jimii. Wia peu le.

Yesu mu Wia-dia

⁴¹ Jina-na kala Yesu nyimma ari u naan yie mu Jerusalem di ba gbieli diisin kielin gbiele. ⁴² Yesu si naa jisn fii ari balia, ba di u nyimma ari u naan mu diisin kielin gbiele-la Jerusalem le, ari ba si venese naa nii. ⁴³ Gbiele-la si dere, ba miiraa mu dia, ka Yesu ha he harin. U naan ari u nyimma bi jin. ⁴⁴ Ba fa biina ari u he ba nialin si miira mu ba jan tuon ne. Ba suomo chicheu ba naanbiirin ari ba nanjonsun tuon. Ba ven deen deen wia tuu juu a cheu ka. ⁴⁵ Ba si cheu ka, ba miira mu Jerusalem a bene chicheu dime.

⁴⁶ U tapulaa batori cheen ne ba nau Wia-dia le, di ba di Juu tinnaa kerichiba hono. Uu jegili wialin ba sii bul an pe pipieseba wiaa maa.

⁴⁷ Nialin kala si he dime a nii u sii chaare wiaa siaa ari wu-jimin nii, u naaba wu-kpunkpere. ⁴⁸ U nyimma ari u naan si nau, u naaba ma wu-kpunkpere. Nii ne u naan piesu, "Mi bii, bee ne tii n naala nla? La di n nyimma gollo cheñ ka ne." ⁴⁹ Nii ne u pieseba a bul, "Bee ne tii ma golloo chemi? Ma bi jin ari mi jan he mi Nyimma dia lee?" ⁵⁰ Ama ba fa bi wii-la u si bula piba bubuon jin.

⁵¹ Nii ne Yesu ari u nyimma ari u naan miira mu Nazaret a he dime. Ba si he dime, u to ba niin worun. U naan laa wialin kala si naa a he u tuon le aa biine.

⁵² Nii ne Yesu waa, u wu-jimin ma puna pe. Wia chou, niaa ma zizilu worun.

3

Joon Wia lii-foori-la bul Wia wiaa Mat. 3.1-12; Maak 1.1-8; Joon 1.19-28

¹⁻² Nii ne Wia ta Zakaraya bie Joon duu mu bul Wia wiaa pi niaa giri-bine tuon. U si suomo nii, Rom tinteen kuori-balin Tabiiras dii kuoron u jisn fii ari banon ne nii. Ponsos Paalit ma fa chin kuori-balin nyun Judiya tinteen le. Herod ma fa biben Galilii tinteen. U naanbie Filip ma fa biben Ituriya ari Takonaatis tinteen. Baal-la ba sii yire Lasiinias ma nii ben Abiliini tinteen. Anas ari Kayafas ma ne fa naa nialin si kpu pusun pipi Wia kuhiasin Jerusalem le. ³ Nii ne Joon golle Joodan fuo-la kala nyun a bubul Wia wiaa pi niaa a bul, "Ma birima lii ma haacheba le an len di mi foma Wii-chuole liin, di Wia jon ma haacheba chema."

⁴ Azaaya fa nmunse nii Wia tenin seme dono. U fa naa nii-la sii bul wiaa, Wia Din-zon-la dolun le ne. Wialin u fa si nmunsa ne nla: "Nuu nii heeli girin tuon a bul,

nyimma ma yiriŋ ne fa Matatayas. Matatayas nyimma ma yiriŋ ne fa Semeen. Semeen nyimma ma yiriŋ ne fa Josek. Josek nyimma ma yiriŋ ne fa Joda. ²⁷ Joda nyimma ma yiriŋ ne fa Juanan. Juanan nyimma ma yiriŋ ne fa Riisa. Riisa nyimma ma yiriŋ ne fa Zerubabil. Zerubabil nyimma ma yiriŋ ne fa Sialitel. Sialitel nyimma ma yiriŋ ne fa Neeri. ²⁸ Neeri nyimma ma yiriŋ ne fa Meliki. Meliki nyimma ma yiriŋ ne fa Adi. Adi nyimma ma yiriŋ ne fa Kosam. Kosam nyimma ma yiriŋ ne fa Elimadam. Elimadam nyimma ma yiriŋ ne fa Eri. ²⁹ Eri nyimma ma yiriŋ ne fa Josua. Josua nyimma ma yiriŋ ne fa Eliyiiza. Eliyiiza nyimma ma yiriŋ ne fa Jorim. Jorim nyimma ma yiriŋ ne fa Matat. Matat nyimma ma yiriŋ ne fa Liivai. ³⁰ Liivai nyimma ma yiriŋ ne fa Simian. Simian nyimma ma yiriŋ ne fa Juda. Juda nyimma ma yiriŋ ne fa Josef. Josef nyimma ma yiriŋ ne fa Jonam. Jonam nyimma ma yiriŋ ne fa Elayakim. ³¹ Elayakim nyimma ma yiriŋ ne fa Meliya. Meliya nyimma ma yiriŋ ne fa Mena. Mena nyimma ma yiriŋ ne fa Mataata. Mataata nyimma ma yiriŋ ne fa Neetiŋ. Neetiŋ nyimma ma yiriŋ ne fa Devit. ³² Devit nyimma ma yiriŋ ne fa Jesi. Jesi nyimma ma yiriŋ ne fa Obed. Obed nyimma ma yiriŋ ne fa Buas. Buas nyimma ma yiriŋ ne fa Salimɔŋ. Salimɔŋ nyimma ma yiriŋ ne fa Naasuŋ. ³³ Naasuŋ nyimma ma yiriŋ ne fa Amiinadab. Amiinadab nyimma ma yiriŋ ne fa Adimiŋ. Adimiŋ nyimma ma yiriŋ ne fa Aani. Aani nyimma ma yiriŋ ne fa Hezurɔŋ. Hezurɔŋ nyimma ma yiriŋ ne fa Peres. Peres nyimma ma yiriŋ ne fa Juda. ³⁴ Juda nyimma ma yiriŋ ne fa Jekɔb. Jekɔb nyimma ma yiriŋ ne fa Aizik. Aizik nyimma ma yiriŋ ne fa Abiraham. Abiraham nyimma ma yiriŋ ne fa Teera. Teera nyimma ma yiriŋ ne fa Nehɔ. ³⁵ Nehɔ nyimma ma yiriŋ

ne fa Serug. Serug nyimma ma yiriŋ ne fa Riu. Riu nyimma ma yiriŋ ne fa Peleg. Peleg nyimma ma yiriŋ ne fa Iba. Iba nyimma ma yiriŋ ne fa Sela. ³⁶ Sela nyimma ma yiriŋ ne fa Keenan. Keenan nyimma ma yiriŋ ne fa Afakizat. Afakizat nyimma ma yiriŋ ne fa Sem. Sem nyimma ma yiriŋ ne fa Nowa. Nowa nyimma ma yiriŋ ne fa Lameki. ³⁷ Lameki nyimma ma yiriŋ ne fa Metuusila. Metuusila nyimma ma yiriŋ ne fa Inok. Inok nyimma ma yiriŋ ne fa Jarid. Jarid nyimma ma yiriŋ ne fa Mahalalil. Mahalalil nyimma ma yiriŋ ne fa Keenan. ³⁸ Keenan nyimma ma yiriŋ ne fa Inos. Inos nyimma ma yiriŋ ne fa Set. Set nyimma ma yiriŋ ne fa Adam. Wia ne ta Adam.

4

Sitaani ku magise Yesu

Mat. 4.1-11; Maak 1.12-13

¹ Nii ne Yesu miira lii Jɔɔdan fuola le ku lii di Wia Diŋ-zɔŋ-la heu le woruŋ. Nii ne u kenu kaa juu giri-bine tuɔŋ tapulaa mahiŋ balia. Sitaani yie ko a mimagisu. (U bi seye.) ² Tapulaa mahiŋ balia deenba kala pege u bi kuŋ-kala die. Nii ne losuŋ kpuu. ³ Nii ne Sitaani ku bula pu a bul, “Di ŋ ne ŋaa Wia Bie, leŋ di tabiŋ deen ŋ si na birime boroboro.” ⁴ Nii ne Yesu miira bula pu a bul, “Ba ŋmuŋse Wia teniŋ tuɔŋ ari

‘Kudiilee dunduŋa dee bi nuhuobi-ine miisiŋ ka pa.’ ”

⁵ Nii hariŋ Sitaani bira kenu kaa jila dage dunia kuoruŋ fine ⁶ an bul, “Kuoruŋ deen kala ŋaa mi kua ne. Mi jan ŋaa di ŋ ken ba kala doluŋ a tii ba kala a nii ba sima. Mi-na jan wuo joŋo pi nuu-kala mi sii che. ⁷ Di ŋ ne tuu kpirimi mi sipaan a chuɔlemi, kias deenba kala jan ŋaa ŋ kias.” ⁸ Nii ne Yesu bira bula pu a bul, “Ba ŋmuŋse Wia teniŋ tuɔŋ ari, ‘U maga di laa chuɔle la Tiina Wia dunduŋa ne

an̄ pɛ timaa pu.' "

⁹ Nii nɛ Sitaani bira kɛnu kaa mu Jerusalem a kɛnu kaa jil Wia-dia nyu-gbaŋa an̄ bula pu a bul, "Di ŋ nɛ ŋaa Wia Bie, jon̄ ŋ titia yuo daha a tuu chigisi tin̄teen̄. ¹⁰ Na ba ŋmun̄sɛ Wia teniŋ tuon̄ ari Wia jan̄ len̄ di u tin̄daaraa ku cheme keniŋ. ¹¹ Ba bira ŋmun̄sa ari

'Ba jan̄ kɛrɛ keniŋ di ŋ sɪ ŋ naan̄ jon̄o ŋmoo tabiin̄.' "

¹² Nii nɛ Yesu bira bula pu a bul, "Ba ma bul Wia teniŋ tuon̄ ari u bi maga di ŋ mimagisɛ ŋ Tiina Wia."

¹³ Sitaani si magisɛ Yesu ŋii a dɛrɛ, u len̄u, ka di tapulii don̄ bira yi.

Yesu suomi u tin̄tin̄ŋaa Galilii tin̄teen̄ lɛ

Mat. 4.12-17; Maak 1.14-15

¹⁴ Nii nɛ Yesu lii giri-bine-la tuon̄ Wia Diŋ-zon̄-la dolun̄ lɛ a mu Galilii tin̄teen̄. Yesu wiaa teeli Galilii tin̄teen̄ kala. ¹⁵ Nii nɛ u dage niaa Wii-chuoɓɓe diisin̄ lɛ. Ba kala bibɛsɛu lɛ.

Ba via Yesu Nazaret lɛ

Mat. 13.53-58; Maak 6.1-6

¹⁶⁻¹⁷ Nii nɛ Yesu mu Nazaret, lee-la ba si lulu. Chɛ-wiesii-la chɛɛŋ u mu juu Wii-chuoɓɓe dia ari u si venɛɛ ŋaa ŋii. Nii nɛ u sii duu karime Wia teniŋ a pi niaa. Ba jon̄ Wia teniŋ tuon̄ sɛmɛ don̄o pu, ten̄-la Azaaya si ŋmun̄sa, nii-la fa sɪi bul wiaa, Wia Diŋ-zon̄-la dolun̄ lɛ. U suri a na lee-la ba si ŋmun̄sɛ ŋla a karime a bul, ¹⁸ "Wia Diŋ-zon̄-la hemi lɛ nɛ.

U nɛ liisemi di mi bul Wia wu-zomɓɓo-la a pi summoo.

U nɛ tin̄mi di mi bula pi yosun̄ ari Wia jan̄ jon̄ba ta,

a bira bula pi nyulimaa di ba siaa jan̄ suri.

U bira tin̄mi di mi laa niaa ba si nyaga bil a ta

¹⁹ a bula piba di jina jan̄ yi di la Tiina Wia jan̄ laa u niaa ta."

²⁰ Yesu si karime ten̄-la dɛrɛ, u kaa to an̄ jon̄o pi nii-la sɪi bil ten̄-la an̄ tuu hon̄. Nialin̄ kala si hɛ Wii-chuoɓɓe dia-la lɛ chaare ba siaa a pɛu

lɛ. ²¹ Nii nɛ Yesu bula piba a bul, "Ten̄-la mi si karima pima, jiniŋ u sɛnɛ ku ŋaa wutitii nɛ." ²² Nii nɛ niaa kala tuon̄ tore u nyun̄. Wu-zon̄ŋoo kala u si bula piba ŋaaba wu-kpun̄kpere. Ba pipiesɛ don̄o, "Josef bile dee ŋlaa?" ²³ Nii nɛ Yesu bira bula piba a bul, "Mi laa dii ari ma jan̄ mage namaga a pimi. U nɛ ŋla: 'Daalusun̄ tiina, mu vaare ŋ titia.' Ma jan̄ bira bula pimi a bul di wialin̄ kala mi si ŋaa Kapenam lɛ, di mi ŋaaba mi titia jan̄ lɛ maa." ²⁴ Nii nɛ Yesu bira bul, "Wutitii, mi bulaa pima ari nii-la sɪi bul wiaa, Wia Diŋ-zon̄-la dolun̄ lɛ nɛ, duu nɛ ko u titia jan̄, u niaa buu cho." ²⁵ Nii nɛ Yesu bira bul, "Má jegili, wutitii mi bulaa pima. Ilaaja fa si hɛ u miisin̄ lɛ, duonun̄ bi nia jisin̄ batori ari lebi. Ilaaja fa ŋaa nii-la sɪi bul wiaa, Wia Diŋ-zon̄-la dolun̄ lɛ nɛ. Losun̄ juu Iziral tin̄teen̄ worun̄. Bua-la lɛ yo-haalaa yuga a fa hɛ dime. ²⁶ Ama Wia bi len̄e Ilaaja mu pɛ Juu tin̄ŋaa yo-haalaa kun̄-kala lɛ. U timu u mu pɛ yo-haal kubala dun̄dun̄a lɛ a lii Saadon̄ tin̄teen̄ lɛ, tan̄ kubala baa yire Zarefat. ²⁷ Bua-la lɛ Ilaasa ma fa si hɛ u miisin̄ lɛ, gbegisin̄ ma yuga nɛ a hɛ Iziral tin̄teen̄ lɛ, ama Wia bi len̄e Ilaasa vaare ba kun̄-kala see baal kubala baa yire Neyeman̄. U lii Siiria tin̄teen̄ nɛ."

²⁸ Nialin̄ kala fa si hɛ Wii-chuoɓɓe dia-la lɛ a nii wiin̄ deen̄, ba baanin̄ sii u nyun̄. ²⁹ Ba sii a kɛŋ Yesu lɛrɛ lii ba tan̄ tuon̄ a kɛnu kaa jil dun̄dolo-la nyun̄ ba fa si saa ba jan̄. Ba kɛnu kaa jil dun̄dolo-la nyun̄ di-bolii aa chɛ di ba jon̄u yuo ta duu tuu tel tin̄teen̄. Ba cheu ka. ³⁰ Ka u to nialin̄ tuon̄ a lii viiri.

Baala si kɛŋ jin̄-bomun̄

Maak 1.21-28

³¹ Nii nɛ Yesu lii Nazaret lɛ a mu Kapenam si hɛ Galilii tin̄teen̄. Chɛ-wiesii-la chɛɛŋ u mu juu Wii-chuoɓɓe dia a didageba. ³² U si dageba ŋii, u ŋaaba wu-kpun̄kpere, bɛɛ wiaa uu bul wiaa ari dolun̄ nɛ. ³³ Di baal

kubala ne fa he Wii-chuoŋe dia-la le. Jiŋ-bomun ne fa kenu. Nii ne u faasa chiire ³⁴ a bul, "Yesu ŋ si lii Nazaret, beɛ kuŋ ne ŋ che ŋ ŋaala le? N ko di ŋ kpula neɛ? Mi jimin ne. N ŋaa Wia Tuo-pul Tiina ne." ³⁵ Yesu si nii wialin baal-la si bula, u kpia jiŋ-bon-la le a bul, "Ken gon an ku lii baal-la le." Jiŋ-bon-la ŋaa baal-la tel ba kala sipaan an lii baal-la le. U bi wu-bon kala ŋaau le. ³⁶ Ba si na nii, u ŋaa nuu-kala wu-kpunkpere. Nii ne ba pipiese donjo a bul, "Ee ne u si wuo bul ŋla? Baal-la deen ken dolun a wuo jiŋ-bonjo, a bul wiaa piba ba lii niaa le." ³⁷ Nii ne Yesu wiaa teeli lee-la kala.

*Yesu vaare niaa yuge
Mat. 8.14-17; Maak 1.29-34*

³⁸ Nii ne Yesu lii Wii-chuoŋe dia-la le a mu baal kubala dia baa yire Saamon. U mua di Saamon hiilihaala pina aa wiile. U yaraa kala lin. Ba si bul u wiaa pu, ³⁹ Yesu mu chin u seme an kpia nyanyalii-la le duu lenu. Nyanyalii-la len haal-la, an ka u guu sii a ŋaa kudiilee piba ba dii.

⁴⁰ Di niaa donsun ma ne nii, ba nandonsun wiwiile. Nyanyal-yiriba kala ne kenba. Wia si jua, ba kenba kaa ko Yesu teen. U jon u nisaa a dan ba kuŋ-kala le, ba duori. ⁴¹ Jiŋ-bonjo ma lii niaa le a yuge aa chiire, a bula pi Yesu a bul, "N ne ŋaa Wia Bie." Nii ne Yesu kpiaba le di ba si u wiaa bul, beɛ wiaa ba jima ari u ne ŋaa Kirisito.

*Yesu bul Wia wiaa Judiya tinteen
le*

Maak 1.35-39

⁴² Siipuura Yesu lii tan-la le a mu lee-la niaa si tuo dime. Nii ne nialin suomo chicheu. Ba si mu nau, ba wiwalime di ba kenu bil duu si viiru. ⁴³ Nii ne Yesu bula piba a bul, "U maga di mi mu tasin donsun maa a bul Wia kuorii-la wiaa dime. Nii ne Wia tinmi di mi ku ŋaa." ⁴⁴ Nii ne u bul Wia wiaa Judiya tinteen, Wii-chuoŋe diisin le.

5

*Yesu yire u bunbun haritooro
Mat. 4.18-22; Maak 1.16-20*

¹ Bua kubala Yesu chin muga kubala niin baa yire Genzarret. Niaa yuge a yigi donjo a kuko u teen di ba nii Wia wiaa. ² Nii ne Yesu na liin daborusun balia di ba chin liin niin. Ba tinŋaa kaa ku bil ne an mu di ba chese ba jonba. Saamon ne tii donjo. ³ Nii ne Yesu juu Saamon liin daboro an bul duu yigu duu juu liin tuon mua. U mu yigu. Nii ne Yesu hon liin daboro-la tuon an didage ni-dan-la kala. ⁴ U si bul wiaa pi nialin dere, u bula pi Saamon a bul, "Kusi liin daboro-la duu mu lee-la liin si lunje mua, di ma di ŋ nandonsun yuo ma jonba a kese chenfilee." ⁵ Nii ne Saamon bula pu a bul, "Mi kuhian, la yuo jonba titanin kala kala ne an bi kuŋ-kala kene. Ama ŋ-na si bul nii pimi, mi jan yuo." ⁶ Nii ne ba ŋaa nii a kese chenfilee yuge kinken. Ba si kese yuge nii, ba jonba chiche di ba kiese. ⁷ Di ba nandonsun he liin daboro donjo tuon. Nii ne ba yireba di ba ku peba le. Ba ko a chaare chenfilee-la a su liin daborusu-la baliamin kala. Ba paala chiche di ba tuu liin bubuon. ⁸ Saamon yirin donjo ma ne fa ŋaa Piita. Saamon Piita si na wiila si ŋaa, u tuu kpirimi u naadusun nyun Yesu sipaan an bul, "Mi Tiina, sii lii mi teen. Mi ŋaa haache tiina ne." ⁹ Ba si kese chenfilee-la yuge nii, u ŋaa Piita ari nialin kala wu-kpunkpere. ¹⁰ Saamon nandonsun Jeems ari Jon ma fa he dime. Ba fa ŋaa Zebidii biirin ne. Wialin ba si na ma ŋaaba wu-kpunkpere. Nii ne Yesu bula pi Saamon a bul, "Si fawullun fa. A suomi jinin, ŋ jan che kikese niaa ari ŋ sii kese chenfilee nii."

¹¹ Nii harin ba sii a ken liin dabori-biisi-la kaa ku lii liin niin. Ba len kuŋ-kala ta dime an sii to Yesu harin.

*Yesu vaare gbege**Mat. 8.1-4; Maak 1.40-45*

¹² Nii ne Yesu mu tan kubala di baal kubala ne nii. U naa gbege ne. U na Yesu a tuu kpirimi u sipaan an sulu a bul, “Mi kuhian, di n ne cho, n jan wuo naa di mi duori.” ¹³ Nii ne Yesu liise u nisin a digu an bul, “Mi cho ne. Duori.” Yawiil-la guu len baal-la. ¹⁴ Nii ne Yesu bula pu a bul, “Si wiin deen bula pi nuu-kala. Ama ken n titia mu dage nii-la si kpu pusun pipi Wia duu kpu pusun pipi Wia, a piise n disinnin ta ari Moosis fa si dagema nii. Di n ne naa nii, niaa jan na ari n bira bi disinnin ken.” ¹⁵ An ka wii-la ha faasa teeli lerin kala a mu. Niaa yuga a ko u teen di ba nii u wiaa, an ka duu pe vaare ba nyanyalaa maa. ¹⁶ Ka Yesu yie sii mu girin duu chuole Wia.

*Yesu vaare gberike**Mat. 9.1-8; Maak 2.1-12*

¹⁷ Tapulii kubala Yesu didage niaa, di Wia dolun heu le u kaa vivaare nyanyal tinjaa. Farisii tinjaa ari Wia tenin kerichiba si lii Galilii tinteen ari Judiya tinteen ari Jerusalem kala ma fa hon dime.

¹⁸ Nii ne niaa chun gberiku kubala ari u bosso kala a kaa ko a wiwalime di ba kenu kaa juu dia-la le Yesu si he a bil u sipaan. ¹⁹ Ama niaa fa si yuga nii, ba bi wonbiin na di ba kenu juu. Nii ne ba kenu kaa jil lusun nyun a ta luri a jonu ta. U to dime a tuu nialin tutubaanin Yesu sipaan.

²⁰ Yesu si na ari niaa deenba naau yarida worun, u bula pi gberiku-la a bul, “Mi nandon, mi jon n haacheba chen ne.” ²¹ Nii ne Farisii tinjaa ari Wia tenin kerichiba-la suomo pipiese donjo a bul, “Kubee ne nia deen sii tuuse Wia jonnoo nla? Nuukala bi jan wuo jon haacheba che nuu see Wia dununa.” ²² Nii ne Yesu wuo jin ba tuobiinaa a pieseba a bul, “Bee ne tii ma biine wiaa deenba ma tuon le?” ²³ Mi si jan bul di mi jon u haacheba cheu ne koo mi si jan bul duu sii a chuoli u

bosso a viviiri, ba tuon kubee ne naa moli? ²⁴ Mi jan dagema ari mi-na Nuhuobiine Bie ken dolun dunia le di mi jon haacheba che niaa.” Nii ne u bula pi gberiku-la a bul, “Sii a jon n bosso a mu dia.” ²⁵ U guu duori a sii a jon u bosso-la u fa si pin u nyun a mu dia an didenne Wia. ²⁶ U naa nialin kala fa si he dime wu-kpunkpere. Fawullun kenba. Ba denne Wia a bul, “La na wu-kpunkpere jinin.”

*Yesu yire Liivai**Mat. 9.9-13; Maak 2.13-17*

²⁷ Nii harin Yesu bira sii a lii a na lanpoo lilaara kubala baa yire Liivai duu hon u tintinni dia le. Nii ne Yesu yiru a bula pu duu sii a tuto u harin. ²⁸ Nii ne Liivai sii an len u kun-kala ta an to u harin.

²⁹ Nii ne Liivai naa di ba gbieli gbiele u dia le. Yesu ari u haritooro ari lanpoo lilaaraa donsun yuge, ari niaa donsun ma fa he dime.

³⁰ Nii ne Farisii tinjaa donsun ari Wia tenin kerichiba ari ba nandonsun sii a pipiese Yesu haritooro a bul, “Bee ne tii ma di lanpoo lilaaraa ari haache diiree kala hono didii kudiilee?” ³¹ Yesu nii ba sii bul nii. Nii ne u bula piba a bul, “Nialin si ken yarifielaa bi daalun ninaara ka che, see nialin sii wiilu.” ³² Mi ko di mi yire haache diiree ne di ba len ba haacheba. Nialin si ken tuo-pula mi sipaan dee mi ko mi yire.”

*Ba piese Yesu nii-vobun wiaa**Mat. 9.14-17; Maak 2.18-22*

³³ Nii ne niaa donsun ku piese Yesu a bul, “Jon Wia lii-foori-la haritooro yie vuvoo nin ne an pe chuchuele Wia bua-na kala le. Farisii tinjaa haritooro ma ninjaa nii titia. Ama n-na haritooro bi nin ka voo.” ³⁴ Nii ne Yesu ma pieseba a bul, “Di nuu ne mu jaa haala kaa ko, di ba duu nandonsun gbigbieli ha-jaari gbiele, u nandonsun jan voo nin koo? Ai, ba bi nin ka voo.” ³⁵ Ama chee don ne he dime, ba jan

keŋ baal-la kaa mu lee, aŋ ka di u nanɔŋsu-la voo niin.”

³⁶ Nii ne u bira mage namaga a piba a bul, “Nuu-kala bi jaŋ kerri geripe-falin a kaa to geri-binin. N ne ŋaa nii, ŋ jaŋ chei geri-falii-la. Geripe-falii-la ma ŋ si kere to gerikosu-la ma bi jaŋ challe. ³⁷ Nii titia ne nuu ma bi jaŋ jon si-huon a he pupoi-kpaan le. N ne ŋaa nii, pupoi-la jaŋ yere, di sin-la kala bisa ta. ³⁸ Si-huon maga di ŋ jonu he pupoizomun le ne. ³⁹ Di nuu ne nyua siyele, u bira bi che duu nyua si-huon, bee wiaa nuu-kala jima ari siyele ne zomɔ kii si-huon.”

6

Ba piese Yesu che-wiesii-la cheen wiaa

Mat. 12.1-8; Maak 2.23-28

¹ Bua kubala, che-wiesii-la cheen, Yesu ari u haritooro to nyonso бага tuon bibal. Nii ne u haritooro-la bori nyonso-la a chichan.

² Di Farisii tinŋaa donsun ma he dime a naba. Ba si naba nii, ba pieseba a bul, “Bee ne tii ma ŋaa ŋla? Maa chei la che-wiesii-la cheen kisin ne nii.” ³ Nii ne Yesu pieseba a bul, “Ma bi wii-la Devit fa si ŋaa karimaa? Losun fa si kenu ba di u harin niaa, ⁴ u mu juu Wia-dia a jon boroboroba-la ba fa si kaa ku bil Wia sipaan a chogɔ dii an jonɔ pi u harin niaa maa, ba ma laa dii. U fa ŋaa kisin ne ari ni-wogo si jaŋ jonɔ dii, see nii-la si kpu pusun pipi Wia dunɔna, ka Devit ari u niaa dii.”

⁵ Nii ne Yesu bira bula piba a bul, “Mi-na Nuhuobiine Bie ne ŋaa che-wiesii-la tiina nii.”

Yesu vaare baala u nisin si suba

Mat. 12.9-14; Maak 3.1-6

⁶ Che-wiesii-la cheen donɔ Yesu bira juu Wii-chuole dia a didage niaa, di baal kubala ma fa he dime. U na-diin nisin suba ne. ⁷ Wia tenin kerichiba ari Farisii tinŋaa donsun ma fa he dime. Baa che di ba na wii ne a to nii le a keŋ Yesu, a bul duu

chei ba kisin le ne. Ba kala chaare siaa bibenu di ba na ari u jaŋ vaare baal-la che-wiesii-la cheen. ⁸ Ama Yesu fa jin ba tuobiinaa kala ne. Nii ne u bula pi na-suu-la tiina a bul duu sii a ku chin ba tutuobaanin. Nii ne baal-la sii a mu chin dime. ⁹ Nii ne Yesu bira pieseba a bul, “Ee ne la naabalimaba kisin bul di la ŋinaa che-wiesii-la cheen? Di la pipe niaa le koo di la dudogiseba? Di la lilaa niaa miisin koo di la kpukpuba?” ¹⁰ Yesu si bul nii, u beŋ nialin kala fa si hon dime golli an bula pi na-suu-la tiina duu keŋ u nisin tiene. U kaa tiene. U nisin bira nage u nagin. ¹¹ Yesu fa si ŋaa nii, baanin faasa keŋ Farisii tinŋaa ari Wia tenin kerichiba-la. Ba vuvuure nii ba si jaŋ ŋaau le.

Yesu liise u haritooro fii ari balia

Mat. 10.1-4; Maak 3.13-19

¹² Tapulii kubala Yesu jil peelin nyun duu chuole Wia. U chuole Wia nii deen deen tan-pul. ¹³ Tan si pula, u yire u haritooro ba ko u teen. Nii ne u liise ba tuon niaa fii ari balia a kenba kaa yire u nanzooba maa. ¹⁴ Nialin u si liisa ne ŋla: Saamon (Yesu fa kenu yiyire Piita ne) ari u naanbie Anɔduru, ari Jeems ari Jon ari Filip ari Batolomi ¹⁵ ari Matiu ari Tomas ari Alifiyas bie Jeems, ari Saamon Zelot, ¹⁶ ari Jeems bie Judas, ari Judas Isikarot, nii-la si ku ŋaa zenbe tiina.

Yesu dage niaa an pe vaare ba donsun maa

Mat. 4.23-25

¹⁷ Nii ne Yesu ari u nanzooba-la lii peel-la nyun ku tuu a chin tinteen, di u haritooro donsun ma he dime a yuge. Niaa donsun ma yuga a he dime a lii Judiya tinteen, donsun lii Jerusalem, donsun ma lii Taya ari Saadon tinteen a kpage mugibalin niin. ¹⁸ Niaa deenba kala ko di ba jegile nii wialin Yesu sii bul ne an ka duu vaareba. Nialin donsun ma he dime, jin-bonɔɔ kenba. Yesu ŋaa ba duori. ¹⁹ Wia dolun ne heu le u

vivaare niaa. Nii wiaa ne nialin kala ninerike di ba digu. Di ba ne digu, dol-la liiu le, u nja ba duori.

Nii la si jan nja a ken tuutorun

Mat. 5.1-12

²⁰ Yesu si vaare nialin dere, u miira ben u haritooro an bul, “Ma nialin si nja summoo, Wia jan pema le.

Ma ne jan dii Wia kuorii-la.

²¹ Ma ma nialin losun sii kpu leele, Wia jan pema le.

U jan pima kudiilee di ma dii a voge.

Ma nialin sii yel leele, Wia ma jan pema le,

bee wiaa Wia jan nja ma mon.

²² Di niaa ne berema a liisema ta ba tuon a tutuusema a chichei ma yirin a bul di ma nja ni-bomone, di ba ne bul nii a tin ma sii to mi-na Nuhuobiine Bie harin wiaa, Wia ma jan pema le. ²³ Di nii ne ku chinma le, ma len di ma gugua ari tuutorun, bee wiaa ma time jan yuge Wia-jan le. La naabalimaba ma dogise nialin fa sii bul wiaa, Wia Din-zon-la dolun le nii ne.

²⁴ Ama ma nialin si ken kiaa leele, ma jan na heen,

bee wiaa ma laa sipaan dii ma sima dere ne.

²⁵ Ma nialin si voge leele, ma ma jan na heen.

Losun jan kenma.

Ma nialin sii mon leele, ma jan na heen.

Ma tuon jan chei, di ma yel.

²⁶ Di niaa kala yie besema le, ma ma jan na heen, bee wiaa la naabalimaba Juu tinjaa ma besa nialin fa si nyia wiaa a bul di baa bul wiaa, Wia Din-zon-la dolun le ne.”

Yesu dage niaa di ba cho ba dinjonon

Mat. 5.38-48; 7.12

²⁷ Nii ne Yesu bira dage niaa a bula piba a bul, “Ma nialin sii jegili mi teen, mi bulaa pima di ma cho ma dinjonon aa nja wu-zonon nialin si berema le. ²⁸ U maga di maa

sul Wia duu pe nialin sii bul wu-bonon ma le a chuore Wia pi nialin sii dogisema. ²⁹ Di nuu ne falle n na-gua chanjkanin le, ken n na-din chanjkanin ma birima pu duu falle. Di nuu ne ken n geri-balin laa, wuri n geri-bie ma pe pu. ³⁰ Di n ne ken kun, di nuu piese chiche, jonjo pu. Di nuu ne jon n kun maa, bira si piesa laa. ³¹ Ma sii che di niaa njaa nii ma le, ma ma jon nii njaaaba le.

³² Di ma ne cho nialin si choma dunjon, u bi maga di ma ken time, bee wiaa haache diiree ma cho donon ne. ³³ Di maa nja wu-zonon nialin sii nja wu-zonon ma le, ma bi time kene, bee wiaa haache diiree ma nja nii ne. ³⁴ Di ma ne jon kiaa a chin nialin ma si biina ba jan wuo time pima an von niaa donsun, ma bira bi time kene, bee wiaa haache diiree ma jon kiaa chichin haache diiree donsun ne an gbera di ba bira tinba nii titia. ³⁵ Ama wialin mi sii che di ma nja ne nja: Ma cho ma dinjonon aa nja wu-zonon ba le, a jon kiaa chinba an si gbera di ba tinma. Di ma ne nja nii, Wia jan len di ma nja u-na Wii-balin biirin, duu jon ku-bal-bal tinma. Wia yie pe ni-bonon ari nialin ma kala si ken siin le ne. ³⁶ Ma fifa niaa nennige ari ma Nyimma Wia sii fa niaa nennige nii.

Ma si ma donsun tinjaa wiaa laa jijin

Mat. 7.1-5

³⁷ Ma si ma donsun tinjaa wiaa laa jijin a ma si cheerin jonjo piba. Di ma ne nja nii, Wia ma bi jan jon cheerin pima. Ma jon wiaa che ma donsun tinjaa. Di ma ne nja nii, Wia ma jan jon ma wiaa chema. ³⁸ Ma nja kiaa pipi ma donsun tinjaa. Di ma nja nii, Wia ma jan nja kiaa a pima a ma jan ken zile ma teen. U jan magise kiaa chuore a pima. Ku-la n si kaa magisa pi n donsun tinjaa, u titia ne Wia ma jan kaa magisa pin.”

³⁹ Nii ne Yesu bira mage namaga piba a bul, “Nyulima bi jan wuo a

kenj nyulima donjo daanj le. Di u ne njaa nii, ba kala balia janj tel buotuonj le. ⁴⁰ Sukuuri-bie bi u kerichi ka kii, ama di kerichi-la dage bile dere, u janj wuo mage u kerichi-la. ⁴¹ Ee ne njanj wuo na daa-bie si tel njanjanbie siinj le anj bi daa-bal-la si tel njanjanbie siinj le ka na? ⁴² Njanjan bi janj wuo bula pi njanjanbie a bul duu lenj di njanjan liise daa-bie-la si he u siinj le, anj paala bi daa-bal-la si he njanjanbie siinj le ka na. Njanjan-kanfugi tiina, laa sipaanj liise daa-bal-la si he njanjanbie siinj le, ka njanjan siasa wuo na, nii ne njanjan ma janj wuo pe njanjanbie le a liise daa-bie-la si he u siinj le a pu."

Yesu mage namaga a tige tia ari u nenen le

Mat. 7.16-20; 12.33-35

⁴³ Nii ne Yesu mage namaga a pi niaa a bul, "Tia-la si kenj yarifielaa bi janj nenj nenj-lorununj, anj ka tia-la si bi yarifielaa kene ma bi janj nenj nenj-zonj. ⁴⁴ Tia-la nenen ne yie dage tia-la yiri. Sojaaminj bi tutogo nanbilaa ka nenj, sogun-gbene ma bi chichuenj ka nenj. ⁴⁵ Ni-zomunj kenj tuobiinj-zonj ne u tuonj le aa njaa wu-zom-la u sii biinu. Ni-bomunj ma kenj tuobiinj-bonj ne u tuonj le a maa njaa wu-bom-la u sii biinu u tuonj le. Njanjan tuobiinaa si kenj wii-la ne, u ne njanjan niinj bubul."

Yesu mage namaga a tige di-saaraa balia le

Mat. 7.24-27

⁴⁶ Nii ne Yesu bira bul, "Bee ne tii ma kenjmi yiyire 'La Tiina, la Tiina,' anj bi wialinj mi sii bula pima ka njaa? ⁴⁷ Nii-la kala si ko mi teenj a jegile nii mi niinj wiaa a tutoba, mi janj dagema nii u si naga. ⁴⁸ U nage baala si saa dia ne a lu dia-la gentine, u faasa tuu kpaginyilinj nyunj. Nii ne duonunj nii, fuonj su, liinj pelle yage dia-la, ka dia-la bi jigise maa, bee wiaa u saau worunj ne. ⁴⁹ Ama nii-la si jegile nii wialinj mi si bula anj biba to, u nage baal-la si saa u dia tinteenj anj bi gentine luu u tuu ne. Nii ne

duonunj nii, fuonj su, liinj pelle yage dia-la, dia-la kala tel wuru."

7

Yesu vaare laali-yuoroo kuhianj yomo

Mat. 8.5-13

¹ Yesu si bul wiaa deenba kala a pi nialinj dere, u sii mu tanj kubala baa yire Kapenam.

² Baal kubala ne fa he dime. U fa njaa Rom laali-yuoroo kuhianj ne a fa kenj u yomo ne a chou worunj. Yomo-la wiwiile a pina kikiiki. ³ Nii ne laali-yuoroo kuhianj-la nii Yesu wiaa. U si nii nii, u liise juu tinjaa kuhiasinj di ba mu sulu duu ku vaare u yomo-la. ⁴ Ba sii a mu Yesu teenj a sulu kinkej kinkej a bul, "Baala deenj njaa ni-zonj ne. U maga di njanjan pe le. ⁵ U cho la niaa worunj. U titia ne saa Wii-chuole dia a pila."

⁶ Nii ne Yesu to ba harinj mu. Ba si mu kpage laali-yuoroo kuhianj dia, baal-la tinj u nanjonsunj di ba ku lii bula pi Yesu a bul, "Mi Tiina, si njanjanbie si walimu a ko mi dia. Mi bi maga di njanjan ku juu mi dia. ⁷ Nii ne tii mi paala bi njanjan teenj ko. Njanjan-ya suri njanjan niinj a bul di mi yomo-la duori, u janj duori. ⁸ Mi ma paala to mi laali-yuoroo nihiasinj niinj ne. Laali-yuoroo donsunj tuto mi niinj maa. Di mi ne bul di niaa deenba mu daha, ba yie mu ne. Di mi bira si di nia deenj ko daha, u yie ko ne. Di mi ne bula pi mi yomo duu njaa deenj, u yie njaa ne." ⁹ Yesu si nii wiaa deenba, u njaau wu-kpunkpere. U miira daase harinj a bula pi ni-danj-la fa sii to u harinj a bul, "Mi ha bi yarida deenj doho na Iziral tinteenj niaa tuonj."

¹⁰ Nii ne nialinj laali-yuoroo kuhianj-la fa si tima, ba miira mu u dia, di u yomo-la duoro.

Yesu chise yo-haala bie

¹¹ Yesu si vaare Rom laali-yuoroo kuhianj yomo-la, u bi diene ka u mu tanj kubala baa yire Neenj. Ni-danj ari u haritooroo ne to u harinj mu.

¹² U si mu kpage tanj-la niinj di baa

yel yoho. Baal kubala ne suba. U ne fa n̄aa u naan̄ bie kala. U naan̄ ma fa n̄aa yo-haal ne. Niaa yuga a lii tan̄-la a ku chigi haal-la. ¹³ Yesu si na haal-la, nennige kala kenu. U bula pu a bul duu sí yel. ¹⁴ Nii ne u mu a digi daga-la ba fa si jon̄ suu-la he. Nialin̄ fa si chun̄ daga-la a kaa mu di ba hugi, ba chin̄. Nii ne Yesu bula pi suu-la a bul, “Bapuosi-bie, mi bula pin̄ di η sii suun̄ le.” ¹⁵ Baal-la sii suun̄ le a suomo bubul wiaa. Nii ne Yesu jon̄u pi u naan̄. ¹⁶ Fawullun̄ ken̄ nuu-kala. Ba denne Wia a bul, “Nialin̄ síi bul wiaa, Wia Din̄-zon̄-la dolun̄ le, ba tuon̄ ku-bal ne ku tuu la tuon̄. Wia k̄o duu laa u niaa ta ne.”

¹⁷ Nii ne wiin̄ deen̄ Yesu si n̄aa, teeli Judiya tin̄teen̄ kala ari ta-biisi-la si golli Judiya tin̄teen̄.

*Joon̄, Wia lii-foori-la tin̄ tin̄daaraa
Mat. 11.2-19*

¹⁸ Joon̄ haritooro bul wiaa deen̄ba kala Yesu si n̄aa a pu. ¹⁹ Nii ne Joon̄, Wia lii-foori-la yire ba tuon̄ niaa balia, a tin̄ba di ba mu Yesu teen̄ a piesu a bul, “N̄ ne nii-la Joon̄ si si u jan̄ k̄o, koo la gber̄e nuu ma don̄ nee?” Nii ne ba mu Yesu teen̄. ²⁰ Ba si mu u teen̄, ba piesu a bul, “Joon̄, Wia lii-foori-la ne tin̄la di la ku piesin̄ ari η ne nii-la u si si u jan̄ k̄o koo la gbigber̄e nuu don̄ nee?” ²¹ Bua-la titia le Yesu vaare nyanyal tin̄naa a yuge, a kiri jin̄-bon̄on̄o niaa le, an̄ suri nyulimaa ma siaa. ²² Nii ne u bula pi Joon̄ haritooro-la a bul, “Má miira mu a bula pi Joon̄ wialin̄ kala ma si nia an̄ na maa. Nyulimaa siaa susuri, gberik̄ee viven̄, gbegisin̄ duduori. Tan̄naa ninii wiaa. Nialin̄ si suba sisii suun̄ le. Summoo ma wuo ninii Wia wu-zon̄on̄o. ²³ Nialin̄ si bi kaa lere ari mi ne n̄aa nii-la Wia si tima, ba tuon̄ jan̄ t̄ore.”

²⁴ Nii ne Joon̄ haritooro-la viiri. Ka Yesu suomo bul Joon̄ wiaa a pipi nid̄an̄-la. U pieseba, “Ma si mu Joon̄ teen̄ giri-bine le, bee ne ma fa gber̄e di ma na? Ma mu di ma na yan̄ pelin̄ si kaa viviisi nee? Ai. ²⁵ Bee ne saa

ma lii di ma na? Ma lia di ma na nuu si laale geri-zon̄on̄o nee? Ai. Bee na nialin̄ si yie laale gennin̄ deen̄ba, ba yie juu kuori-diisin̄ ne aa nii sima.

²⁶ Má saa dagemi ku-la ma si mua di ma na. Ma mu di ma na nii-la síi bul wiaa, Wia Din̄-zon̄-la dolun̄ le nee? Oo, mi jan̄ bula pima ari ma na nuu duu kii nii-la síi bul wiaa, Wia Din̄-zon̄-la dolun̄ le. ²⁷ U-na Joon̄ wiaa ne ba ηmun̄sa bil Wia tenin̄ tuon̄, a bul di Wia si,

‘Má jegile nii mi teen̄, mi jan̄ tin̄ mi tin̄daara

duu laa η sipaan̄ a mu a wase won̄biin̄ bilin̄ le.’ ”

²⁸ Nii ne Yesu bira bula pi niaa a bul, “Joon̄ ne kii nuu-kala ba si lula. Ama nii-la si n̄aa ni-bie Wia kuorii-la tuon̄, u ne yuga kii Joon̄.”

²⁹ (Nialin̄ ari ba tuon̄ lan̄poo lilaaraa fa si nii wialin̄ Joon̄ si bula, ba laa dii a to Wia. Ba ne ku n̄aa tuon̄-pul timma. Joon̄ foba Wii-chuole lin̄ maa. ³⁰ Ama Farisii tin̄naa ari Wia tenin̄ kerichiba via Wia niin̄ wialin̄ Joon̄ si bula. Ba ne bi seye di Joon̄ foba Wii-chuole lin̄.)

³¹ Nii ne Yesu bira bul, “Bee ne mi jan̄ ken̄ jin̄in̄ niaa kaa magise? Ee ne ba nage? ³² Ba nage han̄biisin̄ síi gbieli yob̄o tuon̄ ne. Don̄sun̄ yie kpia don̄o le, a bula piba a bul, ‘La yii yiilaa ne pima, an̄ ka ma bi gua, la yel yoho pima, an̄ ka ma bi yel.’ ³³ Bua-la le Joon̄ Wia lii-foori-la si k̄o ma teen̄, uu voo niin̄ ne a bi sinin̄ ma nyua. Nii ne ma si di jin̄-bon̄ ne kenu. ³⁴ An̄ ka mi-na Nuhuobiine Bie k̄o ma teen̄ a didii kiaa an̄ pe nyunyua sinin̄ maa. Nii ne ma bula pi don̄o a bul baala deen̄ n̄aa luobii tiina ne a n̄aa si-nyuaru maa, an̄ pe ken̄ lan̄poo lilaaraa ari haache diiree kala kaa dii nan̄don̄sun̄. ³⁵ Nialin̄ si sei wu-jimii-la si lii Wia teen̄, ba wu-n̄aalaa daga ari ba sene lii Wia teen̄ ne.”

*Yesu juu Farisii kubala dia baa
yire Saamon̄*

³⁶ Tapulii kubala Farisii tin̄naa tuon̄ don̄o yire Yesu duu k̄o u dia

di ba dii kudiilee. Yesu mu a hon di ba dii kiaa. ³⁷ Di haal kubala he tan-la le a naa haache diiru. Haal-la nii Yesu wiaa ari u he Farisii tiina-la dia le aa dii kiaa. Nii ne u sii jon tulaali lon a kaa mu juu dia-la. ³⁸ U si juu dia-la, u chin Yesu naasin seme a yiyel sii-liirin a hihe Yesu naasin le. Sii-liirin si he Yesu naasin le nii, u ken u nyu-punaa kaa tiike an guori Yesu naasin, a bise tulaalii-la he u naasin le. ³⁹ Farisii tiina-la si yire Yesu duu ku dii kiaa na wiin deen a bibiine u tuon le, "Di baala deen sene naa nii-la sii bul wiaa, Wia Din-zon-la dolun le ne, u fa jan jin ari haala deen si digu naa haache diiru ne." ⁴⁰ Nii ne Yesu bula pi Saamon a bul, "Saamon, mi ken wii ne di mi bula pin." Nii ne Saamon bula pu a bul, "Mi kuhian, bula pimi." Nii ne Yesu bula pu a bul, ⁴¹ "Baalaa balia ne he dime a sii mu chin moribee kiaa tiina teen. Dono chin siidi bui banese, dono ma chin siidi zabanese. ⁴² Naa deenba balia tuon, kun-kala bi u chimin wuo tin. Nii ne kiaa tiina-la jon chin-la a che ba kala. Naa deenba baliamin tuon, kubee ne jan cho baal-la worun?" ⁴³ Nii ne Saamon bula pu duu biina ari nii-la chimin si yuga ne. Nii ne Yesu bula pu di wutitii ne.

⁴⁴ Nii ne u miira ben haal-la an piесе Saamon a bul, "N na haal-la deen nee? Mi ko n dia, an ka n bi liin naa pimi di mi son mi naasin, an ka u-na ken u sii-liirin kaa son mi naasin an ken u nyu-punaa ma tiike. ⁴⁵ Mi sii ko n dia, n bimi guoro, ka u-na guori mi naasin. ⁴⁶ N bi nuun naa tise mi nyun, ka u-na naa tulaali tise mi naasin. ⁴⁷ Mi bula pin ari mi jon u haacheba yuge ne a cheu, nii ne tii u chomi worun nii. Ama ni-la ma mi si jon u haacheba muapilii cheu, u tiina ma chomi muapilii ne." ⁴⁸ Nii ne Yesu bula pi haal-la niaa tuon ari u jon u haacheba a cheu ne. ⁴⁹ Nii ne nialin ku-kaanaa fa si hono didii kudiile-la bibiine ba tuon le a bul, "Kubee ne nia deen si paala jon

haacheba che niaa?" ⁵⁰ Ama Yesu bula pi haal-la a bul, "N yarida ne laan ta. Mu ari yarifielaa."

8

Haala-la sii to Yesu harin

¹ Nii harin Yesu gollo to ta-balaa ari ta-biisin a bubul Wia wu-zomola a tige Wia kuorii-la le. U haritoorola fii ari balia to u harin mu, ² ari haalaa donsun maa. Ba tuon donsun faa wiile ne, jin-bonhon ma fa ken donsun. Yesu vaare ba kala. Ba tuon dono yirin ne Meeri Magidalin. Yesu fa kiri jin-bonhon balipe ne u le. ³ Dono ma yirin ne Juana. U bala ma yirin ne Kusa. Kusa fa naa nihian ne kuoro Herod dia le. Haal-la ba sii yire Suzana ma he dime a pe haalaa donsun yuge ma le. Ba peba le ari kialin kala Yesu ari u haritooro sii che.

Yesu mage namaga a tige baal-la sii dyu kiaa le

Mat. 13.1-9; Maak 4.1-9

⁴ Nii ne niaa lii tasin a kuko Yesu teen. Ni-dan-la si ku hilime dere, Yesu mage namaga a piba a bul, ⁵ "Baal kubala ne sie a mu u dyu u kiaa. U jon u ku-doho aa mise ne. U sii mise nii, donsun tel wonbiin tuon. Naa vene nuose, ka diibiisin tuosa dii. ⁶ Donsun ma tel kpaginyilin nyun a nyu an suu, bee wiaa liin tuo dime. ⁷ Donsun ma tuu tel sosun tuon a nyu, ba di sosun kala waa he dono le. Sosu-la wulimin ken kialin, ba suu. ⁸ Ku-doho-la donsun ma tel tintee-zomun le. Ba nyu a waa a wase kinken a he biee zolo zolo." Nii ne Yesu mage namaga-la dere an bul, "Digilaa tinnaa, ma wuoli ma digilaa nii."

Yesu dage namaga-la bubun

Mat. 13.10-23; Maak 4.10-20

⁹ Nii ne Yesu haritooro piесе namaga-la bubun. ¹⁰ Yesu bula piba a bul, "Ma niaa deenba ne Wia dage u kuorii-la bubun pa. Ama ni-dan kala, namagaba ne u yie kaa didageba. Ba yie jegili jegili an bi ba

bubuon jin a bira nyilimi nyilimi an bi kuŋ-kala ma wuo na.

¹¹ Namaga-la bubuon ne nla: Wia niin wiaa ne naa ku-doho-la. ¹² Kialin si tel wonbiin tuon ne naa nialin si yie nii Wia niin wialin, ka Sitaani ku liiri wialin ba tuon, di ba si wialin laa dii di Wia laaba ta. ¹³ Kialin si tel kpaginyilin nyun ma ne naa nialin si yie nii Wia niin wialin a sei ari tuotoron. Ama u bi ba tuon tibe. Ba yie sei wii-la a mu mage nii an via. Di wiaa ne juuba, ba jonon ta. ¹⁴ Kialin si tel sosun tuon ma ne naa nialin si yie nii Wia niin wialin, ama dunia kiaa wiaa wiwalimeba, ba cho di ba jigi a chiche dunia tuotore wu-naalaa. A tin kiaa deenba wiaa ba yie to mu mage nii an bira via wialin. Wialin lel ba tuon. ¹⁵ Kialin si tel tinteezomun tuon ma ne naa nialin si nii Wia niin wialin a laaba he ba tuosaa le a tutoba, a pese wialin le halii, ba ken doho."

Yesu mage namaga a mu tige chaanin le

Maak 4.21-25

¹⁶ Nii ne Yesu bira dage niaa a bul, "Nuu-kala sii che pulumun u dia le, u bi jan nyige chaanin bil u dia le a ken gbanja a chu to, u bira bi jan jon chaan-la he godo bubuon maa. U yie jonon bil kua nyun ne di niaa ne kuu juu u dia, di ba na pulumun. ¹⁷ Wu-faali tuo see duu ku lii di-jalin. Wii-kala si he birimin tuon ma jan ku lii pulumun. ¹⁸ Ma fiele ma siaa worun ari wialin ma sii nii le. Nii-la kala sii to Wia niin wiaa, Wia jan faasa peu le duu to worun. Nii-la ma si bi Wia niin wiaa ka to, Wia bi jan peu le. U si peu le mua-la maa, u jan laau kaa viiri."

Yesu naan ari u naanbiirin ko Yesu teen

Mat. 12.46-50; Maak 3.31-35

¹⁹ Nii ne Yesu naan ari u naanaa ko lee-la Yesu si he di ba nau. Niaa si yuga nii, ba buu wuo na. ²⁰ Nii ne nuu bula pi Yesu a bul, "N naan ari n

naanaa ne chin jeen harin a chiche di ba nan." ²¹ Nii ne Yesu bula pi ba kala a bul, "Nialin si nii Wia niin wiaa a tutoba, ba ne naa mi naan ari mi naanbiirin."

Yesu naa pelin chin

Mat. 8.23-27; Maak 4.35-41

²² Tapulii kubala Yesu ari u haritooro sii juu liin daboro. Nii ne Yesu bul di ba chol muga cholo donon. Nii ne ba juu liin daboro-la a duoro mu. ²³ Ba fa si duoro mu nii, Yesu pin don. Nii ne pel-duo kubala suomo ninjaa, a ku nmoo liin a he liin daboro-la tuon u chiche u su. U fa ka mua di ba tuu liin bubuon.

²⁴ Nii ne Yesu haritooro-la mu leela u fa si pina, a chisu a bula pu a bul, "La kuhian, laa che di la suu ne." Nii ne Yesu sii don le a kpia pel-la le an bul lii-pel-la ma le duu fiela pin. Pel-la kere, ka lerin kala naa fuu. ²⁵ Nii ne Yesu piase u haritooro a bul, "Ma bi yarida naa?" U naa nuu-kala wu-kpunkpere. Fawullun ma kenba.

Nii ne ba pipiase donon a bul, "Kube ne saa paala naa nia deen? U bul wiaa a pi pelin ari lii-pelin, ba kala to u niin."

Yesu vaare baal kubala, jin-bonjon fa si kene

Mat. 8.28-34; Maak 5.1-20

²⁶ Nii ne ba duoro ko Gerasin tinteen. Gerasin ari Galilii tinteen kpage donon ne. ²⁷ Ba si mu yi leela, Yesu lii liin niin. U si lia, di baal kubala ma lii tan-la a ku chemu. Jin-bonjon kenu. U ken yaribiree ne aa golle a dieni. U bi dia maa juu. Vaamaa lerin ne u yie he. ²⁸ U si na Yesu, u nmoo niin an tuu tel u sipaan, an bula pu a bul, "Yesu, Wii-balin Bie, bee ne n che n naami le? Mii sulun, si mi dogisu." ²⁹ Yesu fa bula pi jin-bon-la duu lii baal-la le, nii ne tii u bul nii. Jinsi-la fa vene kenu a yuge ne. Niaa kenu kaa to dia a heu kurun a ken chorumonon vobu an he niaa ba bibenu. U yie ken chorumonon-la kaa kere, ka jinsi-la

kenu kaa lii juu girin. ³⁰ Nii ne Yesu piesu a bul, “N yirin ne bæe?” Nii ne baal-la bul duu yirin ne ku-kene, bæe wiaa jinjin fa yuga ne a kenu. ³¹ Nii ne jinji-la sul Yesu di ba ne len baal-la, duu sí leje di ba tuu buotuo-lunuj.

³² Di toonuj ma he lee-la a yuge a didii kiaa peelin nyuj. Nii ne jinji-la sul Yesu duu len di ba mu juu toonula. U sei. ³³ Ba lii baal-la le a mu juu toonula. Nii ne toonula kala sii a fá lii peel-la nyuj a tuu tel muga tuon a nyua liin a suu.

³⁴ Too-daara-la si na wii-la si nãa, ba fá mu a kenj doworo mu bula pi bagi-daaraa ari tan-la nãa kala. ³⁵ Nãa sii lii mu di ba na wii-la si nãa a kã Yesu teenj. Baa kã di baal-la Yesu si kiri jinjin u le, duu honj Yesu semã a laale gerin a kenj yarifielaa. Ba si na nii, fawulluj kenja. ³⁶ Nialin si he dime aa benj, ka Yesu vaare baal-la, ba bula pi ba donsunj tinãa nii u si nãa a vaare baal-la. ³⁷ Ba si nii wialin, fawulluj kenja woruj. Nii ne tan-la nãa kala ku bula pi Yesu duu lii ba jan le. Nii ne Yesu sii juu liinj daboro. Ba di u haritoooro duoro viiri. ³⁸ Nii ne baal-la Yesu si kiri jin-bonjon u le ma sulu duu len duu kã di ba mu. U bi seyã anj bula pu a bul, ³⁹ “Mu dia a bula pi nj dia nãa, Wia si nãa wii-la nj le.” Nii ne baal-la gollã jan tuonj kala a bul wii-la Yesu si nãau le.

*Yesu vaare Jaaris tolo
Mat. 9.18-26; Maak 5.21-43*

⁴⁰ Nii ne Yesu miira mu juu liinj daboro a duoro chol muga. Ba cholo nii di ni-danj hilime a honã gberu.

⁴¹⁻⁴² Di baal kubala ma kã dime. Baa yire Jaaris. U fa nãa Wii-chuãle dia kuhianj ne. U fa kenj toli-bala ne. Tolo-la fa yi jisinj fii ari balia ne. Nii ne baal-la kã Yesu teenj a tuu tel u naasinj le a sulu duu kã u dia. U bula pu ari u tolo ne pina kikiiki. Nii ne Yesu sii duu mu baal-la dia. U sii mu nii, di nãa gollu chu semã-na kala.

⁴³ Haal kubala ma fa he ba tuonj. U fa kenj tinãa ne jisinj fii ari balia, u pã u bi dẽre. [U gollã nãa daalusuj kinjenj a chei u moribiee kala, ka daalusu-la buu laa.] ⁴⁴ Nii ne u lugisi nialin tuonj a ku chinj Yesu harin a digi u gerin niipininj le. U tinãa-la guu dẽre. ⁴⁵ Nii ne Yesu piesã a bul di kubãe ne digu. Nuu-kala bul duuna dee. Nii ne Piita bula pi Yesu a bul, “Kuhianj, ka nj na nãa si yuga nii ne a golluj chu a yiyigi donã.” ⁴⁶ Ama Yesu ha bul di nuu ne digu. U jima ari doluj ne liiu le. ⁴⁷ Haal-la si na ari wii-la u si nãa bi wu-faali nãa, u ku kpirimi Yesu sipaanj a chichel, a bul nialin tuonj wii-la si tii u digu, a dage njii u si digu a duori lima. ⁴⁸ Nii ne Yesu bula pu a bul, “Mi tolo, nj yarida ne tii nj duori, mu ari yarifielaa.”

⁴⁹ Yesu fa sii bul wiaa njii, di tinãaara kã. U lii Jaaris dia ne a kã. U si kã, u bula pi Jaaris a bul, “Nj tolo-la suba ne, bira sí la kuhianj-la walimu.” ⁵⁰ Yesu sii nii njii, u bula pi Jaaris a bul, “Sí leje di fawulluj kenin. Di nj nãa yarida, u jan sii.”

⁵¹ Yesu si mu yi baal-la dia, u bi leje di nuu-kala to u harin juu diala, see Piita ari Jonj ari Jeems, a pe bile nyimma ari u naanj le. ⁵² Ba ku juu dia-la di nialin kala si he dime china yel bile yoho. Nii ne Yesu bula piba a bul, “Ma sí yel, bile bi suba, donj ne u pinj.” ⁵³ Nii ne ba kala momu, bæe wiaa ba jima ari u suba ne. ⁵⁴ Nii ne Yesu guu mu kenj bile nisinj le anj yiru a bul, “Sii mi bii.” ⁵⁵ Nii ne u dima miira ku juu. U sii lima lima. Nii ne u bul di ba nãa kudiilee pu duu dii. ⁵⁶ Wii-la nãa bile nyimma ari u naanj wukpunjperere. Nii ne Yesu bula piba di ba sí wiinj deenj si nãa bula pi nuu-kala.

9

*Yesu tinj u haritoooro fii ari balia
Mat. 10.5-15; Maak 6.7-13*

¹ Nii ne Yesu yire u haritooroo fii ari balia a he dɔŋɔ ɛ, a piba dolun di ba wuo jin-bɔŋŋɔ an vivaare nyanyal tinŋaa maa. ² Nii ne u tinba di ba lii a bul Wia kuorii-la wiaa an pe vaare nyanyal tinŋaa. ³ U bula piba di ba sí kuŋ-kala kaa pe ven wonbii-la, di ba sí daantigisiŋ koru, di ba sí luɔgaba ma koru, di ba sí kudiilee ma koru, di ba sí moribiee ma koru, a sí genniŋ balia ma paa. ⁴ U bira bula piba a bul, “Di ma ne mu a juu tan kala, má juu dia-la niaa si cho ma wiaa, a he dii-bala ɛ halii a mu lii tan-la ɛ. ⁵ Di ma mu tan kala, di ba pɔ di ma sí juu, má kiele mu. Di ma mua, má kpesi ma naasiŋ hagila ta. Nii jan ŋaa di ba jin ari ba ŋaa wii ne a cheima.”

⁶ Nii ne Yesu haritooro-la sii a gollo to tasiŋ aa bul Wia wu-zɔmɔ-la wiaa an pe vaare niaa lee-na kala ba si mua.

Herɔd tuɔbiinaa vugima

Mat. 14.1-12; Maak 6.14-29

⁷ Galilii tinŋaa kuoro Herɔd si nii wialiŋ Yesu haritooro-la fa si gollo ŋaa, u tuɔŋ kala vugima, bɛɛ wiaa niaa dɔŋsun bula ari Jɔɔŋ Wia lii-foori-la ne sii suun ɛ. ⁸ Niaa dɔŋsun ma si Ilaaja ne sii suun ɛ, dɔŋsun ma si nialiŋ fa síi bul wiaa, Wia Din-zɔŋ-la dolun ɛ faafaa dɔŋɔ ne sii suun ɛ. ⁹ Nii ne Herɔd bul, “Mi ŋaa ba kpu Jɔɔŋ a keru u nyun ne, ka kubɛɛ wiaa ne saa mi biraa nii ŋla?” Nii ne u ninerike duu na Yesu.

Yesu pi niaa bui banɔŋ kudiilee

Mat. 14.13-21; Maak 6.30-44; Jɔɔŋ 6.1-14

¹⁰ Nii ne Yesu nanzɔɔba-la miira kɔ u teen a bul wialiŋ kala ba si ŋaa pu. Nii ne u ken ba dunduna mu tan kubala baa yire Betisaada. ¹¹ Nialiŋ si nii Yesu wiaa duu mu Betisaada, ba to u harin mu. U kenba worun a bul Wia kuorii-la wiaa piba, an vaare nialiŋ síi wiilu.

¹² Wia si suomo duu juu, u haritooro-la fii ari balia-la kɔ u teen a bula pu a bul, “Len di niaa deenba

viiri a mu tan tuɔŋ ari bagisiŋ si kpaga daha a che kudiilee ari dipiniŋ, bɛɛ wiaa kuŋ-kala tuo daha.”

¹³ Nii ne Yesu bula piba a bul, “Má mu che kudiilee a piba di ba dii.” Nii ne ba bula pu a bul, “Ku-la la si kene ne boroboroba banɔŋ ari chenfilee balia. Nŋ che di la mu yɔɔ kudiilee kaa kɔ pi ni-dan deen kala neɛ?”

¹⁴ Baalaa fa si he nialiŋ tuɔŋ yi bui banɔŋ ne. Nii ne Yesu bula pi u haritooroo a bul, “Má len di nialiŋ gulimo hɔŋ hɔŋ mahin balia ari fii fii leree.”

¹⁵ Nii ne u haritooro-la ŋaa nialiŋ kala tuu hɔŋ. ¹⁶ Yesu laa boroboroba banɔŋ-la ari chenfilee balia-la a wula ben wia nyun an chuɔɛ Wia, an kaa chɔge chɔge a pi u haritooroo. Ba laa kaa mu kpaa nialiŋ. ¹⁷ Ba kala dii a vɔge an ka. U haritooro-la paa ku-kaan-biisiŋ a su siŋsiŋ fii ari balia.

Piita dage Yesu si ŋaa nii-la

Mat. 16.13-19; Maak 8.27-29

¹⁸ Tapulii kubala Yesu dunduna chuchuɔɛ Wia. U haritooroo ma he u teen. Nii ne u piɛɛba a bul, “Kubɛɛ ne niaa si mi ŋaa?” ¹⁹ Nii ne u haritooro-la bul, “Dɔŋsun si ŋ ŋaa Jɔɔŋ ne, Wia lii-foori-la. Dɔŋsun ma si di ŋ ŋaa Ilaaja ne. Dɔŋsun ma si ŋ ŋaa nialiŋ fa síi bul wiaa, Wia Din-zɔŋ-la dolun ɛ faafaa dɔŋɔ ne si sii suun ɛ.” ²⁰ Nii ne Yesu miira piɛɛ u haritooroo maa a bul, “Ka ma maa, ma si mi ŋaa kubɛɛ ne?” Piita si, “N ne ŋaa Kirisito, nii-la Wia si liisa.”

Yesu bul ŋii u si jan na heɛŋ an pe suu

Mat. 16.20-28; Maak 8.30-9.1

²¹ Nii ne Yesu bula piba ari siifesiŋ di ba pɔ di ba sí wii-la bula pi nuu-kala. ²² U bira bula piba a bul, “Mi-na Nuhuobiine Bie jan na heɛŋ kinken. Juu tinŋaa nihiasin ari nialiŋ si kpu pusun pipi Wia kuhiasin ari Wia tenin kerichiba kala jan viami. Ba jan kpumi, ka di mi sii suun ɛ tapul-torimun cheɛŋ.”

²³ Nii ne u bula pi nialiŋ kala a bul, “Di nuu-kala nii che duu tomi,

see duu via u titia wonjbiin an jon u daa-gesee baase tapulii-na kala a to mi hariņ. ²⁴ Nii-la kala sii che duu laa u miisin, u jan jon u miisin ta, ama nii-la si via u miisin ta a tin mi wiaa, u jan sene laa u miisin. ²⁵ Di η ne tii dunia kala an bi miisin kene, bee kun nyuurii ne η na? ²⁶ Mi-na Nuhuobiine Bie jan mu Wia-jan an miira ko, a chaane ari mi Nyimma si chaane nii. Wia tinđaraa ma jan to mi hariņ ko a ma chaane. Ba-na bi disin kene. Nialin hiisin si kene a tin mi wiaa ari wialin mi si bula wiaa, mi ma jan faba hiisin bua-la le mi si jan miira ko. ²⁷ Wutitii ne mi bulaa pima, niaa donsun he daha, ba bi jan suu see di Wia kuorii-la ko."

Yesu birima

Mat. 17.1-8; Maak 9.2-8

²⁸ Yesu si bul wiaa deenba kala dere, u tapulaa chori cheen ne u sii jil peelin nyun duu chuole Wia. U ken Piita ari Jon ari Jeems ba jil. ²⁹ U fa sii chuole Wia nii, u siaa birime. U gerin ma pulle a tutul. ³⁰ Niaa balia guu ko u teen a kalaa tul. Moosis ari Ilaaja ne. ³¹ Ba chin aa bul wiaa. Baa bul nii Yesu si jan suu Jerusalem le. U tintinđaa diderin ne nii.

³² Piita ari u nandonsun fa pin don ne, ama ba hirike sii a na Yesu sii tul nii, a na nialin balia ma si chin u teen. ³³ Nii ne nialin ta Yesu an viviiri. Ba si viire nii, Piita bula pu, "Kuhian, u naa wu-zon ne la si he daha. La jan he lenje batori, di η ken don, di Moosis ma ken don, di Ilaaja ma ken don." U sii bul wiaa deenba kala, u fa paala bi jin wii-la kala u sii bul.

³⁴ Piita ha sii bul wiaa nii, duonbilingbaanin ku tuu toba. U si toba nii, fawullun ken Yesu haritoo-ro-la. ³⁵ Ka nuu yikoro lii duonbilingbaan-la tuon aa bul, "Mi Bie ne ηla. U ne naa nii-la mi si liisa. Ma jegile nii u teen." ³⁶ Yiikori-la si bul wiaa dere, u-na Yesu dunđuna ne he dime. Nii ne u haritoo-ro-la

to-re ba niin. Ba bi wii-la ba si na bula pi nuu-kala.

Yesu kiri jin-bomun bie le

Mat. 17.14-18; Maak 9.14-27

³⁷ U tan si pula, ba lii peel-la nyun tuu, nii ne ni-dan ku chen Yesu. ³⁸ Di baal kubala lii ni-dan-la tuon a faasa yire, "La kuhian, bee na mii sulun di η pe mi bie le. U ne mi bie kala. ³⁹ Jin-bomun ne kenu, u chichiire a teriki. Nantuo-funfuga yie to u niin. Uu walimu a po u buu ka len. ⁴⁰ Mi mu sul η haritoo-ro di ba kiri jin-bon-la u le, ama ba bi wuo kiri." ⁴¹ Nii ne Yesu bula piba a bul, "Ma leele niaa deenba, ma bi yarida kene. Ma naa ni-bom ne. Ee ne mi jan nyalime a dieni ma teen?" Nii ne u bula pi baal-la a bul, "Ken η bile kaa ko mi teen." ⁴² Nii ne bile sii mu. Bile sii mu nii, nii ne jin-bon-la ηmobu lo tinten u teriki. Nii ne Yesu bul jin-bon-la le duu lii bile le. U lii, ka bile duori, an ka Yesu jonu pi u nyimma.

⁴³ U naa nialin kala wu-kpunkpere. Ba si di Wia ken dolun worun.

Yesu bira bul u suun wiaa

Mat. 17.22-23; Maak 9.30-32

Nialin kala haa biine wu-kpunkperisi-la Yesu si naa le. Nii ne u bula pi u haritoo-ro-la a bul, ⁴⁴ "Ma si wii-la mi si jan bula pima yu. U ne ηla: Ba jan jon mi-na, Nuhuobiine Bie a he niaa nisin le." ⁴⁵ Ama u haritoo-ro-la bi wii-la u si bula bubun jin. U naa wu-faali ne ba teen. Nii ne tii ba bi u bubun wuo jin. Ama ba fifa fawullun di ba piase wii-la bubun.

Yesu haritoo-ro ken ba tuon kuhian wiaa lile

Mat. 18.1-5; Maak 9.33-37

⁴⁶ Nii ne Yesu haritoo-ro ken ba tuon kuhian wiaa lile. ⁴⁷ Yesu fa jin wii-la ba sii biinu a ken bii-bie kaa ko kii u seme, ⁴⁸ an bula piba a bul, "Di nuu-kala ne ken bii-bie don worun a tin mi wiaa, mi ne u ken worun nii. Nii-la ma kala si

kenji woruŋ, mi dunđuŋa dee u kenji woruŋ nii. Nii-la si tiŋmi ma ne u kenji woruŋ nii. Nii-la si ŋaa ni-bie ma tuɔŋ, u ne ŋaa ma tuɔŋ kuhianŋ.”

Nii-la kala si biŋ bere, u choŋ ne Maak 9.38-40

⁴⁹ Nii ne Joɔŋ bula pi Yesu a bul, “Kuhianŋ, la na baal kubala duu yire ŋ yirinŋ aa kiri jin-bɔŋŋɔɔ niaa le. La kiru duu si nii ŋaa, bee wiaa u bi la dɔŋɔ ŋaa.” ⁵⁰ Nii ne Yesu bula pi Joɔŋ ari u haritooro ku-kaanaa a bul, “Ma si u kiru, bee wiaa nii-la kala si bi ma harinŋ lia, u ŋaa ma dɔŋɔ ne.”

Samaria tinŋteen seme dɔŋɔ niaa via Yesu

⁵¹ Nii ne tapulii-la kpage di ba jonŋ Yesu a kaa jil Wia-jaŋ. U ŋaa siri a sii, a jonŋ wonbiinŋ a mumu Jerusalem. ⁵² U tinŋ tinɔaraa di ba laa u sipaanŋ a mu Samaria tinŋteen ta-bie kubala, a che lerinŋ a bilu le. ⁵³ Ka nialinŋ bi siri ŋaa di ba laau, bee wiaa ba jima duu mu Jerusalem ne.

⁵⁴ U haritooro Jeems ari Joɔŋ si na nii, ba piese Yesu a bul, “La Tiina, ŋ jaŋ leŋ di la sul nyininŋ duu lii wia nyuŋ ku tuu a diiba koo?” ⁵⁵ Nii ne Yesu daase harinŋ aŋ kpiaba le [a bul, “Ma bi jinŋ dima-la yiri Wia si jonŋ pima. Mi-na Nuhuobiine Bie bi ko di mi kpu niaa, ama di mi laa niaa ta ne.”] ⁵⁶ Nii ne ka ba kiele mu taŋ dɔŋɔ.

Nialinŋ si maga di ba to Yesu harinŋ Mat. 8.19-22

⁵⁷ Ba si lii jonŋ ba wonbiinŋ, baal kubala bula pi Yesu a bul, “Mi ŋaa siri di mi to ŋ harinŋ a mu lee-na kala ŋ sii mu.” ⁵⁸ Nii ne Yesu bula pu a bul, “Jolluŋ kenji buasuŋ ne a juuu, diibiisinŋ ma kenji dellinŋ ne a juuu, ama mi-na Nuhuobiine Bie bi di-pininŋ kene di mi pina wiesi.” ⁵⁹ Nii ne u bula pi nuu dɔŋ maa a bul, “To mi harinŋ.” U bula pu a bul, “Mi Tiina, leŋ di mi laa sipaanŋ mu hugi mi nyimma.” ⁶⁰ Nii ne Yesu bula pu a bul, “Leŋ di suunuŋ tinŋaa

mu hugi ba suunuŋ, aŋ ka di ŋ ma mu bul Wia kuorii-la wiaa a pi niaa.”

⁶¹ Nuu ma dɔŋ bira bula pu a bul, “Mi Tiina, mi jaŋ to ŋ harinŋ, ama leŋ di mi mu ta mi dia niaa aŋ ko.”

⁶² Nii ne Yesu bula pu a bul, “Nuu-na kala si suomo duu pere aŋ didaase u harinŋ, u bi tinŋtimii kala kene Wia kuorii-la le.”

10

Yesu tinŋ u nanɔɔɔba mahinŋ batori ari fii

¹ Yesu si bul wiaa deenba dere, u liise niaa mahinŋ batori ari fii a kenba kaa kpa baalia baalia, a tinba di ba laa sipaanŋ mu lee-kala u titia si jaŋ mu. ² U bula piba a bul, “Kiaa yuga baga le di ba ŋaa, ama tinŋtinnaa bi yuge di ba tinŋ. Ma sul baga-la tiina duu he niaa di ba tinŋ tinŋtimii-la. ³ Ma sii mu. Ma nage pie-biisinŋ ne. Mii tinŋma di ma guoli gungurusuŋ tuɔŋ. ⁴ Ma si moribiee koru, ma si sulli-gbanŋsin koru a si nenŋenŋee tuŋ bulia bulia ma koru a si china chuɔle niaa ma dieni wonbiinŋ le. ⁵ Di ma ne mu juu dia kala, ma laa sipaanŋ bula pi dia-la niaa a bul, ‘Dia deenŋ niaa jaŋ hoŋ ari yarifiela.’ ⁶ Di nuu ne he dime si cho yarifiela-la, ma leŋ duu hoŋ ari yarifiela ari ma si sul nii. Di nuu tuo dia-la le a cho yarifiela-la, yarifiela-la ma si sula jaŋ miira ko ma teenŋ. ⁷ Di ba ne pima di-pininŋ, ma he dii-bala le hali aa dii kudiile-la ba si ŋaa pima aa nyua liinŋ ma dime. Di tinŋtinna ne tima, u maga di ba tinŋmu ne. Ma si gollo pipinŋ niaa diisinŋ le. ⁸ Di ma ne mu taŋ kala, di ba ne pima di-pininŋ, ma dii kialinŋ kala ba si ŋaa pima lee-la. ⁹ Ma vaare nyanyal tinŋnaa ma kala si he taŋ-la le aŋ bula piba a bul, ‘Wia kuorii-la ku kpage ma ne.’ ¹⁰ Ama di ma ne mu taŋ kala, di ba ne bima di-pininŋ pa, ma lii chinŋ wonbiinŋ le aŋ bula piba a bul, ¹¹ ‘Ma taŋ-la hagila si mere la naasinŋ le, ba ne la kpesee hema le ŋla. Ama u maga di ma jinŋ ari Wia kuorii-la

ku kpagema nɛ.' ¹² Mi bulaa pima ari sariya che-diilin, Wia jaŋ dɔgise taŋ-la niaa a kii bua-la ɛ u si dɔgise Sɔdɔm niaa nii."

Tasi-la niaa si bi Yesu wiaa laa dii
Mat. 11.20-24

¹³ Nii nɛ Yesu bula pi taŋ-la niaa si bi u wiaa laa dii a bul, "Ma Korazin tiŋŋaa, ma jaŋ na hɛɛŋ. Betisaada tiŋŋaa maa, ma ma jaŋ na hɛɛŋ. Wu-magila-la ba si ŋaa ma teen, di ba nɛ fa ŋaaba Taya ari Saadɔŋ niaa teen ŋla, ba fa bi jaŋ dieni aŋ hɔŋɔ tellɛ tellɛ naasiŋ a ŋaa tuɔruŋ bubuge ba titia, a didage nii ari ba birima lii ba haacheba ɛ nɛ. ¹⁴ Sariya che-diilin, Wia jaŋ dɔgise Korazin ari Betisaada tiŋŋaa a kii Taya ari Saadɔŋ tiŋŋaa. ¹⁵ Mana Kapenam tiŋŋaa, ma nɛ paala chiche di ma keŋ ma titia a kaa jil Wia-jaŋ. Ama Wia jaŋ joŋma yuo ta di ma tuu juu Wia nyiniŋ."

¹⁶ Nii nɛ aŋ ka u bira bula pi u haritooro-la a bul, "Nii-la kala si jegile nii ma teen, u jegile nii mi ma teen nɛ. Nuu-kala si viama, u viami ma nɛ. Nii-la kala ma si viami, u ma via nii-la si tiŋmi nɛ."

Yesu nanɔɔba-la mahiŋ batori
ari fii miira kɔ Yesu teen

¹⁷ Nii nɛ Yesu nanɔɔba-la mahiŋ batori ari fii-la miira kɔ Yesu teen. Ba tuɔŋ tɔrɛ kinkeŋ a bula pi Yesu a bul, "La Tiina, di la nɛ yirɛ ŋ yiriŋ, jiŋ-bɔŋŋɔɔ ma yie paala to la niŋ nɛ." ¹⁸ Nii nɛ Yesu bula piba a bul, "Mi na Sitaani duu lii wia nyuŋ ku tuu tel a nage duonuŋ sii ligise nii." ¹⁹ Nii nɛ Yesu bira bula piba a bul, "Má jegile nii mi teen. Mi pima doluŋ di ma wuo viviŋ diŋŋaa ari nuɔmaa tuɔŋ, ka ba bima wuo diŋ. Mi pima doluŋ di ma wuo Sitaani maa. U bi jaŋ wuo keŋma walime. ²⁰ Ama ma sí leŋe di ma tuɔŋ tɔrɛ ari jiŋ-bɔŋŋɔɔ sii to ma niŋ ɛ, má miira leŋ di ma tuɔŋ tɔrɛ a tiŋ ba si ŋmuŋse ma yiraa hɛ Wia-jaŋ ɛ."

Yesu tuɔŋ tɔrɛ Wia Diŋ-zɔŋ-la
doluŋ ɛ

Mat. 11.25-27; 13.16-17

²¹ Bua-la titia ɛ Yesu tuɔŋ tɔrɛ Wia Diŋ-zɔŋ-la doluŋ ɛ a bul, "Mi Nyimma, ŋ nɛ ŋaa wia nyuŋ ari tiŋteen kala Tiina. Mii lolluŋ ari ŋ si keŋ wialiŋ ŋ si joŋo faa a dage nialiŋ si bi wiaa jiŋ, aŋ bi joŋo dage nialiŋ si keŋ wu-jimiŋ. Mi Nyimma, mii lolluŋ. Ŋ titia tuɔtɔruŋ ɛ nɛ ŋ ŋaa nii." ²² Nii nɛ u bira bul, "Mi Nyimma joŋ kuŋ-kala doluŋ nɛ pimi. Mi Nyimma duŋduŋa nɛ jiŋ nii mi si naga. Mi ma duŋduŋa nɛ jiŋ nii mi Nyimma ma si naga. Nuu-kala bira buu jiŋ, see nialiŋ duŋduŋa mi sii cho di mi dage."

²³ Nii nɛ Yesu miira daase u haritooro-la aŋ bula piba ba duŋduŋa a bul, "Ma tuɔŋ tɔrɔ ari ma wuo nina wialiŋ kala ma sii na. ²⁴ Mi jaŋ bula pima ari buŋbuŋ nialiŋ fa sii bul wiaa, Wia Diŋ-zɔŋ-la doluŋ ɛ ari faafaa kuoroo paala yuga a faa cho di ba na wialiŋ ma sii na aŋ bi wuo na, a ma faa cho di ba nii wialiŋ maa ma sii nii, aŋ ka ba bi wuo nii."

Yesu dage niaa ba si jaŋ ŋaa nii a
cho ba dɔŋsuŋ tiŋŋaa

²⁵ Nii nɛ Wia teniŋ kerichi kubala kɔ a wiwalime duu magise Yesu a piɛsu a bul, "Kuhian, bɛɛ kuŋ nɛ mi jaŋ ŋaa a keŋ miisi-la si bi dɛrɛ?"

²⁶ Nii nɛ Yesu piɛsu a bul, "Bɛɛ nɛ ba ŋmuŋse Wia teniŋ tuɔŋ? ɛɛ nɛ ŋ yie karime?" ²⁷ Nii nɛ baal-la bula pu a bul, "Ba si di ŋ keŋ ŋ tuɔŋ kala ari ŋ kuŋ-kala ari ŋ tuɔbiinaa ma kala a cho ŋ Tiina Wia, a cho ŋ dɔŋɔ tiina maa ari ŋ si cho ŋ titia nii." ²⁸ Nii nɛ Yesu bula pu a bul, "Wialiŋ kala ŋ si bula ŋaa wutitii nɛ. Ŋ nɛ ŋaa nii, ŋ jaŋ keŋ miisiŋ."

²⁹ Nii nɛ Wia teniŋ kerichi-la chiche duu dage ari u keŋ wutitii. Nii nɛ u piɛse Yesu a bul, "Kubɛɛ nɛ ŋaa mi dɔŋɔ tiina?" ³⁰ Nii nɛ Yesu mage namaga a bul, "Baal kubala nɛ sie a lii taŋ kubala baa yire Jerusalem a mumu Jeriko. U fa ŋaa

Juu tiina nɛ. U si mu nii, u mu juu gaaraa tuɔŋ. Ba wuri u genniŋ kala aŋ ŋmobu a bolimu aŋ fá lel, ka u piŋ dime a chiche duu suu. ³¹ Nii nɛ di nialiŋ si kpu pusun pipi Wia, ba tuɔŋ kubala ma jon wonbii-la aa ven. U si ku a nau, u to semɛ don nɛ a kperɛ bal. ³² Nii nɛ Wia-dia nanzɔɔ kubala ma kɔ lee-la a ma kperɛ bal. ³³ Ka Samaria tinŋaa baal kubala ma fa jon wonbii-la a venɛ kɔ. U si nau, nennige kɛnu. ³⁴ U mu u teen a chɛɛ u naawiilaa a vɔɔ, aŋ jonu hɛ u titia kakumo lɛ a kɛnu kaa mu nuhɔɔraa dia kubala aa benu. ³⁵ Tan-pul u jon siidi zɔɔ a pi dia tiina aŋ bula pu duu biben u nyun worun. Duu nɛ miira kɔ, u jan tin u si ŋmoo chimiŋ mage nii kala.” ³⁶ Nii nɛ Yesu piɛɛ Wia teniŋ kerichi-la a bul, “Niaa deenba batorimuŋ tuɔŋ, kubɛ nɛ ŋaa baal-la si juu gaaraa tuɔŋ donɔ tiina? Bɛɛ nɛ ŋ biine ŋ tuɔŋ lɛ?” ³⁷ Nii nɛ Wia teniŋ kerichi-la bul, “Baal-la si fáu nisusun.” Nii nɛ Yesu bula pu, “Tɔɔ, ŋ ma mu ŋaa nii titia.”

Yesu mu Maata ari Mɛeri dia

³⁸ Yesu ari u haritooro si jon wonbiin mumu nii, ba kɔ tan kubala, di haal kubala ma hɛ dime. Baa yirɛ Maata. U kɛŋ Yesu kaa juu u dia. ³⁹ U ŋaana ma fa hɛ dime. Baa yiru Mɛeri. Yesu si hon dia-la tuɔŋ, u ku hon Yesu semɛ a jegilee nii wialiŋ u sii bul, ⁴⁰ ka Maata fiɛɛ sii a ŋinŋaa kudiilee duu pi Yesu a kala lol. Nii nɛ u na baaniŋ Mɛeri nyun a ku lii, a bula pi Yesu a bul, “Mi Tiina, ŋ biina u zomɔ nɛ mi ŋaana si len tinŋinŋaa kala pimi mi titiŋ? Len duu ku pemi lɛ.” ⁴¹ Nii nɛ Yesu bula pu a bul, “Maata, wiaa yuga nɛ hɛ dime a wiwalimiŋ. ⁴² U maga di ŋ che wu-bala dunɔn nɛ. Wii-la titia nɛ Mɛeri liise nii. Wii-la ba bi jan wuo kaa laa u teen.”

11

Yesu dage niaa ba si ŋaa nii aa

chuoɛ Wia

Mat. 6.9-13; 7.7-11

¹ Tapulii kubala Yesu sii a mu chuoɛ Wia lee kubala. U si chuoɛ Wia dɛɛ, u haritooro tuɔŋ kubala kɔ u teen a bula pu a bul, “La Tiina, dagela nii la si jan ŋaa a chuoɛ Wia, ari Jon fa si dage u haritooro ba si ŋaa nii aa chuoɛ Wia.” ² Nii nɛ Yesu bula piba a bul, “Nla nɛ ma jan chuchuoɛ Wia: Má bul,

‘La Nyimma Wia,

len di ŋ yiriŋ yirɛ,

len di ŋ kuorii-la kɔ.

³ Pila la niin kudiilin tapulii-na kala.

⁴ Jon la haacheba chɛla ari la ma si jon la donsun tinŋaa haacheba chɛba nii, a liisela wii-la si jan kɛnla hɛ haache tuɔŋ lɛ.’ ”

⁵ Nii nɛ Yesu bula pi u haritooro a bul, “Má len di la jon ari ma kun nɛ mu u nanɔnɔ dia tita-siesee, a bula pu a bul, ‘Mi nanɔnɔ, chinmi boroboro batori. ⁶ Mi nanɔnɔ nɛ lii wonbiin a kɔ mi teen titaniŋ deen, ka mi bi kun kɛnɛ di mi ŋaa pu duu dii.’ ⁷ N biina ari ŋ nanɔnɔ-la nɛ hɛ dia tuɔŋ aŋ bula piŋ a bul, ‘Sí mi walimu, boin yaga nɛ. Ka la di mi biiriŋ piŋ don. Mi bi jan wuo sii a piŋ kun-kala.’ Ai, u bi jan bul nii. ⁸ Bɛɛ nɛ u jan ŋaa? Mi jan bula pima, di ŋ nɛ china pɛɛ, ma nanɔnɔsun wiaa dee u jan sii don lɛ a piŋ kudiile-la. Ama ŋ si pɛɛ nii aŋ bi hiisiŋ fá nɛ tii u jan sii a piŋ ku-la kala ŋ sii che. ⁹ Nii wiaa mi jan bula pima, Má sul kiaa, ma jan laa, má che kiaa, ma ma jan na. Má du boro, ba jan kaa suro pima. ¹⁰ Nii-la kala si sul kiaa Wia teen, u yie laa nɛ. Nii-la kala sii che kiaa, u yie na nɛ. Nii-la ma kala si du boro, ba yie kaa suro pu nɛ. ¹¹ Nyin bɛɛ nɛ ma tuɔŋ si jan jon dimiŋ a pi u bie duu nɛ piɛɛ chiche chenfilin? ¹² Koo duu ka che ji-halin, ma tuɔŋ nyin bɛɛ nɛ jan jon nuomun pi u bie? Ma tuɔŋ nuu-kala bi jan ŋaa nii. ¹³ Ma nialiŋ ŋaa ni-bonɔɔ nɛ, ka ma wuo jon

ku-zɔŋŋɔɔ a pi ma biirin. Ama mi Nyimma si he Wia-jaŋ, u keŋ wu-zɔŋŋɔɔ a kiima, nii ne tii u bi jaŋ via duu joŋ u Diŋ-zɔŋ-la a pi nii-la si sulu chiche.”

Yesu ari Belizibul

Mat. 12.22-30, 43-45; Maak 3.20-27

¹⁴ Baal kubala ma ne fa ko Yesu teen. Jiŋ-bomun kenu a ŋaa u taŋ. Nii ne Yesu ŋaa jiŋ-bɔŋ-la lii baal-la le, ka baal-la wuo bubul wiaa. Ni-daŋ-la si he dime a na wii-la, u ŋaaba wu-kpunkpere. ¹⁵ Nii ne niaa doŋsun ma si di jiŋ-bɔŋŋɔɔ kuoro ba sii yire Belizibul ne pu dolun duu kikiri jiŋ-bɔŋŋɔɔ nii. ¹⁶ Niaa doŋsun ma chiche di ba magisu. Nii ne ba si duu ŋaa wu-magilin di ba na a jiŋ ari Wia dolun ne u kaa ŋiŋaa nii. ¹⁷ Yesu wuo jiŋ ba tuɔbiinaa a bula piba a bul, “Di taŋ niaa ne he dime a bi nii-bala kene, ba taŋ jaŋ tel. Di naanbiirin ma ne bi nii-bala kene, ba dia jaŋ tel. ¹⁸ Di Sitaani niaa ne bi nii-bala kene, ba taŋ bi jaŋ wuo chin.” ¹⁹ Nii ne Yesu bira bula piba, “Ma bula ari Belizibul ne pimi dolun mi kaa kiri jiŋ-bɔŋŋɔɔ niaa le. Kubee ne saa joŋ dolun pi niaa deenba sii to ma hariŋ ba ma kikiri jiŋ-bɔŋŋɔɔ niaa le? Niaa deenba titia daga ari maa nyia ne. Ba jima ari Sitaani bi u titia wuo guraa yuo. ²⁰ Wia dolun ne mi kaa kiri jiŋ-bɔŋŋɔɔ niaa le. Wiin deen ne daga ari Wia kuorii-la paala ko ma teen ne. ²¹ Di ni-duon ne voo u tuonun a hono po u dia, nuu-kala bi u dia kun-kala wuo juu joŋ. ²² Ama nii-la ma si keŋ dolun a kiiu duu wuo ku keŋ baal-la, aŋ keŋ u tuonun kala u si kaa po u kiaa a kaa laa u teen, u jaŋ wuo paa u kialin kala kaa viiri. ²³ Nuukala si bi mi nuu ŋaa, u lii mi hariŋ ne. Nii-la ma kala si bi mi le pe di la kiri kiaa hihe doŋo le, u kaa pisa tita ne.”

²⁴ Nii ne Yesu bira bula pi niaa a bul, “Di jiŋ-bɔŋ ne lii nuu le, u yie golle tintee-hilin le a chiche di-wiesin. Di u ne bi lee na, u yie bul

u titia le a bul, ‘Mi jaŋ miira mu lee-la mi si lia.’ ²⁵ U jaŋ miira mumu, di disinnin tuo dia-la le, ba wasa u kala zɔŋ. ²⁶ Nii ne u jaŋ miira lii, a keŋ jiŋ-bɔŋŋɔɔ balipe, kialin si bomo kiiu, ba ma ku juu a pe le. Nii hariŋ le ne baal-la yie kperi a kii bunbun-la.”

Nii la si jaŋ ŋaa a keŋ tuɔtorun kinkeŋ

²⁷ Yesu si bul nii dɛre, di haal kubala he ni-daŋ-la tuon a faasa bula pu a bul, “Wia jaŋ pe haal-la si lulun le a diesin ari yilin. U jaŋ len duu tuon tɔre.” ²⁸ Nii ne Yesu miira bula pu a bul, “Nii-la si nii Wia niin wiaa a tutoba, u-na tiina tuon ne jaŋ tɔre.”

Nialin che di Yesu ŋaa wu-magilaa

Mat. 12.38-42

²⁹ Nialin si golli Yesu nii, u bula piba a bul, “Bee na, jinin niaa deenba bomo ne. Ba si di mi ŋaa wu-magilin di ba na a jiŋ ari mi dolla lii Wia teen ne. Ai, mi bi ŋaa. Wu-magilin ma sii che, ma bi jaŋ wuo na, see wu-magil-la Wia fa si ŋaa a tige Jona le. ³⁰ Wia joŋ Jona a kenu ŋaa wu-magilin Ninive niaa teen. Nii titia ne u jaŋ joŋ mi-na Nuhuobiine Bie ma a keŋmi ŋaa wu-magilin jinin niaa teen.”

³¹ Nii ne Yesu bira bul, “Haal kubala ne fa he dime. U dii kuoron tintee kubala le baa yire Siiba. U sii lii u jaŋ le a mu di-bolii duu jegile nii kuoru kubala wu-jimin. U yirin ne fa Solomɔŋ. U fa keŋ wu-jimin kinkeŋ kinkeŋ. Sariya che-diilin, haal-la jaŋ sii a joŋ cheerin a pi jinin niaa worun. Mi jaŋ bula pima ari nuu ne he dime, u yuga a kii Solomɔŋ, ka ma bi sei di ma jegile nii u wiaa. ³² Sariya che-diilin, Ninive niaa ma jaŋ sii a joŋ cheerin a pima worun. Bua-la le Jona ma fa si mu bul Wia wiaa pi Ninive niaa, ba birima lii ba haacheba le ne aŋ to Wia. Mi jaŋ bula pima ari nuu ne he ma tuon a yuga kii Jona, ka ma bi sei di ma jegile nii u wiaa.”

*Yesu dage niaa a tige puluŋ-la le
Mat. 5.15; 6.22-23*

³³ Nii ne Yesu bira dage niaa a bul, “Di η ne nyige chaaniŋ aa che di pulumuŋ he dia tuoŋ, η bi jaŋ keŋ kua keɛ. N bira bi jaŋ joŋ gbaŋa ma a chu to. N yie joŋo dan kuŋ nyuŋ ne, di nuu-kala ne ku juu η dia, duu wuo na pulumuŋ a ku juu dia-la. ³⁴ N siala ne ŋaa η yaraa pulumuŋ. Di η siala ne zomɔ, η yaraa kala keŋ pulumuŋ ne, ama di η siala ne bi zɔŋ, η yaraa kala he birimiŋ tuoŋ ne. ³⁵ Má pɔ di puluŋ-la ma si kene sí birimiŋ birimu. ³⁶ Di η yaraa kala ne keŋ pulumuŋ aŋ ka η lee-kala bi birimiŋ kene, u jaŋ chaane lee-kala, ari chaaniŋ si yie chaane ηii.”

*Yesu bul Farisii tinŋaa ari Wia teniŋ kerichiba teen woruŋ
Mat. 23.1-36; Maak 12.38-40*

³⁷ Yesu si bul wiaa deenba deɛ, Farisii tiina kubala yiru duu ko u dia a dii kudiilee. Nii ne Yesu mu hoŋ duu dii kudiile-la. U bi liiŋ somɔ aŋ didii kudiile-la. ³⁸ Farisii tiina-la si na ηii, u ŋaau wu-kpuŋkpere. ³⁹ Nii ne la Tiina Yesu bula pu a bul, “Ma-na Farisii tinŋaa, ma yie cheɛ ma gbaŋsiŋ ari ma nyunyualuŋ hariŋ woruŋ di ba zɔŋ aŋ bi ba tuoŋ ka tiisi, ka ba tuoŋ kala birisi. Ma nage nyunyualuŋ ari gbaŋsiŋ deenba ne. Ma yaraa ne zomɔ, ama ma tuoŋ le ma keŋ yaribieriŋ ari tuo-bomun. ⁴⁰ Ma ŋaa ni-yaaraa ne. Wia-la si ŋaa ma hariŋ, u ne ŋaa ma tuoŋ maa. ⁴¹ Di ma nii che di ma tuoŋ pulle, má keŋ ma tuoŋ a cho sum-moo a fifába nennige.

⁴² Ma Farisii tinŋaa, ma jaŋ na heeŋ. Ku-biisiŋ, ma yie kaa kpaa leree fii fii, a joŋ leriŋ kubala a pi Wia. Di ma ne jaa pipaari-la suɔra si sima ari pipaari-la suɔra si bi siŋ ari pipaa-diilee maa, ma yie keŋba kaa kpaa leree fii fii, a joŋ ba kuŋ-kala leriŋ doŋo a pi Wia, ama ma via wutitii wonbiin a bi Wia cho. U maga di ma kpaa ma kialin leree fii fii, a joŋ leriŋ kubala a pi Wia, ama

u bi maga di ma via wutitii wonbiin. ⁴³ Ma Farisii tinŋaa, ma jaŋ na heeŋ. Di ma ne juu Wii-chuoɛ diisiŋ, ma yie cho ni-balaa di-honun ne. Di ma nii golle yɔbo le maa, ma yie cho di nuu-kala ne pima jirima a chuchuoɛma. ⁴⁴ Ma jaŋ na heeŋ kiŋkeŋ kiŋkeŋ. Ma nage vaamaa ba si kaa jere, di ba di tinteen kala mage doŋo ne, ka niaa bi jin aŋ viven ba nyuŋ.”

⁴⁵ Yesu si bul ηii deɛ, di Wia teniŋ kerichi doŋo bula pu a bul, “Kuhian, η si bul ŋla, η tuusela ma ne.” ⁴⁶ Nii ne Yesu bira bul, “Ma-na Wia teniŋ kerichiba, ma jaŋ na heeŋ. Ma yie joŋ chuga a dan niaa hariŋ le, ka ba bi wuo chuŋ. Aŋ ka ma titia bi jaŋ peba le a laa chuga-la. ⁴⁷ Ma jaŋ na heeŋ kiŋkeŋ. Ma naabalimaba bi woruŋ ŋaa a kpu nialiŋ fa sii bul wiaa, Wia Diŋ-zɔŋ-la doluŋ le. Ma ne paala saa ba vaama-la. ⁴⁸ Ma ne sei wialiŋ ma naabalimaba si ŋaa a bul di ba ŋaa wutitii ne. Ba kpu nialiŋ fa sii bul wiaa, Wia Diŋ-zɔŋ-la doluŋ le, ma ma ne saa ba vaamaa. ⁴⁹ A tin wiin deen wiaa, ba ŋmunse Wia teniŋ seme doŋo ba sii yie Wia wu-jimiŋ a bul, ‘Mi jaŋ ta nialiŋ sii bul wiaa, Wia Diŋ-zɔŋ-la doluŋ le ari mi tinɔaraa di ba mu ba teen. Ba jaŋ kpu doŋsun aŋ to doŋsun naasiŋ a doŋiseba.’ ⁵⁰ Wia jaŋ doŋise jiniŋ niaa a tin ba si kpu nialiŋ fa sii bul wiaa, Wia Diŋ-zɔŋ-la doluŋ le a lii dunia di-suomuŋ, ⁵¹ a chiiŋ bua-la le ba si kpu Ebil a kaa mu yi bua-la le ba si kpu Zakaraya. Ba kpu Wia-dia tuoŋ ne a kpage koru-la nyuŋ ba si yie nyige pusun pipi Wia ne. Wutitii, mi jaŋ bula pima, Wia jaŋ doŋise jiniŋ niaa kala kiŋkeŋ a tin wiaa deenba kala le. ⁵² Ma Wia teniŋ kerichiba, ma ma jaŋ na heeŋ kiŋkeŋ. Ma to wonbii-la nialiŋ sii to a yi lee-la ba si jaŋ na wu-jimiŋ ne. Ma titia bi che di ma to wonbiin deen, aŋ pɔ di nialiŋ ma sii walime di ba to, di ba sí to.”

⁵³ Yesu si lii lee-la, Wia teniŋ

kerichiba-la ari Farisii tinŋa-la suomo bul wiaa a lilii u hariŋ a piesu wiaa yuge. ⁵⁴ Baa walime di ba bere kenu di u ne bul wii chei.

12

Yesu bula pi niaa di ba sí kanfugi tinŋaa nagu

Mat. 10.26-27

¹ Nialin fa si ko Yesu teen, ba yi niaa bui bui bui a yiyigi dono. Nii ne Yesu laa sipaan a bula pi u haritooro a bul, "Má po ma titia le ari Farisii tinŋaa. Ba ŋaa kanfugi timma ne. Ba nage si-burun ne. Di ŋ ne jono he kun-kala le, u yie puore ne. ² Wii-kala si faa, u jan ku lii pulumun, niaa ma jan nii wii-la si ŋaa wu-faali. ³ Wii-kala maa ŋ si bul birimin tuon, ba jan niu pulumun le. Wii-kala bira ŋ si munso bul a he nuu dunjun digilin le dia tuon, ba jan faasa heele bulu lusun nyun."

Nii-la si maga di ŋ fá

Mat. 10.28-33; 12.32; 10.19-20

⁴ Nii ne Yesu bira bul, "Mi nanjonsun, mi jan bula pima, ma sí nialin si jan wuo kpu ma yaraa le fá. Ba bira bi jan wuo ŋaa wu-bon kala ma le. ⁵ Mi jan dagema nii-la si maga di ma fá. Má fá Wia. U ne jan wuo kpuma an bira ken dolun duu wuo jonma he Wia nyinin tuon. Mi bulaa pima, ma fifáu. ⁶ Zaarikokobiisin banon dee ba yie jono yalle kobu balia koo? Ama Wia bi ba tuon kubala ma wiaa yua. ⁷ Wia paala jin ma nyu-punaa kala ma niin ne. Nii wiaa, ma sí leŋe di fawullun kenma. Ma ne paala kii zaarikokobiisin a yuge.

⁸ Mi bulaa pima, nii-la kala si jan wuo bul niaa tuon ari u ŋaa mi nuu ne, mi-na Nuhuobiine Bie ma jan bul nii a tigeu le Wia tinŋaaraa sipaan. ⁹ Ama nii-la kala si viami niaa tuon, mi-na Nuhuobiine Bie ma jan viau Wia tinŋaaraa sipaan. ¹⁰ Nii-la kala si bul wu-bonŋoo a mu tige mi-na Nuhuobiine Bie le, Wia jan jono cheu, ama nii-la kala si tuuse Wia

Diŋ-zon-la jonŋoo, Wia bi jan jono che u tiina.

¹¹ Di ba ne kenma kaa juu Wii-chuole diisin koo kuoroo ari kuhiasin teen di ba dii ma sariya, ma sí leŋe di ma boisin jon nii ma si jan ŋaa a laa ma titia, koo wii-na kala ma si jan bul. ¹² Bua-la titia le Wia Diŋ-zon-la jan dagema wii-la ma si jan bul."

Yesu mage namaga a tige bagi-daari tuolon tiina le

¹³ Yesu fa si bul wiaa pipi ni-dan-la nii, baal kubala lii ba tuon a bula pu a bul, "Mi kuhian, la nyimma suba an ka kiaa. Mii sulun di ŋ bula pi mi naanbie duu kaa kpa pimi." ¹⁴ Nii ne Yesu bula pu a bul, "Mi nanjon, mi tinŋimii dee di mi laa ma sariya dii pima koo di mi ken ma kiaa kaa kpaama." ¹⁵ Nii ne u bira bula pi niaa a bul, "Má fiele ma siaa a sí tuolonun ken. Di nuhuobiine ne ken kiaa kinken, kialin bi jan wuo len duu ken miisin."

¹⁶ Nii ne Yesu bira mage namaga a bul, "Baal kubala ne fa he dime a ken kiaa worun a bil u бага. U бага-la kiaa wase worun. ¹⁷ Nii ne u bibiine u tuon le a bul, 'Ee ne mi jan ŋaa? Mi bira bi lerin kene di mi tuole mi kiaa.' ¹⁸ Nii ne u bul, 'Mi jan ŋmoo mi virisin deenba mi si kene a ta an wasa saa ku-balaa. Mi jan jon mi kuorimaa ari mi kiaa kala a tuole dime ¹⁹ an bula pi mi titia a bul, Mi tuole kiaa yuge ne. Mi jan dii jisi ari jisi. Mi-na jan ta jia a dii kiaa ari tuotonun.' ²⁰ Nii ne Wia bula pu, 'Ni-yaari, titanin deen mi jan len di ŋ suu. Kialin saa ŋ si che bil, kubee ne jan dii?' " ²¹ Nii ne Yesu bula pi niaa a bul, "Nii-la kala si yie che kiaa bil u titia le an bi kuoru ŋaa Wia teen, u nage baala deen ne."

Yesu dage niaa di ba sí ba titia walimu a tige kudiilee ari gennin wiaa le

Mat. 6.25-34

²² Nii wiaa Yesu bula pi u hari-tooro a bul, "Mi bulaa pima, ma

sí ma titia walimu a tige kudiile-la ma si jaŋ dii a keŋ doluŋ, koo ma sí ma titia ma walimu a tige genni-la le ma síi che di ma lilaale. ²³ Ma miisin ne kii kudiilee, ma yaraa ma kii genniŋ. ²⁴ Má bee na diibiisin, ba bi pere, ba bi kiaa ka tuole virisin le, ka Wia pipiba kudiilee. Ma ne paala keŋ nyuuruŋ a kii diibiisin. ²⁵ Di ma níi walime ma titia kiaa deenba wiaa, bua-la le ma miisin si jaŋ dere, u bi jaŋ keŋ tapul-bala ma pe pima. ²⁶ Di ma ne saa bi tapul-bala ma wuo kaa pe ma miisin le tapulii-la ma ma si jaŋ suu, bee ne saa tii kiaa deenba wiaa wiwalimema? ²⁷ Má bee na tii-fiilaa. Ba bi tin, ba bi genniŋ ma yere a lilaale, ama ba zomɔ woruŋ. Kuoru kubala ne fa he dime. Baa yire Solomɔŋ. U fa si he u miisin le, u keŋ kiaa ne woruŋ. Ama u genniŋ fa bi zomɔ mage tii-fiilaa deenba. ²⁸ Wia ne yie ŋaa yaŋ nyu a waa a zɔŋ, ka u bi dieni aŋ hil. Di u ne hila, ba yie nyige nyiniŋ. Di Wia ne wuo ŋaa yaŋ zɔŋ nii, bee ne tii ma bibiine ari u bi jaŋ wuo pima kudiilee ari genniŋ? Ma yarida bi yuge. ²⁹ Ma sí leŋe di ma walime ma titia kudiile-la ma si jaŋ dii ari ku-la ma si jaŋ nyua wiaa. ³⁰ Nialin si bi Wia jin dunia deen le, ba ne yie walima chiche kiaa deenba. Ma Nyimma jima ari ma che kiaa deenba ne. ³¹ Nii wiaa, má laa sipaan a che kialin si he Wia kuorii-la tuɔŋ. U jaŋ jɔŋ kuŋ-kala si ka a pe pima.”

Nii la si jaŋ ŋaa a keŋ kiaa Wia-jaŋ le

Mat. 6.19-21

³² Nii ne Yesu bira bul, “Ma nialin síi tomi, ma bi yuge. Ma sí leŋe di fawulluŋ keŋma. Ma Nyimma tuɔŋ tɔre ne duu jɔŋ kuorii-la pima. ³³ Má jɔŋ ma kiaa kala yalle a jɔŋ moribie-la a pi summoo. Má che kialin si bi chei a bil ma titia le, a jɔŋ ma kiaa bil Wia-jaŋ le. Dime ba bi jaŋ dere, gaaru kala bi jaŋ wuo paaba dime, pugumaa ma bi jaŋ diiba. ³⁴ Ma tuobiinaa jaŋ pin lee-la ma kiaa si he.

³⁵ Má vɔɔ ma damerisin woruŋ ma tiŋsin le a nyige ma chaanaa di ba chaane, di ma ŋaa siri ari wii-na kala si jaŋ ŋaama le. ³⁶ Má leŋ di ma nage dia tiŋtinni-zɔŋŋɔɔ. Di ba kuhian mu ha-jaari gbiele aŋ kɔ, ba hɔnɔ gberu. Ba ŋaa siri di bua-la le u si miira kɔ a du boro, ba jaŋ suro pu lima lima. ³⁷ Di ba kuhian ne miira kɔ a na di ba weye a ŋaa siri, ba tuɔŋ jaŋ tɔre. Wutitii, mi jaŋ bula pima, u jaŋ vɔɔ u damere woruŋ aŋ ŋaa di u tiŋtinna-la hɔŋ, a jɔŋ kudiilee piba di ba dii. ³⁸ Duu ne miira kɔ tita-siesee maa, koo duu ne paala kieli nii maa, ba tuɔŋ jaŋ tɔre woruŋ. ³⁹ Di nuu ne fa jima bua-la le gaara si jaŋ ku gaa u kiaa u dia le, u fa jaŋ hɔnɔ pɔ u dia. Di u ne weye, u bi jaŋ sei di gaara juu gaa u kiaa. Má liisi wiin deen. ⁴⁰ Má ma saa ŋaa siri, bee wiaa, mi-na Nuhuobiine Bie jaŋ kɔ bua-la le ma si buu yiele.”

Nii-la si ŋaa tiŋtinni-titii ari nii-la si bi tiŋtinni-titii ŋaa

Mat. 24.45-51

⁴¹ Nii ne Piita piese Yesu a bul, “La Tiina, ŋ mage namaga deen pipila ne koo ŋ bula pi nuu-kala nee?” ⁴² Nii ne la Tiina Yesu miira pieseba a bul, “Kubee ne saa ŋaa tiŋtinni-titii-la si jin wiaa? U ne nii-la u kuhian si yie liise duu biben u dia, aŋ pe pipi u tiŋtinni-dɔŋsuŋ ma kudiilee. ⁴³ Di tiŋtinna-la ŋaa wialin u kuhian si dagu duu ŋaa, u tuɔŋ jaŋ tɔre bua-la le u kuhian-la si jaŋ miira kɔ. ⁴⁴ Wutitii mi bulaa pima, u kuhian-la jaŋ jɔŋ u kiaa kala he tiŋtinna deen nisin le duu biben. ⁴⁵ Ama di tiŋtinni-la ne bula pi u titia ari u kuhian-la jaŋ dieni ne aŋ suomo ŋmuŋmoo u tiŋtinni-dɔŋsula, baalaa ari haalaa kala, a he dɔŋɔ le, aŋ faasa didii kudiilee a nyunyua sinin bubugi, ⁴⁶ duu ŋaa nii, u bi siri ŋaa gberu u kuhian-la. U kuhian-la jaŋ kɔ tapulii-la le u si bi yiela. U jaŋ dɔgisu woruŋ aŋ kenu kaa mu he lee-la nialin si bi u niin wiaa nii

si he. ⁴⁷ Tintinni-la si jin tintimii-la u kuhian sii che duu tin an bi siri naa duu tin tintimii-la, u kuhian jan chaasa viiru kinken. ⁴⁸ Ama tintinni-la si bi tintimii-la u kuhian sii che duu tin jin an naa wii-la si maga di ba viiru, ba jan viiru mua. Di ba jon kiaa yuge a pi nuu, u maga di ba piese laa kiaa yuge nii-la teen. Di ba jon kiaa yuge kinken kinken a pi nuu duu ben, u ma maga di ba piese laa kiaa kinken kinken u teen.”

A tin Yesu wiaa, niaa jan pore dɔɔ le

Mat. 10.34-36

⁴⁹ Nii ne Yesu bira bul, “Mi ko di mi naa di dunia dii nyinin ne. Mi saa fa cho duu suomo a didii ne leele. ⁵⁰ Mi jan juu heen le ari niaa si yie juu liin nii, bua-la le ba sii foba Wii-chuole liin. Mi tuon bi jan pin di-bala see di mi na hee-la dere. ⁵¹ Ma biina di mi ken yarifielaa ne kaa ko di mi pi dunia? Ai. Mi paala ko di mi naa di niaa pore dɔɔ le ne. ⁵² A chin leele a kaa mu, dia niaa jan pore dɔɔ le. Di ba ne naa banon a jujuu dia, ba jan pore dɔɔ le. Niaa batori jan ken nii-bala, di niaa balia ma ken nii-bala. Niaa batori-la jan pe dɔɔ le a yuyuo niaa balia-la. Niaa balia-la ma jan pe dɔɔ le a yuo niaa batori-la. ⁵³ Biirin nyimmaba ari ba biirin jan guraa yuo dɔɔ. Biirin ma ken ba nyimmaba di ba yuyuo dɔɔ. Biirin naanba ma jan ken ba biirin yuyuo dɔɔ, biirin ma jan ken ba naanba di ba yuyuo dɔɔ. Bala naanba ma jan ken ba bii-haalaa yuyuo dɔɔ. Bii-haalaa ma jan ken ba bala naanba yuyuo dɔɔ.”

U maga di ma jin wialin si naa dunia le bubuon

Mat. 16.2-3

⁵⁴ Nii ne Yesu bula pi nialin a bul, “Di ma ne na duonbilinbaanaa di ba ne lii wii-juulun a kuu jil, ma yie bul di duonun nii che duu nii. Nii ne duonun sene yie nii. ⁵⁵ Di ma ne bira na pelin duu ne lu a lii tan-bubuon, ma yie bul di lerin jan lin. U sene

lin. ⁵⁶ Ma kanfugi tinnaa deenba. Ma yie wuo ben tinteen a ben wia nyun maa a wuo dage wii-la si jan naa. Bee ne saa tii ma bi jan wuo jin wialin sii naa dunia deen le ba bubuon?”

Wii-la si maga di ma naa

Mat. 5.25-26

⁵⁷ Nii ne Yesu bira bul, “Ma si jin wii-la si maga di ma naa, bee ne tii ma buu naa? ⁵⁸ Di nuu ne samin a kenin kaa mu sariya didiin, n naa kukeri a bul wii-la wase wonbiin le an-na mu. Di nii dee, u jan kenin kaa lere sariya didiire teen. Sariya didiire bira jan kenin kaa he porisiba nisin le. Ba jan kenin mu to dia. ⁵⁹ Di ba ne kenin mu to dia, n bi jan wuo lii, see di n tin chin-la kala ba si kere pin.”

13

Yesu bula pi niaa di ba birima lii ba haacheba le

¹ Bua-la le Yesu fa si bul wiaa pipi niaa, nialin dɔɔsun fa si he dime bul wiaa pu a mu tige Paalit le, u fa si kpu Galilii tinnaa dɔɔsun nii. U kpuba bua-la le ba sii kpu pusun pipi Wia ne. ² Nii ne Yesu pieseba a bul, “Ma biina ari Galilii tinnaa deenba Paalit si kpua ne naa haache a kii Galilii tinnaa dɔɔsun kalaa? ³ Ai, nii dee. Di ma ne bi birima lii ma haacheba le, ma kala jan suu ari niaa deenba si suu nii. ⁴ Nialin fii ari chori ma fa si he dime, dii-duduon tele nmooba kpu Siloom le. Ma biina ari ba ne naa haache a kii nialin dɔɔsun kala fa si he Jerusalem le koo? ⁵ Ai, nii dee. Mi bulaa pima, di ma kala bi birima lii ma haacheba le, ma kala jan suu niaa deenba fa si suu nii.”

Yesu mage namaga a tige tia-la si bi nen le

⁶ Nii ne Yesu mage namaga a pi niaa a bul, “Baal kubala ne fa he dime. U fa ken tutogo ne u бага le. Tutogo-la nenin yi, u mu a chiche nene tutogo-la le. U bi nen kala na.

7 Nii ne u bula pi u bagi-paara a bul, 'Jisin batori ne nla tia-la si bi nene, u maga di n kere ta ne. U china to lerin ne.' 8 Nii ne bagi-paari-la bula pu a bul, 'Mi kuhian, len duu chin jina deen ma le di la na. Mi jan huro golli u bubuon a he na-binin. 9 Di u ne nene harin jina-la le, u jan zon. Di u ne bi nene, kere ta.' "

Yesu vaare guma tiina

10 Che-wiesii-la cheen kubala Yesu juu Wii-chuole dia a didage niaa Wia wiaa. 11 Di haal kubala he dime. Jin-bon kubala ne kenu a naa uu wiile. U wiile nii a yi jisin fii ari chori. U fa kenu bori ne. U bi wuo tienaa chin. 12 Yesu si na haal-la, u yiru a bul, "Haal, n duoro ne. N nyanyalii-la lii-n le ne." 13 Nii ne u jon u nisaa a dan haal-la le. Haal-la guu tienne u titia a denne Wia. 14 Nii ne Wii-chuole dia-la kuhian na baanin ari Yesu si vaare niaa che-wiesii-la cheen. U bula pi nialin a bul, "Tapulaa balidu ne he dime. U maga di la tin tintinnaa tapulaa deenba pege di ba vaarema, ama che-wiesii-la cheen dee." 15 Nii ne la Tiina Yesu bula piba a bul, "Ma kanfugi tinnaa deenba, ma tuon kubee ne bi neen koo u kakumo puro kaa lii u nyunyua liin che-wiesii-la cheen? 16 Haala deen naa Abiraham doho nuu ne. Sitaani kenu voo bil jisin fii ari chori. U saa bi maga di la laau ta che-wiesii-la cheen koo?" 17 U si bul nii, hiisin ken u dindom-la kala, an ka nialin ku-kaanaa tuon tore ari Yesu si naa wu-kpunkpere-la.

Yesu mage namaga a mu tige ku-doho kubala le baa yire masitad

Mat. 13.31-32; Maak 4.30-32

18 Nii ne Yesu piese nialin a bul, "Bee kun ne mi jan ken Wia kuorii-la kaa magise? Ee ne Wia kuorii-la nage? 19 U nage ku-doho kubala ba kaa yire masitad ne. Baal kubala jonon duu u baga le. U nyu a waa a birime tia. Nii ne diibiisin ku sua ba dellin u naakelee le."

Yesu mage namaga a mu tige si-burun le

Mat. 13.33

20 Nii ne Yesu bira pieseba a bul, "Bee kun ne mi bira jan ken Wia kuorii-la a kaa magise? 21 Wia kuorii-la nage si-burun ba si kaa he munun le, u sii a puore ne. Haala jon munun a he tasi-gbana tuon, a jon si-burun a kaa kuosi. U dieni mua, ka mun-la sii su tasi-gbana-la kala."

Yesu bula pi niaa di ba to boi-la si bi jal

Mat. 7.13-14, 21-23

22 Nii ne Yesu mu Jerusalem diirin. U sii mu nii, u golle ta-balaa ari ta-biisin a didage niaa. 23 Nii ne nuu kubala ku piesu a bul, "La Tiina, nialin Wia si laa ta, ba jan naa niaa muapilii dun-dun koo?" 24 Nii ne Yesu bula pi niaa a bul, "Di ma nii che di ma juu Wia kuorii-la tuon, u maga ari ma to boi-la si bi jal ne. Ma he dolun a to boi-la a juu. Mi jan bula pima, niaa jan yuge a wiwalime di ba to lee-la juu an walima lol. 25 Tapulii kubala dia-la tiina jan sii a ken u boin to. Ka n-na jan he harin a suomo du boro-la a bul, 'La Tiina, ken boi-la suri a pila.' Nii ne u jan bula pima a bul, 'Mi bi lee-la ma si lia jin.' 26 Ma ma jan bula pu a bul, 'La di ma kala ne fa hon di-bala a dii kaaa. N dagela n wiaa la jan ma le.' 27 Nii ne u jan bira bula pima a bul, 'Mi bi lee-la ma si lia jin. Ma suusa lii mi teen. Ma kala naa ni-bonhon ne.' 28 Tapulii kubala ma jan na Abiraham ari Aizik ari Jakob, ari nialin kala sii bul wiaa, Wia Din-zon-la dolun le di ba hon Wia kuorii-la tuon, ka mana jan he jeen harin a na baanin a yiyel an didin ma nyilaa, an bi wuo juu. 29 Niaa jan lii dunia seme-na kala a hon Wia kuorii-la tuon aa gbieli. 30 Ama kuhiasin yuga a jan ku birime hanbiisin. Hanbiisin yuga a ma jan ku birime kuhiasin."

Yesu cho Jerusalem niaa

Mat. 23.37-39

³¹ Bua-la titia le ne Farisii tinjaa donsun ko Yesu teenj a bula pu a bul, "Lii daha, bee wiaa Herod ka che duu kpuŋ ne." ³² Nii ne Yesu bula piba a bul, "Ma mu bula pi nyinyiseri-la, mi janj kiri jin-bonjoo anj vaare niaa jiniŋ ari chie. Chieto mi janj tinj mi tintinjaa dere. ³³ Ari nii kala, u maga di mi ha he mi wonjbiin le jiniŋ ari chie ari chieto kala. U bi wonjbii kene di ba kpu nialin sii bul wiaa, Wia Din-zon-la dolun le lee-kala see Jerusalem le. ³⁴ Ma Jerusalem niaa, ma yie kpu nialin sii bul wiaa, Wia Din-zon-la dolun le, a jonj tabiaa a yage tinjaara-la Wia si tima di ba ko ma teenj. Naansiin yuga ne mi fa cho di mi chu to ma niaa kala, ari jimij si yie chu to u biirin nii, ka ma bi seye. ³⁵ Bee na, Wia janj lej ma janj pima. Ma bira bi janj nami, see bua-la le ma si janj chuolemi a bul, 'Wia janj pe nii-la sii ko la Tiina Wia dolun le.' "

14

Yesu vaare baala sii wiilu

¹ Che-wiesii-la chee kubala, Yesu mu duu dii kudiilee Farisii tinjaa kuhianj kubala dia le. Nii ne niaa faasa bibenu worun. ² Di baal kubala ne he dime a ko Yesu teenj. U yaraa kala fa nmerere ne. ³ Nii ne Yesu piese Wia teninj kerichiba ari Farisii tinjaa a bul, "U kenj wonjbiin nee di la vaare nyanyal tinjaa che-wiesii-la cheenj koo?" ⁴ Ba bi wii-kala bula. Nii ne Yesu kenj baal-la a vaaru anj tau u mu dia. ⁵ Nii ne u bira pieseba a bul, "Di nj bie koo nj neen ne tel vilinj le che-wiesii-la cheenj, ma tuonj kubee ne bi janj lere liisu?" ⁶ Ba bi wii-kala wuo bula pu.

Yesu bula pi niaa di ba kenj ba titia muuri, a kenj zile, a huhuore niaa

⁷ Yesu si benj nialinj ba si yira baa juu dia nii, u na di ba juu chiche ba honj ni-balaa di-honoo. Nii ne u mage namaga a piba a bul, ⁸ "Di nuu ne yirin di nj ko u ha-jaari gbiele a dii

kudiilee, si mu bagisa jonj ni-balaa di-honunj a honj. Dia tiina janj wuo yire nuu ma si kiinj bira duu honj dime. ⁹ Nii-la si yirema janj wuo ku bula pinj a bul, 'Suusa mu, ka di nj donjo tiina honj nj di-honunj.' Nii ne nj janj sii a mu honj ni-biisin di-honunj. Hiisin janj keninj worun. ¹⁰ Nii ne saa di ba ne yirin di nj ku dii kudiilee, di nj ne mua, honj ni-biisin di-honunj. Di nii-la si yirin ne ko nanj, u janj bula pinj a bul, 'Mi nanjdonj, sii honj di-honj-zomunj.' U ne naa nii, u janj pinj jirima nialinj kala si he dime teenj. ¹¹ Nii-la kala sii bigisi u titia le, Wia janj kenu muuri. Ka nii-la ma si kenj u titia muuri, Wia janj naa duu yuge."

¹² Nii ne Yesu bula pi nii-la si yiru duu ku dii kudiilee a bul, "Di nj ne naa kudiilee, si nj nanjdonsunj koo nj naanjbiirinj yiru, si nj dia niaa koo nj donsunj tinjaa si kenj kiaa ma yiru. Ba ma janj wuo yirin maachie di nj ku dii kudiilee ba teenj a tinj nj chiminj. ¹³ Di nj nii yire niaa di ba ku gbieli gbiele a dii kudiilee, yire summoo ari nialinj naasinj koo nisaa si suba ari nyulimaa kala. ¹⁴ Di nj ne naa nii, Wia ma janj penj le, bee wiaa ba-na bi janj wuo tinj nj chiminj. Wia janj tinj nj chiminj tapulii-la tuo-pul tinjaa si janj sii suun le."

Yesu mage namaga a tige baal-la si naa ba gbieli gbiele le

Mat. 22.1-10

¹⁵ Yesu si bul wiinj deenj, nii ne nialinj si honoo dii kialinj donjo bula pi Yesu a bul, "Nialinj si janj dii kiaa Wia kuorii-la tuonj, ba tuonj janj tore."

¹⁶ Nii ne Yesu mage namaga a bul, "Baal kubala ne fa he dime. U naa ba gbieli gbieli-bal. Nii ne u yire niaa yuge di ba ko di ba gbieli. ¹⁷ Gbiele-la si naa siri, u tinj u tintinna duu mu bula pi nialinj u si yira ari ba naa siri ne di ba gbieli gbiele-la. ¹⁸ U si mu yireba, ba kala via. Ni-bunbun si duu yoo бага ne a chiche duu mu na, nii wiaa u bi janj wuo ko.

19 Dɔŋɔ ma si duu ma yoo nɛ-bellin fii nɛ a ma kaa lii duu kaa mu pɛrɛ na. Nii wiaa u ma bi jan wuo kɔ. 20 Dɔŋɔ tiina ma si di lɛɛɛ nɛ u jaa haala. A tinj nii wiaa u ma bi jan wuo kɔ. 21 Nii nɛ tintinni-la miira mu bula pi u kuhian-la. U si nii nii, u baanin sii kinkeŋ. Nii nɛ u bira bula pu a bul, 'Lii mu wonbiiŋ niin lima ari jan tuon wonbii-biisin a yirɛ summoo ari gberikɛɛ ari nyulimaa, ari nialin naasin ari nisaa si suba.' 22 Lima lima di baal-la u si tima lia a yirɛ nialin ba ku juu, ka u juu bula pi u kuhian-la ari nialin kɔ nɛ, ama ba ha bi yugɛ. 23 Nii nɛ baal-la bira bula pi u tintinni-la a bul, 'Bira lii bagisin wonbiee ari wonbii-biisin kala a yirɛ niaa di ba ku juu di mi dia su.' 24 Mi jan bula pima ari nialin mi si yira, ba kuŋ-kala bi jan dii kudiilee deenba."

Wii-la ŋ si jan ŋaa aŋ-na ku ŋaa Yesu haritooro

Mat. 10.37-38

25 Yesu fa sii mu wonbiiŋ nii, ni-dan to u harin. Nii nɛ u daase harin a bula piba a bul, 26 "Di nuu-kala nɛ kɔ mi teen, u bi jan wuo ŋaa mi haritooro, see u berɛ u nyimma ari u naan ari u haala ari u biirin ari u naanbiirin ari u titia wu-ŋaalaa kala. 27 Nii-la kala si bi u titia daagɛɛ baase aŋ to mi harin, u bi maga duu ŋaa mi haritooro. 28 Di ma kuŋ nii che di ŋ saa dii-duduon, ŋ jan laa sipaan hon a biine a na di moribiee maga di ŋ kaa saa dia-la derɛ. 29 Di ŋ nɛ bi nii ŋaa aŋ suomo bil dia-la gentine aŋ bira bi moribiee kenɛ di ŋ saa dia-la derɛ, niaa jan na wii-la ŋ si ŋaa. Ba jan mumomun. 30 Ba jan bul, 'Baala deen suomo duu saa dia nɛ aŋ bi wuo saa derɛ.' "

31 Nii nɛ Yesu bira maga namaga dɔŋɔ a bul, "Kuoro nɛ sie a ken niaa bui fii a kaa mu duu yuo u kuoro dɔŋɔ. Ka kuoru-la ma ken niaa bui mara nɛ. U jan laa sipaan hon a biina na duu nɛ jan wuo yuo dii kuoru-la aŋ-na mu yuou. 32 Di u nɛ bi jan wuo dii kuoru-la, u jan tinj

tinjdaaraa di ba mu chen kuoru-la dɔŋɔ di ba he di-bolii, a len di ba sulu di ba sin." 33 Nii nɛ Yesu bira bula piba a bul, "Nii titia nɛ ma kuŋ-kala bi jan wuo ŋaa mi haritooro, see ŋ via kuŋ-kala ŋ si kenɛ ta.

Yesu bul wiaa a tige yisin le

Mat. 5.13; Maak 9.50

34 Yisin sima, ama di u nɛ sebise, ŋ bira bi jan wuo ŋaa duu sin. 35 Nii bira bi jan wuo jono he бага le duu len di kiaa wase. U bira bi nyuurun kala kenɛ. Ba yie jono yuo ta nɛ. Ma digilaa tinjaa, má wuoli ma digilaa a nii wiaa deenba."

15

Yesu mage namaga a tige piesi-la si lele le

Mat. 18.12-14

1 Tapulii kubala lanpoo lilaaraa ari haache diiree yuga kɔ Yesu teen di ba jegile nii u wiaa. 2 Nii nɛ Farisii tinjaa ari Wia tenin kerichiba suomo gugurime wiaa a bul, "Baala deen leŋe haache diiree kuko u teen nɛ aŋ pɛ len ba di ba kala didii kiaa."

3 Yesu si nii nii, u mage namaga piba a bul, 4 "Baal kubala nɛ he dime a ken piesee zolo. Nii nɛ ba tuon dɔŋɔ lel. U len piesee mahin banese ari fii ari nibi-la ta girin tuon aŋ gollo chiche pie-lelii-la a bul di see duu che nau. 5 U si nau, u jono baase a kaa mu dia. 6 U si kaa mu dia, u yirɛ u nanɔŋsun ari u naanbiirin a bula piba, 'Má len di la kala tuon tore. Mi na mi piesi-la si lele nɛ.' Ma tuon kubɛ nɛ bi jan ŋaa wii-la baal-la si ŋaa?"

7 Yesu dage namaga-la bubuon a bul, "Di haache diire kubala ma nɛ birima lii u haacheba le, nialin si he Wia-jan le, ba tuon jan tore. Ba tuon jan tore nia deen nyun a kii niaa mahin banese ari fii ari nibi-la si ken tuo-pula a biine u bi maga di ba birima lii ba haacheba le.

Haal-la moribiee si lele

⁸ Len la jon ari haal kubala ne he dime a ken selime moribii-biin fii. Di donjo ne lele, ee ne u jan nja? U jan nyige nyinin a tii u dia kala a ben worun see duu nau. ⁹ U si nau, u yire u tanlonson ari u naanbiirin kala a he donjo a bula piba a bul, 'Ma len di la kala tuon tore. Mi moribii-la si lele, mi nau ne.' " ¹⁰ Nii ne Yesu bul, "Mi jan bula pima ari nii titia ne, di haache diire kubala ne birima lii u haacheba le, Wia tinjaaraa tuon yie tore ne."

Yesu mage namaga a tige bile si lele le

¹¹ Yesu bira mage namaga donjo a bul, "Baal kubala ne he dime a ken u hanbiisin balia. Ba fa nja baalaa ne. ¹² Nii ne ba tuon ku-bie sii mu bula pi ba nyimma a bul, 'Mi nyimma, kialin n si jan suu an ka pila, jon mi torun pimi.' Nii ne u ken kialin kaa kpaa. ¹³ U bi diene, ka ba tuon ku-bie sii paa u torun kala u si laa a he donjo le, a sii mu ta-bolii kubala. Dime u ken kialin kala kaa mu nja wu-tonun, ba kala dere. ¹⁴ U si dii kialin kala dere nii, di losun juu tan-la worun. U che kudiilee ka. ¹⁵ Nii ne u mu che tintinjaa. Tan-la nuu sei duu biben u toonun. U ken u titia kaa mu mere nii-la le a didaa u toonu-la. ¹⁶ U sii daa toonu-la, nuu-kala buu kudiilee ka pa. U fa chiche duu dii toonu-la kudiilee. ¹⁷ Nii ne u biine u tuon le a mu yi u nyimma le a bul, 'Mi nyimma ma ken tintinnaa yuge ne. Ba kala nina kudiilee didii an kika, an ka mi-na he daha a susuu losun. ¹⁸ Mi jan sii a miira mu mi nyimma teen. Di mi ne mua, mi jan bula pu, Mi nyimma, mi nja haache ari Wia arin kala. ¹⁹ U bira bi maga di mi nja n bii. Jonmi di mi pe n tintinnaa le di la titin.' Nii ne u sii a kuko u nyimma teen. ²⁰ U si ko u nyimma teen, u fa ha he di-bolii ne, ka u nyimma nau. Nennige kenu worun. U fa mu a guoru. ²¹ Nii ne bile bula pi u nyimma a bul, 'Mi nja haache ari Wia arin kala. U bira bi maga di mi nja n bii.' ²² Ama

u nyimma ha bula pi u tintinnaa a bul, 'Ma mu lima a jon geri-zomon a kaa ko laalu. Ma jon nenii-pirin maa a he u nisin an jon nentanene ma a heu. ²³ Ma mu ken neen-la ma si nere a kaa ku kpu di la kala dii, di la tuon tore. ²⁴ U naga mi bie deen fa suba ne an sisele sii. U fa lele ne, ka la lele nau. Nii ne ba dii kiaa ari tuotonun.'

²⁵ Bua-la le di bile malima he бага le. Nii ne u ko dia. U si ku kpage u dia, u nia di baa du kiaa a gugua. ²⁶ Nii ne u yire u nyimma tintinna-la donjo a piesu a bul, 'Bee ne baa nja nii?' ²⁷ Nii ne u bula pu a bul, 'N njaana ne miira ko. Nii ne n nyimma ken ne-fere a kpu a pu, bee wiaa u miira ko dia ari yarifilaa ne.' ²⁸ Nii ne bile malima-la na baanin kinken. U bi dia jua. U nyimma ku lii a sulu duu ku juu dia. ²⁹ Bile bula pi u nyimma a bul, 'Jisin deenba kala le mi faasa tin tintinjaa worun a pin. Mi ha bi n niin wiaa via che-bala maa. Bee kun ne n saa pimi? N ha bi buu-bie ma kaa pimi di mi kpu la di ma nandonsun gbieli gbiele an chan. ³⁰ Ka n bie deen-na ken n kiaa kala chei ha-chorumun le. Ka u si miira ko dia nii, n kpu ne-fere a pu.' ³¹ Nii ne bile nyimma bula pu a bul, 'Mi bii, n yie he dia le bua-na kala le ne. Kun-kala mi si kene, n ma ne tiu. ³² Ama u maga di la gbieli gbiele a len di la tuon tore ne, bee wiaa u nage n njaana deen fa suba ne an sii. U fa lele ne, ka la lele nau.' "

16

Yesu mage namaga a tige tintinni-la si ken wu-jimin le

¹ Yesu mage namaga donjo a pi u haritooro a bul, "Baal kubala ne fa he dime. U fa nja kiaa tiina ne. U fa ken tintinnu. U ne faa ben u kialin. Nii ne niaa ku bula pi kiaa tiina-la, ari u tintinni-la ken u kialin chichei ne. ² U si nii nii, u mu yiru a piesu, 'Bee na wialin mi sii nii a tigen le. Len di mi jin nialin n si

yalle mi kialiŋ ba yoo. N bira bi jaŋ wuo ŋaa mi tiŋtinu.’³ Nii ne baalla bul u titia le a bul, ‘Mi kuhian ka che duu kirimi ne mi tiŋtiŋŋaa le. Bee ne mi jaŋ ŋaa? Mi bi doluŋ kene di mi pere. Mi bira bi jaŋ wuo gollo susul kiaa ma. Mi jaŋ fifa hiisiŋ.’⁴ Di mi tiŋtiŋŋaa ne cheye, mi jiŋ nii mi si jaŋ ŋaa a wuo keŋ nanɔɔŋsuŋ, a ŋaa di ba keŋmi woruŋ ba diisiŋ le.’⁵ Nii ne u yire nialiŋ kala si dii u kuhian chimin. U yireba kubala kubala ne. Nii ne u yire bunbun nia a piesu, ‘Chimin ŋ si dii mi kuhian teen ŋaa banme ne?’⁶ Nii ne u si di nuuŋ ne u chimu ankuraba zolo. Nii ne tiŋtinni-la jon ten-la si dage chin-la a pu an bul, ‘Ten-la si dage ŋ chimin ne ŋla. N chimin ŋaa ankuraba ari nuuŋ zolo ne. Birima ŋmuŋse ankuraba mahin balia ari fii.’⁷ Nii ne u yire doŋo tiina ma a piesu, ‘Ka ŋ maa?’ U ma si di chimin u si die ŋaa miaa botoba bui ne. Nii ne tiŋtinni-la bula pu a bul, ‘Tenin tuon ba ŋmuŋsa he ari ŋ chimin mage ŋla ne, ama birima ŋmuŋse botob zolo chori.’⁸ Nii ne kiaa tiina-la bese singirin tiina-la le a bul duu ŋaa kukeri an keŋ wu-jimin u si ŋaa wu-bonɔɔŋo nii.” Nii ne Yesu bira bul, “Bee na nialiŋ si cho dunia kiaa kinkeŋ keŋ wu-jimin a pipe doŋo le a kii nialiŋ sii to Wia.”⁹ Nii ne Yesu bira bula pi u haritooro-la a bul, “Mi bulaa pima, ma jon moribiee a kaa dii nanɔɔŋsuŋ. Di moribie-la dere, Wia jaŋ keŋma kaa mu u jaŋ a jon miisi-la si bi dere a pima.

¹⁰ Di ŋ jon kiaa mua a pi nuu duu beŋ, nii ne u beŋ ba nyuŋ woruŋ, u tiina ma jaŋ wuo beŋ kiaa si yuga nyuŋ woruŋ. Di nuu ma ne keŋ kiaa mua an bi ba nyuŋ woruŋ ka beŋ, duu ne keŋ kiaa woruŋ, u biba ma nyuŋ wuo beŋ woruŋ.¹¹ Di ŋ ne bi dunia kiaa wuo beŋ ari wutitii, nuu-kala bi jaŋ wuo jon kialiŋ si faasa keŋ nyuuruŋ a he ŋ nisiŋ le di ŋ biben.¹² Di ŋ ne bi niaa kiaa wuo beŋ ari wutitii, ba jaŋ wuo jon ŋ

titia kiaa pin di ŋ beŋ? Ai.¹³ Yon-bala bi jaŋ wuo tin tiŋtiŋŋaa a pi kuhiasiŋ balia. U jaŋ cho doŋo an bere doŋo. U jaŋ tuto doŋo niin wiaa woruŋ an via doŋo niin wiaa. N ma saa bi jaŋ wuo to Wia an bira cho dunia kiaa maa.”

Yesu bul wiaa a pi Farisii tinŋaa
Mat. 11.12-13; 5.31-32; Maak 10.11-12

¹⁴ Farisii tinŋaa nii wiin deen Yesu si bula. Ba fa cho dunia kiaa kinkeŋ ne. Nii ne tii ba sisieru le.¹⁵ Nii ne Yesu bula piba a bul, “Ma nialiŋ, ma yie che di niaa biine ma keŋ wutitii, ama Wia jin ma tuosaa. Kialiŋ si ŋaa ku-zonɔɔŋo nuhuobiinee teen, ba ne ŋaa ku-lorunon Wia teen.”

¹⁶ Nii ne Yesu bira bul, “Nialiŋ faa to wialiŋ Moosis fa si bile. Ba ma to tenni-la le nialiŋ fa sii bul wiaa, Wia Din-zon-la doluŋ le, fa si ŋmuŋsa a kaa mu bua-la le Jon si ko, nii-la fa sii fo niaa Wii-chuole liin. Jon si ko nii, ba suomo bubul Wia wu-zomola a tige Wia kuorii-la le aa pi niaa. Nii ne nuu-kala fiise siin a wiwalime duu juu Wia kuorii-la tuon.¹⁷ Di wia nyuŋ ari tinteen kala ne fa dere, u fa bi jaŋ hei. U fa bi jaŋ hei ari Moosis niin wialiŋ tuon ku-bie bira si bi bubuon kene.

¹⁸ Baal-na kala si via u haala an bira mu jaa doŋo, u tiina juu Wia haache le ne. Baal-la ma si jaa haala si via u bala, u ma juu Wia haache le ne.”

Yesu mage namaga a tige kiaa tiina ari Lazoros le

¹⁹ Nii ne Yesu bira mage namaga a bul, “Kiaa tiina kubala ne fa he dime. U yie lilaale geri-zomola yalin si heye, a pin sima nyuŋ woruŋ tapulii-na kala.²⁰ Ka summu ma fa he dime. Baa yiru Lazoros. U yaraa kala ŋaa naawiilaa ne.²¹ Vahin yie ko a lilenni u naawiila-la. U yie mu hon kiaa tiina-la boininiin a chiche di kiaa tiina-la si dii kudiile-la an ka, duu ma paa dii.²² Nii ne summo-la sii suu. Wia tinɔɔara ku jonu a kaa

mu Abiraham teenj. U hɔŋ u sɛmɛ Wia-jaŋ lɛ aa nii sima. ²³ Ka kiaa tiina-la ma suu. Ba joŋu hugi. U mu juu Wia nyiniŋ a nina hɛɛŋ woruŋ. Nii nɛ u beɛ mu na Abiraham duu hɔŋ di-bolii, ka Lazɔrɔs ma hɔŋ u sɛmɛ. ²⁴ Nii nɛ u yiru a bul, 'Mi nyimma Abiraham, fámi nennige aŋ tiŋ Lazɔrɔs duu kɛŋ u neniŋ yuu liiŋ a kaa kɔ a fiɛɛ mi nɛndelimiŋ. Mii na hɛɛŋ nɛ woruŋ nyiniŋ deɛŋ tuɔŋ.' ²⁵ Nii nɛ Abiraham bula pu a bul, 'Mi bii, liise mu yi ŋ fa si hɛ ŋ miisiŋ lɛ, ŋ faa nii sima nɛ woruŋ, aŋ ka Lazɔrɔs fa nina hɛɛŋ. Ama lɛɛɛ Lazɔrɔs ma nii sima daha, aŋ ka ŋ ma hɛ hɛɛŋ tuɔŋ. ²⁶ Nii ma dunduŋa dee, buɔtuo-luŋi nɛ piŋ la pɛge. Di nialiŋ si hɛ la teenj nii chɛ di ba lii kiele mu ma teenj, ba bi jaŋ wuo. Nu ma bi jaŋ wuo lii ma teenj a ku kieli a kɔ la teenj.' ²⁷ Nii nɛ kiaa tiina-la bira bula pu a bul, 'Mi nyimma Abiraham, nii nɛ saa mii suluŋ di ŋ tiŋ Lazɔrɔs duu mu mi nyimma dia. ²⁸ Mi kɛŋ naaŋbiiriŋ banɔŋ nɛ dime. Lenj duu kpuriɛ ba digilaa di ba ma sí hɛɛŋ deɛŋ leriŋ kɔ bua-la lɛ ba si jaŋ suu.' ²⁹ Nii nɛ Abiraham bula pu a bul, 'Wialiŋ Moosis ari nialiŋ fa síi bul wiaa, Wia Diŋ-zɔŋ-la doluŋ lɛ fa si ŋmuŋsa, ba hɛ ŋ naaŋbiiriŋ teenj. Lenj di ba jegile nii wialiŋ ba síi bul.' ³⁰ Nii nɛ kiaa tiina-la bira bul, 'Nii ha bi maga, mi nyimma. Ama di nuu nɛ fa sii suuŋ lɛ a mu ba teenj, ba fa jaŋ wuo birima lii ba haacheba lɛ.' ³¹ Nii nɛ Abiraham bira bula pu a bul, 'Di ba nɛ bi jaŋ jegile nii wialiŋ Moosis ari nialiŋ fa síi bul wiaa, Wia Diŋ-zɔŋ-la doluŋ lɛ fa si ŋmuŋsa, ba ma fa bi jaŋ sei wialiŋ di nuu nɛ paala sii suuŋ lɛ a mu ba teenj a dageba.' "

17

*Yesu bul wiaa a tige haache lɛ
Mat. 18.6-7, 21-22; Maak 9.42*

¹ Yesu bula pi u haritooroo a bul, "Wialiŋ si jaŋ ŋaa di niaa juu haache lɛ jaŋ hɛ dime. Ama nii-la si jaŋ

ŋaa di ba juu haache lɛ jaŋ na hɛɛŋ woruŋ. ² U maga di ba joŋ nɔmuŋ nɛ a vɔɔ laale u banŋa lɛ, a joŋu yuo hɛ muga tuɔŋ duu suu. Di ba nɛ ŋaa nii, u nɛ jaŋ kpia u si jaŋ ŋaa di hanbiisiŋ deɛŋba tuɔŋ kubala ŋaa wu-bɔmuŋ. ³ Má pɔ ma titia lɛ. Di ŋ naaŋbie nɛ ŋaa haache, kpiau lɛ. Di u nɛ si duu cheye nɛ, joŋo cheu. ⁴ Di u nɛ ŋaa wii cheiŋ lɛ aŋ ku bula piŋ ari u cheye nɛ, a ŋaa nii a yi naaŋsiŋ bulipe che-bala, joŋo cheu."

Yesu bul wiaa a tige yarida lɛ

⁵ Nii nɛ Yesu naŋzɔɔba-la bula pu a bul, "La Tiina, ŋaa di la yarida yuge kiŋkeŋ." ⁶ Nii nɛ la Tiina Yesu bula piba a bul, "Di ma yarida nɛ fa mage kuŋ biŋ ba sii yire masitad, ma fa jaŋ wuo bula pi tia duu kɛŋ u naakelee kala churi a jila chɔŋse muga lɛ. U fa jaŋ to ma niŋ lɛ a ŋaa nii."

Yesu bul tiŋtinnaa tiŋtimiŋ wiaa

⁷ Nii nɛ Yesu bira bul, "Di ma kuŋ nɛ kɛŋ tiŋtinu u pipere ŋ бага lɛ koo u didaa ŋ piesee, duu nɛ lii бага koo pie-daaliŋ kɔ, ŋ jaŋ bula pu a bul duu ŋaa lima a dii kudiilee koo? ⁸ Ai, ŋ ma jaŋ bula pu duu ŋaa siri a laale u genniŋ a ŋaa kudiilee piŋ di ŋ dii. Di ŋ nɛ dii dɛɛ, u ma jaŋ wuo dii u kudiilee. ⁹ N jaŋ lɔlle ŋ tiŋtinni-la a tiŋ u si ŋaa wialiŋ ŋ si dagu wiaa? Ai. ¹⁰ Ma ma saa nage nii nɛ. Di ma nɛ ŋaa wialiŋ kala ba si si di ma ŋaa, u maga di ma bul, 'La ŋaa tiŋtinnaa nɛ. U bi maga di ba lɔllela. Tiŋtimii-la si maga di la tiŋ dunduŋa nɛ la titiŋ.' "

Yesu vaare gbeŋisiŋ fi

¹¹ Nii nɛ Yesu bira sii mu Jerusalem diiriŋ. U to Samaria tiŋteen ari Galili tiŋteen nɛ a mu. ¹² Nii nɛ u mu juu taŋ kubala, di gbeŋisiŋ fii ku chemu. Ba fa chinj di-bolii nɛ ¹³ aŋ faasa yire a bul, "Yesu, la kuhian, fála nennige." ¹⁴ Nii nɛ Yesu naba a bul, "Má kɛŋ ma titia mu a dage nii-la si kpu pusun pipi

Wia.” Nii ne ba mu. Ba sii mu nii, ba duori. ¹⁵ Ba tuon donjo si na duu duoro, u miire a faasa didenne Wia. ¹⁶ U mu Yesu teen a tuu kpirimi tinteen u naasin le a lolu. Baal-la fa naa Samaria tiina ne. ¹⁷ Nii ne Yesu piesu, “Niaa fii dee mi vaaree? Nii ne nibi-la he? ¹⁸ Bee ne tii nuhura deen dununa ne miira ko duu lolle Wia?” ¹⁹ Nii ne Yesu bula pi baal-la a bul, “Sii a viiri, n yarida ne naa n duori.”

Yesu bul wiaa a tige bua-la le Wia kuorii-la si jan ko

Mat. 24.23-28, 37-41

²⁰ Nii ne Farisii tinnaa piee Yesu di bua bee le ne Wia kuorii-la jan ko? Nii ne u bula piba a bul, “Di Wia kuorii-la ne jan ko, wu-magil dee bi jan naa di niaa jin. ²¹ Nuu-kala ma bi jan wuo bul, ‘Bee na, u he daha koo u he dime.’ Ma bee na, Wia kuorii-la he ma tuon ne.”

²² Nii ne u bula pi u haritooro-la a bul, “Tapulii jan yi di ma cho di ma na mi-na Nuhuobiine Bie tapulaa tuon che-bala dununa maa. Ama ma bi jan wuo nami. ²³ Niaa donsun jan bula pima a bul, ‘Nau, u ne nla, koo, na u ne he daha.’ Di ba ne bul nii, ma si lii gollo chicheu. ²⁴ Mi-na Nuhuobiine Bie si jan miira ko tapulii-la, u jan nage duonun si ligisa a lii wia nyun seme donjo a ku tuu seme donjo. ²⁵ Ama mi jan laa sipaan na heen. Ma leele niaa, ma jan viami. ²⁶ Bua-la le mi-na Nuhuobiine Bie si jan miira ko, u jan nage bua-la le Nowa fa si he u miisin le ne. ²⁷ Bua-la le nialin fa dii kudiilee, haalaa ari baalaa ma jijaa donjo a mu yi tapulii-la Nowa fa si juu liin daboro-la tuon. Liin ku pelle paa nialin donsun kala, ba suu. ²⁸ U ma jan nage bua-la le Lot fa si he u miisin le. Nuu-kala fa he dime a didii kudiilee a yiyalle kiaa a yuyoo kiaa a duduu kiaa a sisaa diisin. ²⁹ Ka tapulii-la Lot si lii tan kubala ba sii yire Sodom le, nyinin ari jiribin lii wia nyun, a ku tuu kpu nialin

donsun kala. ³⁰ Nii ne u jan nage tapulii-la mi-na Nuhuobiine Bie ma si jan miira ko. ³¹ Di nuu ne he u lusun nyun tapulii-la le an ken kiaa u dia tuon, ma si leje duu tuu a juu u dia a paa u kiaa. Nii-la ma si he u бага le, duu ma si miira mu dia. ³² Ma liise yi wii-la si naa Lot haala le. ³³ Nii-la kala sii walime duu laa u miisin, u jan jonjo ta. Nii-la kala ma si jon u miisin ta, u jan laa u miisin. ³⁴ Mi jan bula pima, tapulii-la niaa balia jan pin donjo godo bala nyun titanin, Wia jan jon donjo an len donjo ta. ³⁵ Haalaa balia ma jan nunon munun. Wia jan jon donjo an len donjo ta. ³⁶ Baalaa balia ma jan he бага le a pipere, Wia jan jon donjo an len donjo ta.” ³⁷ Nii ne Yesu haritooro-la piesu a bul, “Nii ne ne nii, la Tiina?” Nii ne Yesu bula piba a bul, “Lee-la ku-pua si pina ne, dunun ma hihilimi.”

18

Yo-haala mu na sariya diire

¹ Nii ne Yesu bira mage namaga piba a dageba di ba chuchuele Wia bua-na kala le a si len. ² U si, di sariya diiru ne fa he dime tan kubala le. U fa bi Wia ka fa. U bi nuhuobiinee ma jirima ka jon. ³ Yo-haal kubala ma ne fa he tan-la le. U yie vene mu sariya diiri-la teen a susulu duu peu le di u wuo dii sariya a lo u dinom. ⁴ Bunbun kala baal-la via duu peu le. Ama u si yie vene ko u teen nii, nii ne baal-la bula pi u titia a bul, “Mi paala bi Wia ka fa, mi bi nuhuobiinee ma jirima ka jon. ⁵ Ama yo-haala deen si vene walimemi nii, mi jan peu le duu dii u sariya. Nii dee u ha jan vene wiwalimemi di mi lol.” ⁶ Nii ne la Tiina Yesu bira bula pi niaa a bul, “Ma jegile nii wialin sariya diiri-la si bi wutitii kene si bula. ⁷ Ma saa biina Wia saa bi jan wuo pe nialin u si liisa le di ba nii laa ku-sinna? Di ba nii yel u teen wiiheye ari titanin kala, u bi jan dieni an peba le. ⁸ Mi jan bula pima, u jan peba le di ba laa

ku-sinḡaa. U jaḡ ḡaa ḡii lima lima. Ama bua-la ɛ mi-na Nuhuobiine Bie si jaḡ miira kɔ, mi jaḡ na nialin si ḡaa mi yarida, koo?”

⁹ Yesu bira mage namaga a pi nialin si biina ba tuɔḡ ɛ di ba keḡ tuɔ-pula aḡ lilieni ba dɔḡsun tinḡaa kala. U bula piba a bul, ¹⁰ “Baalaa balia ne sii mu Wia-dia di ba chuɔɛ Wia. Dɔḡɔ lii nialin ba sii yire Farisii tinḡaa tuɔḡ ne. Dɔḡɔ-la ma ḡaa lanḡoo lilaaru ne. ¹¹ Farisii tiina-la sii chin a chuɔɛ Wia ḡla u tuɔḡ ɛ a bul, ‘La Tiina Wia, mii lollun ari mi si bi niaa dɔḡsun naga, nialin si gollɔ keḡ niaa kiaa lilaa, koo nialin si bi wutitii kenɛ, koo nialin si gollɔ che niaa haalaa. Mi bi lanḡoo lilaara deen ma si he daha naga. ¹² Mi yie vɔɔ niin bulia ne yɔbɔ-na kala ɛ. Ku-la kala mi si na, mi yie kaa kpaa leree fii ne a jon dɔḡɔ pin.’ ¹³ Ka lanḡoo lilaari-la chin di-bolii. U paala bi u siaa ma kaa wul wia nyun aḡ paa u nisaa chun u nyun ɛ aḡ bul, ‘Wia, fámi nisusun. Mi ḡaa haache diiru ne.’ ” ¹⁴ Nii ne Yesu bira bul, “Mi jaḡ bula pima ari Wia jon lanḡoo lilaari-la haacheba cheu, u mu dia. Ama u bi ḡii ḡaa Farisii tiina-la ɛ. Nii-la kala sii bigisi u titia ɛ, Wia jaḡ kenu muuri. Ama nii-la si keḡ u titia muuri, Wia jaḡ ḡaa duu yuge.”

Yesu chuɔɛ Wia duu pe hanḡiisin ɛ
Mat. 19.13-15; Maak 10.13-16

¹⁵ Niaa dɔḡsun keḡ ba hanḡiisin ma kɔ Yesu teen duu jon u nisin danba ɛ di Wia peba ɛ. Yesu haritooro naba a kpiaba ɛ. ¹⁶ Ba si kɔ ḡii, u bula pi u haritooro-la a bul, “Má leḡ di hanḡiisi-la kɔ mi teen. Ma síba kiru. Nialin si jaḡ juu Wia kuorii-la tuɔḡ nage hanḡiisin deenba ne.” ¹⁷ U bira bula pi niaa a bul, “Wutitii, mi bulaa pima, nii-la kala si bi Wia to a nage hanḡie si yie to u nyimma ari u naan ḡii, u bi jaḡ wuo juu Wia kuorii-la tuɔḡ.”

Kiaa tiina kɔ Yesu teen

Mat. 19.16-30; Maak 10.17-31

¹⁸ Nii ne Juu tinḡaa kuhian kubala kɔ Yesu teen a piesu, “Mi kuhiazomun, ɛɛ ne mi jaḡ ḡaa a keḡ miisila si bi dere?” ¹⁹ Nii ne Yesu piesu a bul, “Bee ne tii ḡ yiremi kuhiazomun? Nuukala bi zɔḡ see Wia. ²⁰ N jin wialin ba si ḡmunsa bil di ma tuto neɛ? Ba ne ḡla: Sí ḡ dɔḡɔ tiina haala che. Sí niaa kpu. Sí gaa. Di ḡ ḡaa danḡia wii ɛ, sí wiaa nyia, fifá ḡ nyimma ari ḡ naan.” ²¹ Nii ne baal-la bul, “Mi to wiaa deenba kala mi hanḡiirin ɛ.” ²² U si bul ḡii, Yesu bula pu a bul, “Wu-bala ne ka ḡ ha jaḡ ḡaa. Jon ḡ kiaa kala a yalle, a jon moribie-la a pi summoo, aḡ ku tomi. N ne ḡaa ḡii, ḡ jaḡ keḡ kiaa Wia-jaḡ ɛ.” ²³ Baal-la si nii wiin deen, u tuɔḡ kala chei, bee wiaa u fa keḡ kiaa ne worun. ²⁴ Yesu si na di u tuɔḡ cheye, u bul, “U ḡaa wu-duo ne ari nialin si keḡ kiaa si jaḡ wuo juu Wia kuorii-la tuɔḡ. ²⁵ U bi hei ari buntanḡa si jaḡ wuo to geri-hemin buɔḡ lii ari u si heyɛ ḡii nii-la si keḡ kiaa si jaḡ wuo juu Wia kuorii-la tuɔḡ.”

²⁶ Nialin si nii Yesu si bul ḡii, ba piesu a bul, “Kubee ne saa Wia jaḡ laa ta?” ²⁷ Nii ne Yesu bula piba a bul, “Wii-la si jaḡ kperi nuhuobiine, u bi Wia wuo kperi. Wia wuo wiikala ḡaa ne.” ²⁸ Nii ne Piita bula pu a bul, “Bee na, la leḡ la diisin ne aḡ tuto ḡ hariḡ.” ²⁹ Nii ne Yesu bula piba a bul, “Wutitii ne mi bulaa pima, nii-la kala si jaḡ wuo leḡ u dia ari u haala koo u naanḡiirin koo u nyimma ari u naan koo u biirin a tin Wia kuorii-la wiaa, ³⁰ u jaḡ bira na kiaa yuge a kii kialin u si leḡ ta. Di u ne ku suu, u ma jaḡ na miisi-la si bi dere.”

Yesu bira bul u suun wiaa pi u haritooro

Mat. 20.17-19; Maak 10.32-34

³¹ Nii ne Yesu keḡ u haritooro fii ari balia-la a kaa suusa lii a bula piba, “Má jegile nii mi teen. Laa mu Jerusalem ne. Dime wialin nialin si bula, Wia Din-zɔḡ-la dolun ɛ a tige

mi-na Nuhuobiine Bie le a nmuŋsa bil, ba jaŋ ŋaa deɛ. ³² Ba jaŋ joŋmi he nialin si bi Juu tinŋaa ŋaa nisin le di ba moŋmi. Ba jaŋ tuusemi aŋ pe tu nanjuɔruŋ hemi le. ³³ Ba jaŋ viiremi aŋ pe kpumi, ka di mi sii suuŋ le tapulaa batori cheeŋ.” ³⁴ Ama Yesu haritooro-la bi wii-la u si bula bubuɔŋ jin. (Wii-la u fa si bula bubuɔŋ fa faa ne.)

Yesu vaare sullu-la si nyulima
Mat. 20.29-34; Maak 10.46-52

³⁵ Nii ne Yesu ari u haritooroo sii di ba mu Jerusalem. Ba mu kpage taŋ kubala baa yire Jeriko, di nyuluŋ kubala fa hoŋ woŋbiin niin a susul kiaa. [³⁶ U si nii ni-dan-la sii bal domo, u piese, “Bee kuŋ ne?”] ³⁷ Nii ne ba bula pu ari Yesu si lii Nazaret nii bal. ³⁸ Nii ne u yire Yesu a bul, “Yesu, Devit nihiliere, fãmi nennige.” ³⁹ Nialin si laa u sipaan kpiau le duu keŋ goŋ. Ama u faasa yire a kii nii a bul, “Yesu, Devit nihiliere, fãmi nennige.” ⁴⁰ Nii ne Yesu chin aŋ bul di ba keŋ nyuluŋ-la kaa ko u teen. Nyuluŋ-la ko. ⁴¹ Nii ne Yesu piesu a bul, “Bee kuŋ ne ŋ che di mi ŋaa pin?” U bula pu a bul, “Mi kuhian, leŋ di mi siaa suri di mi nina.” ⁴² Nii ne Yesu bula pu, “Ŋ siaa jaŋ suri, ŋ yarida ne ŋaa ŋ duori.” ⁴³ U siaa guu suri. Nii ne u to Yesu harin a didenne Wia. Ni-dan-la ma kala si na nii, ba ma kala denne Wia.

19

Zakias

¹ Yesu mu to taŋ kubala baa yire Jeriko. ² Di baal kubala ne fa he dime. U fa ŋaa lanpoo lilaaraa kuhian ne. U yirin ne fa Zakias. U fa keŋ kiaa ne woruŋ. ³ U faa che duu na Yesu, ama u fa ŋaa ni-kuu ne. A tin ni-dan-la fa si he dime nii, u fa buu wuo na. ⁴ Nii ne u kieli ni-dan-la, a fa mu jil tia, duu wuo na Yesu. U jima duu jaŋ ku to tia-la bubuɔŋ bal. ⁵ Yesu si ku to tia-la bubuɔŋ bibal, u wula beŋ tia-la nyuŋ a nau a bula pi Zakias a bul,

“Zakias, ku tuu lima. U maga di mi chua ŋ dia le ne jinin.” ⁶ Zakias si nii nii, u tuon tore. U tuu lima lima a keŋ Yesu mu u dia. ⁷ Nialin kala si he dime a na nii, ba suomo gugurime wiaa a bul, “Baala deen mu duu chua haache diiri-la dia le ne.” ⁸ Yesu si he Zakias dia le nii, Zakias sii chin a bula pi la Tiina Yesu a bul, “Mi kuhian, jegile nii mi teen. Mi jaŋ joŋ mi kiaa lebi a pi summoo. Di mi ne girime nuu maa, mi jaŋ tin u tiina ari moribiee naansiin bunese.” ⁹ Nii ne Yesu bula pu a bul, “Wia laaŋ di ŋ dia niaa kala ta ne jinin. Baala deen ma ŋaa Abiraham doho nuu ne, ¹⁰ bee wiaa mi-na Nuhuobiine Bie ko di mi che a laa nialin si lele ne a ta.”

Yesu mage namaga a tige moribin le

Mat. 25.14-30

¹¹ Nii ne Yesu mage namaga a pi nialin si nii wialin u si bula. Bua deen le u ka mua ka duu yi Jerusalem. Nii ne tii nialin biine ari bua-la le Wia kuorii-la si jaŋ ko kpaga ne. ¹² Nii ne u bul, “Ni-bal kubala ne sie a mu ta-bolii kubala di ba bil u kuoruŋ, ka di u miira ko u jaŋ a ŋaa kuoro. ¹³ Ka duu-na mu, u yire u dia tintinnaa fii, a joŋ siidi bui a pi kuŋ-kala, a bul di ba kaa bibirime duu mu aŋ ko. ¹⁴ Ama u taŋ-la niaa bere ni-bal-la ne. Nii ne ba tin tindaaraa ba kiri u harin mu a bula pi taŋ-la dono kuoro ari ba bi cho duu ŋaa ba taŋ kuoro. ¹⁵ Ka baal-la mu dii kuoruŋ aŋ miira ko. U si miira ko, u yire u tintinna-la u fa si joŋ moribii-la pa duu na ba si na nyuuruŋ mage nii. ¹⁶ Nii ne tintinni-bunbun ko u teen a bula pi u kuhian a bul, ‘Mi kuhian, ŋ siidi bui-la ŋ si joŋo pimi birime siidi bui fii ne.’ ¹⁷ Nii ne u kuhian-la bula pu a bul, ‘Ŋ ŋaa woruŋ. Ŋ ŋaa tintinnitii ne. Ŋ si ŋaa nii a beŋ kubii-bie nyuŋ woruŋ, mi jaŋ leŋ di ŋ biben tasin fii.’ ¹⁸ Nii ne tintinni-liamin ma ko u teen a bul, ‘Mi kuhian, ŋ siidi bui-la ŋ si joŋo pimi, u birime siidi

bui banonj ne.' ¹⁹ Nii ne u kuhian-la bula pu duu jan bibenj tasinj banonj. ²⁰ Nii ne tintinni donj-la ma ko a bula pu a bul, 'Mi kuhian, na nj siidi bui-la nj si jonjo pimi, mi jonjo gul gerikosunj le ne a jonjo faa. ²¹ Mii fanj ne. Njaa ni-tere ne. Njie kenj niaa kiaa lilaa ne anj yie kukunj kialinj nj si bi duo.' ²² Nii ne u kuhian-la bula pu a bul, 'Njaa tintinni-bonj ne. Wialinj titia nj si bula ne janj dii nj sariya a jonj cheerinj pinj. Nj jima ari mi njaa ni-tere ne a kenj niaa kiaa lilaa anj pe kukunj kialinj mi si bi duo. ²³ Bee ne saa tii nj bi mi moribiinj jonjo bil lee-la ba sii bil moribiee? Mi fa si miira ko njla, mi fa janj laa moribie-la ari mi nyuurii kala.' ²⁴ Nii ne u bula pi u tintinni donsu-la fa si chinj dime a bul, 'Ma laa siidi bui-la u teenj a jonjo pi nii-la si kenj siidi bui fii-la.' ²⁵ Nii ne ba bula pu a bul, 'La Tiina, bee na, u paala kenj siidi bui fii ne, anj ka nj che di nj jonj siidi bui-la a pe pu nii.' ²⁶ Nii ne u bula piba a bul, 'Nii-la si paala kenj kiaa yuge ne, Wia janj wasa che a pe a pu, ama nii-la si bi faasa kenj kiaa yuge, muapiliila ma u si kene, Wia janj kaa laa u teenj. ²⁷ Mi dinjonjonj deenba saa si bi cho di mi njaa ba kuoro, ma kenjba kaa ko daha di mi njaa ba kpuba mi sipaanj.' "

Yesu juu Jerusalem

Mat. 21.1-11; Maak 11.1-11; Joonj 12.12-19

²⁸ Yesu si bul wiaa deenba dere, u jonj u wonjiinj a laa u haritooro sipaanj ba mumu Jerusalem. ²⁹ Ba ku yi Betifagi ari Betani diirinj a ku yi peel kubala baa yire Oliv. Nii ne Yesu liise u haritooro balia a tinjba a bula piba a bul, ³⁰ "Ma mu tanj-la si he sipaanj. Di ma ne mua, ma janj na kaku-bie di ba vobo a kii. Nu ha buu jila. Ma mu puri a kaa ko. ³¹ Di ma nii puru, di ba piesema a bul di bee ne tii maa puri, ma bul di la Tiina Yesu nii che, duu ne si di ma puro kaa ko." ³² Nii ne ba mu a na wialinj kala Yesu fa si bula

piba. ³³ Ba sii puri kaku-bie-la, u tiina pieseba a bul, "Bee ne tii maa puri kaku-bie-la?" ³⁴ Nii ne ba bula pu a bul, "La Tiina nii che." ³⁵ Nii ne ba kenj kaku-bie-la a kaa mu pi Yesu, a wuri ba genninj a danj kaku-bie-la nyunj, anj kenj Yesu u jila honj. ³⁶ U si jil kaku-bie-la aa venj nii, ba jonj ba genninj jere wonjiinj le. ³⁷ U si mu kpage Jerusalem, lee-la wonjiinj si lii Oliv peel-la nyunj tuu, ni-danj-la fa si to Yesu harinj suumo juuose a faasa didenne Wia a tinj u wu-magila-la kala ba si na. ³⁸ Ba bula, "Wia janj pe kuoro-la sii ko la Tiina Wia dolunj le. Ba janj honj ari yarifielaa Wia-janj le. Wia yirinj ma janj yire." ³⁹ Nii ne Farisii tinjaa donsunj fa si he ndanj-la tuonj bula pi Yesu a bul, "La kuhian, njaa di nj haritooro-la kenj gonj." ⁴⁰ Nii ne Yesu bula piba a bul, "Mi janj bula pima, di ba ne fa bi gonj maa njaa, tabiaa ma titia janj njaa gonj."

Yesu yel Jerusalem wiaa

⁴¹ Yesu sii mu nii, u ku kpage Jerusalem a na tanj-la. U yel a tinj tanj-la niaa wiaa anj bul, ⁴² "Mi fa cho di ma tanj niaa deenba jinj nii ma si janj njaa a honj ari yarifielaa ne jininj, ama ma bi wuo na. ⁴³ Tapulii janj yi di ma dinjonjonj saa jebiinj gollima, di ma si wuo lii. ⁴⁴ Ba janj kpu ma nialinj kala si he tanj-la tuonj, ma di ma biirinj kala. Tabii-bie ma bira bi janj danj u donjo le lee-la. Ma bi seye bua-la le Wia si ko duu laama ta. Nii ne tii ba janj njaa nii."

Yesu juu Wia-dia

Mat. 21.12-17; Maak 11.15-19; Joonj 2.13-22

⁴⁵ Yesu si mu juu Wia-dia, u suumo kikiri nialinj sii yalle kiaa dime ⁴⁶ anj bula piba a bul, "Ba njmunse Wia teninj tuonj a bul ari Wia si, u dia janj njaa lee-la niaa si janj chuchuele Wia, anj ka ma miira kaa birime gaardia."

⁴⁷ Tapulii-na kala Yesu yie dage niaa Wia-dia-la tuonj. Nii ne nialinj si kpu pusunj pipi Wia kuhiasinj ari

Wia teniŋ kerichiba ari Juu tiŋŋaa kuhiasinŋ chiche di ba kpuu. ⁴⁸ Ama ba bi jinŋ wonbii-la ba si jaŋ to, bæe wiaa nialinŋ kala fa si he dime jegile ninii wialinŋ u sii bul ne ari siifiesinŋ.

20

Farisii tiŋŋaa piɛsɛ Yesu u dolunŋ wiaa

Mat. 21.23-27; Maak 11.27-33

¹ Tapulii kubala Yesu didage niaa Wia-dia le aŋ pe bubul Wia wuzomɔ-la wiaa. Nii ne nialinŋ si kpu pusunŋ pipi Wia kuhiasinŋ ari Wia teniŋ kerichiba ari Juu tiŋŋaa kuhiasinŋ sii ko u teenŋ. ² Ba piesu a bul, “Dol bæe ne ŋ keŋ a ŋŋaa wiaa deenba? Kubæe ne pinŋ dolunŋ ŋ ŋŋaa nii?” ³ Nii ne Yesu bula piba a bul, “Mi ma jaŋ piesema wii. Má dagemi. ⁴ Joonŋ, nii-la fa sii fo niaa Wii-chuoɓe liinŋ, u dolunŋ, u lii Wia teenŋ nee koo nuhuobiine teenŋ nee?” ⁵ Nii ne ba suomo keŋ wii-la lilere doŋɔ le aa bul, “Wu-bæe ne laa che di la bul? Di la ne bula pu a bul di Wia teenŋ ne u lii, u jaŋ piesela a bul, ‘Bæe ne saa tii ma bi wialinŋ u si bula laa dii?’ ⁶ Di la ne bira si nuhuobiine teenŋ ne, ni-danŋ-la kala si hilimi daha, ba jaŋ yageɓa ari tabiaa, bæe wiaa ba seye ari Joonŋ fa ŋaa nii-la sii bul wiaa, Wia Diŋ-zonŋ-la dolunŋ le ne.” ⁷ Nii ne ba bula pu a bul, “La bi jinŋ u dol-la si lii lee-la.” ⁸ Yesu ma bula piba a bul, “Tɔɔ, mi ma bi jaŋ dagema dol-la mi si keŋe bubuonŋ.”

Yesu mage namaga a tige tiŋtinnaa si he бага le

Mat. 21.33-46; Maak 12.1-12

⁹ Nii ne Yesu mage namaga a pi nialinŋ si he dime a bul, “Baal kubala ne fa he dime a bil бага a chonŋse kiaa si keŋ nenɛɛ yuge a nage chichuenŋ. Ba yirinŋ ne gireps. Nii ne u paa niaa he бага-la le di ba bibenŋ, aŋ sii mu tiŋtee doŋ a dieni dime. ¹⁰ Kialinŋ neninŋ si yie, u tinŋ u tiŋtinnaa doŋɔ duu mu tiŋtinna-la teenŋ a laa tii-nenɛ-la doŋsunŋ kaa ko. U mu ba keŋu a ŋmobu aŋ kiru, u

miira keŋ na-hillinŋ a kaa mu бага tiina teenŋ. ¹¹ Nii ne u bira tinŋ u tiŋtinna-la doŋɔ maa. U ma bira mu. Nialinŋ ŋmobu maa aŋ hiisu aŋ bira kiru maa, u miire ari na-hillinŋ. ¹² Nii ne u bira tinŋ ni-tori. Nialinŋ piru maa aŋ kiru ta. ¹³ Nii ne бага-la tiina bul, ‘Wu-bæe ne mi jaŋ ŋaa? Mi jaŋ tinŋ mi bii-choolunŋ. N bi pɔɔ, ba jaŋ zilu.’ Nii ne u tinŋ bile u mu. ¹⁴ Tiŋtinna-la si nau duu ko, nii ne ba bula pi doŋɔ a bul, ‘Baga-la tiina bie ne nii. Di бага-la tiina ne suba, bie deenŋ ne jaŋ dii u kiaa. Má lenŋ di la kpuu, ka di бага-la ŋaa la kunŋ.’ ¹⁵ Ba keŋu kaa lii бага-la tuonŋ a kpuu.” Nii ne Yesu piɛsɛ nialinŋ a bul, “Eɛ ne бага-la tiina jaŋ ŋaa? ¹⁶ U jaŋ ko a kpu tiŋtinna-la kala aŋ jonŋ бага-la a pi ni-tania.”

Nialinŋ si nii wialinŋ Yesu si bula, ba si di Wia bi jaŋ sei di ba ŋaa nii. ¹⁷ Nii ne Yesu benba aŋ piɛsɛba a bul, “Ba ŋmunŋse Wia teniŋ tuonŋ ari tiebii-la dii-saaraa si via ta, u ne jaŋ ku ŋaa tiebii-duonŋ ba si jonŋ bil dia gentine. Wiinŋ deenŋ bubuonŋ ne saa ŋaa bæe? ¹⁸ Nii-la kala si tel tiebii-la nyunŋ, u tiina jaŋ yere muno muno. Di tiebii-la ma ne tel nuu-kala nyunŋ, u jaŋ yere u tiina muno muno.”

Yesu bul lanpoo timinŋ wiaa

Mat. 22.15-22; Maak 12.13-17

¹⁹ Nii ne Wia teniŋ kerichiba ari nialinŋ si kpu pusunŋ pipi Wia kuhiasinŋ walime di ba keŋ Yesu naabuasu-la le, bæe wiaa ba jima ari u mage namaga-la a tigeɓa le ne. Ama baa fá nialinŋ si he dime ne. ²⁰ Nii ne ba bee chiche wonbii-la ba si jaŋ to a keŋu. Ba kpal niaa a ŋaa di ba fugi ari ba ŋaa ni-titiiba ne. Ba jonŋ moribiee piba di ba mu a magise Yesu a piesu wiaa a na duu ne bul wii chei, di ba wuo to nii le a keŋu a kaa mu he ba kuori-balinŋ nisinŋ le, duu ŋaau nii kala u si cho. ²¹ Nii ne nialinŋ ba si he, ba mu Yesu teenŋ, a piesu a bul, “La kuhianŋ, la jima wialinŋ kala ŋ sii bul aŋ didage maa, ba ŋaa wutitiiba ne. La jima ari

η jor̄ niaa kala ba ηaa kubala ne, ηη dage Wia wonbii-titii ne. ²² U ηaa wonbii ne di la tin̄ lanpoo a pi Rom tin̄teen kuori-balin̄ ba s̄ii yire Siiza koo? Dagela.” ²³ Ama Yesu jin̄ ba bubuon̄. Nii ne u pieseba a bul, ²⁴ “Má ken̄ moribii-biin̄ kaa ko mi bee na. Kubee nyun̄ ne he dime? Kubee yirin̄ ma ne ba tuuro he moribie-la le?” Nii ne ba si, “Siiza yirin̄ ne.” ²⁵ Nii ne Yesu bul, “Too, má jor̄ Rom tin̄teen kuori-balla kiaa a pu, an̄ jor̄ Wia ma kiaa pu.” ²⁶ U si bul ηii, ba bi wii-kala na ba si jan̄ wuo to ηii le kenu nialin̄ si he dime sipaan̄. Wialin̄ u si bula ηaaba wu-kpun̄kpere, ba niin̄ kala maa.

Yesu bul wiaa a tige nialin̄ si sii suun̄ le

Mat. 22.23-33; Maak 12.18-27

²⁷ Nii ne Sadusii tin̄ηaa don̄sun̄ ma ko Yesu teen̄. Niaa deen̄ba laa dii ari nialin̄ si suba bira bi jan̄ sii suun̄ le. Nii ne ba piesu a bul, ²⁸ “La kuhian̄, Moosis dagela Wia tenin̄ tuon̄ ari baal ne jaa haala, di haal-la ari baal-la ne bi bii lula, an̄ ka di baal-la suu, duu ηaana jaa yo-haal-la a lul biirin̄ pi u malima si suba, di biiri-la chin̄ u nyun̄ le. ²⁹ Naan̄biirin̄ balipe ne fa he dime bua kubala le. Ba kuhian̄ jaa haala. Ba di haal-la bi bii lula, an̄ ka u suu. ³⁰ Liamin̄ tiina jor̄ haal-la jaa. Ba duu ma bi bii lula, an̄ ka u ma suu. ³¹ Torimun̄ tiina ma jor̄ haal-la jaa. U ma ηii titia ne. Nii ne naan̄biiri-la balipe kala jaa haal-la. Ba kala suu an̄ bi bii lula. ³² U ηii harin̄ haal-la ma suu. ³³ Tapulii-la niaa si jan̄ sii suun̄ le, baalaa deen̄ba balipe tuon̄ kubee ne jan̄ tii haal-la? Ba kala balipe ne jaau.”

³⁴ Nii ne Yesu bula piba a bul, “Baala-la ari haala-la si he ba miisin̄ le leele, ba n̄ii jaa don̄o. ³⁵ Ama bua-la le baala-la ari haala-la si jan̄ sii suun̄ le a ken̄ miisi-la si bi dere, ba bira bi jan̄ jaa don̄o. ³⁶ Ba jan̄ nage Wia tin̄daaraa a bira bi jan̄ suu. Wia si chiseba suun̄ le ηii, ba jan̄ ηaa Wia biirin̄. ³⁷ Moosis fa paala chaasa

dage ari ba jan̄ chise nialin̄ si suba suun̄ le di ba wei. U fa bul Wia tenin̄ seme don̄o ari la Tiina Wia ne ηaa Abiraham Wia ari Aizik Wia ari Jekob ma Wia. Lee-la u fa si bul wiaa a tige tii-bie-la s̄ii dii nyinin̄ le ne, u fa bul ηii. ³⁸ U si bul ηii daga ari u ηaa ni-weyee Wia ne. U bi jan̄ wuo ηaa nialin̄ si suba Wia.” ³⁹ Nii ne Wia tenin̄ kerichiba don̄sun̄ bula pu a bul, “La kuhian̄, η bul worun̄ ne.” ⁴⁰ Ba bira bi nyu-duon̄ kene di ba piese Yesu wii-kala.

Ba piese Kirisito, nii-la Wia si liisa, wiaa

Mat. 22.41-46; Maak 12.35-37

⁴¹ Nii ne Yesu pieseba, “Ee ne ba jan̄ wuo bul ari Kirisito, nii-la Wia si liisa, jan̄ ηaa Devit nihiliere dun̄duña? ⁴² Devit titia bula Wia tenin̄ seme don̄o ba s̄ii yire Saams a bul,

‘Mi Tiina Wia bula pi mi Tiina, duu hon̄ u seme, ni-duon̄ di-honun̄,

⁴³ see duu yuo dii u din̄don̄ηoo kala dere.’

⁴⁴ Devit titia yire nia deen̄ u Tiina. Ee ne saa u jan̄ wuo ηaa Devit nihiliere dun̄duña?”

Yesu bul Wia tenin̄ kerichiba wiaa

Mat. 23.1-36; Maak 12.38-40

⁴⁵ Nii ne Yesu bula pi u haritooroo nialin̄ kala sipaan̄ a bul, ⁴⁶ “Má ken̄ ma titia worun̄ Wia tenin̄ kerichiba le. Ba yie gugolle yobo le ari ba geriduduosun̄, a cho di niaa jujon̄ba jirima a chuchuoeba. Ba yie chiche di-hon̄-zon̄ηoo Wii-chuo le diisin̄ le. Di ba ne yireba di ba ku dii kiaa, ba cho di ba hon̄ ni-balaa di-hon̄oo maa. ⁴⁷ Ba yie fugo chuole Wia didieni a ken̄ yo-haalaa kiaa kaa laa didii. Bua-la le Wia si jan̄ dii ba sariya, ba ne jan̄ na heen̄ a kii ba don̄sun̄ tin̄ηaa kala.”

21

Yo-haalaa jor̄ kiaa pi Wia
Maak 12.41-44

¹ Bua kubala Yesu he Wia-dia le a na nialin si ken kiaa si jon ba moribiee bil a pipi Wia. ² Nii ne u bira na yo-haal ma si jon amiisinba balia a ma he. ³ Nii ne u bula pi nialin a bul, "Wutitii ne mi bulaa pima, yo-haala deen moribii-bie-la u si jon he, u ne kii nialin moribie-la kala. ⁴ Nialin kala si jon moribiee a pi Wia, ba liisa an ka ne. An ka u-na jon u summu moribiin kala a he, ku-la kala u si kene ne nii."

*Yesu bul nii Wia-dia si jan tel
Mat. 24.1-2; Maak 13.1-2*

⁵ Nii ne Yesu haritooro dongsun bul wiaa a tige Wia-dia-la le a bul duu zom, di u tiebie-la ba si kaa saau ma zom, a bira bul nii niaa si jon ku-zonjon a pi Wia ba kaa wase dia-la, ba kala ne naa dia-la zon nii. ⁶ Nii ne Yesu bul, "Bua kubala jan yi, ba jan nmoo kiaa deenba kala ma sii na a lo. Ba bi jan len di tiebii-bala ma dan u donjon le."

*Yesu bul nii ba si jan dogise nialin
sii tou*

Mat. 24.3-14; Maak 13.3-13

⁷ Nii ne ba piase Yesu a bul, "La kuhian, bua bee le ne wiaa deenba jan naa? Bee kiaa ne la jan na, ka di wiaa deenba-na naa?" ⁸ Nii ne Yesu bula piba a bul, "Ma ken ma titia worun di nuu-kala sima nyisu," a bira bul, "Niaa jan yuge a ko a jon mi yirin he ari ba ne naa Kirisito, a bul di bua-la dunia si jan dere kpaga ne. Ama ma si ba harin to. ⁹ Ma jan nii ari laalin ari yuosun he daha a he di-boloo maa. Di ma ne ku nii nii, ma si lede di ma boisin jon. Wiaa deenba kala jan naa bal, ama u nii saa bi naga ari dunia diderin yie ne."

¹⁰ Nii ne Yesu bira bul, "Tinteen donjon niaa jan sii a mu yuo tinteen donjon niaa. Tan kuoro ari u niaa jan sii giri a mu yuo kuoro donjon ari u niaa. ¹¹ Tinteen jan zigili worun, losun ma jan juu, nyanyalaa jan juu niaa leree yuge, wu-bal-lorunun ari wu-magilaa kala jan naa wia nyun. ¹² Ka di wiaa deenba kala-na naa,

ba jan kesema a to naasin dogisema. Ba jan jonma he niaa nisin le di ba dii ma sariya Wii-chuole diisin le a kenma to dia. Ba jan kenma kaa mu kuoro ari ni-balaa sipaan a tin mi wiaa. ¹³ Bua deen le ne ma jan wuo na wonbiin a bul Wia wu-zom-la. ¹⁴ Ma ken ma titia he donjon le a si lede duu walimema nii ma si jan bul wiaa a laa ma titia, ¹⁵ bee wiaa mi jan jon wu-jimin a he ma nyun le di ma bul wialin ma dinjonjon si bi jan wuo kaa lere ari wutitii dee. ¹⁶ Ma nyimmaba ari ma naanbiirin ari ma doho niaa ari ma nanjonsun paala jan jonma he ma dinjonjon nisin le. Ba jan kpu ma dongsun. ¹⁷ Nuukala jan berema a tin mi wiaa. ¹⁸ Ama ma kun nyu-pun ma bi jan lel. ¹⁹ Di ma ne nyalima, ma jan laa ma miisin."

*Yesu bul ari ba jan nmoo
Jerusalem lo*

Mat. 24.15-21; Maak 13.14-19

²⁰ Nii ne Yesu bira bul, "Di ma ne na di laali-yuoro golli Jerusalem, ma jan jin ari tan-la jan tel lele. ²¹ Nii-na ma len di nialin si he Judiya le fa mu jil peelee nyun. Nialin ma si he tan-la tuon, u maga di ba lii tan-la tuon. Nialin ma si he ba bagisin le, ma si miira juu tan-la tuon. ²² Tapulii-la Wia jan dogise Iziral niaa, a len di wialin kala ba si bula Wia tenin tuon sene ku bal. ²³ Haala-la si ken luoro ari haala-la si ken bii-mullun baa wase yilin, tapulia-la le ba jan na heen. Tintee-la kala jan na heen worun. Wia jan na baanin tinteen deen niaa nyun a dogiseba. ²⁴ Ba jan kpu dongsun ari tokobiee, an kese dongsun di ba ma naa yosun tintee-dongsun le, ka nialin si bi juu tinnaa naa yigi Jerusalem tan-la kala lo, see bua-la yie di Wia piba wonbiin di ba len."

*Yesu bula pi niaa duu jan miira ko
Mat. 24.29-31; Maak 13.24-27*

²⁵ Nii ne Yesu bira bul, "Niaa jan na wu-magilaa wii-posun ari chene ari chenwulaa le. Dunia kala le, niaa

bi jaŋ jin wii-la kala le ba si he. Di mugi-balaa nii huuru, fawulluŋ jaŋ keŋba. ²⁶ Fawulluŋ jaŋ keŋ niaa di ba yeŋŋi a tin ba sii yiele wii-la si jaŋ ŋaa dunia kala le. Ba jaŋ kiri wia nyuŋ kialin kala si keŋ doluŋ di ba lii ba leree. ²⁷ Nii le ne ma jaŋ na mi-na Nuhuobiine Bie di mi to duoŋbilingbaaniŋ tuoŋ kuu tuu. Mi jaŋ keŋ doluŋ a chaane kinkeŋ. ²⁸ Di wiaa deenba suomo a ŋiŋaa, má sii chin a keŋ ma digilaa wuoli, bee wiaa bua-la le Wia si jaŋ laama ta yie ne.”

Yesu bul tutogo wiaa

Mat. 24.32-35; Maak 13.28-31

²⁹ Nii ne Yesu mage namaga piba a bul, “Má bee na tutogo ari tiisin doŋsuŋ. ³⁰ Di ma ne na tiisin di ba suomo tutose, ma jima yibiiniŋ jua ne. ³¹ Nii titia ne, di ma ne na wiaa deenba kala mi sii dagema di baa ŋaa, ma jin ari Wia kuorii-la kpaga ne. ³² Wutitii ne, mi bulaa pima, ma leele niaa deenba si he ma miisin le, ma bi jaŋ suu, ka wiaa deenba ŋaa bal. ³³ Wia nyuŋ ari tinteen kala jaŋ dere, ama wialin mi si bula bi jaŋ lel.

³⁴ Má keŋ ma titia, a sí wu-fuoloo ŋiŋaa, a sí siniŋ nyua bubugi. Ma sí leŋe di dunia kiaa wiaa walimema. Di wiaa deenba nii walimema, tapulii-la mi-na Nuhuobiine Bie si jaŋ ko, u jaŋ guu ku di-ma le a nage ba si he beré, kiaa vene mu juu-u le aŋ bi jin nii. ³⁵ Tapulii-la jaŋ keŋ dunia nuu-kala lee-kala le. ³⁶ Má po a chuchuele Wia bua-na kala le. Di ma ne ŋaa nii, ma jaŋ keŋ doluŋ a lii wialin kala si jaŋ ŋaa le ari yarifielaa a wuo chin mi-na Nuhuobiine Bie sipaan.”

³⁷ Yesu fa yie he Wia-dia le wiiheye ari chichuoŋ kala a didage niaa. Di didaaniŋ ne yie-na kala, u yie mu Oliv pel-la nyuŋ ne a pin. ³⁸ Siipuura-na kala saa niaa yie mu Wia-dia di ba jegile nii wialin u sii bul.

22

Ba vuura di ba kpu Yesu

Mat. 26.1-5; Maak 14.1-2; Joŋ 11.45-53

¹ Tapulaa deenba, diisin kieliŋ gbiele-la kpaga ne, gbiele-la le ba si yie dii boroboro-la si bi si-buruŋ kene. ² Nii ne nialiŋ si kpu pusun pipi Wia kuhiasin ari Wia tenin kerichiba wiwalime di ba na woŋbii-la ba si jaŋ to a kpu Yesu di nialiŋ bi jin, bee wiaa baa fá nialiŋ ne.

Judas seye duu joŋ Yesu yalle

Mat. 26.14-16; Maak 14.10-11; Joŋ 11.45-53

³ Nii ne Sitaani ku juu baal kubala. U fa ŋaa Yesu haritooroo fii ari biala-la doŋo ne. U yiriŋ ne Judas. Baa yiru Isikarot ma ne. ⁴ Nii ne Judas sii mu bula pi nialiŋ si kpu pusun pipi Wia kuhiasin ari Wia-dia kuhiasin nii u si jaŋ to a keŋ Yesu yalla piba. ⁵ Ba tuoŋ tore. Ba sei ari ba jaŋ pu moribiee. ⁶ Nii ne Judas sei, a suomo chiche woŋbii-la u si jaŋ to a keŋ Yesu yalla piba di nialiŋ bi jin.

Yesu ari u haritooroo dii diisin kieliŋ gbiele kudiilee

Mat. 26.17-25; Maak 14.12-21; Joŋ 13.21-30

⁷ Nii ne gbiele-la le ba si yie dii boroboro-la si bi si-buruŋ kene yi, bua-la le u si maga di ba kpu pie-bie-la ba si jaŋ kaa ŋaa gbiele-la kudiilee. ⁸ Nii ne Yesu tin Piita ari Joŋ a bul di ba mu ŋaa ba diisin kieliŋ gbiele kudiilee di ba dii. ⁹ Nii ne ba piesu a bul, “Nii ne ŋŋ che di la ŋaa kudiile-la?” ¹⁰ U bula piba a bul, “Bee na, di ma ne juu taŋ tuoŋ, ma jaŋ cheŋ baal kubala duu kori loŋ ari liiŋ. Má to u hariŋ juu dia-la u sii juu. ¹¹ Di ma ne mua, má bula pi dia-la tiina a bul, ‘La kuhian si la piesin di nii le ne nuhuraa dia he, di ba di u haritooroo juu hono dii diisin kieliŋ gbiele-la kudiilee?’ ¹² U jaŋ dagema dii-bal kubala. U ŋaa lusun nyuŋ dia ne. Ba wasu kala. Lee-la ne ma jaŋ ŋaa kudiile-la.” ¹³ Nii ne ba mu a na wialin kala u si bula piba ari

ba jaŋ na, a ŋaa diisiin kieliŋ gbiele kudiile-la ba dii.

Kudiile-la la si jaŋ dii a liliisi Yesu wiaa

Mat. 26.26-30; Maak 14.22-26; 1 Kor. 11.23-25

¹⁴ Bua-la si yie di ba dii kudiile-la, Yesu ari u nanzɔɔba kala hɔŋ di ba dii kiaa. ¹⁵ Nii ne Yesu bula piba a bul, “Mi fa paala cho di la di ma dii kiaa deenba, aŋ ka di mi-na na heeŋ. ¹⁶ Mi jaŋ bula pima ari mi bira bi jaŋ kɔ di mi dii kudiilee deenba, see bua-la ɛ Wia kuorii-la si jaŋ kɔ. Nii ɛ ne la jaŋ jin kudiile-la la si die bubuɔŋ.” ¹⁷ Nii ne u joŋ nyunyuala ari siniŋ a lolle Wia aŋ joŋo pi u nanzɔɔba-la a bul, “Má laa nyunyuala deen ari siniŋ a kaa kpaa ma titia. ¹⁸ Mi bulaa pima, mi bira bi jaŋ kɔ di mi nyua siniŋ deen, see bua-la ɛ Wia kuorii-la si jaŋ kɔ.”

¹⁹ Nii ne Yesu bira joŋ boroboro a lolle Wia aŋ kaa chɔge chɔge, a joŋo piba aŋ bul, “Mi yaraa ne nii. [Mi joŋo pi Wia a tin ma wiaa, má laa dii. Má ŋaa nii a liliisi mi wiaa.” Nii ne ba dii. ²⁰ Ba si dii kialin dere, u bira joŋ nyunyuala ari siŋ-la a piba aŋ bul, “Nyunyuala ari siniŋ deen ŋaa nii-falii ne Wia ta. Mi chalin si jaŋ jaase ma wiaa ne tii Wia ta nii-la.] ²¹ Má bee na, nii-la si jaŋ keŋmi yalle he la tuɔŋ ne, la kala didii kiaa. ²² Mi-na Nuhuobiine Bie, mi jaŋ suu ari Wia si dage nii, ama nii-la si jaŋ joŋmi yalle, u jaŋ na heeŋ yuge.” ²³ Nii ne Yesu nanzɔɔba-la suomo pipiese dɔŋo ari ba tuɔŋ kubee ne jaŋ ŋaa nii?

Yesu haritooroo keŋ ba tuɔŋ kuhian wiaa kaa lilere

²⁴ Nii ne Yesu haritooroo keŋ ba tuɔŋ kuhian wiaa kaa lilere. ²⁵ Yesu bula piba a bul, “Nialin si bi Juu tinŋaa ŋaa keŋ ba dolun kaa hɔŋ ba niaa nyun ne. Kuoroo dɔŋsun sii beŋ niaa, ba cho di nialin ba sii beŋ keŋba kaa yiyire ni-zɔmɔ. ²⁶ Ama u bi maga di ma ŋinŋaa nii. U maga di ma tuɔŋ kuhian ne birime

hanbie, di ma sipaa-laara ma tin tinŋinŋaa pipima. ²⁷ Nu ne hɔnɔ, aŋ ka u dɔŋo ŋaa kudiilee pupu u didii. Ba di nii-la si ŋaa kudiile-la pupu, ba tuɔŋ kubee ne yuga? Nii-la si hɔnɔ, ka ba ŋaa kudiilee pupu, u ne yuga. Ama mi-na he ma tuɔŋ a tin tinŋinŋaa pipima.

²⁸ Mi si he ma teenŋ nii, mi na heeŋ worun. Aŋ ka ma chin mi seme aŋ bimi via ta. ²⁹ Mi Nyimma pimi dolun ne di mi ŋaa kuori-balin. Nii titia ne mi ma jaŋ pima dolun di ma ŋaa kuori-balaa. ³⁰ La di ma kala jaŋ dii kudiilee Wia kuorii-la tuɔŋ. Ma jaŋ hɔŋ kuori-kpasinniŋ nyun a dii Iziral tinŋaa ta-gentisi-la fii ari balia-la sariya.”

Yesu bula pi Piita ari u jaŋ bul duu buu jin

Mat. 26.31-35; Maak 14.27-31; Joŋ 13.36-38

³¹ Nii ne Yesu bula pi Saamɔŋ Piita a bul, “Saamɔŋ, Sitaani laa wonbiin ne duu magise ma kala, duu pore nizɔŋɔɔ ni-bɔŋɔɔ ɛ, ari paara si yie chaare mii-jorun ta, aŋ ka mii-biin nii. ³² Ama mi chuɔle Wia pi ŋ-na Saamɔŋ ne di ŋ yarida sí lel. Di ŋ ne miira kɔ mi teen, pe ŋ naanbiirin ma ɛ di ba chin ba yarida naan le worun.” ³³ Nii ne Piita bula pu a bul, “Mi Tiina, mi sí to ŋ harin nii, di ba ne tɔŋ dia maa, mi paala ŋaa siri ne di ba keŋmi ma tɔ. Di ba kpun maa, mi ma ŋaa siri ne di mi suu.” ³⁴ Nii ne Yesu bula pi Piita a bul, “Piita, ji-bele bi jaŋ yel, aŋ ka di ŋ bul naansiin butori ari ŋ bimi jin.”

Yesu bula pi u haritooro-la moribiee ari tokobiee wiaa

³⁵ Nii ne Yesu piase u haritooroo a bul, “Bua-la ɛ mi si tinma, ma lii aŋ bi moribiee koo sulli-gbanŋin ma koro, a bi nenŋenŋee tun bulia bulia ma koro. Ma si mu nii, ma che kun ne kaa?” Ba bul di ba bi kun-kala che ka. ³⁶ Nii ne Yesu bula piba a bul, “Ama leele ma ku-la kala si keŋ moribiee koo sulli-gbaŋa, u maga duu joŋ. Ma ku-la ma kala si bi

tokobii kene, u maga duu jon u geribalin yalle ne a yoo donjo. ³⁷ Nii ne ba nmunse Wia tenin tuon. Ba bula ari ba jan kenu pe wu-bon njinaaraa le. Wiaa deenba ba nmunsa a tigemi le ne. Ba kala jan naami le ne, bee wiaa wialin kala ba si nmunsa a tigemi le, ba kala jan sene naa a dere.” ³⁸ Nii ne u haritooro bula pu a bul, “La Tiina, bee na, tokobiee balia ne nla.” Nii ne Yesu bula piba a bul, “Ma leŋ di wii-la kala bal.”

Yesu chuole Wia pel-la nyun ba sii yire Oliv

Mat. 26.36-46; Maak 14.32-42

³⁹ Nii ne Yesu lii Jerusalem le a jil peel-la nyun ba sii yire Oliv, ari u si venee naa nii. Nii ne u haritooro to u harin mu. ⁴⁰ Ba si yi lee-la, u bula piba a bul, “Ma chuole Wia, di Sitaani si wuo nyisema.” ⁴¹ U si bul nii dere, u kieli u haritooro-la a mu sipaan muapilii, a tuu kpirimi duu chuole Wia. ⁴² U chuole Wia a bul, “Mi Nyimma, di n tuotorun le ne, liise hee-la sii komi le. Ama mi-na tuotorun le dee n-na tuotorun le ne.” [⁴³ Nii ne Wia tinpara kubala lii wia nyun a ku tuu u teen a pu dolun. ⁴⁴ U tuon faasa chei kinken kinken. Nii ne u faasa chuole Wia ari siifesi. U suolun paala nage chalin a tutuu tinteen.] ⁴⁵ U si chuole Wia dere, u sii a miira mu u haritooro teen, di ba pin don, bee wiaa ba tuon cheye ne worun. ⁴⁶ Nii ne u pieseba, “Ma sene pin nee? Ma sii chuole Wia, di Sitaani si wuo nyisema.”

Ba ken Yesu

Mat. 26.47-56; Maak 14.43-50; Joon 18.3-11

⁴⁷ Yesu ha sii bul wiaa nii, di ndan ko. Yesu haritooro-la fii ari balia-la donjo ne kenba kaa ko lee-la. U yirin ne Judas. Ba si ko, Judas mu Yesu teen a guoru. ⁴⁸ Nii ne Yesu bul, “Judas, n sene guorimi nla ne di n jon mi-na Nuhuobiine Bie yalle?” ⁴⁹ Yesu haritooro-la fa si he dime a na wii-la sii naa, nii ne ba piese Yesu

a bul, “La Tiina, n che di la ken la tokobie-la taba nee?” ⁵⁰ Nii ne Yesu haritooro donjo jon tokobii, a ta nialin donjo na-diin digilin kiesee. Baal-la fa naa nii-la si kpu pusun pipi Wia kuhian yomo ne. ⁵¹ Nii ne Yesu bul di u maga ne, di ba len. U si bul nii, u digi baal-la digilin le a naa u fiele. ⁵² Nii ne Yesu piese nialin si kpu pusun pipi Wia kuhiasin ari Wia-dia kuhiasin ari ba tan kuhiasila si ko di ba kenu, a bul, “Mi naa gaaru nee? Ma sii kori tokobiee ari tanguloo a kuko di ma kenmii?” ⁵³ La di ma kala ne fa he Wia-dia le tapulii-na kala, an ka ma bi walima di ma kenmi dime. Ama bua deen le ne birimin tiina Sitaani pima dolun ma wuo ko di ma kenmi.”

Piita si u bi Yesu jin

Mat. 26.57-58, 69-75; Maak 14.53-54, 66-72; Joon 18.12-18, 25-27

⁵⁴ Nii ne ba ken Yesu. Ba kenu kaa mu nii-la si kpu pusun pipi Wia kuhian dia, ka Piita daa tuto ba harin. ⁵⁵ Di ba he nyinin kaala tuon. Ba si jua, Piita mu pe nialin sii wieni nyin-la le. ⁵⁶ Toli-bie kubala ma he dime. U fa naa dia-la tintinnu ne. U na Piita duu hono aa wieni nyinin. U bul, “Baala deen ma faa to Yesu harin ne.” ⁵⁷ Nii ne Piita si, “Haal, mi paala buu jin.” ⁵⁸ Muapilii di baal kubala ma nau a bul, “N ma naa ba donjo ne.” Nii ne Piita bira bul duu dee. ⁵⁹ U bi diene bira di baal don ma ne nii a pese ari Piita naa Yesu haritooro donjo ne, bee wiaa u ma naa Galilii tiina ne. ⁶⁰ Nii ne Piita bira bula pu a bul, “Baal, mi paala bi wii-la n sii bul jin.” Piita sii bul nii, u bi bula dere di ji-bele yele. ⁶¹ Nii ne la Tiina Yesu daase a ben Piita. U liisi wii-la Yesu fa si bula pu ari u jan bul naansiin butori ari u bi u-na Yesu jin, ka di ji-bele-na yel. ⁶² Nii ne Piita lii a faasa yel.

Ba sieri Yesu le an nmobu

Mat. 26.67-68; Maak 14.65

⁶³ Nii ne nialin si po Yesu sieri le an nmobu. ⁶⁴ Ba woo u siaa to a

nmobu an piestu duu dage nii-la si nmobu. ⁶⁵ Ba bul wiaa ma yuge a tuusu.

Ba ken Yesu ko nialin si yie hilime vuvuure wiaa sipaan

Mat. 26.59-66; Maak 14.55-64; Jooj 18.19-24

⁶⁶ Tan si pula, Juu tinjaa tan kuhiasin ari nialin si kpu pusun pipi Wia kuhiasin ari Wia tenin kerichiba, ba hilimi a len ba ken Yesu ko ba sipaan, lee-la ba si yie hilime vuvuure wiaa. ⁶⁷ Nii ne ba piestu a bul, "Dagela, n ne njaa nii-la Wia si liisaa?" Nii ne Yesu bula piba a bul, "Di mi ne bula pima maa, ma bi jan laa dii. ⁶⁸ Di mi ne saa bira piesema wii maa, ma bi jan bul wii-kala, ⁶⁹ ama a lii leele a kaa mu mina Nuhuobiine Bie jan honj Wii-balin seme, ni-duonj di-honunj." ⁷⁰ Nii ne ba kala piestu a bul, "N ne saa njaa Wia Bie koo?" Nii ne Yesu bula piba a bul, "Ma bul worun ne, mi ne sene njaa Wia Bie." ⁷¹ Nii ne nialin bul, "La bira bi siada tiina kala ka che. La titia nia wii-la u si bula ne."

23

Ba ken Yesu kaa mu Paalit sipaan

Mat. 27.1-2, 11-14; Maak 15.1-5; Jooj 18.28-38

¹ Nii ne niaa deenba kala sii, a ken Yesu a kaa mu Paalit teenj. ² Dime ne ba suomo a bul wialin u si njaa chei a bul, "La ken baala deen duu nyise la niaa di ba via la wonbii-la la sii to, an bul di ba si lanpoo ma time pi Rom tinteenj kuori-balin. U bira bula a tige u titia le di u ne njaa Kirisito, nii-la Wia si liisa, a bul duu njaa kuoro ma." ³ Nii ne Paalit piestu a bul, "N ne njaa Juu tinjaa kuoro koo?" Yesu bula pu a bul, "Oo, mi ne." ⁴ Nii ne Paalit bula pi nialin si kpu pusun pipi Wia kuhiasin ari nidan-la kala si hilime a bul, "Mi bi wii-la na baala deen si njaa chei a mage di ba kpuu." ⁵ Nii ne nialin sii bul Yesu teenj ha pese a bul, "U dage niaa a njaa ba njjaa taawei ne. U suomi nii Galilii le ne, a sii ko Judiya

tinteenj, a golle lee-la kala aa dageba, a njaa ba njjaa taawei an leele ko Jerusalem ma njla."

Ba ken Yesu mu Herod teenj

⁶ Paalit si nii ari Yesu lii Galilii ne, u pieste nialin sii bul Yesu teenj a bul, "Baala deen njaa Galilii tiina nee?" Nii ne ba bula pu di kuoro Herod ne faa benj tintee-la Yesu si lia. ⁷ Paalit si nii nii, u njaa ba kenu kaa mu Herod teenj. Bua-la le di Herod he Jerusalem le. ⁸ Herod tuonj kala tore u si na Yesu, bee wiaa u nii u wiaa faafaa kala ne a yie chiche duu nau. U faa che di Yesu njaa wu-kpunkpere ne duu na. ⁹ Nii ne Herod pieste Yesu wiaa yuge, ama u bi wii bula. ¹⁰ Nialin si kpu pusun pipi Wia kuhiasin ari Wia tenin kerichiba-la sii tuora mu Yesu le a faasa bul u teenj worun. ¹¹ Herod ari u laali-yuoroo sieri Yesu le a dogisu, an len ba jonj geri-balin ku-zonj kubala laalu, an miira kenu mu Paalit teenj. ¹² Herod ari Paalit faa yuo donjo ne. A lii tapulii-la ne, ba sinj a dii nandonsunj.

Ba si di ba ken Yesu mu kpu

Mat. 27.15-26; Maak 15.6-15; Jooj 18.39-19.16

¹³ Nii ne Paalit yire nialin si kpu pusun pipi Wia kuhiasin ari Juu tinjaa kuhiasin ari niaa donsunj a bula piba a bul, ¹⁴ "Ma ken baala deen kaa ko mi teenj a bula pimi ari u njaa di niaa via wonbii-la la sii to ne. Mi saa piestu ma kala sipaan. Wialin ma sii bul u teenj a bul duu cheye, mi bi ba tuonj kubala ma na duu njaa chei. ¹⁵ Herod ma si bi na u si njaa wii-la chei, nii ne tii u len ba bira kenu kaa ko daha. Ma bee na, baala deen bi wii-kala njaa chei a mage di ba kpuu. ¹⁶ Mi jan len di ba viiru an jonjo ta." [¹⁷ Ama diisinj kielin gbiele-la ne yie-na kala, ba yie len Paalit liise dansarikaba tuonj kubala ne a ta, nii-la Juu tinjaa si cho di ba liisa.]

¹⁸ Nii ne nialin kala kpia gonj a bul di ba kpu Yesu an liise Barabas

piba. ¹⁹ Bua kubala le, niaa sii n̄aa taaweɪ ne ba ta-baliŋ le. Barabas kpu nuu, n̄ii ne tii ba kenu mu tɔ dia. ²⁰ Paalit si cho duu jon̄ Yesu ta, n̄ii ne u bira suomo bul wiaa pi ni-dan̄-la. ²¹ Ama ba faasa kpia gon̄ a bul, “Má kpaasu daa-geɛɛ nyuŋ, má kpaasu daa-geɛɛ nyuŋ!” ²² N̄ii ne Paalit piɛɛba naan̄siin̄ butorimuŋ a bul, “Bɛɛ ne tii? Bɛɛ kuŋ ne baala deen̄ n̄aa chei, ka mi-na bi na? Mi-na bi na u si n̄aa wii-la chei a mage di ba kpuu. Mi jan̄ len̄ di ba viiru an̄ jon̄u ta.” ²³ Ka ba ha peɛ, a faasa kpia gon̄ a bul, “U maga di ba ken̄ Yesu a kpaase daa-geɛɛ nyuŋ ne.” Ba sí n̄aa gon̄ n̄ii, Paalit ku sei ba kua ²⁴ a bul di ba ken̄ Yesu kpaase daa-geɛɛ nyuŋ, ari nialiŋ fa si sul n̄ii. ²⁵ N̄ii ne Paalit liise nii-la ba fa si cho a ta, nii-la ba fa si kaa tɔ dia a tin̄ u si n̄aa taaweɪ a kpu niaa le. U jon̄ Yesu a he ba nisin̄ le di ba n̄aa wii-la ba si cho.

Ba ken̄ Yesu kpaase daa-geɛɛ nyuŋ

Mat. 27.32-44; Maak 15.21-32; Jɔɔŋ 19.17-27

²⁶ N̄ii ne ba ken̄ Yesu kaa lii di ba kaa mu kpaase daa-geɛɛ nyuŋ. Ba sí mu n̄ii, ba chen̄ baal kubala baa yire Saamon̄ a lii Sariini, duu lii baga a juuu Jerusalem. Ba kenu a jon̄ daa-geɛɛ-la baasu a n̄aa u kaa tuto Yesu hariŋ. ²⁷ Ni-dan̄-la ma to u hariŋ. Ba tuon̄ haalaa yuga a yiyel Yesu wiaa. ²⁸ N̄ii ne Yesu miira daaseba an̄ bula piba a bul, “Jerusalem haalaa, ma sí mi wiaa yel. Má yel ma titia ari ma biirin̄ wiaa. ²⁹ Bee na tapulaa ka kɔ ne, niaa jan̄ bul, ‘Ha-piraa ari haala-la si bi biirin̄ lula di ba diɛɛ, ba tuon̄ jan̄ tɔɔɔ.’” ³⁰ Bua-la le ne niaa jan̄ bul di peelee tele tɔba, di dundollun̄ ma jere tɔba. ³¹ Mi si nage tii-weyiŋ, an̄ ka ba dɔgisemi n̄la, ɛɛ ne ba jan̄ n̄aama ma le, ma ma si nage tii-hilia le?”

³² Ba si ken̄ Yesu mu n̄ii, ba ken̄ ni-bon̄n̄ɔɔ balia ma kaa mu di ba kpuba a pe Yesu le. ³³ N̄ii ne ba mu yi

lee kubala baa yire nyu-kun̄kogulo. Ba si yi lee-la, ba jon̄ Yesu ari ni-bom̄o-la balia a kpaaseba daa-geɛɛ nyuŋ. Dɔn̄ɔ he daa-geɛɛ nyuŋ si he Yesu na-diin̄, dɔn̄ɔ ma he daa-geɛɛ nyuŋ si he u na-gua. ³⁴ N̄ii ne Yesu chuɔle Wia a bul, “Mi Nyimma, jon̄ wii-la ba si n̄aa a cheba, bɛɛ wiaa ba bi jin̄ wii-la kala ba sí n̄aa.” N̄ii ne ba tɔn̄ɛ Yesu genniŋ wiaa di ba kpaas, a jin̄ geri-la nuu-kala si jan̄ laa. ³⁵ Niaa dɔn̄suŋ ma chin̄ dime a biben̄, an̄ ka Juu tin̄n̄aa kuhiasin̄ sisieru le a bul, “Duu ne n̄aa Kirisito, nii-la Wia si liisa, má len̄ duu laa u titia ta yeii. U wuo laa niaa tita ne.” ³⁶ Laali-yuoroo ma sieru le a n̄aa sinin̄ si nyala kaa mu pu duu nyua ³⁷ an̄ bula pu duu ne n̄aa Juu tin̄n̄aa kuoro, duu laa u titia ta. ³⁸ Ba ma n̄muŋsa mere u daa-geɛɛ-la le a bul, “Juu tin̄n̄aa kuoro ne n̄la.”

³⁹ N̄ii ne ni-bom̄o-la dɔn̄ɔ ma si sage daa-geɛɛ nyuŋ tuuse Yesu a bul, “N̄ ne n̄aa nii-la Wia si liisa koo? Saa laa n̄ titia ta an̄ pe laala ma ta.” ⁴⁰ N̄ii ne ni-bom̄o-la dɔn̄-la kpiau le a bula pu a bul, “N̄ bi Wia ka fáa? La duu kala ne juu wu-bala. ⁴¹ U maga di ba n̄aala-na n̄ii ne, bɛɛ wiaa la n̄aa wu-bon̄ ne, an̄ ka u-na bi wii-kala n̄aa chei.” ⁴² N̄ii ne an̄ ka u bula pi Yesu a bul, “Yesu, di n̄ ne dii kuoron̄, liisi mi ma wiaa.” ⁴³ N̄ii ne Yesu bula pu a bul, “Wutitii ne mi bulaa pin̄, la din̄ kala jan̄ he Wia-jan̄ jin̄in̄.”

Yesu suba

Mat. 27.45-56; Maak 15.33-41; Jɔɔŋ 19.28-30

⁴⁴ Wia si ku mage nyu-gbaŋa, lerin̄ kala biri lim a mu yi didaanin̄, ka lerin̄ bira pulle. ⁴⁵ Patiisa ne fa he Wia-dia tuon̄. Ba kaa kere. U kies balia. ⁴⁶ N̄ii ne ka Yesu faasa yire a bul, “Mi Nyimma, mi jon̄ mi titia a he n̄ nisin̄ le.” U bul n̄ii ne an̄ wiesi u wiesi kati an̄ suu. ⁴⁷ N̄ii ne di laali-yuoroo zɔlɔ kuhian̄ kubala fa chin̄ dime. U na wii-la si n̄aa, a denne Wia a bul, “Wutitii, baala

deen fa n̄aa tuo-pul tiina n̄e, u bi wii-kala cheye.”⁴⁸ Nialin̄ kala fa si hilime dime di ba na wii-la si jan̄ n̄aa an̄ l̄eēle na wii-la si n̄aa, ba paa ba nisaa chun̄ ba nyun̄ l̄e a miira mu dia.⁴⁹ Nialin̄ kala fa si jin̄ Yesu, ari haala-la kala fa s̄ii to u harin̄ a lii Galilii k̄o, ba chin̄ di-bolii a na wiaa deen̄ba kala.

Ba hugi Yesi

Mat. 27.57-61; Maak 15.42-47; J̄ōn̄ 19.38-42

⁵⁰⁻⁵¹ Baal kubala ma n̄e fa h̄e dime. U yirin̄ n̄e Josef. U fa n̄aa juu tiina n̄e a lii Arimatiya. U fa n̄aa nialin̄ si yie hilimi a vuvuure wiaa d̄ōn̄o n̄e. U fa n̄aa tuo-pul tiina n̄e. Niaa ma jujon̄u jirima. U ma fa gber̄e Wia kuorii-la n̄e duu k̄o. Ba fa s̄ii vuure di ba kpu Yesu a s̄ene n̄aa nii a kpuu, u fa bi s̄eye.⁵² Nii n̄e u sii mu Paalit teen̄ a sul Yesu ku-suun̄. Paalit len̄ u mu sori.⁵³ U sori Yesu nii, a jon̄ geripula a beu, a jon̄u hugi. U k̄enu kaa mu hugi bun̄ ba si l̄oso l̄e n̄e. Ba ha bi nuu-kala hugo dime.⁵⁴ Tapulii-la di ba n̄aa siri didaanin̄ a gber̄e ba che-wiesii-la.⁵⁵ Haala-la fa si to Yesu harin̄ a lii Galilii k̄o, ba to Josef harin̄ a mu na bun̄-la, a na nii u si hugi Yesu.⁵⁶ Nii n̄e ba miira mu dia a che tulaali di ba kaa mu tise Yesu. Che-wiesii-la ch̄een̄ ba s̄ii a wiesi. Wialin̄ Moosis fa si n̄mun̄sa bil di niaa tuto bul nii n̄e.

24

Yesu sii suun̄ l̄e

Mat. 28.1-10; Maak 16.1-8; J̄ōn̄ 20.1-10

¹ Lahadi ch̄een̄ siipuuraa, haala-la sii a ken̄ tulaalii-la a kaa mu bua-la lerin̄. ² Ba si yi lee-la, ba na di tabii-la ba fa si kaa to bua-la niin̄ suro. ³ Nii n̄e ba juu bua-la tuon̄, ama ba bi la Tiina Yesu ku-suun̄ na. ⁴ Ba chin̄ dime a bi jin̄ wii-la kala ba si jan̄ n̄aa. Ba n̄aa di ba ben̄, di baalaa balia n̄e chin̄ ba s̄eme nii. Ba gennin̄ faasa tutul. ⁵ Fawullun̄ ken̄ haala-la. Ba ken̄ ba nyusun̄ gure. Nii n̄e

baala-la pieseba a bul, “B̄ee n̄e tii ma chiche nii-la si weye ni-suunun̄ tuon̄?”⁶ U tuo daha. U sie n̄e. Má liise mu yi wii-la u fa si bula pima l̄e, bua-la l̄e u fa si h̄e Galilii l̄e. ⁷ U fa bula pima ari ba jan̄ jon̄ u-na Nuhuobiine Bie a h̄e haache diiree nisin̄ l̄e di ba kpaasu m̄ere daa-ḡes̄ee nyun̄ duu suu, an̄ ka duu sii suun̄ l̄e tapulaa batori ch̄een̄.”⁸ Nii n̄e haala-la liise yi wii-la u fa si bula piba. ⁹ Ba miira lii bua-la lerin̄ a mu bula pi Yesu haritooro fii ari kubala-la, ari nialin̄ d̄on̄sun̄ fa s̄ii to u harin̄ wialin̄ kala si n̄aa. ¹⁰ Haala-la si mu bua-la lerin̄ n̄e n̄la: M̄eri Magidalin̄, Juana ari Jeems naan̄ M̄eri. Ba di haalaa d̄on̄sun̄ n̄e bul wiaa deen̄ba si n̄aa a pi Yesu nan̄z̄ooba-la. ¹¹ Ama Yesu nan̄z̄ooba-la fa biina ari wii-la haala-la si bula n̄aa wu-nyiarin̄ n̄e. Ba bi laa dii. [¹² Ama Piita sii a fá mu bua-la lerin̄, a mu juu bua-la, a ben̄ a na genni-la ba fa si jon̄o b̄e Yesu di ba pina, an̄ ka u bi kun̄-kala na. Nii n̄e u miira mu dia a ken̄ wii-la si n̄aa a bibiine. U kperu.]

Niaa balia fa s̄ii to Yesu harin̄ mu tan̄ kubala baa yire Emeyas

Maak 16.12-13

¹³ Tapulii-la titia n̄e niaa balia fa s̄ii to Yesu harin̄ mumu tan̄ kubala baa yire Emeyas. Emeyas ari Jerusalem yi ari meel-daasin̄ balipe n̄e. ¹⁴ Ba s̄ii mu tan̄-la nii, ba bula pipi d̄ōn̄o wialin̄ kala si n̄aa. ¹⁵ Ba s̄ii bul wialin̄ nii a vuvuure, nii n̄e Yesu titia ku yiba ba kala viven̄. ¹⁶ Ba nau, ama ba bi wuo jin̄ ari u n̄e. ¹⁷ Nii n̄e Yesu pieseba a bul, “Wu-b̄ee n̄e maa bul nii won̄biin̄ l̄e?” Nii n̄e ba chin̄, ba tuon̄ kala chei. ¹⁸ Ba tuon̄ d̄ōn̄o yirin̄ n̄e Kiliapas. Nii n̄e Kiliapas piesu a bul, “N̄ dun̄dūn̄a n̄e n̄aa nuhūoru a h̄e Jerusalem l̄e a bi wii-la si n̄aa tapulaa deen̄ba niaa?” ¹⁹ Nii n̄e u pieseba a bul, “Wu-b̄ee n̄e nii?” Nii n̄e ba bula pu a bul, “Wii-la si n̄aa Yesu si lii Nazaret l̄e. Baala deen̄ fa n̄aa nii-la fa s̄ii bul wiaa, Wia Dīn̄-z̄on̄-la

dolun ɛ nɛ. Wialin u sii ɲaa ari wialin u sii bul fa ken dolun Wia ari nuhuobiinee kala teen. ²⁰ Nialin si kpu pusun pipi Wia kuhiasin ari juu tinɲaa kuhiasin jonu he Paalit nisin ɛ duu kpuu. Nii ne Paalit ɲaa ba kpaasu mere daa-gesee nyun u suu. ²¹ La faa yiele ari u ne ɲaa nii-la si ko duu laa Iziral tinɲaa ta. Ba si kpu Yesu nii, u tapulaa batori ne jinin. ²² La di haala-la donsun fa sii to Yesu harin ku bul wii pila. U kperila. Ba sii mu bua-la lerin siipuura aɲ bi Yesu ku-suun na. ²³ Ba ku bul nii pila. Ba bula ari ba na Wia tinɲaaraa ari duosoo tuon. Ba bula piba ari Yesu weye ne. ²⁴ La tuon donsun ma mu bua-la lerin a na ari wii-la haala-la si bula ɲaa wutitii ne. Ba bi Yesu na." ²⁵ Nii ne Yesu bula piba a bul, "Ni-yaaraa, ma digilaa yunje, ma bi wialin nialin fa sii bul wiaa, Wia Din-zon-la dolun ɛ laa dii. ²⁶ Ma bi jin ari u maga di nii-la Wia si liisa, na heen ne aɲ-na juu u kuorii-la tuon a laa yirin?" ²⁷ Nii ne Yesu bula piba wialin kala ba si nmunsa Wia tenin tuon a tigeu ɛ, a suomi ten-la Moosis si nmunsa a kaa mu tenni-la kala nialin sii bul wiaa, Wia Din-zon-la dolun ɛ si nmunsa ɛ. U dageba wialin kala bubuon.

²⁸ Ba sii mu nii, ba ku kpage tan-la ba sii mu. Nii ne Yesu ɲaa a nage duu ha kiele mu ne. ²⁹ Nii ne ba kenu lere bil di tan bire, duu len di ba chua. Nii ne u juu di ba pin. ³⁰ Ba si he dia tuon, ba hon di ba dii kudiilee. Nii ne Yesu jon boroboro a chuɔɔ Wia aɲ kaa choge piba di ba dii. ³¹ U si ɲaa nii, ba siaa luome ba jin ari Yesu ne. Ka u lel ba sipaan. ³² Nii ne ba bula pi donɔ a bul, "La yaraa fa fiela ne worun u si bul wiaa pipila wonbiin ɛ, aɲ pe didagela Wia tenin wialin bubuon." ³³ Nii ne ba sii lima lima a miira mu Jerusalem, a na Yesu haritooro-la fii ari kubala, ari nialin donsun ma fa sii to Yesu harin. ³⁴ Nii ne Yesu haritooro-la fii

ari kubala-la bula piba a bul, "La Tiina Yesu sene sii ne. U ken u titia kaa ko dage Saamon ne!" ³⁵ Nii ne nialin baliamin ma bul wii-la si ɲaa wonbiin ɛ, ari nii ba si ku jin ari la Tiina Yesu ne. Ba si di bua-la ɛ u si ken boroboro choge a piba ɛ ne ba jin ari u ne.

Yesu ken u titia ku dage u hari-tooro

Mat. 28.16-20; Maak 16.14-18; Jon 20.19-23; Yesu nanz. tintinɲaa 1.6-8

³⁶ Nialin balia sii bul wialin nii, di Yesu titia ne chin ba tutuobaanin nii [a bula piba a bul, "Ma jan hon ari yarifiɛlaa."] ³⁷ Nii ne fawullun kenba, ba biina ari ni-dima ne ba na nii. ³⁸ Nii ne Yesu pieseba a bul, "Bee ne tii fawullun kenma maa walime ma titia? Bee ne tii ma tuobiinaa vugime nii?" ³⁹ Ma beɲ a na mi nisaa ari mi naasin a jin di mi ne. Ma dige na. Ma jima ari ni-dima bi yaraa kene ari mi si ken nii." [⁴⁰ U si bul nii, u ken u nisaa ari u naasin kala a dageba di ba na.] ⁴¹ Ba ha bi laa dii, ka wii-la sima piba kinken. U ɲaaba wu-kpunkpere. Nii ne u pieseba a bul, "Ma ken kudiilee ne?" ⁴² Nii ne ba jon chenfilin ba si wasa a pu. ⁴³ U laa chan ba sipaan.

⁴⁴ Nii ne u bula piba a bul, "Mi fa bula pima ari wii-na kala ba fa si nmunsa a tigem ɛ jan ɲaa wutitii. Ba nmunse wiaa a tigem ɛ wialin tuon Moosis fa si nmunsa bil di niaa tuto ari wialin tuon nialin fa sii bul wiaa, Wia Din-zon-la dolun ɛ fa si nmunsa, ari wialin tuon ba si nmunse Wia tenin seme donɔ ba sii yire Saams. Ba kala ku ɲaa wutitii." ⁴⁵ Nii ne Yesu ɲaa ba ken wu-jimin di ba wuo jin Wia tenin wiaa bubuon. ⁴⁶ Nii ne u bula piba a bul, "Nla ne ba nmunsa bil:

'U maga di Kirisito, nii-la Wia si liisa na heen a suu aɲ sii suun ɛ tapulaa batori cheen.'

⁴⁷ Ba bira nmunsa di niaa jan bul Wia wiaa, nii-la Wia si liisa dolun

le, dunia lee-na kala, a bula piba di ba birima lii ba haacheba le di Wia jon ba haacheba cheba, di ba suomo n̄aa nii Jerusalem le.” ⁴⁸ Nii ne Yesu bira bula piba a bul, “Ma n̄aa wiaa deenba kala si n̄aa siada, di ma wuo bula pi n̄aa. ⁴⁹ Má bee na, mi jan jon ku-la mi Nyimma si si u jan jonjo pima a hema le. Ama má gberɛ Jerusalem le, see bua-la yie di dolun lii Wia teen a ku tuu hema le.”

Wia jon Yesu jil Wia-jan
Maak 16.19-20; Yesu nanz.
tintin̄aa 1.9-11

⁵⁰ Nii ne u ken u haritooro-la ba lii ta-bal-la le a jon wonbiin a mumu Betani diirin. Dime ne u ken u nisaa kaa chu toba le an chuole Wia piba di Wia peba le. ⁵¹ U ha si chuole Wia pipiba nii a susulu duu peba le, nii ne u sii ba teen, [ka Wia jonu kaa jil Wia-jan.] ⁵² Nii ne ba chuolu an miira mu Jerusalem. Ba tuon kala faasa tore. ⁵³ Ba yie juu Wia-dia buana kala le a chuchuole Wia.

**WIA WU-ZOMɔ-LA
Jɔɔŋ
SI N̄MUNSA**

Wii-la si pi niaa miisinj

1 Ka di Wia ne ɲaa dunia, wii-la fa he dime ne, u fa he Wia teen ne. Ba di Wia kala fa ɲaa kubala ne. 2 Bunɲun kala ne u fa he Wia teen. 3 U le ne Wia to a ta kuɲ-kala. Kuɲ-kala si he dunia le, u ne ta. 4 Wii-la fa weye ne a keɲ pulumuɲ kaa ku pi niaa. 5 Pulun-la chaane biriminj tuɔɲ, birin-la bi pulun-la wuo to. 6 Nii ne Wia tin u tinɲaara kubala baa yire Jɔɔŋ. 7 U ne ko duu bul pulun-la wiaa pi niaa. U ɲaa nii di nuu-kala wuo nii a tou le a laa pulun-la wiaa dii. 8 Jɔɔŋ fa dee bi pulun-la ɲaa, ama u ta ko duu bul pulun-la wiaa ne a pi niaa. 9 Nii ne pulun-la titia ku tuu dunia duu chaana he nuu-kala le. 10 U fa he dunia-la le Wia si tou le ta ne, ama dunia niaa buu jin. 11 U ko u titia jan, ama u jan niaa buu laa. 12 An ka niaa doɲsun-na laau a laa u wiaa dii. Nii ne u piba wonɲiin di ba wuo ɲaa Wia biirin. 13 Niaa deenba bi naga baala si jin u haala ba lul biirin nii ne. Wia titia ne ɲaa ba Nyimma. 14 Nii ne wii-la birime nuhuobiine a ku he la tuɔɲ. U fa he la teen a fifala nennige worun, a keɲ wutitii. La na u si keɲ yirin. Yirin deen u Nyimma Wia ne joɲo pu, ari u ne ɲaa u Bie kala. 15 Jɔɔŋ bul u wiaa pila. Wialin u si heele bul ne ɲla: "Nii-la si jan to mi harin ko, u ne kiimi, bee wiaa u he dime ne, ka ba-na lulmi." 16 Ku-la kala u si kene, la ma na kpaalin u tuɔɲ ne. U yie fala nennige a pela le bua-na kala le. 17 Wia to Moosis le ne a bil u niin pila. Ama Yesu Kirisito le ne Wia to a fala nennige a pela le worun, a dagela wutitii. 18 Nuukala ha bi Wia naa. U Bii-bala-la si hoɲ u seme ne dagela u wiaa.

Jɔɔŋ bula ari u dee bi Kirisito ɲaa Mat. 3.1-12; Maak 1.1-8; Luuk 3.1-18

19 Juu tinɲaa fa si he Jerusalem le tin nialin si kpu pusun pipi Wia ari nialin ba sii yire Liivai timma, ba ko Jɔɔŋ teen a piesu a bul, "Kubee ne ɲ ɲaa?" 20 Nii ne Jɔɔŋ bi wiaa nyia an chaasa bul ari u dee Kirisito, nii-la Wia si liisa. 21 Nii ne ba bira piesu a bul, "Kubee ne saa ɲ ɲaa? N ne ɲaa Ilaaja?" U bul duu dee. Nii ne ba bira piesu, "N ne ɲaa nii-la sii bul wiaa, Wia Din-zon-la dolun le la sii gberu?" U bira si duu dee. 22 Nii ne ba bira piesu, "Kubee ne saa ɲ ɲaa? U maga di ɲ dagela, di la mu bula pi nialin si tinla. Wu-bee ne ɲ bul a tige ɲ titia le?" 23 Nii ne Jɔɔŋ bul, "Mi ne ɲaa yiikori-la si he giri-bine tuɔɲ aa bul, 'Ma wase wonɲiin bil di la Tiina ko.' Nla ne Azaaya fa bul di ma ɲaa." Azaaya fa ɲaa nii-la sii bul wiaa, Wia Din-zon-la dolun le ne.

24 Nialin fa si ku piese Jɔɔŋ wiaa deenba, Farisii tinɲaa ne fa tinba. 25 Nii ne ba bira piese Jɔɔŋ a bul, "N dee bi Kirisito ɲaa, nii-la Wia si liisa, ɲ dee bi Ilaaja ma ɲaa, ɲ bira bi nii-la sii bul wiaa, Wia Din-zon-la dolun le ma ɲaa. Bee ne saa tii ɲ fufo niaa Wii-chuole liin?" 26 Nii ne Jɔɔŋ bul, "Mi sii fo niaa Wii-chuole liin, liin dunɲun ne mi kaa fufoba, ama nuu doɲ ne he ma tuɔɲ nii, ka ma buu jin. 27 U ne to mi harin ko. Mi paala bi maga di mi keɲ u nenɲenɲee ɲmenin ma kaa puri." 28 Ba sii bul wiaa deenba kala nii, Betani le ne ba he, Joodan fuo-la seme doɲo. Lee-la ne Jɔɔŋ faa fo niaa Wii-chuole liin.

Jɔɔŋ bul Wia piesi-la wiaa

29 U tan si pula, Jɔɔŋ na Yesu duu ko. U si nau, u bul, "Bee na, Wia Piebie-la ne nii. U ne laa dunia haache ta. 30 Baala deen wiaa ne mi faa bul nii, mi si bula ari nuu ne jan ko mi harin. U ne kiimi, u he dime ne, ka ba-na lulmi. 31 Mi fa bi jin nii-la kala u si ɲaa. Ama mi ta ku fufo niaa Wii-chuole liin ne, di Iziral tinɲaa ku

Jimu.” ³² Wialin Jɔɔŋ si bula pi niaa a tigeu le ne ŋla: U si, “Mi na Wia Diŋ-zɔŋ-la duu lii wia nyuŋ a nage kokomo, a ku tuu togiliu le. ³³ Mi ma titia fa buu jin. Ama Wia si tinmi di mi fo niaa Wii-chuoŋe liin, u ne bula pimi a bul, ‘N jan na Wia Diŋ-zɔŋ-la duu ku tuu a he nuu le, tiina ne jan jon Wia Diŋ-zɔŋ-la a he niaa le!’ ” ³⁴ Nii ne Jɔɔŋ bira bul, “Mi sene nau a bulaa pima ari u ne ŋaa Wia Bie.”

Nialin si laa sipaan ku to Yesu harin

³⁵ U tan si pula, Jɔɔŋ ari u haritooro balia bira chin lee-la a na Yesu. ³⁶ Jɔɔŋ si nau duu bal, nii ne u bul, “Bee na, Wia Pie-bie-la ne ŋla.” ³⁷ U haritooro-la balia nii u si bul wiin deen a to Yesu harin. ³⁸ Yesu miira daase, di baa to u harin. U pieseba a bul, “Bee kun ne maa che?” Nii ne ba ma piesu a bul, “La kuhian, nii le ne ŋ jujuu?” ³⁹ Nii ne Yesu bula piba a bul, “Má ko na mi sii juu lee-la.” Nii ne ba to u harin mu a na lee-la u sii juu. Bua-la le ŋaa didaanin ne. Nii ne ba he u teen wii-kaanin tiire juu. ⁴⁰ Nialin balia fa si nii wii-la Jɔɔŋ si bula a to Yesu harin, donɔ yirin ne Anɔduru. U fa ŋaa Saamon Piita ŋaana ne. ⁴¹ Nii ne Anɔduru ma che u malima Saamon lerin, a bula pu a bul, “La na Kirisito, nii-la Wia si liisa.” ⁴² U ken Saamon kaa ko Yesu teen. Nii ne Yesu benu an bula pu a bul, “N ne Jɔɔŋ bie Saamon. Ba jan kenin kaa yire Kiifas.” Kiifas ari Piita fa ŋaa yiri-bala ne. U bubuon ne bun.

Yesu yire Filip ari Nataniel

⁴³ U tan si pula Yesu sii duu mu Galilii tinteen. Nii ne u na Filip a bula pu a bul, “To mi harin.” Nii ne Filip to u harin. ⁴⁴ Filip fa lii Betisaada ne, tan-la Anɔduru ari Piita ma si lia. ⁴⁵ Nii ne Filip na Nataniel a bula pu, “La na nii-la, u wiaa ne Moosis fa ŋmunsa bil di niaa tuto nii. Nialin sii bul wiaa, Wia Diŋ-zɔŋ-la dolun le ma fa bul u wiaa ne, ba ŋmunsa bil. Ba fa ŋmunsa ari

u ne Josef bie Yesu a lii Nazaret.” ⁴⁶ Nii ne Nataniel piesu a bul, “N ha na ku-zon duu lii tan-la ba sii yire Nazaret?” Nii ne Filip bula pu a bul, “Ku nau.” ⁴⁷ Yesu si na Nataniel duu ko u teen, u bubul u wiaa a bul, “Nia deen ŋaa Iziral tiina titii ne. U ken wutitii.” ⁴⁸ Nii ne Nataniel piesu a bul, “Ee ne ŋ ŋaa jinmi?” Nii ne Yesu bula pu a bul, “Mi nan ne ŋ si hon tutogo bubuon, ka Filip-na yirin.” ⁴⁹ Nii ne Nataniel bula pu a bul, “Kuhian, ŋ ne ŋaa Wia Bie. N ne ŋaa Iziral tinŋaa kuoro maa.” ⁵⁰ Nii ne Yesu piesu, “Mi si bula bul di mi nan di ŋ hon tutogo bubuon ne tii, ŋ laa mi wiaa dii koo? N jan na wukpunƙperisin a kii ŋla.” ⁵¹ Nii ne Yesu bula pu a bul, “Wutitii ne mi bulaa pin, ma jan na wia nyuŋ duu suro, di Wia tinɔdaaraa lii dime a ku tuu mi-na Nuhuobiine Bie teen, an miira jijil.”

2

Ba gbieli ha-jaari gbiele

¹ Tapulaa balia si bala, baa che di ba gbieli ha-jaari gbiele tan kubala le baa yire Keena. Keena he Galilii tinteen le ne. Yesu naan ma fa he dime. ² Ba fa yire Yesu ari u haritooro maa ha-jaari gbiele-la lerin. ³ Ba sii gbieli gbiele-la nii, ba nyunyua sinin. Ba si nyua sinin kala dere, Yesu naan bula pu di sin-la dere ne. ⁴ Nii ne Yesu bula pu a bul, “U bi maga di ŋ dagemi nii mi si jan ŋaa. Bua-la le mi si jan tin tinŋana ha bi yie.” ⁵ Yesu naan saa bula pi dia-la tintinnaa a bul, “Má ŋaa wii-la kala u si bula pima.” ⁶ Juu tinŋaa fa ken ba Wii-chuoŋe wonbiin ne aa son liin. Nii wiaa pupoi-balaa balidu ma fa he dime ari liin. Kun-kala tuon liin yi galan mara a kaa mu galan mara ari fii. ⁷ Nii ne Yesu bula pi dia-la tintinnaa a bul, “Má ŋaa liin a su pupoye-la.” Ba ŋaa liin su pupoye-la pilim pilim. ⁸ Nii ne Yesu bira bula piba di ba ŋaa lii-la pupoi-la tuon a kaa mu pi nii-la sii

benj gbiele-la. Ba ስaa mu pu. ⁹ U laa lii-la nyua a na lii-la, duu birime sinij. U bi jin lee-la ba si na sin-la. Ama dia-la tintinnaa-na jin. Nii ne u yire haal-la tiina ¹⁰ a bula pu a bul, “Gbiele-na kala, lee-na kala ba yie laa sipaan ne a kenj si-zomun a lii ba nyua. Nu-kala si nyua voge, ስ saa-na kenj sin-la si bi sinj a kaa to harinj ko. Ka ስ-na jonj si-zomun bil harinj u ku yi bua deenj kala le.”

¹¹ Yesu si ስaa liinj birime sinij Keena le Galilii tinteen ne ስaa u wu-magil-bunbun u si ስaa. Dime ne u dage nii Wia dolun si heu le. U haritooroo si na nii, ba laa u wiaa dii.

¹² A lii gbiele-la harinj Yesu ari u naan ari u ስaanaa ari u haritooroo sii mu Kapenam tinteen a he dime tapulaa banmen.

Yesu juu Wia-dia

Mat. 21.12-13; Maak 11.15-17; Luuk 19.45-46

¹³ U ka mua, ka di Juu tinስaa diisiin kieliስ gbiele-la yi. Nii ne Yesu sii mu Jerusalem a juu Wia-dia. ¹⁴ U si juu dime, u na niaa di baa yalle nesinj, piesee ari kokosun. Nialinj sii yere moribee ma hoስ ba teebulba nyun.

¹⁵ Nii ne Yesu kenj ስmeninj a birime chiba a kiri nialinj ari ba piesee ari ba nesinj kala ta ba lii Wia-dia-la le, aስ kenj moribii-yiyerile-la ma teebulba-la kaa birima chu, aስ kenj ba moribii-biin ma jaase tinteen.

¹⁶ Nii ne ka u bula pi nialinj ma sii yalle kokosun a bul, “Má kaa lii dia-la tuon. Ma sí mi Nyimma dia kaa birime yobo.”

¹⁷ U haritooroo liisi wii-la ba si ስmunse Wia teninj tuon a bul, “Wia-dia wiaa ka diimi ne worun a nage nyinin.” ¹⁸ Nii ne Juu tinስaa miira ko u teen a piesu, “Bee kunj wu-magil ne ስ jaስ wuo jonjo dagela ari ስ kenj dolun di ስ wuo ስaa wiinj deenj?”

¹⁹ Nii ne Yesu bula piba a bul, “Má ስmoo Wia-dia deenj lo, mi jaስ wuo jonj tapulaa batori a bira saau.” ²⁰ Nii ne ba bula pu a bul, “Jisin mahinj balia ari balidu ne ba jonjo saa Wia-dia deenj, ka ስ-na

bul di ስ jaስ kenj tapulaa batori saau koo?” ²¹ Ama Yesu si bul Wia-dia-la wiaa nii, u titia yaraa wiaa ne u bubul nii. ²² Bua-la le u si sii suun le ne u haritooroo liisi a yi wii-la u fa si bula le. Nii ne ba laa wialinj ba fa si ስmunsa Wia teninj tuon dii, a laa wialinj ma Yesu si bula dii.

²³ Yesu fa si he Jerusalem le, diisiin kieliስ gbiele-la le, niaa yuga a laa u wiaa dii a tinj ba si na wu-magila-la u sii ስaa le. ²⁴ Ama Yesu bi u titia kaa pulle ba teen, bee wiaa u jin nuhuobiinee kala ne worun. ²⁵ U fa bi maga di nuu-kala bira bul nuhuobiinee wiaa pu, bee wiaa u fa jin nuhuobiinee tuon wu-keninj kala ne.

3

Nikodiimas cheስ Yesu

¹ Baal kubala ne fa he dime. Baa yire Nikodiimas. U fa ስaa Juu tinስaa kuhianj ne a he Farisii tinስaa paati tuon. ² Titanj kubala u sii ko Yesu teen a bul, “Kuhianj, la jima ari ስ ne ስaa nii-la Wia si ta di ስ dage niaa. Nu-kala bi jaስ wuo ስaa wu-magila-la ስ sii ስaa, see di Wia pe tiina le.”

³ Nii ne Yesu bula pu a bul, “Wutitii ne mi bulaa pinj, nuu-kala bi jaስ wuo juu Wia kuorii-la tuon, see di ba wasa lul tiina.”

⁴ Nii ne Nikodiimas piesu a bul, “Ee ne banihianj jaስ wuo ስaa di ba bira wasa lulu? U jaስ bira wuo juu u naan luorun di u bira wasa lulu koo?”

⁵ Nii ne Yesu bul, “Wutitii ne mi bulaa pinj, nuu-kala bi jaስ wuo juu Wia kuorii-la tuon, see di Wia jonj u Din-zon-la he tiina le, di tiina ma pe fo Wii-chuole liinj. ⁶ Nuhuobiinee yie lul nuhuobiinee u kenj miisinj ne tinteen deenj le. Aስ ka Wia ma yie jonj u Din-zon-la a heu le duu kenj miisinj Wia teen. Nuhuobiinee bi Wia Din-zon-la jaስ wuo jonjo he nuu le.

⁷ Sí leስ duu ስaa wu-kpunkpere ስ le mi si bula pinj ari u maga di ba wasa lulun. ⁸ Pelinj yie lu lee-na kala u si cho ne. ስ ninii u domo, ama ስ bi jin

lee-la u si lii kə, koo η bira bi jin lee-la u sii mu. U saa nage ηii ne nuu-kala le Wia si jon u Diη-zəη-la heu le.”⁹ ηii ne Nikodiimas piese, “Ee ne wiin deen jan wuo ηaa?”¹⁰ ηii ne Yesu bula pu a bul, “N ηaa kerichibal ne Iziral tinteen le, an ka bee ne tii η bi wiin deen bubuon jin?”¹¹ Wutitii ne mi bulaa pin, la yie bul wii-la la si jima ne, a ηaa siada ari wii-la la si na. Ama ma kun-kala bi che di ma sei wii-la la si bula.¹² Mi bul dunia wiaa ne pipin, ka η bi laa dii. Ee ne saa η jan wuo laa dii di mi ne bul Wia-jan wiaa pin?¹³ Nuu-kala ha bi Wia-jan jila, see mi-na Nuhuobiine Bie si lii dime ku tuu.¹⁴ Moosis fa si he giri-bine tuon, u fa ken hoon a libi dimin, a jon mere daan le a kaa jee. ηii titia ne ba jan kpaase mi-na Nuhuobiine Bie ma daan le a kaa jee,¹⁵ di nuu-kala si laa mi wiaa dii, u jan wuo ken miisila si bi dere.¹⁶ Wia cho dunia niaa a mu kieli, ηii ne tii u jon u Bii-bala a pila, di nii-la kala si laa u wiaa dii, u bi jan lel, ama u jan ken miisila si bi dere.¹⁷ Wia bi u Bie ta duu ku tuu laa dunia niaa wiaa jin, ama duu laa dunia niaa ta.¹⁸ Nuu-na kala si laa Yesu wiaa dii, u bi jan dii u tiina sariya a jon cheerin pu, ama nii-la kala si bi u wiaa laa dii, u paala dii u tiina sariya a jon cheerin pu, bee wiaa u bi Wia Bii-bala-la wiaa laa dii.¹⁹ Wii-la si tii Wia dii dunia niaa sariya a jon cheerin piba ne ηla: Pulumun ku tuu dunia ne, ama niaa cho birimin ne a kii pulun-la, bee wiaa baa ηaa wu-bonηoo ne.²⁰ Nuu-na kala sii ηaa wu-bonηoo bi pulumun cho, u bi pulumun tuon lii, bee wiaa u bi che di u wu-bom-la lii pulumun.²¹ Ama nuu-na kala sii ηaa wu-zonηoo cho pulumun a yie lilii pulumun tuon, di niaa wuo na ari uu ηaa wu-zom-la Wia dolun le ne.”

Joon cheη Yesu

²² ηii harin ne Yesu ari u haritooroo lii Jerusalem a mu Judiya tinteen, a dieni mua dime aa fo niaa

Wii-chuole liin.²³ Joon ma fa he lee kubala baa yire Aanon le a kpage Seelim aa fo niaa Wii-chuole liin, bee wiaa liin fa yuga kinken dime. Niaa faa mu u teen u fufoba Wii-chuole liin.²⁴ (Bua-la le di ba ha bi Joon kaa to dia.)

²⁵ ηii ne Joon haritooroo donsun ari Juu tiina kubala ken liin somun wiaa a kaa lilere.²⁶ Ba mu Joon teen a piesu a bul, “La kuhian, η liisi baalla fa si he Joodan fuo-la seme don wiaa ne, nii-la η si bul u wiaa? Leye u maa fo niaa Wii-chuole liin ne, niaa kala mumu u teen.”²⁷ ηii ne Joon bul, “Nuu-kala bi jan wuo ken kun-kala, see di Wia jon pu.²⁸ Ma titia ηaa mi dansia, ka mi bul ari mi dee bi Kirisito-la ηaa, nii-la Wia si liisa, ama Wia ta tinmi ne di mi laa u sipaan.²⁹ Ha-falin tiina ne tii haala, ama di ha-falin tiina nanonon ne chin dime a jijegili wialin ba sii bul, u tuon yie tore ne duu ne nii hafalin tiina-la yiikoro. ηii titia ne mi tuon ma tore worun Yesu nyun.³⁰ U maga duu ne miira ku ηaa ni-balin mi teen, ka di mi miira ηaa ni-bie.”

Nii-la si lii Wia-jan

³¹ Nii-la si lii Wia-jan ne kii kun-kala. Nii-la si lii tinteen ηaa tinteen kun ne aa bul tinteen wiaa. Ama nii-la si lii Wia-jan ne kii kun-kala.³² Uu bul wialin u si na an nii ma ne, ama nuu-kala bi u niin wiaa seye.³³ Nii-la kala si sei u niin wialin jima ari Wia he dime ne a ken wutitii.³⁴ Mi-na nii-la Wia si tima, mii bul Wia niin wiaa ne, bee wiaa Wia jon u Diη-zəη-la dolun kala a pimi ne.³⁵ Mi Nyimma Wia cho mi-na u Bie, a jon u dolun kala a he mi nisin le.³⁶ Nii-la kala si laa mi-na Wia Bie wiaa dii, u jan ken miisila si bi dere; ama nii-la kala si bi mi-na Wia Bie wialin ka to, u bi jan ko duu ken miisila si bi dere, ama Wia jan na baanin u tiina nyun a kaa mu wuu.

4

Yesu bul wiaa a pi Samaria tinɲaa haala

¹ Nii ne Farisii tinɲaa nii ari Yesu na niaa yuge a kii JƆƆŋ, baa tou u foba Wii-chuɔle liiɲ. ² (Ama Yesu titia bi nuu-kala Wii-chuɔle liiɲ fo, u haritooroo dunɲa ne.) ³ Yesu si nia di baa bul nii, u sii lii Judiya tinɲeeɲ le a miiraa mu Galilii tinɲeeɲ. ⁴ U sii mu Galilii nii, u to Samaria tinɲeeɲ ⁵ a ku yi taɲ kubala Samaria tinɲeeɲ le baa yire Sika. Tinɲee-la Jekɔb fa si jono pi u bie Josef fa kpage dime ne. ⁶ Jekɔb fa si lu vil-la he dime. Yesu fa si veɲ wonɲiɲ nii a lol, u mu hoɲ vil-la seme.

⁷ Di wia jil nyu-gbaɲa, nii ne Samaria tinɲaa haal kubala ko vil-la duu naa liiɲ. Nii ne Yesu bula pu a bul, "Naa liiɲ pimi di mi nyua."

⁸ Bua-la le di u haritooroo-na mu taɲ-la tuɔɲ di ba yoo kudiilee. ⁹ Nii ne Samaria tinɲaa haal-la piese Yesu a bul, "Beɛ ne tii ɲ-na Juu tiina chiche di mi-na Samaria tiina naa liiɲ piɲ di ɲ nyua?" Juu tinɲaa ari Samaria tinɲaa bi wii pe. Nii ne tii haal-la bul nii. ¹⁰ Nii ne Yesu bula pu a bul, "Di ɲ ne fa jii ku-la Wia si jono pi niaa, a fa jii nii-la si suluɲ di ɲ naa liiɲ pu duu nyua, ɲ fa jaɲ sulu duu piɲ lii-la si keɲ miisiɲ." ¹¹ Nii ne haal-la piesu a bul, "Kuhian, ɲ bi guga keɲ di ɲ kaa naa liiɲ, ka vil-la ma luɲ. Nii le ne saa ɲ jaɲ na lii-la si keɲ miisiɲ? ¹² La naabalima Jekɔb ne jon viliɲ deɲ pila. Ba di u biiriɲ ari u pusun kala nyua viliɲ deɲ liiɲ ne. ɲ jaɲ bul di ɲ kii Jekɔb neɛ?"

¹³ Nii ne Yesu bula pu a bul, "Nuu-kala si nyua liiɲ deɲ, lii-nyuasun jaɲ bira keɲ tiina. ¹⁴ Ama nii-la kala si jaɲ nyua lii-la mi si jaɲ pu, lii-nyuasun bira bi jaɲ kenu da. Lii-la mi si jaɲ pu jaɲ birime lii-bulo u tuɔɲ le a bubul, a pu miisiɲ si bi deɛ." ¹⁵ Nii ne haal-la bula pu a bul, "Mi Tiina, pimi liiɲ deɲ, di lii-nyuasun bira si mi keɲ, di mi bira si ko di mi naa liiɲ daha."

¹⁶ Nii ne Yesu bula pu a bul, "Mu yire ɲ bala aɲ miira ko daha."

¹⁷ Haal-la si duu bi bala keɲ. Nii ne Yesu bira bul, "ɲ kiaa sima ɲ si jaɲ bul di ɲ bi bala keɲ, ¹⁸ beɛ wiaa ɲ fa jaa baalaa banɔɲ ne, ama ma di baal-la si he dime leɛle sene bi ɲ bal-titii naa. ɲ bul wutitii ne pimi."

¹⁹ Nii ne haal-la bula pi Yesu a bul, "Mi Tiina, u naga ɲ naa nii-la sii bul wiaa, Wia Diɲ-zɔɲ-la dolun le ne."

²⁰ Haal-la bira bula pu a bul, "La-na Samaria tinɲaa naabalimaba, baa chuɔle Wia peeliɲ deɲ nyun ne, aɲ ka ma Juu tinɲaa si, di Jerusalem ne lee-la la si maga di laa chuɔle Wia."

²¹ Nii ne Yesu bula pu a bul, "Bua kubala jaɲ yi, niaa si bi jaɲ chuɔle la Nyimma Wia peeliɲ deɲ nyun koo Jerusalem le. Laa wiin deɲ dii. ²² Ma-na Samaria tinɲaa sene bi jii nii-la ma sii chuɔlu. La-na Juu tinɲaa jii Nii-la la sii chuɔlu ne. Nii-la le Wia si jaɲ to a laa dunia niaa ta, u lii Juu tinɲaa tuɔɲ ne. ²³ Bua kubala jaɲ yi, u paala yi ne, nialiɲ si jaɲ sene chuɔle Wia, ba jaɲ chuɔle la Nyimma Wia ari wutitii, Wia Diɲ-zɔɲ-la dolun le. Nii ne Wia che di niaa chuchuɔlu. ²⁴ Wia naa ni-dima ne, nialiɲ sii che di ba chuɔlu, u maga di ba chuɔlu ari wutitii, u Diɲ-zɔɲ-la dolun le." ²⁵ Nii ne haal-la bula pu di u jima ari nii-la ba sii yire Kirisito, nii-la Wia si liisa, u jaɲ ko. Di u ne ko, u jaɲ dageba wii-na kala.

²⁶ Yesu miira bula pu a bul, "Mi ne nii, mi nii bul wiaa ɲ teen nii."

²⁷ Bua-la di Yesu haritooroo miira ko. U kperiba ba si ku nau, duu bul wiaa haal-la teen. Ama ba kuɲ-kala bi niin suro a piesu a bul, "Beɛ ne ɲɲ che u teen?" Koo ba bira bi piesa bul, "Beɛ ne tii ɲ bubul wiaa haal-la teen?"

²⁸ Nii ne haal-la len u pupoiɲ dime, aɲ miira mu jaɲ tuɔɲ, a yire niaa a bula piba, ²⁹ "Ma ko na baal kubala si wuo dage wialiɲ kala mi si naa. Nia deɲ ne saa naa Kirisito, nii-la Wia si liisaa, koo?" ³⁰ Niaa si nii wiin

deen, ba lii mu Yesu teen. ³¹ Bua-la le di Yesu haritooroo ka sulu a bul, "La kuhian, laa kiaa dii." ³² Nii ne Yesu bula piba a bul, "Mi ken kudiilee ne mi dii, ama ma bi kialin wiaa jin." ³³ Nii ne Yesu haritooro-la miira chinaa piese donjo a bul, "Nuu ne saa ken kudiilee ku pu koo?" ³⁴ Yesu bula piba a bul, "Mi kudiilee ne di mi sei nii-la si tinmi niin, a tin tintimii-la u si pimi dere. ³⁵ Ma si u ha ka chensin banese ne, ka di ma wase бага kiaa he donjo le. Mi jan bula pima, ma bee na, kiaa ne bia a gollima nii di ma wasa he donjo le. Ba ne nialin si naa siri di ba laa mi wiaa dii. ³⁶ Nialin kala si wase kialin he donjo le, ba jan laa ba time. Kialin ma ma si wasa he donjo le, ba ma ne naa nialin si laa mi wiaa dii. Ba ne jan ken miisi-la si bi dere. Nii wiaa nialin si kese nialin si laa mi wiaa dii ari nialin sii bul Wia wiaa pipi niaa, ba kala tuon jan tere. ³⁷ Wii-la sene naa wutitii ne. Nuu don ne bul Wia wiaa, nuu don ma kese nialin si laa mi wiaa dii he donjo le. ³⁸ Mi tinma ne di ma mu kese nialin si laa mi wiaa dii. Ma si naa nii, ma nage nialin si mu wase бага kiaa ne he donjo le, бага-la le ba si bi tima. Naa donsun ne tin бага-la le, ka ba pe nii бага-la sima nii."

³⁹ Nii ne niaa yuga Samaria tinteen le a laa Yesu wiaa dii. Haal-la si bul wialin Yesu si bula a tigeu le ne tii ba laa Yesu wiaa dii nii. ⁴⁰ Samaria nialin si ko Yesu teen, ba sulu duu chua ba teen. Yesu sei a chua dime tapulaa balia. ⁴¹ Naa bira yuga a laa u wiaa dii a tin wialin u si dageba wiaa. ⁴² Nii ne nialin bula pi haal-la a bul, "Leele la laa u wiaa dii a tin la titia si nii u niin wiaa nii ne, u bi naga wii-la n si bula pila ne tii. La titia wuo jin ari u ne sene naa dunia Laataara."

Yesu vaare kerichi-bal kubala bie

⁴³ Yesu si chua dime tapulaa balia-la, u sii a bira mu Galilii tinteen.

⁴⁴ Yesu titia fa bula pi niaa ari nii-la sii bul wiaa, Wia Din-zon-la dolun le, ba buu jirima ka pa u titia jan le. ⁴⁵ U si mu Galilii tinteen nii, ba kenu worun a tin wialin kala u si naa bana juu tinnaa gbiele-la le Jerusalem le. Ba ma fa he dime.

⁴⁶ Yesu bira miira mu lee-la ba sii yire Keena a he Galilii tinteen le, lee-la u fa si ken liin birime sinin. Di kerichi-bal kubala fa he tan kubala le baa yire Kapenam le. U bie fa wiwiile. ⁴⁷ U si nia di Yesu lii Judiya tinteen a ko Galilii tinteen, u mu Yesu teen a sulu duu ku vaare u bie pu, di u kpage suun ne. ⁴⁸ Nii ne Yesu bula pu, "See di ma na wu-magilaa ari wu-kpunjkerisin, ma bi jan naa yarida." ⁴⁹ Nii ne kerichi-la bula pu, "Mi kuhian, ko lagi di mi bie si suu."

⁵⁰ Nii ne Yesu bula pu, "Mu dia, n bie duoro ne." Baal-la laa wii-la Yesu si bula pu dii a jon u wonbiin aa ven.

⁵¹ Uu mu nii, u tintinna ku chemu a bula pu ari bile duoro ne. ⁵² U piese duu na bua-la le u si duoro. Ba bula pu ari diamin wiiheye, kerifi kubala le ne waari-la leju. ⁵³ Nii ne bile nyimma jin ari bua-la le ne Yesu bula pu ari u bie ken miisin ne. Nii ne ba di u dia niaa kala laa u wiaa dii. ⁵⁴ Wu-liamin ne nii Yesu si naa, u si bira lii Judiya ko Galilii tinteen.

5

Yesu vaare baal kubala fuon le

¹ Nii harin le ne juu tinnaa gbiele kubala bira yi Jerusalem le. Nii ne Yesu sii mu lee-la.

² Jerusalem le, fuo kubala ne fa he dime. U fa kpage boinniiri-la donjo ba fa si to juuu tan-la tuon ne. U yirin ne fa piese boinniin. Hiiburu yiikoro le ba ken fuo-la kaa yire Betizata. Ba he palaa banon ne a kere fuo-la. ³ Nyanyal tinnaa fa yuga a he pala-la tuon. Donsun nyulime, donsun fa naa naa-suunun ari nasuunun tinnaa. Donsun ma gberike. [Ba fa hono gbera fuo-la di lii-la fa vuugi.] ⁴ Bua donjo Wia tinndaru ne fa yie ku tuu fuo-la a ken lii-la

kaa vuugi. Di Wia tin̄daari-la ne keḅ lii-la vuugi, nyanyal tiina-la si laa sipaan̄ tuu lii-la, u nyanyalin̄ cho duu nageḅ nii ma kala, u yie duori ne. ⁵ Baal kubala ma ne fa he nyanyal timma-la tuḅḅ. U fa wiila ne a yi jisij mara ari fii ari chori. ⁶ Yesu si na baal-la duu piḅ dime, u jij ari baal-la wiila dien̄ ne. Nii ne u piesu a bul, “Nḅ che di ḅ duori nee?” ⁷ Nii ne baal-la bul, “Mi kuhian̄, mi bi nuu keḅ daha u si jan̄ wuo jon̄mi kaa tuu he fuo-la le di ba ne keḅ lii-la vuugi. Ba yie keḅ lii-la vuugi, mii neḅike di mi tuu, di nuu laa sipaan̄ tuumi le.” ⁸ Nii ne Yesu bula pi baal-la a bul, “Sii a chuoli ḅ bḅḅ a viiri.” ⁹ Baal-la guu duori a sii chuoli u bḅḅ a chun̄aa viiri. Tapulun̄ deen̄ ḅaa che-wiesii-la cheḅḅ ne.

¹⁰ Nii ne Juu tin̄ḅaa bula pi baal-la Yesu si vaara a bul, “Jin̄ij ḅaa che-wiesii-la cheḅḅ ne. Uu kise ne di ḅ chun̄ bḅḅ tapulun̄ deen̄ cheḅḅ.” ¹¹ Nii ne baal-la ma bul, “Nii-la si vaaremi ne bula pimi di mi chuoli mi bḅḅ a viiri.” ¹² Nii ne ba piesu, “Kubee ne baal-la si bula piḅ di ḅ chuoli ḅ bḅḅ a viiri?” ¹³ Ama baal-la bi nii-la si vaaru jij. Bua-la le di niaa si yuga nii, Yesu lel. ¹⁴ U nii harin̄ ne Yesu na baal-la Wia-dia le a bula pu, “Na, leeḅ ḅ duoro ne, bira sí haache ḅaa. Di nii dee, wiin̄ jan̄ wasa juun̄ le a kii nii.” ¹⁵ Nii ne baal-la sii a mu bula pi Juu timma-la ari Yesu ne fa vaaru nii. ¹⁶ Yesu si ḅaa nii che-wiesii-la cheḅḅ, nii ne tii Juu tin̄ḅaa suomo to Yesu naasin̄ di ba dḅgisu. ¹⁷ Nii ne Yesu bula piba a bul, “Mi Nyimma ka tin̄ ne, nii ne tii mi maa tin̄.” ¹⁸ Yesu si bul nii ḅaa Juu timma-la wasa chiche won̄bii-la ba si jan̄ to kpuu. Wiaa balia ne ba si duu cheye, u chei ba kisin̄ le che-wiesii-la cheḅḅ, aḅ pe bul di Wia ne ḅaa u Nyimma, a bul nii di ba di Wia mage dḅḅḅ ne.

Wia Bie si keḅ dolun̄ nii

¹⁹ Nii ne Yesu bula pi niaa a bul, “Mi bul wutitii ne aa pima, mi-na

Wia Bie bi wii-kala wuo ḅaa mi titia dolun̄ le. Mi yie ḅḅaa wialin̄ mi si na di mi Nyimma ḅaa ne. Wii-na kala u sí ḅaa ne, mi ma u Bie ḅḅaa, ²⁰ bee wiaa mi Nyimma chomi, mi si ḅaa u Bie, aa dagemi wialin̄ kala u titia sí ḅaa. U jan̄ dagemi wiaa a kii ḅla di mi ḅaa, di ba ḅaama wu-kpun̄kpere. ²¹ Mi Nyimma si chise nialin̄ si suba ba bira keḅ miisin̄ nii, nii titia ne mi ma u Bie jon̄ miisin̄ a pipi nialin̄ mi sí che. ²² Mi Nyimma-na bi nuu-kala sariya ka dii, ama u jon̄ba kala he mi-na u Bie nisin̄ le ne. ²³ U ḅaa nii di nuu-kala to nii le a zizil mi-na u Bie ne, ari ba sí zil mi Nyimma nii. Nii-la-na kala si bi mi-na Wia Bie ka zil, u tiina ma bi mi Nyimma Wia si tin̄mi ka zil. ²⁴ Wutitii ne mi bula pipima, nii-la kala si jegile nii mi niin̄ wiaa a laa nii-la ma si tin̄mi wiaa dii, u jan̄ keḅ miisi-la si bi dere. U tiina, ba bi u-na sariya ka dii, u saa lii suun̄ bua le ne a keḅ miisin̄.

²⁵ Wutitii ne mi bula pipima, bua-la jan̄ yi, u saa yie ma ne, di nialin̄ si suba jan̄ nii mi-na Wia Bie yiikoro. Nialin̄ saa si nii mi yiikoro, ba jan̄ keḅ miisin̄. ²⁶ Mi Nyimma si keḅ dolun̄ duu pi niaa miisin̄ nii, nii ne u ḅaa mi ma u Bie keḅ dolun̄ di mi pi niaa miisin̄. ²⁷ U saa pi mi-na u Bie dolun̄ ne di mi dii niaa sariya, bee wiaa mi ne ḅaa Nuhuobiine Bie. ²⁸ Ma sí leḅe di wiin̄ deen̄ ḅaama wu-kpun̄kpere. Bua-la jan̄ ko di nialin̄ kala si suba a he buasun̄ le jan̄ nii mi yiikoro. ²⁹ Ba saa jan̄ sii ba buasun̄ le. Nialin̄ si ḅaa wu-zḅḅḅḅḅ jan̄ sii a keḅ miisin̄, nialin̄ ma si ḅaa wu-bḅḅḅḅḅ, di ba ma sii di Wia dii ba sariya a jon̄ cheerin̄ piba.”

³⁰ Nii ne Yesu bira bul, “Mi-na bi wii-kala wuo ḅaa mi titia dolun̄ le. Mi yie dii sariya ari Wia si si mi dii nii ne. Nii wiaa mi si yie dii sariya-la nii, u ḅaa wutitii ne, bee wiaa mi bi che di mi ḅaa wii-la mi sí che, ama wii-la nii-la si tin̄mi sí che. ³¹ Di mi dun̄duḅa ne bul mi wiaa, u bi yun̄un̄ jan̄ keḅ. ³² Ama nuu ma ne he

dime a bubul mi wiaa. Mi saa jima wialin u sii bul a tigemi le, ba n̄aa wutitiiba n̄e. ³³ Ma tin̄ ma tin̄daaraa ba mu Jɔɔŋ teen̄ a pīese mi wiaa. Jɔɔŋ bul wutitii n̄e piba a tigemi le. ³⁴ U saa bi naga wialin nuhuobiinee si bula a tigemi le wiaa n̄e mi chil, ama mii bul wiin̄ deen̄ di ma n̄aa siri di Wia wuo laama ta n̄e. ³⁵ Jɔɔŋ fa nage chaanin̄ n̄e a chaan̄e, ma fa cho di ma nii u chaan̄-la sima muapilii. ³⁶ Ama wiin̄ dɔŋɔ he dime a laa mi nyun̄ a bubul wiaa. U n̄e kii Jɔɔŋ. Tin̄timii-la mi sii tin̄ n̄e nii, tin̄timii-la mi Nyimma si jon̄o pimi di mi tin̄. Nii daga ari mi Nyimma n̄e tin̄mi. ³⁷ Mi Nyimma-la si tin̄mi, u maa bul mi wiaa n̄e. Ma ha bi u yiikoro nia, ma ha buu na ari ma siaa maa. ³⁸ U niin̄ wiaa bima le he, bee wiaa ma bi mi-na nii-la u si tima wiaa laa dii. ³⁹ Ma yie fīese siin̄ a kikarime Wia tenin̄. Ma biina ari ma nii n̄aa nii, ma jan̄ wuo ken̄ miisi-la si bi d̄ere. Wia ten̄-la ma sii karimu ma paala bul mi wiaa n̄e. ⁴⁰ Ka ma via di ma kɔ mi teen̄ a wuo ken̄ miisin̄. ⁴¹ Mi bí che di nuhuobiinee besemi le. ⁴² Mi jima ari ma tuon̄ le ma bi Wia cho. ⁴³ Mi kɔ mi Nyimma dolun̄ le n̄e, ka ma bimi kene worun̄. Di nuu dɔŋ n̄e fa kɔ u titia dolun̄ le, u n̄e ma fa jan̄ ken̄ worun̄. ⁴⁴ Ma cho di niaa besema le n̄e, ama ma bi cho di Wia n̄e besema le. Ee n̄e saa ma jan̄ wuo laa mi wiaa dii? ⁴⁵ Ma sí biina bul ari mi jan̄ jon̄ cheerin̄ pima mi Nyimma sipaan̄. Moosis n̄e jan̄ jon̄ cheerin̄ pima. Ma yielaa kala heu le n̄e. ⁴⁶ Di ma n̄e sene fa laa Moosis wiaa dii, ma fa jan̄ laa mi ma wiaa dii. Mi wiaa n̄e Moosis fa ŋmun̄se nii. ⁴⁷ Ama di ma bi wialin̄ u si ŋmun̄sa laa dii, ee n̄e ma jan̄ wuo laa wialin̄ mi sii bul dii?"

6

Yesu pi niaa bui banon̄ kudiilee
Mat. 14.13-21; Maak 6.30-44;
Luuk 9.10-17

¹ U nii harin̄ n̄e Yesu miira chol mugi-balin̄ kubala baa yire Galilii

U yirin̄ dɔŋɔ ma n̄e Tabiiras. ² Niaa yuga a tuto u harin̄, bee wiaa ba fa na u si n̄aa wu-magila-la a vaare nyanyal tin̄n̄aa n̄e. ³ Nii n̄e Yesu ari u haritooroo mu jil peelin̄ nyun̄ a hon̄ dime. ⁴ Di Juu tin̄n̄aa diisin̄ kielin̄ gbiele-la ma kpaga. ⁵ Ba si hon̄ dime, Yesu bee na di ni-dan̄ nii kɔ u teen̄ nii. U pīese Filip a bul, "Nii n̄e la jan̄ na kudiilee a yoo a pi niaa deen̄ba kala di ba dii voge?" ⁶ Yesu titia fa jin̄ wii-la u si jan̄ n̄aa n̄e, ama u ta bul nii duu magise Filip n̄e. ⁷ Nii n̄e Filip bula pu a bul, "Di la n̄e yoo boroboro a yi siidi bui balia maa, u bi niaa deen̄ba wii-kala wuo n̄aa, ba dɔŋsun̄ paala bi mua mua maa na." ⁸ Nii n̄e di u haritooro dɔŋɔ he dime, baa yire An̄duru. U fa n̄aa Saamon̄ Piita naan̄bie n̄e. U bula pi Yesu a bul, ⁹ "Bii-bie kubala n̄e he la tuon̄ a ken̄ boroboroba banon̄ ari chen̄filee balia. Ee n̄e saa kiaa deen̄ba jan̄ wuo n̄aa niaa deen̄ba?" ¹⁰ Nii n̄e Yesu bul di ba len̄ di nialin̄ hon̄. Di yan̄ bumoo t̄ose lee-la. Nii n̄e nialin̄ hon̄. Ba tuon̄ baalaa fa n̄aa bui banon̄ n̄e. ¹¹ Nii n̄e Yesu laa boroboroba-la a chuole Wia, an̄ kaa kpaa nialin̄ si hon̄o. Nii n̄e u ken̄ chen̄filie-la ma kpaaba. Ba kun̄-kala dii a voge. ¹² Ba si dii a voge nii, u bula pi u haritooroo di ba mu paa boroboroba-la si ka, di kun̄-kala sí lel. ¹³ Nii n̄e ba paa ku-kaana-la nialin̄ si die an̄ ka, a sū sin̄sin̄ fii ari balia. ¹⁴ Nialin̄ si he dime a na Yesu si n̄aa wu-magilin̄ deen̄, ba bul di wutitii, baala deen̄ sene n̄aa nii-la sii bul wiaa, Wia Din̄-zon̄-la dolun̄ le ba si si u jan̄ kɔ dunia n̄e.

¹⁵ Nii n̄e Yesu jin̄ ari ba n̄aa siri n̄e di ba ku fugu duu dii ba kuorun̄. Nii n̄e u mu faa peelin̄ nyun̄.

Yesu ven̄ liin̄ nyun̄

Mat. 14.22-33; Maak 6.45-52

¹⁶ Didaanin̄, Yesu haritooroo tuu muga ¹⁷ a juu liin̄ daboro, a bira duoroo chol muga aa mu Kapenam. Tan̄ bire di Yesu ha bi ba teen̄ kɔ.

18 Bua-la le di pel-duo kubala maa lu a kenj liinj kala n̄aa u viviisi. 19 Di u haritooro-la ma duoro a mu yi meel-daasinj batori koo ban̄ese, an̄ na Yesu duu venj liinj nyuŋ a kuko daboro-la teenj. Ba si na nii, fawullunj kenjba. 20 Nii ne Yesu bula piba a bul, “Ma sí leŋe di fawullunj kenjma, mi-na ne.” 21 Nii ne ba tuonj t̄ore, ba jonu he liinj daboro-la tuonj. Di liinj daboro-la guu yi lee-la ba fa sí mu.

Niaa yuga aa che Yesu

22 Tanj si pula, ni-dan-la bira chinj muga-la cholo sem̄e donjo, lee-la ba si mua. Didaan-la ba fa na liinj daboro kubala ne duu chinj dime. Ba jima ari Yesu haritooro donduŋa ne juu liinj daboro-la. Yesu tuo ba tuonj. 23 Ba si chinj dime nii, liinj daborusunj donsunj lii Tabiiras ko lee-la, a kpage lee-la Yesu fa si chuole Wia anj jonj boroboro piba di ba dii. 24 Nialinj si na di Yesu tuo, u haritooro ma tuo, ba sii juu liinj daborusu-la a mu Kapenam aa cheu.

Yesu si duu ne n̄aa boroboro-la si kenj miisinj

25 Nialinj si na Yesu muga-la cholo donjo, ba piesu a bul, “La kuhianj, bua bēe le ne η ko daha?” 26 Nii ne Yesu bula piba a bul, “Wutitii ne mi bulaa pima, maa chemi a tinj boroboro-la ma si dii voge wiaa ne, ama wu-magila-la ma si na di mi n̄aa wiaa dee. 27 Ma sí ma dolunj kala he a che kudiilee. Kudiile-la janj chei, ama má tima chiche kudiile-la si janj pima miisi-la si bi dere. Kudiilee deenba mi-na Nuhuobiine Bie ne janj pima, bēe wiaa mi Nyimma Wia jonj dolunj hemi le ne di mii n̄aa nii.” 28 Nii ne ba piesu, “Ee ne la janj wuo n̄aa a tinj Wia tintin̄n̄aa?” 29 Nii ne u bul, “Tintimii-la Wia si cho di maa tinj ne n̄la: Má laa mi wiaa dii, mi ne nii-la Wia si tima.” 30 Nii ne ba piesu, “Wu-magili bēe ne η janj n̄aa di la na a laa η wiaa dii? Bēe ne η janj n̄aa?” 31 Na la naabalimaba dii kudiilee ne girinj tuonj baa yire Mana. Wialinj ba

si n̄mun̄se Wia teninj tuonj ne n̄la: Ba si,

‘U jonj boroboro-la si lii wia nyuŋ ne a piba di ba dii.’ ”

32 Nii ne Yesu bul, “Mi bul wutitii ne aa pima. Kialinj Moosis si pima, u dee bima pa, Wia ne pima. Kudiile-la bima miisi-la si bi dere ka pa. Mi Nyimma nii pi niaa boroboro titii-la si lii Wia-janj. Kudiile-la jonj miisi-la si bi dere a pi dunia niaa.

33 Boroboro-la Wia si ta, u lii Wia-janj ne a ku tuu. U ne pi dunia niaa miisinj.” 34 Nii ne ba bul, “La Tiina, nii-na vene jonj boroboro deenj pipila.” 35 Nii ne Yesu bula piba a bul, “Mi ne n̄aa kudiile-la sí pi niaa miisinj. Nii-la kala si ko mi teenj, losunj bira bi janj kenj u tiina. Nii-la ma si laa mi wiaa dii, lii-nyuasunj ma bira bi janj kenu. 36 Mi bula pipima ari ma nami ne, ama ma bi mi wiaa laa dii. 37 Nuuna kala mi Nyimma si jonjo pimi, u janj ko mi teenj. Niaa deenba kala si ko mi teenj, mi bi janj ko di mi kiriba ta, 38 bēe wiaa mi lii Wia-janj ku tuu di mi n̄aa wialinj nii-la si tinjmi sí che ne, mi titia tuotore wiaa dee. 39 Nla ne nii-la si tinjmi chiche di mii n̄aa: di mi sí leŋe di nialinj u si jonjo pimi kunj-kala lel, ama di mi chuuleba kala dunia diderinj di ba kenj miisinj. 40 Wialinj mi Nyimma sí che ne n̄la: Di nuuna kala si na mi-na u Bie a laa mi wiaa dii, duu janj kenj miisi-la si bi dere. Dunia diderinj maa, ba ma janj chisu suunj le duu kenj miisinj.”

41 Nii ne Juu timma-la suo mo gugurime wiaa. U si si u ne n̄aa kudiile-la si lii Wia-janj ku tuu, nii ne tii ba gugurime u wiaa nii. 42 Nii ne ba bul, “Baala deenj dee Josef bie Yesuu? La jinj u nyimma ari u naanj kala ne. Ee ne saa lelele u si duu lii Wia-janj ne a ku tuu?” 43 Nii ne Yesu bira bula piba, “Má leŋ ma wialinj gurimunj. 44 Nuuna kala bi janj wuo ko mi teenj, see di mi Nyimma-la si tinjmi ne kenj u tiina kaa ko mi teenj, di mi chisu suunj le dunia diderinj. 45 Nialinj sí bul wiaa, Wia Dinj-zonj-

la doluj le, ba ስሙን ስላ ነገር ወገን ሆኖ. Ba si,

‘Wia jan dage niaa kala.’

Nuu-kala si ስላ siri duu jegile nii wialin Wia sii dagu, a gunne u teen, u ne jan ko mi teen. ⁴⁶ U nii ma saa bi nage ari nuu-kala na mi Nyimma Wia ne, see nii-la si lii Wia teen. U dunduna ne nau. ⁴⁷ Wutitii ne mi bulaa pima, nii-la kala si laa mi wiaa dii, u jan ken miisi-la si bi dere. ⁴⁸ Mi ne ስላ kudiile-la sii pi niaa miisin. ⁴⁹ Ma naabalimaba dii kudiile-la ba sii yire ‘Mana’ ne girin tuon. Ari nii kala ba-na ha suba ne. ⁵⁰ Ama kudiile-la si lii Wia-jan ku tuu, di nuu ne diiba, u bi jan suu. ⁵¹ Mina ne ስላ kudiile-la si ken miisin a lii Wia-jan ku tuu. Di nuu ne dii kudiilee deenba, u jan ken miisi-la si bi dere. Mi yaraa namia ne ስላ kudiile-la mi si jan jonjo pi dunia niaa di ba ken miisi-la si bi dere.”

⁵² Yesu si bul nii, Juu tinjaa suomo ken wii-la lilere a bul, “Ee ne baala deen jan wuo ስላ a jon u yaraa namia pila di la chan?” ⁵³ Nii ne Yesu bula piba a bul, “Wutitii ne mi bulaa pima, di ma ne bi mi-na Nuhuobiine Bie yaraa namia chan, a nyua mi chalin maa, ma bi jan ken miisi-la si bi dere. ⁵⁴ Nii-la kala si chan mi yaraa namia, a nyua mi chalin maa, u jan ken miisi-la si bi dere. Di dunia ma ne dere, mi jan chise u tiina suun le duu ken miisin, ⁵⁵ bee wiaa mi yaraa namia sene ስላ kudiilee ne. Mi chalin ma sene ስላ lii-nyualun ne. ⁵⁶ Nii-la kala si chan mi yaraa namia-la a nyua mi chal-la, u jan he mi teen a kaa mu wuu, mi ma jan he u teen a kaa mu wuu. ⁵⁷ Mi Nyimma-la si ken miisin a tinmi nii, nii ne mi ma ken miisin. Nii titia ne nii-la ma si chan mi yaraa namia ma jan ken miisin a tin mi wiaa. ⁵⁸ Kudiile-la si lii Wia-jan ku tuu ne nii. U bi naga kudiile-la ma naabalimaba si die an ha suu ne. Nii-la kala si dii kudiilee deenba, u jan ken miisi-la si bi dere.” ⁵⁹ Yesu bul wiaa deenba

duu he Kapenam tinteen le ne aa dage niaa Wii-chuole dia le.

Wialin si jan pi niaa miisi-la si bi dere

⁶⁰ Niaa yuga a faa to Yesu harin, a nii wialin u si bula a bul, “Wiaa deenba u sii dage, ba heye kinken. Kubee ne jan wuo jegili wiaa deenba?” ⁶¹ Ba bi wii-kala bula, ka Yesu jin ari u haritooro-la ka gurime wiaa ne a tin wialin u si bula le. Nii ne u pieseba a bul, “Wiin deen lene ma na baanin nee? ⁶² Ka di ma ne saa fa na mi-na Nuhuobiine Bie di mi miiraa mu lee-la mi si liaa? ⁶³ Wia Din-zon-la ne ku-la si pila miisi-la si bi dere. Nuhuobiine yaraa dolun-na ስላ pei ne. U bi miisi-la si bi dere wuo pa. Wia Din-zon-la wiaa ne mi bula pima. Ba jan pima miisi-la si bi dere. ⁶⁴ Ama ma donsun bi mi wiaa laa dii.” Bunbun kala Yesu fa jin nialin si bi u wiaa laa dii ne ari nii-la si jan jonu yalle. ⁶⁵ Nii ne Yesu bira bul, “Wiin deen wiaa ne tii mi bula pima ari nuu-kala bi jan wuo ko mi teen, see di mi Nyimma pi u tiina wonbin duu wuo ko.”

⁶⁶ A tin wiin deen wiaa ni-dan-la fa si to u harin, ba miire harin. ⁶⁷ Nii ne Yesu piese u haritooro fii ari balia-la a bul, “Ma ma cho di ma miire mi harin nee?” ⁶⁸ Nii ne Saamon Piita piesu a bul, “La Tiina, kubee teen ne saa la ma jan mu? Wialin ስላ sii bul nii pi niaa miisi-la si bi dere. ⁶⁹ Leele la laa dii a jin ari ስላ ne ስላ Wia Tuo-pul Tiina.” ⁷⁰ Nii ne Yesu pieseba a bul, “Ma niaa fii ari balia dee mi liisee? Ama ma donjo ስላ dinjon ne a ስላ Sitaani tiina.” ⁷¹ Judas, Saamon Isikarot bie wiaa ne u faa bul nii. U fa he u haritooro-la fii ari baliamin tuon ne, ama u ne fa jan jon Yesu yalle.

7

Yesu mu ghieli-balin Jerusalem le

¹ Nii harin Yesu gugolle Galilii tinteen. U bi cho duu mu golle Judiya tinteen le, bee wiaa Juu

tinገaa fa si he Judiya tinገteen ሎ ka che di ba kpuu ne. ² Di Juu tinገaa gbieli-bal kubala yie. Gbiele-la ሎ ba yie len ba diisiin an he lenገee ne a jujuu. Di gbiele-la ne dere, ba bira miira mu a jujuu ba diisiin. ³ Nii ne Yesu ገaanaa bula pi Yesu a bul, "Sii daha a mu Judiya tinገteen, di ገ haritooroo ma wuo na wialin ገ sii ገaa. ⁴ Nii-la sii che di ba jimu, u bi faa ገገaa wiaa. ገ sii ገaa wiaa deenba, len di dunia niaa kala na." ⁵ Ba titia paala bi u wiaa laa dii, ገii ne tii ba bul ገii. ⁶ Nii ne Yesu bula piba a bul, "Bua-la si jan yi di mi mu gbiele-la, u ha bi yie. Ma-na teen bua-na kala maga ne. ⁷ Dunia niaa bima bere, ama ba bere mi-na ne. Mi venee bula piba ari baa ገaa wu-bonገoo ne. ⁸ Má-na lii mu gbiele-la, mi-na ha bi mu, bee wiaa bua-la si jan yi di mi mu ha bi yie." ⁹ U bul ገii an ገon Galilii tinገteen ሎ ne.

¹⁰ Yesu ገaana-la si mu gbiele-la dere, Yesu ma sii mu. Ama u bi niaa hariገ to. U luora mu ne. ¹¹ Juu tinገaa si he gbiele-la ሎ, ba bee chiche Yesu gbiele-la ሎ, a pipiese di nii ሎ ne u he? ¹² Nii ne nialin si he gbiele-la lerin, ba jesin suomo a munsi a bubul Yesu wiaa. Donገsun si duu ገaa ni-zon ne. Donገsun ma bi seye an bul duu nyise niaa ne. ¹³ Ama ba kala faa fá Juu timma-la ne, ገii ne tii nuu-kala bi wuo faasa bul u wiaa.

¹⁴ Gbiele-la si ku kpaamaga donገ, Yesu juu Wia-dia a didage niaa. ¹⁵ U si dage niaa ገii ገaa Juu timma-la si jegile nii wialin wu-kpunገpere. Ba si, "Ee ne baala deen ገin wiaa ገla kinገen an bi lee yie?" ¹⁶ Nii ne Yesu bula piba a bul, "Wialin mi sii dagu, mi titia dolun ሎ dee mii dage. Nii-la si tinገmi ne dagemi wialin. ¹⁷ Nii-la kala sii che duu ገaa wii-la mi si cho, u jan wuo ገin ari wialin mi sii dagu lii Wia teen ne, koo mi titia dolun ሎ ne. ¹⁸ Nii-la si yie bubul wiaa u titia dolun ሎ yie bula chiche u titia yirin ne. Ama nii-la sii che di nii-la si timu laa yirin, u ገaa ni-

titii ne. U bi wiaa ka nyia. ¹⁹ Moosis bil niin pima ne di maa to. Ama ma kun-kala bi nii-la to. Bee ne tii maa che di ma kpumi?" ²⁰ Nii ne nialin bula pu a bul, "ገn nyaase ne. Kubee nii che di u kun?" ²¹ Nii ne Yesu bula piba a bul, "Mi ገaa wu-bala ne ma che-wiesii-la cheen, u ገaa ma wu-kpunገpere. ²²⁻²³ Moosis fa bula pima di ma kikeri ma biirin penee. U dee bi ገii suomo. U naabalimaba ne suomo ገaa ገii. U si ገaa ma kisin ገii, ma paala yie keru ma biirin penee che-wiesii-la cheen, di ba lullun ne tel ገii ሎ. Di ma ne saa jan wuo to Moosis niin aa keru ma biirin penee che-wiesii-la cheen, di ba lullun ne tel che-wiesii-la cheen, bee ne saa tii maa na baaniገ a tinገ mi si ገaa puwuoloo duori che-wiesii-la cheen?" ²⁴ Di nuu ne ገaa wii, ma sí guu jon taali pu a tinገ ma si biina ari u bi worun ገaa wiaa. Má biine wii-la tuon a ገin u wutitii, an-na jon taali pu."

²⁵ Nii ne niaa donገsun si lii Jerusalem piесе a bul, "Baala deen dee ba chiche di ba kpu ገii?" ²⁶ Na, u ne chin niaa tuon ገii aa bul wiaa, ka nuu-kala bi wii wuo bul, koo nihiasila jima ari u ne ገaa Kirisito, nii-la Wia si liisaa? ²⁷ Nii-la Wia si jan tinገ, duu ne ko, nuu-kala bi jan ገin u si lii lee-la, ama la kala ne ገin lee-la baala deen si lia." ²⁸ Yesu sii dage niaa Wia-dia-la tuon ገii, ገii ne u faasa piесе, "Ma senገ ገinገmi nee, a ገin lee-la mi si liaa? Ama mi saa bi mi titia dolun ሎ ne ko. Nuu ne tinገmi. Nii-la ma saa si tinገmi ገaa Wutitii Tiina ne. Ma buu ገin. ²⁹ Mi-na jimu ne, bee wiaa mi fa he u teen ne. Nii ne u tinገmi." ³⁰ Nii ne ba chiche di ba kenu, ama bua-la ሎ u si jan suu ha bi yie. Nii ne tii nuu-kala nisin buu dige. ³¹ Ama niaa yuga nialin tuon a laa u wiaa dii a piесе a bul, "Ma biina di Kirisito, nii-la Wia si jan liise ne ko, u jan ገaa wu-magilaa kii nia deen?"

Ba tinገ niaa di ba mu kenገ Yesu

³² Farisii tinገaa si nia di nialin muገso bubul Yesu wiaa ገii, ገii ne ba di nialin si kpu pusun pipi Wia kuhiasin tin ba tintinni-biisin di ba mu ken Yesu. Ba si mu lee-la Yesu fa si he di ba kenu, ba nii wialin u si bula pipi niaa. ³³ U si, “Mi jan he ma teen tapulaa banmene, an miira mu nii-la si tinmi teen. ³⁴ Ma jan chemi ka. Lee-la mi si jan he, ma bi jan wuo mu dime.” ³⁵ Nii ne Juu timma-la piese di nii ne uu che duu mu ba bi jan nau? Duu che duu mu Giriik tinteen, lee-la Juu tinገaa si guoli ba tuon ne, a didagebaa? Ba bira si, ³⁶ “U si di la jan cheu ka, a bira bul di la bira bi jan wuo mu lee-la u si jan he. U si bul ገii, u bubuon ne be?”

Yesu bul wiaa a tige lii-la sii pi niaa miisin le

³⁷ Gbiele-la che-derin, tapulii-la ne fa ገaa gbiele-la siifan cheen. Nii ne Yesu sii chin a faasa bul, “Nii-la kala lii-nyuasun si kene, ma len duu ko mi teen a nyua liin. ³⁸ Nii-la kala si laa mi wiaa dii, u jan nage lii-bulo u tuon le a bubul. Ba bul ገla ne Wia tenin tuon.” ³⁹ Yesu bul wiaa deenba a tige Wia Din-zon-la le ne u si jan jono he nialin si laa u wiaa dii le. Bua-la le di u ha bi Wia Din-zon-la jono heba le, be wiaa u ha bi suun le sie duu laa yirin.

Nialin pore dono le a tin Yesu wiaa

⁴⁰ Ni-dan-la fa si he dime a nii wialin Yesu si bula, ገii ne ba donsun bul di nia deen sene ገaa nii-la sii bul wiaa, Wia Din-zon-la dolun le ne. ⁴¹ Donsun ma si, duu ne ገaa Kirisito, nii-la Wia si liisa. Ama donsun ma si di nii-la Wia si liisa bi jan lii Galilii tinteen. ⁴² Wia tenin tuon ba bula ari Kirisito, nii-la Wia si liisa, ገaa Devit doho nuu ne a lii Betlehem. Devit jan ne fa Betlehem. ⁴³ Nii ne nialin ken wiin deen lilere a pore dono le. ⁴⁴ Ba donsun chiche di ba ken Yesu, ama nuu-kala bi nisin jono digu.

⁴⁵ Nii ne tintinni-biisi-la ba si tima di ba mu ken Yesu, ba miira mu

Farisii tinገaa ari nialin si kpu pusun pipi Wia kuhiasin teen, ari na-hillin. Nii ne ba pieseba a bul, “Be ne tii ma buu kaa ko?” ⁴⁶ Nii ne ba bul, “Nuu-kala ha bi wiaa bula ari baala deen sii bul ገii.” ⁴⁷ Nii ne Farisii kuhiasi-la pieseba a bul, “U nyisema ma ne? ⁴⁸ Ma nia ari ma kuhiasin tuon koo la Farisii tinገaa tuon kubala ma ha laa u wiaa dii? ⁴⁹ Ama ni-dan deen kala si hilime, ba bi wialin Moosis si ገmunsa bil jin. Wia jan kpu ba nyusun.” ⁵⁰ Baal kubala baa yire Nikodiimas, u ma fa ገaa Farisii tinገaa dono ne a he ba tuon. U-na fa laa sipaan mu Yesu teen ne an ka. ⁵¹ Nii ne u bula piba a bul, “La kisin ne di la jon cheerin a pi nuu duu ne ገaa wii, see di la laa sipaan nii tiina niin, a jin wii-la u si ገaa.” ⁵² Nii ne Farisii timma-la piesu a bul, “N ma ገaa Galilii tiina ne? Karime Wia tenin. Di ገ ገaa ገii, ገ jan na ari nialin sii bul wiaa, Wia Din-zon-la dolun le, ba kun bi Galilii tinteen lia.” [⁵³ Nii ne ba kala sii pise a mu ba diisin.

8

Ba ken haal-la si pin nuu bala

¹ Nii ne ka Yesu ma lii dime a jil peel kubala baa yire Oliv nyun. ² Tan si pula chichu-fela, u bira miira mu a juu Wia-dia. Niaa ku gbaaru, u hon a bira suomo didageba. ³ Nii ne Wia tenin kerichiba ari Farisii tinገaa ken haal kubala ku juu. Ba ken haal-la duu pin nuu bala. Ba len u chin ba tutubaanin. ⁴ Nii ne ka ba bula pi Yesu a bul, “La kuhian, la ken haala deen duu hiile nuu bala ne. ⁵ Wialin Moosis fa si bile di niaa tuto daga ari nuu-kala ne ገaa ገii, di la yaga kpuu ne ari tabiaa. Be ne ገ ma bul?” ⁶ Ba bul ገii di ba ገmoo Yesu fehe le ne, a wuo na wonbiin a bul u teen. Nii ne Yesu ken u nyun chugili tinteen an ken u neniin tutuuri tinteen. ⁷ Ka ba ha chin aa piese wiaa. Nii ne Yesu ken u nyun wul wia nyun a

bula piba a bul, “Ma ku-la kala ha si bi haache wii ስaa, má leŋ duu laa sipaan jon tabiin a yage haalla, di ku-kaanaa ma pe.”⁸ Nii ne u bira ken u nyun chugili a bira ken u neniin a tutuuri tinteen.⁹ Ba si nii wialin u si bula, ba kala lii kun kun. Ba tuon nihiasi-la ne laa sipaan lii, ka ku-kaanaa tuto, an ka Yesu ari haal-la dunduna lee-la.¹⁰ Nii ne Yesu ken u nyun jee a piese haal-la a bul, “Nii ne nialin he? Nuukala tuo duu yagin kpoo?”¹¹ Haal-la si di nuukala tuo. Nii ne Yesu bula pu a bul, “Too, mi ma bi jan naan wii-kala. Viiri an bira si haache ስaa.”]

Yesu si duu ne ስaa dunia niaa pulumun

¹² Nii ne Yesu bira suomi a didage niaa. U bula piba a bul, “Mi ne ስaa dunia niaa pulumun. Nii-la kala si tomi bi jan ven birimin tuon. U jan ven pulumun tuon. Miisi-la mi si jan pu jan chaane.”¹³ Nii ne Farisii timma-la bula pu a bul, “N titia wiaa ne ስ bubul nii, wialin saa ስ si bula bi wutitii kene.”¹⁴ Nii ne Yesu bula piba a bul, “Di mi ne bul mi titia wiaa maa, wii-la mi si bula ስaa wutitii ne, bee wiaa mi jin lee-la mi si lia ne, a jin lee-la mi si jan mu. Ama ma-na bi lee-la mi si lia jin, a bira bi lee-la mi si jan mu ma jin.”¹⁵ Ma yie jon cheerin pi nuu a tin ma si biina ari u si bi worun ስaa wiaa. Mi-na bi nuukala cheerin pa.¹⁶ Di mi ne faa jon cheerin pi niaa maa, u fa jan ስaa wutitii, bee wiaa mi dunduna dee bi cheerin jon pi tiina, mi Nyimma-la si tinmi ne pemi le la jon cheerin a pi tiina.¹⁷ Wialin Moosis fa si bile di niaa tuto daga ari niaa balia ne na wiin, a bul duu ስaa wutitii ne, di wii-la sene ስaa wutitii ne.¹⁸ Mii bul mi titia wiaa ne, mi Nyimma-la ma si tinmi, u ma bubul mi wiaa.”¹⁹ Nii ne ba piesu, “Nii ne ስ Nyimma he?” Nii ne Yesu bul, “Ma bimi jin, nii wiaa ma bi mi Nyimma ma jin. Di ma ne fa jinmi, ma fa jan jin mi Nyimma maa.”²⁰ Yesu bul

wiaa deenba kala bua-la le u sii dage niaa Wia-dia le ne, lee-la ba si yie jon kialin bile pipi Wia. Ka nuu-kala buu kene, bee wiaa bua-la le ba si jan kenu ha bi yie.

Yesu si di niaa bi jan wuo mu lee-la u si jan mu

²¹ Nii ne Yesu bira bula pi nialin a bul, “Mi jan viiri, ma jan chemi ka, ma saa jan suu ari ma haacheba. Lee-la mi sii mu, ma bi jan wuo mu dime.”²² Nii ne Juu timma-la piese donjo a bul, “U si, la bi jan wuo mu lee-la u sii mu. U saa bula magise ari u jan kpu u titia ne koo ee ne u bul ስla?”²³ Nii ne Yesu bira bula piba a bul, “Ma lii dunia deen ne, ka mi ma lii Wia-jan. Ma lii dunia ne, an ka mi ma bi dunia lia.”²⁴ Mi laa sipaan bula pima ari ma jan suu ari ma haacheba. Ma sene jan suu ari ma haacheba, see di ma laa mi wiaa dii ari mi si si mi ስaa nii-la.”²⁵ Nii ne ba piesu a bul, “Kubee ne ስ ስaa?” Nii ne Yesu bula piba a bul, “Mi si suomo dage niaa, mi dage nii-la mi si ስaa ne a pima.”²⁶ Mi ken wiaa yuge ne di mi bul a tigema le, a wuo to wialin le a jon cheerin pima. Nii-la si tinmi, u sene ስaa Wutitii Tiina ne. Wialin mi sii nii, u niin le ne mi saa bula pi dunia niaa.”²⁷ U sii bul nii, nialin fa bi jin ari u Nyimma Wia wiaa ne u bulaa piba nii.”²⁸ Nii ne Yesu bula piba, “Di ma ne ken mi-na Nuhuobiine Bie kpaase daa-gese nyun, ma jan jin ari mi ne ስaa niila mi si si mi ስaa. Nii ma le ne ma jan to jin ari mi bi wii-kala ስaa mi titia dolun le, ama mi yie bul wialin mi Nyimma si dagemi ne.”²⁹ Nii-la ma saa si tinmi bimi dunduna leŋe, u ma he mi teen ne, bee wiaa mi yie ስaa wialin sii tore u tuon ne.”³⁰ U si bul wiin deen, niaa yuga a laa u wiaa dii.

Nialin si sene ስaa Abiraham doho niaa

³¹ Nii ne Yesu bula pi Juu timma-la si laa u wiaa dii a bul, “Di ma ne nii mi niin wialin, ma jan sene ስaa

mi haritooroo. ³² Ma jaᅇ jii wutitii. Wutitii-la saa jaᅇ leᅇ di Wia laama ta di ma tii ma titia.” ³³ Juu timma-la si laa Yesu wiaa dii ma bul, “La paala ᅇaa Abiraham doho niaa ne. La ha bi nuu-kala yosu ᅇaa. Beᅇ ne saa tii ᅇ bul di Wia jaᅇ laala ta di la tii la titia?”

³⁴ Nii ne Yesu bula piba a bul, “Wutitii ne mi bulaa pima, nuuna kala si ᅇaa haache, u tiina ᅇaa haache yonᅇ ne. ³⁵ Di yomo ne he nuu dia le, u bi dia-la le jaᅇ he deenᅇ deenᅇ. Ama di dia-la tiina ne keᅇ bii, u-na jaᅇ he dia-la le a kaa mu wuu. ³⁶ Di mi-na Wia Bie ne saa laama ta, mi sene laama ta ne di ma tii ma titia. ³⁷ Mi jima ari ma ᅇaa Abiraham doho niaa ne, aᅇ ka ma chiche di ma kpumi, beᅇ wiaa wialiiᅇ mi si dagema bi ma digilaa jua. ³⁸ Mi-na yie bul wialiiᅇ mi Nyimma si dagemi ne, ma ma ᅇiᅇaa wialiiᅇ ma nyimma si dagema di ma ᅇiᅇaa.”

³⁹ Nii ne ba bula pu a bul, “Abiraham ne ᅇaa la nyimma.” Nii ne Yesu ma bul, “Di ma ne sene fa ᅇaa Abiraham biiri, ma fa jaᅇ ᅇiᅇaa wialiiᅇ Abiraham fa sii ᅇaa. ⁴⁰ Mi bul wutitii ne pima, wialiiᅇ Wia si dagemi. A tiᅇ wiᅇ deenᅇ wiaa ne maa che di ma kpumi. Abiraham fa bi ᅇii ᅇaa. ⁴¹ Maa ᅇaa wialiiᅇ ma nyimma sii ᅇaa ne.” Nii ne ba bul, “La bi maᅇaa-biiri ᅇaa. La kala nyimma ne kubala. Wia ne ᅇaa la Nyimma.” ⁴² Nii ne Yesu bula piba a bul, “Di Wia ne sene fa ᅇaa ma Nyimma, ma fa jaᅇ chomi, beᅇ wiaa, Wia teenᅇ ne mi lii a ko daha. Mi titia doluᅇ le dee mi ko. U ne tiᅇmi. ⁴³ Beᅇ ne saa tii ma bi wialiiᅇ mi si bula bubuᅇᅇ jii? Ma bi che di ma jegile nii wialiiᅇ mi sii bul. Nii ne tii ma bi ba bubuᅇᅇ jii. ⁴⁴ Ma nyimma ne ᅇaa Sitaani. Ma ma saa cho di maa ᅇaa u tuᅇtuᅇ wiaa ne. Dunia di-suomuᅇ kala le ne u ᅇaa ni-kpuuru. U titia bi wutitii keᅇ. Nii ne tii u bi wutitii ka to. Di u ne nyia wiaa maa, u nagisiᅇ ne paala ᅇii. U ᅇaa wu-nyiaru ne, a paala ᅇaa wu-

nyiaraa kala nyimma maa. ⁴⁵ Ama a tiᅇ mi sii bul wutitii wiaa ne ma bi mi wiaa laa dii. ⁴⁶ Ma kubee ne jaᅇ wuo dage ari mi keᅇ haache? Di mi nii bul wutitii, beᅇ ne saa tii ma bi mi wiaa laa dii? ⁴⁷ Nii-la kala si lii Wia teenᅇ yie jegile nii wialiiᅇ Wia sii bul ne. Ma bi Wia teenᅇ lia, ᅇii ne tii ma bi wialiiᅇ u sii bul jegile nii.”

⁴⁸ Nii ne Juu timma-la bula pi Yesu a bul, “La bi wutitii bulaa, la si si ᅇ ᅇaa Samaria tiina neᅇ, jii-bomuᅇ ma keᅇiᅇ?” ⁴⁹ Nii ne Yesu bula piba a bul, “Jii-bonᅇ bimi keᅇ, ama mii pi mi Nyimma jirima ne, aᅇ ka ma-na bimi jirima ka pa ᅇii. ⁵⁰ Mi bi yiriᅇ che pipi mi titia. Ama nuu ne he dime a che yiri-la pipimi. U ne saa jaᅇ dii nialiiᅇ si via mi wiaa sariya. ⁵¹ Wutitii ne mi bulaa pima, nii-la kala sii to mi niᅇ wiaa, u bi jaᅇ suu.” ⁵² Nii ne Juu timma-la bula pu a bul, “Lele la jima ari ᅇ keᅇ jii-bonᅇ ne. Abiraham suba ne. Nialiiᅇ ma sii bul wiaa, Wia Diᅇ-zonᅇ-la doluᅇ le, ba ma suu. Aᅇ ka ᅇ bul di nii-la kala sii to ᅇ niᅇ wiaa bi jaᅇ ko duu suba. ⁵³ La nyimma Abiraham suba ne. ᅇ saa biina di ᅇ kiiu neᅇ? Nialiiᅇ sii bul wiaa, Wia Diᅇ-zonᅇ-la doluᅇ le ma suu. ᅇ saa biina ᅇ ᅇaa kubee ne?” ⁵⁴ Nii ne Yesu bira bula piba a bul, “Di mi nii pi mi titia yiriᅇ, yiri-la ᅇaa yiri-peᅇ ne. Mi Nyimma ne nii-la sii pimi yiriᅇ, nii-la ma si si u ᅇaa ma Wia ne. ⁵⁵ Ma buu jii, ama mi-na jimu ne. Di mi ne jaᅇ bul ari mi buu jii, mi jaᅇ ᅇaa wu-nyiaru, ari ma si ᅇaa wu-nyiaraa ᅇii. Mi saa jimu ne a tuto u niᅇ. ⁵⁶ Ma naabalima Abiraham nia ari mi jaᅇ ko dunia duu nami. U si nii ᅇii, u tuᅇ fa tuᅇ. U paala nami ne.” ⁵⁷ Nii ne Juu timma-la bula pu a bul, “ᅇ ha paala bi jisiᅇ mahiiᅇ balia ari fii yie. Eᅇ ne saa ᅇ ᅇaa a na Abiraham?” ⁵⁸ Nii ne Yesu bula piba a bul, “Wutitii ne mi bulaa pima, ka di ba-na lul Abiraham, mi fa he dime ne.” ⁵⁹ Nii ne ba paa tabiaa di ba yagu. U keᅇ u titia faa a luora lii Wia-dia-la tuᅇᅇ.

9

Yesu vaare baal-la ba si lulu duu nyulima

¹ Yesu si jon wonbiin viven, u na baal kubala, ba lulu duu nyulima ne. ² Nii ne Yesu haritooro piesu a bul, "Kuhian, kubee haache ne nya baala deen nyulime? Baal-la haache ne koo u nyimma ari u naan haache ne?" ³ Nii ne Yesu bula piba a bul, "Baal-la nyulimun bi u haacheba le lia, u nyimma ari u naan haache ma dee bi tii u nyulime. U nyulima di niaa wuo na nii Wia dol-la si wuo tin tintinjaa u le ne. ⁴ La si na wonbiin, ma len di la tin tintimii-la nii-la si tinmi di mi tin. Bua kubala jan yi nuu-kala bira bi jan wuo tin tintimii-la. ⁵ Mi ha si he dunia le nii, mi ne nya dunia niaa pulumun." ⁶ Yesu si bul nii ne, u tu nantuurun bil tinteen a kaa buu tiarin, a paa a taa baal-la siaa, an bula pi baal-la a bul, ⁷ "Sii tuu fuo kubala baa yire Siloom (yirin deen bubuon ne nya 'mi timu ne') a son n siaa." Nii ne baal-la sii tuu son u siaa fuo-la le. U siaa suri, u miira ko. ⁸ Nii ne nalin si kpagu, ari nalin kala fa si na baal-la duu faa sul kiaa, ba pipiese donjo, "Baala deen dee fa bi hono susul kiaa nii?" ⁹ Donson si u ne, donson ma si duu dee, ama u ta nagu ne. Nii ne baal-la titia bul duu ne nii. ¹⁰ Nii ne ba piesu, "Ee ne n nya n siaa suri?" ¹¹ Nii ne baal-la bul di nii-la ba sii yire Yesu ne buu tiarin, a paa taa u siaa le, an bula pu duu tuu Siloom fuo-la a son. U tuu son, u siaa suri. ¹² Nii ne ba piesu, "Nia le ne u he?" Baal-la bul di u bi jin.

Farisii tinjaa piесе nyulun-la vaarin wiaa

¹³ Nii ne ba ken baal-la fa si nyulima a kaa mu Farisii tinjaa teen. ¹⁴ Tapulii-la Yesu si buu tiarin a taa baal-la siaa ba suri, u nya che-wiesii-la cheen ne. ¹⁵ Nii ne Farisii timma-la piесе baal-la nii u si nya u siaa suri. Baal-la bula piba a bul

di Yesu nya tiarin ne taa u siaa, u son, u siaa suri. ¹⁶ Nii ne ba ken wii-la lile. Farisii tinjaa donson bula ari Wia dee bi baala deen tima, bee wiaa u bi ba che-wiesii-la kisin le ka to. Nii ne donson ma si di "Ee ne nuu si nya haache tiina jan wuo nya wu-magilaa deenba?" ¹⁷ Nii ne Farisii timma-la bira piесе baal-la a bul, "U si suri n siaa nii, ni-bee ne n biina ari u nya?" Nii ne baal-la si u-na biina ari nalin sii bul wiaa, Wia Din-zon-la dolun le donjo ne.

¹⁸ Ama Juu tinjaa kuhiasi-la si, ba-na bi laa dii ari baal-la fa nyulima ne an leele nina nii, see di ba yire u nyimma ari u naan. ¹⁹ Nii ne ba yire baal-la nyimma ari u naan a piесеba, "Ma bie ne nlaa? Ma si, ma lulu duu nyulima nee? Ee ne u nya a nina leele?" ²⁰ Nii ne baal-la nyimma ari u naan bul, "La jima ari la bie ne nla. La jima la lulu maa duu nyulima ne. ²¹ Ama la bi jin u si nya nii u siaa suri, la bira bi jin nii-la ma si nya u siaa suri. Ma piesu, u waa ne. U titia jan wuo bula pima." ²² Baal-la nyimma ari u naan faa fa Juu timma-la ne. Nii ne tii ba bul nii. Juu timma-la fa si di nii-la kala si bula ari Yesu ne nya Kirisito, nii-la Wia si liisa, ba jan kiru ba Wii-chuole dia le. ²³ U naan ari u nyimma jin nii ne a bul duu waa ne, di ba piesu.

²⁴ Nii ne Farisii timma-la bira yire baal-la ba si lulu duu nyulima a bul, "La jima ari baala deen nya haache tiina ne. Wia sipaan bul wutitii pila." ²⁵ Baal-la si, "Mi-na bi jin di baal-la nya haache tiina koo u bi haache tiina nya. Ama wii-la mi-na si jima ne nla: Mi fa nyulima ne, ama leele mi siaa suro ne." ²⁶ Nii ne ba piesu a bul, "Ee ne u nya a suri n siaa?" ²⁷ Nii ne baal-la bula piba a bul, "Mi laa sipaan bula pima ne, ka ma bi jegile. Bee ne tii ma bira chiche di ma nii? Ma ma saa che di ma mu nya u haritooro nee?" ²⁸ Nii ne ba tuusu worun an bul, "N ne nya u haritooro, ama la-na nya

Moosis haritooroo nē. ²⁹ La jima ari Wia fa bul wiaa pi Moosis nē, ama baal-la deen-na, la bi jin u si lii lee-la kala.” ³⁰ Nii nē baal-la bul, “Wukpunkpere nē ስላ. Ma bi jin lee-la u si lia, ama u nē suri mi siaa. ³¹ La jima ari Wia bi haache tinጎaa wubuluጎ ka jegili. Uu jegili nialiጎ sī zilu nē aጎ pē ስጎaa wialiጎ u si cho. ³² Dunia si suomo, ma ha nia ari nuu ba si lula duu nyulima, di nuu suri u siaa? ³³ Di nii-la nē bi Wia teenጎ lia, u bi wiinጎ deenጎ wuo ስaa.” ³⁴ Nii nē ba bula pi baal-la a bul, “Ba paala luluጎ di ስ ስaa haache tiina nē, ka ስ ma saa che di ስ dagela koo?” Nii nē ba kiru ta u lii Wii-chuole dia-la le.

Nii-la si bi Wia Diጎ-zጎ-la kenē, u nyulima nē.

³⁵ Yesu si nia di ba kiri baal-la ta u lii Wii-chuole dia-la tuጎ, u mu cheu, a nau a piesu, “ጎ laa Nuhuobiine Bie wiaa dii koo?” ³⁶ Nii nē baal-la piesu, “Kubee nē ስii? Dagemi tiina di mi laa u wiaa dii.” ³⁷ Nii nē Yesu bula pu a bul, “ጎ paala nau nē. U nē nii-la sī bul wiaa ስ teenጎ ስii.” ³⁸ Nii nē baal-la tuu kpirimi Yesu sipaanጎ a chuolu aጎ bul, “Mi Tiina, mi laa ስ wiaa dii nē.” ³⁹ Nii nē Yesu bul, “Mi ko dunia di mi ስaa di nialiጎ si nyulima, di ba siaa suri nē, ka di mi ስaa di nialiጎ si si di ba siaa suro nē, di ba nyulime.” ⁴⁰ Farisii timma-la si chinጎ dime a nii Yesu si bul ስii, ba piesu a bul, “ጎ biina la ma nyulima nē?” ⁴¹ Nii nē Yesu bula piba a bul, “Di ma nē fa nyulima a bi wutitii jinጎ, ma fa bi wii-kala cheye. Ama leele ma si folo bul di maa na nē a jinጎ wutitii ስla, ስii-na ma cheerinጎ ha hema le nē.”

10

Yesu si u nē ስaa pie-daari-zጎmunጎ

¹ Nii nē Yesu mage namaga a bul, “Wutitii nē mi bulaa pima, nii-la kala si bi boinጎiinጎ to juu pie-dia, aጎ wule to keጎ juu, u tiina ስaa gaaru nē. ² Ama nii-la si to pie-dia

boinጎiinጎ juu, u nē ስaa pie-se-la pie-daara. ³ Pie-dia bibenne yie suri pie-dia boinጎiinጎ nē a pu. Pie-se-la ma jinጎ u yiikoro. U yie yiyireba kubala kubala, a laa ba sipaanጎ a kenba lii. ⁴ Di u nē kenጎ u kiaa kala lii, u yie laa ba sipaanጎ nē, ka piesee tuto u hariጎ, beጎ wiaa ba jinጎ u yiikoro nē. ⁵ Ba bi nuhuoru hariጎ ka to, ba janጎ miira fá u hariጎ, beጎ wiaa ba bi nuhuorula yiikoro jinጎ.” ⁶ Yesu mage namaga deenጎ piba, ka ba bi wii-la u si bula piba bubuጎ jinጎ.

⁷ Nii nē Yesu bira bula piba a bul, “Wutitii nē mi bulaa pima, mi nē ስaa pie-dia-la boinጎiinጎ. ⁸ Nialiጎ kala si laa sipaanጎ ko mi le a nyia wiaa bul di Wia nē tinba, ba kala ስaa gaaraa nē, pie-se-la ma bi ba yiikoro le ka to. ⁹ Mi nē ስaa boi-la, nii-la kala si tomi le juu, mi janጎ laau ta. Nialiጎ kala si jua, mi janጎ benba ari niaa sī ben piesee ስii, a lenጎ ba lii didii yanጎ aጎ miira kuu juu. ¹⁰ Gaara-na yie ko duu gaa a kpu nē koo duu chei kiaa, ama mi-na ko di niaa wuo kenጎ miisinጎ, di ba tuጎ tutore woruጎ buana kala le.” ¹¹ Yesu bira bula, “Mi nē ስaa pie-daari-zጎmunጎ. Pie-daari-zጎmunጎ yie jonጎ u miisinጎ yoo suuጎ nē u piesee wiaa. ¹² Ama nii-la si bi piesee tii aጎ didaa, ka ba titimu, u nē yie na gunguro duu ko, u lenጎ pie-se-la aጎ fá. Gunguro-la ku keጎ ba doጎsunጎ aጎ ስaa doጎsunጎ pise. ¹³ U yie fá, beጎ wiaa u daa pie-se-la, ka ba titimu nē. U sipaa kala tuo pie-se-la le. ¹⁴ Mi nē ስaa pie-daari-zጎmunጎ. Mi jinጎ mi piesee, mi piesee ma jinmi. ¹⁵ Nii titia nē mi Nyimma jinmi, mi ma jimu. Mi jonጎ mi miisinጎ yoo suuጎ, mi piesee wiaa. ¹⁶ Mi kenጎ piesee doጎsunጎ maa, aጎ ka ba tuo piesee deenba tuጎ. Mi janጎ kenba kaa ko. Ba ma janጎ jinጎ mi yiikoro a kala ስaa ni-bala piesee, ba pie-daara ma ስaa kubala. ¹⁷ Mi jonጎ mi miisinጎ nē yoo suuጎ mi piesee wiaa, ka di mi bira laa. Nii nē tii mi Nyimma cho mi wiaa ስii. ¹⁸ Nuukala dee bi janጎ wuo lenጎ mi jonጎ mi miisinጎ yoo suuጎ, mi

titia tuotorun ለ ነጹ. Mi kenj dolun di mi jonj mi miisinj a yoo suun, a bira kenj dolun di mi laa mi miisinj maa. Mi Nyimma ne pimi dolun deenj.”

¹⁹ Yesu si bul wiaa deenba, Juu timma-la bira kenj wiaa lilere. ²⁰ Ba jesinj si di beɛ ne tii ba jijegili u wiaa, di jinsinj ne kenu u nyinyaase. ²¹ Ba donsunj ma bul di nii-la jisinj si kene bi wiaa deenba wuo bul. U bira bi nyulimaa ma siaa wuo suri.

Yesu bula ari u ne naa Wia Bie

²² Nii ne Juu tinjaa gbiele kubala yi di ba gbieli Jerusalem ለ. Bua deenj ለ ne ba liliisi ba si saa ba Wia dia dere a jonjo pi Wia. ²³ U fa naa waarinj chene tuon ne. Bua deenj ለ ne Yesu vivenj zawura-la tuon ba sii yire Solomonj zawura a he Wia dia-la ለ. ²⁴ Nii ne Juu tinjaa gbaaru a piesu a bul, “Eɛ ne η janj kenjla dieni mage ηla an-na bula pila nii-la η si naa? Di η ne naa Kirisito, nii-la Wia si liisa, chaasa bula pila.”

²⁵ Nii ne Yesu bula piba a bul, “Mi laa sipaanj bula pima ne, ka ma bi laa dii. Tinjimii-la mi sii tinj mi Nyimma dolun ለ dage nii-la mi si naa ne. ²⁶ Ama ma bi mi piesee naa, ηii ne tii ma bi mi wiaa laa dii. ²⁷ Mi piesee jinj mi yiikoro ne, mi ma jinba, ba tuto mi harinj. ²⁸ Nii ne mi piba miisi-la si bi dere, ba bi janj ko di ba suba. Nuu ma saa bi janj wuo kenjba kaa laa mi nisinj ለ da. ²⁹ Mi Nyimma-la si jonba pimi, u ne kii kun-kala. Nuu ma kala saa bi janj wuo kenjba kaa laa u nisinj ለ. ³⁰ La di mi Nyimma kala naa kubala ne.”

³¹ Yesu si bul ηii, Juu timma-la bira paa tabiaa di ba yagu. ³² Nii ne Yesu bula piba a bul, “Mi naa wu-zonjoo yuge ne ma sipaanj di ma na. Mi Nyimma ne pimi dolun mii naa. Ba kubee wiaa ne tii maa che di ma yagemi?” ³³ Juu timma-la ma miira bul, “La bi che di la yaginj a tinj η si naa wu-zomɔ-la wiaa, ama η naa nuhuobiinj ne anj kenj η titia a kaa birime Wia, a tutuuse Wia jonjoo. Nii ne tii.” ³⁴ Nii ne Yesu bula piba

a bul, “Wia teninj tuon seme donjo ba ηmunja a bul di la nage Wia ne. Wia bul wiinj deenj pi nialinj ba si ηmunje Wia teninj pa ne. ³⁵ U naa wutitii ne, la bi janj wuo via Wia teninj.” ³⁶ Nii ne Yesu bul, “Wia si liisemi, a tinj mi ku tuu dunia, ee ne saa ma janj bul di mii tuuse Wia jonjoo ne di mi ne bula bul di mi naa Wia Bii ne? ³⁷ Di mi ne bi mi Nyimma tinjinjaa ka tinj, ma si mi wiaa laa dii. ³⁸ Ama di mi nii tinj mi Nyimma tinjinjaa, ma laa mi wiaa dii a tinj tinjimii-la mi sii tinj wiaa, ari ma si bi wialinj mi si bula pima laa dii kala. Nii ለ ne ma janj wuo to jinj a laa dii ari mi Nyimma hemi ለ ne. Mi ma heu ለ.” ³⁹ U si bul ηii, ba bira chiche di ba kenu, u fori ba nisinj ለ.

⁴⁰ Nii ne Yesu bira miira mu kieli Jordanj fuonj, a mu lee-la Jonj fa sii fo niaa Wii-chuole liinj a he dime. ⁴¹ Niaa yuga a ko u teenj. Ba si di Jonj fa bi wu-magil kala naa, ama wialinj kala u fa si bula a tige baala deenj ለ naa wutitii ne. ⁴² Niaa fa yuga a laa u wiaa dii lee-la.

11

Lazoros sii suun ለ

¹⁻² Baal kubala ne fa he tanj kubala ለ, tanj-la yirinj ne Betani. Baal-la yirinj ne fa Lazoros. U dihaalaa Meerij ari Maata ma fa he lee-la ne. Meerij deenj ne bua kubala ለ jonj tulaali a bisa he la Tiina Yesu naasinj ለ, anj kenj u nyu-punaa a tiike. Nii ne Lazoros fa wiwiile. ³ U dihaalaa tinj ba mu bula pi Yesu a bul, “La Tiina, nii-la η si cho ka wiilu ne.” ⁴ Yesu si nii wiinj deenj, u si, “Nyanyalinj deenj dee bi maga di Lazoros wiila suu, ama di Wia yirinj to ηii ለ ne a yire, di mi ma Wia Bie yirinj to dime yire.”

⁵ Yesu fa cho Maata ari u naana ari Lazoros ne kinjenj. ⁶ U si nia di Lazoros ka wiilu lee-la u fa si he, ηii ne u bira chua dime tapulaa balia. ⁷ Nii harinj ne u bula pi u haritooroo a bul, “Ma lenj di la miira mu Judiya tinteenj.” Betani fa he Judiya tinteenj

le ne. ⁸ Nii ne Yesu haritooroo bula pu a bul, "La kuhian, Juu tinjaa faa che di ba paa tabiaa yagin lee-la ne, u bi diene, an ka η biraa che di η mu dime nii?" ⁹ Nii ne Yesu mage namaga a dage ari u suun bua ha bi yie. U si, "Tapulun ken hawaba fii ari balia ne. Nii wiaa, di nuu nii ven wiiheyε, u bi jan gigerε kiaa, bee wiaa lerin pulla ne. ¹⁰ Ama di η nii ven titanin, η yie gigerε kiaa ne, bee wiaa pulumun tuo." ¹¹ Nii ne Yesu bira bula pi u haritooroo a bul, "La nanɔɔɔ Lazɔɔs pin don ne, ama mi saa jan mu chisu don ε." ¹² Nii ne u haritooroo bula pu, "Di u ne pin don, nii-na u jan duori." ¹³ Yesu si bul nii, u si ari Lazɔɔs suba ne, an ka u haritooroo biine ari don titia ne u sene pin. ¹⁴ Nii ne Yesu chaasa bula piba ari Lazɔɔs suba ne. ¹⁵ Nii ne Yesu bul, "A tin ma wiaa mi tuon tɔɔ ari bua-la ε Lazɔɔs si suba mi tuo lee-la. Nii ε ne ma jan to a wuo laa mi wiaa dii. Má len di la mu u teen." ¹⁶ Yesu haritooroo tuon don yirin ne fa Tomas. Ba kenu yiyire daalierin ma ne, bee wiaa ba fa ηaa daalierin ne. Nii ne u bula pi u donsun tinjaa a bul, "Má len di la kala to Yesu harin, duu ne ηaa suu maa, di la kala suu."

¹⁷ Nii ne Yesu ari u haritooroo mu Betani. Ba si mu yi lee-la, niaa bula pu ari ba si hugi Lazɔɔs, u tapulaa banese ne ηla. ¹⁸ Betani ari Jerusalem fa ηaa ari meel-daasin balia ne. ¹⁹ Juu tinjaa fa yuga a lii Jerusalem ko Betani di ba lolle Maata ari Mɛeri a tin ba dibaala si suba wiaa. ²⁰ Maata si nia ari Yesu faa ko ne, u sii lii duu chemu wenin ε, an ka Mɛeri-na fa he dia ε. ²¹ Nii ne Maata bula pi Yesu a bul, "Mi Tiina, di η ne fa he daha, mi dibaala fa bi jan suu. ²² Ari nii ma ha, mi jima ari η ne sul Wia chiche kun-kala, u jan pin." ²³ Nii ne Yesu bula pu ari u dibaala jan bira sii a ken miisin. ²⁴ Nii ne Maata bula pu, "Mi jima ari dunia che-derin u jan sii suun ε, bua-la ε nialin kala si suba

si jan sii." ²⁵ Nii ne Yesu bula pu, "Mi ne ηaa nii-la si jan sii suun ε, a chise niaa suun ε di ba ken miisin. Nuukala si laa mi wiaa dii, di η suba maa, η jan sii a ken miisin. ²⁶ Nii-la ma kala si weye an laa mi wiaa dii, u bi jan ko duu suba. N laa wiin deen dii koo?" ²⁷ Nii ne Maata bul, "Oo, mi Tiina. Mi laa dii ari η ne ηaa Kirisito, nii-la Wia si liisa, a ηaa Wia Bie maa, nii-la si maga duu ko dunia deen."

²⁸ Maata si bul wiaa deenba dere, u miira juu dia a luora yire u ηaana Mɛeri, a munso a bula pu a bul, "Mɛeri, la kuhian ko ne aa yirin." ²⁹ Mɛeri si nii nii, u sii lima a lii duu chemu. ³⁰ Bua-la ε di Yesu ha bi tan-la tuon jua, u ha he lee-la Maata si chemu ne. ³¹ Juu timma-la ari Mɛeri fa si he dia ε baa nyagu, ba na Mɛeri duu sii lima. Ba si na nii, ba sii to u harin, bee wiaa ba fa biina duu che duu mu yel ne lee-la ba fa si hugi u dibaala. ³² Mɛeri si yi lee-la Yesu fa si he a nau, u tuu tel u naasin ε an bul, "Mi Tiina, di η ne fa he daha, mi dibaala fa bi jan suu." ³³ Yesu si na Mɛeri ari Juu timma-la sii to u harin ko di baa yel, u tuon faasa chei. U yaraa ma faasa ven. ³⁴ Nii ne u pieseba a bul, "Nii ε ne ma hugu?" Ba bula pu, "La Tiina, ku na lee-la." ³⁵ Ba si bul nii, Yesu yel. ³⁶ Nii ne Juu timma-la bul, "Má bee na u si chou nii." ³⁷ Donsun ma piese a bul, "Ka u ne suri nyulimaa siaa nii, u saa fa bi jan wuo ηaa di Lazɔɔs si suu?"

³⁸ Ba si bul nii, Yesu yaraa bira ven. Nii ne ba mu yi bua-la lerin. Bua-la fa he buj ε ne. Ba jon tabiin to niin. ³⁹ Nii ne Yesu bul di ba suri tabii-la bua-la niin. Nii ne Maata, baal-la si suba dihaala don, bula pu, "Mi Tiina, u si suba, u tapulaa banese ne jinin. Nla uu suoru." ⁴⁰ Nii ne Yesu bula pu a bul, "Mi bi bula pin ari η ne laa mi wiaa dii, η jan na nii Wia si ken dolun?" ⁴¹ Nii ne ba ken tabii-la suri. Yesu wula ben wia nyun an bul, "Mi Nyimma,

mii lolluጽ ari ገ si jegile nii mi teenጽ.
⁴² Mi jima ari ገገ jegili mi teenጽ ጽጽ bua-na kala ጽጽ. Ama mi bul wiinጽ deenጽ a tinጽ nialinጽ si he daha wiaa ጽጽ, di ba wuo laa dii ari ገ ጽጽ tinጽmi.”
⁴³ Yesu si bul ገገii derጽ, ገገii ጽጽ u faasa bul, “Lazጽros, ku lii!” ⁴⁴ U si bul ገገii, baal-la si suba sii ku lii. U si ku lii, geri-kosumጽጽ ጽጽ fa vጽጽ u naasinጽ ari u nisaa kala. Gerinጽ dጽጽጽ ma to u siaa. Nii ጽጽ Yesu bula pi nialinጽ a bul, “Má kenu puro ta duu viiri.” Ba kenu puri.

Ba vuura di ba kpu Yesu

Mat. 26.1-5; Maak 14.1-2; Luuk 22.1-2

⁴⁵ Juu timma-la fa si kጽ di ba chuጽle Mጽeri, a to u harinጽ mu a na wii-la Yesu si ገaa, ba tuጽጽ niaa yuga a laa u wiaa dii. ⁴⁶ Ka dጽጽsunጽ ma miira mu bula pi Farisii tinጽጽ wii-la Yesu si ገaa. ⁴⁷ Nii ጽጽ Farisii timma-la ari nialinጽ si kpu pusunጽ pipi Wia kuhiasinጽ ari niaa dጽጽsunጽ hilimi a honጽጽ vuure a bul, “Bee ጽጽ la janጽ ገaa? Má na wu-magila-la kala baala deenጽ sii ገaa ጽጽ. ⁴⁸ Di la ጽጽ leጽጽ duu ገገጽጽ wiaa deenጽba, nuu-kala janጽ laa u wiaa dii. Nii harinጽ Rom tinጽጽጽ niaa janጽ kጽ a kenጽ la Wia-dia ari la tinጽጽጽ kala kaa laa.” ⁴⁹ Juu nihiasila tuጽጽ dጽጽጽ ጽጽ ba faa yire Kayafas. Jina-la ጽጽ u ጽጽ fa ገaa nialinጽ si kpu pusunጽ pipi Wia kuhianጽ. Nii ጽጽ u bul, “Ma bi wii jinጽ. ⁵⁰ Ma bi jinጽ di ni-bala ጽጽ laa tinጽጽጽ niaa kala nyunጽ suu, u ጽጽ kpia la tinጽጽጽ niaa kala si suba, koo ma bi wiinጽ deenጽ jinጽ?” ⁵¹ U si bul ገገii, u bi naga u titia dolunጽ ጽጽ ጽጽ u bul ገገii, ama u si ገaa nialinጽ si kpu pusunጽ pipi Wia kuhianጽ jina-la, ገገii ጽጽ tii u wuo bul wiaa, Wia Din-zጽጽ-la dolunጽ ጽጽ, ari Yesu janጽ laa tinጽጽጽ niaa kala nyunጽ suu, ⁵² tinጽጽጽ deenጽ niaa ma dundunጽጽ wiaa dee, ama duu wuo pe kese Wia biiri-la si pisa he leree dጽጽsunጽ maa a he dጽጽጽ ጽጽ. ⁵³ A chinጽ tapulii-la a kaa mu Juu tinጽጽጽ kuhiasila vuure ገገii ba si janጽ to kpu Yesu.

⁵⁴ Nii wiaa Yesu bira bi chaasaa gollጽ kpilii Juu tinጽጽጽ tuጽጽ. U lii dime a mu lee kubala baa yire Efirim a kpage giri-bine tuጽጽ. Ba di u haritooroo he dime.

⁵⁵ Bua-la ጽጽ di Juu tinጽጽጽ diisinጽ kielinጽ gbiele-la kpaga. Nii ጽጽ Juu tinጽጽጽ yuga a lii ba jasinጽ ጽጽ a mu Jerusalem, di ba piise ba disinninጽ ta, anጽ ka di gbiele-la-na yi. ⁵⁶ Nii ጽጽ ba bee chiche Yesu gbiele-la tuጽጽ. Ba si honጽ Wia-dia tuጽጽ, ገገii ጽጽ ba pipiese dጽጽጽ, “Ma biina u janጽ ko gbiele-la koo, u bi janጽ kጽ?” ⁵⁷ Bua-la ጽጽ, di nialinጽ si kpu pusunጽ pipi Wia kuhiasinጽ ari Farisii tinጽጽጽ pa niinጽ, di nuu-kala ጽጽ jinጽ Yesu si he lee-la, duu dage, di ba wuo kenu.

12

Mጽeri ገaa nuunጽ tise Yesu naasinጽ *Mat. 26.6-13; Maak 14.3-9*

¹ Leele u ka tapulaa balidu ጽጽ, ka di Juu tinጽጽጽ diisinጽ kielinጽ gbiele-lana yi. Nii ጽጽ Yesu sii mu Betani, lee-la Lazጽros si he, baal-la u fa si chisa suunጽ ጽጽ. ² Nii ጽጽ u juu Lazጽros dia. Ba ገaa kudiilee di ba huጽru. Nii ጽጽ Lazጽros ari niaa dጽጽsunጽ pe Yesu ጽጽ di ba dii kudiile-la. Maata ጽጽ fa kenጽ kudiile-la gollጽጽ kpa. ³ Nii ጽጽ Mጽeri jonጽ nuunጽ ari lonጽ. U suጽra sima. U yallinጽ ma heyጽ. Nii ጽጽ u jonጽ bisa he Yesu naasinጽ ጽጽ, a kenጽ u nyupunaa kaa tiike. Nuula suጽra suጽ diala kala. ⁴ Di Yesu haritooroo dጽጽጽ baa yire Judas Isikarጽጽ, duu fa he dime, nii-la fa si janጽ jonጽ Yesu yalle. Nii ጽጽ u bul, ⁵ “Bee ጽጽ tii ba bi nuunጽ deenጽ jonጽ yalle siidi bui balia, a jonጽ moribie-la pi summoo?” ⁶ U si bul ገገii, u bi naga duu cho summola ጽጽ tii, ama u fa ገaa gaaru ጽጽ. U ጽጽ faa kori ba moribiee a yie liliise moribie-la si he dime. ⁷ Nii ጽጽ Yesu bula piba a bul, “Má lenጽ haal-la. Má lenጽ duu ገaa ገገii a gberጽ tapulii-la ba si janጽ hugimi. ⁸ Ma di summoo janጽ he dime bua-na kala ጽጽ. Ama la di ma bi janጽ he dime deenጽ deenጽ.”

⁹ Niaa yuga Juu timma-la tuጽጽ a nii di Yesu he Betani ጽጽ, a sii mu

dime. Yesu dunđuḡa wiaa dee ba mu dime. Ba mua ka di ba pe na Lazoros, nii-la u fa si chisa suun le ne. ¹⁰ Nii ne nialin si kpu pusun pipi Wia kuhiasin vuure di ba kpu Lazoros maa. ¹¹ A tin Yesu si chise Lazoros suun le wiaa juu tinḡaa yuga a via ba nihiasin niin, an laa Yesu wiaa dii.

Ba zil Yesu kaa juu Jerusalem

Mat. 21.1-11; Maak 11.1-11; Luuk 19.28-40

¹² Tan si pula, ni-dan-la si ko diisin kielin gbiele-la nii ari Yesu ka ko Jerusalem ne. ¹³ Nii ne ba kala kaare abee pipaarin a kaa mu di ba chemu, a faasa ḡaa gon a bubul, "Tabarikala. Wia jan pe nii-la sii ko la Tiina Wia dolun le. U ne ḡaa la Iziral tinḡaa kuoro." ¹⁴ Ba sii ḡaa nii, nii ne Yesu na kaku-bie a hon u nyun. Ba fa ḡmunse nii ne Wia tenin tuon a bul,

¹⁵ "Ma nialin si he Zaayon le, ma si fawullun fa. Ma kuoro nii ko ma teen a jil kaku-bie."

¹⁶ Yesu haritoooro fa bi wii-la bubuon jin, ama Yesu si suba an sii suun le a laa yirin nii, bua-la le ne ba liisi ari wialin ba si ḡmunsa a tigeu le ne, ba sene ḡaa u le nii. ¹⁷ Ni-dan-la fa si he dime a na Yesu duu yire Lazoros u sii a lii suun bua le, nii ne baa bul wii-la. ¹⁸ Ni-dan-la si nia ari Yesu ḡaa wu-magilin deen, ba kala lii di ba chemu. ¹⁹ Nii ne Farisii timma-la bula pi donjo a bul, "La bi wii-kala wuo ḡinḡaa. Ma bee na, dunia niaa kala ni to u harin nii."

Yesu bul u suun wiaa

²⁰ Nialin si lii Giriis tinḡeen donsun ma fa he nialin si mu Jerusalem di ba chuole Wia gbiele-la le tuon ne. ²¹ Nii ne niaa deenba mu Filip teen. Filip fa lii Betisaada ne, Galilii tinḡeen. Ba bula pi Filip ari baa che di ba na Yesu ne. ²² Filip ma mu bula pi Anḡduru. Nii ne ba balia-la mu bula pi Yesu. ²³ Nii ne Yesu bula piba a bul, "Bua-la leele

kpaga ne di mi-na Nuhuobiine Bie laa yirin. ²⁴ Wutitii ne mi bulaa pima, di ḡ ne jon mii-biin duu, u yie pua ne tinḡeen, an nyu, a he mii-biee yuge. Di ḡ ne bi jon duu tinḡeen duu pua, u bi jan ken biee. ²⁵ U si nage nii mii-biin ḡ si jon duu le, nii titia ne u nage nuhuobiine ma le. Nii-la kala sii che duu laa u miisin, u jan via u miisin ta, ama nii-la kala si via u miisin ta dunia deen le, u tiina jan ken miisi-la si bi dere. ²⁶ Nii-la kala si cho duu tima pipimi, see tiina to mi harin. Lee-la kala mi si he, u tiina ma jan he dime. Di nuu-kala ne tima pipimi, mi Nyimma jan zil u tiina.

²⁷⁻²⁸ Leele mi tuon bi di-bala pina. Bee ne saa mi jan bul? Mi saa bul di mi Nyimma si leje di wialin kala si jan ḡaami le ḡaa koo? Ai, mi bi jan wuo bul nii. Wiaa deenba si jan ḡaami le wiaa ne tii mi ko dunia. Mi Nyimma, len di niaa yire ḡ yirin." Nii ne nuu yikoro lii wia nyun a bul, "Mi paala laa yirin ne. Mi saa jan bira len di niaa yire mi yirin."

²⁹ Ni-dan-la si chin dime a nii nii-la yikoro, donsun si di tan ne domo. Donsun ma si di Wia tinḡaar u ne bul wiaa pu. ³⁰ Nii ne Yesu bula piba, "Ma wiaa ne tii yikoro deen bul nii, mi wiaa dee. ³¹ Bua-la le Wia si jan dii dunia niaa sariya yie ne. Bua deen le ne u ma jan kiri Sitaani ta, nii-la si ḡaa dunia niaa kuoro. ³² Ama di ba ne kpaasemi daa-gesee nyun, mi jan ḡaa di niaa kala ko mi teen." ³³ U si bul wiin deen, u bula dage suu-la yiri u si jan suu ne.

³⁴ Nii ne nialin bul, "Ba dagela ari ba ḡmunse Wia tenin tuon a bul di Kirisito, nii-la Wia si liisa, bi jan suu, duu jan he dime deen deen. Ee ne saa ḡ bul di ba jan ken Nuhuobiine Bie a kpaase daa-gesee nyun? Kubee ne saa Nuhuobiine Bie deen wiaa ḡ sii bul?" ³⁵ Nii ne Yesu bula pi nialin a bul, "Pulun-la si he ma teen, u bi jan dieni. Pulun-la ha si he dime nii, ma ven pulun-la le, di birimin sima to. Nii-la sii ven birimin tuon bi jin

lee-la u síi mu. ³⁶ Puluጅ-la si he ma teen ገii, má laa u wiaa dii. Di ma ne ገaa ገii, ma ma jaጅ keጅ pulumuጅ a ma chaane.”

Yesu si bul wiaa deenba dere, u lii a keጅ u titia faa di ba síu na. ³⁷ U si ገaa wu-magila-la kala ba na, ari ገii kala, ba ha bi u wiaa laa dii. ³⁸ Ba si bi u wiaa laa dii ገii, ገii leጅ wialiጅ nii-la fa síi bul wiaa, Wia Diጅ-zoጅ-la doluጅ le baa yire Azaaya si bula ገaa wutitii ne. U fa bula, “Nuu-kala bi wialiጅ la si bula piba laa dii.

Nuu-kala ma bi la Tiina Wia doluጅ na.”

³⁹ Ba sene bi Wia wiaa wuo laa dii. Nla ne Azaaya bira bul a tigeba le.

⁴⁰ U si,

“Wia to ba siaan ne aጅ nyire ba tuoጅ, di ba siaan sí kuጅ-kala wuo na, di ba sí wiaa bubuosa ma wuo jinጅ.

Di ገii dee, ba fa jaጅ ko Wia teen duu pulle ba tuoጅ, di ba birima tutou.”

⁴¹ Azaaya fa na Kirisito fa si jaጅ keጅ doluጅ, ገii ne tii u bul ገii. ⁴² Ari ገii ma kala Juu tinጅaa kuhiasin yuga a laa Yesu wiaa dii, ama a tinጅ Farisii tinጅaa wiaa fawulluጅ fa keጅba. Ba bi wuo chaasa bul ari ba laa u wiaa dii, di ገii dee, ba fa jaጅ kiriba Wii-chuoጅ dia le. ⁴³ Ba fa cho di niaa ne bibeseba le a kii Wia si beseba le.

⁴⁴ ገii ne Yesu faasa bul, “Nii-la kala si laa mi wiaa dii, u ma laa nii-la si tinጅmi wiaa dii ne. Mi dunduጅ wiaa dee u laa dii. ⁴⁵ Nii-la kala si nami, u ma na nii-la si tinጅmi ne.

⁴⁶ Mi ku tuu dunia di mi ገaa dunia pulumuጅ ne a chaane. Nii-la kala si laa mi wiaa dii bira bi jaጅ he biriminጅ tuoጅ. ⁴⁷ Nii-la kala si nii mi wubulaa aጅ bi baa to, mi bi u tiina sariya ka dii, beጅ wiaa mi bi ko di mi dii dunia niaa sariya. Mi ko di mi laa dunia niaa ta ne. ⁴⁸ Wialiጅ mi si bula pima ne jaጅ dii tiina si bi mi wiaa laa dii sariya chee-la dunia si jaጅ dere.

⁴⁹ Wialiጅ mi si bula, mi titia doluጅ le dee mi bul. Mi Nyimma-la si tinጅmi, u titia ne dagemi wialiጅ mi síi bul.

⁵⁰ Mi jima ari wialiጅ u síi daga jaጅ pi nialiጅ síi toba miisi-la si bi dere. ገii wiaa, wialiጅ kala mi síi bul ገaa mi Nyimma ne dagemi.”

13

Yesu soጅ u haritooro naasin

¹ Leele u ka tapulii kubala ne, ka di Juu tinጅaa diisinጅ kieliጅ gbiele-la yi. Bua deen le Yesu jinጅ ari u jaጅ leጅ dunia deen aጅ mu u Nyimma teenጅ. U cho nialiጅ síi to u harinጅ ne dunia deen le. Bua deen le saa dage ari u cho u haritooro ne a mu kieli. ² Tapulii-la didaaninጅ Yesu ari u haritooro hoጅ di ba dii kudiilee. Bua deen le di Sitaani ku juu Saamoጅ bie Judas Isikarot duu joጅ Yesu yalle.

³ Yesu fa jima ari u ne lii Wia teen ne. U si lii Wia teen ገii, u jaጅ bira miira mu u teenጅ. U bira jima ari u Nyimma fa joጅ kuጅ-kala doluጅ ne a he u nisinጅ le. ⁴ ገii ne Yesu sii kudiile-la nyuጅ, a wuri u geri-balinጅ bil, aጅ joጅ popo woጅ u tinጅ, ⁵ a ገaa liinጅ he taasi-gbana le, a suomo susoጅ u haritooro-la naasinጅ a keጅ popo-la titiike. ⁶ U si ku yi Saamoጅ Piita le, ገii ne Piita piesu a bul, “Mi Tiina, ገጅ che di ጅ ne soጅ mi naasin?” ⁷ ገii ne Yesu bula pu, “Bua deen le ጅ bi jinጅ wii-la mi síi ገaa, ama u harinጅ le ጅ jaጅ jinጅ u bubuoጅ.” ⁸ ገii ne Piita bira bula pu a bul, “ጅ bi jaጅ soጅ mi-na naasin da.” ገii ne Yesu ma bul, “Di mi ne bi ጅ naasin somo, ጅ bira bi mi haritooru ገaa.” ⁹ ገii ne Piita bira bul, “Mi Tiina, di ገii-na ne, sí mi naasin dunduጅ soጅ, soጅ mi nyuጅ ari mi nisaa maa.” ¹⁰ ገii ne Yesu bul, “Nii-la kala si fo liinጅ, u yaraa kala zomo ne, u saa bira bi maga duu fo liinጅ, [see duu soጅ u naasin dunduጅ.] Ma kala saa bi disinninጅ kene, ama ni-bala dunduጅ ne keጅ disinninጅ ma tuoጅ.” ¹¹ Yesu paala jinጅ nii-la síi che duu joጅ yalle ne. ገii ne tii u bul di ba kala tuoጅ dee bi pulla ገii.

¹² Yesu si soጅ u haritooro-la naasin dere, u bira joጅ u gerinጅ laale a

ma kenma. ²⁸ Ma nia ari mi si bula pima ari mi jan miira viiri an bira miira ko ma teenj. Di ma ne fa chomi, ma tuonj fa jan tɔre ari mi si mu mi Nyimma teenj, bee wiaa u ne kenj dolunj a kiimi. ²⁹ Mi laa sipaanj bul wiaa deenba pipima ne, ka di bana nja, ma jan laaba dii. ³⁰ Mi bi jan wuo bul wiaa ma teenj a dieni, bee wiaa dunia kuoro ka ko ne. U bi dol kala kene mi le. ³¹ Ama mii che di dunia niaa jinj ari mi cho mi Nyimma ne. Nii ne tii mi njinaa wialinj kala u si si di mi nja. Má lej di la lii. Má sii.”

15

Yesu ne nja tii-titii-la ba sii yire vainj

¹ Nii ne Yesu si, “Mi nage tia-la titia ba sii yire vainj ne. Ama mi ne tii-titii-la. Mi Nyimma ma nage nii-la sii bej tia-la ne. ² Naakel-la kala si mere tia-la le an bi nenj, u yie kere ta ne, naakel-la kala sii nenj, u yie buoro ta ne, ka di u wuo faasa nenj worunj. ³ Ma tuonj paala bira bi disinninj kene a tinj wialinj mi si bula pima. ⁴ Má meremi le di mi ma merema le. Tia naakelee dunjuna bi jan wuo nenj, see di ba mere tia gentine le. Ma ma bi jan wuo tinj tintinj-zonjoo, see di ma meremi le.” ⁵ Nii ne Yesu bira bul, “Mi nage tia ne, ma ma nage tia-la naakelee. Nii-la kala si meremi le, mi ma mere tiina le. Nii ne jan wuo nja duu tinj tintinj-zonjoo worunj, a tinj bee wiaa di ma ne bimi le mere, ma bi jan wuo nja wii-kala. ⁶ Di nuu ne bimi le mere, ba jan jonj tiina yuo ta, a nage ba si yie keru tia naakelee ta, ba hil. Ba paaba a yuo he nyininj le ba dii nii. ⁷ Di ma meremi le, mi niinj wiaa mi si bula pima jan he ma tuonj. Di ma ne nja nii, kunj-kala ma si piesemi chiche, mi jan wuo nja pima. ⁸ Di ma ne tinj tintinj-zonjoo worunj, nja ne mi Nyimma yirinj jan yire. Ma jan wuo dage nii ari ma nja mi haritooro ne. ⁹ Mi choma ari mi Nyimma si chomi nii ne. Nii wiaa,

má meremi le di mi choma a kaa mu wuu. ¹⁰ Di ma nii to mi niinj wiaa, mi jan choma a kaa mu, ari mi sii to mi Nyimma niinj wiaa a mereu le u chomi nii. ¹¹ Mi bul wiaa deenba pima di ma wuo na tuotoru-la mi si jonj pima. Nii ne ma tuonj jan faasa tɔre worunj a mu dere.

¹² Mi choma ne worunj. Wii-la mi si bula pima di maa nja ne nja: Má cho donj ari mi si choma nii. ¹³ Di nuu ne nja siri duu jonj u miisinj yoo suunj u nanjdonj wiaa, u chou ne worunj. Nu-kala bi nii-la cho mage nia deenj. ¹⁴ Di ma nii nja wialinj mi sii bula pima di maa nja, ma jan nja mi nanjonsunj. ¹⁵ Mi bira bi jan kenma kaa yire mi tintinnaa, bee wiaa tintinna bi wii-la u kuhianj sii nja jinj. Ama mi-na bul wialinj kala mi Nyimma si bula pimi pima ne. Nii ne tii mi kenmaa yire mi nanjonsunj. ¹⁶ Ma dee bimi liisa, mi ne liisema. Mi liisema di ma mu faasa nja wu-zonjoo ne, wu-zomola si bi jan lel. Di ma nii nja nii, mi Nyimma jan pima kunj-kala ma si piesu chiche mi dolunj le. ¹⁷ Wii-la mi si bula pima di maa nja ne nja: Má cho donj.

Yesu bul nii dunia niaa si jan bere ba di u haritooro

¹⁸ Di dunia niaa ne berema, ma jinj ari ba laa sipaanj beremi ne. ¹⁹ Di ma ne fa nja dunia niaa, dunia niaa fa jan choma worunj, ari ba si cho donj nii. Ma di dunia niaa bi kubala nja. Mi liisema dunia niaa tuonj ne. Nii ne tii ba berema. ²⁰ Mi laa sipaanj bula pima ari tintinnu bi u kuhianj kii. Má liisi wiinj deenj. Ba si dogisemi nii, ba jan dogisema ma nii. Di ba ne fa sei mi niinj wiaa, ba fa jan sei ma ma niinj wiaa. ²¹ Ba jan nja wiaa deenba kala a tinj ma sii to mi harinj wiaa. Ba si bi nii-la si tinjmi jinj ne tii baa nja nii. ²² Di mi ne fa bi ku bul wiaa piba, ba si nja wu-bomola kala, mi fa bi jan wuo bul di ba chei wii-kala. Ama mi si folo ku bul wiaa piba, ba bira bi jan wuo

bul ari ba bi wii-kala cheye. ²³ Nii-la si beremi, tiina bere mi Nyimma ma ne. ²⁴ Wialin kala mi si naa, nuu-kala biba naa. Di mi ne fa biba naa di ba na, ba fa bi jan chei wii-kala. Ama ba naba kala ne an ha bere la di mi Nyimma kala. ²⁵ Ba si beremi nii, wialin kala ba si nmuɔsa Wia tenin tuon sene naa. Nla ne ba nmuɔse, 'Mi bi wii-kala naa chei, ka ba beremi.' ²⁶ Ama mi jan len di Wia Din-zon-la lii mi Nyimma teen a ku tuu hema le. U jan pema le a dagema wutitii. U ne jan bul mi wiaa pima. ²⁷ Ma ma jan bul mi wiaa pi niaa, bee wiaa mi si suomo didage niaa, la di ma kala nii to dono.

16

¹ Mi bul wiaa deenba kala pipima di ma si hariin miiru ne. ² Bua-la jan yi di Juu tinnaa kirima ta Wii-chuole diisin le. Bua ma don jan yi di niaa kpuma an biine di baa to Wia wonbiin ne nii. ³ Ba jan naa wiaa deenba kala a tin ba si bi mi Nyimma jin, a bimi ma jin. ⁴ Mi bul wiaa deenba kala pipima di bua-la ne ku yi di wiaa deenba ninnaa, ma jan liisi ari mi bula pima.

Wia Din-zon-la tintinnaa

La di ma kala fa si to dono, nii ne tii mi bi wiaa deenba bula pima faafaa. ⁵ Ama leele mii mu nii-la si tinmi ne, an ka ma kun-kala ha bi mi piesa a bul di nii ne mii mu? ⁶ Mi si bul wiaa deenba pima leele nla, ma tuon cheye ne. ⁷ Ama wutitii ne mi bulaa pima nla. Mi si mu nii, u jan zomo pima. Di mi ne bi mua, Wia Din-zon-la si jan ko a pema le bi jan ko. Ama di mi ne mua, mi jan len duu ko. ⁸ Duu ne saa ko, u jan len di dunia niaa jin ari ba naa haacheba ne. U jan bira dageba nii ba si jan to a ken tuo-pula Wia sipaan, a bira dageba ari Wia jan dii ba sariya. ⁹ Ba jan jin ari ba si bi mi wiaa laa dii, u nii naa haache ne. ¹⁰ Mi si miira mu mi Nyimma teen nii, ma bira bi jan nami. U nii ma jan dage ari mi

ken tuo-pula ne Wia sipaan. ¹¹ Wia si folo dii dunia kuoro Sitaani sariya nii, ba ma jan jin ari Wia ma jan dii ba sariya.

¹² Wiaa yuga ne mi ha ken di mi bula pima, ama ma biba wuo nyalime. ¹³ Ama di Wia Din-zon-la ne ko, u jan dagema wutitii kala. U bi jan bubul wiaa u titia dolun le, ama wialin kala u si nii mi Nyimma niin le ne u jan bul. U ma jan dagema wialin kala si jan naa. ¹⁴ U jan len di niaa yire mi yirin, bee wiaa wialin kala mi si kene mi bul, u jan kaa ku bula pima. ¹⁵ Ku-la kala mi Nyimma si kene naa mi kun ne. Nii ne tii mi bula pima ari wialin kala mi si kene mi bul, Wia Din-zon-la jan kaa ku bula pima."

Yesu bula pi u haritooro ari ba tuon jan tore

¹⁶ Nii ne Yesu bira bula piba a bul, "Ma bira bi jan nami. Tapulaa banmene cheen ne ma jan bira nami." ¹⁷ Nii ne u haritooro donsun pipiese dono a bul, "Wiin deen bubuon ne bee? U bula pila ari tapulaa banmene la bi jan nau, di tapulaa banmene cheen ne la bira jan nau. U bira bula ari u si jan mu u Nyimma teen ne tii la bira bi jan nau. ¹⁸ U si yie bul di tapulaa banmene deen, u bubuon ne bee? La bi u bubuon jin." ¹⁹ Yesu jima ari baa che di ba piesu ne. Nii ne u bula piba, "Mi si si tapulaa banmene ma bi jan nami, di tapulaa ma banmene cheen ma jan bira nami, nii wiaa ne ma pipiese dono? ²⁰ Wutitii ne mi bulaa pima, ma jan nmuɔmoo niin kala, di dunia niaa tuon tore, ma tuon jan chei, ama ma tuo-chei-la jan miira birime tuoton. ²¹ Di haala luoron nii wii duu che u lul, u yie tuune niin ne. U heen yie ne. Duu ne saa ku lul bile dere, u yu u hee-la kala le. U si lul bie ne tii u tuon yie tore. ²² Nii ne saa u jan nage ma le. Leele ma tuune niin ne, ama mi jan bira nama di ma tuon kala tore. Bua-la le nuu-kala bi jan wuo naa

di ma tuጋጋ bira chei. ²³ Di tapulii-la ne yie, ma bi jaጋጋ piጋጋsemi chiche kuጋጋ-kala. Wutitii ne mi bulaa pima, mi Nyimma jaጋጋ pima kuጋጋ-kala ma si piጋጋsu chiche mi doluጋጋ ጌ. ²⁴ Lጌጌጌ ገla ma ha bi kuጋጋ-kala piጋጋsu chiche mi doluጋጋ ጌ. Nii wiaa ma saa piጋጋsu, u jaጋጋ joጋጋ pima, di ma tuጋጋ faasa toጋጋre a mu deጋጋre.

²⁵ Wiaa deጋጋጋba kala mi sii bul, namagaba ne mii mage. Ama bua kubala jaጋጋ yi, mi bira bi jaጋጋ mage namagaba, mi jaጋጋ chaasa bul wiaa pima a mu tige mi Nyimma ጌ, di ma jii ba bubuጋጋsaa woruጋጋ. ²⁶ Di tapulii-la ne yie, ma ne jaጋጋ piጋጋsu chiche kiaa mi doluጋጋ ጌ. Mi bi si mi ne jaጋጋ sula pima, ²⁷ beጋጋ wiaa mi Nyimma titia ma choma ne. Ma chomi ne a laa mi wiaa dii ari mi lii u teenጋጋ ne. Nii ne tii u ma choma. ²⁸ Mi lii mi Nyimma teenጋጋ ne a ku tuu dunia. Lጌጌጌ mi saa jaጋጋ leጋጋ dunia aጋጋ miira mu mi Nyimma teenጋጋ.”

²⁹ Nii ne u haritooro-la bula pu a bul, “Lጌጌጌ ገ chaasaa bul wiaa ne. Nii bira bi namagaba ka mage. ³⁰ Lጌጌጌ la jima di ገ jii wii-wii-kala ne, ገ bi che di nuu-kala piጋጋsiጋጋ wii-kala. Wiinጋጋ deጋጋጋ ne ገaa di la jii ari ገ lii Wiaa teenጋጋ ne.” ³¹ Nii ne Yesu piጋጋseba, “Lጌጌጌ saa ma laa mi wiaa dii neጋጋ? ³² Bua-la jaጋጋ yi, u saa paala yi ma ne, ma kala jaጋጋ piጋጋ a mu ma diisinጋጋ, aጋጋ ka mi duጋጋduጋጋ. Ama saa, mi bi jaጋጋ ገaa mi duጋጋduጋጋ. Mi Nyimma hemi ጌ ne. ³³ Mi bul wiaa deጋጋጋba pima di ma wuo hoጋጋ ari yarifiጋጋlaa ne. Dunia deጋጋጋ tuጋጋጋ ma jaጋጋ na heጋጋጋ. Ama ma leጋጋ di ma nyuጋጋ nyaase. Mi yuo dii dunia ne.”

17

Yesu chuጋጋጋ Wia pi u haritooroo

¹ Yesu si bul wiaa deጋጋጋba deጋጋre, u wula beጋጋ wia nyuጋጋ aጋጋ bul, “Mi Nyimma, bua-la yie ne. Leጋጋ di mi-na ገ Bie laa yiriጋጋ, di mi ma leጋጋ di ገ yiriጋጋ yire. ² Nii ne joጋጋ doluጋጋ pimi di mi bibenጋጋ nuhuobiinee kala, a joጋጋ miisi-la si bi deጋጋre a pi nialiጋጋ kala ገ si liisa pimi. ³ Nialiጋጋ si jima ari ገ

ne seጋጋጋ ገaa Wia, Wia bira tuo, aጋጋ pe jii mi-na Yesu Kirisito, nii-la ma ገ si tima, ba ne keጋጋ miisi-la si bi deጋጋre. ⁴ Mi leጋጋ ገ laa yiriጋጋ ne tiጋጋteenጋጋ deጋጋጋ ጌ. Mi tiጋጋ tiጋጋtimii-la deጋጋre ne, tiጋጋtimii-la ገ si joጋጋ pimi di mi tiጋጋ. ⁵ Oo, mi Nyimma, leጋጋ di mi yiriጋጋ yire ገ sipaanጋጋ lጌጌጌ, yiri-la la di ገ kala fa si laa, aጋጋ ka ገ-na suomo ገaa dunia.

⁶ Mi leጋጋ nialiጋጋ ገ si liisa pimi dunia niaa tuጋጋጋ jimiጋጋ ne. Ba fa ገaa ገ kiaa ne, ገ ne liiseba pimi. Ba ne sei ገ niinጋጋ wiaa. ⁷ Lጌጌጌ ba jima ari wii-kala mi si ገaa, mi ገaa ገ doluጋጋ ጌ ne. ⁸ Mi bul ገ niinጋጋ wialiጋጋ ገ si bula pimi piba ne. Ba laa dii a jii ari wutitii ne, mi seጋጋ lii ገ teenጋጋ ne. Ba ma laa dii ari ገ ne tiጋጋmi. ⁹ Mi suluጋጋ pipiba ne. Mi biጋጋ sula pipi dunia niaa, see nialiጋጋ ገ si liisa pimi duጋጋduጋጋ. Ba ne ገaa ገ kiaa. ¹⁰ Nialiጋጋ kala mi si keጋጋጋ ገaa ገ niaa ne. Nialiጋጋ kala ገ ma si keጋጋጋ ገaa mi ma niaa ne. Ba ne leጋጋ mi laa yiriጋጋ. ¹¹ Lጌጌጌ mii ko ገ teenጋጋ ne, mi bira bi jaጋጋ he dunia ጌ, ama ba-na jaጋጋ he dunia ጌ. Mi Nyimma, ገ ne ገaa nii-la si bi disinniጋጋ keጋጋ. Beጋጋ nialiጋጋ ገ si liisa pimi woruጋጋ ገ doluጋጋ ጌ, a leጋጋ di ba ገaa kubala, ari la di ገ kala si ገaa kubala nii. ¹² Mi fa si he ba teenጋጋ, mi beጋጋ ba nyuጋጋ ne woruጋጋ ገ doluጋጋ ጌ, dol-la ገ si joጋጋ pimi ne mi kaa beጋጋba. Mi si ገaa nii, ba kubala ma bi leጋጋ, see nii-la si maga duu leጋጋ, di wialiጋጋ ba fa si ገmuጋጋsa Wia teniጋጋ tuጋጋጋ seጋጋጋ ገaa. ¹³ Lጌጌጌ saa mii ko ገ teenጋጋ ne. Mi ha si he dunia ጌ nii, nii ne mi bul wiaa deጋጋጋba piba di ba tuጋጋጋ faasa toጋጋre, ari mi tuጋጋጋ si toጋጋre nii. ¹⁴ Mi bul ገ niinጋጋ wiaa piba ne. Ba di dunia niaa bi kubala ገaa, ari la di dunia niaa si bi kubala ገaa nii. Nii ne tii dunia niaa bereba. ¹⁵ Mi bi si di ገ liiseba dunia ጌ, ama mi si di ገ poጋጋba ne a liiseba Siጋጋaani nisiጋጋ ጌ. ¹⁶ Ba di dunia niaa bi kubala ገaa, ari la di dunia niaa si bi kubala ገaa nii. ¹⁷ Nii niinጋጋ wiaa ገaa wutitiiba ne. Dageba, di ba bira si disinniጋጋ keጋጋ. ¹⁸ Nii ne tiጋጋmi dunia niaa teenጋጋ. Nii si tiጋጋmi nii, nii titia ne mi ma tiጋጋba

dunia niaa teen. ¹⁹ Mi jon mi miisin ne a yoo suun ba wiaa. Mi naa nii di ba ma naa siri di ba jon ba miisin yoo suun wutitii wiaa ne.

²⁰ Mi bin sula pipiba dundun, mi pe sula pi nialin si laa mi wiaa dii a tin ba si bul mi wiaa piba le ne.

²¹ Mii sulun nii di ba kala wuo naa kubala ne. N hemi le ne. Mi ma hen le. Len di ba kala ma wuo hela le. Di n ne naa nii, dunia niaa jan wuo laa dii ari n ne tinmi. ²² N si len mi laa yirin nii, nii ne mi ma len ba laa yirin. Mi naa nii di ba kala wuo naa kubala ne, ari la di n kala si naa kubala nii. ²³ Mi heba le ne, n ma hemi le. La he donjo le nii di ba wuo naa kubala ne. Nii ne dunia niaa jan jin ari n ne tinmi. Ba ma jan jin ari n choba ne ari n si chomi nii.

²⁴ Mi Nyimma, n paala chomi ne a len mi laa yirin, ka dunia-na suomi. Mi saa che di n len di nialin n si liisa pimi, di ba he mi teen lee-na kala mi si jan he, di ba wuo na nii n si leje mi laa yirin. ²⁵ Mi Nyimma, n ken wutitii. Dunia niaa bin jin, ama mina jimin ne. Niaa deenba ma jin ari n ne tinmi. ²⁶ Mi saa naa ba jimin ne, mi saa ha jan len di ba jimin. Mi naa nii, di nii n si chomi, di ba ma cho donjo, di mi ma heba le.”

18

Ba ken Yesu

Mat. 26.47-56; Maak 14.43-50; Luuk 22.47-53

¹ Yesu si bul wiaa deenba dere, ba duu haritooro sii kieli fuo-naan kubala ba kaa yire Kidiron. Lee kubala ne fa he dime ba chonse tiisin. Nii ne Yesu ari u haritooro juu lee-la. ² Ba venee mu lee-la ne, nii ne tii Judas, nii-la si jonu yalle, ma wuo jin dime. ³ Nii ne Judas ken laali-yuoroo donsun ari nialin si kpu pusun pipi Wia kuhiasin tintinni-biisin, ari Farisii tinnaa tintinni-biisin, di ba mu ken Yesu. Ba mu lee-la Yesu si he. Ba sii mu nii, ba kori chaanaa, ka-pilaa ari nyinin ari

ba ba-kiaa. ⁴ Yesu jin wii-la kala fa si jan naau le ne. Nii ne u mu chejba a pieseba, “Kubee ne maa chee?” ⁵ Nii ne ba si, “Yesu si lii Nazaret ne la chiche.” Nii ne u bula piba, “Mi ne nla.” Judas, nii-la fa si jan jonu yalle, u ma fa he ba tuon ne. ⁶ Yesu si bul nii, ba miira yala mu harin a tuu tel. ⁷ Nii ne Yesu bira pieseba a bul, “Kubee ne maa che?” Ba si, “Yesu si lii Nazaret.” ⁸ Nii ne Yesu bula piba, “Mi laa sipaan bula pima ari mi ne nla. Di ma nii chemi, ma len di nikaanaa viiri.” ⁹ (U bul nii di wii-la u fa si bula, duu wuo sene naa wutitii. U fa bula ari nialin kala Wia si liisa pu, ba kun-kala bi lele.) ¹⁰ Saamon Piita fa kori tokobii ne. Nii ne u tuure a ta nialin si kpu pusun pipi Wia kuhian dia-yomo na-diin digilin a kerii. Yomo-la yirin ne fa Malikas. ¹¹ Nii ne Yesu bula pi Piita a bul, “Jon n tokobii-la he u peen le. U bi maga di mi na hee-la, mi Nyimma sii che di mi na, koo?”

Ba ken Yesu kaa mu Anas sipaan

¹² Nii ne laali-yuoroo ari ba kuhian ari juu tinnaa titinni-biisi-la ken Yesu a vobu. ¹³ Ba laa sipaan kenu kaa mu Anas teen ne. Anas ne fa naa Kayafas hiili-baala. Jina-la Kayafas ma ne fa naa nialin si kpu pusun pipi Wia kuhian. ¹⁴ Kayafas ne fa laa sipaan bula pi juu tinnaa ari ni-bala ne laa tinteen niaa kala nyun suu, u ne kpia ni-dan si suba.

Piita si u bi Yesu jin

Mat. 26.69-70; Maak 14.66-68; Luuk 22.55-57

¹⁵ Saamon Piita ari Yesu haritooro donjo to Yesu harin, a juu nialin si kpu pusun pipi Wia kuhian kaala. Kuhian-la fa jin Yesu haritooro deen ne. Nii wiaa haritoorula to Yesu harin a juu kaala-la tuon. ¹⁶ Ka Piita chin kaala-la jeen harin boinniin. Nii ne Yesu haritooro-la donjo, nii-la nialin si kpu pusun pipi Wia kuhian si jima, u miira lii, a bula pi toli-bie kubala si po boin-la niin duu len di Piita ku juu, an ken Piita

ku juu. ¹⁷ Nii ne tolo-la si chin boi-la niin piесе Piita, “N ma bi baal-la haritooroo dɔŋɔ ŋaa?” Nii ne Piita si, “Ai, mi dee.” ¹⁸ Di waariŋ fa he dime. Nii ne dia-la tintinnaa ari nialiŋ si kpu pusun pipi Wia kuhian tintinni-biisiŋ he nyiniŋ a china golli aa wieni. Piita ma mu chin ba teen aa wieni nyin-la.

Yesu bul u suun wiaa

Mat. 26.59-66; Maak 14.55-64; Luuk 22.66-71

¹⁹ Nii ne nialiŋ si kpu pusun pipi Wia kuhian piесе Yesu wiaa a tige u haritooroo le ari wialiŋ u fa sii dagu. ²⁰ Nii ne Yesu bul, “Wialiŋ kala mi si bula, mi yie chin ni-dan tuɔŋ ne a bul. Mi yie chaasa chin Wii-chuɔle diisiŋ tuɔŋ ne ari Wia-dia tuɔŋ, lee-la Juu tinŋaa kala si yie ku hilimi ne a bul. Mi ha bi wii-kala luɔra bul. ²¹ Bɛɛ ne saa tii ŋ piесеmi? Piесе nialiŋ si nii wialiŋ mi si bula, di ba dagiŋ. Ba jin wialiŋ mi si bula ne.” ²² Yesu si bul nii, nialiŋ si kpu pusun pipi Wia tintinni-bie dɔŋɔ falle Yesu chanŋpaniŋ le an bul, “Nla ne u mage di ŋ bul wiaa nialiŋ si kpu pusun pipi Wia kuhian teen koo?” ²³ Nii ne Yesu bul, “Di mi ne bul wii chei, u maga di ŋ bul di nuu-kala nii ne. Ka di wii-la mi si bula ne ŋaa wutitii, bɛɛ ne tii ŋ fallemi?” ²⁴ Ba si vɔɔ Yesu nii, nii ne Anas lej ba kenu nii kaa mu nii-la si kpu pusun pipi Wia kuhian Kayafas teen.

Piita bira bula ari u bi Yesu jin

Mat. 26.71-75; Maak 14.69-72; Luuk 22.58-62

²⁵ Ka Piita ha chin kaala-la tuɔŋ aa wieni nyin-la. Nii ne nialiŋ dɔŋsuŋ piесе a bul, “N ma bi baala deen haritooroo dɔŋɔ ŋaa?” Piita kaa via an bul, “Ai, mi dee.” ²⁶ Nii ne nialiŋ si kpu pusun pipi Wia kuhian dia tintinnaa dɔŋɔ ma peu le. U fa ŋaa nii-la Piita si ta u digiliŋ kerii, u naanbii ne. U piесе a bul, “Mi fa bi ma di baal-la na, lee-la ba si chonse tiisiŋ?” ²⁷ Nii ne Piita bira kaa via

an bul di ai, u dee. U bul nii dere di ji-bele ye.

Ba keŋ Yesu kaa mu Paalit teen

Mat. 27.1-2, 11-14; Maak 15.1-5; Luuk 23.1-5

²⁸ Chichuɔ-fie la felele ba keŋ Yesu lii Kayafas dia le, a kenu kaa mu baal kubala dia baa yire Paalit. Paalit ne fa hon Rom kuori-baliŋ nyun lee-la. Juu tinŋaa bi to juu. Ba bi che di ba ŋaa disinniŋ a chei ba kisiŋ le, an wuo dii diisiŋ kielin gbiele kudiilee.

²⁹ Nii ne Paalit lii a piесеba a bul, “Bɛɛ ne ma si baala deen ŋaa chei?”

³⁰ Nii ne ba bula pu a bul, “Di u ne fa bi wii ŋaa chei, la fa bi jan kenu kaa ko ŋ teen.” ³¹ Nii ne Paalit bula piba a bul, “Ma kenu kaa mu to ma titia wonbiin le a dii u sariya.” Nii ne ba bula pu a bul, “La bi wonbiin kene di la kpu nuu-kala.” ³² Yesu fa si daga ari u jan suu daa-gesee nyun, u nii sene ŋaa wutitii.

³³ Nii ne Paalit miira juu dia a yire Yesu a piесе, “N ne ŋaa Juu tinŋaa kuoroo?” ³⁴ Nii ne Yesu piесе, “N titia ne bul wiin deen koo nuu ne bul nii pin a tigemi le?” ³⁵ Nii ne Paalit bira bul, “Mi bi Juu tiina ŋaa. N titia nia ari nialiŋ si kpu pusun pipi Wia kuhiasin ne jonun he mi nisiŋ le. Bɛɛ ne ŋ ŋaa chei?” ³⁶ Nii ne Yesu bul, “Mi kuorun tuo dunia deen le, di mi kuorun ne fa he dunia deen le, mi niaa fa jan yuo laami, di Juu tinŋaa simi wuo keŋ. Ama mi kuorun tuo daha.” ³⁷ Nii ne Paalit piесе a bul, “N saa ŋaa kuoru ne koo?”

Nii ne Yesu bul, “Wii-la ŋ si bula ŋaa wutitii ne. Ba paala lulmi di mi ku ŋaa kuoru ne. Mi ku tuu dunia di mi dage niaa, di ba jin wutitii ne. Nii-la kala si cho duu jin wutitii yie jegile nii mi teen ne.” ³⁸ Nii ne Paalit piесе, “Wutitii ne bɛɛ?”

Ba bula ari ba jan kpu Yesu

Mat. 27.15-31; Maak 15.6-20; Luuk 23.13-25

Nii ne Paalit miira lii di-jalin Juu timma-la teen a bula piba a bul, “Mi bi wii-la na baala deen si cheye.

³⁹ Ama jina-na kala, di diisiin kielin gbiele-la ne yie-na kala, mi yie vene liise nialin ba si kaa to dia donjo ne pima. U nii nage ari ma kisiin ne. Ma saa che di mi liise Juu tinjaa kuorula ne ta pima?" ⁴⁰ Nii ne ba kpia gon a bul, "Ai, nia deen dee! Liise Barabas ta. (Barabas fa nja gaaru ne.)"

19

¹ Nii ne Paalit len ba ken Yesu a viiru. ² Ba si viiru dere, laali-yuoroo ken sosun sua nyun-chuulo a nage kuoro nyun-chuulo a jono chuu, a jon geri-fian laalu ³ an chuolu a bul, "Juu tinjaa kuoro, laa chuolun!" an pe fallu. ⁴ Nii ne Paalit bira miira lii nialin teen a bula piba a bul, "Ma bee na, mi kenu kaa kuu lii ma teen ne di ma jin ari mi-na bi wii-kala na u si cheye a mage di ba kpuu." ⁵ Nii ne Yesu ku lii a ha chu sosun nyun-chuulo-la ari geri-fian-la ba si jono laalu. Nii ne Paalit bula piba, "Ma na baal-la." ⁶ Nialin si kpu pusun pipi Wia kuhiasin ari ba tintinni-biisin si nau, ba kpia gon a bul, "Len di ba kpaasu daa-gese nyun." Nii ne Paalit bula piba, "Ma titia kenu kpaase daa-gese nyun. Mi-na bi wii-la u si cheye na." ⁷ Nii ne Juu timma-la bira bul, "U ken u titia yire Wia Bii ne. La kisin le nii-la kala si nja nii, u maga di ba kpuu ne." ⁸ Fawullun fa paala ken Paalit ne. U si nia ari ba bul nii, fawullun wasa kenu. ⁹ Nii ne u bira miira juu diala a piese Yesu a bul, "Nii ne n lii?" Yesu bi wii-kala bula. ¹⁰ Nii ne Paalit piesu, "N tere n niin nee? N bi jin mi ken dolun di mi jonun taa, a bira ken dolun di mi len di ba kpaasin daa-gese nyun?" ¹¹ Nii ne Yesu bula pu, "N fa bi dol kala kene mi le. Wia ne pin dol-la. Ama nii-la si jonmi he n nisin le ne faasa ken haacheba a kiin."

¹² Paalit si nii nii, u fa cho duu jon Yesu ta. Nii ne Juu tinjaa faasa kpia gon a bul, "Di n ne jonu ta, n bira bi la tinten kuori-balin ba sii

yire Siiza nanjon nja. Nii-la kala si ken u titia yiyire kuoru, u tiina nja kuori-balin dinjon ne." ¹³ Paalit si nii nii, u ken Yesu kaa ku lii, an mu hon u sariya diiri kpaasa nyun. Ba ken lee-la kaa yire Gabata ne Hiiburu yiikoro le. U bubuon ne: Lee-la tabiaa nja mula mula ne. ¹⁴ Di wia jil nyu-gbana. Tapulii-la ne Juu tinjaa nja siri di u tan ne pula di ba gbieli diisiin kielin gbiele-la. Nii ne Paalit bula piba a bul, "Ma na ma kuoro." ¹⁵ Nii ne ba faasa kpia gon a bul, "Len di ba kenu kaa mu kpaasu daa-gese nyun." Nii ne Paalit pieseba a bul, "Maa che di mi kpaase ma kuoro daa-gese nyun nee?" Nii ne nialin si kpu pusun pipi Wia kuhiasin bul, "La bi kuoru kala kene a pe Siiza le." ¹⁶ Nii ne u jon Yesu piba di ba kaa mu kpaase daa-gese nyun.

Ba kpaase Yesu daa-gese nyun
Mat. 27.32-44; Maak 15.21-32;
Luuk 23.26-43

¹⁷ Nii ne ba ken Yesu lii. U lii a baase u titia daa-gese a mu lee-la ba sii che di ba kpaasu. Lee-la yirin ne nyu-kunkogulo. Hiiburu yiikoro le baa yire lee-la Goligota ne. ¹⁸ Lee-la ne ba kpaasu daa-gese nyun. Ba fa kpaase niaa balia ma ne daa-gese nyun a pe Yesu le. Donjo he u na-diin, donjo ma he u na-gua. Ka Yesu he tutuobanin. ¹⁹ Nii ne Paalit nmunsa mere daa-gese-la le a bul, "Juu tinjaa kuoro Yesu a lii Nazaret." ²⁰ Lee-la kpage Jerusalem ne. Nii ne Juu tinjaa yuga a karime wii-la Paalit si nmunsa mere daa-gese-la le. U nmunse wii-la ari yiikorusun batori ne. U ken Hiiburu tinjaa yiikoro nmunse, a ken Latin yiikoro ma nmunse, a ken Giriik tinjaa yiikoro ma nmunse. ²¹ Nii ne Juu tinjaa nialin si kpu pusun pipi Wia kuhiasin bula pi Paalit ari u si nmunsa bul di Juu tinjaa kuoro ne, ama duu bul di baala deen ne si u ne nja Juu tinjaa kuoro. ²² Nii ne Paalit bul, "Wii-la mi si folo nmunse nii, mi bira bi kaa birime."

²³ Laali-yuoro-la si kpaase Yesu daa-gese-la nyun dere, ba paa u gennin a kaa kpaal leree banese. Laali-yuoro kala ken dongo. Geri-bal kubala ma ne fa he dime. Ba yie yuo nii ne, ba bi geripee kala yere meru le. ²⁴ Nii ne laali-yuoro-la bula pi dongo a bul, “Ma si leje di la ken geri-la kiesse, ma len di la tongo, a na nii-la si jan dii duu laa geri-la.” Wiin deen ba naa di wialin ba fa si nmuusa Wia tenin tuon, duu naa wutitii ne. Ba fa si,
 “Ba paa mi gennin kpaal dongo ne an tin mi gerin dongo wiaa a tongo.”

²⁵ Nialin fa si china kpage Yesu daa-gese-la ne nla: Yesu naan, ari u naan dihaala, ari Kilopas haala Meeri, ari Meeri Magidalin. ²⁶ Yesu si na u naan ari u haritooru-la u fa si cho, di ba china, nii ne u bul u naan le a bul, “Haal, bee na n bie ne nla,” ²⁷ an bira bula pi u haritooru-la ma a bul, “Na n ma naan ne nla.” A chin bua-la le u haritooru-la ken Yesu naan-la a kaa mu u dia ba he dime.

Yesu suba
Mat. 27.45-56; Maak 15.33-41; Luuk 23.44-49

²⁸ Yesu jima ari leele wii-wii-kala dere ne, ka duu wuo len di wialin ba si nmuusa Wia tenin tuon, di ba naa wutitii, nii ne u si lii-nyuasun ne kenu. ²⁹ Di sinin si nyala su gbanja chin dime. Ba jon suosuo a sin sin-la le, a ken sakelin liise suosuo-la, a kaa jila he Yesu nin le. ³⁰ Nii ne Yesu nyua sin-la. U si nyua sin-la dere, nii ne u bul, “Wii-kala dere ne”, an ken u nyun chugili a suu.

³¹ Tapulii-la ne juu tinnaa naa siri a gber ba diisin kielin gbielela. Tapulii-la ma naa che-wiesii-la cheen ne. Nii ne tii ba bi che di nialin sage daa-gese-la nyun chee-la. Nii ne ba mu sul Paalit duu len di laali-yuoro mu bori ba naasin an soriba daa-gese-la nyun. U sei. ³² Nii ne laali-yuoro-la mu ken baala-la ba si kpaal a pe Yesu le naasin kaa bori.

³³ Ba ko Yesu lerin duu suba. Nii wiaa ba bi u naasin boro. ³⁴ Ama laali-yuoro-la dongo jon u timin a too Yesu seme le u luri. Nii ne chalin ari liin lii. ³⁵ Mi-na juon ne na wiaa deenba ari mi siin aa bulba. Wutitii ne mi bul. Mi bul wiaa deenba pipima di ma ma laa dii. ³⁶ Wiaa deenba kala naa di wialin ba si nmuusa Wia tenin tuon naa wutitii ne. Ba nmuusa a bul,
 “Ba bi jan bori u hangbel-bala maa.”

³⁷ Wia tenin seme dongo ba bira bula ari ba jan ben nii-la ba si too.

Ba hugi Yesu
Mat. 27.57-61; Maak 15.42-47; Luuk 23.50-56

³⁸ Yesu si suba, baal kubala ma fa he dime. Baa yire Josef. U fa lii Arimatiya tinteen ne. U ma fa naa Yesu haritooro dongo ne. Ama u-na faa luoru ne a tin juu tinnaa wiaa. Uu faba ne. Nii ne u mu sul Paalit duu len duu sori Yesu kusuun. Paalit pu wonbiin. Nii ne u mu sori. ³⁹ Nikodiimas, nii-la fa si laa sipaan mu Yesu teen titanin, u ma to Josef harin mu, a pe ken tii-keli-zon kubala baa yire mee ari dongo maa baa yire alois. Ba yunon mage nuhuobiine yunon ne. ⁴⁰ Ba balia ne mu jon Yesu kusuun, a jon geripe-pula, a jon kialin mise geripe-pula-la, a kaa be Yesu. juu tinnaa yie naa nii ne a huhugi ba suunon. ⁴¹ Lee kubala ne kpage leela ba fa si kpaase Yesu daa-gese-la nyun. Ba chonse tiisin. Tiisi-la tuon bun kubala ne fa he dime ba lose. Ama ba ha bi nuu-kala hugo dime. ⁴² U si ka tapul-bala ka di juu tinnaa gbieli-balin yi, ka bua-la ma kpage lee-la, nii ne ba jon Yesu hugi dime.

20

Yesu lii u bua le
Mat. 28.1-8; Maak 16.1-8; Luuk 24.1-12

¹ Lahadi cheen siipura di lerin kala ha bire, Meeri Magidalin mu bua-la lerin a na tabii-la ba si jon

to bua-la niin duu suro. ² Nii ne u fá mu Saamōη Piita ari Yesu haritooro-la dōηō teen, nii-la Yesu fa si cho woruη, a bula piba a bul, “Ba liise la Tiina Yesu bua-la tuōη ne. La bi jin lee-la kala ba si jōηu bil.” ³ Nii ne Piita ari Yesu haritooro-la dōηō-la sii mu bua-la lerin. ⁴ Ba kala balia fá. Nii ne dōηō-la tiina kieli Piita, a laa sipaan fá mu bua-la lerin. ⁵ U si yi bua-la lerin, u bi bua-la tuōη jua. U tuu tin ne a nyilimi a na genni-la ba fa si jōηo be Yesu, di ba pina, ka u buu na. ⁶ Ka Piita to harin ko a ku juu bua-la tuōη, a na genni-la ba fa si jōηo be Yesu, di ba pina. ⁷ Ka geri-la ba fa si jōηo vōō Yesu nyuη ma, duu chuolo pin u dunduηa. ⁸ Nii ne ni-la si laa sipaan mu bua-la lerin ma juu bua-la tuōη a na wii-la si ηaa, a laa dii ari Yesu sii suuη le ne. ⁹ Ama ba bi wii-la ba fa si ηmuηsa Wia tenin tuōη bubuōη jin ari u maga di Yesu sii suuη le ne. ¹⁰ Nii ne Yesu haritooro-la miira mu ba diisin.

Yesu keη u titia ku dage Mēeri
Mat. 28.9-10; Maak 16.9-11

¹¹ Bua-la le di Mēeri miira mu bua-la teen. Nii ne u chin dime aa yel. Uu yel nii ne aη pe nyinyilimi bua-la tuōη. ¹² U nyilimi bua-la tuōη nii ne a na Wia tinđaraa balia bua-la tuōη a laale geri-pulluη. Dōηō hōη Yesu nyuη fa si mu lee-la. Dōηō ma hōη u naasin fa si mu lee-la. ¹³ Nii ne ba piesu a bul, “Haal, bee ne tii η yiyel?” Nii ne u bul, “Ba jōη mi Tiina Yesu kaa lel ne. Mi bi jin ba si jōηu kaa mu bil lee-la.” ¹⁴ U si bul nii dere aη ηaa duu birime, duu na baal duu chin dime. Yesu ne fa nii. Ama Mēeri fa bi jin ari Yesu ne. ¹⁵ Nii ne Yesu ma piese Mēeri, “Bee ne tii η yiyel? Kubee ne η chiche?” Mēeri fa biina baal-la sii beη tiisila ne. Nii ne u piesu, “Kuhian, di η ne jōηo, dagemi lee-la η si kaa mu bil, di mi mu jōηu kaa viiri.” ¹⁶ Nii ne Yesu yiru a bul, “Mēeri.” Nii ne u miira daase aη bul ari Hiiburu yiikoro, “Rabboni, η nee?” (Rabboni

bubuōη ne kuhian.) ¹⁷ Nii ne Yesu bula pu a bul, “Sími keη. Mi ha bi mi Nyimma teen jila. Ama mu bula pi mi naanbiirin ari mi jan jil mi Nyimma teen. U ηaa ma ma Nyimma ne a ηaa mi Wia, a ηaa ma ma Wia.” ¹⁸ Nii ne Mēeri Magidalin mu Yesu haritooro-la teen, a bula piba a bul duu na u Tiina Yesu ne, a bul wialin ma kala u si bula pu.

Yesu keη u titia ku dage u hari-tooroo
Mat. 28.16-20; Maak 16.14-18; Luuk 24.36-49

¹⁹ Lahadi cheeη titanin u hari-tooroo hilimi dia tuōη aη keη boin yage. Baa fá Juu timma-la ne. Nii ne tii ba keη borusuη to a yage. Nii ne Yesu ku chin ba tutuobaanin aη bul, “Ma jan hōη ari yarifiēlaa.” ²⁰ U si bul nii dere, u keη u nisaa ari u seme dageba. U haritooroo kala tuōη tore ba si na ba Tiina Yesu. ²¹ Nii ne Yesu bira bula piba, “Ma jan hōη ari yarifiēlaa. Mi Nyimma si tinmi nii, nii titia ne mi maa tinma di ma tin mi tininηaa.” ²² U si bul nii dere, u wiese heba le aη bul, “Má laa Wia Din-zōη-la duu hema le. ²³ Di ma ne jōη nuu haacheba a cheu, u bira bi haache keηe. Di ma ne bira bi nuu haacheba jōηo cheu, u ha keη u haacheba ne.”

Yesu keη u titia ku dage Tōmas

²⁴ Bua-la le Yesu si keη u titia ku dage u haritooro-la, u haritooro-la dōηō fa tuo. U yirin ne Tōmas. Ba fa ηaa daalieri ne. Nii ne tii baa yiru daalierin maa. ²⁵ Nii ne u haritooro-la dōηsuη bula pu a bul di ba na Yesu. Nii ne Tōmas bula piba a bul, see duu na heme-la buasuη u nisaa le, a jōη u neniin he bua-la le, a jōη u neniin he u seme bua-la ma le, u bi jan laa dii ari wialin ηaa wutitii.

²⁶ Tapulaa chori pege Yesu haritooro-la bira juu dia a keη boin yage. Bua-la-na le di Tōmas he ba tuōη. Di Yesu ku juu chin ba tutuobaanin aη bul, “Ma jan hōη ari yarifiēlaa.” ²⁷ Nii ne aη ka u bula pi

Tomas, “Jon ስ neniin a he mi nisin bua-la le an ben mi nisaa, an ken ስ nisin he mi seme bua-la ma le a na, an laa mi wiaa dii, an si kaa lere.”
 28 Nii ne Tomas yiru a bul, “Mi Tiina, ስ ne mi Wia!” 29 Nii ne Yesu piesu, “N si nami ne tii ስ laa mi wiaa dii koo? Nialin si bimi na an laa mi wiaa dii, ba tuon jan tore.”

30 Yesu ስaa wu-magilaa yuge u haritooro na a pe wialin mi si ስmuጽsa tenin deen tuon. An ka mi bi ba-na ስmuጽsa he tenin deen tuon. 31 Ama mi ስmuጽse wiaa deenba di ma wuo laa dii ari Yesu ne ስaa Kirisito, nii-la Wia si liisa an pe ስaa Wia Bie maa. Di ma ne laa wiaa deenba dii, ma jan ken miisin u dolun le.

21

Yesu ken u titia dage u haritooro balipe

1 Yesu bira ken u titia dage u haritooro donsun muga kubala nin baa yire Tabiiras. U haritooro-la ne ስla: 2 Saamon Piita ari Tomas, nii-la ba fa si kaa yire daalierin maa, ari Nataniel fa si lii tan kubala ne baa yire Keena a he Galili tinteen. Zebidii biirin balia ma ne fa he dime, ari Yesu haritooro balia maa. 3 Nla ne u to a ken u titia ku dageba: Ba fa chin muga-la nin ne. Nii ne Saamon Piita bula pi haritooro-la ku-kaanaa ari uu mu duu kese chenfilee ne. Nii ne ba kala bul di ba jan to mu. Nii ne ba mu jon liin daboro a juu liin tuon, ama titan-la kala ba bi chenfilii kala kene.

4 Tan si pulaa ko di Yesu chin lii-la nin, ama u haritooro-la bi jin ari u ne. 5 Nii ne Yesu pieseba, “Mi nandonsun, ma kese chenfilee ne?” Nii ne ba bul di ba bi kubala ma kene. 6 Nii ne u bula piba di ba jon ba jonba, a yuo he liin tuon liin daboro-la na-diin seme, di ba ne ስaa ስii, ba jan kese chenfilee. Nii ne ba jon jon-la yuo kese chenfilee su. U si suo ስii, ba bi wuo lilere. 7 Nii ne

haritooro-la Yesu si cho worun bula pi Piita a bul, “La Tiina Yesu ne!” Bua-la le di Piita fa wuri u gerin ne. U si nii ስii, u jon u gerin a laale, an lii liin daboro-la le, a fula juu liin duu duoro mu Yesu teen. 8 Lee-la ari lii-la nin fa bi bol. U fa yi naakielin zolo ne. Ka Yesu haritooro-la ku-kaanaa lere jon-la ari chenfilie-la ku lii lii-la nin.

9 Ba si ku lii lii-la nin, ba na holo nyinin di chenfilee chebe, ka ba na boroboro maa. 10 Nii ne Yesu bula piba a bul, “Ma liise chenfilee-la donsun ma si kese leele a kaa ko.” 11 Nii ne Saamon Piita mu lere jon-la ku lii lii-la nin, di chenfilibalaa suo. Chenfilie-la fa ስaa zolo ari mahin balia ari fii ari batori ne. Chenfilie-la yuga ስii ma ne, an ka jon-la bi kiesa. 12 Nii ne Yesu bula piba a bul, “Ma ku lii bille ma nin.” U si bul ስii, u haritooro kun-kala bi piese a bul di kubee ne? Ba kala jima ari ba Tiina Yesu ne. 13 Nii ne Yesu jon boroboro-la a piba, a jon chenfilie-la ma a piba di ba dii. 14 U si sii sun le u butori ne ስii u si ken u titia kaa ku dage u haritooro.

Yesu bul wiaa a pi Piita

15 Ba si dii boroboro-la ari chenfilie-la dere, ስii ne Yesu piese Saamon Piita a bul, “Jon bie Saamon, ስ chomi a kii niaa deenba ne?” Nii ne Piita si, “Oo mi Tiina, ስ titia jima ari mi chon ne.” Nii ne Yesu bula pu, “Ben mi niaa nyun, ari pie-daara si yie ben u piesee nyun ስii.” 16 Nii ne Yesu bira piesu, “Jon bie Saamon, ስ chomi ne?” Nii ne u bira bul, “Oo mi Tiina, ስ jima ari mi chon ne.” Nii ne Yesu bira bula pu, “Ben mi niaa nyun, ari pie-daara si yie ben u piesee nyun ስii.” 17 Nii ne Yesu bira piesu torimun a bul, “Jon bie Saamon, ስ chomi ne?” Yesu si piesu torimun ስii, u tuon chei. Nii ne Piita bula pu, “Mi Tiina, ስ jin wii-kala ne, ስ jima ari mi chon ne.” Nii ne Yesu bira bula pu, “Ben mi niaa nyun, ari pie-daara si yie ben

u piesee nyun ŋii. ¹⁸ Wutitii ne mi bulaa piŋ, ŋ fa si ŋaa haŋbie, ŋ yie keŋ ŋ damere kaa vɔɔ ŋ tiŋa ne aa mu lee-la kala ŋ si cho. Ama di ŋ ne ku hiɛɛ, ŋ jaŋ keŋ ŋ nisaa jee, aŋ ka di nuu dɔŋ ne joŋ damere-la a vɔbuŋ aŋ keŋiŋ mu lee-la ŋ si bi cho di ŋ mua.” ¹⁹ Yesu si bul wiin deen, u dage Piita si jaŋ suu ŋii a laa yirin pi Wia. Nii hariŋ le ne Yesu bula pu duu to u hariŋ.

²⁰ Nii ne Piita daase hariŋ a na Yesu haritooru-la Yesu fa si cho woruŋ, nii-la fa si suusa mu kpage Yesu bua-la le ba fa sii dii diisin kieliŋ gbiele-la kudiilee, a fa piesu, “Mi Tiina, kubee ne che duu joŋuŋ yalleɛ?” ²¹ Piita si nau, ŋii ne u piese Yesu a bul, “Mi Tiina, ka baala deen, bee ne jaŋ ŋaau le?” ²² Nii ne Yesu bula pu, “Di mi nii che duu he dime ka di mi-na miira ko dunia, ŋ sipaa tuo dime. To mi hariŋ.” ²³ Nii ne ba ŋmoo doworo pi nialiŋ kala si laa Yesu wiaa dii ari Yesu haritooro deen-na bi jaŋ suu. Ama Yesu bi ŋii bula. U si duu nii che di haritooru-la he dime ka di u-na miira ko dunia, Piita sipaa tuo.

²⁴ Mi-na Jɔɔŋ ne na wiaa deenba aa ŋmuŋse teniŋ deen. La saa jima ari wialiŋ kala mi si bula ŋaa wutitii ne. ²⁵ Yesu ŋaa wiaa dɔŋsuŋ yuge a pe wialiŋ mi si ŋmuŋsa he teniŋ deen le. Wialiŋ-na mi bi ŋmuŋsa. Di mi ne fa ŋmuŋse wialiŋ kuŋ-kuŋ-kala, ten-la fa jaŋ yuga kii dunia kala.

YESU NANZŌŌBA TINTINŊAA

¹ Mi nanɔɔŋɔ Tiafilas, mi-na Luuk laa sipaan ɲmunɔse teniɲ a piɲ. Ten-la ɛ mi dage wialin kala Yesu si ɲaa ari wialin kala u si daga, a suomi bua-la ɛ u si suomo titin u tintinŋaa ² a kaa mu tapulii-la Wia si jonɔ a kaa jil Wia-jaɲ. Wia Diɲ-zɔɲ-la dolun ɛ u dage u nanzŏɔba-la u si tuɔsa tintimii-la ba si jaɲ titin, ka u-na jil Wia-jaɲ. ³ U si sii suun ɛ, u keɲ u titia ku dage u nanzŏɔba-la a yuge ne tapulaa mahin balia pege. Wonbiee yuga ne u keɲ u titia kaa dage ari u weye, aɲ bul Wia kuorii-la wiaa a piba, ka u-na jil Wia-jaɲ. ⁴ U si he ba teen, u bula piba a bul, “Ma si Jerusalem ɛ lii. Ma gberɛ ma Nyimma Wia zile ku-la u fa si si u jaɲ jonɔ pima. Wii-la mi fa si bula pima ne ɲla: ⁵ Mi bula, ‘Jɔɔɲ sii fo niaa Wii-chuɔle liin, liin dunɔɲa ne u kaa fo. Ama u bi dieni, ka mi jonɔ mi Diɲ-zɔɲ-la hema ɛ.”

Yesu jil Wia-jaɲ

⁶ Yesu ari u nanzŏɔba si hilimi nii, ba piesu, “La Tiina, tapulaa deenba ɛ, ɲ jaɲ bira len di Iziral tinŋaa dii kuorun?” ⁷ Nii ne Yesu bula piba, “Mi Nyimma bi che di ma jin tapulun deen. U ne keɲ dolun a he tapulia-la wialin si jaɲ ɲaa. ⁸ Ama di Wia jonɔ u Diɲ-zɔɲ-la hema ɛ, ma jaɲ keɲ dolun. Ma jaɲ ɲaa mi siada tinŋaa a bul mi wiaa Jerusalem ɛ, Judiya tinŋeen kala ari Samaria ɛ, a kaa mu dunia semɛ-na kala.” ⁹ Yesu si bul nii dere, Wia jonɔ kaa jil Wia-jaɲ, ka ba china biben. Nii ne duonbilinbaanin ku tou, ba bira buu na. ¹⁰ Ba ha si wula biben wia nyun nii, di niaa balia ne nii a chin ba semɛ, a laale geri-pullun ¹¹ a piesɛba, “Galilii timma, bɛɛ ne tii ma chinaa ben wia nyun nii? Yesu deen Wia si jonɔ ma sipaan a kaa jil Wia-jaɲ,

u jaɲ miira ko ari ma si nau duu jil Wia-jaɲ nii.”

Ba liise nuu u laa Judas nyun

¹² Nii ne Yesu haritooro-la lii peel-la ba sii yire Olivet a miira mu Jerusalem. A chin peel-la leriɲ a kaa mu Jerusalem u yi ari meel-daan lebi ne. ¹³ Ba si yi Jerusalem, ba mu juu dia-la ba sii juu Jerusalem ɛ, lusun nyun. Piita ari Jɔɔɲ ari Jeems ari Anɔuru ari Filip ari Tomas ari Batolomi ari Matiu, ari Alifiyas bie Jeems, ari Saamɔɲ Zelot, ari Jeems bie Judas, ba kala nii juu di-bala. ¹⁴ Ba di haalaa dɔɲsun ari Yesu naan Mɛeri ari Yesu ɲaanaa, ba kala ɲaa nii-bala ne aa hilimi dime, a fiɛɛ siin a chuchuɔle Wia.

¹⁵ Tapulii kubala ba ku hilimi dɔɲɔ ɛ. Ba fa yi ari niaa zolo ari mara. Nii ne Piita sii chin duu bul wiaa a bul, ¹⁶ “Mi naanbiirin, Wia Diɲ-zɔɲ-la fa lenɛ Devit dage wialin Judas si jaɲ ɲaa. Wia niin wiaa deenba ku ɲaa wutitii. Judas ne keɲ niaa ko di ba keɲ Yesu. ¹⁷ Yesu fa liisu duu ɲaa la dɔɲɔ ne, a maa tin la tintimin deen. ¹⁸ Judas si ɲaa wu-bɔɲ-la, u laa moribiee. U jonɔ moribie-la a yoo tintee kubala ne. Dime ne u tuu tele yere. U tuon kiaa kala jaase. ¹⁹⁻²⁰ Niaa si he Jerusalem ɛ kala nii. Ba yiikoro ɛ ba keɲ lee-la kaa yiyire Akilidaama. U bubuɔɲ ne chalin tinŋeen. Devit ɲmunɔsa he Wia tenin semɛ dɔɲɔ baa yire Saams a bul, ‘Wia jaɲ len duu dia pin jikpeen, di nuu-kala si dime juu.’

U bira ɲmunɔsa

di nuu laa u nyun a titin u tintinŋaa.

²¹ Nii wiaa nuu ne maga duu laa u nyun a pela ɛ di la dii siada ari la Tiina Yesu sii suun ɛ. Nia deen maga duu lii nialin fa sii to la harin, bua-la ɛ Yesu si suomo kenla gugolle, ²² a lii bua-la Jɔɔɲ fa si fo Yesu Wii-chuɔle liin a kaa mu yi tapulii-la Wia si jonɔ kaa jil Wia-jaɲ.” ²³ Nii ne ba dage niaa balia. Ba dɔɲɔ yirin ne fa Josef Basabas. (U

yirin ɔŋɔ ma ne fa Jasitis.) Ɖɔŋɔ-la ma yirin ne fa Matayas. ²⁴ Ba si dage nialin nii, ba suomo chuɔɛ Wia a bul, “La Tiina Wia, ŋ ne jin nuu-kala tuɔŋ wiaa. Nii wiaa dagela niaa deenba baliamin tuɔŋ ku-la ŋ si liisa, ²⁵ duu ŋaa ŋ nanzɔɔ ɔŋɔ a laa Judas nyun, a tin u tinȚinȚaa. Judas via ne aŋ suu aa mu Sitaani lerin.” ²⁶ Nii ne ba tɔŋɛ. Matayas kiaa dii. Ba diisu pɛ Yesu nanzɔɔba-la fii ari kubala-la tuɔŋ.

2

Wia Diŋ-zɔŋ-la kuu tuu

¹ Ba gbieli-bal kubala cheɛ ku yi baa yire Pentikos. (Tapulii-la ne ba yie ta ba bagi-bunɔŋ kiaa a kaa mu pi Wia.) Cheɛ-la ba ku hilimi di-bala.

² Ba bi yiela di ba nii goŋ. U lii wia nyun a ku tuu ari peli-balin sii ŋaa nii, a juu su dia-la tuɔŋ ba fa si hoŋɔ.

³ Nii ne ba na kiaa a nage nyin-geli-biisin. Ba nagisin nage nenɔdelimee. Ba lii pise. Nyin-geli-bie kala togili nuu-kala si he dia-la le. ⁴ Ba si togili nuu-kala le nii, Wia Diŋ-zɔŋ-la heba kala le, a piba dolun ba suomo bubul yiikori-yiri-yiriba ba si bi jin.

⁵ Juu tinȚaa ɔŋɔsuŋ ma fa he Jerusalem le aa fá Wia, a lii dunia seme-na kala. ⁶ Ni-dan-la si nii goŋ deen, ba kala ku hilimi. Ba si hilimi nii, ba nia di baa bul wiaa ba titia yiikorusun le. U ŋaaba wu-kpunɔkperere. ⁷ Ba faasa hiriki a bula pi ɔŋɔ, “Niaa deenba kala ŋaa Galili tinȚaa ne. ⁸ Eɛ ne saa ba bubul wiaa la nyimma yiikoro le la ninii? ⁹ La ɔŋɔsuŋ lii Paatia, ɔŋɔsuŋ lii Miidia, ɔŋɔsuŋ lii Ilam. La ɔŋɔsuŋ lii Mesopoteemia, ɔŋɔsuŋ lii Judiya, ɔŋɔsuŋ lii Kapadoosia, ɔŋɔsuŋ lii Pɔŋtos, ɔŋɔsuŋ ma lii Esia. ¹⁰ La ɔŋɔsuŋ lii Firijia, la ɔŋɔsuŋ lii Panfilia, la ɔŋɔsuŋ lii Ijipiti, la ɔŋɔsuŋ ma lii Liibia seme ɔŋɔ si kpage tan-la ba sii yire Sariini. La ɔŋɔsuŋ ma ŋaa nuhuɔraa a lii Rom. La ɔŋɔsuŋ ŋaa Juu tinȚaa, la ɔŋɔsuŋ ŋaa niaa si bi Juu

tinȚaa ŋaa aŋ tuto Juu tinȚaa hariŋ. ¹¹ La ɔŋɔsuŋ lii Kiriiti, la ɔŋɔsuŋ lii Ariibia. La kalaa bul yiikoro daban daban ne, ka la nii di baa bul wiaa la yiikoro le. Wia si tin tinȚinȚin-duorila wiaa ne ba bubul nii.” ¹² Ba kala hiriki, ba tuɔŋ vugime, ba pipiese ɔŋɔ, “Bɛɛ kuŋ ne ŋla?” ¹³ Ɖɔŋɔsuŋ ma sisieriba le di ba bugo ne.

Piita bul Wia wiaa a pi niaa

¹⁴ Piita ari Yesu nanzɔɔba-la fii ari kubala fa si he dime nii, Piita sii chin a faasa bul wiaa a bul, “Mi naanɔbiirin Juu tinȚaa ari ma nialin kala si he Jerusalem le. Má wuoli ma digilaa di mi bul wii-la si ŋaa a pima. ¹⁵ Ma biina niaa deenba bugo neɛ? Ba bi bugo. Chichuo-fiela deen ba bi jan wuo bugi. ¹⁶ Jewel ma fa bul wiin deen si ŋaa wiaa ne. U fa ŋaa nii-la sii bul wiaa, Wia Diŋ-zɔŋ-la dolun le. U si,

¹⁷ ‘Wia si, ŋla ne u jan ŋaa tapulaa diderin:

Mi jan jon mi Diŋ-zɔŋ-la he nuu-kala le.

Ma biirin ari ma toloo jan bul wiaa mi Diŋ-zɔŋ-la dolun le.

Ma bapuoosi-biisin ma jan nina wiaa ari duosoo tuɔŋ.

Ma kuhiasin ma jan duduosi duosoo.

¹⁸ Cheɛ-la mi jan jon mi Diŋ-zɔŋ-la pi baala-la ari haala-la si ŋaa mi tinȚinnaa

di ba kaa bubul wiaa, Wia Diŋ-zɔŋ-la dolun le.

¹⁹ Mi jan ŋinȚaa wu-kpunɔkperisin wia nyun, aŋ ŋinȚaa wu-magilaa ma tinȚeen le.

Chalin, nyinin ari nyuo-bine jan he dime.

²⁰ Di tan ne pula maa, lerin jan biri.

Chene ma jan fiɛɛ a nage chalin,

ka di la Tiina tapul-bal-la-na yi.

²¹ Tapul-bii-la, nii-la kala si yire la Tiina Wia, u jan laau ta.’ ”

²² Nii ne Piita bira bul, “Iziral tinȚaa, má jegile nii wiaa deenba mi sii che

mi bula pima. Yesu si lii Nazaret, Wia ne timu. Wu-magilaa ari wu-kpun̄kperisiŋ Wia si leŋe u ŋaa ma siŋ le ne dage ŋii. Ma ma jima ne. ²³ Wia jima aŋ leŋ Yesu juu ma nisiŋ le. Ma ne leŋe haache tinŋaa kpaasu mere daa-geŋe nyuŋ u suu. ²⁴ Ba si kpaasu daa-geŋe nyuŋ ŋii u suu, Wia chisu suuŋ le, a liise hee-la u si na bua-la le u sii suu. Suuŋ fa buu wuo kaa bibil. ²⁵ Devit fa tin wiŋ deŋe wiaa ne a bul, 'Mi yie na mi Tiina.

U laa mi sipaan a ŋaa mi hari-chinna, di wii sími juu.

²⁶ U ŋii ŋaa mi tuotoruŋ, mi bubul wiaa ma ari tuotoruŋ.

Mi jaŋ na wiese.

Mii yiele wialin Wia si jaŋ ŋaa le ne.

²⁷ Di mi ne suba, ŋ-na Wia bi jaŋ leŋ di mi he lelin le.

Ŋ bi cho di mi-na ŋ tinŋinni-titii-la pua.

²⁸ Ŋ dagemi wonbie-la mi si jaŋ to a keŋ miisiŋ.

Ŋ si he mi teen jaŋ ŋaa di mi keŋ tuotoruŋ woruŋ.'

²⁹ Ŋii ne Piita bira bul, "Mi naanbiirin, mi jaŋ chaasa bul la naabalima Devit wiaa pima. U suba ne, ba jonu hugi, u vaamin ha pina ne la jaŋ le. ³⁰ U fa ŋaa nialin sii bul wiaa, Wia Diŋ-zoŋ-la doluŋ le doŋo ne a wuo jin wialin Wia si si u jaŋ ŋaa pu. Wia ŋmiesa ne a bul duu jaŋ leŋ di Devit doho niaa doŋo, duu dii kuoruŋ u nyuŋ le. ³¹ Devit si na wii-la Wia fa sii che duu ŋaa, u wuo bubul ari Kirisito jaŋ sii suuŋ le, a ma bul di Wia bi jaŋ leŋ duu he lelin le duu yaraa pua. ³² Yesu deŋe ne Wia chise suuŋ le. La kala na a ŋaa wiŋ deŋe siada. ³³ Wia chisu u sii a jila hoŋ Wia seme, ni-duoŋ di-hoŋuŋ, a bira pu u Diŋ-zoŋ-la ari u fa si bul ŋii. Diŋ-zomuŋ deŋe Yesu si joŋo hela le jinin, u ne wialin ma sii na a ninii maa. ³⁴ Devit titia fa bi Wia-jaŋ jila, ama u ta bula pa a tige Yesu a bul,

'La Tiina Wia bula pi mi Tiina duu ku hoŋ u seme, ni-duoŋ di-hoŋuŋ,

³⁵ see duu yuo dii u diŋdoŋoŋo kala dere.'

³⁶ Ma Iziral tinŋaa, ma jin u sene ŋaa wutitii ari Yesu deŋe ma si kaa kpaase daa-geŋe nyuŋ, u ne Wia leŋ u ŋaa la Tiina. U ne bira leŋ u ŋaa Kirisito maa."

³⁷ Nialin si nii wiŋ deŋe Piita si bula, u faasa wiwalimeba kinkeŋ. Ŋii ne ba piŋe ba di Yesu nanzooba-la doŋsuŋ, "La naanbiirin, beŋe kuŋ ne saa la jaŋ ŋaa?" ³⁸ Ŋii ne Piita bula piba a bul, "Má birime a lii ma haacheba le, aŋ leŋ di ba foma Wii-chuoŋe liŋ Yesu Kirisito doluŋ le, di Wia jon ma haacheba chema, ka u jon u Diŋ-zoŋ-la a dii zile ma le. Wia fa si si u jaŋ jon u Diŋ-zoŋ-la pi niaa, u tapuluŋ ne ŋla. ³⁹ Wialin Wia si bula, ma ne u bula pa, ma ari ma biirin ari nialin kala si lii di-boluŋ, nuu-na kala Wia si yira duu ko u teen." ⁴⁰ Piita si bul ŋii, u sulba a paala chaasa bul wiaa doŋsuŋ yuge a bul, "Má liise ma titia ni-boŋoŋo deŋba tuoŋ." ⁴¹ Ba tuoŋ niaa yuga laa wialaa u si bula dii, ba foba Wii-chuoŋe liŋ. Niaa ma si pe nialin le tapulii-la yi bui batori. ⁴² Ba jon ba nyuŋ kala he Yesu nanzooba-la wubulia-la le siifesiŋ a keŋ nii-bala. Ba kala hoŋo aa dii kudiile-la Yesu fa sí si di baa dii aa liisi u wiaa, aŋ pe gbaara chuchuoŋe Wia.

Nialin si laa Yesu wiaa dii di-hoŋuŋ

⁴³ Ŋii ne ba kuŋ-kala fifá Wia, Yesu nanzooba-la ma ŋaa wu-kpun̄kperisiŋ ari wu-magilaa yuge kinkeŋ. ⁴⁴ Nialin kala si laa wialin dii, ba kala ku hihilimi bua-na kala le, ba kaa kala ma ŋaa kubala. ⁴⁵ Ba yie jon ba kaa ma yiyalle a keŋ moribie-la a kpikpaa doŋo mage ŋii kala nuu-kala sii che. ⁴⁶ Tapulii kala ba yie mu hilimi Wia-dia le ari ba diisiŋ ma le, a didii kudiile-la Kirisito fa sí si baa dii a liliisi u wiaa. Baa ŋaa ŋii ari zile ari tuotoruŋ ⁴⁷ a

didenne Wia. Niaa ma kala bibeseba le. Tapulii-na kala la Tiina Wia yie laa ni-falaa ta ne, ba kuu pe Yesu nanzooaba-la le.

3

Ba vaare gberike

¹ Tapulii kubala Piita ari Joon sii aa mu Wia-dia. Ba mu dime kerifi batori wiiheye, bua-la le ba si yie chuole Wia. ² Di baal kubala ne he dime. U naan lulu duu gberike ne. Ba yie chunju tapulii-na kala a kaa mu Wia-dia-la boininiin kubala baa yire boi-zomun. Uu sul kiaa nialaa sii juu Wia-dia-la teen. ³ U si na Piita ari Joon di ba ku juu Wia-dia-la, u sul kiaa ba teen. ⁴ Ba ben u siaa le. Nii ne Piita bula pu duu ma bibenba. ⁵ Nii ne u bibenba an gberike kialin ba si jan jono pu. ⁶ Nii ne Piita bula pu, "Mi bi moribii kala kene mi si jan jono pin, ama mi jan jon ku-la mi si kene a pin. Yesu Kirisito si lii Nazaret dolun le mi si, n sii a viven." ⁷ U si bul nii, u ken u na-diin nisin le a kenu chuule, u sii. U naasin ari u naachigisin kala guu polli. ⁸ U fula sii chin u naasin nyun aa ven, ba juu Wia-dia-la. U ven an pe fuful, a didenne Wia. ⁹ Nialin kala nau duu ven an didenne Wia. ¹⁰ Ba wuo jin u ne nii-la fa si yie hon Wia-dia-la boininiin ba sii yire boi-zomun aa sul kiaa. Ba hiriki. Wii-la si nna, nnaaba wu-kpunkpere wii.

Piita bul Wia wiaa Wia-dia tuon

¹¹ Nii ne Piita ari Joon ari gberiku-la juu zawura kubala baa yire Solomon zawura. Gberiku-la ken Piita ari Joon nisaa le, ka niaa kire to ba harin juu. U nnaaba wu-kpunkpere. ¹² Piita si na nialin di baa nna nii, u bula piba a bul, "Mi naanbiirin Iziral tinnaa, ee ne wiin deen nna wu-kpunkpere ma teen, ma paala faasa chaare siaa a bibenla nla? Ma biina ari la titia dolun le ne koo la wu-zonjon nnaanin ne wuo nna baala deen sii viven? Ai. ¹³ Wia-la si nna la naabalimaba Abiraham

ari Aizik ari Jekob Wia, u ne jon yiri-balin a pi u Bie Yesu. U ne ma kaa pa di ba dii u sariya, an bul ma buu jin Paalit sariya diire-la sipaan. U faa biine duu jonu ta, ka ma bi seye. ¹⁴ Ma kaa via Wia Tuon-pul Tiina, nii-la si nna wu-zon nnaara, an susul di ba jon ni-kpuura ta, ¹⁵ an len ba kpu u-na nii-la sii pi niaa miisi-la si bi dere. Ama Wia chisu suun le. La nna wiin deen dansia. ¹⁶ Yesu dolun le ne nna baala deen ma si na a jimu, u duori. La si nna yarida u dolun le ne wuo nna nii. La si nna u yarida-la ne nna baala deen na yarifielaa worun ma kala siin le.

¹⁷ Mi naanbiirin, mi jima ma di ma kuhasin si kpu Yesu nii, ma bi jin tuon le ne. ¹⁸ Wia len u nialin sii bul wiaa, Wia Din-zon-la dolun le, ba bul faafaa kala ari Kirisito-la jan na heen. U sene ku nna wutitii nla. ¹⁹ Ma birima lii ma haacheba le an to Wia, duu jon ma haacheba chema, ka di Wia len di ma dinsin na wiese. ²⁰ Nii ne ka Wia bira ta Yesu si nna Kirisito, nii-la u si liisa, a pima. ²¹ U maga duu he Wia-jan, see bua-la yie, wii-kala si he dunia le jan birime wu-falii. Wia len u nialin sii bul wiaa, Wia Din-zon-la dolun le bul wiin deen faafaa kala ne. ²² Moosis fa he ba tuon ne a ma bul,

'La Tiina Wia jan len di nialin sii bul wiaa, Wia Din-zon-la dolun le, di ba donjo ko ma teen ari u si tinmi nii.

U jan nna ma naanbii.

Duu ne ko, ma saa to u niin wiaa le wii-na kala u si jan bul.

²³ Nii-la kala si bi u niin to, Wia jan len di ba liisu Wia niaa tuon a ta duu suu.'

²⁴ Nialin kala sii bul wiaa, Wia Din-zon-la dolun le, a chin Samuel nisin le aa mu nialin kala si to u harin, ba kala fa bul wiaa deenba ma sii na nla. ²⁵ Wialin Wia fa si to u nialin sii bul wiaa u Din-zon-la dolun le a bula pi ma naabalimaba, ba kala nna ma

kiaa ne, maa naba ŋla. U fa bula pi ma naabalima Abiraham a bul, 'Ŋ doho niaa doŋo le ne mi jaŋ to a tima pe dunia niaa kala le.'

26 Nii ne Wia liise u tintinna Yesu, duu laa sipaan ko ma teen a pema le, di ma kala birima lii ma wu-boŋŋoo ŋaanin le."

4

Piita ari Joŋŋ chin nialin si yie hɔnɔ vuvuure wiaa sipaan

1 Piita ari Joŋŋ fa si bul wiaa pipi nialin nii, di nialin si kpu pusun pipi Wia ari Wia-dia kuhiasin ari nialin ba sii yire Sadusii tinŋaa, ba ko ba teen. 2 Ba fa na baanin a tin wialin ba sii dage. Ba faa dage nialin ari Yesu sii suun le, a dageba nii ari nuu ne suba, u jaŋ bira sii suun le. 3 Nii ne ba keseba, a kenba kaa mu to dia, taŋ-pul. (Bua-la ma le di wia ka che duu juu, nii ne tii ba toba taŋ-pul.) 4 Ka nialin si nii wialin ba si bula, niaa yuga ba tuon a laa Yesu wiaa dii. Nialin si laa wialin dii, ba tuon baalaa leele puna yi bui banon.

5 Taŋ si pula, nialin si kpu pusun pipi Wia ari ba Juu tinŋaa kuhiasin ari Wia tenin kerichiba, ba kala ku hilimi Jerusalem le. 6 Ba di nialin si kpu pusun pipi Wia kuhian Anas ari Kayafas ari Joŋŋ ari Alekizanda, ari nuu-kala si lii nialin si kpu pusun pipi Wia kuhiasin doho niaa tuon ne ku hilimi nii. 7 Ba si hilimi nii, ba yire Yesu nanzooaba-la balia a kaa lii bil ba tutuobaanin a pieseba, "Dol bee yiri ne ma kaa ŋaa baala deen duori? Kubee yirin le ne ma yire a ŋaa ŋla?" 8 Nii ne Wia Din-zon-la ku he Piita le worun, u si, "Ma nialin si kpu pusun pipi Wia kuhiasin ari ma Juu tinŋaa kuhiasin, 9 ma kenla dii sariya jinin a tin wu-zon-la la si ŋaa gberiku-la le u duori. 10 U maga di ma niaa deenba ari Iziral tinŋaa kala jin ari Yesu Kirisito si lii Nazaret, u dolun le ne ŋaa baala deen duoro chin ma sipaan nii. U ne ma len ba kpaasa mere daa-gesee

nyun u suu, ka Wia chisu suun le.

11 Ba ŋmunse Wia tenin tuon ari tiebii-la dii-saaraa si via, duu ne ku ŋaa tiebii-duon ba si joŋo bil dia gentine.

Ba si ŋmunse wiin deen, Yesu wiaa ne ba bul nii. 12 Nuu-kala bi jaŋ wuo laala ta, see Yesu dunɔɔna. U yirin dunɔɔna ne Wia si la yire duu laala ta. Wia bira bi nuu-kala liisa duu wuo laala ta, see Yesu dunɔɔna."

13 Nialin si hilime na Piita ari Joŋŋ di baa bul wiaa ari nyu-duon nii, u ŋaaba wu-kpunkpere, bee wiaa ba jima ba ŋaa ba tuon ni-biisin ne a bi wii-kala gunna. Nii ne ba wuo jin ari ba faa to Yesu harin ne a gunne u wiaa. 14 Ka ba na gberiku-la Piita ari Joŋŋ si vaara, di ba kala china, ba niin kala maa. 15 Nii ne ba bula piba di ba lii dia-la tuon ba fa si hɔnɔ vuure wiaa. Ba lii, an ka ba pipiese doŋo, "Ee ne la jaŋ ken niaa deenba balia kaa ŋaa? 16 Nuu-kala si he Jerusalem le ne jima ari ba ne ŋaa wu-balin deen, la saa bi wuo kaa lile. 17 Ama ma len di la kpurise ba digilaa di ba bira si Yesu yirin yiru, a bira si u wiaa bula pi niaa, di wiin deen bira si lerin deen kala teelu." 18 Nii ne ba bira yireba kaa juu, a bula piba ari siifesin di ba bira si wii-kala bul, koo di ba si wii-kala dagu a tige Yesu le, a bira si u yirin yiru. 19 Nii ne Piita ari Joŋŋ pieseba, "La si to ma niin koo la si to Wia niin, kubee ne zomɔ Wia teen? Ma bul. 20 La bi jaŋ wuo tore la niin, see di la bul wialaa la si na a nii maa." 21 Nii ne ba bira fugisiba worun ari ba jaŋ dogiseba worun an jonba ta. Ba bi wonbiin na di ba dogiseba, bee wiaa nialin kala ka denne Wia a tige wii-la si ŋaa le ne. 22 Baala deen ba fa si ŋaa wu-kpunkpere deen u le u duori, u fa kii jisun mahin balia ne.

Nialin si laa Yesu wiaa dii sul Wia chiche nyu-duon

23 Ba si jonba ta, Piita ari Joŋŋ miira mu ba naanbiirin teen, ba di ba fa si yie hilimi, a bula piba wialin

kala nialin si kpu pusun pipi Wia kuhiasin ari Juu tinŋaa kuhiasin fa si bula piba. ²⁴ Ba si nii nii, ba suomo chuchuoŋe Wia ari tuo-bala a bul, “La Tiina Wia, ŋ ne ta wia nyun ari tinŋeen ari mugi-balaa ari fuo-biisin ari kuŋ-kala si he dime. ²⁵ Ŋ Diŋ-zoŋ-la dolun le ŋ wuo len la naabalima Devit, ŋ tintinna, u bul, ‘Bee ne tii nialin si bi Juu tinŋaa ŋaa, ba faasa na baanin?’

Bee ne tii nialin vuure di ba jan chei Wia tintinŋaa an lol?

²⁶ Tinŋeen kuoroo keŋ ba titia he doŋo le a ŋaa siri, ba taŋ kuhiasin, ba ma hilimi di ba yuo la Tiina Wia ari Kirisito, nii-la u si liisa.’

²⁷ Wiaa deenba sene ku ŋaa wuti-tii. Herod ari Ponsos Paalit ari nialin si bi Juu tinŋaa ŋaa ari Iziral tinŋaa, ba kala hilime ne taŋ deen le di ba yuo Yesu, ŋ tintinni-zoŋ-la ŋ si liisa duu ŋaa Kirisito. ²⁸ Ba hilime di ba ŋaa wialin kala ŋ si paala jin ŋ dolun ari ŋ tuo-biinaa le ari ba jan ŋaa. ²⁹ La Tiina Wia, bee na ba si kpurise la digilaa nii ari ba jan dogiseŋa, an pe ŋ tintinnaa le di la wuo bul ŋ niin wiaa ari nyu-duon. ³⁰ Dage ŋ dolun an len di puwuolo duori, di la ma wuo ŋinŋaa wu-kpunŋperisin ari wu-magilaa ŋ tintinni-zoŋ-la Yesu dolun le.” ³¹ Ba si chuoŋe Wia dere, lee-la ba si hilime jigisi. Wia Diŋ-zoŋ-la ku heba kala le. Ba suomo bubul Wia niin wiaa ari nyu-duon.

Nialin si laa Yesu wiaa dii ka pe doŋo le.

³² Nialin kala fa si laa Yesu wiaa dii, ba kala keŋ tuo-bala ari nii-bala. Di nuu ne keŋ kuŋ maa, u bi jan bul, “Na mi kuŋ ne ŋla”, ba kala ne yie tiu. ³³ Wia lahōrimo-bal-la ne tii Yesu nanzoŋba-la wuo na dolun a bulaa pi niaa di la Tiina Yesu sii suun le. ³⁴ Wia pe nialin kala si laa Yesu wiaa dii kala le worun. Nialin kala fa si keŋ diisin ari bagisin, ba yie joŋo yalle, a keŋ moribie-la ba si na ³⁵ a kaa mu Yesu nanzoŋba-la

teen. Ba kpa magē nii kala nuu-kala sii che. Nii wiaa ba nialin kuŋ-kala fa bi kuŋ chee ka. ³⁶ Baal kubala ma ne fa he dime, baa yire Josef. Yesu nanzoŋba-la ma kenu kaa yiyire Banabas. (U bubuon ne, u fa yie bul wiaa pi niaa ba nyusun nyinyaase.) U fa ŋaa Liivai doho nuu ne a lii Saapos tinŋeen. ³⁷ U ne jon u бага u fa si kene a yalle, a keŋ moribie-la kaa mu Yesu nanzoŋba-la teen.

5

Ananaya ari Safaya

¹ Ama ba tuoŋ baal kubala ne fa he dime. Baa yire Ananaya. U haala ma yirin ne fa Safaya. U jon u dua a yalle ² a liise moribie-la doŋsun faa, u haala jin, an keŋ ku-kaana-la kaa mu Yesu nanzoŋba-la teen. ³ Piita piesu, “Ananaya, bee ne tii ŋ len Sitaani nyisin, ŋ jon tinŋee-la ŋ si yalla moribie-la doŋsun faa, an nyia wiaa pi Wia Diŋ-zoŋ-la? ⁴ Ka ŋ-na jon ku-la yalle, ŋ dee buu tii? Moribie-la maa ŋ si yalla, ŋ dee biba tii? Bee ne saa tii ŋ biine ŋ tuoŋ le an ŋaa wiin deen? Nuhuobiinee dunŋa dee ŋ nyia wiaa pa, ŋ nyia wiaa pi Wia ma ne.” ⁵ Ananaya si nii wiin deen, u tuu tele suu. Fawullun keŋ nialin ma kala si he dime. ⁶ Bapuosa jon gerin laalu a jonu kaa lii a kaa mu hugi.

⁷ U yi hawa batori di u haala ku juu. U fa bi jin wii-la kala si ŋaa. ⁸ Piita piesu, “Moribie-la ŋ bala si kaa ko, magē nii ne ma jon ma tinŋee-la yalle koo?” Nii ne haalla bul di ba niin ne nii. ⁹ Nii ne Piita piesu, “Bee ne tii ma di ŋ bala vuure di ma nyise Wia Diŋ-zoŋ-la, a biine u bi jan dogisemaa? Bee na, nialin si jon ŋ bala mu hugi, ba ne chin boinniin nii. Ba saa jan jonun ma lii.” ¹⁰ U guu tel u sipaan a suu. Bapuosa-la si jon u bala kaa mu hugi, ba ku juu duu suba. Nii ne ba jonu kaa lii, a hugu a kperē u bala. ¹¹ Nialin kala si laa Yesu wiaa

dii aa hilimi ari nialin dōnsun ma si nii wii-la, fawullun kenba worun.

Wu-kpun̄kperisin̄ ari wu-magilaa

¹² Yesu nanzooba-la ŋaa wu-magilaa ari wu-kpun̄kperisin̄ yuge niaa tuon̄. Nialin̄ kala si laa Yesu wialin̄ dii, ba kala hilimi dōn̄o le ari nii-bala. Zawura-la ba si kaa yire Solomōn̄ zawura, u le ne ba hilimi. ¹³ Nuukala si bi Yesu wialin̄ laa dii bi nyu-duon̄ kene duu guoli ba tuon̄. Ari ŋii kala, ka ba ha bibeseba le. ¹⁴ Nialin̄ si laa Yesu wialaa dii a ku pe nialin̄ le, ba kii nialin̄ kala Wia fa si vene kaa kuu pe, baalaa ari haalaa. ¹⁵ A tin̄ wialin̄ kala sii ŋaa le, ba paala paa puwuoloo kaa lii won̄biiŋ niin̄, a bilba godoba le ari bōsunun̄ le. Ba ŋaa ŋii di Piita ne kuu bal, duu daaliimin̄ wuo he ba dōnsun̄ le di ba duori. ¹⁶ Niaa ma yuga a lii ta-biisi-la si kpage Jerusalem, a ken̄ puwuoloo ari nialin̄ jin̄-bōn̄n̄o si kene a kaa ko u teen̄, ba kala duori.

Ba to naasin̄ dōgise Yesu nanzooba

¹⁷ Ŋii ne nialin̄ si kpu pusun̄ pipi Wia kuhian̄ ari u haritooroo sii. U haritooro-la kala he Sadusii tin̄ŋaa paati-la tuon̄ ne Jerusalem le. Ba yaraa faasa bibieri. ¹⁸ Ba kese Yesu nanzooba-la kaa mu to dia, lee-la ba sii to ba niaa. ¹⁹ Ama titan̄-la titia Wia tin̄daara kubala ku ken̄ dia-la boin̄niiree suri, a len̄ Yesu nanzooba-la lii. Ka u bula piba, ²⁰ “Má mu juu chin̄ Wia-dia le a bula pi niaa won̄bii-falin̄ deen̄ wiaa.” ²¹ Yesu nanzooba-la sei. Siipuuraa ba juu Wia-dia a suomo didage niaa.

Ŋii ne nialin̄ si kpu pusun̄ pipi Wia kuhian̄ ari u nan̄dōnsun̄, ba yire Juu tin̄ŋaa kuhiasin̄ ari ba niaa kala di ba hilimi a vuure, an̄ tin̄ di ba mu dia-la le a kese Yesu nanzooba-la kaa ko. ²² Nihiasi-la si mua, ba biba na sarika le. Ba miira ku bul, ²³ “La si mu sarika-la, la na di ba yaga, nuukala bi suro, ka nialin̄ sii ben̄ sarikala, ba ma chin̄ boin̄niin̄. Ama la mu

suri, la bi Yesu nanzooba-la naa.”

²⁴ Wia-dia nihian̄ ari nialin̄ si kpu pusun̄ pipi Wia kuhiasin̄ si nii wiin̄ deen̄, u kperiba kin̄ken̄, ba bi jin̄ wii-la kala ba si jan̄ ŋaa. ²⁵ Ŋii ne baal kubala ku juu a bula piba di ba bee na nialin̄ ba si kaa to dia, ba ne chin̄ Wia-dia tuon̄ a didage niaa. ²⁶ Ŋii ne Wia-dia nihian̄ ari u niaa, ba mu keseba kaa ko. Fawullun̄ fa ken̄ba ne ari nialin̄ fa si he Wia-dia-la tuon̄ jan̄ paa tabiaa yageba, ŋii ne tii ba bi Yesu nanzooba-la fuga.

²⁷ Ba ken̄ba kaa ku juu, a len̄ ba chin̄ nialin̄ si yie hilime vuvuure wiaa sipaan̄. Ŋii ne nialin̄ si kpu pusun̄ pipi Wia kuhian̄ bula piba, ²⁸ “La bula pima ari siifiesin̄ ari ma bira sí wii-kala dagu Yesu dolun̄ le. Ama ma bee na, ma ken̄ wii-la kaa gaara chen̄ Jerusalem kala aa che ma jon̄ taali chugela a tin̄ baala deen̄ suun̄ le.” ²⁹ Piita ari Yesu nanzooba-la dōnsun̄ miira bula piba a bul, “U maga di la to Wia niin̄ ne a kii nuhuobiine niin̄. ³⁰ La naabalimaba faa to Wia ne, u ne chise Yesu suun̄ le, nii-la ma fa si kaa kpaase daa-gese nyun̄ u suu. ³¹ Wia chisu u sii jila hōn̄ Wia seme, ni-duon̄ di-hōnun̄, duu ŋaa Sipaa-laara ari Laataara, a len̄ di Iziral tin̄ŋaa birima lii ba haacheba le, ka duu jon̄ ba haacheba cheba. ³² La ŋaa wiaa deen̄ba kala dansia ari Wia Din̄-zon̄-la maa, Wia si jon̄o pi nialin̄ si to u niin̄ ne.”

³³ Nialin̄ si nii wiin̄ deen̄, ba faasa na baanin̄ a chiche di ba kpuba. ³⁴ Baal kubala ma ne fa he nialin̄ si yie hilime vuvuure wiaa tuon̄. U lii Farisii tin̄ŋaa tuon̄ ne. Baa yire Gamiilial. U ne faa dage wialin̄ Moosis fa si ŋmun̄sa bil di niaa tuto. Nuukala pupu jirima. U sii chin̄ a bul di ba len̄ di Yesu nanzooba-la lii di-jalin̄ muapilii. ³⁵ Ka u sii a bula piba, “Ma Iziral timma, má fiele ma siaa ari ma sii ŋaa wii-la niaa deen̄ba le. ³⁶ Jisin̄ deen̄ba ne, baal kubala ne fa he dime. Baa yire

Tuudas. U bula ari u ɲaa ni-bal nɛ. Niaa yi ari zɔ-banese a pɛu lɛ. Ba kpuu, ka u haritooro-la kala pise dɔɲɔ lɛ, u yiri-la kala dise. ³⁷ U harin lɛ nɛ, baal kubala ma lii, bua-la lɛ ba sɪi diise niaa, baa yire Judas. U lii Galilii nɛ. U kɛsɛ ni-dan a kaa to u harin. Ba kpuu maa, ni-dan-la ma sɪi to u harin, ba ma pise dɔɲɔ lɛ. ³⁸ Ka lɛɛɛ wiin deen, mi jan bula pima di ma sɪi wii-kala ɲaa niaa deenba lɛ, an lenba ta. Di tinȚimin deen lii nuhuobiine dolun lɛ nɛ, u jan lel. ³⁹ Ama di Wia tinȚimii nɛ, ma bi jan wuo cheyu. Di ma nɛ che di ma cheyu, ma jan na di ma di Wia paala yuyuo dɔɲɔ.”

⁴⁰ Nii nɛ ba jegile nii u niin. Ba yire Yesu nanzɔɔba-la ba ku juu, a ɲaa ba viireba, an bula piba di ba bira sɪi wiaa bul Yesu dolun lɛ, an len ba viiri. ⁴¹ Nii nɛ ba lii nialin fa si hilime teen. Ba tuɔɲ tɔrɛ ari ba si dɔgiseba a tin Yesu wiaa lɛ. ⁴² Tapulii-na kala ba yie juu Wia-dia a pɛɛ mu niaa diisin, a ha bubul Wia wu-zɔmɔ-la a mu tige Yesu Kirisito lɛ.

6

Niaa balipe ku pɛ Yesu nanzɔɔba-la lɛ

¹ Tapulaa deenba Yesu haritooro-la ku puɲa yuge. Nii nɛ ba tuɔɲ Giriik tinȚaa suomo nyinyan Hiburu tinȚaa. Ba bula ari ba si yie jon moribie-la a pipi yo-haalaa tapulii kala, ba yie bee kikieli bana yo-haalaa nɛ. ² Nii nɛ Yesu haritooro-la fii ari balia yire nialin kala si laa Yesu wiaa dii a hilimi, a bula piba a bul, “U bi maga di la biben moribiee an ka Wia wiaa ta. ³ Mi naanbiirin, má liise ma tuɔɲ niaa balipe ma si jima di niaa ka zilba, ka Wia Diɲ-zɔɲ-la heba lɛ an ken wu-jimin maa. Má liiseba di ba biben yo-haalaa deenba. ⁴ Ka la jon la nyun kala he aa chuɔle Wia an pɛɛ bul Wia niin wiaa.” ⁵ Nii nɛ nialin kala si he dime tuɔsaa kala tɔrɛ ari wialin Yesu haritooro-la si

bula. Ba liise baal kubala baa yire Sitiivin. U fa ɲaa baal-la si ken yarida worun nɛ. Wia Diɲ-zɔɲ-la ma heu lɛ. Ba bira liise Filip ari Purɔkurɔs ari Nikeeno ari Taamon ari Paaminas ari Nikɔlas. Nikɔlas lii AnȚiok nɛ. U fa bi Juu tiina ɲaa an tuto Juu tinȚaa harin. ⁶ Nii nɛ ba ken nialin balipe-la ba si liisa a kaa mu Yesu nanzɔɔba-la sipaan. Ba chuɔle Wia piba an jon ba nisaa danba lɛ.

Ba ken Sitiivin

⁷ Wia niin wiaa ha gaara su leela kala. Nialin si laa Yesu wiaa dii pun worun Jerusalem lɛ. Nialin ma si kpu pusun pipi Wia yuga a ma sei Wia niin wialin.

⁸ Wia lahɔrimɔ lɛ Sitiivin ken dolun worun, a wuo ɲinɲaa wu-kpunkerisin ari wu-magilaa niaa tuɔɲ. ⁹ Niaa dɔɲsun fa he dime. Ba fa ɲaa Juu tinȚaa nɛ a lii Sariini, dɔɲsun ma lii Alekizandia. Ba fa lii Wii-chuɔle dia-la ba fa sɪi yire ‘yosun ba si jonɔ ta’. Dɔɲsun ma fa ɲaa Juu tinȚaa a ma lii Siliisia ari Esia. Ba lii Sitiivin harin a ken wiaa lilere. ¹⁰ Ama ba fa bi u bubuɔɲ lɛ wuo ken a tin u wu-jimin ari Wia Diɲ-zɔɲ-la dolun lɛ u fa sɪi bul wiaa. ¹¹ Nii nɛ ba luɔra he niaa, ba bul, “La nia duu chei Moosis ari Wia yirin.” ¹² Ba bul ɲii a nyise nialin ari nihiasi-la ari Wia tenin kerichiba he. Ba baanin sii Sitiivin nyun. Ba kɛnu kaa mu nihiasi-la si yie hilime vuvuure wiaa teen. ¹³ Ba ken niaa kaa kɔ di ba ku nyia wiaa pu a bul, “Baala deen yie ku bul wiaa aa chei Wia-dia-la ba si jonɔ pi Wia, ari wialin Moosis si ɲmuɲsa bil di la tuto. U yie bul ɲii, u bi tɔrɛ, ¹⁴ bɛɛ wiaa la nia duu si di Yesu deen si lii Nazaret jan yigi Wia-dia-la lo, a ken wialin Moosis fa si dage la naabalimaba di ba tuto a kaa birime.” ¹⁵ Nialaa kala fa si hɔɲ leela, ba chaare siaa a pɛ Sitiivin lɛ. Ba na duu siaa nage Wia tinȚaara siaa.

7

Sitiivinŋ bul Wia wiaa a pi niaa

¹ Nii ne nialin si kpu pusun pipi Wia kuhianŋ piēse Sitiivinŋ di wiaa deenba ŋaa wutitii nee? ² Sitiivinŋ bul, “Mi nyimmaba ari mi naanbiirinŋ, má jegile nii mi teenŋ. Wii-balinŋ si keŋ yirinŋ keŋ u titia ku dage la naabalima Abiraham, bua-la le u fa si hōŋ Mesopoteemia tinŋteenŋ le, di u ha bi taŋ-la ba sii yire Haranŋ le mu hōŋ. ³ Nii ne Wia bula pu duu sii a leŋ u dia niaa, a lii u tinŋteenŋ ma le, a mu tinŋtee-la u si jaŋ dagu. ⁴ Nii ne u sii lii Kalidiya tinŋteenŋ le a mu hōŋ taŋ kubala baa yire Haranŋ le. Dime ne Abiraham nyimma suu. Nii ne Wia leŋ u sii lee-la a kō tinŋteenŋ deenŋ ma niaa deenba si hōŋ lēle. ⁵ Bua-la le Wia bi lee-la kere pi Abiraham a yi naakielinŋ kubala maa, duu titia keŋ, ama u bula pu duu jaŋ joŋo pu, ba di u doho niaa. Bua-la le Wia si bul ŋii Abiraham le duu ha bi bii lula. ⁶ Nla ne Wia bula pu, ‘N doho niaa jaŋ ŋaa nuhōraa tinŋteenŋ dōŋo le, a birime yosunŋ. Ba jaŋ dōgiseba worunŋ jisinŋ zō-banese. ⁷ Mi saa jaŋ keŋ nialinŋ ba si jaŋ tima pipa dii sariya. Nii harinŋ le ba jaŋ lii lee-la le, a bira kō daha a chuchulemi.’

⁸ Nii ne Wia joŋ u niinŋ a pi Abiraham. U magilinŋ ne, ba di u doho niaa kikeri ba penee. Nii ne Abiraham lul Aizik. Tapul-chorimunŋ cheeŋ u keri u peninŋ. Aizik ma lul Jekōb. Jekōb ne lul biirinŋ fii ari balia-la si ku ŋaa la naabalimaba. ⁹ Ba tuōŋ dōŋo yirinŋ ne Josef. Ku-kaana-la yaraa bibieri u nyunŋ, ba kenu kaa yalle pi baalaa kubalaba. Ba kenu kaa mu Ijipiti tinŋteenŋ. Ama Wia fa peu le worunŋ ¹⁰ a liisu wahala kala le u fa si jua. U fa si mu Feero Ijipiti kuoro sipaanŋ, Wia lahōrimō le u keŋ wujiminŋ. U leŋ u ŋaa u tinŋteenŋ kuhianŋ a bibenŋ u tinŋteenŋ ari u dia kala. ¹¹ Nii ne losunŋ ku juu Ijipiti tinŋteenŋ ari Keenanŋ tinŋteenŋ kala. Losunŋ kpu niaa kinŋkenŋ, la naabalimaba bi

kudiilee wuo na. ¹² Jekōb nia ari kudiilee he Ijipiti tinŋteenŋ le. U tinŋ u biirinŋ, la naabalimaba-la, di ba mu yōō kaa kō. Ba yōō kaa kō. ¹³ Jekōb biirinŋ miira mu Ijipiti liaminŋ le di ba yōō kudiilee. Nii ne Josef keŋ u titia dageba, aŋ keŋba ma dage Feero. ¹⁴ Nii ne Josef tinŋ di ba mu bula pi u nyimma Jekōb, duu keŋ u doho niaa kala kaa kō Ijipiti, ba kala fa ŋaa mahinŋ batori ari fii ari banōŋ ne a mu Ijipiti. ¹⁵ Nii ne Jekōb sii a mu Ijipiti. Ba di u biirinŋ suu dime. ¹⁶ Ba miira keŋba kaa mu Keenanŋ tinŋteenŋ a hugiba lee kubala baa yire Sekem. Ba hugiba bua kubala le Abiraham fa si yōō Hamō niaa teenŋ.

¹⁷ U ka mua, ka di wii-la-na ku bal, Wia fa si bula pi Abiraham ari u jaŋ ŋaa pu. Bua-la le Jekōb doho niaa fa puŋa worunŋ Ijipiti le. ¹⁸ Kuorula fa si jinŋ Josef suba, aŋ ka ni-tanii dii kuorunŋ Ijipiti le. U fa bi Josef wiaa jinŋ. ¹⁹ U nyise niaa kinŋkenŋ a dōgiseba, a fuge la naabalimaba di ba joŋ ba bii-mullunŋ kaa lii ta di ba suu. ²⁰ Bua-la le ne ba fa lul Moosis. U fa ŋaa bii-zōŋ-bie ne worunŋ. Ba benu u nyimma dia le cheŋsinŋ batori, aŋ ka ba joŋu kaa lii ta. ²¹ Ba si joŋu kaa lii ta ŋii, Feero tolo ku joŋu, a diesu ari u bii-lullunŋ. ²² Ba dagu Ijipiti tinŋŋaa wujiminŋ kala. U wu-ŋaalaa ari u wu-bulaa leŋ u ŋaa ni-bal.

²³ Moosis fa si yi jisinŋ mahinŋ balia, u biine ari u jaŋ mu na u naanbiirinŋ Iziral tinŋŋaa. ²⁴ U si mu dime, u na Ijipiti tiina duu dōgise Iziral niaa dōŋo. U mu lii paa Iziral tiina-la tuōrunŋ, a kpu Ijipiti tiina-la. ²⁵ U fa biina ari u naanbiirinŋ jaŋ jinŋ ari Wia che duu ne laaba ta, ama ba fa bi wuo jinŋ. ²⁶ Taŋ si pula, u na di Iziral niaa balia, baa yuo dōŋo. U mu duu keŋba he dōŋo le a bul, ‘Ma ŋaa naanbiirinŋ ne, bee ne tii ma gura dudōgise dōŋo?’ ²⁷ Nii-la fa sii dōgise u dōŋo tiina-la keŋ Moosis yige ta aŋ bul, di kubee ne si u bibenba a laa ba wiaa jijinŋ? ²⁸ Duu che duu kpuu maa, ari u dia si kpu Ijipiti tiina-la

ŋii nɛɛ? ²⁹ Moosis si nii ŋii, u fá Ijipiti tinteen ɛ a mu ŋaa nuhuɔru Midian tinteen ɛ. U hɔŋ dime nɛ a jaa haala, a lul biirin balia. ³⁰ U fa hɔŋ dime jisin mahin balia.

Nii nɛ Wia tinɗaara kubala ku lii u teen giri-bine tuɔŋ a kpage peel kubala baa yire Saana. U ku lii a nage tii-bie síi dii nyinin tuɔŋ. ³¹ Moosis si na ŋii, u ŋaau wu-kpunkpere. U mu yi duu na tii-bie-la, a nii la Tiina Wia yiikoro. U bula pi Moosis a bul, ³² ‘Mi nɛ ŋaa ŋ naabalimaba Abiraham ari Aizik ari Jekɔb Wia.’ U si bul ŋii, Moosis china chichel. U bira bi wuo biben.”

Ba yage Sitiivin ari tabiaa

³³ Sitiivin bira bul, “Ŋii nɛ la Tiina Wia bula pi Moosis a bul, ‘Chaare ŋ nɛŋɛŋɛŋɛ ŋ naasin ɛ. Wia hɛ lee-la ŋ si china nɛ. U wase lee-la kala a ta. U bi disinnin kenɛ. ³⁴ Mi na ba síi dɔgise mi niaa ŋii nɛ Ijipiti ɛ, a nii ba síi yel maa, a ku tuu di mi laaba ta. Sii lɛɛɛ, mi timin di ŋ miira mu Ijipiti.’ ”

³⁵ Nii nɛ Sitiivin bira suomi aa bul, “Moosis deen nɛ ba via aŋ piesu, ‘Kubɛɛ nɛ ŋaa ŋ bibenla a laa la wiaa jijin?’ U nɛ Wia tin u ŋaa ma kuhian ari ma laataara. Wia nɛ to Wia tinɗaari-la fa si ku lii Moosis teen a nage tii-bie-la si dii nyinin tuɔŋ, a pɛu ɛ duu laa u niaa tita. ³⁶ Moosis ŋaa wu-magilaa ari wu-kpunkperisin Ijipiti ɛ, aŋ-na kɛɛɛ u niaa lii Ijipiti tuɔŋ, a kenba to mugi-bal kubala baa yire Mugi-fian. Ba to girin maa jisín mahin balia, a pɛɛ ŋaa wu-kpunkperisin ari wu-magilaa wonbiin ɛ. ³⁷ Moosis deen nɛ bula pi Iziral niaa a bul, ‘Wia jan len di nialin síi bul wiaa, Wia Din-zɔŋ-la dolun ɛ, di ba dɔŋɔ kɔ ma teen ari u si tinmi ŋii.

U jan ŋaa ma naanbii.’ ”

³⁸ Nii nɛ Sitiivin bira suomo bubul, “Moosis ari la naabalimaba nɛ fa hilimi giri-bine tuɔŋ. Dime nɛ u na Wia tinɗaara ma peel kubala nyun

baa yire Saana. U jon Wia niin wialaa si ken miisin pu duu laa bula pila. ³⁹ La naabalimaba via u niin aŋ jon ba harin yia, ba tuɔbiinaa kala fa cho di ba fa miira mu Ijipiti. ⁴⁰ Nii nɛ ba bula pi ɛɔŋ a bul, ‘Mɛ vesin pila di ba laa la sipaan. Moosis deen si kenla lii Ijipiti tinteen ɛ a kenla kɔ daha, la bi jin wii-la kala si ŋaau ɛ.’ ⁴¹ Nii nɛ ba mɛ vene a nage nɛ-bie a kpaaru. Ba tuɔŋ tɔɔɛ ku-la ɛ ba titia si mɛɛ. ⁴² Wia jon harin yiaba a jonba ta ba chuchuoɛ chɛŋwulaa ari chɛnɛ ari wii-pɔsun. Ba ŋmunɛ ŋii nɛ Wia ten-la sɛmɛ dɔŋɔ nialin síi bul wiaa, Wia Din-zɔŋ-la dolun ɛ, si ŋmunɛ. Ba dɔŋɔ ŋmunɛ a bul, Wia si,

‘Ma Iziral timma, bua-la ɛ ma fa si hɛ giri-bine-la ɛ jisín mahin balia-la, mi-na dee ma fa kpu pusun pa.

⁴³ Ma vesin nɛ ma kpikpaare.

Ma vene ba síi yire Mɔlɔk, u lɛbin nɛ ma kaa chunaa ven, a chun ma chɛŋwulun vene maa, vene-la ba síi yire Refan u magilin nɛ.

Kiaa deenba nɛ ma mɛ a chuchuoɛ.

Ŋii nɛ tii mi jan len ba kenma kaa mu di-bolii, a kieli Babilon a mu.’ ”

⁴⁴ Nii nɛ Sitiivin bira bul, “La naabalimaba fa si hɛ giri-bine tuɔŋ, ba ken lɛbi-la ba fa si hɛ pi Wia. Wia nɛ fa dage Moosis duu ŋaa. U dage u nagisin kala u si jan ŋaa duu nage. Moosis ŋaa ŋii. ⁴⁵ Niaa deenba suba nɛ, ka la naabalimaba laa lɛbin deen ba nyun ɛ a chun. Ba di Josua juu tinteen dɔŋɔ. Nialin fa si tii tintee-la, ba fa bi Wia ka to. Wia pɛ la naabalimaba deenba ɛ ba yuo kiri nialin, aŋ laa tintee-la tii. Lɛbi-la fa hɛ ba teen, ŋii nɛ deen deen, Devit, la naabalima, ku yiu. ⁴⁶ Wia lahɔrimɔ-la ɛ u sul Wia duu len duu saa dia pu, u-na Wia-la u naabalima Jekɔb fa síi to. ⁴⁷ Devit dee bi dia-la saa, Solomɔŋ nɛ miira saa a pi Wia. ⁴⁸ Ka Wia si kii kun-kala, u bi diisi-la

nuhuobiinee si saa dunɗuɗa ne ka juu. Nialin sii bul wiaa, Wia Diɗ-zɔŋ-la dolun ɛ, ba dɔŋɔ ne fa bul nii. U si,

49 ‘Wia si, Wia-jaɗ ɛ ne mi kuorikpasa he, tɪnteen ne ɗaa mi naasin dibilin.

Dii bɛɛ ne saa ma jaɗ saa pimi? Mi di-wiesin he nii?

50 Kiaa deenba kala, mi dee bi ɗaa?’

51 Nii ne Sitiivin bul, “Ma nyun dolie kinkeɗ. Ma digilaa ma kparime. Ma keɗ nyu-duon ari nialin si bi Wia ka to. Ma ma yie via ma to Wia Diɗ-zɔŋ-la ɛ, ari ma naabalimaba fa si ɗaa nii. 52 Nialin sii bul wiaa, Wia Diɗ-zɔŋ-la dolun ɛ, ba tuɔɗ kuɗ-kala tuo ma naabalimaba si bi naasin to dɔgise. Ba fa kpu nialaa si laa sipaan paala bul di Wia Tuɔ-pul Tiina jaɗ ko. U ne ma joɗo yalle a kpu. 53 Wia tɪɗdaaraa joɗ Wia niin wiaa pima, ama ma buu to.”

54 Sitiivin si bul wialin dɛɛ, nialin fa si hilime vuure wiaa nii wialin u si bula. Ba baaniɗ faasa sii, ba chichan ba nyilaa. 55 Nii ne Wia Diɗ-zɔŋ-la faasa he Sitiivin ɛ yuge. U wula beɗ wia nyun a na Wii-balin tula, a na Yesu maa duu hoɗ Wia seme, ni-duon di-honun. 56 Nii ne Sitiivin bul, “Má bee na, mi na Wia-jaɗ boininiin duu suro, ka Nuhuobiine Bie hoɗ Wia seme, ni-duon di-honun.” 57 Ka ba faasa ɗaa goɗ a to ba digilaa, ba kala guu mu-u ɛ 58 a kenu yige ta u lii ba jaɗ tuɔɗ ɛ, a paa tabiaa yiyagu. Nialin sii yage Sitiivin joɗ ba genniɗ a pi bapusi-bie kubala baa yire Sool, u biben. 59 Baa yage Sitiivin nii ne ari tabiaa, ka u yiyire la Tiina Yesu a sulu, “Mi Tiina Yesu, laami kaa mu ɗ teen.” 60 U tuu kpirimi a faasa ɗmoo niin a bul, “Mi Tiina Yesu, mii sulun, si ba haache deen chimin tɪɗ.” U bul nii ne an suu.

8

Sool to naasin dɔgise nialin si laa Yesu wiaa dii aa hilimi

1 Sool ma sei ari ba kpu Sitiivin ne. Chɛɛ-la ba suomo to nialin si laa Yesu wiaa dii aa hilimi naasin, a dudɔgiseba kinkeɗ Jerusalem ɛ. Ba kala pise Judiya ari Samaria tɪnteen kala ɛ, see Yesu nanzoo-ba-la dunɗuɗa ne ka. 2 Nialin sii fá Wia joɗ Sitiivin a hugi an yel u yoho worun.

Ba bul Wia wu-zomɔ-la Samaria ɛ

3 Sool faa che duu pugi nialin si laa Yesu wiaa dii, a to ba naasin dudɔgiseba. U to dii-niirin a kese haalaa ari baala-la si laa Yesu wiaa dii, a lereba lii ba diisin ɛ, an len ba keɗba kaa mu to dia. 4 Nialaa fa si pisa, ba mu golle lee kala a bubul Wia niin wiaa. 5 Filip sii mu taɗ kubala baa yire Samaria, a bul Kirisito wiaa pi nialaa si he dime. 6 Ni-dan-la kala si nii wialaa u si bula a na u wu-magila-la u si ɗaa, ba kala keɗ nii-bala a joɗ ba nyun he wialin u sii bul ɛ. 7 Filip si bul wiaa nii, jin-bonɗoɗo fa keɗ niaa a yuge, ba lenba. Di ba ne lenba, ba yie lii a faasa yiyel. Niaa ma yuga a gberike, dɔɗsun keɗ na-suunun ari na-suunun, ba ma kala duori. 8 Samaria tɪɗɗaa kala tuɔɗ faasa toɛ.

9 Taɗ-la ɛ baal kubala ma he dime, baa yire Saamon. U keɗ daalusun a ɗɪɗɗaa wu-kpunɗkperisin taɗ-la ɛ niaa nina, a didage ari u ne keɗ dolun. 10 Ni-balaa ari hanbiisin kala joɗ ba nyun he u wu-ɗaalaa ɛ a bul, “Baala deen ne ɗaa wia. U keɗ dolun, dol-la ba sii yire Wia dol-balin.” 11 U si ɗaa wu-kpunɗkperisin deenba niaa na u diene, nii ne tii niaa joɗ ba nyun kala he u wu-ɗaalaa ɛ. 12 Ama Filip si bul Wia wu-zomɔ-la a tige Wia kuorii-la, a bul Yesu Kirisito ma wiaa, ba laa wialaa dii, ba foba Wii-chuɔle liin, baalaa ari haalaa kala. 13 Saamon titia ku laa wialin dii, ba fou ma

Wii-chuoŋe liiŋ, ka u mere Filip ƙe. U si na wu-kpunƙperisi-la ari wu-magilaa Filip sii ŋaa, u ŋaau wu-kpunƙpere.

¹⁴ Yesu nanzooƙa-la si he Jerusalem ƙe nii ari Samaria tinŋaa laa Wia wiaa dii. Nii ne ba ta Piita ari Joŋ di ba mu dime. ¹⁵ Ba mu a chuoŋe Wia piba di Wia joŋ u Diŋ-zoŋ-la piba, ¹⁶ bee wiaa bua-la ƙe Wia Diŋ-zoŋ-la ha biba kuŋ-kala ƙe he. La Tiina Yesu doluŋ dunɗunɗa ƙe ne ba fa foba Wii-chuoŋe liiŋ. ¹⁷ Ba joŋ ba nisaa danba ƙe, nii ne Wia Diŋ-zoŋ-la ku tuu heba ƙe. ¹⁸ Saamɗoŋ si na di Yesu nanzooƙa-la joŋ ba nisaa danba ƙe Wia Diŋ-zoŋ-la ku heba ƙe, u joŋ moribee a sulba a bul, ¹⁹ “Má pimi ma doluŋ deen di mi ma joŋ nisinɗa dan nuu-kala ƙe, di Wia Diŋ-zoŋ-la he tiina ma ƙe.” Nii ne Piita bula pu, ²⁰ “N biina ŋ jaŋ wuo joŋ moribee yoo Wia si joŋ kua dii zile niaa ƙe? Ma di ŋ moribee kala jaŋ juu nyiniŋ. ²¹ N bi wii-kala keŋe wiaa deenba ƙe. N bi ŋ tuɗoŋ pulla Wia teen. ²² Birime a lii wu-bomunɗa deen ƙe, aŋ sul Wia duu joŋ ŋ tuɗoŋ deenba ŋ si biinu a cheŋ. Duu jaŋ joŋo cheŋ, u jaŋ joŋo cheŋ. ²³ N yaraa bieri kinkeŋ, haache ma keŋiŋ.” ²⁴ Nii ne Saamɗoŋ sulba di ba chuoŋe Wia pu di wiaa deenba kala ba si bula siu ƙe ŋaa. ²⁵ Ba si bul Wia wiaa dere ari wialinɗa kala u si ŋaa piba, ba sii di ba miira mu Jerusalem. Ba si mu Jerusalem nii, ba bul Wia wu-zomɗo-la Samaria tinteen tasiŋ ƙe a yuge.

Filip cheŋ baal-la si lii Itoopia tinteen

²⁶ Nii ne Wia tinɗaara kubala ku bula pi Filip, “Sii mu taŋ-bubuɗoŋ a mu wonbii-binii-la si lii Jerusalem aa mu Gaza.” U mua. ²⁷ U si mu dime, u na baal kubala duu lii Itoopia tinteen. U ŋaa bonjoŋ ne a tima pipi Itoopia kuoro ba sii yire Kanɗaasi. U fa ŋaa haal ne. Baal-la faa beŋ u kiaa kala. U fa mu Jerusalem ne a chuoŋe Wia aŋ hoŋ

u toruko nyuŋ, ²⁸ a miira mumu dia. U fa sii veŋ nii ne u kikaime Wia teniŋ seme doŋo, Azaaya si ŋmuŋsa. Azaaya fa ŋaa nialiŋ sii bul wiaa, Wia Diŋ-zoŋ-la doluŋ ƙe doŋo ne. ²⁹ Nii ne Wia Diŋ-zoŋ-la bula pi Filip duu mu kpage toruku-la. ³⁰ Filip fá mu kpage a nii duu karime Wia ten-la seme doŋo Azaaya si ŋmuŋsa. U piesu duu jin wialiŋ u sii karimu bubuɗoŋ ne? ³¹ Nii ne baal-la bul duu bi jaŋ wuo jin ba bubuɗoŋ, see di nuu dagu, aŋ yire Filip duu jila hoŋo peu ƙe. ³² Wia niinɗa wialiŋ u fa sii karimu ne ŋla: U si,

“U toŋe u niinɗa a nage pieŋe ba si kaa mu di ba kpu, ka u toŋe nii. U bira nage pie-bie ma si toŋe u niinɗa, ka ba kikeri u punaa ne. Nii-la bi u niinɗa suro.

³³ U si keŋ u titia muuri nii, ba girima laa u wu-sinŋaa. Ba liisu ni-weyee tuɗoŋ a kpuu. Ba si kpuu nii, kubee ne jaŋ wuo to u doho naasiŋ?”

³⁴ Baal-la si karime Wia niinɗa wiaa dere, u pieŋe Filip, “Kubee wiaa ne nii-la sii bul wiaa, Wia Diŋ-zoŋ-la doluŋ ƙe bubul nii? U titia wiaa ne koo nuu ma doŋ wiaa ne?” ³⁵ Nii ne Filip suomi Wia niinɗa wialaa leela titia ne a bul Wia wu-zoŋoŋo wiaa a kaa mu tige Yesu ƙe. ³⁶ Ba si joŋ wonbii-la aa mu, ba mu yi lee kubala duu keŋ liiŋ. Nii ne baal-la bula pi Filip a bul, “Na liiŋ ne ŋla. Bee ne jaŋ tomi di ŋ sími Wii-chuoŋe liiŋ fo?” ³⁷ Nii ne Filip bula pu, “Di ŋ ne laa Yesu wialiŋ dii ari ŋ tuɗoŋ kala, mi jaŋ foŋ Wii-chuoŋe liiŋ.” Nii ne baal-la bul, “Mi laa dii ari Yesu Kirisito ne ŋaa Wia Bie.” ³⁸ Nii ne baal-la ŋaa jani-la fa sii lere toruku-la chinɗa. Ba di Filip kala tuu a juu lii-la. Filip fou Wii-chuoŋe liiŋ. ³⁹ Ba si ku lii lii-la tuɗoŋ, Yesu Diŋ-zoŋ-la ku joŋ Filip kaa lel. Baal-la bira bi Filip na aŋ joŋ u wonbiiŋ vivenɗa, a kala ŋaa tuɗoŋ. ⁴⁰ Filip ŋaa duu chinɗa duu he taŋ kubala baa yire Asidod ƙe. U golle ta-biisi-la kala si he dime

a bubul Wia wu-zŏŋŋŏ wiaa. U ŋaa ŋii nɛ a mu yi taŋ kubala baa yirɛ Sizariya.

9

Sŏol ku laa Yesu wiaa dii

¹ Sŏol ha fufugi la Tiina Yesu haritooro-la ari u jaŋ kpuba, a sii mu nialin si kpu pusun pipi Wia kuhian teen, ² a sulu duu ŋmunŋɛ tennin pu duu kaa mu taŋ kubala baa yirɛ Damaasikas a kpa Wii-chuŏle diisin lɛ. U nɛ ŋaa ŋii duu na nuu-na kala sii to wonbii-la dime, baalaa koo haalaa kala, duu wuo keŋ dolun a wuo keŋɛba vŏŏ kaa kŏ Jerusalem. U ŋmunŋa pu. ³ Sŏol si lii jon wonbiin a mumu Damaasikas a ku kpage taŋ-la, pulumun guu lii wia nyun a faasa chaana heu lɛ. ⁴ U tuu tel tinteen. Ka u nii nuu yiikoro. Uu bul u teen, "Sŏol, Sŏol, bɛɛ nɛ tii ŋ to mi naasin a dudŏgisemi ŋla?" ⁵ Nii nɛ u piɛɛ, "Kubɛɛ nɛ, tiina?" Yiikoro-la bul, "Mi nɛ ŋaa Yesu, nii-la ŋ si to u naasin a dudŏgisɛ. ⁶ Sii juu taŋ-la tuŏŋ. Dime ba jaŋ dagin wii-la ŋ si jaŋ ŋaa." ⁷ Sŏol ari nialin fa sii ven, ba china tuŏbibeŋ, ba nii yiikori-la, ama ba bi nuu-kala naa. ⁸ Sŏol nyaga sii a suri u siaa. U bi kuŋ-kala wuo na. Ba keŋ u nisin lɛ nɛ a lɛrɛ juu Damaasikas. ⁹ U nyulime a he dime u tapulaa batori. U bi kuŋ-kala die, u bi liin ma nyua.

¹⁰ Yesu haritooro-la kubala ma fa he Damaasikas lɛ, baa yirɛ Ananayas. U na wiaa ari duosoo tuŏŋ. Nla nɛ u na: La Tiina Yesu yiru a bul, "Ananayas!" Nii nɛ u si, "Nami, mi Tiina." ¹¹ Nii nɛ la Tiina Yesu bula pu, "Sii mu wonbii-la ba sii yirɛ wonbii-tegi-tegi a mu baal kubala dia u yirin nɛ Judas, a piɛɛ che baal-la si lii taŋ kubala baa yirɛ Taasis. Baal-la yirin nɛ Sŏol. U nii chuŏle Wia sisɛle ŋii." ¹² Nii nɛ Yesu bira bula pi Ananayas a bul, "Sŏol nii chuŏle Wia ŋii, u na ari duosoo tuŏŋ, ŋ-na Ananayas, di ŋ ku juu a jon ŋ nisin danu lɛ di u siaa

bira suri." ¹³ Nii nɛ Ananayas bul, "Mi Tiina, niaa yuga kinkeŋ a bula pimi ari baala deŋ ŋaa wu-bŏŋŋŏ ŋ niaa lɛ si he Jerusalem lɛ. ¹⁴ Nialin si kpu pusun pipi Wia kuhiasin pu dolun taŋ deŋ lɛ duu keŋɛ nialin kala sii chuŏlun vŏŏ." ¹⁵ La Tiina Yesu bula pi Ananayas a bul, "Sii mu, mi nɛ liisu duu tima pipimi. U jaŋ mu bul mi wiaa nialin si bi Juu tinŋaa ŋaa teen, ari kuoroo, ari Iziral niaa teen. ¹⁶ Mi nɛ jaŋ dagu heɛ-la ŋii u si jaŋ na a tin mi wiaa." ¹⁷ Nii nɛ Ananayas sii mu dia-la Sŏol si jua. U juu a jon u nisaa dan Sŏol lɛ aŋ bul, "Mi naanbie Sŏol, la Tiina Yesu-la ŋ si na wonbiin lɛ ŋ sii kŏ daha, u nɛ tinmi. U tinmi di mi kŏ di ŋ siaa wuo suri, ka di Wia Din-zŏŋ-la ma heŋ lɛ."

Sŏol bul Wia wiaa a pi niaa Damaasikas lɛ

¹⁸ U si bul ŋii, di kiaa nage chenfilin kerikee guu lii Sŏol siaa lɛ tel, ka u bira wuo nina. U sii, ba fou Wii-chuŏle liin. ¹⁹ U dii kiaa a bira dol. U he Damaasikas lɛ a juu Yesu haritooro-la si he Damaasikas tuŏŋ tapulaa banmenɛ. ²⁰ U si he dime, u guu sii mu Wii-chuŏle diisin a suomo bubul Yesu wiaa a pipi niaa, a bul duu nɛ ŋaa Wia Bie. ²¹ Nialin kala si nii wialin u si bula, u ŋaaba wu-kpunkpere. Baa piɛɛ dŏŋŏ, "Baala deŋ dee fa bi Jerusalem lɛ he aa kpu nialin sii to Yesu deŋ ŋii? Nla wiaa saa dee u bira kŏ daha, duu keŋɛba vŏŏ kaa mu nialin si kpu pusun pipi Wia kuhiasin teen?" ²² Ka Sŏol sii bul wialaa, u wasa keŋ dolun a kii bunbun-la. U wuo dage ari Yesu nɛ ŋaa Kirisito, Wia si liisa. U paala faasa bul ŋii, Juu tinŋaa si he Damaasikas lɛ, ba nanɗaasin kala yuŋɛ.

²³ U he dime a dieni, ŋii nɛ chee kubala Juu tinŋaa vuurɛ di ba kpuu. ²⁴ Sŏol ku nii. Ba yie pŏ taŋ-la boinŋii-balin wiiheye ari titanin kala nɛ di ba kpuu.

Sŏol he Jerusalem lɛ

25 Titanj kubala Sool haritooroo jonj he sime tuonj a kenj nmeninj voo, a leru u kieli jee-la a tuu jeen harinj, a lii mu Jerusalem.

26 Sool si mu Jerusalem, u chiche duu juu Yesu haritooro-la tuonj. Ba bi laa dii ari u nja Yesu haritooro-la donjo. Ba fifau. 27 Yesu nanzoo-ba-la donjo ba sii yire Banabas ne peu le a kenu kaa mu Yesu nanzoo-ba-la teenj. U ne bula piba nii Sool si na la Tiina Yesu wonjiinj le, u bul wiaa pu nii. Banabas ne saa bira bula piba nii Sool si kenj nyu-duonj a bul Yesu wiaa pi niaa Damaasikas le. 28 Ba sei u juu ba tuonj a gugolle ari tuotoronj Jerusalem le, 29 a bubul Wia wiaa ari nyu-duonj la Tiina Yesu dolunj le. Ba di juu timma-la sii bul Giriik tinjja wu-bulun, ba kenj wiaa lilere. Ba wiwalime di ba kpuu. 30 U naanjiiri-la si nii wiinj deenj, ba kenu kaa mu Sizariya a nja u mu Taasis.

31 Nii harinj le nialinj si laa Yesu wiaa dii aa hilimi Judiya ari Galilii ari Samaria tinjeenj le kala na wiese, a wasa nja Wia yarida, a to la Tiina Yesu a fifau. Wia Din-zonj-la ma peba le. Ba punja pe.

Piita mu Lida ari Jopa

32 Piita fa golle leree kala ne. Tapulii kubala u sii mu Lida duu na Wia niaa dime. 33 U si mu dime, u na baal kubala baa yire Iniyas. U gberike pinj dia le jisinj chori. 34 Nii ne Piita bula pu a bul, "Iniyas, Yesu Kirisito vaarinj ne, sii chuoli nj boso." U guu sii a duori. 35 Nialinj kala si lii Lida ari Saronj na nii, a birime to la Tiina Yesu.

36 Haal kubala ne fa he Jopa le. U faa to Yesu ne. U yirinj ne Tabita. (Giriik tinjja kaa yiru Dookas. U bubuonj ne bagil.) U kenj zile kinjenj a pipe summoo le. 37 Bua-la le u wiwiile a suu. Ba fou liinj a kaa jila bil lusunj nyunj dia le. 38 Jopa ari Lida fa bi bol. Nialinj si laa Yesu wiaa dii a he Jopa le nii ari Piita he Lida le. Ba tinj niaa balia u teenj di ba sulu duu he dolunj anj ko ba teenj lima lima.

Ba mu a bula pu. 39 Piita sii to ba harinj mu. U si mu dime, ba kenu jil lusunj nyunj dia-la. Yo-haalaa kala chinj u seme aa yel, a paa geri-laalaa ari geri-vobia-la Dookas fa si yere u fa si he u miisinj le, a didage Piita. 40 Piita nja ba kala lii dia-la tuonj. Ba si lia, u tuu kpirimi a chuole Wia. U chuole Wia dere anj birime suu-la teenj a bul, "Tabita, sii." U suri u siaa. U si na Piita, u sii honj. 41 Piita mu yiu a kenj u nisinj le u sii. Nii ne u yire Wia niaa ari yo-haalaa-la a jonj piba. Ba kala nau duu bira weye. 42 Wiinj deenj teeli Jopa kala ne. Niaa yuga a ku laa la Tiina Yesu wiaa dii. 43 Piita he puri-tiseru kubala dia le ne Jopa le a didieni. U yirinj ne fa Saamonj.

10

Piita ari Koniiias

1 Baal kubala ne fa he Sizariya le. U yirinj ne fa Koniiias. U fa nja laali-yuoro-la ba si kaa kpa zolo zolo ba donjo kuhianj ne, laali-yuoro-la ba kaa yire Itali laali-yuoroo. 2 Uu fa Wia, ba di u dia niaa kala ma tuto Wia. U yie pipe summoo le, a chuchuele Wia ma bua-na kala le. 3 Wiiheye kubala ari kerifi batori bua le, Koniiias paala chaasa na ari duosoo tuonj di Wia tinjdaara kubala ku juu a yiru, "Koniiias!" 4 U chaare siaa bibenu. Fawullunj kenu. U piese, "Bee kunj ne mi Tiina?" Nii ne Wia tinjdaari-la bula pu, "Wia nii nj si yie chuchuele nii ne a na nj si yie pipe summo-la ma le nii. A tinj wiaa deenja wiaa uu liisi nj wiaa ne. 5 Tinj niaa leele di ba mu Jopa a che yire baal kubala duu ko nj teenj. U yirinj ne Saamonj Piita. 6 Uu juu puri-tiseru kubala dia ne, u ma yirinj ne Saamonj. U dia kpage mugi-balinj ne." 7 Wia tinjdaari-la si bul wialinj dere, u miira viiri. Nii ne anj ka Koniiias yire u dia tinjinnaa balia a pe laali-yuoro kubala le. Laali-yuori-la he nialaa si yie honjo gbaaru tuonj ne a fifa Wia. 8 U bul wii-la kala u si na ne anj lenj ba mu Jopa.

9 Tan si pula, wia ma mage nyu-gbaŋa di ba mu kpage Jopa. Ba sii mu nii, Piita ma jil lusun duu chuole Wia. 10 Losun fa kenu u chiche kudiilee duu dii. Ba sii njaa kudiilee di ba pu. Ba sii nja kudiile-la nii, u na ari duosoo tuon 11 di wia nyun kpa. Ka kun a nage geri-balin a lii wia nyun ku tuu tinteen. Ba ken u niipine-la banesemin le. 12 Ka pun-yiriba ari zaari-yiriba ari kialin si ken boye tutuuri tinteen he u tuon. 13 Nii ne u nii nuu yikoro duu bul, "Piita, sii kpu a dii." 14 Piita bul, "Ai, mi Tiina, mi ha bi ku-la kala si ken disinnin die." 15 Yikori-la bira miira bula pu, "Ku-la kala Wia si si u zomo, bira si bul duu ken disinnin." 16 U na kialin deenba di ba ku tuu naansin butori ne, ka ba miira jil wia nyun. Ba bira bi tibe.

17 Wii-la kperi Piita. U hono bibiine wii-la u si na bubuon, di nialin Koniiias fa si tima, di ba ne piesa ku chin Saamon boinnii-balin nii. 18 Nii ne ba yire a piese di baal kubala he dia deen tuon baa yire Saamon Piitaa? 19 Piita fa ha ken wii-la u fa si na a bibiine u bubuon. Nii ne di Wia Din-zon-la bula pu, "Bee na baalaa batori ne he daha a chiche. 20 Sii tuu a si logo logo nja, an kenba mu. Mi ne tinba n teen." 21 Nii ne Piita sii tuu ba teen a bula piba, "Mi ne nii-la ma sii che. Bee ne ma kaa chichemi?" 22 Nii ne ba bul, "Laali-yuoroo kuhian kubala, baa yire Koniiias ne tinla. U nja tu-pul tiina ne a fifa Wia. Juu tinjaa ma kala bibeseu le. Wia tinjaara kubala ne ku bula pu duu yirin di n ko u dia, di ba nii wii-la n si jan bula piba." 23 Nii ne Piita yireba di ba juu chua, tan-pul.

Tan si pula u sii ba di ba mu. U naanbiiri-la ma donsun si laa Yesu wiaa dii Jopa le ma pe kenu mu. 24 Che-liamin cheen ba mu yi Sizariya. Dime Koniiias ari u naanbiirin ari u nanjonsun u si yira, ba kala hono gberu. 25 Piita fa si ku juu, Koniiias sii chemu, a

tuu kpirimi u sipaan a chuolu. 26 Nii ne Piita kenu an bul duu sii. Ka u bula pu, "Mi ma nja nuhuobiin ne." 27 Piita ari Koniiias fa haa bul wiaa ne an to dono juuu dia. Piita juu na di niaa yuga a hilimi dime. 28 Nii ne u bula piba a bul, "Ma titia jima ari Juu tinjaa kisin ne di ba guoli nialin si bi Juu tinjaa nja tuon. Ba bi ba diisin maa mu. Ama Wia dagemi di mi si nuu-kala kaa yire disinnin tiina. 29 Nii ne tii, ba si ku yiremi, mi bi wii-kala bula an ko. Mi si ko nla, bul wii-la si tii n yiremi."

30 Nii ne Koniiias bula pu a bul, "Tapulaa batori ne nla ari bua deen titia le, mii chuole Wia wiiheye mi dia le. Di baal kubala ne nii a chin mi sipaan. U gennin faasa tutul. 31 U bula pimi, 'Koniiias, Wia nii n si yie chuchuele Wia nii ne, a na n si yie pipe summo-la ma le nii. 32 Saa tin niaa di ba mu Jopa, a che yire baal kubala duu ko. U yirin ne Saamon Piita. U juu puri-tiseru kubala dia ne, baa yire Saamon. U dia kpage mugi-balin ne.' " 33 Koniiias bira bul, "Nii ne tii mi tin niaa lima lima, ba ko n teen di ba yirin. N ma he dolun n si ko nla. Leele la kala hilime ne Wia sipaan, a gbigbere di la nii wii-la kala Wia si dajin di n bula pila."

Piita bul Wia wiaa a pipi niaa

34 Nii ne Piita suomo bubul, "Mi leele jima ari wutitii ne, Wia jon niaa kala ba nja kubala ne. 35 Nu-kala sii fau a njaa wialin sii to wonbin, Wia laau ne. U sipaan tuo yiri-la kala u si nja le. 36 Ma ma nii Wia wu-zomo-la u si jono pi Iziral tinjaa. U bula piba di ba to Yesu Kirisito le a na wiese. (U ne nja nu-kala Tiina.) 37 Wialin si tige Yesu si lii Nazaret le suomi Galili tinteen a teeli Judiya tinteen kala. Jon laa sipaan bubul Wia wiaa, a fo niaa Wii-chuole liin. 38 Ma ma nii Yesu wiaa ne. Wia jon u Din-zon-la heu le a puu dolun. U sii mu lee kala, aa nja wu-zonon pipi niaa, aa vaare

naa wonjbiin di ba wuo birima lii ba haacheba le an ken miisinj.”

Nialinj si laa Yesu wiaa dii aa hilimi Antiook le

¹⁹ Bua-la le ba fa si to naasin dudogise nialinj si laa Yesu wiaa dii a tinj Sitiivinj wiaa, ba pise. Ba si pise nii, ba mu yi Foniisia ari Saapos tinteenj ari tanj-la ba sii yire Antiook, a bul Wia niinj wiaa pipi Juu tinjaa dunduja dime. ²⁰ Ama nialinj dongsunj si laa Yesu wiaa dii a lii Saapos ari Sariini sii mu Antiook, a bul la Tiina Yesu wiaa a pi nialinj si bul Giriik wu-bulunj maa. ²¹ Wia peba le a chinj ba harinj. Niaa yuga a laa Yesu wiaa dii a birima tutou.

²² Nialinj si laa Yesu wiaa dii aa hilimi Jerusalem le nii wiinj deenj. Ba tinj Banabas duu mu Antiook. ²³ U si mua, u na nii Wia si pe nialinj le. U tuonj tere. U chagileba worunj a bul di ba chinj la Tiina Yesu yarida le ari ba tuonj kala, a si jonjo ta. ²⁴ Banabas fa naa ni-pula ne a kenj yarida worunj. Wia Dinj-zonj-la ma heu le worunj. Niaa yuga a laa la Tiina Yesu wiaa dii a ku tutou. ²⁵ Nii ne Banabas sii mu Taasis duu che Sool lerinj. ²⁶ U si nau, u kenu ba ko Antiook. Ba di nialinj si laa Yesu wiaa dii, ba yie hilimi. Ba honj dime ji-pilinj a dage Wia wiaa pi niaa yuge. Antiook le ne ba suomo kenj Yesu haritooro-la kaa yiyire Kirisitianba.

²⁷ Bua-la le ne nialinj sii bul wiaa, Wia Dinj-zonj-la dolunj le dongsunj lii Jerusalem a ko Antiook. ²⁸ Ba donjo yirinj ne Agabos. U sii chinj a bul wiaa, Wia Dinj-zonj-la dolunj le a bul di losunj janj juu dunia kala. Losu-la ku juu di Kulodios ne fa naa kuoribalinj. ²⁹ Nii ne Yesu haritooro-la vuure a sei di ba janj jonj moribiee tinj, di ba kaa mu pe ba naanbiiri-la si he Judiya le, di nuu-kala tia mage nii kala u si kene. ³⁰ Ba kaa ko. Ba jonjo tinj Banabas ari Sool, di ba kaa mu pi nialinj si laa Yesu wiaa dii kuhiasinj Judiya le.

12

Ba wasa to naasinj dogise Yesu nanzooaba

¹ Kuoro kubala ne he dime a biben Juu tinjaa tinteenj. U yirinj ne fa Herod. Bua deenj le u suomo to naasinj dudogise nialinj dongsunj si laa Yesu wiaa dii aa hilimi. ² U naa ba jonj tokobii a kpu Jonj naanbie Jeems. ³ U si na di Juu tinjaa tuonj toro wii-la u si naa le, u naa ba kenj Piita ma to dia. (Wiinj deenj naa ba gbieli-bal-la le ne ba si yie dii boroboro si bi si-burunj kene.) ⁴ Ba si kenj Piita, ba kenu kaa mu to dia. Dime ne ba naa laali-yuoroo fii ari balidu bibenu. Banese yie benu mua, banese ma bira ku laaba le. Herod fa biina di diisinj kielinj gbielela ne bal, ka u kenu lii pi nialinj di ba dii u sariya. ⁵ Piita fa si he sarika le nii, nialinj si laa Yesu wiaa dii aa hilimi chuole Wia pupu ari siifiesinj.

Ba liise Piita sarika le

⁶ Titanj kubala Piita fa pinj donj laali-yuoro-la baliaminj sii benu pegge. Ba fa kenj chorumo balia ne a kaa voo u nisaa le, ka laali-yuoroo balia ma chinj sarika-la boinniinj a po. U tanj nii pul di Herod fa kenu kaa lii nialinj tuonj di ba dii u sariya. ⁷ Piita he dime nii di Wia tinjdaara kubala ne chinj dime nii. Pulumunj chaane sarika-la tuonj. Wia tinjdaari-la ku peese Piita vaanj pe a chisu, a bula pu duu sii lima. Chorumo-la guu lii Piita nisaa le tuu tel. ⁸ Nii ne Wia tinjdaari-la bula pu duu paa u kaaa laale a he u nententenne. Piita naa nii Wia tinjdaari-la si bula pu. U bira bula pu duu jonj u geri-boso baage a to u harinj. ⁹ U to u harinj a lii sarika-la tuonj. U sii to Wia tinjdaari-la harinj nii, u fa ha bi jinj ari wii-la Wia tinjdaari-la sii naa, naa wutitii. U biina u na ari duosoo tuonj ne. ¹⁰ Ba mu kielii laali-yuoro-la si chinj sipaanj a biben sarika-la, a bira mu kielii laali-yuoro-la dongsunj ma si chinj harinj a ma ha biben sarika-la, a mu yi honj boro-la si to

boinnii-baalij a juuu taŋ-la. Boi-la suri u titia ɛ, ba lii. Ba lii joŋ wonbii kubala aa veŋ. Ba si mu mua, Wia tinɗaari-la joŋ Piita ta. ¹¹ Nii ne Piita sisele ku jin ari wii-la si ŋaau ɛ ŋaa wutitii ne. U bul, “Mi ɛɛle jima ari Wia ne tin u tinɗaara u ku laami ta Herod nisin ɛ ari wialij kala Juu tinŋaa fa si biina ba ŋaami ɛ.”

¹² Piita si jin wiin deen ɛ, u mu Joŋ Maak naan Meeri dia. U mu dime, di niaa fa yuga a hilimee chuole Wia. ¹³ Piita ŋmoo boro. Tolibie kubala baa yire Roda, u fa ŋaa ketii ne dia-la ɛ. U ko duu na. ¹⁴ U ku nii Piita yiikoro a wuo jin di Piita ne. U tuon tore woruŋ. U bi boi-la suro an miira fa juu bula pi niaa di Piita ne chin di-jalin. ¹⁵ Ba si tolibie-la nyuŋ tuo. Ka u-na ha bul di wutitii ne. Nii ne ba bira bul, u nidima ne u na. ¹⁶ Ka Piita ma ha chin a ŋmuŋmoo boro. Nii ne ba ku ken boro-la suri a nau. U ŋaaba wu-kpunkpere. ¹⁷ Nii ne Piita ken u nisin vigi di ba ken gon, an bula piba nii Wia si kenu kaa lii sarika-la tuon. U si di ba bul wiin deen a pi Jeems ari u naanbiiri-la ma donsun si laa Yesu wiaa dii. U si bul nii dere, u lii to lee don mu.

¹⁸ Tan si pula, laali-yuoro-la si po sarika-la bi Piita na. Ba tuobiinaa kala vugime. Ba pipiese donjo di bee ne ŋaa Piita ɛɛ? ¹⁹ Nii ne Herod bul di ba che kenu kaa ko. Ba cheu lol. Herod piese laali-yuoro-la duu na wii-la kala si ŋaa, an ŋaa ba kpuba. Nii ne Herod sii lii Judiya tinteen, a mu Sizariya a hon dime.

Kuoro Herod suba

²⁰ Bua deen ɛ Herod fa na baanin woruŋ Taya ari Saadon niaa nyuŋ. Ba sii hilime mu di ba na Herod, ba laa sipaan a na Bilasitas, nii-la sii beŋ kuoro dia ne, duu peba ɛ. U peba ɛ. Nii ne ba mu Herod teen a sulu duu len di ba sin. Ba tan niaa kudiilee lii kuoro tinteen ne. Nii ne tii baa sulu nii. ²¹ Herod he tapulii ne di ba ko. Tapulii-la si yie, Herod sii laale u kuori-genniŋ a hon

u kuori-kpasa nyuŋ, a bul wiaa pipi nialin. ²² Nii ne nialin faasa njanja gon a bul, “U bi naga nuhuobiine nii bul wiaa deenba, Wia ne.” ²³ Ba si bul nii, Herod bi Wia zile pa. Nii ne tii Wia tinɗaara ku tuu ŋmoo Herod lo lima lima u suu, nanchuolaa diiu.

²⁴ Ka Wia niin wiaa ha teeli lerin. Niaa yuga a nii a laa dii. ²⁵ Banabas ari Sool si tin tintimii-la dere, tintimii-la ba si si di ba mu tin Jerusalem ɛ, ba miira mu Antioch, a pe ken Joŋ Maak ma peba ɛ mu.

13

Ba liise Banabas ari Sool a tinba di ba mu leree donsun a bul Wia wiaa.

¹ Nialin sii bul wiaa, Wia Dinzon-la dolun ɛ ari kerichiba donsun fa he Antioch ɛ, nialin si laa Yesu wiaa dii aa hilimi teen. Ba yirin ne Banabas, ari Simian ba sii yire nibine, ari Lusias si lii Sariini, ari Sool ari Maneyan. (Tinteen kuoro Herod ne diese Maneyan.) ² Niaa deenba tin tinŋaa pipi Wia a vuvoo niin. Nii ne Wia Dinzon-la bula piba a bul, “Ma liise Banabas ari Sool pimi di ba tin tintimii-la mi si jono piba di ba ŋaa.” ³ Ba chuole Wia a voo niin, a jon ba nisaa danba ɛ, an taba.

Banabas ari Pool he Saapos ɛ

⁴ Wia Dinzon-la si tinba nii, ba sii mu Selusia, a lii dime a juu liin daboro, a mu tintee kubala liin si gollo chu baa yire Saapos. ⁵ Ba si yi dime, ba mu Saapos tan donjo baa yire Salamis. Ba bul Wia niin wiaa Juu tinŋaa Wii-chuole diisin ɛ dime. Ba ken Joŋ Maak ma pe ko duu pe tin tintimii-la. ⁶ Ba golle tintee-la kala liin si gollo chu, a mu yi tan kubala baa yire Paafos. Dime ne ba na daaluson tiina kubala baa yire Baa-Yesu. U fa ŋaa Juu tiina ne an nyia wiaa bul duu-na bul wiaa, Wia Dinzon-la dolun ɛ ne. ⁷ U fa he ba tan kuoro dia ɛ ne, baa yire Saajas Pools. Kuoru-la fa ŋaa wu-jinnu ne. U yire Banabas ari Sool u sipaan.

U faa che di ba bul Wia niin wiaa pu ne. ⁸ Daalusun tiina Elimas lii ba harin aa walime di kuoru-la si Yesu wialaa laa dii. (Giriik le ba ken Baa-Yesu yiyire Elimas ne.) ⁹ Nii ne Wia Din-zon-la ku he sool le. (Ba fa kenu kaa yiyire sool ma ne.) U chaare siaa pe daalusun tiina-la le ¹⁰ a bula pu, "N-na Sitaani bie deen, η ηaa ku-zon kala dinjon ne. N ηaa zenbe tiina maa a ηaa wu-bonjoo kinjen. Wia wonbii-titiiba-la η kaa golibi ne. ¹¹ Bee na, Wia jan ku tuun le, η jan nyulime, a mage magina kubala η bi jan na pulumun." U si bul nii, kun guu to u siaa, u bira bi na. U gollo chiche nuu duu ken u daan le. ¹² Kuoru-la si na wii-la si ηaa, u laa Yesu wiaa dii. Wialin u si gunna a tige la Tiina Yesu le ηaau wu-kpunjperere.

Banabas ari Pool he Antiok le, Pisiidia tinteen le

¹³ Pool ari u nanjonsun sii juu liin daboro a lii Paafos, a kiele mu tan kubala baa yire Pega a he Panfilia tinteen le. Jon Maak taba dime an miira mu Jerusalem. ¹⁴ Ba ma sii dime a mu Antiok, Pisiidia tinteen le. Che-wiesii-la cheen, ba mu juu Wii-chuole dia a hon. ¹⁵ Ba si hon nii, nuu karime wialin Moosis fa si ηmunsa bil di niaa tuto, ari Wia tenni-la nialin sii bul wiaa, Wia Din-zon-la dolun le fa si ηmunsa. Ba si karima dere, Wii-chuole dia-la kuhiasin tin di ba bula piba a bul, "Mi naanbiirin, di ma ne ken wii si jan wuo pe niaa deenba le di ba nyun nyaase, ma bul."

¹⁶ Nii ne Pool sii chin a ken u nisin vigi di ba ken gon, an suomo bubul, "Mi naanbiirin Iziral timma ari ma nialin si bi Juu tinjaa ηaa a he daha a fifa Wia, ma jegile nii mi teen. ¹⁷ Wia-la ma Iziral tinjaa deenba sii to, u ne tuose la naabalimaba a ηaa ba pun a yuge, bua-la le ba fa si ηaa nuhuraa Ijipiti tinteen le. U dolun le ne u kenba kaa lii Ijipiti le. ¹⁸ U benba ari kenyiri jisin mahin

balia giri-bine tuon. ¹⁹ U leje ba yuo ta-gehtisin balipe Keenan tinteen le a laa tintee-la a dii. Ba hon dime jisin zo-banese ari mahin balia ari fii. ²⁰ Ba si hon lee-la, Wia liise ba tuon nihian duu biben ba tinteen. Ba venee ηaa ηii ne, ka Samuel-na ko. U fa ηaa nialin sii bul wiaa, Wia Din-zon-la dolun le donjo ne. ²¹ Nii ne ba sul Wia duu piba kuoro. Wia sei a liise sool piba. Sool fa ηaa Kis bie ne a lii Benjamin doho niaa tuon. U dii kuoron jisin mahin balia. ²² Nii ne Wia kiru kuoron le an ηaa Devit dii kuoron. U bul wiaa a tige Devit le a bul, 'Jesi bie Devit ne ηaa mi tuoturu nia. U jan ηaa wii-kala mi sii che duu ηaa.' ²³ Devit doho niaa tuon ne Yesu lii. Wia ηaa u ku ηaa Iziral niaa Laataara, ari u fa si bul ηii. ²⁴ Ka di Yesu-na ko, Jon bul Wia wiaa pi Iziral tinjaa kala, a bul di ba birima lii ba haache le an fo Wii-chuole liin. ²⁵ Jon tinjinjaa si kpage derin, u piase niaa, 'Kube ne ma biine di mi ηaa? Mi dee nii-la ma sii gberu duu ko. U jan ko mi harin. Nii-la-na mi paala bi maga di mi ken u nenjenje ne ηmenin a puri!'

²⁶ Mi naanbiirin Abiraham doho niaa ari ma nialin si bi Juu tinjaa ηaa a he daha a fifa Wia, la wiaa ne ba tin di ba bul wialin deenba si jan wuo laala ta. ²⁷ Yesu si ko, nialin si he Jerusalem le ari ba kuhiasin fa bi jin ari u ne ηaa la Laataara. Ba ma bi nialin fa sii bul wiaa, Wia Din-zon-la dolun le wu-bulii-la bubuon jin, wialin ba si yie karime che-wiesii-la cheen kala. Ama ba ha len nialin sii bul wiaa, Wia Din-zon-la dolun le niin wialin ku ηaa wutitii, a kpu Yesu. ²⁸ Ba paala bi wii-kala na u si ηaa chei a mage di ba kpuu, ka ba sul Paalit duu len di ba kpuu. ²⁹ Ba si ηaa wialin kala dere ba si laa sipaan ηmunse Wia tenin tuon a mu tige Yesu le, ba soru daa-gese nyun a jonu hugi. ³⁰ Ama Wia chisu suun le. ³¹ U si sii suun le, u ken u titia ku dage ba di nialin fa si lii

Galilii a mu Jerusalem. Ba nau yuge. Ba ne leelee saa bul u wiaa pipi Iziral tinŋaa. ³² La ma saa kō di la bul Wia wu-zōmō-la pima. Wii-la Wia fa si bula pi la naabalimaba duu janŋaa, ³³ leelee u ŋaa pila, la nialinŋ si ŋaa ba doho niaa. Wia chise Yesu suuŋ le u keŋ miisinŋ. Ba fa ŋmuŋse ŋii ne Wia teninŋ seme dōŋo le ba sīi yire Saams. Ba ŋmuŋsa a tige Yesu le a bul, 'Ŋ ŋaa mi Bii ne.

‘Mi ne lulunŋ jininŋ.’

³⁴ Ba ŋmuŋse Wia teninŋ seme dōŋo ma a tigeu le ari Wia si, 'Mi janŋ sene tou le a pema le woruŋ ari mi fa si bul ŋii a pi Devit.'

U bul ŋii ne aŋ chise Yesu suuŋ le, duu bira bi janŋ suu a pua. ³⁵ Wia teninŋ baa yire Saams seme dōŋo maa ba bira ŋmuŋsa, 'Ŋ bi janŋ lenŋ di ŋ Tuō-pul Tiina suu a pua.'

³⁶ Devit fa ŋaa wialinŋ Wia sīi che duu ŋaa. U ŋaa ŋii u miisinŋ le aŋ suu. Ba jonu hugi u naabalima seme, u pua. ³⁷ Ama nii-la Wia si chise suuŋ le, u-na bi pua. ³⁸ Mi naanŋbiirinŋ, u maga di ma kala jinŋ woruŋ di baala deenŋ wiaa ne ŋaa la wuo bubul di Wia janŋ jonŋ ma haacheba chema. ³⁹ Nuu-kala si laa u wiaa dii, u laa u haacheba kala ta ne, haacheba-la kala wialinŋ Moosis fa si ŋmuŋsa bil di niaa tuto fa si bi wuo laa ta. ⁴⁰ Má fielee ma siaa di wialinŋ nialinŋ sīi bul, Wia Din-zōŋ-la dolunŋ le, si ma le ŋaa. Ba si,

⁴¹ 'Ma nialinŋ sīi mōŋ Wia, má bee na tintimii-la mi si janŋ tinŋ ma miisinŋ tapulunŋ le.

Di nuu ne bula pima, ma bi janŋ laa dii duu sene ŋaa wutitii.

U janŋ ŋaama wu-kpunŋkperere a lenŋ di ma suu.' "

⁴² Pōol ari Banabas si bul wiaa deenŋba kala dere, ba sīi lii Wii-chuole dia le. Ba sīi mu, nialinŋ sulba di ba miira kō hariŋ che-wiesii-la cheenŋ, a bira bul wiaa deenŋba piba. ⁴³ Ŋii ne nialinŋ kala lii Wii-chuole dia le. Juu tinŋaa ari nialinŋ si bi Juu tinŋaa ŋaa aŋ tuto Juu tinŋaa,

ba yuga a to Pōol ari Banabas hariŋ. Pōol ari Banabas bul wiaa piba a susulba di ba chinŋ Wia wu-zōmō-la le a sīi jonŋo ta.

⁴⁴ Hariŋ che-wiesii-la si yie, niaa jesinŋ kala si he tanŋ-la le ne mu Wii-chuole dia di ba jegile nii Wia niinŋ wiaa. ⁴⁵ Juu tinŋaa fa si na ni-danŋ-la si hilime ŋii, ba didii hadōruŋ. Ba juuu Pōol le ari wialinŋ u sīi bul a tutuusuu. ⁴⁶ Ka Pōol ari Banabas bul wiaa ari nyu-duonŋ a bul, "U fa maga di la laa sipaanŋ bul Wia niinŋ wiaa pi ma Juu tinŋaa ne, ka ma viaba ta aŋ bibiine ma bi maga di ma keŋ miisi-la si bi dere. La janŋ lenŋma aŋ mu nialinŋ si bi Juu tinŋaa ŋaa teenŋ. ⁴⁷ Wia ne bula pila di la ŋaa ŋii. U bul wiinŋ deenŋ Wia teninŋ seme dōŋo. U si,

'Mi ne liisinŋ di ŋ ŋaa nialinŋ si bi Juu tinŋaa ŋaa pulumuŋ.

Ŋ janŋ bul Wia niinŋ wiaa dunia seme-na kala, di Wia laa nialaa ta.' "

⁴⁸ Nialinŋ si bi Juu tinŋaa ŋaa si nii wiinŋ deenŋ, ba tuonŋ kala tōre, ba bul di Wia niinŋ wiaa sima kinŋenŋ. Nialinŋ Wia si liisa di ba keŋ miisi-la si bi dere, ba laa wialinŋ dii. ⁴⁹ La Tiina Yesu niinŋ wiaa teeli lee-la kala. ⁵⁰ Ama Juu tinŋaa nyise tanŋ-la nihiasinŋ ari haala-la si ŋaa ni-balaa a fifá Wia a he. Ba di Juu tinŋaa suomo to naasinŋ dudōgise Pōol ari Banabas, a ŋaa ba lii ba tinŋteenŋ le. ⁵¹ Pōol ari Banabas kpesi ba nenŋtenŋee hagila heba le, a dageba ŋii di ba wii dee, aŋ lii mu Ikooniam. ⁵² Ka nialinŋ si laa Yesu wiaa dii Antioŋk le, ba tuonŋ kala tōre. Wia Din-zōŋ-la ma heba le woruŋ.

14

Banabas ari Pōol mu Ikooniam

¹ Pōol ari Banabas si he Ikooniam le, ba juu Juu tinŋaa Wii-chuole dia a bul Wia wiaa. Ba si chaasa bul Wia wiaa ŋii, ni-danŋ ku laa Yesu wiaa dii, Juu tinŋaa ari Giriik tinŋaa kala. ² Ama Juu tinŋaa si bi Yesu wiaa laa dii, ba nyise nialinŋ si bi Juu

tinȚaa Țaa he. Ba tuƆbiinaa bira bi nialin si laa Yesu wiaa dii teen mua. ³ PƆol ari Banabas hƆȚ lee-la a dieni. Ba bul la Tiina Yesu wiaa ari nyu-duonȚ. U ma pɛba lɛ a piba dolun ba ȚinȚaa wu-magilaa ari wu-kpunȚkerisinȚ. Niaa ku jinȚ ari la Tiina Yesu zile wiaa nɛ ba sɛnɛɛ bul. ⁴ Nialin fa si he taȚ-la lɛ kɛȚ ba titia kpaabalia. DɔȚsunȚ tuto Juu tinȚaa, dɔȚsunȚ ma tuto Yesu nanzƆƆba-la. ⁵ Nii nɛ nialin si bi Juu tinȚaa Țaa ari Juu tinȚaa ari ba kuhiasinȚ wiwalime di ba dɔȚisɛ PƆol ari Banabas aa che di ba paa tabiaa yiyageba. ⁶ Ba ku jinȚ a sii fá mu Lisita, a lii dime a mu Dɛɛbi. Ba kala Țaa ta-biisinȚ nɛ Lakoonia tinȚteenȚ lɛ. Ba ma mu ta-biisi-la si golli Lakoonia tinȚteenȚ chu. ⁷ Dime kala nɛ ba bul Yesu wu-zɔmɔ-la wiaa.

Banabas ari PƆol mu Lisita ari Dɛɛbi.

⁸ Ba fa si mu Lisita Ții di baal kubala gberike hƆȚ dime. Ba lulu duu gberike nɛ. U ha bi vene na. ⁹ U hɔnɔ jegile nii PƆol fa sii bul wialinȚ. PƆol chaare siaa benu, a na duu laa dii ari Yesu jaȚ wuo a vaaru. ¹⁰ U faasa bula pu, “Sii chinȚ Ț naasinȚ nyunȚ.” U pura sii chinȚ u naasinȚ nyunȚ aa venȚ. ¹¹ Nialin fa si hilime a na wii-la PƆol fa si Țaa, ba suomo kpikpia gonȚ aa bul ari ba yiikoro lɛ a bul, “VesinȚ nɛ birime nuhuobiine ku tuu la tuɔȚ.” ¹² Nii nɛ ba kɛȚ Banabas yiyire Zuus. Zuus nɛ fa Țaa ba venȚ-hianȚ. PƆol nɛ fa nii-la sii bul wiaa, Ții nɛ tii ba yiru Hɛɛmis maa, ba venȚ-hianȚ nanzƆƆ yirinȚ nɛ Ții. ¹³ Ba vene Zuus dia ba fa si juu kpikpaare, fa chinȚ ba taȚ sipaanȚ. Vene tiina kɛȚ nɛ-bellinȚ ari tii-fiilaa ba si kaa guori kaa kɔ dia-la boinȚiinȚ. Ba di nialin fa si hilime ka che di ba kpaare Yesu nanzƆƆba-la nɛ. ¹⁴ Banabas ari PƆol si nii wii-la ba sii che ba Țaa, ba kɛȚ ba genninȚ kiɛɛ, a dageba Ții ari ba bi seye, aȚ fá juu nialin tuɔȚ a faasa bul, ¹⁵ “La nanȚdɔȚsunȚ, bɛɛ nɛ tii maa Țaa Țla? La ma Țaa nuhuobiinee nɛ. La kɔ di

la bul la Tiina Yesu wu-zɔmɔ-la nɛ pima, di ma wuo lenȚ ma vui-tɔɔnu-la aȚ birima to Wia-la si weye. U nɛ Țaa wia nyunȚ, ari tinȚteenȚ, mugibalaa ari fuonunȚ, ari kunȚ-kala si he dunia lɛ. ¹⁶ BunȚunȚ Wia lenȚe la naabalimaba tuto ba titia wonȚbiinȚ nɛ. ¹⁷ U fa Țaa wu-zɔȚȚɔɔ pipi niaa, a didageba Ții ari u he dime. U Țaa duonunȚ ninii a Țaa бага kiaa wiwase, ma didii kiaa a vuvoge a kala kɛȚ tuɔtɔrunȚ.” ¹⁸ Banabas ari PƆol bul wiaa deenȚba kala nɛ, ka nialin ha bi seye aȚ chiche di ba kpaareba. Ba na hɛɛȚ nɛ, ka nialin-na lenȚ.

¹⁹ Di Juu tinȚaa dɔȚsunȚ lii AntioȚ, Pisiidia tinȚteenȚ lɛ, a ma kɔ. DɔȚsunȚ ma lii Ikooniam a kɔ. Ba ku kɛɛ nialin pɛ ba titia lɛ a yage PƆol ari tabiaa, a kenu lere lii ba taȚ tuɔȚ. Ba biina u fa suba nɛ. ²⁰ Yesu haritoorola mu a gollu. Nii nɛ u sii a miira juu taȚ tuɔȚ. U taȚ si pula, ba di Banabas sii mu Dɛɛbi.

Ba miira lii Siiria a mu AntioȚ

²¹ PƆol ari Banabas bul Yesu wu-zɔmɔ-la wiaa lee-la ma lɛ. Ba si bul Ții, niaa yuga a laa Yesu wialinȚ dii a tuto ba hariȚ. Ții nɛ ba miira mu Lisita, a sii dime a mu Ikooniam, a bira sii dime a miira mu AntioȚ Pisiidia tinȚteenȚ lɛ. ²² Leree deenȚba kala ba yie bul wiaa pi nialin si laa Yesu wiaa dii di ba wasa kɛȚ yarida aa Țaa di ba nyunȚ nyaase di ba chinȚ ba yarida lɛ, a sí jonȚ ta. Ba ma bula piba di nialin si laa Yesu wialinȚ dii, di ba jaȚ na hɛɛȚ kinȚkɛȚ, ka di banna juu Wia kuorii-la tuɔȚ. ²³ Lee-na kala nialin si laa Yesu wialinȚ dii aa hilimi, ba ma liise niaa ba tuɔȚ di ba Țaa ba kuhiasinȚ. Ba nɛ Țaa Ții, ba yie chuɔle Wia piba aa vɔɔ niinȚ, aȚ jonȚba he la Tiina Yesu nisinȚ lɛ. U-na la Tiina Yesu wiaa nɛ ba laa dii.

²⁴ Nii nɛ ba golle Pisiidia tinȚteenȚ kala dere aȚ lii mu Panfilia tinȚteenȚ. ²⁵ Dime ba bul Wia niinȚ wiaa taȚ kubala baa yire Pɛɛga, a bira lii dime a mu taȚ kubala baa yire Atalia. ²⁶ Ba lii dime a juu liinȚ daboro, a

bira miira mu An̄tiok. Dime ne ba fa jon̄ba he Wia nisin̄ ari u lah̄orimo le di ba wuo tin̄ ba tintin̄ŋaa. Lɛɛɛ ba tin̄ tintimii-la dɛrɛ. ²⁷ Ba si miira ku yi An̄tiok, ba yire nialin̄ kala si laa Yesu wiaa dii aa hilimi, a bula piba wu-zom̄o-la kala Wia si toba le a ŋaa, a dageba nii Wia si wuo suri won̄biin̄ a pi nialin̄ si bi Juu tin̄ŋaa ŋaa, ba ma wuo laa Yesu wiaa dii. ²⁸ Ba h̄on̄ dime, ba di nialin̄ si laa Yesu wiaa dii teen̄, a dieni.

15

Yesu nan̄zoōba ari nialin̄ si laa Yesu wiaa dii kuhiasin̄ hilime Jerusalem le

¹ Baalaa d̄on̄sun̄ ma lii Judiya a k̄o An̄tiok, a suomo didage ba naan̄biiri-la si laa Yesu wiaa dii a bul, “Wia bi jan̄ wuo laama ta, see ma keri ma pen̄ee, ari Moosis fa si bil niin̄ pima nii.” ² Nii ne P̄ool ari Banabas ken̄ nii-dolon̄ worun̄. Ba di nialin̄ si lii Judiya ken̄ wii-la lilere. Ba vuure di P̄ool ari Banabas ari nialin̄ d̄on̄sun̄ si lii An̄tiok, di ba mu Jerusalem a na Yesu nan̄zoōba-la ari nialin̄ si laa Yesu wiaa dii aa hilimi kuhiasin̄ dime, a mu tige wiin̄ deen̄ le. ³ Nialin̄ si laa Yesu wiaa dii aa hilimi ken̄ba lii he wen̄in̄ le. Ba s̄ii mu nii, ba to F̄oniisia ari Samaria tin̄teen̄ a bula pi nialin̄ si laa Yesu wiaa dii dime nii nialin̄ si bi Juu tin̄ŋaa ŋaa si birima tuto Wia. Ba si bul wu-zomun̄ deen̄ nii, nialin̄ tuon̄ t̄ore kin̄ken̄. ⁴ Ba si mu yi Jerusalem, Yesu nan̄zoōba-la ari nialin̄ kala si laa Yesu wiaa dii aa hilimi ari ba kuhiasin̄, ba ken̄ba worun̄. Ba bula piba wialin̄ kala Wia si ŋaaba le. ⁵ Ama nialin̄ d̄on̄sun̄ ma si laa Yesu wiaa dii aa to nialin̄ ba s̄ii yire Farisii tin̄ŋaa, ba sii chin̄ a bula piba a bul, “U maga di ba keri ba pen̄ee an̄ tuto wialin̄ Moosis fa si bile di maa to.”

⁶ Yesu nan̄zoōba-la ari nialin̄ si laa Yesu wiaa dii kuhiasin̄ bira hilimi di ba bira biine wiin̄ deen̄ wiaa. ⁷ Ba h̄on̄ ken̄ wii-la a lere dieni. Nii ne Piita sii chin̄ an̄ bul, “Mi

naan̄biirin̄, ma jima ari faafaa kala ne Wia liisemi ma tuon̄ di mi bul Wia wu-zom̄o-la wiaa a pi nialin̄ si bi Juu tin̄ŋaa ŋaa, di ba ma wuo laa Yesu wiaa dii. ⁸ Mi mu bula piba. Wia jon̄ u Din̄-zon̄-la heba le ari u fa si jon̄o hela le nii, a dage nii ari u maga di ba ma laa Yesu wiaa dii. U saa jin̄ nuu-kala tuon̄. ⁹ U bi nialin̄ si ŋaa Juu tin̄ŋaa ari nialin̄ si bi Juu tin̄ŋaa ŋaa kaa p̄ore. Nialin̄ si bi Juu tin̄ŋaa ŋaa ma laa Yesu wiaa dii, nii ne tii u jon̄ ba ma haacheba cheba. ¹⁰ Bɛɛ ne tii ma jon̄ chugi-balin̄ aa chin̄ nialin̄ si bi Juu tin̄ŋaa ŋaa an̄ laa Yesu wiaa dii, aa magise Wia nii? La di la naabalimaba kala, la fa bi chuga deen̄ wuo chin̄. ¹¹ La laa dii ari la Tiina Yesu d̄undun̄a lah̄orimo le ne Wia jan̄ laala kala ta ari u si laaba ta nii.”

¹² Piita si bul wii-la dɛrɛ, nialin̄ kala fa si hilime ŋaa fuii, a jegile nii Banabas ari P̄ool teen̄. Ba bul wu-magila-la ari wu-kpun̄kperisi-la Wia si toba le ŋaa nialin̄ si bi Juu tin̄ŋaa ŋaa le. ¹³ Ba si bul wialin̄ dɛrɛ, Jeems ma bul, “Mi naan̄biirin̄, má jegile nii mi teen̄. ¹⁴ Saamon̄ Piita bula pima Wia si laa sipaan̄ cho nialin̄ si bi Juu tin̄ŋaa ŋaa nii, a tuose niaa ba tuon̄ di ba ŋaa u niaa. ¹⁵ Nialin̄ s̄ii bul wiaa, Wia Din̄-zon̄-la dolon̄ le ma fa bul wiin̄ deen̄ Wia tenin̄ tuon̄. Ba si, Wia bula a bul,

¹⁶ ‘Mi jan̄ miira k̄o a chuule Devit dia-la si tele.
Mi jan̄ wasa taase je-kieri-la duu chin̄ worun̄.

¹⁷ Mi jan̄ ŋaa nii di dunia niaa nikaanaa ma ku che Wia a tou.
Nialin̄ mi si tuosa nialin̄ si bi Juu tin̄ŋaa ŋaa tuon̄ di ba ŋaa mi niaa,
ba ma jan̄ ku chemi a tomi.’

¹⁸ Wia bul nii faafaa kala ne di niaa jin̄.” ¹⁹ Nii ne Jeems bul, “Mi biina u bi maga di la walime nialin̄ si bi Juu tin̄ŋaa ŋaa an̄ birima tuto Wia. ²⁰ Ama má leŋ di la ŋmun̄se tenin̄ piba a bula piba di ba bira sí vuin̄

kaa tinȚ a birisi ba titia, di ba lenȚ ba-chorunȚ ari ha-chorunȚ wu-ŋaalaa, a sí pusunȚ si suu pimee dii, a sí pusunȚ chalinȚ ma dii. ²¹ Bεε wiaa ba yie dage wialinȚ Moosis fa si bile di la tuto ta-biisi-la kala le ne. Ba ŋaa ŋii faafaa kala ne a kaa kɔ jininȚ. Ba ma yie karime wialinȚ Wii-chuɔle diisinȚ le che-wiesii-la-na kala cheeŋ.”

Ba ŋmunȚe teninȚ pi nialinȚ si bi Juu tinȚŋaa ŋaa aŋ laa Yesu wiaa dii.

²² Yesu nanȚɔɔba-la ari kuhiasi-la ari nialinȚ si laa Yesu wiaa dii aa hilimi, ba vuure a liise ba tuɔŋ niaa, a tinȚba di ba di Pɔɔl ari Banabas mu AnȚiok. Ba liise Judas ba sí yire Basabas ari Saalas. Niaa deenȚba balia ne fa ŋaa ba tuɔŋ sipaa-laaraa. ²³ Ba jonȚ teninȚ piba a tinȚba. TenȚ-la le ba fa ŋmunȚe ŋla ne, “La nialinȚ si laa Yesu wiaa dii a ma ŋaa Yesu nanȚɔɔba, ari nialinȚ si ŋaa kuhiasinȚ la tuɔŋ, laa chuɔlema, ma nialinȚ si laa Yesu wiaa dii aŋ bi Juu tinȚŋaa ŋaa a he AnȚiok ari Siiria ari Siliisia le. ²⁴ La nia ari la niaa dɔŋsunȚ kɔ ma teenȚ a walimema, a kenȚ ma tuɔbiinaa vugime. La bi bula piba di ba ŋaa ŋii. ²⁵ Ŋii wiaa la hilime ne a vuure. U zɔmɔ pila di la liise niaa a tinȚba ma teenȚ, di ba di la nanȚɔŋsunȚ Banabas ari Pɔɔl ne janȚ kɔ. ²⁶ Niaa deenȚba jonȚ ba miisinȚ a yɔɔ suunȚ ba fa sí tinȚ la Tiina Yesu Kirisito tinȚinȚŋaa. ²⁷ La saa tinȚ Judas ari Saalas. Ba ma janȚ bula pima wialinȚ titia la si ŋmunȚa pima. ²⁸ Wia DinȚ-zɔŋ-la ari la kala kenȚ nii-bala ari la bi janȚ jonȚ chugiyunȚi kala chunȚma. Ama u maga di ma to kisinninȚ deenȚba la sí dagema ne. Ba ne ŋla: ²⁹ Ma sí vuinȚ namia chanȚ, ma sí kunȚ-kala chalinȚ dii, ma sí puna-la kala si suu pimee chanȚ, a sí ba-chorunȚ ari ha-chorunȚ wu-ŋaalaa ŋinȚaa. Di ma ne wuo liise ma titia wiaa deenȚba le, ma he dolunȚ. Ma janȚ hɔŋ worunȚ.”

³⁰ Ŋii ne ba ta nialinȚ ba si liisa. Ba sii mu AnȚiok. Ba si mu dime, ba yire nialinȚ kala si laa Yesu wiaa dii

aa hilimi, a jonȚ tenȚ-la piba. ³¹ Ba si karime tenȚ-la, wialinȚ ba si ŋmunȚa ŋaa ba kenȚ tuɔtorunȚ. Ba nyunȚ kala nyaase. ³² Judas ari Saalas fa ŋaa nialinȚ sí bul wiaa, Wia DinȚ-zɔŋ-la dolunȚ le ne. Ba bul wiaa yuge piba kinȚkenȚ. Ba si ŋaa ŋii, ba nyunȚ nyaase, ba wasa chinȚ ba yarida le. ³³ NialinȚ dieni mua AnȚiok le. Ŋii ne nialinȚ si laa Yesu wiaa dii AnȚiok le taba ari yarifiɛlaa, ba miira mu nialinȚ si tinȚba teenȚ. [³⁴ Ama u ŋaa wu-zɔŋ ne a pi Saalas duu dieni AnȚiok le.] ³⁵ Pɔɔl ari Banabas ma ka AnȚiok le. Niaa dɔŋsunȚ yuga a peba le a bul la Tiina Yesu niinȚ wiaa a pi niaa.

Pɔɔl ari Banabas pɔre dɔŋɔ le.

³⁶ U ŋii hariŋ ne Pɔɔl bula pi Banabas a bul, “LenȚ la miira mu, a na nialinȚ si laa Yesu wiaa dii tanȚ kala le la si bul la Tiina Yesu niinȚ wiaa, a na ba sí ŋaa ŋii.” ³⁷ Banabas faa che duu kenȚ JonȚ ba sí yire Maak kaa pe mu. ³⁸ Ŋii ne Pɔɔl biine duu wonȚbiinȚ dee di ba kenu pe ba titia le, bεε wiaa u via duu peba le a tinȚ tinȚinȚŋaa PanȚfilia le, lee-la ba fa si laa sipaanȚ mu di ba tinȚ, ka u miire. ³⁹ Ba faasa kenȚ wiinȚ deenȚ kaa lere kinȚkenȚ, ba pɔre dɔŋɔ le. Ŋii ne Banabas kenȚ JonȚ Maak. Ba juu liinȚ daboro a duoro mu Saapɔs. ⁴⁰ Ka Pɔɔl ma liise Saalas. NialinȚ si laa Yesu wiaa dii jonȚba he Wia nisinȚ le duu bibenȚba. ⁴¹ Ŋii ne ba sii mumu a mu yi Siiria ari Siliisia tinȚteenȚ. Ba wasa bul wiaa pi nialinȚ si laa Yesu wiaa dii aa hilimi dime, di ba wasa chinȚ ba yarida le.

16

Timoti to Pɔɔl ari Saalas hariŋ

¹ Ŋii ne Pɔɔl sii mu Dεebi, a lii dime a mu Lisita. U mu dime ŋii di Yesu haritooroo kubala he dime, baa yire Timoti. U naanȚ fa ŋaa Juu tiina ne a ma fa laa Yesu wiaa dii, aŋ ka u nyimma fa ŋaa Giriik tiina. ² NialinȚ si laa Yesu wiaa dii Lisita ari Icooniam kala le bibese baal-la

le. ³ Pɔɔl faa che di Timoti to u harin. A tin Juu tinŋaa si he lere-la le wiaa Pɔɔl kenu keru u penin, bee wiaa ba kala jima ari u nyimma ŋaa Giriik tiina ne. ⁴ Ba sii mu tasi-la nii, ba bul wiaa a pi nialin si laa Yesu wiaa dii dime. Ba bula piba wialin Yesu nanzɔɔba-la ari nialin si laa Yesu wiaa dii kuhiasin Jerusalem le si bile piba di ba tuto. ⁵ Nii ne nialin si laa Yesu wiaa dii aa hilimi wasa ken yarida. Ba ku punaa pe tapulii kala.

Pɔɔl na wiaa ari duosoo tuɔŋ Turɔwas le

⁶ Pɔɔl ari Saalas golle nii halii a to Firijia ari Galiisia tinteen, bee wiaa Wia Din-zɔŋ-la biba wonbiin pa di ba bul Wia niin wiaa Esia tinteen le. ⁷ Ka ba jon ba wonbiin a mu yi Maasiya. Dime ne ba walime di ba juu Bitinia tinteen, ama Yesu Din-zɔŋ-la biba wonbiin pa. ⁸ Nii ne ba to Maasiya tinteen a mu yi Turɔwas. ⁹ Dime, titanin Pɔɔl na ari duosoo tuɔŋ di baal kubala a lii Masidoonia, duu china aa sulu duu ko Masidoonia tinteen a peba le. ¹⁰ Pɔɔl si na nii dere, la duu ŋaa siri di la mu Masidoonia, bee wiaa la jima ari Wia sene dagela di la mu bul Wia wu-zomɔ-la a pi nialin si he lee-la ne.

Haal kubala baa yire Lidia laa Yesu wiaa dii Filipa le.

¹¹ Ba bira sii dime a sii juu liin daboro, a duoro chol tegi tegi a mu Saamotas. U tan si pula la bira sii a mu Niyapolis. ¹² La bira lii dime a vene mu Filipa. U fa ŋaa ta-bal ne Masidoonia seme donɔ a tuto Rom. La hon tan-la le tapulaa banmene. ¹³ Che-wiesii-la cheen si yie, la lii tan-la tuɔŋ a mu fuon niin. La fa biina la jan na Wia di-chuɔɔɔn dime. La si mu dime, la tuu hon a bul wiaa pipi haala-la fa si hilime dime di ba chuɔɔɔle Wia. ¹⁴ Haala-la si jegile nii la wialin, ba tuɔŋ haal kubala ne fa he dime, baa yire Lidia. U fa lii Taataya tinteen ne. U fa biri gennin ne a

yyialle. U faa chuɔɔɔle Wia ne. U si jegile nii wialin Pɔɔl fa sii bul, Wia pulle u tuɔŋ, u laa wialin dii. ¹⁵ Ba fo ba di u dia niaa Wii-chuɔɔɔle liin. Nii ne haal-la sulla a bul, "Di ma ne biina di mi sene laa Yesu wiaa dii ne, ma ku juu chua mi dia le." U si sulla dieni nii, la mu chua.

Ba ken Pɔɔl ari Saalas to dia Filipa le

¹⁶ Chee kubala la bira mu Wia di-chuɔɔɔɔn. Yomo toli-bie ku chenla. Jima ne kenu, u vuga pipi niaa. U vuga na moribee yuge a pi nialin si tiuu. ¹⁷ U to la di Pɔɔl harin a yie faasaa bul, "Niaa deenba tin tinŋaa a pi Wii-balin si yuga a kii kun-kun-kala. Ba bulaa pima nii ma si jan ŋaa di Wia laama ta." ¹⁸ U yie ŋaa nii tapulii kala. Nii ne Pɔɔl baaniin sii. U miira birima chaase tolo-la, an bula pi jima-la a bul, "Yesu Kirisito dolun le mi si, ŋŋ lii an len tolo-la." Jima-la guu lii tolo-la le.

¹⁹ Tolo-la tinŋaa si na ari ba bira bi moribee-la ka na, ba ken Pɔɔl ari Saalas a lere mu ba tan kuhiasin teen ba si yie hihilimi lee-la. ²⁰ Ba kenba kaa mu ba Rom kuhiasin teen, a bula piba a bul, "Niaa deenba ŋaa Juu tinŋaa ne an wiwalime niaa la tan tuɔŋ. ²¹ Baa dagela di laa ŋaa wialaa la Rom tinŋaa sii kisu." ²² Ni-dan-la kala fa si hilime, ba sii pe ba nihiasi-la le a ken Pɔɔl ari Saalas. Nii ne Rom tinŋaa kuhiasin ken ba gennin wuri an bul di ba viireba. ²³ Ba faasa viireba an kenba to dia, an bula pi sarika bibenni-la duu toba worun di ba si wuo lii. ²⁴ U nii ba niin a ken Pɔɔl ari Saalas a kaa kiele juu sipaan dia tuɔŋ, a ken ba naasin baliamin kala he kurun.

²⁵ Ari tita-siesee Pɔɔl ari Saalas chuchuɔɔɔle Wia a yii yiilaa a didenne Wia. Nialin ba si kaa to dia kukaanaa ma jijegili aa nii. ²⁶ Nii ne tinteen guu zigili a ken sarika diala ma kala kaa zigili. Borusun kala guu suri. Nuu-kala kurun ma lii tel.

27 Sarika bibenni-la hirike sii donj le a na di sarika-la borusunj kala suro. U biina nialinj kala ba si kaa to dia, ba lii fá viiri ne. U liise u tokobii duu kpu u titia. 28 Nii ne Pool faasa kpia a bula pu a bul, "Sí η titia kpu. La kala ne he daha." 29 Sarika bibenni-la naa ba kenj chaaninj kaa ko. U laa fá juu, a tuu tel Pool ari Saalas naasinj le a chichel. 30 U kenba kaa lii a pieseba a bul, "Mi nanɔɔnsun, ee ne mi janj naa di Wia laami ta?" 31 Nii ne ba bula pu a bul, "Laa la Tiina Yesu wiaa dii, di Wia laa ma ari η dia niaa kala ta." 32 Nii ne ba bul la Tiina Yesu niinj wiaa pi ba di u dia niaa kala. 33 Titanj-la titia ne sarika bibenni-la kenba a chese ba yaraa naawiilaa, ka ba fo ba di u dia niaa kala Wii-chuole liinj. 34 Sarika bibenni-la kenj Pool ari Saalas a kaa mu u dia, a piba kudiilee ba dii. Ba di u dia niaa kala naa tuoturu ari ba si laa Wia wiaa dii.

35 Tanj si pula, Rom nihiasinj tinj di ba mu bula pi porisiba kuhiasinj di ba bula pi sarika bibenni-la duu liise Pool ari Saalas. 36 Nii ne sarika bibenni-la bula pi Pool di Rom nihiasi-la tima di ba bula pu duu liise ba di Saalas. Nii wiaa ba janj wuo mu ari yarifielaa. 37 Nii ne Pool bula pi porisi kuhiasi-la a bul, "Ba viirela niaa tuonj, anj bi la sariya die a dagela wu-cheyinj, anj ka la ma naa Rom tinjaa. Nii ne ba kenla to dia. Ka leele baa che di la luora viiri. Aj, la bi sei. U maga di Rom nihiasi-la titia ko daha ne a ku liisela." 38 Nii ne porisi kuhiasi-la mu bula pi Rom nihiasi-la ari Pool ari Saalas ma naa Rom timma ne. Ba si nii njii, fawullunj kenba. 39 Nii ne ba sii mu sulba ari ba cheye ne anj liiseba sarika le, anj bula piba di ba lii ba tanj le. 40 Ba lii sarika le a mu Lidia dia. Dime ne ba na nialinj donsunj si laa Yesu wiaa dii. Ba bul wiaa piba a naa ba nyunj nyaase, anj viiri.

17

Pool ari Saalas mu Tesalonaaka

tinjteen

1 Ba sí viiri njii, ba mu to tanj kubala baa yire Anfiipolis, a bira sii dime a to tanj donjo maa baa yire Apoloonia, a lii dime a mu tanj kubala baa yire Tesalonaaka. Juu tinjaa Wii-chuole dia fa he dime. 2 Pool mu juu Wii-chuole dia ari u si venee naa njii lee-na kala. Chewiesii-la cheenj yosunj batori pege, ba di niaa vuvuure Wia wiaa. 3 U karime Wia teninj piba a dageba njii ari u si maga di Yesu na heenj a suu anj bira sii suunj le, a bira bula piba ari Yesu deenj u si bul u wiaa piba ne naa Kirisito. 4 Nialinj donsunj laa wialinj dii a pe Pool ari Saalas le. Ba tuonj Giriik tinjaa ari haala-la si naa ni-balaa ba tanj le ma yuga a laa wialinj dii a peba le. 5 Nii ne Juu tinjaa yaraa bibieri. Ba che kese nyu-duo tinjaa si yie bibaare wonbiee ari yosunj tuonj a pe ba titia le. Ba bira che kese niaa donsunj, ba kala hilimi di ba kenj tanj-la kala a vugime. Ba mu juu Jeesinj dia di ba che Pool ari Saalas di ba kenba kaa ku lii niaa tuonj. 6 Ba biba naa anj kenj Jeesinj ari nialinj donsunj si laa Yesu wiaa dii a lereba lii ba tanj kuhiasinj teenj, anj njinaa gonj a bul, "Niaa deenba chei lee kala ne anj leele ko la janj. 7 Ka Jeesinj laaba bil u dia le. Ba kala chei wii-la la kuoribalinj si bile ne anj bul di kuori donj ne he dime, baa yire Yesu." 8 Wiaa deenba ba si bula naa nialinj ari ba tanj kuhiasinj kala bi jinj wii-la kala ba si janj naa. 9 Nii ne tanj kuhiasinj naa Jeesinj ari u nanɔɔnsunj liise ta-time, anj ka ba lenba.

Pool ari Saalas mu Biriya tinjteen

10 Tanj si bire, nialinj si laa Yesu wiaa dii naa Pool ari Saalas lii mu Biriya. Ba si yi Biriya, ba mu juu Juu tinjaa Wii-chuole dia. 11 Lee-la Juu timma-la kpia Juu timma-la si he Tesalonaaka le. Ba chaga laa Wia niinj wialinj ari na-kparinj a kikarime Wia teninj ari siifiesinj tapulii-na kala, di ba na di wialinj

sene ɲaa wutitiiba ne. ¹² Ba tuɔɲ niaa yuga ne laa Yesu wiaa dii. Giriik tinȚaa haalaa si ɲaa ni-balaa ari ba baalaa kala laa Yesu wialin dii.

¹³ Juu timma-la si he Tesalonaaka le nia di Pɔɔl bira bul Wia wiaa Biriya ma le. Ba sii mu dime maa a nyise ni-dan-la he. ¹⁴ Nii ne nialin si laa Yesu wiaa dii ɲaa Pɔɔl lii a mu mugi-balin niin, ka Saalas ari Timoti bi mua an he Biriya le. ¹⁵ Niaa dɔɲsun lii Biriya a to Pɔɔl harin, a kenu kaa mu Ateɲ. Pɔɔl miira tinba di ba mu bula pi Saalas ari Timoti di ba ku chemu lima.

Pɔɔl mu Ateɲ tinȚeen

¹⁶ Pɔɔl si hoɲ Ateɲ le a gbigbere Saalas ari Timoti, u na di daalusun su tan-la kala le. U tuɔɲ faasa viisi. ¹⁷ Nii ne Pɔɔl mu Juu tinȚaa Wii-chuɔle dia. U bul Wia wiaa pi Juu tinȚaa ari nialin sii fá Wia, ba kaa lere. U yie juu yɔbo maa chee-na kala a bul Wia wiaa a pi nialin si yie ko dime. ¹⁸ Kerichibala dɔɲsun sii to Epikuuras wonbiin ari Sitoik kerichiba dɔɲsun ma ku nau. Niaa dɔɲsun ma piɛɛ, “Bee kiaa ne ni-yaarin deen ma chinaa bul?” Dɔɲsun ma si, “U naga ven-falii wiaa ne u bubul.” Pɔɔl si yie bul Yesu wiaa ari u si sii suun le ne tii ba bul nii. ¹⁹ Nii ne ba kenu kaa mu ba si yie hilimi dia-la le baa yire Ariyɔpagis a bul, “La cho di la nii wu-falin deen wiaa ɲ sii dagu ne. ²⁰ Wialin dɔɲsun ɲ sii bul ɲaa wu-kpunƙperisin ne la teen. La saa cho di la nii ba bubuɔɲ ne woruɲ.”

²¹ Ateɲ niaa ari ba nuhuɔraa kala bi wii-kala kaa pe, see di ba bul wu-falia-la ba si nia a pi niaa, a ma cho di ba jegile nii wu-falaa niaa teen. Ba wiin kala ne nii.

²² Nii ne Pɔɔl sii chin nialin fa si hilime tutuɔbaanin a bula piba a bul, “Mi si ko daha, mi na ari ma cho vuiaa kpaarin ne woruɲ. ²³ Mi sii golle ma tan le, mi na ma vesin. Mi bira na koruɲ maa ma si saa. Nla ne ma tuuro heu le, ‘Wia-la la si bi

jin di-kpaarin le ɲla.’ ” Nii ne Pɔɔl bira bul, “Wia-la ma sii chuɔle an buu jin, u wiaa ne mi bulaa pima nii. ²⁴ Wia-la si ɲaa dunia ari kuɲ-kala si he dime, a ɲaa wia nyun ari tinȚeen kala Tiina, u bi lee-la nuhuobiine si saa aa kpaare vuiaa ka juu. ²⁵ U bi naga u si che kuɲ ka ne tii uu che nuhuobiinee tima pu. U ne pi nuhuobiinee miisin ari wiese ari kuɲ-kuɲ-kala. ²⁶ Wia fa ɲaa ni-bala ne bunbun-la. Ni-balala le ne dunia niaa ta-gentisin kala to ko. Ba hoɲ dunia seme kala. Ka di u ɲaaba, u ne dage bua-la ba si jan ken miisin, ari lere-la kala ba si jan hoɲ. ²⁷ U ɲaaba nii di ba wuo bee cheu a lilaare lee-kala di ba nau. Ama Wia saa bi di-bolii he. U kpagela kuɲ-kala ne. ²⁸ Nu kubala ne bula ari u dolun le ne la ken miisin aa ven a he dime. U saa ɲaa wutitii. Ma goɔgo dindenneɛ dɔɲsun ma fa bul nii a bul ari la ɲaa u biirin ne. ²⁹ La saa si ɲaa u biirin, u bi maga di la biine Wia nage kialin nuhuobiine si ken selime kaa me, koo ku-la ba si ken hoɔɲ koo tabiin kaa ɲaa ne. U bi naga kiaa deenba nuhuobiine si ken u wu-jimin kaa ɲaa ne. ³⁰ Bua-la le nuhuobiinee si buu jin, u fa toriko ne ba nyun. Ama lele u bula pipi nuu-kala lee-na kala di ba birima lii ba haacheba le, ³¹ bee wiaa u he tapulii ne u si jan dii dunia niaa kala sariya ari tuɔ-bala. U jan to nuhuobiin-la le u si liisa ne a dii sariya-la. Nii-la si suba, u chisu suun le, di nuu-kala wuo jin ari wutitii ne.”

³² Nialin si nia ari Pɔɔl bul suun siinin le wiaa, ba dɔɲsun mumomu, ama dɔɲsun ma si di ba cho duu maachie bira bul wii-la di ba nii. ³³ Nii ne Pɔɔl sii a lii lee-la ba si hilime. ³⁴ Niaa dɔɲsun laa wialin dii a to u harin. Ba tuɔɲ dɔɲɔ baa yire Dayɔnaasias. U fa he nialin sii hilimi Ariyɔpagis dia-la tuɔɲ dɔɲɔ ne. Haal kubala maa baa yire Damaris ari niaa ma dɔɲsun laa wialin dii.

25 Ba fa dagu la Tiina Yesu wonbii-la tonuŋ woruŋ. Uu dage Yesu wiaa woruŋ ari siifian. Wialinŋ kala u si bula aa tige Yesu le ŋaa wutitiiba ne. Ari nii kala, duu nii bul Wii-chuoŋe liinŋ fonuŋ wiaa, Joŋŋ Wia lii-foori-la sii fo niaa Wii-chuoŋe liinŋ dunɔɔna wiaa ne u jin. 26 U si he Efesis le, u bul Wia wiaa ari nyu-duoŋ Wii-chuoŋe dia le. Pirisila ari Akuila he dime a nii wialinŋ u sii bul. Nii ne ba kenu kaa mu ba dia a wasa dagu Wia wonbii-la woruŋ. 27 Nii ne Apolos chiche duu mu Giriis tinŋteen. Nialinŋ si laa Yesu wiaa dii Efesis le peu le a ŋmunse teninŋ a pi nialinŋ sii laa Yesu wiaa dii Giriis le, a bula piba di u ko ba kenu woruŋ. U si mu dime, u puu nialinŋ si laa Yesu wiaa dii, Wia lahorimo le. U peba le woruŋ. 28 U di Juu tinŋnaa faasa kenŋ wiaa lilere niaa tuoŋ. U yie kenŋ nii-doluŋ a joŋ Wia teninŋ dageba ari Yesu ne ŋaa Kirisito. U bul nii a wuo loba.

19

Pool mu Efesis tinŋteen

1 Apolos fa si he Korinti le nii, Pool bira golli nii a bira ko Efesis. U si ko dime, u na nialinŋ doŋsunŋ si laa Yesu wiaa dii. 2 Nii ne Pool pieseba, "Wia joŋ u Diŋ-zoŋ-la hema le nee bua-la le ma si laa Yesu wiaa dii?" Nii ne ba si, "Ai, la ha bi Wia Diŋ-zoŋ-la wiaa nia." 3 Nii ne Pool bira pieseba, "Ni-bee ne ma to ka ba foma Wii-chuoŋe liinŋ?" Nii ne ba bul, "La to wialinŋ Joŋŋ Wia lii-foori-la si dagela ne." 4 Nii ne Pool bira si, "Nialinŋ si birima lii ba haacheba le ne, Joŋŋ fufo Wii-chuoŋe liinŋ. U fa bula piba ari nuu janŋ ko u harinŋ, u yirinŋ ne Yesu, duu ko di ba laa u wiaa dii." 5 Ba si nii wiinŋ deenŋ Pool si bula, ba ŋaa ba foba Wii-chuoŋe liinŋ la Tiina Yesu doluŋ le. 6 Nii ne Pool joŋ u nisaa danba le. U si ŋaa nii, Wia Diŋ-zoŋ-la ku tuu heba le. Ba suomo bubul yiikori-yiriba ba si bi jinŋ, a bul Wia wiaa Wia Diŋ-zoŋ-la doluŋ le

maa. 7 Niaa deenba kala fa ŋaa ari baalaa fii ari balia ne.

8 Pool si he Efesis le, u venee juu Wii-chuoŋe dia cheŋsinŋ batori, a chaasa bubul Wia kuorii-la wiaa ari nyu-duoŋ. Ba di niaa kenŋ wialinŋ lilere, u wiwalime di ba sei wii-la. 9 Ama nialinŋ doŋsunŋ nyuŋ si dolie, ba bi wii-la laa dii, anŋ bubul wu-boŋŋoo a tige la Tiina Yesu wonbii-la tonuŋ wiaa. Nialinŋ si laa Yesu wiaa dii aa hilimi tuoŋ ne ba bul nii. Pool lenba anŋ kenŋ nialinŋ si laa Yesu wiaa dii kaa mu. Ba mu juu baal kubala dii-bal baa yire Tiranis. Pool ari niaa yie kenŋ wiaa lilere dime tapulii-na kala. 10 U venee ŋaa nii a yi jisinŋ balia ne. Juu tinŋnaa ari Giriik tinŋnaa kala si he Esia tinŋteenŋ le wuo nii la Tiina Yesu wiaa.

Sikiiva biirinŋ gollo kiri jin-boŋŋoo

11 Wia fa joŋ dol-bal kubala ne a pi Pool, u ŋinŋaa wu-kpunŋkperisinŋ. 12 Pool yaraa geri-koŋsumoo ma paala ba yie paa kaa mu pi nyanyal tinŋnaa ba duduori. Di jin-boŋŋoo ne kenŋ nuu maa, ba lii tiina le. 13 Juu tinŋnaa doŋsunŋ ma fa he dime a ma fa golle aa kiri jin-boŋŋoo niaa le. Ba wiwalime di ba ŋaa nii la Tiina Yesu doluŋ le ne. Ba bula pi jin-boŋŋoo-la a bul, "Mi si, ma lii Yesu doluŋ le, niila wiaa Pool sii bul." 14 Baalaa balipe ne faa ŋaa nii. Ba nyimma yirinŋ ne Sikiiva. U fa ŋaa Juu tinŋnaa nialinŋ si kpu pusunŋ pipi Wia kuhianŋ doŋŋo ne. 15 Nii ne jin-boŋŋo-la bula piba a bul, "Mi jinŋ Yesu a jinŋ Pool maa, anŋ ka ma ma ŋaa kubeeba ne?" 16 Nii ne jinŋsinŋ si kenŋ baal-la wuoba. U sii a kenba a ŋmooba woruŋ a pireba. Ba genninŋ kala kiese. Ba kala fa lii diala tuoŋ ari yaribiree. 17 Juu timma-la ari Giriik timma-la ari nialinŋ kala si he Efesis le nii wiinŋ deenŋ. Fawulluŋ kenba kala. Ba denne la Tiina Yesu woruŋ. 18 Nialinŋ ma doŋsunŋ si laa Yesu wiaa dii yuga ko, a ku dage ba wu-boŋŋo-la ba si ŋaa a pi Pool, niaa tuoŋ. 19 Ba tuoŋ niaa yuga a faa ŋaa daalusuŋ. Ba kala paa tenni-la ba fa si karima aa ŋaa daalusu-la. Ba

paa nyige nuu-kala siaa ɛ. Ba si ken tenni-la kala yalin pe donɔ ɛ, u ɲaa siidi bui bui bui ne. ²⁰ La Tiina niin wiaa teeli lerin kala a dol worun.

Niaa ɲaa taawei Efesis ɛ

²¹ Nii ne Pɔɔl biine ari u jan to Masidoonia tinteen ari Giriis tinteen a mu Jerusalem. Nii ne u bul, “Di mi ne mu dime, u maga di mi mu Rom maa.” ²² Nii ne Pɔɔl tin nialin fa si pe u ɛ ba tuɔn balia di ba mu Masidoonia. Timoti ari Irasitas ne u tin. An ka u titia hon Efesis ɛ Esia tinteen a dieni mua.

²³ Bua-la ɛ yuosun fa juu Efesis ɛ siifesiin a tige la Tiina Yesu wonbiila tonun wiaa. ²⁴ Libiri kubala ne fa he dime. U yirin ne fa Demiitias. U fa ken selime ne a kaa lilibi kiaa, ba nage ba tan ven-balin Atemis. Tintimin deen ɛ ba di u tintinnaa na moribee kinken. ²⁵ Chee kubala u yire u tintinnaa ari u tintinndonson a bula piba a bul, “Mi nanndonson, ma jima ari tintimin deen ne ɲaa la kuori. ²⁶ Ma titia nia a nina maa wialin Pɔɔl sii bul. U si, vua-la nuhobiinee sii libi, ba bi wia ɲaa. U saa wuo ken ni-dan nyusun birime ba sei wii-la. U ɲaa nii Efesis deen ɛ ari Esia tinteen jesiin kala ɛ ne. ²⁷ Wii-la la sii fa ne ɲla: Niaa jan chei la tintimin deen yirin. La biraa fa ari la ven-balin Atemis jan ku ɲaa ku-too. Niaa bira bi jan zizilu. Lee ɛ Esia niaa ari dunia nuu-kala nii zilu.”

²⁸ Nialin si nii wii-la, ba baaniin sii. Ba ɲaa gon a bubul, “La ven-balin Atemis si he Efesis ɛ ne ken dolun.” ²⁹ Nii ne ba ken tan kala vugime. Ni-dan-la ken Gayas ari Arisitaakis si lii Masidoonia a tuto Pɔɔl hariin. Ba lereba kaa mu lee-la tan-la niaa si yie hihilimi. ³⁰ Ba si kenba kaa mu dime, Pɔɔl fa cho duu mu juu nialin tuon, ama nialin si laa Yesu wiaa dii bi seye. ³¹ Esia tinteen kuhiasin donson si dii Pɔɔl nanndonson tin di ba sulu duu si nialin tuon juu. ³² Nialin kala si hilime bi jin wii-la

sii ɲaa. Donson ɲaa gon a bul ɲla ne, donson ma si wiin deen ne. Ba kala jesiin paala fa bi jin wii-la si tii ba ku hilimi donɔ ɛ. ³³ Juu tiina kubala ne fa he nialin tuon. Baa yire Alekizanda. Juu tinnaa leɲe u lii chin ba sipaan ne. Nii ne tii nialin donson biine duu ɲaa wii-la tuon nibal ne. Nii ne Alekizanda ken u nisin vigi di ba ken gon, an wiwalime duu bula pi nialin di ba di u nanndonson bi wii cheye. ³⁴ U sii ɲaa nii, ba bene duu ɲaa Juu tiina. Nii ne ba kala bira ɲaa gon a he donɔ ɛ a yi hawaba balia aa bul, “La ven-balin Atemis si he Efesis ɛ ne ken dolun.”

³⁵ Nii ne ba tan kerichi-hian donɔ ku lii a wuo ɲaa ba ken gon. U bula piba a bul, “Efesis niaa, nuu-kala ne jima ari la tan Efesis ne tii la ven-balin Atemis ari u di-kpaarin kala, a pe tabii-la si lii wia nyun ku tuu tel, la kpikpaare ɛ. ³⁶ Nuukala bi jan wuo ken wiin deen kaa lere. Nii wiaa, ma len gon an si wii-la si bi bubu kene ɲaa. ³⁷ Niaa deenba bi kun gaa jon la ven-balin di-kpaarin, ba bira bi wii bula chei la ven-balin yirin maa, ka ma kenba kaa ko daha. ³⁸ Di Demiitias ari u tintinnaa ne ken wii ari nuu, sariya ken u tapul-diilie ne, ma tan kuhiasin ma he dime di ba dii sariya. Ma len di ba mu dime a nyan donɔ. ³⁹ Ama di wii don ma ne he dime maa che di ma bul, ma len bua-la tan kuhiasi-la si yie ko a hilimi di ba bula wase. ⁴⁰ Di ba ne piesela, la bi wii-kala jan wuo bul a tige taawei deen wiaa si ɲaa jinin. Wii-la mi sii fa ne ɲla, ba jan bul di la ne he taawei-la.” ⁴¹ U si bul nii dere, u ɲaa nialin fa si hilime sii a viiri.

20

Pɔɔl mu Masidoonia ari Giriis tinteen

¹ Nii ne taawei-la dere. Ka Pɔɔl yire nialin si laa Yesu wiaa dii Efesis ɛ a bul wiaa piba di ba nyun nyaase. U si bul wialin dere, u taba an sii mu Masidoonia tinteen. ² U golle

Masidoonia tinŌteen kala a bul wiaa yuge piba di ba nyun nyaase. Nii ne ka u lii dime a mu Giriis tinŌteen. ³ U he Giriis tinŌteen le cheŌsin batori. Nii ne u Ōaa siri duu juu liin daboro a mu Siiria tinŌteen. U si Ōaa siri Ōii, u nia ari Juu tinŌnaa vuure u wiaa di ba kpuu. Nii ne u ken u tuŌbiinaa birime a miira sii to Masidoonia. ⁴ Baal kubala ne fa to u hariŌ. Baa yire Sopata a lii Biriya. U fa Ōaa Piras bie ne. Ka niaa deenba: Arisitaakis ari SekunŌdas a lii Tesalonaaka, baal kubala maa baa yire Gayas a lii Deebi, ari Timoti. Niaa balia ma he dime a lii Esia. Baa yire Tikikas ari TurŌfimos. ⁵ Ba ne laa sipaan a mu gberela TurŌwas le. ⁶ La he dime bua-la le ba si yie dii boroboro si bi si-burun ken. U kieli, ka la sii Filipa le a juu liin daboro, a ven tapulaa banŌ an-na yi TurŌwas. La he dime tapulaa balipe.

PŌol mu TurŌwas tinŌteen

⁷ Lahadi cheen la kala he dŌŌ le a dii kudiile-la Kirisito fa si si di la didii a liliisi u wiaa. U taŌ nŌ pul di PŌol sii viiri. Nii ne u bul wiaa deen deen taŌ siesi. ⁸ La hŌŌ lusun nyun dia le ne a nyige chaanaa yuge. ⁹ BapuŌsi-bie kubala ma he dime. Baa yire Yutikas. U fa hŌŌ tokoro niin ne. PŌol si bul wiaa didieni Ōii, u hŌŌ didiege dŌŌ a jŌŌ pin dŌŌ, a foro lii lusun nyun dia-la nyun a tuu tel. Ba tuu jŌŌ duu suba. ¹⁰ Nii ne PŌol ma sii tuu a tinŌ a guoru, an bula pi nialin a bul, "Ma si lenŌ duu Ōaa wii, u weye ne." ¹¹ Nii ne ka PŌol bira jil lusun nyun dia-la ba didii kudiile-la Kirisito fa si si ba didii a liliisi u wiaa. U si dii dere, ba bira ken ba wu-bulun halii taŌ-pul. Nii ne u viiri. ¹² Ba ken bapuŌsi-bie-la kaa mu dia duu weye. U Ōaaba tuŌtŌrun.

PŌol sii TurŌwas le a mu Miliitas

¹³ Nii ne la sii a mu juu liin daboro a duoro mu AsŌs. PŌol fa bula pila ari la juu liin daboro a duoro mu AsŌs, ka duu ven naasin le kŌ a juu

liin daboro AsŌs le. Nii ne la juu liin daboro a mu AsŌs. Dime ne la fá mu di la jŌŌ PŌol. ¹⁴ PŌol si ku puula AsŌs le, la jŌŌ ari liin daboro a mu to Mitilini. ¹⁵ La bira sii dime. U taŌ si pula, la ku yi KiyŌs. TaŌ dŌŌ bira si pula, la ku yi SamŌs. U taŌ si pula, la ku yi Miliitas. ¹⁶ La bira sii Miliitas le. PŌol si duu bi jaŌ chinŌ Efesis le. U si, u bi che duu dieni Esia tinŌteen, duu faa che duu mu Jerusalem lima lima ne a puu PentikŌs che-gbielii-la dime.

PŌol bul wiaa a pi nialin si laa Yesu wiaa dii aa hilimi kuhiasin Efesis le

¹⁷ Nii ne la kiele kŌ Miliitas. PŌol tima yire nialin si laa Yesu wiaa dii aa hilimi kuhiasin Efesis le di ba kŌ. ¹⁸ Ba si kŌ, u bula piba a bul, "Ma ma jinŌ Ōii mi si naga ne, a chinŌ bua-la le mi si bumo kŌ Esia tinŌteen ne a kukŌ jiniŌ. ¹⁹ Mi si tinŌ tinŌnaa pi la Tiina Wia Ōii, mi ken mi titia muuri ne kinŌken. Mi ma yel sii-liirinŌ a tinŌ ma wiaa. Mi na heenŌ maa Juu tinŌnaa teenŌ, ba si yie vuvuure di ba kpumi. ²⁰ Mi dagema wii-na kala si jaŌ pema le, mi bi kaa faama. Mi dagema Wia wiaa, niaa tuŌŌ ari ma diisinŌ kala ma le. ²¹ Mi bula pi Juu tinŌnaa ari Giriik tinŌnaa kala siifŌsinŌ di ba birima lii ba haacheba le an ku to Wia, a laa la Tiina Yesu wiaa dii. ²² Wia DinŌ-zŌŌ-la dagemi di mi mu Jerusalem. U niinŌ le ne mi lee le to aa mu Ōla. Mi bi jinŌ wii-la kala si jaŌ Ōaami le dime. ²³ Mi ta jinŌ ne ari taŌ-na kala le mi si mua, Wia DinŌ-zŌŌ-la yie bula pimi siifŌsinŌ ari wiaa jaŌ juumi, di ba kenŌmi to dia maa. ²⁴ Ama mi si yie benŌ mi miisinŌ, u bi kunŌ-kala Ōaa mi teenŌ. Mi taa che di mi tinŌ tinŌtimii-la dere mi Tiina Yesu si si mi tinŌ ne. U ne si di mi bul Wia wu-zŌŌ-la a pi niaa, a bula piba Ōii u si jaŌ fába nennige. ²⁵ Lee le mi jima ari ma niaa deenba mi si yie gŌlle ma tuŌŌ a bul Wia kuorii-la wiaa pima, ma bira bi jaŌ kŌ di ma nami. ²⁶⁻²⁷ Mi si bul Wia wialinŌ pima

nii, mi bi wialin kala Wia si n̄aa kaa faama. Mi saa bulaa pima siifiesin jinin tapulun deen di ma nuu-kala kō duu l̄e, mi bi wii cheye. Ma wu-bōn̄ōō jaŋ nyua ma nyun̄ l̄e. ²⁸ Má beŋ ma titia nyun̄ worun̄, aŋ p̄e beŋ nialin̄ maa u Diŋ-zōŋ-la si joŋo h̄e ma nisin̄ l̄e. Má beŋ nialin̄ si laa Yesu wiaa dii a hihilimi nyun̄, ari pie-daara si yie beŋ u piesee nyun̄ nii. Wia n̄e joŋ u titia bie chalin̄ yōōba. ²⁹ Mi jima, di mi n̄e len̄ma, ni-bōn̄ōō jaŋ ku juu ma tuōŋ, ari gun̄gurusun̄ si yie juu pusun̄ tuōŋ nii. Ni-bōmō-la bi jaŋ len̄ma, ba jaŋ walimema. ³⁰ Niaa jaŋ lii ma tuōŋ maa a keŋ wialin̄ kaa birime, a nyise nialin̄ si laa Yesu wiaa dii di ba miire hariŋ a toba. ³¹ Nii n̄e tii mi si, má beŋ ma titia nyun̄ nii. Máa liisi ari mi dagema nuu-kala jisin̄ batori n̄e n̄la wiheye ari titanin̄ kala, a yel sii-liirin̄ ma worun̄ ma wiaa. ³² Mi l̄e l̄e joŋma h̄e Wia nisin̄ l̄e n̄e. Wia wu-zōmō-la lah̄orimō l̄e u jaŋ p̄ema l̄e. U jaŋ wuo p̄ema l̄e di ma keŋ dolun̄ a chin̄ ma yarida l̄e. U jaŋ len̄ di ma wuo dii kialin̄ u si n̄aa bil ma sipaan̄ Wia kuorii-la l̄e a gbigbere nialin̄ si laa u wiaa dii l̄e. ³³ Mi ha bi ma kuŋ-kala moribiee koo gennin̄ biina di mi kaa laa. ³⁴ Ma titia jima di mi tima worun̄, a na kialin̄ kala la di mi nan̄dōŋsun̄ s̄i che. ³⁵ Mi n̄aa nii di mi wuo dagema di ma faasa tin̄ tin̄in̄ n̄aa nii, ma jaŋ wuo p̄e puwuoloo l̄e aa liisi ari la Tiina Yesu fa si bul nii. U si,

‘N̄ si joŋ kua pi nia,

u n̄e keŋ tuōtōrun̄

a kii ŋ si laa kua nia teen̄.’ ”

³⁶ Pōol si bul wiaa d̄ere, u tuu kpirimi a chuōle Wia a piba kala. ³⁷ Ba guoru a yel sii-liirin̄. ³⁸ Ba tuōŋ chei worun̄, b̄e wiaa u fa bula piba ari ba bira bi jaŋ nau. Nii n̄e ba kenu kaa mu liin̄ daboro lerin̄.

21

Pōol mu Jerusalem

¹ La ta dōŋo aŋ juu liin̄ daboro. La ven̄ tegi tegi a mu lee kubala baa yire Kōs, a bira sii dime. Taŋ si pula la mu lee kubala baa yire Roodis, a bira lii dime a mu Patara. ² Dime n̄e la na liin̄ daboro duu mu Fōniisia. La juu mu. ³ La s̄i mu nii, la na lee kubala la na-gua, baa yire Saapōs. La kieli dime a mu yi Siiria tin̄teen̄. La mu chin̄ taŋ kubala l̄e baa yire Taya. Dime n̄e liin̄ daboro-la che duu chin̄ di ba chaare kiaa si h̄e liin̄ daboro-la l̄e. ⁴ La che mu na nialin̄ si laa Yesu wiaa dii dime. La hōŋ ba teen̄ tapulaa balipe. Ba bula pi Pōol Wia Diŋ-zōŋ-la dolun̄ l̄e duu s̄i Jerusalem mu. ⁵ La si hōŋ dime tapulaa balipe nii, la bira lii dime a joŋ la won̄biin̄. Baalaa ari ba haalaa ari ba biirin̄ keŋla kaa lii taŋ-la tuōŋ. La kala tuu kpirimi liin̄ niin̄ a chuōle Wia. ⁶ La ta dōŋo dime aŋ juu liin̄ daboro, ka ba ma miira mu dia.

⁷ La lii Taya l̄e a joŋ la won̄biin̄ a mu taŋ kubala baa yire Pitolimiiyas. La mu chuōle nialin̄ si laa Yesu wiaa dii dime aŋ chua. ⁸ U taŋ si pula, la sii a mu Sizariya, a mu juu baal kubala dia baa yire Filip. U fa gōllo bul Wia wiaa n̄e aa pi niaa. U fa n̄aa nialin̄ balipe dōŋo n̄e ba fa si liisa Jerusalem l̄e. ⁹ U fa keŋ toloo banese n̄e. Ba fa bi balaba jaa aŋ fa bubul Wia wiaa Wia dolun̄ l̄e. ¹⁰ La h̄e dime nii tapulaa ban̄mene, di baal kubala lii Judiya tin̄teen̄ a ma kō, baa yire Agabōs. U fa n̄aa nii-la s̄i bul wiaa, Wia Diŋ-zōŋ-la dolun̄ l̄e n̄e. ¹¹ U kō la teen̄ a laa Pōol damere a kaa vōō u titia naasin̄ ari u nisaa aŋ bul, “N̄la n̄e Wia Diŋ-zōŋ-la bul, ‘Juu tin̄n̄aa jaŋ keŋ damere deen̄ tiina a vōbu n̄la Jerusalem l̄e, a joŋo h̄e nialin̄ si bi juu tin̄n̄aa n̄aa nisin̄ l̄e.’ ”

¹² La si nii wiin̄ deen̄, la di nialin̄ fa si h̄e dime sul Pōol duu s̄i Jerusalem mu. ¹³ Nii n̄e Pōol bula piba a bul, “B̄e n̄e tii ma yiyel n̄la a n̄aa mi tuōŋ chei n̄la? Di ba n̄e jaŋ keŋmi vōō, koo di ba n̄e kpumi maa Jerusalem l̄e a tin̄ mi Tiina Yesu

laali-yuoro-la jonu chuŋ. ³⁶ Nialin kala to u hariŋ a ŋaa goŋ a bubul, “Má kpuu.”

PƆol bul wiaa duu laa u titia

³⁷ Ba si jil lusun chol-la a chiche di ba juu dia-la, ŋii ne PƆol sul laali-yuoroo kuhian-la duu len duu bul wii pu. Ŋii ne laali-yuoroo kuhian-la piɛɛ PƆol a bul, “Ŋii-na ŋ nii Giriik wu-bulun neɛ? ³⁸ Ŋ dee bi Ijipiti tinȚaa baal-la ŋaa, baal-la si suomo ŋaa taaweɪ aŋ keŋ niaa bui banese-la si kpu niaa a kaa mu giri-bine tuoŋ?” ³⁹ PƆol si, “Ai, mi ŋaa Juu tiina ne a lii Taasis, Siliisia tinȚeen ta-balin. Mii sulun di ŋ len di mi bul wiaa pi nialin.” ⁴⁰ Ŋii ne u pu woŋbiin. PƆol si chin lusun chol-la le ŋii, u keŋ u nisin vigi di nialin keŋ goŋ. Ŋii ne ba kala ŋaa fuui. PƆol suomo bubul wiaa Juu tinȚaa yiikoro le.

22

¹ Ŋii ne u bula piba a bul, “Mi nyimmaba ari mi naanbiirin, má jegile nii wii-la mi si keɛ di mi bula laa mi titia.” ² Ba si nia duu bul wiaa ari ba yiikoro, ba kala ŋaa fuui. Ŋii ne PƆol bul, ³ “Mi ŋaa Juu tiina ne. Ba lulmi Taasis le, Siliisia tinȚeen. Mi hanbiirin le ne ba keŋmi kaa ko daha a beŋmi. Gamiilal ne dagemi. U dagemi la naabalimaba woŋbii-la ba sii to ari siifesiŋ. Mi tou woruŋ a jon mi titia pi Wia, ari ma ma si he daha jiniŋ si ŋaa ŋii. ⁴ Mi ma to a doŋise nialin fa sii to Yesu woŋbii-la a chiche di mi kpuba. Mi ŋaa ba keseba vooba a keŋba to dia, baalaa ari haalaa kala. ⁵ Nialin si kpu pusun a pipi Wia kuhian, ari kuhiasi-la kala si yie hilime vuvuure wiaa ma jan wuo bula pima ari wiin deen mi si bula ŋaa wutitii ne. Ba ŋmuŋse tenniŋ pimi di mi kaa mu Damaasikas a jono pi Juu timma-la si he dime. Ba ŋaa ŋii di mi wuo keɛ nialin si laa Yesu wiaa dii dime a vooba, a kaa ko Jerusalem a doŋiseba daha.”

⁶ Ŋii ne PƆol bira bul, “Mi si lii jon woŋbiin aa mu Damaasikas a mu kpage taŋ-la ari wiihei-siesee, pulumun guu lii wia nyun a faasa chaana hemi le. ⁷ Mi tuu tel tinȚeen aŋ nii nii-la yiikoro duu bul mi teen a bul, ‘Sool, Sool, beɛ ne tii ŋ to mi naasiŋ a dudogisemi ŋla?’ ⁸ Ŋii ne mi piɛɛ, ‘Kubeɛ ne, tiina?’ Yiikori-la bul, ‘Mi-na Yesu si lii Nazaret, ni-la ŋ sii to u naasiŋ a dudogise.’ ⁹ La di nialin fa sii ven, ba na pulun-la, aŋ bi nii-la fa sii bul wiaa mi teen yiikoro nia. ¹⁰ Ŋii ne mi piɛɛ, ‘Mi ŋii mi Tiina?’ Mi Tiina bira bul, ‘Sii juu Damaasikas. Dime ba jan dagiŋ wii-la kala mi si liisiŋ di ŋ ŋaa.’ ¹¹ Pulun-la chuule mi siaa, mi bira bi naa, ŋii ne la di nialin fa sii ven keŋ mi nisin le a lere juu Damaasikas.

¹² Baal kubala fa he dime, baa yire Ananayas. U faa fá Wia ne a tuto wialin Moosis fa si ŋmuŋsa bil di niaa tuto. Juu timma-la kala fa si he Damaasikas le zizilu. ¹³ U ko mi teen a chin mi seme a bula pimi a bul, ‘Mi naanbii Sool, keŋ ŋ siaa suri.’ Bua-la titia le mi siaa suri, mi bee nau. ¹⁴ Ŋii ne Ananayas bula pimi a bul, ‘Wia-la la di la naabalimaba sii to ne liisiŋ di ŋ jin wii-la u sii che di ŋ ŋaa. U len ŋ na Wia Tuo-pul Tiina a nii u yiikoro maa u si bul wiaa pin. ¹⁵ Ŋ jan ŋaa u siada tiina, a bula pi niaa wii-la ŋ si nia aŋ pe naa. ¹⁶ Beɛ ne saa tii ŋ hono dieni? Sii mu a len di ba foŋ Wii-chuole liin a fo ŋ haacheba ta Yesu dolun le.’

Wia yire PƆol duu bul Wia wiaa a pi nialin si bi Juu tinȚaa ŋaa

¹⁷ Ŋii ne mi miira mu Jerusalem a juu Wia-dia a chuchuole Wia. Mi sii chuole Wia ŋii, ¹⁸ mi na la Tiina Yesu ari duosoo tuoŋ. U bula pimi a bul, ‘Sii lii Jerusalem le lima, beɛ wiaa nialin si he daha bi jan sei mi wialin ŋ si jan bula piba.’ ¹⁹ Ŋii ne mi bula pi Yesu a bul, ‘Mi Tiina, ba jima woruŋ di lee-na kala mi si mua, mi yie juu Wii-chuole diisiŋ a keɛ nialin si laa ŋ wiaa dii dime, a

ημοοβα αη κενβα το δια. ²⁰ Bua-la εε ba si kpu Sittiivin, nii-la fa si ηαα η siada tiina a bul η wiaa pipi niaa, mi-na Pool ma fa ηε dime a sei di ba kpuu. Ba sii kpuu, mi ne fa po niaa deenba gennin ba si wuro, aη ka ba kpuu.’ ²¹ Nii ne mi Tiina bula pimi a bul, ‘Sii daha, mi jaη timin di η mu di-bolii, nialin si bi Juu tinηaa ηaa lerin.’ ”

²² Pool fa sii bul wiaa ηii, nialin kala fa jegile nii. Ama u si bul wiin deen, ba bira suomo ηaa gon a bul, “Má kpu ni-toon deen, u bi maga duu ηe dunia εe.” ²³ Ba ηηaa gon, aη κεν ba gennin kpikpesi a ηaa hagila yuyuo. ²⁴ Nii ne Rom laali-yuoroo kuhian-la bul di laali-yuorola κεν Pool kaa juu laali-yuoroo diiduo-la. U si di ba viiru aη piesa na wii-la si tii ba kala lii u harin aη ηηaa gon ηla. ²⁵ Nii ne ba vobu di ba viiru. Ba sii che di ba viiru, Pool piese laali-yuoroo kuhian-la fa si chin dime a bul, “U maga di ba viire nuu si ηaa Rom tiina aη bi u sariya die, a dagu u wu-cheelin koo?” ²⁶ U si nii wii-la Pool si bula, u ma bira mu u kuhian teen a bula pu a bul, “Bee na η sii che di η ηaa wiila, baal-la ηaa Rom tiina ne.” ²⁷ Nii ne laali-yuoroo kuhian-la titia sii ko Pool teen a piesu, “N ηaa Rom tiina nee? Bula pimi.” Nii ne Pool si, “Oo.” ²⁸ Laali-yuoroo kuhian-la ma bul, “Mi ma ηaa dono ne. Mi ta tin moribee yuge ne aη-na ku ηaa Rom tiina.” Nii ne Pool si, “Ba paala lulmi di mi ηaa Rom tiina ne.” ²⁹ Nii ne nialin fa sii che di ba viire Pool aη piesu, ba suusa lii u teen lima lima. Laali-yuoroo kuhian-la si ku jin ari Pool ηaa Rom tiina ne, ka u ηaa ba κεν chorumo aη vobu, fawullun kenu maa.

Pool chin nialin si yie hilime vuvuure wiaa sipaan

³⁰ Nii ne laali-yuoroo kuhian-la chiche duu sene jin wii-la si tii Juu tinηaa bubul Pool teen ηii. U tan si pula u ηaa ba kenu puri, a

ηaa nialin si kpu pusun pipi Wia kuhiasin ari kuhiasi-la si yie hilimi a vuvuure wiaa ku hilimi. Ba si hilimi ηii, u κεν Pool kaa lii a ηaa u chin ba sipaan.

23

¹ Pool fa si chin ηii, u chaare u siaa pe nialin fa si yie hilime vuvuure wiaa εe aη bula piba a bul, “Mi naanbiirin, mi to Wia mi miisin kala εe ne. Mi si tou, mi tuobiinaa kala yie chesi ne a kaa ko tapulun deen.”

² Nii ne nialin si kpu pusun pipi Wia kuhian dono, baa yire Ananayas, bula pi nialin si china kpage Pool di ba ηmoo u niin εe. ³ Ba si ηmobu ηii, Pool ma bula pu a bul, “N lono nage jeen si yere, ka ba ηaa tuorun buge ne di niaa si na. Wia ma jaη ηmobun ηii. N hono di η to wialin ba si ηmunsa bil di la tuto ne a didii mi sariya, aη ka η bul di ba ηmoomi a chei wialin ηii.”

⁴ Nialin si china kpage Pool piesu a bul, “Nialin si kpu pusun pipi Wia kuhian ne η tuuse ηii?” ⁵ Nii ne Pool bira bul, “Mi naanbiirin, ma kiaa sima. Ba ηmunse Wia tenin tuon ari u bi maga di la bul wu-bonono a pi nii-la sii ber niaa. Mi bi jin ari u ne ηaa nialin si kpu pusun pipi Wia kuhian.”

⁶ Pool si bene nialin si yie hilime vuvuure wiaa tuon, u na ari donsun ηaa nialin ba sii yire Sadius tinηaa, donsun ma ηaa Farisii tinηaa. Nii ne u faasa bul nialin si yie hilime vuvuure wiaa teen a bul, “Mi naanbiirin, mi ma ηaa Farisii tiina ne, nii-la si lulmi ma ηaa Farisii tiina ne. Mi laa dii ari nialin si suba jaη sii suun εe a κεν miisin. Nii ne tii baa dii mi sariya.” ⁷ U si bul wiin deen, Farisii timma-la ari Sadius timma-la bira bi nii-bala kene. Ba pore dono εe. ⁸ Sadius tinηaa si di nuu ne suba, u bira bi jaη sii suun εe a κεν miisin, a bira bul di Wia tinđaraa ma tuo, di ni-dinsin ma tuo, ka Farisii tinηaa si di ba kala ηe dime, di nuu ma ne suba, u jaη sii suun εe a κεν miisin.

⁹ Nii ne nialin sii a faasa njaa gon. Wia tenin kerichiba-la donsun si he Farisii niaa paati-la tuon sii a faasa ken wialin lile a bul, "La bi na baala deen si naa wii-la chei. U naga ari ni-dima ne koo Wia tinndaara ne sene bul wiaa pupu, la bi u-na jin."

¹⁰ Nii ne ba ken wii-la faasa lere, lerin kala hosi. Fawullun ken laali-yuoroo kuhian-la ari ba jan ken Pool lere puose. Nii ne u naa u laali-yuoroo juu nialin tuon a loriko laau nialin teen, a kenu kaa mu laali-yuoroo dii-duo-la.

¹¹ U tan si bire, titan-la titia la Tiina Yesu ko Pool teen, a chin u seme, a bula pu a bul, "Nyire n boye. U maga di n dii mi siada a bul mi wiaa Rom le ari n si bul mi wiaa nii Jerusalem le."

Juu tinjaa ka vuure di ba kpu Pool

¹² U tan si pula, Juu tinjaa donsun hilimi donjo le a vuure di ba kpu Pool. Ba ta niin ne ari ba ne buu kpua, ba bi jan dii kiaa. Ba bi jan nyua liin maa. ¹³ Nialin fa si vuure wiin deen kii niaa mahin balia. ¹⁴ Nii ne ba mu nialin si kpu pusun pipi Wia kuhiasin ari nialin kuhiasin teen a bula piba a bul, "La ta niin ne di la ne bi Pool kpua, la bi jan dii kiaa. ¹⁵ Ma di nialin si yie hilime vuvuure wiaa kuhiasin saa tin di ba bula pi Rom laali-yuoroo kuhian-la duu len di Pool ko ma teen. Ma fugi ari maa che di ma wasa dii u sariya ne. La jan naa siri duu ne leje u kuko, u bi jan yima, ka di la kpuu."

¹⁶ Pool dihaala bie ma nii ba sii vuure nii, a mu juu laali-yuoroo dii-duo-la a bul wii-la pi Pool. ¹⁷ Nii ne Pool yire laali-yuoroo kuhian donjo a bula pu a bul, "Ken bapوسي-bie deen kaa mu ma kuhian teen, u ken wii ne duu bula pu." ¹⁸ Nii ne u kenu kaa mu ba kuhian teen a bula pu a bul, "Pool, nii-la ba si kaa to dia ne yiremi a bula pimi di mi ken bapوسي-bie deen kaa ko n teen, duu ken wii ne duu bula pin." ¹⁹ Nii ne

kuhian-la ken bile nisin le a kenu lii mua, a fiela piesu di wu-bee ne u ken di u bula pu? ²⁰ Nii ne u bul, "Juu tinjaa vuure ne di ba bula pin di n chie len di Pool ko nialin si yie hilime vuvuure wiaa kuhiasin teen. Baa fugi ari baa che di ba wasa dii u sariya ne. ²¹ Saa si sei, bee wiaa nialin donsun jan faa wonbiin le a gberu. Ba kii niaa mahin balia. Ba ta niin ne di ba bi Pool kpua, ba bira bi jan dii kiaa, ba bi jan nyua liin maa. Ba naa siri ne di n ne pu wonbiin duu kuko." ²² U si bul nii dere, kuhian-la bula pi bapوسي-bie-la a bul, "Si bula pi nuu-kala ari n bul wiin deen pimi," an naa u viiri.

Ba ken Pool mu tinteen kuoro Fiilis teen

²³ Nii ne laali-yuoroo kuhian-la yire u laali-yuoroo kuhiasin balia a bula piba a bul, "Ma liise laali-yuoroo zo-balia di ba naa siri di ba di Pool mu Sizariya, a pe ja-jillaa mahin batori ari fii le, ari nialaa ma si ken tinjee zo-balia. Len di ba naa siri di ba lii titanin deen kerifi nibi le. ²⁴ Ma che janin a liisa pi Pool duu ma jil, a kenu worun a kaa mu Sizariya, a kenu kaa mu he tintee-la kuoro Fiilis nisin le." ²⁵ Nii ne ka laali-yuoroo kuhian-la nmunse tenin a piba di ba kaa mu pi kuorula a tin wiin deen wiaa. Nla ne u bul ten-la le:

²⁶ "Mi-na Kuloodios Lisias ne nmunse tenin deen a pipi mi nyimma kuoro Fiilis. Mii chuolun worun. ²⁷ Baala deen mi si naa ba kaa ko n lerin, Juu tinjaa ne fa kenu di ba kpuu. Ba sii che di ba naa nii, mi nii ari u naa Rom tiina ne. Nii ne mi ken mi laali-yuoroo mu, la loriko laau ba nisin le. ²⁸ Mi faa che di mi nii wii-la si tii ba bubul u teen. Nii ne mi kenu kaa mu ba nihiasin si yie hono vuvuure wiaa teen. ²⁹ Ba si piesu wiaa, mi na ari u bi wii-kala cheye a mage di ba kpuu koo di ba kenu to dia. Wii-la si tii ba bubul u teen tige ba titia kisinnin le ne. ³⁰ Ba

si bula pimi ari J̄uu tinŋaa d̄onsun vuura ne di ba kpuu, n̄ii ne mi si di ba kenu kaa ku piŋ lima lima. Mi saa bula pi nialin s̄ii bul u teen ne di ba k̄o ŋ teen, a ma dage wii-la u si ŋaa chei a piŋ.”

³¹ U si ŋmunse ten-la d̄ere, laali-yuoro-la ŋaa n̄ii u si bula piba. Titan-la ba ken P̄ool kaa mu yi tan kubala baa yire Antipatis. ³² U tan si pula, laali-yuoro-la s̄ii ven naasin le ne miira k̄o ba dii-duo-la, an ka janin tinŋaa kenu mu Sizariya. ³³ Ba si yi dime, ba jon P̄ool pi ba tinteen kuoro, a jon ten-la ma pe. ³⁴ N̄ii ne kuoro-la karime ten-la an piase P̄ool lee-la u si lia. U bul duu lii Siliisia ne. U si nii n̄ii, ³⁵ u bula pu a bul, “Bua-la le nialin s̄ii bul ŋ teen ne k̄o, mi jan nii wii-la ŋ si kene di ŋ bul, an ka di mi-na dii ŋ sariya.” N̄ii ne u ŋaa ba ken P̄ool mu he dii-bal-la Herod si saa, a ŋaa laali-yuoro pupou dime.

24

J̄uu tinŋaa bul P̄ool teen

¹ Tapulaa banon si kiele, nialin si kpu pusun pipi Wia kuhian baa yire Ananayas s̄ii mu Sizariya, kuoro Fiilis teen. Ba di nialin kuhiasin d̄onsun ari sariya didiire kubala baa yire Tatulas, ba kala ne mua. Ba si mu u teen, ba suomo bubul wii-la si tii ba bubul P̄ool teen. ² Tatulas ne ba laa sipaan yire duu dage wii-la P̄ool si ŋaa chei. N̄la ne u suomi, “Mi nyimma, ŋ ne wuo bibenla worun a len la hon ari yarifelaa. N̄ si wuo bibenla n̄ii, ŋ wase wiaa yuge a pila ba zom̄o la tinteen deen le. ³ La tan seme-na kala la tuon t̄oro worun wiin deen le bua-na kala le ne. La saa lollun kinken. ⁴ Mi bi che di mi bul wiaa dieni. Mi saa sulun di ŋ ken kenyiri an jegile nii wii-la la si kene di la bul. La jan keri wii-la la si jan bul kuii. ⁵ La na di baala deen ŋaa wu-h̄eru ne. J̄uu tinŋaa si he dunia seme-na kala le, u yie mu lee-la a ŋaa taawei. U ne ŋaa Nazaret niaa paati kuhian maa. ⁶ U

faa che duu ma ŋaa disinnin ne Wia-dia le. N̄ii ne la kenu [a faa che di la dii u sariya la naabalima wonbii-la le la s̄ii to n̄ii. ⁷ N̄ii ne laali-yuoro kuhian ba s̄ii yire Lisias ku hosi a kenu loriko laa la teen. ⁸ U ne bula pi la nialin kala s̄ii bul P̄ool teen di la k̄o ŋ teen a bula piŋ wii-la si tii la bubul u teen.] Di ŋ ne piase baala deen, ŋ titia jan jin ari wialin kala la si bula a tigeu le ŋaa wutitii ne.” ⁹ N̄ii ne J̄uu tinŋaa ma s̄ii pe a bul di wii-la kala u si bula ŋaa wutitii ne.

P̄ool bul wiaa duu laa u titia kuoro Fiilis sipaan

¹⁰ N̄ii ne tinteen kuoro-la liisi P̄ool duu bul wii-la u ma si kene duu bul. N̄ii ne u bul, “Mi jima ari ŋ dii sariya tinteen deen le u jisin bolie. Mi tuon saa t̄oro mi si jan bul wiaa a laa mi titia ŋ sipaan. ¹¹ N̄ jan wuo piesa nii ŋ titia le ari bua-la le mi si ku mu Jerusalem di mi chuole Wia Wia-dia le, u bi tapulaa fii ari balia kii. ¹² J̄uu tinŋaa bimi naa di la di nuu-kala ken wii lilere Wia-dia le, mi bi taawei ma ŋaa Wii-chuole diisin le koo lee kala tan-la le. ¹³ Ba bira bi jan wuo dage ari wialin ba si si mi ŋaa chei ŋaa wutitiba ne. ¹⁴ Wii-la mi si jan bula piŋ ari u ŋaa wutitii ne n̄la: Ba wialin kala tuon mii to wonbii-la ba s̄ii chei ne. Wonbii-la mi s̄ii to, mi maa to la naabalimaba Wia ne. Mi ma ŋaa wialin kala Moosis si ŋmunsa bil di la to yarida, aa to tenni-la nialin s̄ii bul wiaa, Wia Din-zon-la dolun le si ŋmunsa kala maa. ¹⁵ Mi ma laa dii ari Wia jan chise ni-zonon ari ni-bonon kala suun le. Niaa deenba kala si chin n̄ii, ma laa wiaa deenba kala dii ne. ¹⁶ Mi yie wiwalime worun di mi tuobiinaa kala chesi Wia ari nuhobiinee kala sipaan. ¹⁷ Mi si lii Jerusalem le diene, a yi jisi ari jisi. Leele ne mi k̄o a ken moribin kaa k̄o di mi pi mi tinteen niaa an pe kpu pusun pi Wia. ¹⁸ N̄ii le ba nami Wia-dia le. Bua-la le ba s̄ii nami, di mi piise mi disinnin d̄ere. Ni-dan kala tuo mi teen. Mi bi taawei ma kala ŋaa. J̄uu

tinŋaa dŏnsun si lii Esia tinŋeen ma ne fa he dime. ¹⁹ Di ba ne fa ken wii-kala a tigemi le, u fa maga di ba titia ne kŏ daha a ku bul. ²⁰ Nii ma dee, len di niaa deenba si he daha bul wii-la ba si na di mi nŋaa chei bua-la le mi si chin nialin si yie honŏ vuvuure wiaa sipaan. ²¹ Wii-la dunŋa mi si nŋaa ne nla: Mi fa chin ba sipaan a faasa bula piba a bul, 'Jinin maa dii mi sariya a tin mi si laa dii ari ni-suunun jan sii suun le a ken miisin.' "

²² Fiilis si nii nŋii, u jin wonbii-la Pŏol sŏi to wiaa worun. Nii ne tii u bul di ba sii. Ka u bula piba a bul, "Má len di laali-yuoroo kuhian Lisias ne kŏ. Nii-na mi jan dii ma sariya." ²³ U nŋaa laali-yuoru kubala biben Pŏol, an bula pu duu kenu to an len duu nina wiese, duu pi u nanŋŏnsun wonbii di ba ku ninau di ba bubul wiaa. Duu ní che kun maa, di ba peu le.

Pŏol chin Fiilis ari Dusila sipaan

²⁴ U bi diene di Fiilis ken u haala kaa kŏ. U yirin ne Dusila. U fa nŋaa juu tiina ne. Nii ne Fiilis tima yire Pŏol duu kŏ. U sí kŏ, u nŋaa u bul wiaa pu u jijegili. U bul Yesu Kirisito wiaa pu a bula pu duu laa u wiaa dii. ²⁵ Ama Pŏol si mu bul wiaa a tige wuzŏnŋŏŏ nŋaanin le ari n si wuo ken n titia le, a bira bul tapulii-la Wia si jan dii dunia niaa sariya wiaa maa, fawullun ken Fiilis. Nii ne u bul duu mu, ka duu nina chinin u jan bira yiru. ²⁶ Nii kala le u faa biine ari Pŏol jan pu moribii. Nii wiaa ne tii u yie yiyiru tete tete ba yie bubul wiaa. ²⁷ Jisin balia si kiele, baal kubala baa yire Pŏokŏs Fesitis ne fa laa tinŋeen kuoro Fiilis lerin. Fiilis faa che di juu tinŋaa chou, nŋii ne tii u nŋaa ba ha ken Pŏol to dia.

25

Pŏol sul di ba kenu mu tinŋeen kuori-balin teen

¹ Fesitis si ku laa tinŋeen, u hon Sizariya le tapulaa batori an sii mu

Jerusalem. ² U si mu Jerusalem nŋii, nialin si kpu pusun pipi Wia kuhiasin ari juu tinŋaa kuhiasin ku bul wii-la Pŏol si nŋaa cheiba pu, an sulu ³ duu peba le a nŋaa di Pŏol kŏ Jerusalem. Ba vuura ne di ba cheme kpuu wonbii le. Nii ne tii ba bul nŋii. ⁴ Nii ne Fesitis bul di ba kenu to dia ne Sizariya tinŋeen le, duu sí lee-la lii, duu ma jan miira mu dime sisel. ⁵ Nii ne u bul di ba len di ba kuhiasin to u harin mu Sizariya, di u ne nŋaa wii cheiba le, di ba bul u teen dime duu nii.

⁶ Fesitis chua Jerusalem le ari tapulaa chori koo fi an-na miira mu Sizariya. U tan si pula, u mu hon sariya didillin an nŋaa ba ken Pŏol kaa kŏ. ⁷ Pŏol si kŏ, juu timmala si lii Jerusalem kŏ, ba ku gollu chu a bul di wialin Pŏol si cheye yuga ne siifese, ama ba bi wuo dage ari wialin ba si bula a tigeu le nŋaa wutitiiba. ⁸ Nii ne Pŏol ma bul wiaa duu laa u titia a bul, "Mi bi juu tinŋaa naabalimaba wonbii-la ba sŏi to wii-kala cheye, mi bira bi wii ma kala cheye a tige Wia-dia le koo Rom kuori-balin ma le." ⁹ Fesitis ma faa che di juu tinŋaa chou ne, nŋii ne u piесе Pŏol ari u jan cho duu mu Jerusalem duu dii u sariya dime a tin wiaa deenba ba si bula a tigeu le koo? ¹⁰ Nii ne Pŏol si, "Ai, mi jan cho di mi mu kuori-balin teen. U maga di u ne dii mi sariya. N titia jima worun ari mi bi wii nŋaa chei juu tinŋaa le. ¹¹ Di mi ne fa nŋaa wii chei a mage di ba kpumi, mi faa sei ne, ama di wialin kala ba sŏi bul nŋaa wunyarin ne, nuu-kala tuo duu wuo jonmi he ba nisin le di ba kpumi. Mii sulun di n len di mi mu kuori-balin teen duu ne dii mi sariya." ¹² Nii ne Fesitis ari u nihiasin vuure wiaa. Ka u bula pi Pŏol a bul, "Na n si n jan mu kuori-balin teen duu ne dii n sariya. N saa jan mu."

Pŏol chin Agiripa ari Beenis sipaan

13 U bi diene di kuoro kubala ba sii yire Agiripa ari u dihaala ba sii yire Beenis ko di ba chuole Fesitis Sizariya le. 14 Ba si mu dime tapulaa banmene, Fesitis bul Pool wiaa kala a piba a bul, "Baal kubala ne he daha. Fiilis ne fa kenu kaa to dia. U ha he dime. 15 Mi si mu Jerusalem, nialin si kpu pusun pipi Wia kuhiasin ari ba nihiasin Juu tinŋaa tuon ku bul wialin u si naa cheiba le, an bul di mi dii u sariya a jon cheerin pu. 16 Nii ne mi bula piba ari Rom tinŋaa bi sei di ba bul duu cheye ne an jon tiina he u dindonhoo nisin le, see di ba kala hono, di dono bul u wiaa, dono ma bul u wiaa. 17 Nii ne ba ko daha. Ba si ko, mi bi kaa dieni. U tan si pula, mi mu sariya didilin an naa ba ken baal-la kaa ko. 18 Nialin fa sii bul Pool teen sii chin a bul wialin Pool si naa chei. Mi fa biina di ba jan dage wu-bomo-la u si naa. Ama ba bi wuo dage. 19 Wii-la ba si bula ne naa wu-kaa-lerii ne ba kaa lere a mu tige ba Wii-chuolun le ari baal kubala si suba, baa yire Yesu. Pool yie bubul ari Yesu sii suun le a he u miisin le. 20 Mi fa bi jin nii mi si jan to a jin wiin deen tuon. Nii ne mi piесе Pool ari u jan sei a mu Jerusalem di ba dii u sariya dimee? 21 Pool bi seye. U sulmi di mi len di ba benu a kenu kaa mu kuori-balin teen di u dii u sariya. Nii ne mi naa ba bibenu. Mi ne ku na wonbiin, mi jan len di ba kenu mu kuori-balin teen di u dii u sariya." 22 Nii ne Agiripa bula pi Fesitis ari u titia cho duu ma nii baal-la niin ne. Nii ne Fesitis bula pu ari u chie jan nii u wu-bulun.

23 U tan si pula, Agiripa ari Beenis mu sariya didilin. Ba kpiere ba titia worun a mu juu dii-bal-la. Niaa zilba kinken. Ba di laali-yuoroo nihiasin ari ni-balaa tan-la le, ba kala ku juu a hon dono le. Ba kala si hon nii, Fesitis naa ba ken Pool ku juu. 24 Nii ne Fesitis bul, "Kuoro Agiripa, ma di nialin kala si he daha, ma na baala deen. U wiaa ne tii Juu

timma-la si he daha ari Juu timma-la si lii Jerusalem kala ku wiwalimemi. Baa naa gon a bul di u bi maga di u ken miisin. 25 Mi-na bi na ari u si naa wii-la chei a mage di ba kpuu. Ama u titia ne sulmi ari u jan mu kuori-balin teen duu dii u sariya. Mi saa jan len duu mu. 26 Ama mi paala bi chaasa jin wii-la kala mi si jan nmunsa pi kuori-balin a mu tigeu le. Nii ne tii mi kenu kaa ko ma teen di ma nii u wiaa. N-na kuoro Agiripa teen ne mi saa paala kenu kaa ko. Mi biina ari n ma ne juu wii-la tuon, n jan wuo na wii di mi wuo nmunse tenin pi kuori-balin. 27 U bi wonbii kene mi teen di mi ne len di ba ken dansarika kaa mu kuori-balin teen, an bi chaasa bul wii-la kala u si naa chei."

26

Pool bul wiaa duu laa u titia Agiripa sipaan

1 Nii ne Agiripa bula pi Pool a bul, "Wonbiin he dime di n bul wiaa a laa n titia." Nii ne Pool suomo bul wiaa a jijaake u nisaa a bul, 2 "Kuoro, mi jan bul di mi nyun sima jinin mi si jan wuo bul wiaa a laa mi titia n sipaan wiaa deenba kala le Juu tinŋaa sii bul mi teen, 3 bee wiaa n-na paala chaasa jin Juu tinŋaa kisinnin kala ne ari ba wu-kaa-lerin. Mi saa sulun di n ken kenyiri an jigile nii mi teen.

4 Juu tinŋaa kala jin mi fa si nage nii ne a suomi mi hanbiirin kala le. Mi fa yie he mi tinteen ari Jerusalem dunduna le ne a ku waa. 5 A lii bunbun kala a kaa ko mi faa to Farisii tinŋaa paati-la sii to wonbiiduo-la ne la Wii-chuolun le. Di ba ne seye, ba jan wuo bul ari ba jin nii niin le faafaa kala ne. 6 Ka leele ba len mi chin daha di ba dii mi sariya a tin mi sii yiele wii-la Wia si si u jan naa pi la naabalimaba. 7 La Iziral tinŋaa ta-gentisin fii ari balia-la, la kala yiele wiin deen ne, nii wiaa ne tii la fiесе siin a chuchuele Wia

wiiheye ari titanȚin kala nii. Mi sȚi yiele wiaa deenba ne tii, Juu tinȚaa bubul mi teenȚ nii, mi nyina. ⁸ Bɛɛ ne tii ma Juu tinȚaa bi wuo laa dii ari Wia janȚ wuo chise nialinȚ si suba, di ba bira sii suunȚ le?

⁹ Mi ma titia fa laa dii ari u maga di mi Țaa wii-la kala mi si wuo Țaa a chei Yesu si lii Nazaret yirinȚ. ¹⁰ Nii ne mi Țaa Jerusalem le. Mi laa dolunȚ nialinȚ si kpu pusunȚ pipi Wia nihiasinȚ teenȚ, anȚ kenȚ Wia niaa yuge a to dia. Di ba ne si di ba kpuba maa, mi yie sei ne, ka ba kpuba. ¹¹ Mi vene dɔgisɛba yuge Wii-chuɔle diisinȚ kala le, aa walime di ba bul ari ba bi Yesu jinȚ anȚ via u wonȚbii-la. Mi baaninȚ sii kinȚkenȚ ba nyunȚ. Mi paala mu tasinȚ dɔȚsunȚ si tuo Juu tinȚteenȚ le, a to ba naasinȚ a dɔgisɛba dime.

Pɔɔl to nii u si Țaa a ku laa Yesu wiaa dii

¹² WiinȚ deenȚ wiaa ne tii mi sii mu Damaasikas. NialinȚ si kpu pusunȚ pipi Wia kuhiasinȚ tinȚmi a pimi dolunȚ. ¹³ Mi sȚi mu wonȚbiinȚ le mi nyina, ari wiihei-siesee mi na pulumunȚ duu lii wia nyunȚ a chaana he la di nialinȚ fa sȚi venȚ le. U pulla kii wii-pɔsunȚ. ¹⁴ La kala tuu tel tinȚteenȚ. Ka mi nii nuu yiikoro duu bula pimi Hiiburu yiikoro le a bul, ‘Sɔɔl, Sɔɔl, bɛɛ ne tii Ț to mi naasinȚ a dudɔgisɛmi Țla? Ț nage neenȚ ne ba si vɔbɔ anȚ ȚmunȚmoo duu venȚ. U bi sei duu venȚ anȚ dudɔgise u titia ne.’ ¹⁵ Nii ne mi piɛɛɛ, ‘Kubɛɛ ne, Tiina?’ Nii ne Tiina bul, ‘Mi ne Țaa Yesu, nii-la Ț si to naasinȚ a dudɔgise. ¹⁶ Ama sii chinȚ. Mi kenȚ mi titia ku daganȚ di mi liisinȚ di Ț tinȚ tinȚinȚaa pimi ne, a Țaa mi siada tiina, a bula pi niaa Ț si nami nii jinȚinȚ, ari nii Ț si janȚ bira nami maachie. ¹⁷ Mi janȚ timinȚ di Ț mu Iziral tinȚaa teenȚ ari nialinȚ si bi Juu timma Țaa kala teenȚ. Di ba nii waliminȚ, mi janȚ laanȚ ta ba nisinȚ le. ¹⁸ Mi janȚ timinȚ di Ț mu Țaa di ba siaa suri, a kenȚba di ba birima lii biriminȚ tuɔȚ a ku juu pulumunȚ tuɔȚ, a Țaa di ba lii Sitaani nisinȚ le a

ko Wia teenȚ. Di ba ne Țaa nii anȚ laa mi wiaa dii, Wia janȚ jonȚ ba haacheba cheba. Ba janȚ wuo na lerinȚ Wia si tuɔsa nialinȚ tuɔȚ.’

Pɔɔl to u tinȚinȚaa naasinȚ

¹⁹ Nii wiaa kuoro, mi bi yiikori-la si lii wia nyunȚ wiaa via. ²⁰ Nii ne mi suomo bul Wia wiaa Damaasikas le ari Jerusalem le a kaa mu Judiya tinȚteenȚ kala, ari nialinȚ si bi Juu timma Țaa tuɔȚ. Mi bula piba di ba birima lii ba haacheba le anȚ birima to Wia, anȚ ȚinȚaa wialinȚ si janȚ dage ari ba birima lii ba haacheba le ne. ²¹ WiinȚ deenȚ wiaa ne tii Juu tinȚaa kenȚmi Wia-dia le aa che di ba kpumi. ²² Ama ari jinȚinȚ kala Wia haa pemi le ne, nii ne tii mi chinȚ daha aa bul wiaa deenȚba kala mi si Țaa siada a pima, ma ni-balaa ari ma ni-biisinȚ kala. WiinȚ deenȚ mi sȚi bul, u titia ne nialinȚ fa sȚi bul wiaa, Wia DinȚ-zɔȚ-la dolunȚ le ari Moosis kala fa bul ari wii-la janȚ Țaa. ²³ Ba fa bula ari Kirisito janȚ na heɛȚ a suu, a laa sipaanȚ a sii suunȚ le nialinȚ si suba kala tuɔȚ. Ba bira bula pi Juu tinȚaa ari nialinȚ si bi Juu tinȚaa ma Țaa ba si janȚ Țaa nii a na pulumunȚ.”

²⁴ Pɔɔl si bul wiaa duu laa u titia nii, Fɛsitis kpiau le a bula pu a bul, “Pɔɔl, ȚȚ nyaase ne. Ț wu-jinȚ kinȚkenȚ kinȚkenȚ keninȚ nyinyaase ne.” ²⁵ Nii ne Pɔɔl bul, “Mi bi nyaase mi nyina. Wutitii ne mii bul. Mi siaa kala ne fiela. ²⁶ Kuoro Agiripa, Ț jinȚ wiaa deenȚba kala ne. Nii ne tii mi wuo bubulba ari nyu-duonȚ. Mi jima ari wiaa deenȚba kunȚ-kala tuo Ț si bi jinȚ. Wiaa deenȚba kala si Țaa, ba bi wu-faalia Țaa. ²⁷ Kuoro, Ț laa nialinȚ sȚi bul wiaa, Wia DinȚ-zɔȚ-la dolunȚ le wiaa dii neɛ? Mi jima Ț laa dii ne.” ²⁸ Nii ne kuoro Agiripa piɛɛɛ Pɔɔl a bul, “Ț biina leɛle-bie deenȚ Ț janȚ wuo lenȚ di mi laa Yesu wiaa dii a tutou koo?” ²⁹ Nii ne Pɔɔl bul, “U Țaa leɛle-bie koo u bi leɛle-bie Țaa, mii chuɔle Wia ne di ma di ni-kaana-la kala sȚi jegile nii mi teenȚ jinȚinȚ deenȚ, di ma ku nagemi ari mi si

laa Yesu wiaa dii nii. Ama mi b́ che di ma nagemi ari ba si kenmi v̄o ari chorum̄o ɲla.”

³⁰ P̄oɔl si bul wiaa deenba d̄ere, nii ne tin̄teen kuoro ari nii-la si chin̄ kuori-balin̄ nyun̄ ari B̄eenis ari nialin̄ kala fa si h̄on̄o, ba sii di ba viiri. ³¹ Ba si lii di-jalin̄ nii, ba bula pipi d̄on̄o a bul, “Baala deen̄ bi wii-kala cheye a mage di ba kpuu koo di ba k̄enu t̄o dia.” ³² Nii ne Agiripa bula pi F̄esitis a bul, “Di baala deen̄ fa bi won̄biin̄ sula ari u jan̄ mu kuori-balin̄ teen̄ duu dii u sariya, mi fa jan̄ bul di ɲ jon̄u ta.”

27

P̄oɔl juu liin̄ daboro a duoro mu Rom

¹ Nii ne ba vuure di la juu liin̄ daboro a mu Itali. Ba jon̄ P̄oɔl he laali-yuoroo kuhian̄ kubala nisin̄ le a pe dansarikaba d̄on̄sun̄ le. U lii Rom ne a fa ɲaa kuhian̄ Rom kuori-balin̄ laali-yuoroo tuon̄. Baa yiru Julias. ² La mu juu liin̄ daboro si lii tan̄ kubala baa yire Adamiitam a ɲaa siri duu mu tasi-la si he mugi-balin̄ niin̄ Esia tin̄teen le. Baal kubala baa yire Arisitaakis ma fa he la tuon̄ ne. U fa ɲaa Masidoonia tiina ne a lii Tesalonaaka. La si mu nii, ³ u tan̄ si pula la mu yi tan̄ kubala baa yire Saadon̄. Julias fa ken̄ zile P̄oɔl teen̄ a pu won̄biin̄ duu mu na u nan̄d̄on̄sun̄, di u n̄ii che kun̄ maa, di ba peu le. ⁴ La bira sii dime. La s̄ii mu, di pelin̄ lu lii lee-la la fa si chaasa. La miira mu to tin̄teen kubala liin̄ si gollo chu, baa yire Saap̄os. La to seme-la si k̄ere pelin̄. ⁵ La k̄ere to Siliisia ari Pan̄filia tin̄teen niin̄, a mu yi lee kubala baa yire Maara. U fa he Laasa tin̄teen ne. ⁶ Dime ne laali-yuoroo kuhian̄-la na liin̄ daboro d̄on̄o duu lii Alekizand̄ia aa mu Itali. U ɲaa la juu. ⁷ La fiela duori nii deen̄ deen̄ tapulaa ban̄mene a na heen̄ kin̄ken̄, an̄ sis̄ele ku kpage tan̄ kubala baa yire Sinaadas. Pel-la bi seye di la

to dime. Nii ne la bira k̄ere to tin̄teen kubala liin̄ si gollo chu, baa yire Kiriiti, a ku yi lee kubala baa yire Salimooni. La k̄ere to tin̄tee-la seme-la si k̄ere pelin̄. ⁸ La si k̄ere to lii-la niin̄ nii, la na heen̄ worun̄ an̄-na ku yi lee kubala baa yire F̄ee Heevin̄s. U fa kpage tan̄ kubala baa yire Lasiya.

⁹ La h̄on̄ dime a dieni, Juu tin̄ɲaa tapul-bal-la ba si yie kpu pusun̄ pi Wia, duu jon̄ ba haacheba cheba, ku kieli. Bua-la le liin̄ duoron̄ yie hei ne. Nii ne P̄oɔl bul wiin̄ deen̄ chagileba a bul, ¹⁰ “Mi naan̄biirin̄, mi na ari la won̄bii-la venin̄ jan̄ kperila. Má len̄ di la h̄on̄ daha. Di la ne si la mu, la liin̄ daboro ari la chugusun̄ jan̄ chei, la d̄on̄sun̄ ma jan̄ suu.” ¹¹ Ama laali-yuoroo kuhian̄-la fa bi P̄oɔl teen̄ jegile nii, an̄ jegilee nii liin̄ daboro-la kuhian̄ ari liin̄ daboro-la tiina teen̄. ¹² Ba si lee-la bi z̄on̄ ari ba si jan̄ he dime yibiinin̄ le. Ba tuon̄ jesin̄ kala fa cho di ba juu liin̄ daboro-la, a wiwalime di ba ne wuolo, di ba mu yi tan̄ kubala baa yire Fiinis a he dime yibiinin̄. Fiinis ne fa ɲaa lee-la liin̄ daborusun̄ si yie chin̄ a he Kiriiti tin̄teen. U fa he tan̄ seme ari tan̄ bubuon̄ pege, a bira pin̄ tan̄ seme ari tan̄ nyun̄ pege maa a k̄ere pelin̄.

Lii-pelin̄ lu mugi-balin̄ le

¹³ Nii ne pelin̄ fiela lu a lii tan̄ bubuon̄ a kuko. Nialin̄ biina ari ba jan̄ na won̄biin̄ a ven̄ ari ba fa si biina nii ba tuon̄ le. Nii ne ba ken̄ h̄oo-bal-la ba si yie kaa chage liin̄ daboro-la a kaa liise a he liin̄ daboro-la tuon̄, an̄ duoro k̄ere to Kiriiti tin̄teen niin̄ nii. ¹⁴ U bi diene di peli-duon̄ faasa lu a lii tan̄ nyun̄ ari wii-p̄osun̄ pege. U lii tin̄teen liin̄ si gollo chu ne a kuko. ¹⁵ U ku ɲmoo liin̄ daboro-la, la bi pel-la wuo chaase. La bi wii-kala wuo ɲaa. Nii wiaa la len̄ pel-la ken̄ liin̄ daboro-la mu lee-la u si lu mumu. ¹⁶ Nii ne la to lee kubala liin̄ si gollo chu baa yire Kaada, a to u tan̄

semɛ. U kerɛ pel-la mua. Dime la na heɛɛ woruɲ aɲ-na wuo keɲ liiɲ dabori-bie-la la fa si joɲo vɔɔ liiɲ daboro-la hariɲ. ¹⁷ Ba lɛrɛ liiɲ dabori-bie-la ku juu liiɲ daboro-la tuɔɲ a keɲ ɲmɛsiɲ vɔbu, aɲ vɔɔ liiɲ daboro-la kala kpaɲ kpaɲ. Fawulluɲ fa keɲba ari ba jaɲ vene mu juu hagili-buɲbugulo-la tuɔɲ si golli Liibia tinteenɲ a pɛ dime. Nii nɛ ba keɲ gɛnni-la ba fa si joɲo vɔɔ liiɲ daboro-la nyuɲ di peliɲ kaa venɲ a kaa ta ba suusa tuu, aɲ leɲ pel-la keɲ liiɲ daboro-la aa venɲ. ¹⁸ Pel-la faasa lu ɲii nɛ deɛɛ deɛɛ. Taɲ si pula ba suomo chaare chugusu-la si he liiɲ daboro-la tuɔɲ a yuo tita. ¹⁹ Taɲ si pula, la titia chaare liiɲ daboro-la kiaa ba si kaa wase liiɲ daboro-la dɔɲsuɲ a yuo ta. ²⁰ La tapulaa yuga wia si bi pɔsɔ, cheɲwulaa ma bi lia. Ka pel-la ha faasa lu kiɲkeɲ. Pel-la si faasa lu ɲii, la bira bi yiɛla ari la jaɲ keɲ miisiɲ.

²¹ Nialiɲ diene ba bi kiaa die. Ba si diene ba bi kiaa die ɲii, Pɔɔl sii chinɲ ba sipaanɲ a bula piba a bul, “Mi naanɲiiriɲ, u fa maga di ma jegile nii mi teenɲ. Di ma nɛ fa jegile nii mi teenɲ, la nɛ fa bi Kiriiti le lia, la kiaa deɛɛba kala si cheye, ba fa bi chei. Kialiɲ kala si lele ma fa bi lel. ²² Ama mii sulma, má nyire bɔye. Liɲ daboro dunduɲa nɛ jaɲ lel, ama ma kuɲ-kala bi jaɲ suu. ²³ Wia-la si tiimi, mi maa chuɔlu. U tinɲdaara dia kɔ mi teenɲ titaɲiɲ ²⁴ a bula pimi a bul, ‘Pɔɔl, sí fawulluɲ fá. N jaɲ mu chinɲ kuori-baliɲ sipaanɲ. Wia tinɲ ɲ wiaa nɛ a leɲ ma di nialiɲ kala si he liiɲ daboro tuɔɲ, ma kala jaɲ keɲ miisiɲ.’ ²⁵ Nii wiaa, mi naanɲiiriɲ, má nyire bɔye. Mi ɲaa Wia yarida ari wii-la kala u si bula, u jaɲ chaasa ɲaa. ²⁶ Ama la ta jaɲ mu chinɲ dunduoli-bie kubala le nɛ liiɲ si gollo chu.”

²⁷ Pel-la keɲla kaa venɲ ɲii nɛ tapulaa fii ari banese mugi-bal-la ba sí yire Adira tuɔɲ. U titaɲ-la ari tita-siesee nialiɲ sí duori liiɲ daboro-la, ba biine ari baa mu dunduoli niɲ

nɛ. ²⁸ Nii nɛ ba joɲ kuɲ he lii-la le di ba magise a na u lunuɲ. Ba na duu lunje a mage naakieliɲ mahiɲ balia. Muapilii ba bira magise a na duu ɲaa naakieliɲ mara ari fii. ²⁹ Fawulluɲ fa keɲba ari ba jaɲ mu ɲmoo buɲ. Nii nɛ ba chaare hoɔnu-la ba si yie kaa chichage liiɲ daboro-la a kikii. Ba banese nɛ ba chaare liiɲ daboro-la hariɲ a chagu kii, aɲ susul Wia di taɲ-pul di ba na pulumuɲ. ³⁰ Nii nɛ nialiɲ fa sí duori liiɲ daboro-la lii a chiche di ba fá, aɲ ka liiɲ daboro-la ari ni-kaanaa. Ba liise liiɲ dabori-bie-la a he liiɲ tuɔɲ, a fufugi ari baa che di ba lii liise hoɔ-la basi kaa chichage liiɲ daboro-la sipaanɲ nɛ. ³¹ Nii nɛ Pɔɔl jiɲ a bula pi laali-yuoroo kuhianɲ-la ari laali-yuoro-la a bul, “Ma bi jaɲ keɲ miisiɲ, see nialiɲ sí duori liiɲ daboro-la he liiɲ daboro tuɔɲ.” ³² Pɔɔl si bul ɲii, laali-yuoro-la keri ɲmɛsi-la ba fa si kaa vɔɔ liiɲ dabori-bie-la, a leɲ liiɲ joɲo viiri.

³³ Taɲ si kpage puluɲ, Pɔɔl sul nialiɲ kala si he liiɲ daboro-la tuɔɲ di ba dii kiaa a bul, “Tapulaa fii ari banese nɛ ɲla ma sí gberɛ wii-la si jaɲ ɲaama. Ma bi kuɲ-kala die. ³⁴ Nii wiaa mii sulma di ma dii kiaa. Di ma nɛ dii kiaa, ma jaɲ keɲ doloɲ a wuo laa ma titia a keɲ miisiɲ. Ma kuɲ nyu-puɲ ma bi jaɲ wii.” ³⁵ Pɔɔl si bul ɲii dere, u joɲ boroboro, a chuɔle Wia ba kala sipaanɲ, aɲ choɲe didii. ³⁶ Ba nyire bɔye, ba kuɲ-kala ma dii kudiilee. ³⁷ La nialiɲ kala fa si he liiɲ daboro-la tuɔɲ fa ɲaa zɔ-balia ari mahiɲ batori ari fii ari balidu nɛ. ³⁸ Ba kala si dii kiaa vɔge, ba chaare mia-la fa si he liiɲ daboro-la le a ta, di liiɲ daboro-la sí faasa yuɲ.

Liɲ daboro ka chei nɛ

³⁹ Taɲ si pula, nialiɲ sí duori liiɲ daboro-la bi wuo jiɲ di ba yi dunduoli-la niɲ nɛ, ka ba yi. Ba na di tinteenɲ nɛ golli lii-la chu, lii-la bi jal. Lee-la kala taale. Ba biina ba jaɲ wuo keɲ liiɲ daboro-la a lii lii-la niɲ. ⁴⁰ Nii nɛ ba keri hoɔ-bala-la

ba fa si yie kaa chichage liiŋ daboro-la a lo he liiŋ le. Ba keŋ ŋmeŋ-la ma puri ba si kaa voo danyine-la ba fa si kaa kukuosi liiŋ, a didage liiŋ daboro-la wonŋbiinŋ. Ba bira wasa keŋ genni-la maa ba si kaa voo liiŋ daboro-la sipaanŋ, di peliŋ keŋ liiŋ daboro-la vivenŋ. Ba wasa kaa ta ba jil a voo, di peliŋ kaa vene mu lii-la niinŋ. ⁴¹ Ama liiŋ daboro-la fá mu juu hagili-bunŋbugulo tuoŋ fuo-balaa balia si ku cheŋ doŋo a kuro bil. Daboro-la sipaanŋ muure, u bi wuo venŋ, aŋ ka pel-bal-la ŋaa lii-peliŋ ku ŋmoo liiŋ daboro-la, a ŋaa u hariŋ kala bori. ⁴² Nii ne laali-yuoro-la vuure di ba kpu dansarikabala kala, di ba kuŋ-kala sí wuo lii a duori lii-la a fá lel. ⁴³ Ka laali-yuoro kuhiŋ-la faa che duu laa Pool ta, nii ne u bula piba di ba sí nii ŋaa. U ta bula piba ari nialiŋ kala sí jiiŋ liiŋ a he liiŋ daboro-la tuoŋ, di ba laa sipaanŋ fula tuu a duoro mu lii-la niinŋ, ⁴⁴ aŋ ka di ni-kaana-la ma tuu, di doŋsunŋ paa daa-borusunŋ, di doŋsunŋ ma paa liiŋ daboro-la dabori-yerie-la, a ma kaa duori liiŋ lii. Nla ne la kala ŋaa a lii lii-la niinŋ.

28

Pool he Malita le

¹ La si lii liiŋ niinŋ a laa la miisinŋ nii, la na ari tinŋteenŋ ne liiŋ gollo chu nii. Nialiŋ si he lee-la bula pila ari tinŋtee-la yirinŋ ne Malita. ² Nialiŋ keŋla woruŋ lee-la, a pela le kinŋkeŋ. La si he dime nii, duonunŋ suomo ninii. Leriŋ fiela woruŋ. Ba he nyininŋ pila la wiwieni. ³ Pool mu jaa daasiŋ a kaa ku he nyininŋ le, di dimiŋ he daasi-la le. Wulimiŋ keŋ diŋ-la u ku lii a dima pe Pool nisiŋ le. ⁴ Nialiŋ si he lee-la na di diŋ-la dima pe Pool nisiŋ le nii. Ba bula pipi doŋo a bul, “U naga baala deenŋ ka kpu niaa ne. U wuo lii liiŋ tuoŋ a keŋ miisinŋ, ama Wia bi seye duu keŋ miisinŋ.” ⁵ Nii ne Pool keŋ diŋ-la kpesi u tel nyinŋ-la tuoŋ, ama diŋ-la

si dimu nii, u buu wii-kala ŋaa. ⁶ Ba faa gberere diŋ-la si diŋ Pool nii duu ŋmerere, koo duu guu tele suu, di ba na. Ba gberere a dieni. Ba si gberere a dieni nii, ba bi na ari wii-kala ŋaa le. Ba keŋ ba tuoŋbiinaa birime a bul duu ŋaa vene ne.

⁷ Tinŋtee-la kuoro yirinŋ ne fa Pubilias. U bagisiŋ ma fa kpage lee-la ne. U keŋla kaa mu u leriŋ, a keŋla woruŋ tapulaa batori. ⁸ Kuoro-la nyimma faa wiile ne a piŋ dia le. U yaraa fa lima ne, aŋ ka u ninigile. Nii ne Pool juu nau u dia le a joŋ u nisiŋ danu le a chuole Wia pu, u duori. ⁹ Pool fa si ŋaa nii, puwuolo-la kala fa si he lee-la ko Pool teenŋ. U ŋaa ba duori. ¹⁰ Ba pila choŋgitaba yuge. Bua-la le la síi che di la sii juu liiŋ daboro a duoro viiri, ba joŋ kialiŋ kala la síi che a he liiŋ daboro-la le di la kaa joŋ wonŋbiinŋ.

Pool lii Malita le a mu Rom tinŋteenŋ

¹¹ La he dime cheŋsiŋ batori ne aŋ sii juu liiŋ daboro a lii Alekizandia. Liinŋ daboro-la yirinŋ ne venŋ-daaliŋeriŋ. Yibiiniŋ fa si suomo, ba fa voo liiŋ daboro-la a bil ne liiŋ niinŋ. ¹² La síi mu nii, la mu yi taŋ kubala baa yire Sirakas, a chua dime tapulaa batori. ¹³ La bira lii dime a juu liiŋ daboro, a duoro mu taŋ kubala baa yire Riigiam. U taŋ si pula, peliŋ bira suomo lu a lii taŋ bubuoŋ. U tapulaa balia cheŋ ne la ku yi taŋ kubala baa yire Putooli. ¹⁴ La na nialiŋ doŋsunŋ si laa Yesu wiaa dii dime. Ba si, di la chua ba teenŋ tapulaa balipe. La chua. Nii ne la bira lii dime a mumu Rom. ¹⁵ La naanŋbiiri-la si laa Yesu wiaa dii Rom le nii la wiaa ari laa ko ne. Ba ku cheŋla di-bolii. Ba doŋsunŋ cheŋla lee kubala baa yire Apias Yobo. Doŋsunŋ ma cheŋla lee-la ba síi yire Diisiŋ batori Nuhuoroa síi chua dime. Pool si naba, u lolle Wia aŋ nyire u boye.

Pool he Rom le

¹⁶ La si yi Rom, ba pi PŌol wonŋbiin duu juuu u dunŋduŋa dia, ka ba ŋaa laali-yuoro kubala bibenu. ¹⁷ U tapu-laa batori cheŋ PŌol yire Juu tinŋaa kuhiasin tan-la le ba ku hilimi. Ba si ku hilimi ŋii, u bula piba a bul, “Mi naanŋbiirin, mi bi wii-kala ŋaa chei la niaa le, mi bi la naabalimaba kisinnin ma cheye. Ama ba keŋmi a to dia Jerusalem le, aŋ bira jonŋmi a he Rom tinŋaa nisin le ŋla. ¹⁸ Ba piesemi a na ari mi bi wii-kala cheye a mage di ba kpumi. Nii ne tii ba chiche di ba jonŋmi ta. ¹⁹ Ama Juu tinŋaa bi seye di ba jonŋmi ta, ŋii ne fugemi mi sul wonŋbiin di ba keŋmi kaa ko kuori-balin teen duu dii mi sariya. Ama mi-na bi wu-bon kala keŋe di mi bul a mu tige mi niaa Juu tinŋaa le. Ba ne fugemi mi ko kuori-balin teen. ²⁰ Nla ne tii mi si mi jan nama di la bul wiaa. Ba keŋ chorumoo deŋba vooŋmi a tin nii-la wiaa ma Iziral tinŋaa sii yiele ari u jan ko le ne.” ²¹ PŌol si bul ŋii, ba bula pu a bul, “La bi ten kala laa a lii Judiya a mu tige ŋ le. La naanŋbiirin kubala ma bi lee-la lii ko a ku bul wu-bon a tige ŋ le. ²² Ama la jima ari lee-na kala niaa yie bubul wu-bonŋoo a mu tige paati-la ŋ sii to ne. Nii ne tii la chiche di la nii wialin ŋ si laa dii.”

²³ Nii ne ba he tapulun pi PŌol. Tapulii-la si yie, niaa yuga a ko lee-la PŌol sii juu. PŌol bul Wia kuorii-la wiaa a pipiba siifesiŋ a lii chichuon kala a kaa mumu didaanin. U karime wialin Moosis fa si ŋmuŋsa bil di niaa tuto, ari nialin fa sii bul wiaa, Wia Din-zon-la dolun le fa si ŋmuŋsa bil Wia tenin tuon. U dageba ŋii a bul Yesu wiaa piba, a wiwalime di ba laa Yesu wiaa dii. ²⁴ Nialin si nii wialin u si bula, ba donsun laa dii, donsun ma bi laa dii. ²⁵ Wiaa deŋba ne PŌol bul, ka ba keŋ wiaa lere dono le a sii viiri. U bula piba a bul, “Wialin Wia Din-zon-la si to Azaaya le ŋii a ŋaa u bula pi ma naabalimaba, ba ŋaa wutitii. Azaaya fa ŋaa nii-la fa sii bul wiaa

u dolun le ne. ²⁶ U fa bula a bul, ‘Mu niaa deŋba teen a bula piba a bul,

Ma jan jegile nii wiaa aŋ bi ba bubuon jin.

Ma jan chaare ma siaa kala aŋ bi kuŋ-kala jan na,

²⁷ be wiaa niaa deŋba nyun dolie, ba to ba digilaa di ba si wii nii. Ba keŋ ba siaa ma to di ba si kuŋ-kala na.

Wia si, di nii dee ba siaa fa jan nina, ba digilaa ma fa jan ninii wiaa.

Ba nyusun ma fa jan jijin wiaa bubuosa.

Ba fa jan birima tomi di mi ŋaa di ba duori.’ ”

²⁸ Nii ne PŌol bira bula piba a bul, “U maga di ma jin ari baa bul Wia wuzomola si laa niaa tita a pi nialin si bi Juu tinŋaa ŋaa ne. Ba jan jegile nii.” ²⁹ PŌol si bul wiaa deŋba dere, Juu timma-la keŋ wialin lilere dono le siifesiŋ, a sii viiri.

³⁰ PŌol hon Rom le jisin balia, a yoo u dia u titia le a juuu. Nuu-na kala si ko duu nau, u yie kenu worun ne.

³¹ U bul Wia kuorii-la wiaa a pi niaa, a dage la Tiina Yesu Kirisito ma wiaa ari nyu-duon. Nuu-kala buu to ari u si ŋii ŋaa.

buu zil ari u ŋaa Wia. Ba buu ka lolle. Ba tuɔbiinaa kala birima ne ba ŋɔŋaa wu-liilin. Ba tuɔbiin-lorunu-la kenba kaa mu he birimin tuɔŋ. ²² Ba to ba yaarin le a bul ari ba ken wu-jimin ne. ²³ U fa maga di ba chuchuoɔle Wia-la si ken yirin an bi suu. Ka ba via an miira me kiaa si nage nuhuobiinee a susuu, a bira me kialin si nage diibiisin ari pusun ari kialin sii tuuri tinteen, a chuchuoɔle.

²⁴ Nii wiaa Wia jonba ta ba tuto ba titia tuɔbiin-lorunu-la ba sii cho, a ŋɔŋaa wu-liilin doŋo le. ²⁵ Wutitii-la ba si jima a tige Wia le, ba jonu lenni wu-nyiarin, a miira chuchuoɔle kialin u si ŋaa, an via di ba chuchuoɔle Nii-la si ŋaaba. U maga di la didennu a kaa mu wuu. Ami.

²⁶ A tin nii wiaa, Wia jonba ta ne di baa ŋaa wu-liilin a hihise ba titia. Haalaa ma via di ba di ba balaba pipin, an pipin ba ha-donsun teen.

²⁷ Nii titia ne baalaa ma via di ba jaa haalaa ari Wia si si ba ŋaa nii, an miira ken ba ba-donsun pipin a hihiene doŋo, a ŋɔŋaa hiisi wiaa doŋo le. Ba sii ŋaa nii, baa dogise ba titia ne nii. Dogisunu-la mage ba yaraa le.

²⁸ Niaa deenba bi sei di ba jin Wia. Nii ne tii Wia lenba ta ba tuto ba tuɔbiin-bonono-la harin a ŋɔŋaa wialin si bi maga di baa ŋaa. ²⁹ Baa ŋaa wu-bon yiri-yiri-na kala ne. Ba ken niaa kiaa lilaa, aa ŋaa wu-lorunun, a ken yaribierin, a kpukpu niaa, a yuyuo yuosun, a gigirime niaa, a ŋaa wiaa juuu niaa le, a bubul niaa wiaa. ³⁰ Ba ŋaa yiri-cheeree ma ne, a bere Wia, a ŋaa nii-jigi timma. Ba maa dage ba titia a bibigisi ba titia le. Ba yie chiche wonbii-la ba si jan to a ŋaa wu-bonono. Ba bi ba nyimmaba ari ba naanba niin ka to. ³¹ Ba bi wu-jimin kene, a bi wutitii ma kene. Ba bi niaa cho, a bi doŋo ma nennige ka fa.

³² Ba jin wialin Wia si bula a tige wu-ŋaalaa deenba le ne. U bula ari nialin sii ŋaa wiaa deenba, ba

maga di ba suu ne, an ka ba via an ŋɔŋaa. Nii ma dundun de. Ba paala bibese nialin ma sii ŋaa wialin le ne.

2

Wia sariya che-diilin

¹ Ma bi worun ka ŋaa ma si jon cheerin pipi ma donsun tinŋaa, ka ma nialin sii bul niaa teen a bul di ba cheye ne, ma ŋɔŋaa wu-bomola titia. Nii-la-na kala ma si ŋaa, di ma nii ŋaa wu-bomola, ma bira bi wii-kala kene di ma bul. Ma sii ŋaa nii, ma titia laa cheerin ne nii le. ² Wia si jon cheerin pi ma nialin sii ŋaa wu-bonono deenba, la jima ari u ken wutitii ne. ³ Ama ma-na si jon cheerin pi niaa an ŋɔŋaa wu-bonono deenba ma titia le, ma biina ari ma jan wuo fa lel Wia nisin le duu si ma sariya dii koo? ⁴ Wia si ken zile kinken a ken kenyiri nii, ma bene ari u bi kun ŋaa? Ma bi jin ari Wia si ken zile nii, duu che di ma birima lii ma haacheba le ne? ⁵ Ma tuon dolie. Ma via di ma birima lii ma haacheba le. Ma wasa ŋaa Wia baanin faasa sisii ne. Tapulii-la u si jan dii dunia niaa sariya, u jan dii sariya ari wutitii di niaa na. Bua-la le u baanin jan sii ma nyun kinken kinken. ⁶ U jan tin nuu-kala u time a mage nii u si tin u tinŋaa mage. ⁷ Nialin si ken kenyiri aa ŋaa wu-zonono, a ŋaa nii a chiche di ba na pulumun a laa yirin Wia sipaan, a chiche miisila si bi dere, Wia jan jon piba. ⁸ Ama nialin sii to ba titia tuoturun le an via wutitii-la, an tuto wu-bonono ŋaanin le, Wia jan na baanin ba nyun kinken di ba na heen. ⁹ Nuuna kala sii ŋaa wu-bonono, heen jan kenu. Hee-la jan laa sipaan ken juu tinŋaa ne, an-na ku ken nialin si bi juu tinŋaa ŋaa maa. ¹⁰ Ama nuuna kala sii ŋaa wu-zonono, u jan na pulumun Wia sipaan, a laa yirin, a hon ari yarifiɔlaa, juu tinŋaa ne jan laa sipaan, an ka nialin si bi juu

tinŋaa ŋaa tuto, ¹¹ beɛ wiaa Wia bi niaa kaa pɔɛ.

¹² Wiaa ne Moosis fa ŋmunsa bil di niaa tuto. Nialin si biba jin an ŋɔŋaa wu-bɔŋŋɔɔ, ba jan suu. Di ba ne suba, wialin dee Wia jan kaa dii ba sariya. Nialin ma si jin wialin Moosis si ŋmunsa bil di niaa tuto an ŋɔŋaa wu-bɔŋŋɔɔ, di ba ma ne suba, Wia jan to wialin le ne a dii ba sariya. ¹³ Nialin si nii wialin Moosis si ŋmunsa bil di niaa tuto, u nii bi jan ŋaa di ba keŋ tuɔ-pula Wia teen. Ama nialin sii to wialin Moosis si ŋmunsa bil di niaa tuto, ba ne jan keŋ tuɔ-pula Wia sipaan. ¹⁴ Nialin si bi Juu tinŋaa ŋaa, ba bi wialin Moosis si ŋmunsa bil di niaa tuto jin. Ama di ba tuɔbiinaa ne daga di ba ŋaa wialin titia Moosis fa si daga di niaa tuto, ba bil niin ne nii ba titia le, ari ba si bi wialin Moosis si ŋmunsa bil di niaa tuto jin kala. ¹⁵ Nii daga ari wialin Moosis fa si ŋmunsa bil di niaa tuto, ba he ba tuɔbiinaa tuɔŋ ne. Ba tuɔbiinaa ne dage nii. Di ba ne cheye, ba tuɔbiinaa yie dageba ne. Di ba ne bira bi cheye maa, ba tuɔbiinaa bira yie dageba ne. ¹⁶ U jan nage nii tapulii-la Wia si jan dii niaa sariya. Ba dage nii ne Wia wuzomɔ-la tuɔŋ mi si bula pima. Chɛ-la Wia jan keŋ wialin niaa si kaa faa a kaa ku lii pulumun tuɔŋ, a to Yesu Kirisito le a dii ba sariya.

Juu tinŋaa ne jin wialin Moosis fa si ŋmunsa bil di niaa tuto

¹⁷ Ka ŋ-na nii-la si keŋ ŋ titia yiyire Juu tiina a jijegili wialin Moosis fa si ŋmunsa bil di niaa tuto, a bibigisi ŋ titia le ari ŋ jin Wia ne, ¹⁸ ŋ jin wii-la Wia si cho di ŋ ŋɔŋaa ne. Ba dagin wialin Moosis si ŋmunsa bil ne, nii ne tii ŋ jan wuo jin wii-la si zomɔ. ¹⁹ N jima ari ŋ ne ŋaa nyulimaa daa-kenne a wuo pipi nialin ma si he birimin tuɔŋ pulumun. ²⁰ N ne ŋaa nii-la sii dage nialin si bi wiaa jin, aa dage hanbiisin maa. Wialin Moosis si ŋmunsa bil di niaa tuto ŋaa ŋ keŋ wu-jimin ne a jin wutitii.

²¹ N-na nii-la sii dage niaa, ŋ bi ŋ titia ka dageɛ? Nŋ dage niaa di ba si gaa, an titia gigaa. ²² N-na nii-la si si di niaa si ba dɔŋsun haalaa che, an titia chiche niaa haalaa. N si ŋ bere vuiaa ne, an mu gigaa kiaa vuiaa diisin le. ²³ N-na bigisi ŋ titia le ari ŋ jin wialin Moosis si ŋmunsa bil di niaa tuto ne, an chichei wialin a hihise Wia. ²⁴ Wia tenin tuɔŋ ba ŋmunse nii ne a bul, "A tin ma Juu tinŋaa wiaa, nialin si bi Juu tinŋaa ŋaa tuuse Wia jonŋoo."

²⁵ Di ma nii keri ma pene an tuto wialin kala Moosis si ŋmunsa bil di niaa tuto, ma pene kerin keŋ bubuɔŋ ne, ama di ma nii chei wialin Moosis si bile, u naga ari ma bi ma pene kere. ²⁶ Di nii-la si bi u penin kere nii to wialin Moosis si ŋmunsa bil di niaa tuto, ma bi jin ari Wia jan benu ari u keri u penin neɛ? ²⁷ Nii wiaa nialin si bi ba pene keri an tuto wialin Moosis si ŋmunsa bil di niaa tuto, ba jan jon cheerin pima. Ma niaa deenba jin wialin Moosis si ŋmunsa bil ne a kikeri ma pene maa, an ka ma chichei wialin. ²⁸ N yaraa wu-ŋaalaa dee bi ŋaa ŋ ŋaa Juu tiina. N si keri ŋ namia ma ta dee bi tii. ²⁹ Ama nii-la si ŋaa Juu titii, u tuɔŋ wu-ŋaalaa le ne tii u ŋaa Juu tiina. Nii-la si keŋ tuɔ-pula, u ne nii-la si keri u penin. Wia Din-zon-la ne jan wuo ŋaa nii pin, ŋ si keri ŋ yaraa namia ta dee. Wia ne jan beɛ u tiina le, nuhuobiine dee bi jan beɛu le.

3

¹ Beɛ ne saa Juu tinŋaa kaa kii nialin si bi Juu tinŋaa ŋaa? Ba sii keri ba pene-la maa, u bubuɔŋ ne beɛ? ² Wiaa yuga ne Juu tinŋaa kaa kii nialin si bi Juu tinŋaa ŋaa. Wialin kala tuɔŋ wu-balin ne ŋla: Juu tinŋaa ne Wia jon u niin wiaa pa. ³ Ka di Juu tinŋaa dɔŋsun ne bi Wia niin wialin yarida ŋaa, u jan wuo len di Wia si wutitii keŋ koo? ⁴ Ai. Di niaa kala ne paala ŋaa wu-nyiaraa maa, Wia-na jan keŋ wutitii.

Ba ŋmunɛ ɲii nɛ Wia teniŋ tuɔŋ a tige Wia lɛ. Ba si,

“U maga di ba na di wialiŋ ɲ sɪi bul ɲaa wutitii nɛ,
di ba nɛ joŋ cheeriŋ pipiŋ maa,
di ɲ kɪaa ha siŋ.”

⁵ Ka di la wu-bɔmɔ-la la sɪi ɲaa, di ba nɪi che di ba dage di Wia keŋ wutitii, bɛɛ nɛ laa che di la bul? Mii che di mi bul nuhuobiine tuɔbiinaa wɪaa nɛ a piɛsɛ: Di Wia nɛ dɔgisɛla a tiŋ la wu-bɔŋŋɔɔ wɪaa, u kɪaa bi siŋ u si ɲaa ɲii, koo? ⁶ ɲii dee. Di Wia nɛ fa bi wutitii kenɛ, ɛɛ nɛ u fa jaŋ wuo dii dunia nɪaa sariya? ⁷ Ama di mi wu-nyari-la nɛ wuo leŋ di Wia wutitii-la chaasa chin a laa yiriŋ puu, bɛɛ nɛ tii saa u jaŋ dii mi sariya a bul di mi ɲaa haache tiina nɛ, a joŋ cheeriŋ pimi? ⁸ Di ɲii nɛ fa, mi fa jaŋ bul di mɔ leŋ di la ɲaa wu-bɔŋŋɔɔ a na wu-zɔŋŋɔɔ. Nɪaa dɔŋsun paala tuusɛla nɛ aŋ bul di la dage di nuu ɲaa wu-bɔŋŋɔɔ, u jaŋ na wu-zɔŋŋɔɔ. Wia jaŋ joŋ cheeriŋ pi nɪaa deenba. U nɛ ɲaa ɲii, u kɪaa jaŋ siŋ.

Nuu-kala bi tuɔ-pul tiina ɲaa Wia sipaan

⁹ ɛɛ nɛ saa? Ma biina la Juu tinŋaa kpia nialiŋ si bi Juu tinŋaa ɲaa nɛɛ? Ai, la biba kpia. Mi laa sipaan bul ari nialiŋ si ɲaa Juu tinŋaa ari nialiŋ si bi Juu tinŋaa ɲaa kala, ba ɲaa haache timma nɛ. ¹⁰ Ba ŋmunɛ ɲii nɛ Wia teniŋ tuɔŋ a bul,

“Nuu-kala bi tuɔ-pul tiina ɲaa Wia sipaan, ni-bala ma bi tuɔ-pul tiina ɲaa.

¹¹ Nuu-kala siaa bi suro duu jin Wia wialiŋ bubuɔŋ, nuu-kala ma bi Wia bee chiche.

¹² Nuu-kala joŋ hariŋ yia Wia nɛ a kala ɲiŋaa wu-bɔŋŋɔɔ.

Nuu-kala bi wu-zɔŋ ka ɲaa. Ni-bala ma tuo.

¹³ Ba niin wu-bulaa nage buɔ-surun sɪi suɔɛ ɲii nɛ.

Ba bul wɪaa nyinyise nɪaa.

Wii-kala ba si yie bul keŋ huon nɛ a nage dimiŋ huon.”

¹⁴ “Ba yie ɲmɪesa hihe nɪaa lɛ, a nina baaniŋ nɪaa nyun kiŋkeŋ.”

¹⁵ “Ba baaniŋ bi diene aŋ sisii. Di ba baaniŋ nɛ sie, ba yie fá lima lima a mu kpukpu nɪaa.

¹⁶ Di ba nɛ mu lee-na kala, ba yie chei lee-la nɛ a ɲaa nɪaa tuɔsaa chei.

¹⁷ Ba bi jin ba si jaŋ ɲaa ɲii di ba di nɪaa siŋ.”

¹⁸ “Ba bi Wia ma ka fá.”

¹⁹ La jima ari wialiŋ Moosis si ŋmunɛ bil di nɪaa tuto, duu nɛ dage wii-kala, nialiŋ sɪi to wialiŋ nɛ u daga pipa. ɲii wɪaa nuu-kala bira bi jaŋ wuo bul wii-kala, dunia nuu-kala jaŋ laa cheeriŋ Wia sipaan. ²⁰ Nuu-kala bi jaŋ wuo to wialiŋ Moosis si bile lɛ a wuo keŋ tuɔ-pula Wia sipaan. Wialiŋ Moosis si bile di nɪaa tuto nɛ dagɛla la jin ari nuu-kalaa ɲaa haache nɛ.

Nuu-kala si laa Yesu wɪaa dii keŋ tuɔ-pula Wia sipaan

²¹ Ama lɛɛɛ Wia suri wonbiin nɛ di nɪaa to a keŋ tuɔ-pula u sipaan. U wonbii-la bi wialiŋ Moosis si bile lɛ lia. Ama wialiŋ Moosis si bile ari wialiŋ nialiŋ fa si bula, Wia Diŋ-zɔŋ-la dolun lɛ, ba kala fa bul wonbii-la wɪaa nɛ. ²² Nialiŋ si laa Yesu Kirisito wɪaa dii, nialiŋ si ɲaa Juu tinŋaa koo nialiŋ si bi Juu tinŋaa ɲaa kala, ba nɛ jaŋ keŋ tuɔ-pula u sipaan. U biba kaa pɔɛ, ²³ bɛɛ wɪaa nuu-kala keŋ haache nɛ a bi Wia wuo china kpikpage. ²⁴ Ama Wia lahɔrimɔ lɛ ba keŋ tuɔ-pula nɛ u sipaan. Yesu Kirisito nɛ laaba ta a ɲaa ba ɲaa tuɔ-pul timma Wia sipaan. U ɲaa ɲii chɔgita nɛ. ²⁵ Wia leŋe Yesu Kirisito suu a joŋ u chaliŋ jaase, di Wia joŋ u baaniŋ ta, baan-la u fa si na a tiŋ la haacheba wɪaa, aŋ joŋ la haacheba a chɛla. Nii-la kala si laa Yesu Kirisito wɪaa dii jaŋ laa chɔgita deen. Wia keŋ wutitii a dage ɲii ari u fa keŋ kenyiri nɛ, a bee kieli nuhuobiinee haache. ²⁶ Lɛɛɛ Wia bira bi ɲii ka ɲaa. U dage nɪaa kala haacheba a piba nɛ. Ama u dage duu keŋ

wutitii, bɛɛ wiaa di nuu-kala nɛ laa Yesu wiaa dii, u jan kɛŋ tuɔ-pula Wia sipaan.

²⁷ Wu-bɛɛ nɛ saa la jan kaa bigisi la titia lɛ? Wii-kala tuo. Bɛɛ nɛ tii? Wu-zɔmɔ-la la si ŋaa nɛ tii? Ai, ama la yarida nɛ tii la bira bi wii-kala kɛnɛ di la bigisi la titia lɛ. ²⁸ La ŋaa yarida ari nuu jan wuo na tuɔ-pula Wia sipaan a tinj u si laa Yesu dii lɛ. Di la nii to wialinj Moosis si bile, la bi jan wuo kɛŋ tuɔ-pula deenj Wia sipaan. ²⁹ Ma biina ari nialinj si ŋaa Juu tinŋaa dundunja nɛ jan wuo to Wia? Ai. Nialinj si bi Juu tinŋaa ŋaa ma jan wuo tou. ³⁰ Wia si ŋaa kubala, u jan lenj di nialinj sii keri ba penee kɛŋ tuɔ-pula a tinj ba si laa Yesu wiaa dii wiaa. Nialinj ma si bi Juu tinŋaa ŋaa, u jan lenj di ba ma kɛŋ tuɔ-pula a tinj ba ma si laa Yesu wiaa dii wiaa. ³¹ La saa jan wuo jonj wialinj Moosis si bile a ta, a tinj la yarida wiaa koo? Ai, la yarida-la lenje Moosis si bil wialinj wasa zɔŋ nɛ.

4

Abiraham si laa Wia dii nɛ tii u kɛŋ tuɔ-pula Wia sipaan

¹ Wu-bɛɛ nɛ saa la kɛŋ di la bul a tige la naabalima Abiraham lɛ, nii-la lɛ la kala si to a ku ŋaa u nihee? ² Di Wia nɛ fa lenje u kɛŋ tuɔ-pula u sipaan a tinj u wu-zɔmɔ-la u si ŋaa lɛ, u fa jan wuo bibigisi u titia lɛ, ama Wia teenj dee. ³ Wia teninj tuɔŋ ba bula ari Abiraham laa Wia dii nɛ. U yarida-la nɛ tii Wia ŋaa u kɛŋ tuɔ-pula u sipaan. ⁴ Di nuu nɛ tinj tintinŋaa, u maga di ba tɔmu nɛ. Ku-la ba si jonjo tɔmu, u bi naga ari chogita nɛ ba jonjo pu. U tima nɛ a laa. ⁵ Ama nii-la si bi wu-zɔŋŋɔɔ ka ŋaa an ŋaa Wia yarida, a laa dii ari Wia jan wuo ŋaa di nii-la si ŋaa wu-bɔŋŋɔɔ na tuɔ-pula u sipaan, u yarida-la jan ŋaa duu kɛŋ tuɔ-pula Wia sipaan. ⁶ La naabalima Devit ma fa bul nii nɛ. U si di Wia nɛ lenje di nuu kɛŋ tuɔ-pula u sipaan, ka u bi nii ŋaa a tinj u tiina wu-zɔŋŋɔɔ

ŋaaninj lɛ, u tiina tuɔŋ jan tɔrɛ. Nla nɛ Devit bul:

⁷ “Nialinj wu-bɔŋŋɔɔ Wia si jonjo cheba a kɛŋ ba haacheba faa, nuu-kala bira bi na a kaa mu wuu, ba tuɔŋ jan tɔrɛ.

⁸ Nii-la ma Wia si bi u haachebaa benj, u ma tiina tuɔŋ jan tɔrɛ.”

⁹ Tuɔtɔrunj deenj wiaa saa Devit si bula, u ŋaa nialinj sii keri ba penee dundunja kunj nɛɛ? Ai, nialinj ma si bi ba penee keri, ba ma tiuu nɛ. La laa sipaan bul ari yarida nɛ tii Abiraham kɛŋ tuɔ-pula Wia sipaan.

¹⁰ Bua bɛɛ lɛ nɛ Wia ŋaa wiinj deenj Abiraham lɛ? U ŋaa nii bua-la lɛ duu keri u peninj nɛ koo duu ha bi u peninj kere nɛɛ? U ŋaa nii duu ha bi u peninj kere.

¹¹ Abiraham si keri u peninj nii ŋaa magil nɛ. Uu dage ari u si ŋaa Wia yarida nɛ tii u kɛŋ tuɔ-pula u sipaan, ka u ha bi u peninj kere. U nii ŋaa Abiraham ku ŋaa nialinj kala si bi ba penee kere naabalima. Nialinj si kɛŋ tuɔ-pula Wia sipaan a tinj ba yarida wiaa, Wia lenje ba ma ŋaa Abiraham nihee.

¹² U nɛ ŋaa nialinj si keri ba penee ma nyimma. Ama u bi naga ba si keri ba penee dundunja wiaa nɛ tii u ŋaa ba nyimma. Ba kɛŋ yarida a pe ba penee kerinj lɛ nɛ, ari Abiraham ma fa si kɛŋ yarida nii, an-na keri u peninj.

A tinj la yarida wiaa, la ma jan wuo kɛŋ tuɔ-pula Wia sipaan

¹³ Abiraham ari u doho niaa nɛ Wia fa bula pa di ba jan dii dunia. U bi naga Abiraham fa si to wialinj Moosis fa si bile di niaa tuto nɛ tii Wia bul nii. Ama Abiraham fa si ŋaa Wia yarida nɛ tii Wia lenj u kɛŋ tuɔ-pula u sipaan. ¹⁴ Di nialinj sii to wialinj Moosis fa si bile di niaa tuto, di ba dundunja nɛ fa jan dii dunia, nii-na niaa yarida fa ŋaa pei nɛ. Wialinj Wia si bula ma fa ŋaa pei.

¹⁵ Wialinj Moosis fa si bile di niaa tuto ŋaa Wia baaninj sisii niaa nyunj nɛ, bɛɛ wiaa ba bi baa to. Di wialinj Moosis fa si bile nɛ fa tuo, niaa fa bi wialinj ka chei.

Adam keŋ suuŋ kɔ, Yesu Kirisito ne keŋ miisinj kɔ

¹² Haache to ni-bala le ne a ku juu dunia. Haache-la ne tii suuŋ juu dunia. Nu-kala saa si ku ŋaa haache tiina, ŋii ne tii suuŋ juu dunia niaa kala a tinj haache-la wiaa. ¹³ Haache fa he dunia le, di Wia ha bi wialinj joŋo pi Moosis di niaa tuto, ama bua-la le ba fa bi cheerinj joŋo pi nialinj si bi Moosis ŋii-la jin. ¹⁴ A chin Adam bua-la le a kaa kuko Moosis ma miisinj le, suuŋ ne laa dunia kala. Niaa doŋsuŋ fa he dime, ba haacheba bi Adam haache-la naga, ama suuŋ laaba maa. Adam ne fa ŋaa nii-la si jan kɔ mimaarinj.

¹⁵ Ama Wia zile ku-la kii Adam haache-la. Niaa yuga ne a suu a tinj ni-bala haache wiaa. Ama Wia fála nennige a joŋ u zile ku-la pila, u ne paala yuga kii haache-la. Yesu Kirisito ne ŋaa zile ku-la. U lahɔrimo le u pe niaa le yuge kinkeŋ kinkeŋ. ¹⁶ Haache to ni-bala le ne a juu dunia. Wia zile ku-la ma to ni-bala le ne a juu dunia. Ama ba balia kala bi kubala ŋaa. A tinj ni-bala haache-la wiaa Wia dii la sariya a joŋ cheerinj pila. Ama niaa si yuga a ŋaa haache-la wiaa, Wia joŋ u zile ku-la pila a joŋ la haacheba chela, a leŋ la keŋ tuɔ-pula u sipaanj. ¹⁷ Ni-bala haache wiaa ne leŋ suuŋ laa dunia tii. Wialinj Yesu Kirisito dunɔɔ si ŋaa pila, ba ha yuga kii ni-bala-la haache-la timinj. Wia to Yesu le ne a fála nennige woruŋ, a leŋ la keŋ tuɔ-pula u sipaanj chogita. Nialinj si laa kiaa deenba, ba jan keŋ miisinj (a dii dunia) a tinj Yesu Kirisito wiaa.

¹⁸ Ni-bala haache si wuo leŋ nuu-kala laa cheerinj Wia teenj ŋii, ŋii ne ni-bala tuɔ-pula wu-ŋaalaa ma jan wuo leŋ di nuu-kala keŋ tuɔ-pula Wia sipaanj a keŋ miisinj. ¹⁹ Ni-bala si via Wia niinj ne ŋaa niaa yuge a ŋaa haache tinŋaa. ŋii titia ne ni-bala si to Wia niinj ne wuo ŋaa niaa yuge a keŋ tuɔ-pula Wia sipaanj. ²⁰ Wialinj Moosis fa si bile

di niaa tuto ne ku wasa leŋ haache purike dunia le. Ama haache-la si ku wasa purike, ŋii ne Wia ma faasa fála nennige a wasa pela le woruŋ. ²¹ Haache si keŋ doluŋ a laa dunia dii, ŋii ne keŋ suuŋ kaa kɔ. Wia ma saa keŋ la miisinj doluŋ a fá dunia niaa nennige a kieli, a peba le. U to la Tiina Yesu Kirisito tuɔ-pul wu-ŋaalaa le ne a leŋ la keŋ tuɔ-pula u sipaanj, a keŋ miisi-la si bi dere.

6

Wii-chuɔle liinj fonuŋ bubuɔŋ

¹ Bɛɛ ne saa la jan bul? La haa ŋaa wu-bɔŋɔɔ di Wia faasa fifála nennige a pela le koo? ² Ai, la si liise la titia wu-bɔŋɔɔ ŋaaninj le ŋii, ɛɛ ne la jan bira ŋiŋaa wu-bɔŋɔɔ? ³ Ma kala jima ari ba si foma Wii-chuɔle liinj Yesu Kirisito doluŋ le ŋii, u si suu ŋii, ma ma suba ne. ⁴ Ba si fola Wii-chuɔle liinj ŋii, u naga la duu kala suba ne ba joŋo hugi. Ba ŋaa ŋii di la wuo jin ari Kirisito si sii suuŋ le ŋii u Nyimma doluŋ le, la ma wuo keŋ mii-falinj a tuto wonɔbii doŋ.

⁵ La duu kala si suba ŋii, la kala ma jan bira sii suuŋ le. ⁶ La jima ari ba si keŋ Kirisito kpaase daa-geseɛ nyuŋ ŋii u suu, ba kpaasu ari la wu-bɔŋɔɔ kala ne. U ŋaa ŋii a wuo yuo dii dol-la la fa si kene a ŋiŋaa wu-bɔŋɔɔ ne, di la bira sí haache yosuŋ ŋaa. ⁷ Di nuu-kala ne suba, Wia liisu u haache le ne. Nu-kala bira bi jan joŋ cheerinj pu. ⁸ La laa dii ari la di Kirisito kala si suba ŋii, la duu kala jan sii suuŋ le a keŋ miisinj. ⁹ La jima ari Wia si chise Kirisito suuŋ le ŋii, u bira bi jan suu, ŋii wiaa suuŋ bira buu wuo. ¹⁰ U si suu ŋii, bala dunɔɔ ne u suu. U suba duu keŋ haache doluŋ ne chei. U si sii suuŋ le a keŋ miisinj ŋii, u joŋ u miisinj a pi Wia ne. ¹¹ ŋii wiaa u maga di ma biine ma titia le ari ma ma suu haache wiaa ne, a joŋ ma miisinj a pi Wia, bɛɛ wiaa ma di Kirisito kala ŋaa kubala ne.

¹² Ma saa sí leŋe di haache tii ma yaraa, di ma to u niinj le a njjaa ma titia tuɔtɔre wu-ŋaalaa. ¹³ U bi maga di ma jonj ma yaraa nanɗaasiŋ dɔŋsunj pi haache a kaa ŋaa wu-bɔŋŋɔɔ. Ama má jonj ma titia pi Wia. Ma-na nage nialiŋ si sii suunj le a keŋ miisiŋ ne. Má saa jonj ma yaraa nanɗaasiŋ kala a pi Wia duu wuo leŋ di ma ŋaa tuɔ-pul wiaa. ¹⁴ Haache bira bima wuo, bɛɛ wiaa Wia laħorimo le ne ma keŋ miisiŋ, wialiŋ Moosis fa si bile di niaa tuto dee.

La ŋaa Wia yosuŋ ne leele

¹⁵ La si keŋ miisiŋ Wia laħorimo le, wialiŋ Moosis fa si bile di niaa tuto le dee, u nii wiaa saa la njjaa wu-bɔŋŋɔɔ koo? Ai, u bi wonbii ŋaa. ¹⁶ Ma jima di ma ne jonj ma titia a pi nuu a tuto u niinj le, ma ŋaa niila ma síi to yosuŋ ne. Di ma ne jonj ma titia a he haache nisiŋ le, ma janj suu. Di ma ne biraa to Wia niinj ma le, ma janj keŋ tuɔ-pula Wia sipaanj. ¹⁷ Ama laa lolle Wia ari ma nialiŋ fa si ŋaa haache yosuŋ, ma leele jonj ma tuɔŋ kala aa to Wia wialiŋ ba si dagema di maa to. ¹⁸ Wia si liisema haache nisiŋ le nii, ma miira ku keŋ ma titia a kaa ŋaa tuɔ-pul kenne yosuŋ ne. ¹⁹ Mi si bul yosuŋ wiaa nii, u ŋaa wu-kaa-magisii ne mi magise, di nii dee ma bi u bubuɔŋ wuo jinj. Ma fa si jonj ma titia a he disinniŋ ari wu-bɔŋŋɔɔ ŋaaninj le, nii titia ne ma maga di ma leele jonj ma nanɗaasiŋ kala a he tuɔ-pul wu-ŋaalaa le, di ma bira sí disinniŋ keŋ aŋ keŋ tuɔ-pula.

²⁰ Bua-la le ma fa si jonj ma titia he haache nisiŋ le a ŋaa u yosuŋ, ma fa laa ma titia ne tuɔ-pul wiaa ŋaaninj le. ²¹ Wiaa deenba ma fa síi ŋaa, nyuuru bɛɛ ne ma na? Wialiŋ miira ŋaa hiisiŋ keŋma ne leele. Ba dideriŋ ne saa ŋaa suunj. ²² Ama leele Wia laama ta ne haache nisiŋ le. Ma ŋaa Wia yosuŋ ne leele. Ma nyuuruŋ ne, ma bira si bi disiŋ kala kene, ma saa janj keŋ miisi-la si bi dere. ²³ Time-la ba si yie joŋo tinj

haache ne ŋaa suunj. Ama Wia zile ku-la u si joŋo pila ne ŋaa miisi-la si bi dere, a tinj la Tiina Yesu Kirisito wiaa.

7

Wia Diŋ-zɔŋ-la pila doluŋ di la ŋaa wialiŋ síi tɔre Wia tuɔŋ

¹ Mi naanbiiriŋ, ma ŋaa nialiŋ si jinj wialiŋ Moosis fa si ŋmunsa bil di niaa tuto ne. Ma jima ari nuhuobiine yie mage duu tuto wialiŋ ba si bile ne duu ne he u miisiŋ le, see duu suba. ² Di haala ne keŋ bala, u bala ne tiuu. U yie mage duu tuto u bala niinj ne, bua-la le u bala si he u miisiŋ le. Di u bala-la ne suba, haal-la laa u titia ne u bala nisiŋ le. U bira bi u bala niinj to. ³ Di u bala ne ha he u miisiŋ le, ka u viau aŋ mu jaa baal dɔŋ, u juu baal-la u si via haache le ne. Ama di u bala ne suba, u laa u titia ne u bala-la si suba nisiŋ le. Di u ne jaa baal dɔŋ maa, u bira bi u bala-la si suba haache le jua.

⁴ Mi naanbiiriŋ, nii titia ne ma ma nage. Ma suu wialiŋ ba si bile di niaa tuto tuɔŋ ne, bɛɛ wiaa Kirisito si suu nii, ma duu kala ne suba. Leele nuu dɔŋ ne tiima, nii-la si sii suunj le. U ŋaa nii di la wuo tinj tintinj-zɔŋŋɔɔ a pi Wia ne. ⁵ Bua-la la síi to la tuɔtɔre wu-ŋaalaa hariŋ, wialiŋ Moosis fa si ŋmunsa bil di niaa tuto ne fa ŋaa di sima keŋla di la keŋ la yaraa njjaa wu-bɔŋŋɔɔ, wialiŋ si janj keŋla mu he suunj bua le. ⁶ Ama leele Wia liisela wialiŋ Moosis fa si bile le di niaa tuto. La tuɔtɔre wu-ŋaalaa-la fa keŋla kaa ŋaa yosuŋ ne. Ba le ne la suu. Leele la wuo tuto wonbii dɔŋ ne, a tinj tintinjŋaa aa pi Wia. Wia Diŋ-zɔŋ-la ne dagela nii, wialiŋ Moosis fa si ŋmunsa bil di niaa tuto dee.

Wialiŋ Moosis fa si bile ne dage haache si nage nii

⁷ Bɛɛ ne saa laa che di la bul? Wialiŋ Moosis fa si ŋmunsa bil di niaa tuto ŋaa haache wiaa neɛ? Ai, nii dee. Ama wialiŋ Moosis fa si

doluŋ ɛ, ba joŋ ba nyuŋ kala a he ba yaraa wu-ŋaalaa ɛ ne, ama nialin kala ma sii to Wia Diŋ-zoŋ-la doluŋ ɛ, ba ma joŋ ba nyuŋ kala a he Wia Diŋ-zoŋ-la si cho wialin ɛ ne. ⁶ Di la ne joŋ la nyuŋ a he la yaraa wu-ŋaalaa ɛ, la jaŋ suu, ama di la ne joŋ la nyuŋ a he Wia Diŋ-zoŋ-la wu-ŋaalaa ɛ, la jaŋ keŋ miisin a hoŋ ari yarifielaa, ⁷ bee wiaa di nuu ne joŋ u nyuŋ kala a he u yaraa doluŋ ɛ, u naa Wia diŋdoŋ ne. U bi che duu to wialin Wia si daga, u paala bi wuo to. ⁸ Nialin sii to ba yaraa wu-ŋaalaa ɛ, ba bi wialin Wia si cho wuo naa.

⁹ Ama Wia Diŋ-zoŋ-la si hema ɛ nii, ma-na bi ma yaraa wu-ŋaalaa ɛ ka to, maa to wialin Wia Diŋ-zoŋ-la si daga ne. Di Wia Diŋ-zoŋ-la tuo nuu-kala ɛ, u bi Kirisito kuŋ naa. ¹⁰ Di Kirisito ne hema ɛ, ma yaraa namia ha jaŋ suu a tin ma haacheba wiaa. Ama Wia Diŋ-zoŋ-la si hema ɛ, u ne pima miisin, bee wiaa ma keŋ tuo-pula ne Wia sipaan. ¹¹ Wia ne chise Yesu suuŋ ɛ. Di u Diŋ-zoŋ-la ne hema ɛ, u jaŋ chise ma yara-la si jaŋ pua suuŋ ɛ di ma keŋ miisin, ari u si chise Yesu suuŋ ɛ nii. U jaŋ to u Diŋ-zoŋ-la si hema ɛ ne a naa nii.

¹² Nii wiaa mi naanbiirin, u bi maga di nuu-kala fugela di la tuto la yaraa wu-ŋaalaa ɛ. ¹³ Di ma ne to ma yaraa wu-ŋaalaa ɛ, ma jaŋ suu. Ama di ma ne via ma yaraa wu-ŋaalaa, ma jaŋ keŋ miisin Wia Diŋ-zoŋ-la doluŋ ɛ. ¹⁴ Nialin kala sii to Wia Diŋ-zoŋ-la niin wiaa, ba naa Wia biirin ne. ¹⁵ Wia bi naa di ma nage yosuŋ a bira fifa fawulluŋ, ama u Diŋ-zoŋ-la leŋe ma naa u biirin ne. Di la nii yiru, la wuo kenu yire "la Nyimma". ¹⁶ Wia Diŋ-zoŋ-la ari la tuoŋiinaa kala yie dage ari la naa Wia biirin ne. ¹⁷ La si naa Wia biirin nii, Wia joŋ kiaa ne a billa ɛ, kialin kala Wia si joŋo bil Kirisito ɛ, la ma jaŋ tiiba. Di la di Kirisito kala ne na heeŋ, la ma jaŋ laa yiri-la Kirisito si jaŋ laa.

Yiri-la la si jaŋ laa Wia teen

¹⁸ Mi bee na ari heeŋ deen mi sii na bi jaŋ wuo kaa magise yiri-la la si jaŋ laa. ¹⁹ Dunia kuŋ-kala nii gberu a kpil digilaa di ba na bua-la ɛ Wia biirin si jaŋ laa yirin. ²⁰ Tinŋimii-la dunia kiaa si maga di ba tin, ba tima lol ne. Ba titia tuotoŋ ɛ dee ba lol nii, ama Wia ne naa ba lol. Ari nii kala Wia ha leŋe ba keŋ yielaa, ²¹ bee wiaa Wia jaŋ laaba ta a liiseba suuŋ bua ɛ. Wia biirin si jaŋ ko a laa yirin nii a tii ba titia, ba ma jaŋ tii ba titia nii a ma keŋ yirin. ²² La jima ari dunia kiaa kala haa huuni ne, ari haala sii che duu lul aa huuni nii. ²³ Dunia kiaa duŋduŋa dee, ama la ma nialin Wia si laa sipaan joŋ u Diŋ-zoŋ-la hela ɛ, la maa huuni ne la tuoŋ ɛ duu keŋ la yaraa birime [di la chaasa naa u biirin] a laa yirin.

²⁴ Wia si laala ta nii, la keŋ yielaa. Di la ne na wialin la sii yielu, u bira bi maga di la yiyiele wii. Di nuu ne yiele kuŋ, di u ne nau, u jaŋ bira yiyiele ku-la wiaa? Ai. ²⁵ Ama di la nii yiele wialin la ha si bi na, la keŋ kenyiri a gbigbere.

La si yie keŋ yielaa nii a keŋ kenyiri, ²⁶ nii titia ne Wia Diŋ-zoŋ-la ma yie ko a pela ɛ a tin la si bi doluŋ kene di la pe la titia ɛ. La paala bi jin nii u si maga di la chuole Wia. Ama Wia Diŋ-zoŋ-la titia sul Wia a pipila. U si yie susul Wia nii aa huuni nii, la bi jaŋ wuo keŋ niin a dage, ama ²⁷ Wia na nuhuobiine tuoŋ kala ne a ma jin Wia Diŋ-zoŋ-la sii huuni nii bubuŋ, bee wiaa Wia Diŋ-zoŋ-la sii sul Wia a pi Wia niaa nii, Wia tuotoŋ ɛ ne u yie susul nii.

²⁸ Nialin Wia si tuoŋa di ba naa u niaa, ba chou ne. Niaa deenba teen Wia naa wii-kala birime wu-zoŋ ne a piba. ²⁹ Nialin Wia si laa sipaan liise, u liiseba duu keŋba birime di ba nage u titia Bie ne, a leŋ u Bie naa ba kala kuhian. ³⁰ Wia yire nialin u fa si laa sipaan liise di ba naa u niaa ne. U si yireba nii, ba ko u teen. Ba

si kɔ nii, u leɲe ba keɲ tuɔ-pula u sipaanj. Nialinj ma si keɲ tuɔ-pula u sipaanj, u leɲe ba ma pe laa u yirinj.

Kuɲ-kala tuo si janj wuo liisemi nii Kirisito si chomi le

³¹ Di la ne jinj wiaa deenba kala, bee ne bira ka di la bul? Di Wia ne chinj la harinj, kubee ma ne bira keɲ dolunj a kiila? ³² Wia paala bi u titia Bie kaa laa niaa teenj. U jonu he niaa nisinj le ne di ba kpuu a tinj la wiaa. U si wuo njaa nja, ma bi jinj ari u janj wuo chaasa jonj kuɲ-kala ma pe pila koo? ³³ Kubee ne saa janj bira jonj cheerinj a pi nialinj Wia si liisa? Nuw tuo, bee wiaa Wia titia ne leɲe ba keɲ tuɔ-pula u sipaanj. ³⁴ Kubee ma ne bira janj wuo dii ba sariya a dogiseba? Nuw tuo, bee wiaa Kirisito suba ne, anj bira sii suunj le a keɲ miisinj a honj Wia seme, ni-duonj di-honunj, a sul Wia pipila duu pela le. ³⁵ Kirisito si chola nii, bee kuɲ ne janj bira nja di Kirisito sila cho? Wahala koo wu-juulaa, koo di ba to la naasinj dudogisela, koo di losunj kpula, koo di la bi genninj kene di la laale, koo di wu-bonj ne gberela, koo di la ne janj suu? Wiaa deenba kuɲ-kala bi janj wuo nja di Kirisito bira sila cho. ³⁶ Ba nmunse Wia teninj tuonj a bul nja ne:

“A tinj n wiaa, laa gberɛ suunj ne tapulii-na kala.

Ba yie benja ari la nage piesee ne ba si kaa lii di ba kpu.”

³⁷ Ari nii kala, di wiaa deenba kuɲ-kala ne ku juula, la yie wuo yuo dii ne a tinj nii-la si chola wiaa. ³⁸⁻³⁹ Wiinj deenj tuo kaa lere, mi jima kuɲ-kala tuo si janj wuo liisemi nii Kirisito si chomi le. Suunj, koo miisinj, koo Wia tinjdaaraa, koo Wia bii-zonjɔɔ ari Wia bii-bonjɔɔ, koo kialinj kala si he dime leele, koo kialinj si janj to harinj kɔ, kialinj si he wia nyunj a keɲ dolunj, koo kialinj si keɲ dolunj a he tinjteenj le. Wia si to la Tiina Yesu Kirisito le a chola nii, dunia kuɲ-kala tuo si janj wuo liisela chonu-la le.

9

Wia fa liise Iziral tinjja di ba nja u niaa

¹ Mi sii che di mi bul wii-la nja wutitii ne. Mi si nja Kirisito nuw nii, mi bi wiaa nyia. Wia Din-zonj-la sii benj mi tuobiinaa nii, u ma leɲe mi jinj ari mi bi wiaa ka nyia. ² Mi tuonj faasa chei ne a tinj mi titia niaa wiaa. Uu walimemi kinkeɲ kinkeɲ. ³ Mi fa cho di Wia nmiesa hemi le ne a keɲmi pore Kirisito teenj, anj laa mi naanbiirinj ari mi doho niaa kala ta. ⁴ Njaa deenba ne nja Iziral tinjja, nialinj Wia si liisa. U leɲe ba ne nja u biirinj a laa u yirinj. Ba di Wia bil niinj a pi donjɔ, Wia leɲ Moosis nmunse wiaa piba di ba tuto, a dageba Wia chuolunj wonbiinj, a bul duu janj nja wiaa pipiba. ⁵ Ba ne nja la naabalimaba doho niaa Wia si liisa. Ba si lul Kirisito maa, u ma fa nja la naabalimaba doho nuw ne. U-na Kirisito ne kii kuɲ-kala. Má leɲ di la denne Wia bua-na kala le a kaa mu wuu. Ami.

⁶ Ama u bi naga ari Wia si si u janj nja wii-la u via ne, bee wiaa Iziral doho niaa kala dee Wia leɲ ba nja u niaa. ⁷ Abiraham doho niaa ma kala dee bi Wia niaa nja, ama Aizik doho niaa dunɔɔ ne nja Abiraham doho niaa titia. ⁸ Wiinj deenj daga ari nuw-kala doho bi Wia niaa doho nja, see biiri-la Wia si bula di ba lul, ba ne u benj ba nja u doho niaa titia. ⁹ U fa si bul wiaa a tige bile ba si janj lul le, nja ne u fa bul:

“Mi janj miira kɔ bua deenj titia le harinj jina,
di n haala Saara lul baal.”

¹⁰ Nii ma dunɔɔɔ dee. Ribeka ma si lul biirinj balia-la, ba nyimma nja kubala ne, u ne la naabalima Aizik. ¹¹⁻¹² Ka di Ribeka-na lul daalieri-la, biiri-la ha bi wu-zonj koo wu-bonj kala nja, ka Wia bula pu a bul,
“N si janj lul biiri-la, kuhianj janj tima pipi ku-bie.”

Nii daga ari Wia tuotorunj le ne u yire u niaa a tuoseba, u bi naga ari

ba si ŋaa wialin ne tii u tuoseba. U si yireba ne tii ba ŋaa u niaa. ¹³ Ba bira ŋmunse Wia tenin tuon a bul ŋla ne:

“Mi cho Jekob an bere Iso.”

Wia ken wutitii ne

¹⁴ Bee ne saa la jan bul? La jan wuo bul di Wia bi wutitii kene? Ai.

¹⁵ Wia fa bula pi Moosis a bul,

“Nialin mi si liisa di mi peba le, mi jan peba le.

Nialin ma mi si liisa di mi faba nennige, mi jan faba nennige.”

¹⁶ Wiin deen saa bi naga nuhuobiine si cho wialin a wiwalime duu ŋaaba ne tii, ama Wia si fala nennige ne tii, ¹⁷ bee wiaa ba ŋmunse Wia tenin tuon a tige Feero le ari Wia bula pu a bul,

“Wii-la si tii mi len ŋ dii kuorun ne ŋla:

mi ŋaa nii di mi wuo ton le ne a dage mi dolun,

di ba yire mi yirin dunia kala le.”

¹⁸ Nialin saa Wia si liisa duu faba nennige, uu faba nennige ne. Nialin ma u si liisa di ba ken nyu-duon a tin ba haacheba wiaa, u len ba ma ken nyu-duon ne.

¹⁹ Ma donoo saa jan wuo piense a bul, “Di Wia nii ŋaa nii, ee ne saa u jan wuo jon cheerin a pi niaa? Kube ne saa jan wuo ken kenyiri di Wia kenu birime?”

²⁰ Kube ne kan, ŋ-na nuhuobiine di ŋ laa wiaa bul Wia niin le? Kula ba si ŋaa, u jan wuo piense nii-la si ŋaau a bul, “Bee ne tii ŋ ŋaami mi nage ŋla?” ²¹ Pupoi-meere jan wuo loge churun a kaa me pupoi-zomun, a bira wuo loge a me pupoi-lorun. Di pupoi-meere ne cho nii, u jan wuo ŋaa. ²² Nii titia ne Wia ma jan wuo ŋaa niaa le. Niaa donsun he dime a nage pupoi-kpaanin si maga di ba ŋmoo yere, ka Wia ken kenyiri a nyalime nii kala halii. U fa jan wuo na baanin ba nyun a dage u dolun, ka u wuo nyalime ²³ a tin nialin si nage pupoi-zononoo wiaa, niaa deenba nennige ne u fifa. U laa

sipaan liiseba di ba dii u yiri-bal-la. Ba ne u dage u yiri-balin pa. ²⁴ La ne nialin u si liisa, la kala dee bi juu tinŋaa ŋaa, la donsun ma ŋaa nialin si bi juu tinŋaa ŋaa ne. ²⁵ Ba bul ŋla ne Wia tenin seme donoo ba sii yire Hoziya a bul,

“Nialin si bi mi niaa ŋaa, mi jan yireba mi niaa.

Nialin ma mi fa si bi cho, mi jan yireba mi ni-chooloo.

²⁶ Lee-la titia ba fa si bula pi niaa ari ba bi Wia niaa ŋaa, lee-la ne ba jan yireba Wii-titii biirin.”

²⁷ Azaaya fa ŋaa nii-la sii bul wiaa, Wia Din-zon-la dolun le ne. U ma fa heele bul a tige Iziral niaa le a bul, “Di Iziral tinŋaa ne paala faasa yuga a nage hagili-bunbugulo si pin mug-balin niin, ba tuon niaa banmene dunduŋa ne Wia jan laa ta, ²⁸ bee wiaa chee don la Tiina Wia jan ŋaa nii u fa si bula pila. U bi jan dieni ka di u chei dunia niaa.” ²⁹ Ŋla ne Azaaya ma fa bira bul di Wia jan ŋaa maachie. U fa si,

“Di Wia ne fa bi la naabalima doho niaa banmene lenje,

la kala fa jan suu,

a nage Sodom ari Gomora niaa kala si suu nii.”

Iziral tinŋaa donsun bi tuo-pula kene Wia sipaan

³⁰ Wii-la diderin ne ŋla: Nialin si bi juu tinŋaa ŋaa fa bi che di ba ken tuo-pula Wia sipaan. Ba ne miira ku ken tuo-pula Wia sipaan a tin ba yarida wiaa. ³¹ Ka Iziral niaa fa faasaa che di ba ken tuo-pula Wia sipaan aa to wialin Moosis fa si bile di niaa tuto. Ama ba bi wialin wuo tuto di ba ken tuo-pula-la Wia sipaan. ³² Bee ne tii ba bi tuo-pula-la na? Ba bi yarida kene di ba na tuo-pula-la Wia sipaan, bee wiaa ba faa che di ba ken tuo-pula Wia sipaan a tin wialin ba sii to ne. Ba jon ba naasin a ŋmoo tabii-la si ŋaa niaa sisieru ne. ³³ Ba ŋmunse Wia tenin tuon a tige tabii-la le ne a bul,

“Bee na, mi jonɗ tabii-la si jan len di niaa gere
a bil lee-la ba sii yire Zaayonɗ.
Tabii-la nnaa bunɗ ne.
U jan len di niaa gere titel.
Ama nuu-na kala si laa nii-la la sii yire bunɗ-la, wiaa dii, u bi jan hiise u titia.”

10

¹ Mi naanɗbiirinɗ, mi tuonɗ le mi faasa cho di Wia laa Juu tinɗaa ta ne. Mi yie chuole Wia piba ari siifesiin ne. ² Mi jima ari ba jonɗ ba nyun kala he Wia le ne, ama ba bi Wia wonɗbii-titii-la jinɗ. ³ Ba bi jinɗ wonɗbii-la Wia si yie len ba to a kenɗ tuo-pula u sipaanɗ, anɗ chiche di ba to ba titia wonɗbiee. Nii ne tii ba bi ba titia jonɗ he wonɗbii-la Wia si yie to a len niaa kenɗ tuo-pula u sipaanɗ. ⁴ Kirisito ne nnaa wialinɗ kala Moosis fa si nmunɗsa di niaa tuto diderinɗ. Nii-la kala si laa u wiaa dii jan kenɗ tuo-pula Wia sipaanɗ.

Nuu-na kala si yire Wia, u jan laau ta

⁵ Moosis fa nmunɗsa a tige nialinɗ sii to wialinɗ u si bile di niaa to a kenɗ tuo-pula Wia sipaanɗ, di ba ne wuo to wialinɗ, ba jan kenɗ miisinɗ. ⁶ Wialinɗ ba si bula Wia teninɗ tuonɗ a tige nialinɗ si kenɗ tuo-pula Wia sipaanɗ a tinɗ ba yarida wiaa ne nla: Ba si, “Ma si ma tuonɗ le biinu a piiese, ‘Kubee ne jan jil Wia-jan (a kenɗ Kirisito kaa ku tuu)?’ ⁷ Koo ma bira si piiesu a bul di kubee ne jan mu lelinɗ (a kenɗ Kirisito kaa ko)?” ⁸ Ba si di Wia wu-zomɗ-la kpagema ne. U he ma niinɗ le a he ma tuonɗ maa. Wia wu-zomɗ-la la sii bul ne nnaa wu-zomɗ-la si tige nialinɗ si laa Kirisito wiaa dii a kenɗ tuo-pula Wia sipaanɗ. ⁹ Di n ne jan wuo suri n niinɗ a bul ari Yesu ne nnaa n Tiina, a laa dii ari n tuonɗ ari Wia chisu suunɗ le, Wia jan laanɗ ta, ¹⁰ bee wiaa di la ne kenɗ la tuonɗ a laa Yesu wiaa dii, la jan kenɗ tuo-pula Wia sipaanɗ. Di la ne kenɗ la niinɗ ma bul di la laa u wiaa dii, Wia jan laala ta. ¹¹ Wia teninɗ tuonɗ, nla ne ba

bul: “Nuu-na kala si laa u wiaa dii, Wia bi jan hiisu.” ¹² Juu tinɗaa ari nialinɗ si bi Juu tinɗaa nnaa, ba kala nnaa kubala ne u teenɗ. U bi ba kaa pɗre. U nnaa nuu-kala Tiina ne. Di nuu-kala ne yiru, u jan pe u tiina le worunɗ. ¹³ Nla ne ba bul Wia teninɗ tuonɗ: “Nuu-na kala si yire la Tiina Wia yirinɗ duu laau ta, u jan laau ta.”

¹⁴ Ama di ba ne bi u wiaa laa dii, ee ne ba jan nnaa a yire u yirinɗ duu laaba ta? Di ba ne bira bi u wiaa nia, ee ne ba jan nnaa di ba laa u wiaa dii? Di nuu ma ne saa bi u wiaa bula piba, ee ne ba jan wuo nnaa nii? ¹⁵ Di Wia ne bi niaa tima di ba bul u wiaa, ee ne ba jan wuo nnaa bul u wiaa? Ba fa nmunɗse Wia teninɗ tuonɗ a bul, “Nialinɗ sii ko di ba bul Wia wu-zomɗ-la, ba ko worunɗ ne.” ¹⁶ Nialinɗ ko ne a bul Wia wu-zomɗ-la maa, ama nialinɗ si ko jegile nii wialinɗ, ba donsunɗ bi wialinɗ to. Azaaya fa bira bul wiinɗ deenɗ a bul, “La Tiina Wia, kubee ne he dime si laa wialinɗ la si bula piba dii?” ¹⁷ N yie nii wii ne a laa dii. Ba ne nnaa wialinɗ si tige Kirisito le.

¹⁸ Ama mi jan piiese wiinɗ deenɗ: Ba bi Wia wu-zomɗ-la niaa? Ba nia ne. Ba nmunɗse Wia teninɗ tuonɗ a tige Wia wu-zomɗ-la le a bul,

“Ba bul wiaa deenɗba dunia lee-kala ne.

Dunia nuu-kala ne nii wiaa deenɗba.”

¹⁹ Mi saa jan bira piiese wiinɗ deenɗ: “Iziral tinɗaa si nii wialinɗ, ba bi ba bubuonɗ jinɗ?” Moosis ne fa laa sipaanɗ bul wiinɗ deenɗ a bul di Wia si,

“Mi jan len di niaa yaraa bieri nialinɗ si bi mi niaa nnaa wiaa.

Mi jan bira len di ma baaniinɗ sii nialinɗ si bi wiaa jinɗ wiaa.”

²⁰ Azaaya fa chaasa bul wiinɗ deenɗ a bul, Wia si,

“Nialinɗ si bi mii che, ba nami ne.

Nialinɗ ma si bi mi wiaa piiese, mi kenɗ mi titia dageba ne.”

²¹ Ama u bul nla ne a tige Iziral tinɗaa le:

“Mi keŋ mi nisaa chage ne a dieni aa
yireba di ba ko mi teen,
ama ba bi seye.
Ba viami ne. Ba bi sei di ba to mi
niin.”

11

Wia jan fá Iziral tinŋaa nennige

¹ Nii-na saa Wia via u niaa ne
koo? Ai, mi ma titia ŋaa Iziral tiina
ne, a ŋaa Abiraham doho nuu a lii
Benjamin jan niaa tuon. ² Wia bi u
niaa via, nialin u si laa sipaan liise.
Ma bi wialin ba si ŋmunse Wia tenin
tuon ka liisii? Wialin ba si ŋmunsa a
tige Ilaaja lee? Ba ŋmunsa ari Ilaaja
fa bul Iziral tinŋaa wiaa pi Wia a tin
ba haacheba wiaa. ³ U fa si,
“Mi Tiina Wia, ba kpu ŋ nialin sii bul
wiaa, ŋ Din-zon-la dolun le,
a ŋmoo korunu-la ba si saa pin
a lo.

Mi dunɗunɗa ne ka,
ba saa walime di ba kpumi ma
ne.”

⁴ Ilaaja si bul nii, bee ne Wia bira
bula pu? U si,

“Niaa bui balipe ne mi tii.
Niaa deenba kuŋ-kala bi vene-
la ba sii yire Baal kpaara.”

⁵ Nii titia ne u nage Iziral tinŋaa le
bua deen le. Iziral tinŋaa banmene
Wia liise a fába nennige a peba le.

⁶ U si liiseba a fába nennige a peba le
nii, u bi naga ba tintin-zonɗo ba si
tima wiaa ne tii. Di u ne tin niaa wu-
zonɗo wiaa aa fába nennige, nii-na
niaa nennige dee uu fá nii.

⁷ Bee ne saa? Iziral tinŋaa fa sii
che kialin, ba biba naa. Ama nialin
mua Wia si liisa ba tuon ne naba.
Ku-kaanaa tuon dolie. Wia si yireba,
ba via ne. ⁸ Ba bul nii ne Wia tenin
tuon a bul,

“Wia leje ba siaa chuule ne.
Ba bi kuŋ-kalaa na,
ba bi wii-kala maa nii a kaa ko
ari jinin.”

⁹ Devit ma fa bula a bul,
“Bua-la le ba tuon si toro, ba ku
hilimi di ba dii kiaa,

len di wiaa juuba di ba tel, a
nage ba si he bere u keŋ kua
u tel nii. Len di ba tel nii a tin
nii chimin.

¹⁰ Len di ba siaa to di ba si kuŋ-kala
wuo na,
len di wiaa nyageba di ba dudu-
uri wuu.”

¹¹ Mi jan piere wiin deen: Ba si
siera tel nii, ba tele nii di ba wii-wii-
kala dere ne koo? Ai. Ama a tin ba
haache wu-ŋaalaa le, Wia laa nialin
si bi Juu tinŋaa ŋaa ta ne. U ŋaa nii
di Juu tinŋaa yaraa bieri, di ba na
baanin nialin si bi Juu tinŋaa ŋaa
nyun. ¹² Juu tinŋaa haacheba leje
dunia niaa ŋmoo naa-simin ne. Ba
si tele nii ŋaa nialin si bi Juu tinŋaa
ŋaa ŋmoo naa-simin ne. Di u ne
nage ŋla saa, bua-la le Juu tinŋaa
si jan ku laa Wia wiaa dii, dunia
nuu-kala jan paala nii sima kinkeŋ
kinkeŋ.

Wii-la si tii Wia laa nialin si bi Juu tinŋaa ŋaa ta

¹³ Ma nialin si bi Juu tinŋaa ŋaa
ne mi leele chiche di mi bul wiaa
pa. Wia ne tinmi di mi ŋaa nialin
si bi Juu tinŋaa ŋaa nanzo. Mi jon
tintimin deen u ŋaa tintin-fian ne.

¹⁴ Mi sii tin tintimin deen, ŋ bi po
u jan wuo len di mi naanbiirin Juu
tinŋaa yaraa bibieri, a wuo len di ba
donson ma laa Wia wiaa dii, di Wia
laaba ta. ¹⁵ Juu tinŋaa si via Wia
wiaa nii leje dunia ni-kaanaa wuo
sin ne Wia teen. Di Juu tinŋaa ne
bira ku laa Wia wiaa dii, ee ne saa u
jan nage? U jan nage ni-suunun si sii
suun le ne. ¹⁶ Di ŋ ne buu boroboro
munun a laa sipaan loge mua a pi
Wia, duu ne bi disinin kene, ku-
kaanin ma si ka ma bira bi disinin
kene. Di tia naapoloo ma ne zomɗo,
u naakelee ma zomɗo ne.

¹⁷ Juu tinŋaa saa nage tia-la ba
sii yire Oliv ne. Ba keŋ u nenee a
kaa tutugi nuun ne. Wia ŋaa u zon.
Nii ne Wia keri u naakelee donson,
an keŋma kaa mere ba leree, ma
nialin si nage girin tii-naakelee. U

ɲaa ɲii di ma ma pe nii Oliv tii-zɔŋ-la naakelee sima ne. ¹⁸ Ma sí ma titia le bigisu ari ma kpia tia-la naakelee ba si kere ta le. Ma dee bi tia-la naapoloo chaga bil. Tia-la naapoloo ne chagama bil.

¹⁹ Ma jaŋ wuo bul ari Wia kerɪ tia-la naakelee, ka di u keŋma ne mere dime. ²⁰ Wutitii ne, Wia kerɪ Juu tinŋaa ta a tin ba si bi Wia wiaa laa dii wiaa ne. Ama ma-na nialin si bi Juu tinŋaa ɲaa, ma si laa Wia wiaa dii dunɗuŋa wiaa ne tii ma chin kpaŋ kpaŋ. ɲii wiaa ma sí ma titia le bigisu, aŋ keŋ ma titia woruŋ. ²¹ Wia si bi tia-la naakelee titia nennige fá aŋ keriba ta ɲii, di ma ma ne bi ma síaa fiela, u jaŋ kerima ma ta ɲii titia. ²² Ma na ɲii Wia si keŋ zile aŋ bira tere. U tere nialin si miiru hariŋ nyuŋ ne. Ama u keŋ zile ma-na teen, di ma ne seye di ma tuto u zile-la le ari ma si suomi ɲii. ɲii dee u jaŋ kerima ma ta. ²³ Di Juu tinŋaa ne paala birima to Wia, Wia jaŋ bira keŋba kaa mere tii-zɔŋ-la le, bee wiaa Wia keŋ doluŋ duu ɲaa ɲii. ²⁴ Ma nialin si paala bi tii-zɔŋ-la naakelee ɲaa aŋ ɲaa girin tuɔŋ tii-naakelee, ka Wia keŋma a kaa mere tii-zɔŋ-la le, u jaŋ wuo keŋ tia-la titia naakelee u si kere ta a kaa mere.

Wia ma jaŋ laa Iziral tinŋaa ta

²⁵ Mi naanbiirin, wiaa ne he dime Wia fa joŋo faama, mii che di ma jin. Wii-la jaŋ ɲaa di ma sí biina bul ari ma keŋ wu-jimin a bibigisi ma titia le. Wii-la ne ɲla: Iziral tinŋaa si keŋ nyu-duo-la, ba bi jaŋ kenu wuu. Bua-la le di nialin si bi Juu tinŋaa ɲaa ne ku yuge a laa Wia wiaa dii, Iziral tinŋaa nyu-duo-la jaŋ dexe. ²⁶ ɲla le ne Wia jaŋ to a laa Iziral tinŋaa kala ta. Ba ɲmuŋse ɲii Wia tenin tuɔŋ. Ba si,
“La Laataara jaŋ lii Zaayɔŋ.

U jaŋ kiri wu-bɔŋɲɔɔ kala Jekɔb doho niaa tuɔŋ.”

²⁷ Ba bira ɲmuŋsa a bul,
“La di ba jaŋ bil niin a pi dɔŋɔ di mi laa ba haacheba ta.”

²⁸ A tin Juu tinŋaa si via Wia wu-zɔmɔ-la wiaa ne tii ba ɲaa Wia dinɗomɔ, ma nialin saa si bi Juu tinŋaa ɲaa wiaa ne tii. Ama a tin u si liiseba wiaa ne tii ba ɲaa u nichooloo, a tin ba naabalimaba wiaa, ²⁹ bee wiaa kialin kala Wia si joŋo piba ari u si liiseba ɲii, u bira bi jaŋ wuo vɔŋba. ³⁰ Ama, ma-na nialin si bi Juu tinŋaa ɲaa, ma fa via Wia niin wiaa, ama leele Wia fáma nennige ne a tin Iziral tinŋaa ma si via Wia niin wiaa ɲii. ³¹ ɲii titia ne Iziral tinŋaa ma si bi Wia niin ka to leele, Wia jaŋ fába ma nennige, ari u si fáma ma nennige ɲii. ³² Nialin kala si bi Wia niin wiaa ka to, ba haacheba nyageba bil ne, ɲii ne Wia wuo fába nennige.

³³ Wia sí fála nennige ɲii ari ɲii u si keŋ wu-jimin ari ɲii u si jin wiaa bubuɔŋ, u bi maga kene. Kubee ne jin ɲii Wia sí ɲaa wiaa? Nu-kala bi Wia wu-ɲaalaa jin.

³⁴ Kubee ne jaŋ wuo jin Wia tuɔbiinaa?

Kubee ma ne jaŋ wuo dage Wia?

³⁵ Kubee ne ha joŋ kuŋ pi Wia aŋ gberɛ di Wia miira joŋ ku-la pu?

³⁶ Bee wiaa Wia ne ɲaa kuŋ-kala. U doluŋ le ne kuŋ-kala ma he dime. U ne tii kuŋ-kala. Má leŋ di Wia yirin yire wuu. Ami.

12

Wii-chuɔluŋ wonɓii titii-la

¹ ɲii wiaa, mi naanbiirin, a tin Wia si faasa fála nennige wiaa, mii sulma di ma joŋ ma miisin kala a pi Wia, ari ba fa si yie kpu pusun a ɲaa sarika a pi Wia ɲii. Ma si joŋ ma titia a pi Wia ɲii, ma bira sí disinin keŋ, di Wia wuo laama. Wii-chuɔluŋ wonɓiin titia ne ɲii. ² Ma sí sei a joŋ ma tuɔŋ kala a he dunia wu-ɲaalaa le. Ama má leŋ di Wia keŋ ma tuɔbiinaa birime di ba kala zɔŋ. ɲii ne ma jaŋ wuo jin Wia tuɔɔruŋ. Ma jaŋ wuo jin wii-la si zɔmɔ aa tore Wia tuɔŋ aŋ pe zɔŋ ma woruŋ.

³ Wia si keŋ zile mi teen a pemi le nii, mii sulma kuŋ-kala di ma sí ma titia kaa yuge a kii nii ma si maga. Má len di ma siaa fiele. Wia pi nuu-kala yarida ne. Ama ba kii doŋo ne. Nuukala maga duu biine u nyuŋ le a mage nii Wia si joŋ yarida-la pu ne. ⁴ Nuhuobiine yaraa ŋaa kubala ne, ka u nanɗaasiŋ yuge. Nanɗaasi-la kala keŋ ba tiŋtimia ne. Ba bi tiŋtiŋ-bala ka tiŋ. ⁵ Nii titia ne la ma nage. La yuga ne, aŋ ka la kala mere Kirisito le a ŋaa kubala. La ŋaa niyiri-yiriba ne a mere doŋo le a ŋaa yari-bala. ⁶ Wia pila kuŋ-kala doluŋ ne di la kaa tiŋ tiŋtiŋ-yiri-yiriba. U saa lii nii le Wia si fála nennige ne a pela le. U si joŋ dol-la pila nii, má len di la kenu kaa tiŋ. Di la ne wuo wiaa bula pipi niaa Wia Diŋ-zoŋ-la doluŋ le, má len duu mage nii yarida-la Wia si joŋo pila. ⁷ Duu ne joŋ doluŋ piŋ di ŋ tima pipi niaa, ŋŋaa nii. Duu ne joŋ doluŋ piŋ maa di ŋ didage niaa, ŋ ma ŋŋaa nii. ⁸ Di ŋ ne keŋ doluŋ di ŋ wuo didage niaa a len di ba nyuŋ nyinyaase, ŋ ma ŋŋaa nii. Di nuu ne keŋ zile a pipe niaa le, u ma ŋŋaa nii ari tuo-bala. Nii-la kala si keŋ doluŋ a pipe niaa le, u ŋŋaa nii ari siifesiŋ.

Má cho doŋo ari siifesiŋ

⁹ Nii-la si keŋ zile a fifá niaa nennige, aa pe nennige tiŋŋaa le, u ŋŋaa nii ari tuotoŋ. Má cho doŋo ari siifesiŋ. Má bere wu-boŋŋoo, a joŋ ma titia a he wu-zoŋŋoo ŋaaniŋ le. ¹⁰ Má cho ma doŋsuŋ tiŋŋaa si laa Wia wiaa dii woruŋ ari naanbiiriŋ si cho doŋo nii, a fiese siŋ pipi ma doŋsuŋ tiŋŋaa jirima. ¹¹ Ma sí yariwiŋ keŋ, ama má faasa joŋ ma nyuŋ kala he Wia tiŋtiŋŋaa le, Wia Diŋ-zoŋ-la doluŋ le. ¹² Má juuɗe a tiŋ wialiŋ ma sí yiɗu le. Di ma ní na heeŋ, má dii kenyiri. Má pese a chuchuoɗe Wia. ¹³ Má pe ma naanbiiriŋ si laa Wia wiaa dii le ari kialin ba sí che, aa keŋ nuhuɗraa woruŋ.

¹⁴ Má sul Wia duu pe nialiŋ si to naasiŋ dudogisema le, aŋ sí kaliba heba le. ¹⁵ Di niaa tuoŋ ne toŋo, má ma peba le di ma tuoŋ toŋe. Di niaa tuoŋ ne cheye, má peba le di ma tuoŋ chei. ¹⁶ Má kala keŋ nii-bala, ma sí ma titia kaa yuge. Má keŋ ma titia mere nialiŋ si keŋ ba titia muuri le. Ma sí biina ari ma keŋ wu-jimiŋ. ¹⁷ Di nuu ne ŋaa wu-boŋ ma le, mana sí wu-boŋuŋ joŋo tiŋmu. Ama mána ŋaa wii-la si zoŋo, di nuu-kala jiŋ. ¹⁸ Di ma ne wuolo, má len di ma di nuu-kala siŋ. ¹⁹ Mi bii-chooloo, di niaa ne ŋaa wu-boŋŋoo ma le, ma sí ba chimiŋ tiŋ. Wia na baaniŋ ba nyuŋ ne, u ne jaŋ tiŋ ba chimiŋ. Ba ŋmuŋse nii Wia teniŋ tuoŋ a bul, Wia si,

“Di nuu ne ŋaa wu-boŋ ma le, mi ne jaŋ tiŋ u chimiŋ.

Mi ne keŋ doluŋ mi si jaŋ wuo ŋaa nii.”

²⁰ “Ama di losuŋ ne keŋ ŋ diŋdoŋo, ŋaa kudiilee pu.

Di lii-nyuasuŋ ma ne kenu, ŋaa liiŋ pu duu nyua.

Di ŋ ne wuo ŋaa nii, hiisiŋ jaŋ kenu kiŋkeŋ.”

²¹ Ma sí leŋe di wu-boŋŋoo ŋaaniŋ wuoma. Ama má ŋaa wu-zoŋŋoo di ba wuo wu-boŋŋoo.

13

Má tuto ma tiŋteen nihiasiŋ niŋ

¹ Nuukala maga duu tuto u tiŋteen nihiasiŋ niŋ ne. Nuukala bi tiŋteen wuo beŋ, see di Wia liisu a pu doluŋ. Nialiŋ sí beŋ ma tiŋteen ŋaa Wia ne liiseba. ² Nii wiaa nii-la kala si via u tiŋteen nihiasiŋ niŋ, u tiina ma via Wia niŋ wiaa ne. Nii-la kala si ŋaa nii, u jaŋ len di Wia dii u sariya a joŋ cheeriŋ pu. ³ Nialiŋ sí ŋaa wu-zoŋŋoo bi fawulluŋ ka fá ba tiŋteen nihiasiŋ teen, see nialiŋ sí ŋaa wu-boŋŋoo. Di ŋ ne bi che di ŋ fifá fawulluŋ tiŋteen nihiasiŋ teen, ŋŋaa wialiŋ si zoŋo, duu bibesiŋ le. ⁴ U ŋaa Wia tiŋtinnu ne duu peŋ le. Ama di ŋ ne ŋaa wu-boŋ,

fifá u fawullun, bæe wiaa dol-la u si kené, u bi dol-pei ŋaa. U ŋaa Wia tiŋtinnu né. Nuukala si ŋaa wu-bomun, Wia na baaniŋ u nyun né. Nii né tii nii-la síi beŋ tiŋteen jaŋ wuo dɔgise tiina. ⁵ A tiŋ nii wiaa, máa to ma tiŋteen kuhiasin niin. Ma sí nii ŋaa a tiŋ Wia si jaŋ na baaniŋ ma nyun dunduna wiaa. Ama má ma ŋaa nii di ma tuobiinaa kala su Wia sipaan. ⁶ Wia si liise tiŋteen nihiasin, nii wiaa u ma maga di ma tiŋ lanpoo. Lanpoo lilaaraa ma ŋaa Wia tiŋtinnaa né a maa tiŋ tiŋtiniŋ deen a pipi Wia. ⁷ Má tiŋ nuukala chimiŋ ma si kené. Má tiŋ lanpoo a pi lanpoo lilaaraa. Di ma né yoo kuŋ a kaa lii di-bolii kaa ko di ma kaa juu ma tiŋteen, má tiŋ nii ma si maga di ma tiŋ aŋ kaa juu. Má fa nialiŋ si maga di ma fá, a pi jirima nialiŋ si maga di ma pi jirima.

Má cho ma dɔŋsun tiŋŋaa a kaa mu wuu

⁸ Sí nuukala chin dii. Chin-la dunduna si maga di ŋ dii, ŋ bi jaŋ time dere né ŋla: Cho ŋ dɔŋo tiina. Nii-la kala si cho u dɔŋo tiina ŋaa wialiŋ kala Moosis fa si ŋmunsa bil di niaa tuto né. ⁹ Wialiŋ Moosis fa si ŋmunsa bil di niaa tuto dɔŋsun né ŋla: “Sí ŋ dɔŋo tiina haala che, sí niaa kpu, sí gaa, sí nuu kuŋ kaa laa.” Wiaa deenba kala ari wialiŋ dɔŋsun Moosis si ŋmunsa bil di niaa tuto, ba kala ŋaa wu-bala né. U né ŋla: “Cho ŋ dɔŋo tiina ari ŋ si cho ŋ titia nii.” ¹⁰ Di ŋ né cho ŋ dɔŋo tiina, ŋ bi wu-bon kala jaŋ ŋaau lé. Nii wiaa di ŋ né cho ŋ dɔŋo tiina, ŋŋ to wialiŋ kala Moosis fa si ŋmunsa bil di niaa tuto né.

¹¹ Má ŋaa wiaa deenba. Ma paala jin bua deen lé la si he si nage nii né. Bua-la lé ma si jaŋ sii don lé yie né. Bua-la lé Wia si jaŋ laala ta dunia deen lé faasa kpage né. U né kpage kii bua-la lé la si laa sipaan laa Yesu wiaa dii. ¹² Tan kpage pulun né. Mua né ka, ka di wia pɔse. Má saa len di la len birimin

tuon wu-ŋaalaa, aŋ paa laali-yuori genniŋ laale a yuo laalin pi Wia, pulumun tuon. ¹³ Má len di la ken la titia worun ari nialiŋ si he pulumun tuon. Ma sí len di la faasa gbieli gbieli-toonun a bubugi, a ŋŋaa wu-liilin aŋ pe ŋaa wu-bonŋoo. Ma sí dɔŋo yuo, ma ma sí len di ma yaraa bibieri dɔŋo nyun. ¹⁴ Má len di Yesu Kirisito né ŋaa ma laali-yuori gerin, aŋ sí ma yaraa tuotore wu-ŋaalaa lé hariŋ to. Má jon hariŋ yiaba.

14

Ma sí ma naanbiirin si laa Yesu wiaa dii wiaa laa jin

¹ Di nuu né he ma tuon a laa Yesu wiaa dii aŋ bi faasa chin u yarida naan lé, duu níi che u juu ma tuon, má len duu juu di ma kenu worun. Ama ma sí ma tuobiinaa wiaa kaa lere. ² Ma tuon dɔŋo tuobiinaa yie ŋaa u didii kuŋ-kala né, ama dɔŋo ma he dime, u bi u yarida naan lé china worun a ma didii pipaarin dunduna. ³ Ma sí len di nii-la síi dii kuŋ-kala mumon nii-la síi kise kialin lé. Ma ma sí len di nii-la síi kise lé, duu bul nii-la síi dii kuŋ-kala teen ari u bi worun ŋaa, bæe wiaa Wia cho tiina né a len u ŋaa u bii. ⁴ Kubee né kan di ŋ wuo bul di nuu tiŋtinnu cheye nee? Tiŋtinnila kuhian né jaŋ wuo bul duu cheye né koo duu bi cheye. La Kuhian Yesu jaŋ wuo pe u duu chin. U saa jaŋ chin.

⁵ Nia dɔŋo yie biine ari tapulun dɔŋo né kii tapulaa kala. Dɔŋo ma biine ari tapulaa kala ŋaa kubala né. U saa maga di nuukala chin u tuobiinaa lé né. ⁶ Nii-la si biina ari tapulun dɔŋo né kii tapulaa kala, u liise tapulii-la duu zizil la Tiina Yesu né. Nii-la ma síi dii kuŋ-kala, u ma ŋaa nii a zizil la Tiina Yesu né, bæe wiaa u síi dii kialin, u yie lolle Wia né. Nii-la ma síi kise kialin dɔŋsun, u ma ŋaa nii aa zil la Tiina Yesu né, bæe wiaa u ma síi dii kialin u si bi kise, u ma yie lulolle Wia né. ⁷ La

tuon kuŋ-kala bi la titia tii. Di la ne he la miisin le, la bi la titia tii. Di la ne suba maa, la bi la titia tii. ⁸ La si he miisin deen le, la jon la miisin a he la Tiina Yesu nisin le ne. Di la ni che di la suu maa, la jon la titia ma a he la Tiina Yesu nisin le ne. Di la ne weye koo di la ne suba, la he la Tiina Yesu nisin le ne, ⁹ bee wiaa Kirisito suba an bira sii suun le duu tii ni-weyee ari ni-suunun kala ne, a naa ba kala kuhian. ¹⁰ Bee ne saa tii ma tuon donjo bubul u naanbie si laa Yesu wiaa dii teen a bul duu bi worun naa? Donjo ma bee guguune u naanbie si laa Yesu wiaa dii le. La kala jan chin Wia sipaan duu dii la sariya. ¹¹ Ba nmunse Wia tenin tuon a bul nla ne: Wia si,

“Mi si he dime nii,
nuu-kala jan kpirimi mi sipaan
a suri u niin a bul ari mi ne sene
naa Wia.”

¹² Bua-la le la tuon kuŋ-kala jan dage wialin kala u si naa a pu.

Ma si wialin si jan len di ma naanbie juu haache naa

¹³ Nii wiaa, ma bira si len di la bubul la donsun tinnaa teen a bul di ba bi worun naa, ama u maga di ma biina jon wiin deen ne: Ma pupo ma si wii-la si jan bere ken ma naanbie he haache le naa. ¹⁴ La Tiina Yesu len mi jin ari kudiil kala tuo si ken disinnin. Ama niaa donsun biina ari kudiilee donsun ken disinnin ne ba kikise. Di ba ne dii kialin, ba jan chei ba kisin le. ¹⁵ Di kialin n sii dii wiaa ne naa n naanbie tuon chei, n bira buu cho. Kirisito suu u wiaa ne, nii wiaa, si len di kudiile-la n sii dii wiaa cheiu. ¹⁶ Wii-la n si jima duu zomo, si len di niaa kaa birime wu-bon aa bul u wiaa. ¹⁷ Kudiile-la la sii dii ari kialin la sii nyua bi siifan wii naa Wia kuorii-la tuon. Wialin si naa siifan wiaa Wia kuorii-la tuon ne nla: Di la ken tu-pula Wia sipaan, a ken nii-bala, an pe ken tuotorun maa Wia Din-zon-la dolun le. ¹⁸ Nu-kala si to wonbin

deen le a tima pi Kirisito, Wia tuon jan tore u nyun, niaa ma tuon jan tore u nyun.

¹⁹ Ma saa len di la bibiine wialin si jan len di la ken nii-bala, a wuo pipe donjo le a ken dolun. ²⁰ Ma si kialin ma sii dii wiaa tima chei Wia tinnaa. Kudiil kala zomo ne, u bi disinnin kene di maa kise. Ama di kudiile-la donsun ma sii dii ne jan len di nuu juu haache le, u bi maga di ma diiba. ²¹ Wii-la si zomo ne nla: U bi maga di maa chan namia, koo di ma nyua sinin, koo di maa naa wii-na kala si jan len di ma naanbie yenji u wonbin. ²² Di n ne laa dii ari wii ne zomo di n naa, len duu he ma di Wia dunduja pegge. Di nuu ne naa wii-la u si laa dii ari u zomo, di u tuobiinaa ne buu walime ari u sii naa nii, u tuon jan tore. ²³ Ama di nuu ni dii kiaa an biine ari u bi maga duu dii, duu ne diiba, Wia jan jon cheerin pu, bee wiaa u bi wialin u si laa dii ari ba naa wu-zomo ka to. Wii-na kala ne n ninaa an bi laa dii ari u maga di n naa, u naa haache ne.

15

Ma si ma titia tuotore wiaa harin to

¹ La nialin si faasa chin la yarida naan le, u maga di la pe nialin yarida si bi yuge le ari wialin ba si bi ba dolun kene le. U bi maga di la ninaa la titia tuotore wiaa. ² Ma len di la kuŋ-kala naa di u donjo tiina tuon tore, di la peu le nii duu ken dolun a chin u yarida le. ³ Kirisito ma bi u titia tuotore wiaa naa. Ba fa nmunse Wia tenin tuon a bul nla ne a tigeu le:

“Jomo-la kala nialin si tuuse n-na Wia,
ba ne ba jonoo tuusemi.”

⁴ Wialin kala ba fa si nmunse Wia tenin tuon, ba nmunsa di ba dagela ne, Wia ten-la ne dagela nii la si jan naa a ken kenyiri, a naa la nyun nyaase, di la wuo yiyiele kialin si he la sipaan. ⁵ Wia ne pi niaa kenyiri

a wuo ŋaa la nyuŋ nyaase. U jaŋ wuo pema ɛ di ma keŋ nii-bala a wuo tuto Yesu Kirisito naa-buasun, ⁶ di ma kala wuo denne Wia ari nii-bala. U ne ŋaa la Tiina Yesu Kirisito Nyimma.

U maga di nialin si bi Juu tinŋaa ŋaa ma nii Wia wiaa

⁷ Nii wiaa, má sei a keŋ doŋo woruŋ, ari Kirisito ma si keŋma woruŋ nii, di Wia yirin yire. ⁸ Mi jaŋ bula pima ari Kirisito ku tin tinŋaa a pi Juu tinŋaa, a dage nii Wia si keŋ wutitii a ŋaa wialin kala u fa si bula pi la naabalimaba ari u jaŋ ŋaa, ⁹ a wuo leŋ di nialin si bi Juu tinŋaa ŋaa, di ba denne Wia a tin u si fába nennige nii. Ba ŋmuŋse ŋla ne Wia tenin tuon a bul, “Mi jaŋ dennin nialin si bi Juu tinŋaa ŋaa tuon.

“Mi ma jaŋ yii yiilaa a dennin.”

¹⁰ Ba bira ŋmuŋsa a bul ŋla ne:

“Ma nialin si bi Juu tinŋaa ŋaa, ma di nialin kala Wia si liisa, má juose.”

¹¹ Ba bira bul ŋla ne:

“Ma nialin kala si bi Juu tinŋaa ŋaa, má denne ma Tiina Wia, a leŋ di niaa kala ma dennu.”

¹² Azaaya bira bul ŋla ne:

“Jesi doho niaa doŋo jaŋ ko.

U ne jaŋ sii a beŋ nialin si bi Juu tinŋaa ŋaa.

Ba jaŋ jon ba yielaa kala heu ɛ.”

¹³ Wia ne leŋe la keŋ yielaa. Mii che duu leŋ di ma yarida wuo ŋaa di ma tuon tore, di ma hoŋ ari yarifielaa, a bira leŋ duu Din-zon-la dolun ɛ ma yielaa yuge.

Wii-la si tii Pɔɔl tin tinŋaa nialin si bi Juu tinŋaa ŋaa tuon

¹⁴ Mi naanbiirin, mi chaasa ŋaa yarida ari maa ŋaa wu-zonho woruŋ, a jin wiaa ma woruŋ, a wuo didage doŋo. ¹⁵ Ama tenin deen tuon mi keŋ nyu-duon ne di mi wuo liisima wiaa doŋsun ɛ a tin dol-la Wia si pimi wiaa, ¹⁶ di mi tin Yesu Kirisito tinŋaa nialin si bi Juu tinŋaa ŋaa tuon. Mi tin ba tuon a

nage nii-la si kpu pusun pipi Wia ne, a bul Wia wu-zomɔ-la piba. Mi ŋaa nii di Wia wuo laa nialin si bi Juu tinŋaa ŋaa, ari u si laa pusu-la ba si yie kpu a liise sarika a pu. Wia Din-zon-la jaŋ piise ba disinnin ta di Wia laaba. ¹⁷ Yesu Kirisito dolun ɛ mi keŋ wonbiin di mi dage mi titia a tin tinŋaa-la mi si tima pi Wia. ¹⁸ Mi bi nyu-duon kene di mi bul wii doŋ kala, see tinŋaa-la Kirisito si pemi ɛ mi tin, a wuo leŋ di nialin si bi Juu tinŋaa ŋaa ku to Wia niin. Wialin mi si bula ari wialin mi si ŋaa, ¹⁹ wu-kpuŋkperisi-la ari wu-magila-la mi si ŋaa Wia Din-zon-la dolun ɛ ne pe nialin si bi Juu tinŋaa ŋaa ɛ ba ku to Wia niin nii. Mi chaasa bul Kirisito wu-zomɔ-la, a suomi Jerusalem ɛ a golle nii kala a mu yi Iiirikam. ²⁰ Mi he dolun an bul Wia wu-zomɔ-la leena kala niaa ha si bi Kirisito wiaa nia. Mi bi che di mi mu lee-la niaa si laa sipaan mu a bul Wia wiaa, nii ne tii mi ŋaa nii. ²¹ Ba ŋmuŋse ŋla Wia tenin tuon a bul, “Nialin ha si bi u wiaa nia, ba jaŋ nii.

Ba jaŋ nii a jin wialin bubuon.”

Pɔɔl che duu mu na Rom tinŋaa

²² Mi sii bul Wia wiaa leree doŋsun ne tii mi bi ma lerin wuo ko. Mi walima walima di mi ko ne an lol, ²³ ama leele mi bira bi tinŋaa kene tasin deenba ɛ di mi tin, ka mi ma paala cho di mi ko nama faafaa kala. ²⁴ Mii che di mi ku nama bua-la ɛ di mi nii mu Sipeen tinŋee. Di mi ne hoŋ ma teen a dieni mua, mii che di ma pemi ɛ di mi ven mi wonbiin. ²⁵ Ama leele-na mii mu Jerusalem ne di mi pe Wia niaa ɛ dime. ²⁶ Nialin si laa Wia wiaa dii Masidoonia ari Akaaya tinŋee ɛ, ba tuon tore ne ba si kies moribee di ba pe summo-la si he Wia niaa tuon Jerusalem ɛ. ²⁷ Ba titia tuon ne toro ba ŋaa nii. Ba faa biine di ba peba ɛ ne a laa ba chimin. Wutitii, Juu tinŋaa ne leŋe nialin si bi Juu tinŋaa ŋaa ma nii Wia wiaa. Nii wiaa u maga di ba ma pe Juu tinŋaa ɛ ari ba ma

ku-cheelee. ²⁸ Di mi ne tinj tintimin deenj dere, a kenj moribie-la kala ba si kiesa a kaa mu piba, mi janj sii dime a mu Sipeenj tinteenj. Di mi nii mu dime, mi janj ku to nama. ²⁹ Mi jima, di mi ne ko, mi janj wuo pema le woruj, ari Kirisito si pemi le nii.

³⁰ Mi naanjiirin, mii sulma la Tiina Yesu Kirisito doluj le, ari dol-la Wia Din-zon-la si jonjo pila di la cho donjo, di ma pemi le a chuole Wia pimi, ³¹ di Wia liisemi nialinj si via Wia wiaa nisinj le a he Judiya tinteenj le. Má bira sul Wia di u nialinj si he Jerusalem le, di ba tuonj tere ari kialinj mi si janj kaa mu piba nyuj. ³² Ka di Wia ne seye, mi janj ko ma teenj ari tuotoruj, a ku wiesi mua ma teenj. ³³ Wia si wuo nja nuhuobiine kenj yarifielaa, u janj lenj di ma honj ari yarifielaa. Ami.

16

Pool chuole niaa

¹ Mii che mi kenj la dihaala Fiibi dagema ne. U ne nja nialinj si laa Yesu wiaa dii aa hilimi sipaa-laara, a he Kenjiriya le. ² Má kenu woruj la Tiina Yesu doluj le, ari u si maga di Wia niaa kenj donjo nii, a peu le ari kunj-kala u sii che ma teenj. U pe niaa le yuge, a pemi ma le.

³ Má chuole Pisisila ari Akuila. La di ba kala ne tinj tintinjaa aa pi Yesu Kirisito. ⁴ Ba jonj ba miisinj a yoo suuj ne mi wiaa. Nii wiaa mii lolleba. Mi dunduja saa dee, la di nialinj kala si bi juu tinjaa nja anj laa Yesu wiaa dii aa hilimi, la kala nii lolleba. ⁵ Má chuole nialinj ma si laa Yesu wiaa dii a hilimee chuole Wia ba diisinj le. Má chuole mi nanjon-chooluj Epaniitis maa. U ne laa sipaanj laa Kirisito wiaa dii Esia tinteenj le. ⁶ Má chuole Meeri maa. U faasa tinj tintinjaa woruj ne ma teenj. ⁷ Má chuole Anjonikas ari Junias maa. Ba ma nja juu timma ne. Ba di la kala he sarika le. Wia nanjooba-la tuonj ba ne paala faasa chinj woruj. Ba ne laa sipaanj laa Kirisito wiaa dii mi le.

⁸ Má chuole Anpilaatis maa. U nja mi nanjon-choolii ne la Tiina Yesu wiaa. ⁹ Má chuole Abaanis maa, la tintinni-donjo Kirisito tintinjaa le. Má chuole mi nanjon-chooluj Sitakis maa. ¹⁰ Má chuole Apeles maa, u faasa chinj Kirisito wiaa le ne woruj. Má chuole Arisitobalas dia niaa maa. ¹¹ Má chuole Herodian maa. U ma nja juu tiina ne. Má chuole Nasisas dia nialinj maa si laa la Tiina Yesu wiaa dii. ¹² Má chuole Tafiina ari Tifoosa. Ba maa tinj la Tiina Yesu tintinjaa ne. Má chuole mi nanjon-chooluj Pesis. U ma faasa tinj tintinjaa a pi la Tiina Yesu ne. ¹³ Má chuole Rufas maa. U faasa chinj la Tiina Yesu wiaa le woruj ne. Má chuole la duu kala naanj. ¹⁴ Má chuole Asinkitas, Filegonj, Heemis, Patobas, ari Heemas ari la naanjiiri-la kala si he ba teenj. ¹⁵ Má chuole Filologis, Julia, Niirias ari u dihaala. Má chuole Olinpas maa ari Wia nialinj kala si he ba teenj. ¹⁶ Má guori donjo a honj woruj la Tiina Yesu doluj le. Nialinj kala si laa Kirisito wiaa dii aa hilimi lee-na kala, ba maa chuolema.

¹⁷ Mii sulma ne di ma kenj ma titia ari nialinj si yie kenj niaa pupore le a lenj ba yiyenji ba wonjiin ba sii to le. Má liise ma titia ba le. ¹⁸ Njaa deenba bi la Tiina Kirisito tintinjaa ka tinj, ama ba titia wu-chooloo ne baa nja. Ba yie kenj nii-sima a nyise nialinj si bi wiaa jinj. ¹⁹ Nuukala ne nia ari ma sii to Wia niinj wiaa nii. U nii nja mi tuotoru ne, mii juose ma wiaa. Mii che di ma paala jinj wialinj si zomjo aa njaaba, anj liise ma titia wu-bonjo njaaninj le. ²⁰ Di ma nii nja nii, Wia-la si lenj niaa kenj yarifielaa, u bi janj dieni, ka di u kenj Sitaani nyaga bil ma naasinj bubuonj di ma nuose. La Tiina Yesu Kirisito janj fama nennige a pema le.

²¹ Timoti mi tintinni-donjo, uu chuolema. Lusias ari Jeesinj ari Sosipata maa chuolema. Ba ma nja juu timma ne.

²² Mi-na Teetias si nmunse teninj

deen, mi maa chuolema la Tiina Yesu doluŋ ɛ.

²³ Gayas ŋaa mi dia tiina ne, u dia ɛ ne nialin kala si laa Yesu wiaa dii maa hilimi. U maa chuolema. Irasitas, nii-la sii beŋ moribiee taŋ-la ɛ ari la naanbie Kootos, ba maa chuolema.

[²⁴ La Tiina Yesu Kirisito jaŋ fáma nennige a pema kala ɛ. Ami.]

Ma leŋ di la denne Wia

²⁵ Má leŋ di la denne Wia. U ne wuo leŋ di ma wasa keŋ yarida a tin Wia wu-zomɔ-la mi si bula pima a tige Yesu Kirisito ɛ. Wia ne ŋaa nii-la si bi suu. U fa jon u wu-zomɔ-la ²⁶ faa, faafaa kala ne aŋ ɛɛɛ kaa ku lii pulumuŋ tuɔŋ. ɛɛɛ Wia leŋe ba bula pi dunia kala ne di ba laa wialin dii a tutoba. Nialin sii bul wiaa, Wia Diŋ-zɔŋ-la doluŋ ɛ ma fa ŋmuŋse wiaa a tige wiaa deenba ɛ ne Wia tenin tuɔŋ.

²⁷ Má leŋ la to Yesu Kirisito ɛ a denne Wia wuu. U duŋduŋa ne keŋ wu-jimin. Ami.

TEN-BUNBUN-LA PÖÖL SI N̄MUNSA PI KÖRINTI NIAA

¹ Mi-na Pööl, ari la naanbie Sositenis ne n̄munse teniŋ deen pipi-ima. Wia tuutoruŋ le ne u liisemi di mi n̄aa Yesu Kirisito nan̄zoo.

² La n̄munse teniŋ deen a pipi nialiŋ si laa Yesu wiaa dii aa hilimi Kōrinti taŋ-la le ne. Wia ne liisema di ma to Yesu Kirisito le, a n̄aa tuō-pul timma u sipaan. U ne yirema ari nialiŋ kala s̄i chuole Yesu Kirisito a he dunia semε-na kala, di ma n̄aa tuō-pul timma u teen, di Yesu n̄aa la di ma kala Tiina.

³ La Nyimma Wia ari la Tiina Yesu Kirisito lahorimo le, ma jaŋ hoŋ ari yarifielaa.

Wia to Kirisito le ne a pela le

⁴ Mi yie lolle Wia woruŋ a tiŋ ma wiaa, bee wiaa u to u lahorimo le ne a joŋ ku-zoŋho a pima. Kirisito Yesu le ne u to a n̄aa nii. ⁵ Wii-na kala le, Wia to Yesu le ne a pema le woruŋ, ma wuo jin̄ nii ma si jaŋ wuo bubul wiaa aŋ pe jin̄ ba bubuosa maa. ⁶ Wii-la chaasa chin̄ ne, bee wiaa wu-zomō-la ba si bula a tige Kirisito le he ma tuōŋ ne woruŋ. ⁷ Nii wiaa ne tii Wia chaasa pema le woruŋ. Ma s̄i gberε la Tiina Yesu Kirisito duu miira kō nii, u joŋ kialin̄ kala si lii u Diŋ-zoŋ-la teen a dii zile ma le ne. ⁸ Wia ma jaŋ chaasa keŋma woruŋ, a kaa mu yi tapulii-la la Tiina Yesu Kirisito si jaŋ miira kō. U jaŋ keŋma di ma s̄i wu-boŋ n̄aa a mu yi Yesu Kirisito si jaŋ miira kō tapulii-la. ⁹ Wia keŋ wutitii ne. U ne yirema di ma di u Bie Yesu Kirisito ku n̄aa kubala. U ne n̄aa la Tiina.

Nialiŋ si laa Yesu wiaa dii s̄i yuo doŋo

¹⁰ Mi naanbiirin, mii sul ma kala la Tiina Yesu Kirisito doluŋ le, di ma keŋ nii-bala a s̄i doŋo le poru. Mii

sulma di ma keŋ tuō-bala a chin̄ wu-bala le. ¹¹ Mi naanbiirin, mi nia di maa yuo doŋo ne. La naanbie ba s̄i yire Kuluuwi, u dia niaa ne bula pimi. ¹² Mii che di mi bul ari ma kuŋ-kala bi wonbii-bala ka to. Ma doŋo yie bul duu to Pööl hariŋ ne, ka doŋo ma si duu to Apolos hariŋ ne. Doŋo ma si u to Piita hariŋ ne, ka doŋo ma si u to Kirisito hariŋ ne. ¹³ Má len̄ di mi piesema wiin̄ deen. Ni-bala ne tii Kirisito? Ba kpaase Pööl mere daa-gesee nyuŋ duu laama ta nee? Ba foma Wii-chuole liin̄ Pööl yirin̄ le nee? ¹⁴ Mii lolle Wia ari mi si bi ma kuŋ-kala Wii-chuole liin̄ fo, see la naanbie Kirisipas ari Gayas dunduna. ¹⁵ Nii wiaa nuu ma saa bi jaŋ wuo bul ari mi fou Wii-chuole liin̄ di u n̄aa mi haritooru. ¹⁶ Mi liise yi ari mi fo la naanbie Sitefinis ari u dia niaa ma Wii-chuole liin̄. ¹⁷ Mi biina mi bira bi niaa doŋsun̄ Wii-chuole liin̄ fo, bee wiaa Kirisito bimi tima di mi ku fo niaa Wii-chuole liin̄. U tiŋmi ne di mi ku bul Wia wu-zomō-la. Nuhuobiine wu-jimin̄ dee u joŋo pimi mi kaa bubul wialiŋ. U n̄aa nii di dol-la si lii Kirisito le, a tiŋ u si suu daa-gesee nyuŋ nii, s̄i pei n̄aa ne.

Kirisito ne keŋ Wia doluŋ ari u wu-jimin̄

¹⁸ La si si ari Kirisito suu daa-gesee nyuŋ bi bubuō keŋε nialiŋ si lele teen. Ama la nialiŋ Wia si laa ta, wialiŋ la s̄i bul lii u teen ne a keŋ doluŋ la teen. ¹⁹ Wia teniŋ tuōŋ ba bula di Wia si u jaŋ len̄ di wu-jinnaa wu-jimii-la n̄aa pei, ka wu-jin̄ kin̄keŋ tin̄jaa wu-jimin̄ ma n̄aa pei.

²⁰ Di nii ne n̄aa, nii ne wu-jinna-la jaŋ he? Wu-jin̄ kin̄keŋ timma-la, nii ne ba jaŋ he? Nialiŋ si keŋ wiaa kaa lilere dunia deen le, ba ma jaŋ he nii? Wia daga ari dunia deen wu-jimin̄ n̄aa ni-yaari wu-jimii ne. ²¹ Wia si keŋ wu-jimin̄, nii ne tii u wuo n̄aa di nuhuobiine s̄i u titia wu-jimin̄ le to a jin̄ u-na Wia. Niaa si di

Wia wu-zómó-la la síi bul ñaa wu-tóonu né. Ama nialinj si laa wialinj dii, Wia janj laaba ta. ²² Juu tinñaa cho di Wia ñaa wu-magil né di ba na, ka Giriik tinñaa ma cho di Wia dage u wu-jiminj di ba na. ²³ Ama Kirisito si suu daa-gesee nyuj wiaa né la bubul. Kirisito si suu daa-gesee nyuj lenj Juu tinñaa baaninj sisii, anj ka nialinj si bi Juu tinñaa ñaa teenj u ñaa wu-peí né. ²⁴ Ama nialinj Wia si yira kala teenj, Juu tinñaa ari Giriik tinñaa kala, Kirisito le né Wia dolunj ari u wu-jiminj kala hé. ²⁵ U maga di ma jinj ari wii-la si lii Wia teenj, niaa si u ñaa ni-yaari wii né, u paala kpia nuhuobiine wu-jiminj, ka ba bi jinj. Wii-la ma si lii Wia teenj, ka nuhuobiine si u ñaa wu-pugunj, u kenj dolunj a kii nuhuobiine.

²⁶ Mi naanbiirinj, má liise yi nii ma fa si naga bua-la le Wia si yirema. Ma tuonj niaa banmee né fa kenj wu-jiminj, koo ma tuonj niaa banmee né faa dii dolunj niaa le? Ma niaa banmee ma né fa ñaa ni-balaa nuhuobiinee teenj? ²⁷ Wia paala chaasa liise nialinj dunia niaa si si ba ñaa ni-yaari né, duu wuo hé dunia niaa wu-jinnaa hiisinj le. Wia bira liise nialinj ma dunia niaa si si ba ñaa ni-pugununj né, duu wuo hé ni-duorunj hiisinj le. ²⁸ Wia liise nialinj dunia niaa si bee guguune ari nialinj si bi lee kene dunia le, duu wuo chei nialinj dunia niaa si biina ari ba ñaa nia. ²⁹ Wia ñaa nii di nuu-kala sí u dolunj le wuo to a bigisi u titia le Wia teenj. ³⁰ Ama Wia leñe ma to Kirisito Yesu le a kenj miisinj. Wia saa leñe Kirisito né ñaa la wu-jiminj. A tinj u wiaa Wia laala ta né, la ku ñaa tuopul timma u teenj, a ñaa nialinj si bi disinninj kene. ³¹ Wia teninj tuonj ba bula, “Di nuu-kala níi che duu bigisi u titia le, u tiina maga duu bigisi u titia a mu tige wii-la la Tiina si ñaa pu le né.”

2

Pool bul wiaa a mu tige Kirisito si

suu daa-gesee nyuj

¹ Mi naanbiirinj, mi si kó ma teenj di mi bul Wia wu-zómó-la a pima, mi bi wu-duduosi bula a nage di mi kenj wu-jiminj. ² Mi si kó ma teenj, mi naga ari mi bi wii-kala jinj né, see Yesu Kirisito si suu daa-gesee nyuj dunđunja wiaa. ³ Nii wiaa, mi si hé ma teenj, mi fa nage ni-pugu né. Fawullunj fa kenjmi, mi boye jujon. ⁴ Nuhuobiine wu-jiminj dee mi kaa bubul Wia wu-zómó-la, anj pe didage ma maa. Ama nii mi síi bul wiaa daga ari Wia Din-zonj-la dolunj hemi le né. ⁵ Wia ñaa nii mi le di ma na u dolunj a laa u wiaa dii, a sí nuhuobiine wu-jiminj le to.

Wia wu-jiminj kii nuhuobiine wu-jiminj

⁶ Ama nialinj si waa Wia wiaa le, la yie didageba wu-jiminj né. Wu-jiminj deenj la síi dagu tuo dunia deenj niaa wu-jiminj, dunia deenj ni-duorunj wu-jiminj ma dee. Ni-duorunj deenba wu-jiminj janj dere. ⁷ Wu-jimii-la wiaa mi síi bul, u lii Wia teenj né a ñaa wu-faali niaa teenj. Wu-jimii-la faa né Wia teenj né, ka dunia-na suomi. Wia liisela di la kenj wu-jiminj deenj né a wuo kenj tula u teenj. ⁸ Nialinj kala síi benj dunia deenj bi wiaa deenba bubuonj jinj. Di ba né fa jinba, ba fa bi janj kpaase la Tiina-la si kenj tula a mere daa-gese-la nyuj. ⁹ Ba ñmunse Wia teninj tuonj ari ku-la nuhuobiine ha si bi na, ari ku-la u ha si bi u wiaa ma nia, ari ku-la ha si bi nuhuobiine tuobiinaa jua, kialinj titia né Wia wasa bil nialinj si chou le.

¹⁰ Ama Wia to u Din-zonj-la le né a lenj la-na jinj wiaa deenba fa si faa. Wia Din-zonj-la yie gbilli wii-kala né, a paala jinj Wia wii-wii-kala. ¹¹ Nuhuobiinj bée né janj wuo jinj wii-la u donj síi biinu? Nuukala bi wuo jinj, see u tiina titia síi biinu wii-la. Nii titia né nuu-kala bi janj wuo jinj wialinj Wia síi biinu, see Wia Din-zonj-la dunđunja. ¹² La laa Wia Din-zonj-la né. U tuo dunia deenj kunj.

Wia jon u Diŋ-zoŋ-la a pila ne di la wuo jin kialin kala u si joŋo dii zile la le. ¹³ La yie bul kiaa deenba wiaa a pi niaa ne. Dunia deen wujimin dee la kaa bubul wiaa. Ama Wia Diŋ-zoŋ-la ne dagela nii la si jan bul wialin. U yie dage u titia wiaa bubuosa a pi nialin le u si he, di ba ma jin ba bubuosa.

¹⁴ Nii-la kala si bi Wia Diŋ-zoŋ-la kene bi jan laa kialin Wia si joŋo pi nialin si ken u Diŋ-zoŋ-la. U tiina bi jan wuo jinba. Ba yie naa wupeiba ne u teen, bee wiaa nuu bi jan wuo jinba, see duu ken Wia Diŋ-zoŋ-la. ¹⁵ Nii-la si ken Wia Diŋ-zoŋ-la ne jan wuo chagile nuu-kala. Ama nii-la si bi Wia Diŋ-zoŋ-la kene bi jan wuo chagile nii-la si ken Wia Diŋ-zoŋ-la. ¹⁶ Wia tenin tuon nla ne ba nmunse a piase, "Kubee ne jin la Tiina Wia tuobiinaa? Kubee ne jan wuo bul wiaa a chagilu?" Ama la-na jin Kirisito tuobiinaa ne.

3

U maga di Wia tintinnaa pe donjo le a tin u tintinjaa

¹ Mi naanbiirin, mi bi wuo bul wiaa ma teen ari ma naa nialin sii to wialin sii tere Wia Diŋ-zoŋ-la tuon ne. Ama mi bul wiaa ma teen ari nialin sii to ba tuotore wu-naalaa le ne. Ma ha naa hanbiisin ne Kirisito wiaa le. ² Wialin mi si bula ma teen, ba naga yilin ne mi len ma wase. Mi bi wu-yunji kala bula pima. Bua-la le, ma ha bi siri naa di ma nii wu-yunji. Ari leele kala ma ha bi wu-yunji kala wuo nii. ³ Wii-la si tii ma haa to ma tuotore wu-naalaa le ne: Ma si ken yaribierin donjo le nii a yuyuo donjo nii daga ari maa to ma tuotore wu-naalaa le ne, a ninjaa wii-kala ari nialin si bi Wia jin sii naa nii. ⁴ Ma yie pore donjo le ne. Donjo si duu to Pool harin ne, ka donjo ma si duu to Apolos harin ne. Ma sii bul nii, dunia niaa wu-bulaa dee ma bubul nii?

⁵ Kubee ne Apolos? Kubee ne Pool? La naa Wia tintinnaa ne. La ne bul

Wia wiaa pima ma laa dii. La kun-kala tin tintimii-la la Tiina Wia si joŋo pila di la titin ne. ⁶ Wia wialin la si bula pima nage tii-bie ne la chonse. Mi ne chonse tia-la, Apolos ma ne naa liin a mise, ama Wia ne lenje tia-la waa. ⁷ Nii-la si chonse tia-la ari nii-la si naa liin mise tia-la kala bi siifia wii naa. Wia ne kii ba kala, bee wiaa u ne lenje tia-la waa. ⁸ Nii-la si chonse tia-la ari nii-la si naa liin mise tia-la, ba kala tima mage donjo ne. Wia jan tin nuu-kala a mage nii u si tin u tintimii-la mage. ⁹ La kala naa tintinni donse ne a pe Wia le laa tin. Ma saa nage Wia бага ne la pere hihe. Ma bira nage dia-la Wia titia si saa ne.

¹⁰ Tintimii-la mi sii tin, Wia ne jon dolun pimi. Mi nage dii-sara-la si jin dia saanin worun ne a bil Wia-dia-la gentine. Nu ma don ne saa dia-la u jil. Nu-kala saa fiele u siaa a saa dia-la duu jil. ¹¹ Wia laa sipaan ne a jon Yesu Kirisito duu naa u dia-la gentine. Nu-kala bira bi jan wuo bil dia-la gentine yiri. ¹² Di nuu ne jon selime kaa saa dia-la duu jil, koo hoon, koo tabiin, koo daa-borusun, koo tuto, koo kaha, ¹³ di Kirisito ne miira ko tapulii-la, kialin nuu-kala si joŋo saa dia-la u jil, ba jan nau. Nyinin ne jan dage ku-la ba si kaa saa nagisin. Ba jan to nii le a jin tintimii-la nuu-kala si tima. ¹⁴ Di nyin-la ne ko an bi wuo dii kialin nuu-kala si kaa saa dia-la, u tiina jan laa u time. ¹⁵ Ama di nyin-la ne wuo dii kialin nuu-kala si kaa saa dia-la, u tiina jan tel. Ama u-na titia Wia jan laau ta. U jan naga ari nyin-la faa che duu dii u tiina ne, an ka Wia liisu nyin-la le.

¹⁶ Ma bi jin ari ma naa Wia-dia ne Wia Diŋ-zoŋ-la jujuu? ¹⁷ Nii wiaa, di nuu-kala ne chei Wia-dia-la, Wia ma jan chei u tiina. Wia-dia bi disinnin kene. Ma titia ne naa dia-la.

¹⁸ Nu-kala si u titia nyisu. Di nuu ne he ma tuon a biine ari u ken wujimin dunia deen le ne, u maga duu

birime ni-yaari ne a wuo ken wu-jimii-la si lii Wia teenj. ¹⁹ Dunia niaa wu-jiminj n̄aa pei ne Wia teenj. Wia teninj tuɔŋ ba bula ari

“Wia to dunia niaa wu-jiminj le ne a bere keseba.”

²⁰ Wia teninj seme dɔŋɔ ma ba ŋmun̄sa ari wu-jinnaa tuɔbiinaa kala n̄aa pei ne. ²¹ Nii wiaa nuu-kala saa sí u bɔye le ŋmoo a dage wii-la nuhuobiine si janj wuo n̄aa. Wutitii, ma ne tii kuŋ-kala. ²² Ma ne tii Pɔɔl, a tii Apɔlɔs, a tii Piita, a tii dunia, a tii miisinj, a tii suunj ma, a tii lɛɛɛ ari maachie. Ma ne tii ba kala. ²³ Kirisito ne tiima, Wia ma ne tii Kirisito.

4

Yesu nan̄zɔɔba si nage n̄ii

¹ Ma síi ben̄la n̄ii, u maga di nuu-kala jin̄ ari la n̄aa Kirisito tintinnaa ne. La nage nialinj síi ben̄ Wia kiaa pupu ne. U ne leŋe la bubul u wu-kpun̄kperisi-la fa si faa a pipi niaa. ² Ama u maga di tintinni kala kenj wutitii a titinj u tintinj̄n̄aa. ³ Mi sipaa tuo di ma níi bul mi teenj a mu tige wialinj mi síi dage le. Mi paala bi cheerinj jon̄o pi mi titia, n̄ii wiaa nuu-kala bi janj jon̄ cheerinj pimi a mu tige mi wu-n̄aalaa le. ⁴ Mi tuɔbiinaa kala chese ne. Ama mi saa bi janj wuo dage ari mi bi wii cheye. La Tiina Wia ne janj dii mi sariya a jin̄ ari mi cheye ne koo mi bi cheye. ⁵ Nii wiaa, ma sí cheerinj jon̄o pi nuu-kala, see di tapulii-la la Tiina si janj kɔ a dii la sariya. Duu ne miira kɔ, wu-bɔmɔ-la kala niaa si n̄aa biriminj tuɔŋ, ba kala janj ku lii pulumunj. Niaa tuɔbiinj-lɔrunu-la kala ba si kene janj ku lii pulumunj le. Nuukala si kenj time mage n̄ii Wia teenj, u janj laa.

⁶ A tinj ma wiaa, mi naan̄biirinj, mi jon̄ wiaa deen̄ba mi si bula, a kaa dage la di Apɔlɔs si nage n̄ii ne. Mi n̄aa n̄ii di ma wuo gunne a wuo tuto Wia niinj wialinj ari la síi to n̄ii, di ma sí dɔŋɔ le pɔru a cho dɔŋsunj an̄ bere dɔŋsunj. ⁷ Kubee ne n̄aa ma yuga kii

ma dɔŋsunj? Wia dee bi kialinj ma si kene jon̄o pima? Bee ne tii ma bibigisi ma titia le a nage kialinj ma si kene, Wia dee bi jon̄o pima?

⁸ Ma paala kenj kuŋ-kala ma síi che ne. Ma paala kiila ne an̄ leele dii kuorunj. Wutitii, la fa cho di ma dii kuorunj, di la di ma kala biben̄ kuŋ-kala ne. ⁹ U naga ari Wia jon̄ la nialinj si n̄aa u nan̄zɔɔba di la n̄aa ni-peiba ne dunia deenj le. U naga ba liisela niaa tuɔŋ di ba kpula ne. Ba tuɔsela a kaa ku lii, di dunia niaa kala ari Wia tin̄daaraa nala a huurila ne. ¹⁰ A tinj Kirisito wiaa, la n̄aa ni-yaara ne, ka ma-na kenj wu-jiminj Kirisito teenj. La-na n̄aa puwuoloo ne, an̄ ka ma-na n̄aa ni-duori. Niaa mumɔŋla le an̄ zizilma. ¹¹ Naa-buasunj deen̄ba le losunj ari lii-nyuasunj ken̄la ne, la laale geri-kosumɔɔ, ba ŋmun̄moola, la gollo bibaare. ¹² La faasa titinj ne di la pe la titia le. Di niaa ne ŋmiesa hela le, la-na yie sul Wia piba ne, di ba ne to naasinj dudɔgisela, la yie nyalime ne. ¹³ Di ba ne chei la yirinj, la-na yie bubul wu-zɔŋŋɔɔ ne ba teenj. Naa-buasunj deen̄ba le, dunia nisurunj paala kpiala ne.

¹⁴ Ma nage mi bii-choolie ne. Nii wiaa, mi bi wiaa deen̄ba ŋmun̄sa pima di hiisinj ken̄ma, ama mii che di mi chagilema ne. ¹⁵ Di ma ne kenj sipaa-laaraa síi dagema Kirisito wiaa, di ba ne n̄aa bui fii maa, ma bi nyimmaba kene. Mi ne n̄aa ma nyimma Yesu Kirisito le, bee wiaa mi ne bul Wia wu-zɔmɔ-la a pima. ¹⁶ Nii wiaa mii sulma di ma to mi harinj a ŋin̄aa wialinj mi síi n̄aa. ¹⁷ Nii ne tii mi tinj Timoti duu kɔ ma teenj n̄ii. U nage mi bii-choolii ne, a kenj wutitii maa la Tiina Kirisito wiaa le. U janj liliisima n̄ii mi síi to Kirisito wiaa, ari n̄ii mi si yie dageba lee-na kala niaa si laa Yesu wiaa dii aa hilimi tuɔŋ. ¹⁸ Ma dɔŋsunj kenj nyu-duonj ne a bibiine ari mi bi janj ku nama. ¹⁹ Di Wia ne seye, mi bi janj dieni an̄ ku nama. Di mi ne kɔ, mi bi che di mi nii nyu-duo tin̄n̄aa deen̄ba wu-

bulaa dunduna, ama mi jan chiche di mi jin lee-la ba dolun si he. ²⁰ Wia kuorii-la bi nuhuobiine wu-bulaa le china, ama Wia dolun le ne u chin. ²¹ Wu-bee ne ma cho? Mi kori chiba ku viiremaa, koo mi ken chonun ari siifielaa koo?

5

Nialin si laa Yesu wiaa dii donsun ne naa wu-liilin

¹ Ba venee bul, mi nii ari nuu ne he ma tuon a naa disinnin. U nii loru. Nialin si bi Wia jin ma paala bi nii ka naa. Ba bula pimi ari nuu ne he ma tuon a laa u nyimma haala jaa. ² Ee ne saa ma jan wuo naa a bigisi ma titia le? U maga di ma tuon chei ne, ka di ma liise nii-la si naa nii a ta ma tuon.

³ Mi-na, mi paala he di-bolii ne, ama mi dima guoli ma tuon ne. La Tiina Yesu dolun le, mi paala jon cheerin pi nii-la si naa wu-lorun deen ne. ⁴ Mi jon cheerin pi tiina ne. La Tiina Yesu Kirisito dolun le, di ma ne ku hilimi, ka mi dima he ma tuon, ⁵ ma jon baala deen he Sitaani nisin le, di u to u tuotore wu-naalaa le a dogise u yaraa, ka di Wia laa u dima ta tapulii-la la Tiina si jan miira ko.

⁶ Ma sii bigisi ma titia le nii, u naa pei ne. Ma bi jin ari si-burun mua ne ba yie jon he boroboro munun le, ka u sii puore a yugee? ⁷ Ma jon si-buru-binii-la ta. Di ma ne naa nii, ma jan wuo naa tuo-pul timma, a wuo nage boroboro mun-falii-la ba ha si bi si-burun he. Ma saa jima ari ma bi haache kene. La naa siri di la gbieli diisin gbieli-bal-la ne. Kirisito ne naa Pie-bie-la ba si kpua di la kaa dii la diisin gbieli-bal-la. ⁸ Nii wiaa, ma le di la gbieli la diisin gbieli-bal-la. Ma le di la jon boroboro binii-la si ken si-burun ta. Si-buru-la nage haache ari tuo-bomun ne. Ma le di la gbieli ari boroboro-la si bi si-burun kene. Boroboro deen nage wutitii ari tuo-pula ne.

⁹ Ten-la mi si numusa pima, mi bula pima di ma liise ma titia nialin

sii naa disinnin tuon ne. ¹⁰ Mi saa bi bula ari ma si dunia niaa si naa disin tinnaa, koo nialin si ken tuolunun, koo gaaraa, koo vui-kpaaraa tuon guolu. Di ma nii che di ma si ba tuon guolu, nii-na ma bi jan he dunia le. ¹¹ Ama wii-la mi sii bul ne nla: Ma si ma titia kaa mu mere niila si si u naa nialin si laa Wia wiaa dii donso ne an ninnaa disinnin, koo u ken tuolunun, koo u kpaare vuiaa, koo u gollo chichei niaa yirin, koo u naa si-nyuaru, koo u naa gaaru. Ma paala si leje di ma di tiina hon a dii kudiilee maa. ¹² Mi tintimin dee di mi dii nialin si bi Yesu jin sariya. Ama ma-na saa maga di ma dii donso sariya ne. ¹³ Nialin si bi Yesu jin-na, Wia ne jan dii ba sariya. Wia tenin tuon ba bula, "Ma liise nibomun ma tuon."

6

Nii si maga di nialin si laa Yesu wiaa dii bul wiaa wase

¹ Ma nialin si naa Wia niaa, di wii ne ku he ma balia pege, donso yie ken wii-la kaa mu nialin si bi Wia ka chuole teen ne, di ba bul wii-la a wase. Bee ne tii ma naa nla? Bee ne tii ma yie bi leje Wia niaa bul wii-la wiwase? ² Ma bi jin ari Wia niaa ne jan dii dunia niaa sariya? Di ma ne jan dii dunia niaa sariya, ma bi wubiisin deenba wuo bula wiwasee? ³ Ma bi jin ari la Wia niaa ne jan dii Wia tinndaraa ma sariya? A saa ku biben wialin si naa dunia lee? ⁴ Nii-na saa, di wii ku he ma balia pege, bee ne tii ma yie mu nialin si bi Wia ka chuole teen, nialin si bi di-chinii kene nialin si laa Yesu wiaa dii aa hilimi sipaan di ba bula wase pima? ⁵ Ma hiisi ne. Ni-bala paala tuo ma tuon si ken wu-jimin, di wii ne ku he Wia niaa balia pege, duu wuo bul a wasee? ⁶ Ama di Wia niaa balia ne ken wii, donso yie ken u donso tiina mu nialin si bi Wia ka chuole teen ne ba bul wii-la wase piba.

⁷ Ma si venee ken donso mumu niaa deenba teen di ba dii ma wu-bulun

pima, daga ari ma kala tele ne Wia wonjbiinj le. Di nuu ne nnaa wii chei u dɔŋɔ, bɛɛ ne tii u bi tɔrɛ? Di nuu ne gura laa u dɔŋɔ kiaa, bɛɛ ne tii u bi leŋe tiina kiken kialinj? ⁸ Ama ma titia yie nnaa wiaa chichei dɔŋɔ an girima lilaa ma naanjiirin ma kiaa.

⁹ Ma bi jin ari tuɔ-bɔŋ tinŋaa bi jan wuo juu Wia kuorii-la tuɔŋ? Ma sí ma titia nyisu. Nialinj si nnaa disinninj ari nialinj sí kpaare vuiaa, ari nialinj si gollo chiche niaa haalaa, ari baalaa koo haalaa balia si jaa dɔŋɔ, ari baala-la koo haala-la si gollɛ lee-kala aa nnaa ba-liili koo ha-liili wiaa, ¹⁰ ari gaaraa ari tuɔ-lun tinŋaa, ari si-nyuaraa, ari nialinj sí chei niaa yirin, ari nialinj sí girima lilaa dɔŋɔba kiaa, niaa deenba kuŋ-kala bi jan wuo juu Wia kuorii-la tuɔŋ. ¹¹ Ma dɔŋsun faa nnaa wiaa deenba ne. Ama Wia fo ma haacheba ta ne. Wia ne tiima. A tin la Tiina Kirisito Yesu wiaa ari Wia Din-zɔŋ-la dolun le, ma nnaa tuɔ-pul timma ne Wia teenj.

U maga di la leŋ disinj wu-ŋaalaa

¹² Mi jan wuo bul ari di mi ne cho, mi jan nnaa wii-na kala mi sí che. Wutitii ne, ama wii-na kala bi jan nnaa wu-zɔŋ a pimi. Mi jan wuo bira bul ari mi ne cho, mi jan wuo nnaa wii-kala, ama mi bi jan sei di kuŋ-kala ken dolun mi le. ¹³ Nuu ma he dime a ma jan bul, Wia ne nnaa kudiilee ba dii hihe luorun le, ka luorun ma laa kudiile-la bibil. Wutitii ne, ama Wia jan leŋ di kudiilee ari luoru-la kala pua. Wia bi nuhuobiine nnaa duu ken u yaraa nŋaa disinninj, ama duu ken u yaraa tima pupu. Wia ne tii yara-la maa. ¹⁴ Wia dolun le ne u chise la Tiina Kirisito suun le. U jan chisela ma suun le. ¹⁵ Ma bi jin ari ma yaraa nnaa Kirisito yaraa seme dɔŋɔ nee? Ma bira biina ari mi jan wuo jon Kirisito yaraa seme dɔŋɔ a mere ha-chorumun yaraa le? Ai, mi bi jan nnaa nŋii. ¹⁶ Koo ma bi jin di baala ne ken ha-chorumun-la pin, ba

kala nnaa kubala nee? Wia teninj tuɔŋ ba chaasa bul, “Baala ari u haala jan mere dɔŋɔ le a nnaa kubala.”

¹⁷ Nŋii titia ne nŋii-la si ken u titia mu mere la Tiina Kirisito le, ba duu nnaa kubala ne Wia Din-zɔŋ-la dolun le. ¹⁸ Má liise ma titia disinninj le. Haache-dɔŋ-na kala nuhuobiine si nnaa bi u yaraa ka chei, ama baal-la si nnaa disinninj yie chei u yaraa kala ne. ¹⁹ Ma bi jin ari ma yaraa nnaa Wia Din-zɔŋ-la u si jonjo pima dia nee? Ma dee bi ma titia tii. Wia ne tiima. ²⁰ Wia jon u chalin ne yɔɔma. Nŋii wiaa, má ken ma yaraa tin tinŋimii-la sí tɔrɛ Wia tuɔŋ.

7

Pɔɔl bul ha-jaari wiaa

¹ Tenj-la ma si nŋmunsa pimi tuɔŋ ma piesemi wiaa dɔŋsun. Mii che di mi bul wiaa a tige wialinj le ne. U nnaa wu-zɔŋ ne di baala ne bi haala jaa. ² Ama a tin wu-liilin wiaa, baal kala jaa u haala, di haal ma kala jaa u bala. ³ U maga di baala ari u haala jon ba titia a pipi dɔŋɔ, a nŋnnaa dɔŋɔba tuɔtɔrɛ wiaa. ⁴ Haala bi u titia tii, u bala ne tiu, baala ma bi u titia tii, u haala ne tiu. ⁵ Di baala ní che u haala, u bi maga di haala via, di haala ma ní che u bala, u bi maga di u bala ma via, see di ba kala seye ari ba bi jan jin dɔŋɔ a mage tapulaa banmene, an jon ba titia kala he Wii-chuɔlun le. Ama di ma ne chuɔle Wia derɛ, má bira suomo jin dɔŋɔ. Di ma ní nnaa nŋii, Sitaani bi jan wuo na wonjbiinj a jonma he haache le a tin ma si bi ma titia keninj jin wiaa. ⁶ Mi sí bul wiinj deen a pipima, u bi naga ari mii che di mi bil wii ne pima di ma tuto. ⁷ Wutitii ne, mi fa jan cho di ma kuŋ-kala nagemi a bi haala jaa. Ama nuu ma kala ari u wii Wia si jonjo pu ne. Wia yie jon wiinj deen a pi kubala a jon wii dɔŋ a pi nuu dɔŋ maa.

⁸ Mii che di mi bul bonjonŋoo ari ha-bonjonŋoo ari ma yo-haalaa wiaa ne. U jan nnaa wu-zɔŋ di ma ma ne nagemi a bi baala koo haala

jaa. ⁹ Ama di ma ne bi ma titia wuo kikenj, má mu jaa balaba ari haalaa. U ne kpia ma si jan jon baalaa koo haalaa wiaa a he ma nyunj le.

¹⁰ Baala-la si kenj haalaa ari haala-la si kenj balaba, mii che di mi bul wiinj deenj pima ne. Mi titia dee bi bul, ama la Tiina níi bul wii-la. U ne nja: ari haala bi maga duu via u bala, ¹¹ ama di haal ne via u bala, u maga duu bira sí baal donj jaa ne, anj honj a nja ha-bonjonj. Duu ne na duu bi bonjorunj wuo honj, u maga duu miira mu u bala teenj. Baala ma bi maga duu via u haala.

¹² Ma ni-kaanaa maa, mi-na Pool ne bul wiinj deenj pipima, la Tiina Wia dee. Di baal-la si laa Wia wiaa dii ne kenj haal-la si bi Wia wiaa laa dii, di haal-la ne seyε di ba honj, baal-la bi maga di u viau. ¹³ Di haal-la si laa Wia wiaa dii ne kenj baal-la si bi Wia wiaa laa dii, duu ne seyε di ba duu honj, u bi maga di haal-la viau. ¹⁴ Wii-la si tii ne nja: Di haala ne laa Wia wiaa dii anj ka u bala bi laa dii, a tinj haal-la wiaa, Wia yie jonj ari baal-la ma bi disinninj kene. Nii titia ne, di baal ne laa Wia wiaa dii anj ka u haala bi laa dii, a tinj baal-la wiaa, Wia yie jonj ari haal-la ma bi disinninj kene. Di nii fa dee, ba biirinj fa jan nage nialinj si bi Wia ka chuole biirinj a kenj disinninj. Ama ba biirinj bi disinninj kene Wia teenj. ¹⁵ Baal koo haal, di ba tuonj nii-la si bi Wia ka chuole níi che di nii-la u si jaa viiri, u maga duu viiri. Duu ne viire, nii-la síi chuole Wia bi wii nja chei. Wia yie chiche di ma honj som ne. ¹⁶ Haal-la si laa Wia wiaa dii, anj ka u bala bi Wia wiaa laa dii, εε ne nj janj wuo nja jinj ari nj bala ma janj ku laa Wia wiaa dii? Baal-la ma si laa Wia wiaa dii, ka u haala bi Wia ka chuole, εε ne nj ma janj wuo nja jinj ari nj haala janj ku laa Wia wiaa dii?

¹⁷ Ku-la kala Wia si jonj pinj, ari nii nj fa si naga ka Wia yirinj, u maga di nj kenu ne. Wiinj deenj ne mi didage nialinj si laa Yesu wiaa dii aa hilimi lee-na kala. ¹⁸ Di nuu ne fa

keri u peninj ka Wia yiru, u bi maga duu biine ari u nja wu-bonj ne. Di nuu ma ne bi u peninj kere anj ka Wia yiru, u tiina bi maga duu keru u peninj. ¹⁹ Di nj keru nj peninj koo di nj bi kere, u bi wii kene Wia teenj. Wii-la si nja siifianj wii ne, di ma tuto Wia niinj wialinj u si bula. ²⁰ Nuukala si nage nii anj ka Wia yiru, ú nage nii. ²¹ Di nj ne fa nja yonj anj ka Wia yirinj, sí leje duu nja wiikala. Ama di nj ne na wonbiinj nj si janj wuo tii nj titia, u maga di nj tii nj titia ne. ²² Yonj-na kala la Tiina Kirisito si yira, u tiina tii u titia ne Kirisito teenj. Nii titia ne nii-la si tii u titia anj ka Kirisito yiru, nja Kirisito yonj ne. ²³ Kirisito ne jonj u chalinj yooma. Nii wiaa, ma sí nuhuobiinee yosunj nja. ²⁴ Mi naanbiirinj, nuukala si nage nii anj ka Wia yiru, u maga duu nage nii titia ne.

Bonjonjoo, ha-bonjonjoo ari yo-haalaa wiaa

²⁵ Ma si piesemi wii-la a mu tige ha-toloo le, Wia bi wii-kala bula pila a mu tigeba le, ama Wia si fámí nennige nii, u leje mi nja ni-titii, nii wiaa mii che di mi bul wii ne a tige ha-toloo le. ²⁶ A tinj leele tinjteenj si dolie wiaa, u janj zonj di baal ne bi haala kene. ²⁷ Nj jaa haala nee? Pupo nj síu via. Nj bi haala jaa? Nii-na bira sí haal che. ²⁸ Ama di nj ne jaa haala, nj bi haache wii nja. Di ha-tolo ma ha si bi bala jaa, duu ne jaa bala, u bi haache wii nja. Ama nialinj si jaa haala koo baala, ba yie juu wiwalimaa tuonj ne. Mi bi che di ma juu wiwalimaa deenja. Nii ne tii mi si ma sí baala koo haala kenj. ²⁹ Mi naanbiirinj, wii-la mi síi bul ne nja: La bi janj dieni dunia deenj le. Nii wiaa, nialinj si kenj haalaa, maga di ba nage ari ba bi haalaa kene ne. ³⁰ Nialinj síi yel maga di ba nage ari ba tuonj bi cheye, ka nialinj síi monj maga di ba naga ari ba tuonj bi toro. Nialinj síi yoo kiaa maga di ba nage ari ba bi kunj-kala ka yoo. ³¹ Bayalaa ma maga di ba nage ari ba bi kiaa

yalle. Dunia deen naging, u bi jan dieni kinkeŋ.

³² Mi bi che di wiaa walimema. Baal-la si bi haala kene yie jon u nyun kala he la Tiina tintinŋaa le ne. U yie chiche duu tima pi u Tiina duu tuon tɔre ne. ³³ Ama baal-la si keŋ haala yie bibiine dunia wu-ŋaalaa wiaa ne, be wiaa u yie chiche duu ŋaa wiaa duu haala tuon tɔre ne. ³⁴ Nii wiaa, u yie keŋ tuobiinaa balia ne a titin u tintinŋaa. Haal-la koo ha-tolo-la si bi bala kene yie jon u titia kala a he la Tiina tintinŋaa le ne. U yie chiche duu yaraa ari u tuon kala pullɛ Wia teen ne. Ama haal-la si keŋ bala yie jon u titia kala he dunia wu-ŋaalaa le ne, be wiaa u yie chiche duu ŋaa wiaa duu bala tuon tɔre ne. ³⁵ Mii che di ma pe ma titia le ne, nii ne tii mi bubul wiin deen. Mi bi che di mi kirima ma tuotɔre wu-ŋaalaa le. Ama mii che di ma ŋaa wialin sii to wonbiin le ne, a jon ma titia ari ma wii-wii-kala a he la Tiina tintinŋaa le.

³⁶ Baala si sugɛ ha-tolo duu jaa, di haal-la ma ne seye di ba jaa donɔ, an ka a tin Wia tintinŋaa wiaa ba hono an bi donɔ le he, di baal-la ne bene ari u bi u titia wuo keŋ, duu che siifiesin duu jin haal-la, u maga duu jaau a kenu. U nii bi haache kene. ³⁷ Ama di baal ne he dime a jin u tuon le ari u jan hon an bi haal jin, a biine wii-la le a mu dɛre, a wuo keŋ u titia worun haalaa wiaa le, a wuo jin ari u bi jan jaa ha-tolo-la u si suga, ama ba duu hon an bi donɔ jin, u tiina ŋaa wu-zon ne. ³⁸ Nii wiaa, di baal-la ne jaa haala u ŋaa kukeri ne, ama nii-la si bi haala jaa ne paala kpiau.

³⁹ Haala si keŋ bala, di u bala ne he u miisin le, u bala-la ne tiiu. Ama di u bala ne suba, u keŋ wonbiin duu bira jaa baal don u si cho. Ama u maga duu jaa nii-la si cho la Tiina ne. ⁴⁰ Duu ne bi bala jaa, u jan na tuotɔrun. Mi tuobiinaa ne nii. Mi bul wiin deen, be wiaa ma jima ari Wia Din-zon-la hemi le.

8

Vuiaa kiaa diinin wiaa

¹ Ma si piesemi wiaa donsun a mu tige vuin kudiilee le, mii che di mi bul wiaa a mu tigeba le ne. U ŋaa wutitii ne ari la kala jin wiaa ne. Wu-jimin saa yie keŋ u tiina bibigisi u titia le ne. Ama nalin si cho niaa yie peba le ne di ba chin wialin ba si laa dii le worun. ² Nii-la si biina duu jin wiaa ne, u bi wii-kala jin ari u si maga duu jin nii. ³ Ama di nuu ne cho Wia, Wia jin u tiina ne.

⁴ Nii wiaa an ka vuin kudiile-la wiaa. La jima ari vuin bi kuwei ŋaa. La bira jima ari Wii-bala dunɔn ne he dime. ⁵ Di vuiaa ma ne he dime, di ba ne he wia nyun koo tinteen, di ba ne keŋ dolun niaa le maa a yuge, ⁶ la-na jin Wii-bala ne. U ne ŋaa la Nyimma. U ne ta kun-kala si he dime. U ne tiila. U le ne la to a keŋ miisin. La Tiina ŋaa kubala ne. U ne Yesu Kirisito. U le ne Wia to a ta kun-kala. U le ne la to a keŋ miisin maa.

⁷ Ama niaa kala dee bi wiin deen jin. Niaa donsun fa kpaare vuiaa a mal ne kinkeŋ, ari jinin kala di ba nii dii vuiaa kudiilee, ba yie biine ari ba pe nalin sii kpaare vuiaa le ne. Ba yie bibiine ba tuobiinaa le ari ba ŋaa wii ne a chei. ⁸ Kudiilee bi jan wuo len di Wia ari nuhobiinee pege zon. Di η ne dii kudiilee donsun an vivia donsun, u tuo wii-kala Wia teen. ⁹ Ma nalin si laa Wia wiaa dii a jin ari ma jan wuo dii kun-kala, ma fiele ma siao, di nii dee ma jan len di nalin ma si laa Wia wiaa dii an bi ba le china worun juu haache le. ¹⁰ Ma nalin si waa Wia wiaa le, di ma donsun ne juu vuin dia a hono didii kiaa, di nalin si bi waa Wia wiaa le ne nama di ma dii kudiilee deenba, ma bi jin ari ba ma jan to ma harin a didii kiaa deenba? Ba si ŋaa nii, ba jan biine ari ba ŋaa wii ne a chei. ¹¹ A tin ma wu-jimin deen, ma naanbie tele ne, nii-la wiaa Kirisito si suba. ¹² Nii wiaa, di kudiile-la ma

sii dii ne leŋe di ma naanbiirin to a juu haache le, maa chei u tuobiinaa ne nii. Di ma ne ŋaa nii, ma juu Kirisito haache le ne. ¹³ Nii wiaa, di mi ne jima ari di mi ne dii kudiil doŋ, mi naanbie jaŋ tel, nii-na mi bi jaŋ dii.

9

Wialin Yesu nanzɔɔba si jaŋ wuo ŋaa

¹ Ma si nami nii, mi bi mi titia tii? Mi bi Wia nanzɔɔ ŋaa? Mi ha bi Yesu la Tiina naa? Ma si laa wialin dii bi daga ari mi tima pi la Tiina nee? ² Di niaa doŋsun ne paala bi laa dii ari mi ŋaa Wia nanzɔɔ, mana teen mi ŋaa ne. Miisi-la ma si kene la Tiina Kirisito teen daga ari mi ŋaa u nanzɔɔ ne a tima pupu.

³ Di niaa nii bul mi teen, ŋla ne mi yie bul a laa mi titia: ⁴ U bi wonbiin kene la sii bul Wia wiaa a pipima, di ma ma pila kudiilee ari liin la nyunyua, koo? ⁵ U bi wonbiin kene di la ma jaa haalaa, di ba to la harin a mumu lere-la la sii bul Wia wiaa, koo? Wia nanzɔɔba doŋsun ari la Tiina Yesu ŋaanaa ari Piita ba sii yire Kiifas yie ŋaa nii ne. ⁶ Koo la di Banabas dunɔɔna ne maga di la bul Wia wiaa aŋ pe tima pe la titia lee? ⁷ Laali-yuori bee ne yie chiche u titia kiaa u tinŋinaa le? Paari bee ne bi u titia бага kiaa ka dii? Na-daari bee ne bi u titia na-yilin ka chage?

⁸ Ma biina mi keŋ wialin dunia niaa sii ŋaa tapulii-na kala ne la kaa mimagisee? Wialin Moosis si ŋmunsa bil di niaa tuto, ba bi nii titia bula ba lee? ⁹ Wialin Moosis si ŋmunsa bil tuɔŋ, ba bula ari "Ba bi muŋ-nɔnnu chanŋpanŋaa ka chagise." Wia sipaan tuo muŋ-nɔnnu-la le. ¹⁰ Wia si bul wiin deen, la wiaa ne u bubul nii. La nialin sii bul Wia wiaa ne ba ŋmunse wiin deen pa. Paaraa ari nialin sii kuŋ бага kiaa kala yie yiyele ari ba keŋ toruŋ ne kialin le. ¹¹ Nii titia ne Wia wialin la si bula pima nage ku-doho

ne la duu ma teen. Nii-na di ma nii pela le ari dunia kiaa, ma si biina ari maa ŋaa kikieli ne. ¹² Di ma nii pi niaa doŋsun kiaa deenba, u bi maga di ma faasa pila a kiiba? Ama la ha bi kuŋ laa ma teen, di la si wiikala ŋaa kere Wia wu-zomɔ-la si tige Kirisito wonbiin le. ¹³ Nuukala dii u tinŋinaa lerin ne. Ma jima nii-la sii tin Wia-dia le ka dii Wia-dia le ne, ka nialin ma si kpu pusun pipi Wia ma yie didii namia-la ne. ¹⁴ Nii titia ne la Tiina bul di nialin sii bul Wia wu-zomɔ-la, di ba ma to dime a ma didii ba kudiilee.

¹⁵ Ama mi ha bi wonbiin deen to a chiche mi ku-cheele. Mi saa bi tenin deen ŋmunsa pima, di mi laa kiaa ma teen. Mi bi jaŋ sei di nuukala joŋ kuŋ pimi, di mi si wuo bigisi mi titia le wonbii-la mi sii to le. Mi si jaŋ suu ne kpia nuukala si jaŋ ŋaa nii mi le. ¹⁶ Mi bi wonbii kene di mi bigisi mi titia le a tin mi sii bul Wia wu-zomɔ-la wiaa. Ba tinmi ne di mi bulba. U saa fa jaŋ lore pimi di mi ne bi Wia wu-zomɔ-la bula. ¹⁷ Di mi ne fa bul Wia wu-zomɔ-la mi titia tuɔtoruŋ le, nii ne mi fa jaŋ chiche di mi laa time. Ama tinŋimii deen mi sii tin, mi titia tuɔtoruŋ le dee mi titin, ama Wia ne si mi titin. ¹⁸ Nii wiaa saa, bee kuŋ time ne ba jaŋ joŋo tinmi? Mi bi kuŋ-kala ka che. Mi tinŋimin ne di mi bul Wia wu-zomɔ-la a pima, a si kuŋ-kala laa nuukala teen. Mi bi jaŋ laa ku-la si maga di mi na a tin mi sii bul Wia wu-zomɔ-la wiaa.

¹⁹ Mi ne tii mi titia, mi tuo nuukala yon. Ama mi keŋ mi titia ŋaa nuukala yon ne di mi na niaa yuge di ba ku to Wia. ²⁰ Di mi ne mu juu tinŋaa teen, mi yie keŋ mi titia a nage ari mi ŋaa juu tiina ne, di mi wuo bul Wia wiaa piba, di ba wuo ku to Wia. Di mi ne mu nialin sii to wialin Moosis si ŋmunsa bil di niaa tuto teen, mi yie keŋ mi titia a nage ba tuɔŋ doŋɔ ne, ama mi bi ba wonbii-la-na ka to. Mi yie ŋaa nii di mi wuo na di ba doŋsun ku tuto Wia ne. ²¹ Nii titia ne, di la di nialin

si bi Juu tinɲaa ɲaa ne hɔnɔ, mi yie keɲ mi titia birime ba dɔɲɔ ne, di mi wuo na di dɔɲsun ku tuto Wia. Wiin deen bi naga ari mi bi wialin Wia si bula di la to ka to. Ama mi sene tuto wialin Kirisito si bula ne. ²² Di mi ne mu nialin si bi waa Wia wiaa le teen, mi yie keɲ mi titia a nage ba dɔɲɔ ne, di mi wuo leɲ di ba ku to Wia. Mi yie keɲ mi titia birime a nage nuu-kala ne di mi wuo laa dɔɲsun ta, di mi ne wuolo. ²³ Wiaa deenba kala mi sii ɲaa, mii ɲaaba a tin Wia wu-zɔmɔ-la wiaa ne. Mi ɲaa ɲii di mi ma wuo na ku-zɔmɔ-la nialin si laa Wia wu-zɔmɔ-la dii si jan na Wia teen ne.

²⁴ Ma kala jima ari di ba nii fá, fifaara-la kala yie fá ne. Ama ba tuɔɲ ni-bala ne yie dii. Nii wiaa, má faasa fá a wuo dii a laa kiaa. ²⁵ Fifaari-na kala ba sii dagu yie wuo keɲ u titia wii-na kala le ne duu wuo fá a dii. Ama u si yie fá a dii ku-la, u bi dieni an ka u chei. Ama la-na yie fá a dii ku-la si bi chei ne. U jan he dime deen deen. ²⁶ Nii ne tii mii fá tegi tegi a mumu diderin ɲii. Bira ɲii ne tii mi nage chɔria ɲmunmooro ɲii. Mi bi mi nisin viise tita pei. ²⁷ Mi keɲ mi titia kala a ɲaa mi yaraa diri ne ari ɲmobun le. Mi ɲaa ɲii di mi wuo keɲ mi titia he dɔɲɔ le ne. Di ɲii dee, di mi ne bul Wia wu-zɔmɔ-la a derɛ, ba jan bula pimi ari mi bi toru kene Wia kuorii-la tuɔɲ.

10

Má sí vuiaa kpaaru

¹ Mi naanbiirin, mii che di ma liise mu yi wii-la si ɲaa la naabalimaba fa sii to Moosis hariɲ le. Wia leɲ duɔɲbilingbaanin ne ku kiese to ba kala le, a beɲ ba nyun worun ba kala kieli mugi-bal-la ba sii yire Mugi-fian. ² Duɔɲbilingbaan-la si kiese toba le ɲii leɲ ba wuo kieli muga-la. U ɲii nage ari ba kala fa fo Wii-chuɔle liin ne a ɲaa Moosis haritooro. ³ Ba kala ma dii kudiile-la Wia si joɲo lo a piba. ⁴ Ba kala ma ne nyua lii-la si lii Wia teen. Lii-la Wia si piba di ba nyua lii bun le ne.

Kirisito titia ne saa ɲaa Bun-la, ka u to ba hariɲ. ⁵ Ari ɲii kala, Wia tuɔɲ fa bi ba jesin nyun toɔ, ɲii wiaa ne tii Wia kpuba giri-bine tuɔɲ.

⁶ Wiaa deenba kala ɲaa wu-magilaa ne. Baa dagela di la sí wu-bɔɲɲɔ cho ari niaa deenba fa si choba ɲii ne. ⁷ Ma sí vuiaa kpaaru ari la naabalimaba tuɔɲ niaa dɔɲsun fa sii kpaaru ɲii. Wia tenin tuɔɲ ba si, “Nialin hɔnɔ di ba dii kudiilee, an sii gua a ɲaa wu-liilin.”

⁸ Bira u bi maga di la ɲaa wu-liilin, ari la naabalimaba tuɔɲ niaa dɔɲsun fa sii ɲaa ɲii. Nii wiaa ne tii Wia leɲ ba niaa bui mara ari batori sii suu che-bala. ⁹ Ba tuɔɲ dɔɲsun ma fa magise la Tiina Wia ne. Nii ne u leɲ dinɲaa dinba a kpu. U bi maga di la ma magisu. ¹⁰ Ba tuɔɲ dɔɲsun ma fa gugurime wiaa Wia teen. Nii ne u leɲ u tinɲaara ku kpuba. ¹¹ Wia ɲaa wiaa deenba kala ba le duu chagileba ne. Ama ba saa ɲmunse wiaa deenba bil ne a pila di ba didagela wiaa ne. La he bua-la le dunia si kpage diderin ne. ¹² Nii wiaa nuu-kala sí biina ari u chin worun ne wialin u si laa dii le. U maga duu fiele u siaa ne, di ɲii dee u jan tel. ¹³ Di Sitaani ne ku magise nuu, u maga duu jin ari ɲii titia ne Sitaani yie mimagise nuhuobiinee kala. Ama Wia keɲ wutitii ne. U bi jan sei di Sitaani magisema a kieli ɲii ma si jan wuo ɲaa, a chin wialin ma si laa dii le. Bua-la Sitaani sii magisema maa, Wia jan pima dolun di ma wuo nyalime. U jan dagema wonbii-la ma si jan to a lii wii-la le.

¹⁴ Nii wiaa, mi nanɔɲ-choolie, má liise ma titia vuiaa kpaarin le. ¹⁵ Mi jima di ma keɲ wu-jimin ne, ɲii ne tii mi bul wiin deen pipima. Má biine wiin deen worun. ¹⁶ Di la nii dii kudiile-la Kirisito si si di la dii a liliisi u wiaa, la yie sul Wia ne, an ka la jon nyunyuala-la a nyua u tuɔɲ kiaa. La si ɲaa ɲii yie dage ari a tin Kirisito chalin wiaa la ɲaa kubala ne. Di la ne dii boroboro-la maa, u ɲii daga ari a tin Kirisito yaraa wiaa

la kala ɲaa kubala nɛ. ¹⁷ Boroboro bala nɛ la yie didii. Nii wiaa la kala ɲaa kubala nɛ, bɛɛ wiaa la kala kɛɲ boroboro bala nɛ a kaa kpaa dɔɲɔ. ¹⁸ Má biine mu yi Iziral tinɲaa lɛ, ba nialin fa si yie kpu pusuɲ a nyige a pipi Wia. Di ba nɛ kpu puna-na kala, ba ma yie chaɲ ba toruɲ nɛ. Nii daga ari ba di Wia kala ɲaa kubala nɛ a tin ba kala si dii puna-la ba si kpu pi Wia. ¹⁹ Wiin deen mi si bula, u bubuɔɲ nɛ bɛɛ? Ma biina mi si di vuuia ari vuuia kudiilee ɲaa kiaa nɛɛ? ²⁰ Ai, wii-la mi si bula nɛ ɲla: Di vui-kpaaraa nɛ kpaare vuin, kuɲ-na kala ba si kpua, ba yie kpu pi jinsin nɛ. Wia dee ba kpu pa. Mi saa bi che di ma di jinsin ku ɲaa kubala. ²¹ Ma di Wia bi jaɲ wuo pɛ nyunyuala, aɲ ka ma di jinsin ma pɛ nyunyuala. Ma bira bi jaɲ wuo didii kiaa Wia teen aɲ bira mu didii jinsin ma teen. ²² Koo laa che di la ɲaa di Wia baaniɲ sii nɛɛ? Koo la biina la nɛ dolie kii Wia?

²³ Mi jaɲ wuo ɲaa wii-kala, ama ba kala bi jaɲ wuo pemi lɛ. Ba kala bi jaɲ wuo ɲaa di mi waa Wia wiaa lɛ. ²⁴ Nuukala bi maga duu ɲaa u tuɔɔɔre wiaa, ama u maga duu ɲɲaa u dɔɲɔ tiina tuɔɔɔre wiaa nɛ. ²⁵ Ma jaɲ wuo dii namia-na kala ba sii yallu yɔbɔ lɛ. Ma sí leɲe di ma tuɔbiinaa walimema a mu tige namia-la lɛ, ari ma jaɲ wuo dii koo ma bi jaɲ wuo dii. ²⁶ Wia tenin wiaa tuɔɲ ba si, “Dunia ari kuɲ-kala si he u tuɔɲ, la Tiina Wia nɛ tiiba.” ²⁷ Di nii-la si bi Wia ka chuɔlɛ nɛ yirin di ɲ ku dii kiaa, di ɲ nɛ cho di ɲ mua, mu a dii, ama sí leɲe di ɲ tuɔbiinaa walimin a mu tige kudiile-la lɛ, ari u maga di ɲ dii koo u bi maga di ɲ dii. ²⁸ Ama di nuu nɛ bula pin ari kialin ɲ sí dii ɲaa vuin kiaa nɛ, u naga ari nii-la si bula pin tuɔbiinaa ka walimu nɛ a mu tige kudiile-la lɛ. Nii wiaa sí dii. ²⁹ Sí ɲ tuɔbiinaa lɛ to a dii, to nii-la si bula pin tuɔbiinaa lɛ a sí dii. Di mi nɛ jima ari mi kɛɲ wɔɲbiin di mi ɲaa wii, bɛɛ nɛ saa tii nuu dɔɲ tuɔbiinaa jaɲ wuo pɔ di mi

sí wii-la ɲaa? ³⁰ Di mi nɛ lolle Wia aɲ-na dii kudiil-na kala, ɛɛ nɛ saa nuu dɔɲ jaɲ wuo bul ari mi cheye nɛ a tin kudiile-la mi si die wiaa?

³¹ Nii wiaa kuɲ-na kala ma sii dii ari kuɲ-na kala ma sii nyua, wii-na kala ma sii ɲaa, má ɲaa ba kala di Wia yirin yire. ³² Wii-na kala ma sii ɲaa lɛ, má pɔ ma titia lɛ. Ma sí leɲe di Juu tinɲaa koo nialin si bi Juu tinɲaa ɲaa via Wia wɔɲbiin. Ma sí leɲe di nialin ma si laa Yesu wiaa dii aa hilimi, di ba dɔɲɔ ma tel. ³³ Má ɲɲaa ɲii mi sii ɲaa. Wii-na kala mi sii ɲaa, mi yie chiche di mi pɛ nuu lɛ nɛ. Mi bi che di mi ɲaa wiaa a pɛ mi titia lɛ. Ama mii che di mi pɛ ni-dan lɛ nɛ, di Wia wuo laaba ta.

11

Nii si maga di haalaa chuɔlɛ Wia

¹ Má chesimi ari mi sii chesi Kirisito ɲii. ² Ma ɲaa kukeri nɛ ma si liisi mi wiaa wii-kala lɛ a tuto wialin mi si dagema. ³ Ama mii che di ma jin ari Kirisito nɛ ɲaa baal-na kala sipaa-laara, ka baala ma nɛ ɲaa haala sipaa-laara, ka Wia ma nɛ laa Kirisito sipaan. ⁴ Nii wiaa di baal nii chuɔlɛ Wia, koo duu nii bul Wia wiaa niaa tuɔɲ, duu nɛ jon kuɲ to u nyun, uu hiise Kirisito nɛ. ⁵ Di haal ma kala nii chuɔlɛ Wia koo duu nii bul Wia wiaa, aɲ bi kuɲ jonɔ to u nyun, uu hiise u bala nɛ. Di haal nɛ bi kuɲ jonɔ to u nyun, u naga ari u fuɲ u nyun nɛ. ⁶ Di haal nɛ bi che duu jon kua to u nyun, u maga di u fuɲ u nyun nɛ. U si ɲaa hiisi wii ɲii di haala nɛ fuɲ u nyun koo duu kɛ u nyun ɲii, u maga di haala jon kuɲ nɛ a to u nyun. ⁷ Baala-na bi maga duu jon kuɲ a chu to u nyun, bɛɛ wiaa ɲii Wia si naga, ɲii titia nɛ u ɲaa baala. Baala tula ma lii Wia teen nɛ, ka haala ma tula lii baala teen, ⁸ bɛɛ wiaa haala lɛ dee Wia to a ɲaa baala, ama u to baala lɛ nɛ a ɲaa haala. ⁹ Bira, Wia bi baala ɲaa a tin haala wiaa, ama u ɲaa haala nɛ a tin baala wiaa. ¹⁰ A tin Wia tinɲaaraa wiaa haala maga duu jon kuɲ nɛ a vɔɔ to

u nyuņ. ¹¹ Nialin si laa Kirisito wiaa dii le, baala bi u titia tii, haala ma bi u titia tii, ba kala tii dõņõ. ¹² Wia si to baala le a ņaa haala nii, nii titia ne haala ma lulul baala. Wia ne ņaa ba kala. ¹³ Má titia biine wiin deen woruņ, a na di haal níi chuõle Wia lee-la nialin si laa Yesu wiaa dii síi hilimu aņ bi kuņ joņõ to u nyuņ, u zõmõ nee? ¹⁴ Wia si ņaa baala, u daga ari baala ari nyu-puņ-duduosuņ keņ hiisin ne, ¹⁵ ama haala-na tuõņ jaņ wuo tõre a tiņ u nyu-puņ-duduosu-la. Wia joņ nyu-puņ-duduosuņ pi haala di u kaa to u nyuņ ne. ¹⁶ Di nuu ne saa che duu keņ wiin deen kaa lere, mi jaņ bul ari wii-la ne la tuto. Wii dõņ kala tuo. Nialin si laa Yesu wiaa dii aa hilimi ma ka to nii ne.

Nii si maga di la dii kialin a liliisi Yesu wiaa

Mat. 26.26-29; Maak 14.22-25; Luuk 22.14-20

¹⁷ Mii che di mi dagema wiaa banmene ne. Di ma ne hilime di ma chuõle Wia, ma yie bi dõņõ le pe. Ma yie chichei dõņõ ne. Ma ha bi woruņ ņaa. ¹⁸ Wii-la mi síi che di mi bul ne ņla: Mi nia ari di ma ne ku hilimi di ma chuõle Wia, ma bi nii-bala ka keņ. Mi saa laa dii a nage wutitii mua he wiin deen mi si nia le. ¹⁹ U paala maga di ma põre dõņõ le ne, di ba to nii le a na nialin si ņaa ni-titiiba. ²⁰ Di ma ne ku hilimi, di ma dii kudiile-la la Tiina Kirisito si si di la didii a liliisi u wiaa, u dee ma didii nii. ²¹ Di ma níi dii, nuu-kala yie didii u kudiilee ne. Dõņsuņ keņ losuņ, ka dõņsuņ ma bugi. ²² Bëe ba! Ma bi diisin kene ma si jaņ wuo hõņ dime a dii kudiilee aņ pe nyunyua? Koo maa che di ma mõņ nialin si laa Yesu wiaa dii aa hilimi, aņ leņ di nialin si bi kuņ kene ba tuõņ dii hiisin nee? Bëe ne maa che di mi bula pima a tige wiin deen le? Mi bibesema lee? Ai, mi bi jaņ besema le.

²³ La Tiina Kirisito teen ne mi laa wialin mi si dagema. Titan-la ba

si joņ la Tiina Yesu yalle ne, u joņ boroboro ²⁴ a lolle Wia, aņ kaa chõge aņ bul, “Mi yaraa ne ņla mi chõgo pima, má laa dii. Má ma chõge boroboro a didii, a liliisi mi wiaa.” ²⁵ Nii ne ba si dii boroboro-la dere, u bira joņ nyunyuala ari si-huõņ aņ bul, “Nyunyuala deen ne Wia joņõ a tita nii-falii-la ma teen. Mi jaņ suu di mi chalin jaase. Bua-na kala le di ma níi nyuau, má nyua a liliisi mi wiaa.” ²⁶ Ka di la Tiina-na kõ, má dii boroboro deen aņ nyunyua nyunyuala tuõņ. Di ma níi ņaa nii, ma yie didii danšia ne ari la Tiina Kirisito suu ma wiaa ne.

²⁷ Nii ne tii di nuu-kala ne dii boroboro deen, koo duu ne nyua nyunyuala-la tuõņ, a bi nii ņaa di la Tiina yirin yire, uu tuuse la Tiina joņõõ ne nii. U tiina ņaa chei ne. U bi la Tiina yaraa ari u chal-la joņõ ari ba ņaa siifian kiaa. ²⁸ Nii wiaa nuu-kala maga duu laa sipaan a beņ u titia le woruņ aņ-na dii boroboro-la, a nyua nyunyuala-la tuõņ maa. ²⁹ Di nuu ne bi u titia le bene woruņ ari boroboro-la u síi dii ņaa Kirisito yaraa ne, si-huo-la ma ņaa u chalin, u keņ u titia banņaa he ņmenin ne nii. ³⁰ Ma dõņsuņ he dime a bi ba titia le bene aņ-na didii boroboro-la, aņ pe nyua nyunyuala-la tuõņ. Nii ne tii ma dõņsuņ wiwiile nii, ka dõņsuņ ma pugime, ka dõņsuņ ma suu. ³¹ Di la ne laa sipaan beņ la titia le, la bi jaņ keņ la titia banņaa kaa he ņmenin le Wia teen. ³² Ama di Wia ne na di la cheye, u yie dõgisela ne. U yie ņaa nii duu síla joņõ pe dunia niaa le a dii la sariya, a joņ cheerin pila.

³³ Nii wiaa mi naanbiirin, di ma ne hilime di ma dii kudiile-la la Tiina si si la didii a liliisi u wiaa, má gberẽ dõņõ. ³⁴ Di losuņ ne keņ ma dõņõ, u maga duu dii kiaa u dia le ne aņ-na kõ. Di ma ne ņaa nii aņ hilimi, Wia bi jaņ joņ cheerin pima. Wu-kaana-la-na, di mi ne kõ, mi jaņ dagema ba wonbiin.

12

Kialinj Wia Diŋ-zɔŋ-la si joŋo dii zile la ɛ

¹ Lɛɛɛ, má lenj di la bul kialinj Wia Diŋ-zɔŋ-la si joŋo dii zile la ɛ wiaa. Mi naanɓiirinj, mii che di ma jinj kiaa deenɓa ne. ² Ma jima bua-la ɛ ma fa si bi Wia ka chuɔɛ, ma faa to Sitaani hariŋ ne, a faa kpaare vuiaa maa. Vuiaa deenɓa fa bi wiaa wuo bubul. Ba lenje ma yenŋi ne. ³ Mii che di ma jinj ari di nuu ne keŋ Wia Diŋ-zɔŋ-la, u bi jaŋ wuo kaliba he Yesu ɛ. Nuuna kala bi jaŋ wuo bul di Yesu ne ŋaa la Tiina, see di Wia Diŋ-zɔŋ-la heu ɛ.

⁴ Wia Diŋ-zɔŋ-la si joŋo dii kialinj dii zile la ɛ, ba yuga ne, ama ba kala lii u dunɗunɗa teen ne. ⁵ Wonɓiee yuga ne la si jaŋ wuo to a tima pipi Wia, ama Wii-bala ne la tima pipa. ⁶ Kialinj Wia Diŋ-zɔŋ-la si joŋo dii zile la ɛ yie tinj tintin-yiriba ne u niaa ɛ, ama Wia ne toba ɛ a titinj tintimia-la kala. ⁷ Nuukala keŋ u wii ne Wia Diŋ-zɔŋ-la si joŋo dii zile u ɛ, duu kaa pipe u naanɓiirinj ɛ. ⁸ Wia Diŋ-zɔŋ-la yie joŋo wu-jiminj a pi nuu u wuo bubul Wia wiaa pipi niaa. U yie joŋo wii pi nuu doŋ u wuo jinj Wia wiaa bubuɔŋ a wuo didageba woruŋ. ⁹ Wia Diŋ-zɔŋ-la yie ŋaa nuu doŋ ma keŋ yarida, ka doŋo ma keŋ doluŋ a ma wuo vivaare niaa, ¹⁰ ka doŋo ma keŋ doluŋ a kaa ŋaa wu-kpuŋkperisinj, ka doŋo ma keŋ doluŋ a wuo bubul Wia wiaa, ka doŋo ma bira keŋ wu-jiminj u yie jinj diŋsi-la si lii Wia teen ari diŋsi-la si bi u teen lia pege. Wia Diŋ-zɔŋ-la yie pi nuu doŋ ma doluŋ u wuo bubul wiaa, yiikori-la Wia Diŋ-zɔŋ-la si pe niaa ɛ ba bubul, ka u pi doŋo ma wu-jiminj u wuo dage wialinj ba si bula bubuɔŋ. ¹¹ Tintinj-yiri deenɓa kala lii Wia Diŋ-zɔŋ-la teen ne. U titia tuɔɔruŋ ɛ ne u to a joŋo ku-yiri-yiri deenɓa a pi nuu-kala ari nii Wia si cho.

¹² Nuhuobiine yaraa ŋaa kubala ne, ama u nanɗaasinj yuga ne. La

yaraa nanɗaasinj si yuga nii, ba kala pe doŋo ɛ ne a ŋaa yari-bala. Nii titia ne Kirisito ma nage. ¹³ La nialinj si laa Yesu wiaa dii, la nage ŋla ne. La yuga ne, ama la ŋaa kubala ne. Wia Diŋ-zɔŋ-la doluŋ ɛ ne ba fola Wii-chuɔɛ liinj, nialinj si ŋaa Juu tinŋaa ari nialinj si bi Juu tinŋaa ŋaa, nialinj si ŋaa yosu ari nialinj si tii ba titia. Wia lenje la laa u Diŋ-zɔŋ-la a he la tuɔŋ ne.

¹⁴ Nuhuobiine bi nanɗaa-bala kene, u nanɗaasinj yuga ne. ¹⁵ Di nuhuobiine naan ne bula ari u si bi nisinj ŋaa, nii wiaa u bi nuhuobiine nanɗaanj ŋaa, u si bul wii-la bi jaŋ lenj di u si nuhuobiine seme doŋ ŋaa. ¹⁶ Di nuhuobiine digilinj ma ne si u bi siinj ŋaa, nii wiaa u bi nuhuobiine yaraa seme doŋo ŋaa, u nii bi jaŋ lenj di u si nuhuobiine seme doŋ ŋaa. ¹⁷ Di nuhuobiine yaraa kala ne fa ŋaa siaa, ee ne nuhuobiine fa jaŋ ŋaa a ninii wiaa? Di nuhuobiine yaraa kala ma ne fa ŋaa digilaa, ee ne u fa jaŋ ŋaa a ninii suɔraa? ¹⁸ U si nage nii, Wia ŋaa nuhuobiine nanɗaanj kala, kuŋ-kala ari u tintimii, ari nii u si cho ne. ¹⁹ Di nuhuobiine fa keŋ nanɗaa-bala, nii ne u yara-la fa jaŋ he? ²⁰ U si nage nii, nuhuobiine nanɗaasinj yuga ne a mere doŋo ɛ a ŋaa yari-bala. ²¹ Nii wiaa siaa bi jaŋ wuo bula pi nisinj ari u buu che, nii titia ne nyuŋ ma bi jaŋ wuo bula pi naasinj ari u biba ka che. ²² Di la ne bene, la jaŋ na ari nuhuobiine bi jaŋ keŋ doluŋ di u nanɗaasi-la si paala bi siifianj kiaa ŋaa ne tuo u ɛ. ²³ La biina ari la nanɗaasi-la doŋsuŋ bi siifianj kiaa ŋaa, ama ba nyuŋ ne la yie bibenj woruŋ. La bi nanɗaasi-la niaa sii na nyuŋ ka benj woruŋ. ²⁴ Wia ne joŋo nuhuobiine nanɗaasi-la kala a mere doŋo ɛ, a ŋaa u bibenj u nanɗaasi-la si bi siifianj kiaa ŋaa nyuŋ woruŋ. ²⁵ Wia ŋaa nii di nuhuobiine yaraa ŋaa kubala ne a kala tima pipe doŋo ɛ. ²⁶ Di nuhuobiine seme doŋo nii wii, u yaraa kala nii wii nii, di ba ne

bira bese nuhuobiine seme dönö le, u nanndaasi-la kala le ne ba bese nii.

²⁷ Ma kala si laa Yesu wiaa dii, ma nna Yesu yaraa ne, ma kuŋ-kala ne pe dönö le a nna yaraa kubala. ²⁸ Nii ne tii nialin si laa Yesu wiaa dii aa hilimi tuon, Wia jon ma kala he leree ne, nialin si laa sipaan ne Wia nanzöba, nialin sii tigeba le ne nna nialin sii bul wiaa, Wia Din-zon-la dolun le, nialin sii to ne nna nialin sii dage Wia wiaa, ari nialin ma sii nna wu-magilaa ari nialin ma Wia Din-zon-la si jon dolun pa ba vivaare niaa, ari nialin sii pe niaa le, ari nialin sii beŋ niaa, ari nialin sii bul wiaa yikori-la Wia Din-zon-la si peba le ba bubul. ²⁹ Wia niaa kala bi Wia nanzöba nna, ba kala tuo nialin sii bul wiaa, Wia Din-zon-la dolun le, koo nialin sii dage Wia wiaa. Ba kala dee bi dolun kene di ba nna wu-magilaa. ³⁰ Ba kala dee bi dolun kene di ba vivaare niaa. Ba kala dee bi yie bubul wiaa yikori-yiriba-la, Wia Din-zon-la si pe niaa le ba bubul le. Ba kala dee bi wialin Wia Din-zon-la si bula bubon ka dage. ³¹ Nii wiaa, ma jon ma nyun kala he siifan kialin Wia Din-zon-la si jon dii zile ma le. Mi jan dagema wonbii-la si kii wonbiee kala di ma tuto.

13

Chonun ne kii kuŋ-kala

¹ Di mi ne wuo ninii yikoro-na kala a wuo ninii Wia tin daaraa ma wu-bulun, an bi niaa cho, u nage binbelimin ne mi nmunmoo nii a nna gon pei. ² Di Wia Din-zon-la ne pimi dolun di mi wuo bubul Wia wiaa, a wuo jin wu-faali kala bubon, a keŋ wu-jimin kala, an pe keŋ yarida si jan wuo nna di peelee churo mumu leree donsun, an bi niaa cho, u nna wu-pe ne. ³ Di mi ne jon mi kiaa kala a pi summoo, a jon mi titia a pi niaa di ba nyige nyinin di u diimi kpu, an bi niaa cho, u bi nyuurun kala kene.

⁴ Di n ne cho niaa, n jan keŋ kenyiri ba teen a keŋ zile maa, n bi jan keŋ yaribierin niaa teen, n bi jan bigisi n titia le ba teen, n bi jan nna siidun ma ba teen. ⁵ Di n ne cho niaa, n bi n titia ka dage ba teen, n bira bi jan to n titia tuoton le, n bi jan len di n baanin sisii lima lima, n bira bi jan laa wiaa hihe n tuon. ⁶ Di n ne cho niaa, n tuon bi jan tore di wu-bon ne juuba, ama n tuon jan tore di ba ne na wu-zon. ⁷ Di n ne cho niaa, u maga di n nyalime wii-kala le ne, a nna nuu-kala yarida maa. Di n ne cho niaa, u maga di n keŋ yielaa ba le, a dii kenyiri wii-kala le.

⁸ Di n ne cho niaa, chonu-la n si kene, u bi jan ko duu dere. Dol-la Wia Din-zon-la si jon pila la wuo bubul Wia wiaa, koo la wuo ninii yikori-yiriba kala an pe wu-jimin ma, ba kala jan lel. ⁹ La wu-jimii-la la si kene, u bi yuge. Wia wialin la sii bul, la bi jan wuo bula dere. La sii bul wiaa, Wia Din-zon-la dolun le nii, la bi jan wuo bula dere, mua mua ne la bubul. ¹⁰ Ama di ku-la si nna ku-pilin ne ko, ku-la si bi ku-pilin nna jan lel. ¹¹ Mi fa si nna hanbie, mi bul hanbii wiaa ne aa biine wiaa ari hanbie, a fa nna wiaa ari hanbie. Ama mi si ku waa dere, mi jon hanbii wialin ta ne. ¹² Leele la si he dunia deen le, u naga ari la beŋ Kirisito, ari niaa si yie beŋ ba titia beenantire le nii ne. La bi Kirisito chaasa nina worun, ama maachie la jan nau worun. Leele mi jimu mua ne, ama maachie mi jan chaasa jimu worun, ari Wia si jinmi nii. ¹³ Nii-na wii-la diderin, wiaa batori ne he dime. Ba ne nla: N si nna Wia yarida, a keŋ yielaa, a cho niaa. Ama wiaa deenba batorimun tuon ba siifan wiin ne, n si cho niaa.

14

Kialin Wia Din-zon-la si jon dii zile la le ku-kaanin

¹ Ma kuŋ-kala fiene sii ne a chiche nii ma si jan wuo nna a cho niaa,

a fiɛɛ sii ma a chiche kialin Wia Diŋ-zɔŋ-la si joŋo dii zile ma ɛ, a wasanyan nji ma si jan wuo ŋaa a bubul wiaa, Wia Diŋ-zɔŋ-la dolun ɛ. ² Di nuu nii bul wiaa yiikori-la Wia Diŋ-zɔŋ-la si pe niaa ɛ ba bubul, u tiina bul wiaa a pipi Wia nɛ. U sii bul wialin niaa si bi nii, nuu-kala bi wialin bubuɔŋ ma wuo jin, ama Wia Diŋ-zɔŋ-la si heu ɛ nɛ tii u wuo bubul wu-kpunƙperisin deenba. ³ Ama nii-la sii bul wiaa, Wia Diŋ-zɔŋ-la dolun ɛ, u bul wiaa pipi niaa nɛ. U yie pe niaa ɛ a len ba yarida yuge nɛ, a len di ba nyun nyaase Wia wiaa ɛ, a len ba tuɔŋ ma tɔrɛ. ⁴ Di nuu nii bul wiaa yiikori-la Wia Diŋ-zɔŋ-la si pe niaa ɛ ba bubul, u tiina bula pipe u titia ɛ nɛ. Ama nii-la sii bul wiaa, Wia Diŋ-zɔŋ-la dolun ɛ ka pe nialin si laa Yesu wiaa dii a hihilimi ɛ nɛ. ⁵ Nii wiaa mi fa cho di ma kala bubul wiaa yiikoro-la Wia Diŋ-zɔŋ-la si pe niaa ɛ ba bubul ɛ nɛ, ama mi fa paala cho di ma wuo bubul wiaa, Wia Diŋ-zɔŋ-la dolun ma ɛ nɛ. Nii-la sii bul wiaa, Wia Diŋ-zɔŋ-la dolun ɛ nɛ kii nii-la sii bul wiaa yiikoro-la Wia Diŋ-zɔŋ-la si pe niaa ɛ ba bubul ɛ. Di nuu nɛ he dime si jan dage wii-la u sii bul bubuɔŋ a pi nialin kala si laa Yesu wiaa dii aa hilimi ɛ, uu peba ɛ nɛ.

⁶ Mi naanbiirin, di mi nɛ kɔ ma teen a bubul wiaa yiikoro-la Wia Diŋ-zɔŋ-la si pe niaa ɛ ba bubul ɛ, ɛɛ nɛ mi jan ŋaa a pɛma ɛ? Mi bi jan wuo pɛma ɛ, see di mi bul wii-la Wia si joŋo dagemi a pima, koo di mi jin wii a kaa kɔ dagema Wia dolun ɛ, koo di mi nɛ bul wiaa, Wia Diŋ-zɔŋ-la dolun ɛ, koo di mi joŋ Wia wii dɔŋ a dagema u dolun ɛ. ⁷ Di kialin ba si kaa gbigbieli, ŋmulun ari chen, di ba nɛ bi worun du he dɔŋɔ ɛ, kialin bi digilin ka ken. ⁸ Di ba nii du pam pam tua, di ba nɛ bi u dunun duo, nuu-kala bi jan wuo jin ari wii nɛ ŋaa ba yiyire niaa. ⁹ Nii titia nɛ ma nage. Di ŋ nɛ bul wii-la niaa si bi nii, ɛɛ nɛ ba jan wuo jin wii-la ŋ si

bula bubuɔŋ? N jan ta ŋŋaa goŋ nɛ. ¹⁰ Yiikorusun yuga nɛ dunia ɛ, ba kun-kala ma ken u bubuɔŋ nɛ. ¹¹ Di nuu nii bul wiaa yiikori-la ɛ mi si bi nii, mi jan nage nuhuɔru nɛ u teen, ka nii-la ma sii bul wiaa mi teen ma jan nage nuhuɔru mi teen. ¹² Nii wiaa, ma si cho di ma ken kialin kala Wia Diŋ-zɔŋ-la si joŋo dii zile ma ɛ nii, má he dolun an pe nialin si laa Yesu wiaa dii aa hilimi ɛ, di ba chin wialin ba si laa dii ɛ kpan kpan.

¹³ Nii wiaa nii-la sii bul wiaa yiikori-la Wia Diŋ-zɔŋ-la si pe niaa ɛ ba bubul, u tiina maga duu sul Wia duu wuo len duu wuo didage wialin bubuɔŋ ma nɛ. ¹⁴ Di mi nii chuɔɛ Wia yiikori-la Wia Diŋ-zɔŋ-la si pe niaa ɛ ba bubul ɛ, mi dima nɛ yie chuchuɔɛ, ama mi tuɔbiinaa ɛ mi bi wii-la mi sii bul bubuɔŋ jin. ¹⁵ Nii nɛ tii mi jan ken mi dima ari mi tuɔbiinaa kala kaa chuchuɔɛ Wia, an ken ba kala ma kaa yiyii yiilaa. ¹⁶ Di ma nɛ ku hilimi, an ka di nuu ken yiikori-la Wia Diŋ-zɔŋ-la si pe niaa ɛ ba bubul ɛ a didenne Wia, nialin si hoŋ dia-la ɛ si bi wii-la ŋ sii bul nia, di ŋ nɛ chuɔɛ dɛrɛ, ɛɛ nɛ ba jan ŋaa jin wii-la bubuɔŋ a bul di Ami? ¹⁷ U ŋaa wutitii nɛ, nuu jan wuo denne Wia worun ari yiikori-la Wia Diŋ-zɔŋ-la si pe niaa ɛ ba bubul, ama di nuu nɛ ŋaa nii, u bi nialin si hilimi lee-la wuo pipe. ¹⁸ Mii lolle Wia ari mi si wuo bubul wiaa yiikori-la Wia Diŋ-zɔŋ-la si pe niaa ɛ ba bubul a kii nuu-kala, ¹⁹ ama di la nɛ ku hilimi a chuchuɔɛ Wia, mi jan cho di mi ken mi tuɔbiinaa bul wiaa banmene di niaa jin ba bubuɔŋ, a kii mi si jan bul wiaa yuge yiikori-la niaa si bi nii ɛ.

²⁰ Mi naanbiirin, ma sí wiaa biinu a nage hanbiisin sii biine nii. Ma wu-ŋaalaa ɛ, má nage bii-mullun si bi wu-bɔŋɔɔ jin, ama má bibiine wiaa a nage kuhiasin sii biine nii. ²¹ Ba ŋmunse Wia tenin tuɔŋ ari Wia si u jan to nialin sii bul yiikori-tania ari nuhuɔraa ɛ a bul wiaa pi u niaa,

ari nii ma kala ba bi jan jegile nii u teenj. ²² Nii wiaa, Wia lenje u Diŋ-zɔŋ-la pe niaa le ba wuo bubul wiaa yiikorusunj dɔŋsunj le, duu wuo ŋaa wu-magil a pi nialinj si bi Wia wiaa laa dii teenj. Nialinj si laa Wia wiaa dii, wiinj deenj biba le pe. Di nuu ma ne bul wiaa, Wia Diŋ-zɔŋ-la dolunj le, u bul wiaa pipe nialinj si laa Wia wiaa dii le ne. U bi nialinj si bi Wia wiaa laa dii le ka pe. ²³ Nii wiaa, di nialinj si laa Yesu wiaa dii ne ku hilimi, di ba kuŋ-kala bubul wiaa yiikori-la Wia Diŋ-zɔŋ-la si joŋo pe u le u bubul, di ni-wogusunj koo nialinj si bi Wia wiaa laa dii ne he ba tuɔŋ, ba jan biine ari ma nyunj tuo. ²⁴ Ama di ma kala ne bul wiaa, Wia Diŋ-zɔŋ-la dolunj le, di nii-la si bi Wia wiaa laa dii koo di ni-wogo ne he ma tuɔŋ, u jan sene jinj ari u ŋaa haache tiina ne. Wialinj ma ma si bula jan juu-u le duu na duu cheye ne. ²⁵ U tuɔbiinaa kala jan ku lii pulumunj Wia sipaanj. Nii ne u jan tuu kpirimi Wia sipaanj a chuɔlu, a bul ari wutitii, Wia he ma teenj ne.

Wonjbii-la si maga di nialinj si laa Yesu wiaa dii to chuɔle Wia

²⁶ Wialinj mi si bula, ba bubuɔŋ ne beɛ? Di ma ne ku hilimi-na kala, di dɔŋɔ ne keŋ yiilinj duu yii, di dɔŋɔ ma keŋ wii duu dage niaa, koo nuu nii che duu bul wii-la Wia si joŋo daju u dolunj le, dɔŋɔ maa che duu bul wiaa yiikori-la Wia Diŋ-zɔŋ-la sii pe niaa le ba bubul le, dɔŋɔ maa che duu dage wii-la ba si bula bubuɔŋ, má ŋaa wiaa deenba kala a pipe dɔŋɔ le. ²⁷ Di niaa dɔŋsunj nii che di ba bul wiaa yiikoro-la Wia Diŋ-zɔŋ-la si pe niaa le ba bubul le, u maga di ba ŋaa balia koo batori a bul kuŋ kuŋ, ka di nuu ma he dime aa dage wialinj ba si bula bubuɔŋ. ²⁸ Ama di nuu ne tuo duu laa wialinj bul aŋ dage ba bubuɔŋ, u maga di nii-la si bul wialinj yiikori-la Wia Diŋ-zɔŋ-la si pe niaa le ba bubul le, duu tore ne. Má lenj duu chuɔle Wia u tuɔŋ le, a sí u niinj suro bubul, a keŋ u tuɔŋ

a bul wiaa a pi Wia ari u titia. ²⁹ Di niaa ne he ma tuɔŋ aa bul wiaa, Wia Diŋ-zɔŋ-la dolunj le, má lenj di ba ŋaa balia koo batori a bubul wialinj, aŋ ka di ma ku-kaanaa ma keŋ wialinj ba si bula kaa cho naa. ³⁰ Di Wia ne joŋ wii dage ma tuɔŋ dɔŋɔ duu bula pima, má lenj di nuu-kala keŋ goŋ, ka duu bul. ³¹ Ma kuŋ-kala jan wuo bul wiaa, Wia Diŋ-zɔŋ-la dolunj le, a wuo gunne a pipe dɔŋɔ le maa. ³² Nii-la sii bul wiaa, Wia Diŋ-zɔŋ-la dolunj le ne maga duu bibenj kialinj Wia Diŋ-zɔŋ-la si joŋo puu. ³³ Wia bi cho di ma ŋiŋaa taaweɪ, ama u cho di ma hoŋ som ne.

Nialinj si laa Yesu wiaa dii aa hilimi tuɔŋ lee-na kala, ³⁴ u bi maga di haalaa bubul Wia wiaa a pipiba. U maga di ba tore ba niinj aŋ tuto baalaa niinj ne, ari ba si bul nii Wia teninj tuɔŋ. ³⁵ Di wii ma ne he dime a maga di ba jinj, u maga di ba piɛse ba balaba ne dia le. U ŋaa hiisinj ne di Wia niaa ne hilime, di haalaa laa wiaa bul a pipiba. ³⁶ Beɛ ne? Ma ne suomo bul Wia niinj wiaa? Koo ma dunɔŋa ne ba bul Wia wiaa pa?

³⁷ Di nuu ne biina ari Wia Diŋ-zɔŋ-la pu dolunj duu bul Wia wiaa koo duu keŋ wialinj Wia Diŋ-zɔŋ-la si kene dolunj, u maga di u tiina jinj ari wiinj deenj mi si bul lii Wia teenj ne. ³⁸ Di nuu ne bi che duu sei wiinj deenj a tinj u si bila jinj wiaa, la ma bi u tiina jinj. ³⁹ Nii wiaa mi naanjbiriinj, má fiɛse siinj a chiche di ma wuo bubul wiaa, Wia Diŋ-zɔŋ-la dolunj le, aŋ sí ma dɔŋsunj tinjŋaa kiru di ba sí wiaa bul yiikoro-la Wia Diŋ-zɔŋ-la si pe niaa le ba bubul. ⁴⁰ U maga di ma ŋaa wii-kala u bua le, duu ŋaa dee dee ne.

15

Yesu sí sii suunj le

¹ Mi naanjbiriinj, mii che di mi liliisima a mu tige Wia wu-zomɔ-la mi si bula pima. Ma laaba dii ne a chinj ba nyunj le. ² Wia wu-zomɔ-la ne laama tita, di ma ne kenu worunj.

Ma sí leŋe duu nage ari wialin ma si laa dii bi bubuon kala kene.

³ Wialin mi si nia, u ne mi bula pipima. Wii-la wu-nyun ne nla, ari Yesu suu la haacheba wiaa ne, ari ba si nmunse nii Wia tenin tuon. ⁴ U si suu nii, ba jonu hugi, ka u sii suun le tapulaa batori cheen, ari ba si nmunse Wia tenin tuon nii. ⁵ Nii ne u laa sipaan ken u titia ku dage Piita, an-na ken u titia ku dage u nanzoba-la fii ari balia. ⁶ U nii harin le bua kubala u ken u titia ku dage u haritooro z-banon ari danja. Niaa deenba donsun ha he ba miisin le, ka donsun ma suu. ⁷ Nii harin le u ken u titia ku dage Jeems, a ken u titia ku dage u nanzoba-la kala maa. ⁸ Ba kala harin le ne u ken u titia ku dagemi maa. Mi-na paala nage nii-la ba si lula, an ka u lullun ha bi yie ne. ⁹ Yesu nanzoba-la kala, mi ne paala naa ba tuon ku-bie. U paala bi maga di ba kenmi kaa yire Wia nanzoo, bee wiaa mi to naasin dogise nialin si laa Yesu wiaa dii aa hilimi ne. ¹⁰ Ama Wia dii zile mi le worun. U ne leŋe mi naa nuu leele, u zile ma bi pei naa (u nanzoba-la tuon, mi ne naa ba tuon ku-bie), ama mi ne faasa tin kinken, a kii ba kala. Mi titia dolun le dee mi wuo titin, ama Wia dol-la u si jonjo pimi ne tii. ¹¹ Wii-la si maga ne, Wia wuzom-la la sii bul. Wu-zom-la ba sii bul ne, mi ma bubul, u ne ma laa dii.

Nii Wia si jan naa a chise niaa suun le

¹² Di la ne bul Kirisito wiaa ari u sii suun le ne, bee ne tii ma donsun si di nuhuobiinee bi jan suu an sii suun le? ¹³ Di niaa ne bi jan suu an sii suun le, nii-na Kirisito bi suun le sie. ¹⁴ Di Kirisito ne bi suun le sie, wii-la la si bula pima naa wu-peiba ne, ka ma si laa wialin dii ma naa pei ne. ¹⁵ U jan nage ari laa nyia wiaa pipi Wia ne, bee wiaa la bula ari u chise Kirisito suun le ne. Di niaa ne bi jan suu an wuo sii suun le, nii-na Wia bi Kirisito chisa. ¹⁶ Di niaa ne bi jan suu an sii suun le, nii-na Kirisito

bi suun le sie. ¹⁷ Di Kirisito ne bi suun le sie, nii-na wii-la ma si laa dii naa pei ne, ma ha he ma haacheba le. ¹⁸ U nii saa jan dage ari nialin si laa Yesu wiaa dii an suu ma lele ne. ¹⁹ Di la yielaa si he Kirisito teen jan dere dunia deen le, nii-na dunia niaa maga di ba mumonla ne.

²⁰ Ama wutitii ne, Kirisito sii suun le ne. U ne laa nialin kala si suba sipaan a sii suun le. Ba ma jan to u harin a sii suun le. ²¹ Ni-bala le ne suun to a ken nuu-kala. Nii titia ne ni-bala ma le ne niaa jan to a sii suun le. ²² Adam wiaa ne tii niaa susuu. Nii titia ne a tin Kirisito ma wiaa, niaa jan sii suun le a ken miisin. ²³ Nialin si jan sii suun le jan tuto donjoba harin. Kirisito ne jan laa ba sipaan. Di u ne miira ko, nialin si laa u wiaa dii, ba ma jan to harin a sii suun le. ²⁴ Nii harin ne dunia diderin jan yi. Kirisito jan yuo dii dunia kuoro ari ni-balaa ari nialin sii dii dolun dunia deen le. U jan jon kuorii-la a he u Nyimma nisin le. ²⁵ Ama u maga di Kirisito dii kuoron, an-na yuo dii u dinjonjoo kala, a kenba kaa ku he u naasin bubuon. ²⁶ U dinjon-la u si jan to harin yuo dii ne naa suun. ²⁷ Wia tenin tuon ba bula ari Wia jon kun-kala a he Kirisito nisin le ne. Di ba ne bul Wia tenin tuon di Wia jon kun-kala a he Kirisito nisin le ne, u bi naga ari la Nyimma Wia ma he u nisin le ne. ²⁸ Di Wia ne jon kun-kala a he Kirisito nisin le, u nii harin le, Kirisito ma jan jon u titia a he Wia nisin le, nii-la si jon kun-kala he u nisin le di Wia ken kun-kala dolun.

²⁹ Di niaa ne suba an bi jan sii suun le, nii-na, bee ne tii niaa yie len ba chin ba naanbiiri-la si suba nyun le a naa ba foba Wii-chuole liin? Bee ne tii ma yie len ba foba Wii-chuole liin? ³⁰ Nii-na, bee ne tii la nina heen bua-na kala le? ³¹ Bua-na kala le mi naa siri di mi suu ne. La kala si ken miisin Kirisito Yesu teen nii, mi jan wuo bigisi mi titia

le a tinj ma wiaa. ³² La si mu Efesis, niaa hoso ari baga kiaa si hoso nii ne, a faa che di ba kpumi. Di mi ne fa yuo yuosun deen di mi laa yirin koo kiaa, niaa teen, u bubuon ne bee? Di nuu ne suba, ka u bi jan sii suun le, nii-na ma len di la to la tuotore wu-nyaalaa le dunia deen le. Niaa dongsun bul nla ne. Ba si, "Ma len di la dii kiaa a nyua sinin, bee wiaa maachie la jan suu." ³³ Ama ma si ma titia nyisu. Di n ne naa nizon an tuto ni-bonhon harin, n ma jan ku naa ni-bon. ³⁴ Ma len wuyaayasin ari ma haacheba wonbie-la. Ma dongsun wu-nyaalaa naga ari ma bi Wia jin. Ma dii hiisin.

Yari-zomɔ-la la si kaa sii suun le

³⁵ Nia donon jan piесе, di ee ne nialin si suba jan wuo naa a sii suun le? Di yari beeba ne ba jan ken? ³⁶ Nii-la si piесе wiin deen naa niton ne. La jima ari di n ne jon kudo a duu, ba bi jan nyu ku-falin, see ku-la n si jon duu, laa sipaan pua. ³⁷ Di n ne jon kuorimiin koo mii-biin a duu, nyuulii-la bi bii-la n si jon duu wuo nage. ³⁸ Di n ne duu kun, Wia yie len u nyu a nage nii u sii che ne. Kun-na kala yie nyu a nage u nagisin ne. ³⁹ Kialin kala si he dunia le a ken miisin, ba namia bi kubala naa. Nuhuobiinee ari pusun ari diibiisin ari chenfilee namia bi kubala naa. ⁴⁰ Nialin kala si he Wia-jan ari nialin kala si he tinteen, ba yaraa bi donon naga. Kialin si he wia nyun ari kialin si he tinteen, ba zomun bi donon naga. ⁴¹ Wii-posun ken u pulumun ne, chene ma ken u pulumun, ka chenwulaa ma ken ba pulumun. Chenwulaa ma tuon, dongsun ma pulla ne a kii dongsun.

⁴² Nii titia ne u nage di niaa ne sii suun le. Ku-la ba si jon hugi jan pua, ka ku-la si jan sii suun le bi jan ko duu pua. ⁴³ Ku-la ba si jan jon hugi loron ne. Duu ne sii suun le, u jan ken tula. Ku-la ba si jon hugi pugima ne, duu ne sii suun le, u jan ken dolun. ⁴⁴ Yara-la ba si

jan jon hugi ne la ken dunia le nii. Ama yara-la si jan sii suun le naa yara-la Wia Din-zon-la si jan jon pila ne. Di la ne ken yaraa dunia deen le, u maga di la ken yaraa Wia teen ma ne. ⁴⁵ Wia tenin tuon ba nmunsa, "Nuhuobiin-la Wia si bumo naa yirin ne Adam. Nii ne Wia wiese heu le u ken miisin." Nuhuobiin-la si to harin ko ne naa Kirisito. U nii to u Din-zon-la le a pi niaa miisin. ⁴⁶ U bi naga miisi-la Wia Din-zon-la si jon pila ne laa sipaan ko, ama miisi-la la si kene dunia deen le ne laa sipaan ko, ka miisi-la Wia Din-zon-la si jon pila ma to harin ko. ⁴⁷ Nuhuobiin-la si laa sipaan ko dunia, tiarin ne Wia jon meu. Nii-la si to harin ko-na lii Wia-jan ne a ko. ⁴⁸ Ba si ken tiarin ne me Adam nii, nii titia ne nialin kala ma miisin si lii Adam teen naa tiarin ne. Kirisito si lii Wia-jan ku tuu nii, nii titia ne nialin si ken miisin u teen ma ken miisi-la si lii Wia-jan. ⁴⁹ La si ken nii-la ba si ken tiarin me nagisin nii, nii titia ne la jan ken ni-la si lii Wia-jan ma nagisin. ⁵⁰ Mi naanbiirin, wii-la mi sii che di mi bul ne nla: Nialin ba si ken tiarin me bi jan wuo juu Wia kuorii-la tuon. Ku-la ma sii pua bi jan wuo he dime deen deen a nage ku-la si bi pua.

⁵¹ Ma bee na, mi jan bul wukpunkerisin pima. La kala bi jan suu. Ama bua kubala jan ko di Wia ken la yaraa kala birime. ⁵² Wiin deen jan guu naa ne. Di bua-la ne yie, Wia tindaara jan nmuu u nyile. Di u ne nmuu nyile-la, nialin kala si laa Yesu wiaa dii an suu jan sii a wei. Ba bira bi jan suu. La nialin si he la miisin deen le an bi suba maa, Wia jan kenla birime. ⁵³ Wia jan ken yara-la sii pua kaa birime di ba bira si pua. Nii titia ne la yara-la ma sii suu, u jan kenba kaa birime, di ba si suu. ⁵⁴ Bua kubala jan yi la yaara-la sii pua bira bi jan pua, la yara-la ma sii suu bira bi suu. Di bua-la ne yie, ba si bul wialin Wia tenin tuon jan

ku n̄aa wutitii. Ba bula ari,
 “La yuo dii suun̄ n̄e. ⁵⁵ La bira bi
 jan̄ suu. Suun̄, n̄ dolun̄ h̄e nii?
 Suun̄, nii n̄e n̄ huon̄ h̄e duu
 wuo juu n̄iaa l̄e?”

⁵⁶ Suun̄ huon̄ n̄e n̄aa haache.
 Haache ma dolun̄ lii wialin̄ Wia si
 jon̄o billa l̄e di la tuto, ka la biba
 wuo tuto. ⁵⁷ Ama má len̄ la lolle
 la Nyimma Wia, nii-la si to la Tiina
 Yesu Kirisito l̄e a pila dolun̄ la wuo
 yuo dii suun̄.

⁵⁸ Nii wiaa mi naan̄biirin̄, má chin̄
 wialin̄ ma si laa dii l̄e kpan̄ kpan̄, a
 sí begilu. Má fīese siin̄ a tin̄ la Tiina
 tin̄tin̄naa worun̄. Ma jima ari Wia
 tin̄timii-la ma sí tin̄ bi jan̄ k̄o duu
 n̄aa pei.

16

*Kialin̄ la si jan̄ jon̄o pi la d̄onsun̄
 tin̄naa si laa Yesu wiaa dii*

¹ L̄ēlē mii che di mi bul wiaa a
 mu tige moribie-la ma sí che di ma
 kies̄e, di ba kaa mu pi Wia nialin̄ si
 h̄e Judiya tin̄teen̄ l̄e. Mi laa sipaan̄
 dage nialin̄ si laa Yesu wiaa dii aa
 hilimi a h̄e Galiisia tin̄teen̄ l̄e, nii ba
 si jan̄ n̄aa a kies̄e moribie-la. Ma
 ma jan̄ n̄aa nii titia. ² Ȳob̄o-na kala
 Lahadi chēn̄, moribie-la ma si tima
 a na, nuu-kala liise mage nii n̄ sí che
 di n̄ jon̄o bil. Di mi n̄e k̄o, ma bira bi
 jan̄ kiek̄ese moribiee. ³ Di mi n̄e k̄o,
 mi jan̄ n̄mun̄se tenin̄ pi nialin̄ ma
 si liisa, di ba ken̄ moribie-la ma si
 kies̄a pi nialin̄ si laa Yesu wiaa dii a
 h̄e Jerusalem l̄e, di ba kaa mu piba.
⁴ Di u n̄e maga di mi ma mu, la kala
 jan̄ to d̄on̄o mu.

Wialin̄ P̄ool sí che duu n̄aa

⁵ Mii che di mi ku to Masidoonia
 tin̄teen̄ n̄e a mu lee. Di mi n̄e ku
 to lee-la, mi jan̄ ku nama. ⁶ Di mi
 n̄e k̄o kapoo, mi jan̄ h̄e ma teen̄ a
 dieni di waarin̄ chēnsin̄ lii. Mi jan̄
 h̄e ma lerin̄ a mu yi bua-la mi si jan̄
 jon̄ won̄biin̄, di ma wuo tami lee-na
 kala mi sí che di mi mu. ⁷ Mi bi che
 di mi nama lima lima an̄ kiele mu
 lee-la mi sí mu. Di Wia n̄e sēye, mi

cho di mi dieni n̄e ma teen̄. ⁸ Ama mi
 jan̄ h̄on̄ Efesis l̄e a mu yi gbieli-bal-
 la ba sí yire Pen̄tikos chēn̄. ⁹ Wia
 pimi won̄bii-bal n̄e di mi tin̄ tin̄tin̄-
 z̄on̄ daha, ka nialin̄ si bi che di mi tin̄
 tin̄tin̄naa daha yuga n̄e. ¹⁰ Di Timoti
 n̄e k̄o ma teen̄, má k̄enu worun̄,
 duu sí wii-kala fá. La duu kala ní
 tin̄ Wia tin̄timia-la. ¹¹ Ma sí lēne
 di nuu-kala bee guunu. Má pēu l̄e
 duu ven̄ won̄biin̄ ari yarifīelaa, an̄
 miira k̄o mi teen̄. Mii gberu ari la
 naan̄biiri-la.

¹² Ma jin̄ la naan̄bie ba sí yire
 Apol̄os n̄e. Mi bula pu worun̄ ari ba
 di la naan̄biiri-la ku nama. Ama u bi
 biina ari u jan̄ na won̄biin̄ k̄o l̄ēlē.
 Di bua-la si maga n̄e yie, u jan̄ ku
 nama.

Wu-kaanaa

¹³ Má p̄o, a chin̄ wialin̄ ma si laa
 dii l̄e kpan̄ kpan̄. Má ken̄ boi-duon̄ a
 ken̄ dolun̄ Wia teen̄. ¹⁴ Wii-kala ma
 sí n̄aa, má ma n̄aa di n̄iaa na ari ma
 choba n̄e.

¹⁵ Mi naan̄biirin̄, ma jin̄ baal
 kubala ba sí yire Sitefinis n̄e. Ba
 di u dia n̄iaa n̄e laa sipaan̄ laa Wia
 wiaa dii Akaaya tin̄teen̄ l̄e. Ba pē
 Wia n̄iaa l̄e n̄e worun̄, a jon̄ ba
 titia kala a h̄e nii l̄e. ¹⁶ Mii sulma,
 mi naan̄biirin̄, di ma tuto ni-yiri
 deen̄ba niin̄. Má tuto Wia tin̄tin̄nu-
 na kala, ari nialin̄ sí pela l̄e la titin̄
 ma niin̄ l̄e. ¹⁷ Mi tuon̄ tōre worun̄ ari
 Sitefinis ari F̄otunaatis ari Akaakis
 k̄o mi teen̄ n̄e. Ba n̄e laa ma nyun̄
 daha. ¹⁸ Ba lēne mi tuon̄ pin̄ di-
 bala n̄e. Ba jan̄ len̄ di ma ma tuon̄
 pin̄ di-bala. U maga di ma zizil n̄iaa
 deen̄ba n̄e.

¹⁹ Nialin̄ si laa Yesu wiaa dii aa
 hilimi a h̄e Esia tin̄teen̄, ba kala ka
 chuolema. Baal-la ba sí yire Akuila
 ari u haala Pirisila, ari nialin̄ si laa
 Yesu wiaa dii aa hilimi ba dia l̄e, baa
 chuolema worun̄ la Tiina Yesu dolun̄
 l̄e. ²⁰ Nialin̄ kala si laa Wia wiaa dii
 a h̄e daha maa chuolema. Má guori
 d̄on̄o an̄ chuole d̄on̄o kin̄ken̄ kin̄ken̄.

²¹ L̄ēlē, mi-na P̄ool, mi titia ní
 n̄mun̄se aa chuolema. ²² Di nuu-kala

nɛ bi la Tiina Kirisito cho, Wia jaŋ kaliba heu ɛ. Maranata! U bubuɔŋ nɛ, la Tiina Kirisito kɔ! ²³ La Tiina Yesu Kirisito lahɔrimɔ ɛ Wia jaŋ pɛma ɛ. ²⁴ Yesu Kirisito doluŋ ɛ, mi cho ma kala nɛ. Ami.

TEN-LIA-LA PÖÖL SI N̄MUNSA PI KÖRINTI NIAA

Pööl lölle Wia

¹ Mi-na Pööl ari la naanbie Timoti ne n̄munse teniñ deen a pipima. Wia tuotöruñ ð ne u liisemi di mi ñaa Kirisito Yesu nan̄zoo. La n̄munse teniñ deen a pipi nialin si laa Yesu wiaa dii aa hilimi a he Kōrinti tan-la ð ne, ari nialin si bi haache kene Wia sipaan̄ Akaaya tin̄teen ð.

² La Nyimma Wia ari la Tiina Yesu Kirisito lahōrimo ð, ma jan̄ hōñ ari yarifielaa.

³ Má len̄ di la ðenne Wia. U ne ñaa la Tiina Yesu Kirisito Nyimma, aa fá niaa nennige. U ne yie len̄ nialin tuon̄ si cheye tuon̄ bira tōre.

⁴ Di la n̄i na heen̄ ma, u ne yie len̄ la tuon̄ tōre. U si yie ñaa la tuon̄ tōre ñii, la ma yie ñaa la naan̄biirin̄ ma s̄i na heen̄, ba ma tuon̄ tōre ñii ne. Wia jon̄ tuotöruñ ne pila, ñii ne tii la ma pe la naan̄biirin̄ ð di ba ma na tuotöru-la yiri. ⁵ Kirisito na heen̄ ne woruñ. Hee-la u fa si na, u titia ne la ma nina. A tin̄ ñii wiaa Kirisito ma len̄ la tuon̄ faasa tōre ne. ⁶ La si ko di la bul Wia wu-zomo-la a pima di Wia laama ta, la na heen̄ ne woruñ. La na heen̄ di ma na tuotöruñ ne. Di ma ne na hee-la yiri la si na an̄ wuo nyalime, ma jan̄ na tuotöru-la yiri la si na. ⁷ Laa yielema ne. La yiele-la saa bibegili. La jima ari hee-la la si na, ma ma na u titia ne. Nii titia ne tuotöru-la la si kene, ma ma kenu ne.

⁸ La naan̄biirin̄, laa che di ma jin̄ ñii la si na heen̄ Esia tin̄teen ð ne. Wialin̄ si juula ð fa yun̄ie ne kin̄ken̄ kin̄ken̄ a pila. La paala bi biina ari tan̄ jan̄ pulla. ⁹ Wutitii, la fa biina ari la suba dere ne. Ama ñii pela ð di la sí la titia dolun̄ ð beñ, ama di

la jon̄ la yielea kala a he Wia ð, nii-la s̄i chise niaa suun̄ ð. ¹⁰ Wia ne liisela suun̄ deen̄ nisin̄ ð. Maachie di wiaa ne juula ð, u jan̄ liisela ba ð. U ð ne laa yiele ari maachie u jan̄ bira liisela di heen̄ ne juula. ¹¹ Má ma pe sul Wia pila. Niaa yuga ne aa sul Wia a pipila duu pela ð. Di Wia ne laa ba Wii-sula, ba kala jan̄ wuo ðennu.

Pööl ken̄ u wiaa birime

¹² Leele la jan̄ wuo bigisi la titia ð, bee wiaa la tuobiinaa daga ari la wu-ñaalaa kala zomo nuu-kala teen̄ dunia deen̄ ð. Wii-kala la si ñaa ma teen̄, la ñaa wialin̄ s̄i to Wia won̄biin̄ ne an̄ pe ñaa wutitii-la Wia s̄i che. Nuhuobiine wu-jimin̄ ð dee la to a ñinaa wialin̄, ama Wia dolun̄ ð ne la ñaaba. ¹³ La bi wutani n̄ n̄munsa pima, ama wialin̄ la si n̄munsa, ma jan̄ wuo karime, a jin̄ ba bubuosa maa. La saa laa dii ari ma jan̄ jin̄ wiaa deen̄ba bubuosa a mu dere, ¹⁴ ari ma si jin̄ba mua ñii. Ma jima ari tapulii-la, la Tiina Yesu ne miira ko, ma jan̄ bigisi ma titia ð a tin̄ la wiaa, ka di la ma bibigisi la titia ð a tin̄ ma wiaa.

¹⁵ Mi fa jima di la jin̄ ðon̄o ne woruñ, u ñii wiaa ne tii mi faa che di mi ko ma teen̄, di ma wuo nii sima bulia. ¹⁶ Mi faa che di mi ku to ma lerin̄ a nama, an̄-na mu Masidoonia tin̄teen̄. Di mi ne fa bira lii Masidoonia kuko, di mi bira ku to ma teen̄, di ma hemi won̄biin̄ ð di mi mu Judiya tin̄teen̄. ¹⁷ Ma biina ari di mi n̄i che di mi ñaa wii, mi bi jan̄ biine an̄-na ñaa? Ma bira biina mii ñaa mi wiaa ari dunia niaa s̄i ñaa nee, di mi sei wiin̄ an̄ bira bul di mi bi wii-la seye naa-buasula titia lee? ¹⁸ Ma jima woruñ ari Wia ken̄ wutitii. Nii wiaa wialin̄ kala la si bula pima ñaa wutitii ne. La bi wiaa bula ari tuobiinaa balia ne. ¹⁹ Ma bira jima ari mi-na Pööl, la di la naan̄biirin̄ Silivaanas ari Timoti ne bul Yesu Kirisito wiaa pima. Yesu wii-wii-kala ñaa wutitii ne. Wunyari kala tuo ba ð. U yie sei wutitii

ne bua-na kala. ²⁰ Wia bula ari u jan ŋaa wiaa yuge a pila. U jan to Yesu le ne a lenj di wialinj ku ŋaa wutitii. Nii wiaa ne tii, di la ne chuɔɛ Wia dɛre-na kala, la yie bul “ami” u dolunj le. La yie bul nii di Wia yirinj wuo yire ne. ²¹ Ama Wia titia ne bula ari la di ma kala kenj miisinj Kirisito le ne. U ne liisela di la tinj tintiminj deenj maa. ²² U magilela ne. U jonj u Dinj-zɔŋ-la a hela le ne, di la wuo jinj ari maachie u jan jonj ku-danj ma pila.

²³ Ari Wia, wialinj kala mi si bula ŋaa wutitii ne. Mi bi ma teenj kɔ Kŏrinti le, bɛɛ wiaa mi fa bi che di mi walimema. ²⁴ U bi naga ari ma si laa wialinj dii ne tii la chiche di la fugema, ama laa che di la pema le di ma kenj tuɔtɔrunj. Ma laa Yesu wiaa dii ne a chinba le kpanj kpanj.

2

¹ Nla wiaa ne tii mi bi ma teenj kɔ. Di mi ne fa kɔ, ma tuɔŋ fa jan chei. ² Di mi ne ŋaa di ma tuɔŋ chei, kubɛɛ ne he dime si jan lenj di mi tuɔŋ tɔrɛ? Nuu-kala tuo, see nialinj titia mi si ŋaa ba tuɔŋ chei. ³ Di mi ne fa kɔ ma teenj, ma ne fa jan ŋaa di mi tuɔŋ tɔrɛ. Nii wiaa, di mi ne lenje ma tuɔŋ chei, ma bira bi jan lenj di mi ma tuɔŋ tɔrɛ, nii ne tii tenj-la mi si ŋmunsa pima mi bul wialinj nii pipima. Mi ŋaa ma kala yarida ne. Mi jima ari tuɔtɔru-la mi si na, ma ma nau ne. ⁴ Bua-la le mi si ŋmunse tenj-la di mi pima, mi tuɔŋ faasa chei ne worunj. Mi paala yel ne a tinj ma wiaa. Mi bi tenj-la ŋmunsa di mi chei ma tuɔŋ, ama di mi lenj di ma jinj ari mi faasa choma ne.

U maga di la jonjo che nii-la si ŋaa wii chei

⁵ Di nuu ne ŋaa ma tuɔŋ chei, ma dunduna saa dee, mi ma tuɔŋ cheye ne, ama mi bi che di mi bul wiinj deenj yuge. ⁶ Nii-la si ŋaa nii, ma dɔgisu ne, nii wiaa má lenj wii-la ta. ⁷ Leɛɛ-na u maga di ma jonj wii-la kala cheu, a peɛ le di u tuɔŋ tɔrɛ. Di nii dee, u tuɔŋ janj faasa chei a kieli

duu pugime. ⁸ Nii wiaa mii sulma di ma wasa kenu worunj a chou. ⁹ Nla wiaa ne tii mi ŋmunse teninj pima, di mi na di ma jan wuo to wii-kala mi si bula pima. ¹⁰ Di ma ne jonj wii che nuu, mi ma jonjo cheu ne. Di mi ne fa maga di mi jonj wii che nuu, mi jonjo cheu ne, a tinj ma wiaa. Kirisito sipaanj ne mi ŋaa nii, bɛɛ wiaa ¹¹ mi bi che di Sitaani wuola. La jinj u wu-keninj ne.

Pɔɔɔl tuɔŋ bi di-bala pina Turɔwas tinjteenj

¹² Mi si kɔ Turɔwas tinjteenj di mi bul Kirisito wu-zɔmɔ-la a piba, la Tiina suri wonbiinj pimi ne, ¹³ ama mi tuɔŋ bi di-bala pina, bɛɛ wiaa mi naanbie Taatis fa tuo dime. Nii ne mi sii lee-la a mu Masidoonia tinjteenj.

Kirisito dolunj le la yuo dii Sitaani

¹⁴ Ari nii kala, mi haa lolle Wia ne. Bua-na kala, u yie to Kirisito le ne a pela le la wuo yuo dii Sitaani. U yie pela le la wuo bul Kirisito wiaa leena kala. Kirisito wu-zɔmɔ-la nage tulaali sii suɔrɛ, u suɔraa laa lerinj kala. ¹⁵ La titia nage tulaali-zɔŋ-la ne Kirisito jonjo pi Wia. Wia jonjla gaare nialinj u si laa ta ari nialinj sii lel tuɔŋ ne. ¹⁶ Nialinj sii lele teenj tulaalii-la suɔraa kpuba ne. Ama nialinj Wia sii laa ta teenj, tulaalii-la suɔraa piba miisinj ne. Kubɛɛ ne saa maga duu tinj tintiminj deenj? ¹⁷ Niaa yuga ne a gollo bubul Wia niinj wiaa a lilaa moribiee, ama lana bi nii ŋaa. La-na ŋaa ni-titiiba ne. Wia ne liisela di la tinj tintiminj deenj. Kirisito dolunj le ne la to aa bul Wia wiaa.

3

Nii-falii-la dolunj wiaa

¹ Ma biina wialinj la si bula, laa dage la titia nii la si naga nɛɛ? Niaa dɔŋsunj cho di ba ŋmunse tenninj a dage ba si nage nii ne di ba kaa kɔ pima. Dɔŋsunj ma cho di ba laa tenninj ma teenj a dage ba si nage nii a pi niaa, ama la-na bi che di la

ņinaa ņii. ² Ma-na, ma ne saa ņaa ten-la la si ņmuņsa, di niaa karime a jin ņii la si naga. Ba ņmuņsa he la tuoņ ne. ³ Ma ne saa chaasa daga ari ma ņaa ten-la Kirisito si leņe la ņmuņse. Teniņ deen, u bi naga ku-la niaa si kaa ņmuņse tenniņ ne. Wia si weye joņ u Diņ-zoņ-la ne kaa ņmuņse kialiņ ma tuoņ. Ba saa bira bi ņmuņsa ne tabii-taala le, ama ba ņmuņsa he nuhuobiinee tuosaa le ne.

⁴ La to Kirisito le ne a ņaa Wia yarida, ņii ne tii la keņ nyu-duoņ a bubul u wiaa ņii. ⁵ U ņii bi naga ari tiņtimii-la la sī tiņ, la titia keņ u doluņ ne. Wia ne pila doluņ la titiņ. ⁶ Wia titia ne pila tiņtimin deen doluņ. Kirisito si joņ u chaliņ a ta ņii-falii-la u niaa teen, u wiaa ne la bubul. Ba bi wialiņ ņmuņsa he tabii-taala-la le. ņii-falii-la doluņ lii Wia Diņ-zoņ-la wialiņ ne. Wialiņ Moosis si ņmuņsa bil di niaa tuto bi niaa miisiņ wuo pa, ama Wia wu-zomō-la si lii u Diņ-zoņ-la teen ne wuo niaa miisiņ pipa.

⁷ Wialiņ Moosis si ņmuņsa bil di niaa tuto, ba ņmuņsa he tabii-taala le ne. Wialiņ fa bi niaa miisiņ wuo pa. Bua-la le Wia si joņba pipi Moosis, Wia dage u tula pu ne. ņii ne Moosis siaa kala tutul. Ba sī tul ņii, tula-la fa jaņ lel, ama Iziral tiņņaa bi u siaa wuo biben. ⁸ Ama Wia wu-zomō-la lii Wia Diņ-zoņ-la le ne. U tutul a kii ņii ne. Tula-la-na bi jaņ lel. ⁹ Wialiņ Moosis si ņmuņsa bil di niaa tuto ne fa keņ tula. Ama ba fa joņ cheeriņ pi nialiņ fa sī toba ne. ņii-na wialiņ si leņe niaa keņ tuo-pula Wia teen jaņ paala keņ tula a kii ņii. ¹⁰ ņii-na buņbuņ ku-la fa sī tul bira bi tula kenē. U tula-la lele ne, beē wiaa kuņ doņ nīi tul a kii ņii. ¹¹ Di ku-la fa si bi jaņ dieni ne kō a tutul, ņii-na ku-la si jaņ he dime deen deen ne jaņ tutul a kiiu.

¹² Laa yiēle Wia wu-zomō-la le ne. ņii ne tii la chaasa keņ nyu-duoņ aa tiņ. ¹³ Ama la bi Moosis naga. Bua-la le u si na Wia tula, tula-la juu u

siaa ne. Tula-la haa che duu lii ne. ņii ne u joņ geriņ a to u siaa, di tula-la si lii, di Iziral tiņņaa sīu na. La bi kuņ joņo to la siaa. ¹⁴ Ama Iziral tiņņaa fa keņ nyu-duoņ ne. Ba bi Wia wialiņ laa dii. ņii wiaa ari jiniņ kala, di ba ne karime wialiņ Wia fa si joņo pi Moosis buņbuņ-la di niaa tuto, ba biba laa didii. U naga ari geri-la Moosis fa si joņo to u siaa di Iziral tiņņaa sī u siaa na, ku-la ha to ba siaa ne di ba sī Wia tula na. Ama Yesu Kirisito ne jaņ wuo keņ geri-la suri, di ba wuo na Wia tula. ¹⁵ Ari jiniņ kala, di ba ne karime wialiņ Wia fa si joņo pi Moosis di niaa tuto-na kala, u yie nage ari kuņ ne to ba wu-jimiņ, di ba sī wialiņ bubuoņ jin. ¹⁶ Ama di nuu ne birima a to la Tiina Yesu, Wia jaņ keņ ku-la si kere ba wu-jimiņ kaa joņ. ¹⁷ La Tiina Kirisito ari Wia Diņ-zoņ-la kala ņaa kubala ne. Lee-la kala saa la Tiina Kirisito Diņ-zoņ-la si he, lee-la niaa bi kuņkala yosu ņaa. ¹⁸ La nialiņ kala si laa Yesu wiaa dii, geri-la fa si to la siaa, Wia kaa suri ne. Kirisito tula juu la siaa ne la tutul ari u sīi tul ņii. U keņla kaa bibirime di la wasa tutul halii, la ku nagu u wii-wii-kala le. La Tiina Kirisito ari Wia Diņ-zoņ-la ne ņaa ņii la le.

4

La nage pupoyee ne, Wia joņ ku-zoņ-la a tuoē la tuoņ

¹ Wia ne fála nennige a joņ tiņtimin deen pila di la titiņ, ņii wiaa la naņdaasiņ bi yuōre. ² Hiisi wialiņ ari wu-kaa-faali-la niaa si luōra ņinaa, la-na viaba ta ne faafaa kala. La bira bi nuu nyise. La bi wiaa nyia pipe Wia niin wialiņ le. Ama Wia sipaāņ la chaasa bul wiaa, di nuu-kala tuōbiinaa jin ari wutitii ne la bubul. ³ Ama di Wia wu-zomō-la la sīi bul faa, nialiņ si lele teen ne ba faa. ⁴ Niaa deenba Sitaani ne to ba wu-jimiņ di ba sī wuo na pulumuņ. Wia wu-zomō-la

la síi bul níi dage puluŋ-la. Wia wu-zomɔ-la ma didage Kirisito tula, nii-la si nage Wia. ⁵ Wialin la síi bul, u bi naga la titia wiaa ne la bubul, ama Yesu Kirisito wiaa ne la bubul, nii-la si tii nuu-kala. U wiaa ne tii la tima pipima. ⁶ Bunbun Wia si ŋaa dunia, u leŋe pulumuŋ chaane birimin tuɔŋ ne. Nii titia ne lele u leŋ pulumuŋ ku juu la tuɔŋ. Puluŋ-la ne leŋe la keŋ wu-jimin a wuo jin ŋii Wia síi tul. Wia dage ŋii u síi tul Kirisito siaa le ne.

⁷ La nage pupoyee ne, Wia jon ku-zomuŋ deen a tuɔle la tuɔŋ. Nla saa daga ari dol-bal-la ŋaa Wia kuŋ ne. La dee buu tii. ⁸ La na heeŋ ne woruŋ lee-na kala, ama hee-la bila wuo. Bua doŋɔ le la yie bi jin wii-la kala le la si he, ama la ha keŋ yielaa. ⁹ Ba yie to naasiŋ a dudogisela, ama Wia bila via ta. Niaa yie ŋmoola lo, ama la bi suu. ¹⁰ Kirisito si suu ŋii, ŋii titia ne la yie na la miisin le ari la ma suba. U ŋii leŋe di miisi-la Yesu si kene, di la ma keŋ miisi-la titia. ¹¹ A tin Yesu wiaa, la si he miisin deen le, niaa yie keŋla di ba kpula ne. U ŋii ŋaa di miisi-la Yesu si kene, di la ma kenu ne. ¹² Nii wiaa Wia leŋ la suu ne di ma-na keŋ miisin.

¹³ Nuu ne ŋmunse wiin deen a bul, 'Mi laa Wia wiaa dii ne, ŋii ne tii mii bulba.' La ma keŋ yarida-la titia ne. Nii ne tii la ma laa u wiaa dii a ma bubulba. ¹⁴ La jima ari Wia ne chise la Tiina Yesu suuŋ le, u jan chise la maa, di la di Yesu kala keŋ miisin. U jan keŋla ari ma kala a kaa mu u teen. ¹⁵ Ma wiaa ne tii wiaa deenba kala ŋaa, di niaa wuo yuge a juu Wia lahɔrimɔ-la le. Nii jan leŋ di niaa yuga a denne Wia, di u yirin yire.

¹⁶ A tin wiin deen wiaa la nanndaasiŋ bi yuɔre. Yara-la la si kene la miisin deen le, uu hiese ne, ama la diŋsiŋ-na wasa zuzɔŋ tapulii kala ne. ¹⁷ La teen hee-la la síi na bi yuge aŋ bira bi jan dieni maa. Hee-la dagela wonbii-la la si jan to a laa yirin ne Wia teen. Yiri-la jan ŋaa yiri-bal. Yiri-bal-la la si jan laa jan

kii hee-la la síi na. La jan keŋ yiri-balin deen deen. ¹⁸ Nii wiaa kialin la síi na dunia deen le, la bibaa beŋ ari ba ŋaa kiaa. La miiraa beŋ kialin la si bi na ne, bee wiaa kialin si he dunia deen le niaa nina, ba jan lel, ama kialin niaa si bi na a he Wia teen, ba-na jan he dime a kaa mu wuu.

5

La jan keŋ yari-falaa Wia teen

¹ La jima la yaaraa deenba la si kene la miisin deen le, di la ne suba a mu Wia teen, u jan pila yari-falaa. Yari-falii-la bi dunia deen lia. U lii Wia teen ne. La jan keŋba a he Wia jan le deen deen. ² La si he la miisin deen le, la faasa yel ne. La fa cho di la keŋ yara-la Wia si jan jonɔ pila ne. ³ Di Wia ne fa jon yara-la pila, la fa bi jan keŋ yaribiree. ⁴ Yara-la la si kene la miisin deen le bi leŋe la tuɔŋ tɔre. U bi naga ari la cho di la suba ne, ama la cho di la keŋ miisin Wia teen ne. U ŋii wiaa Wia jan jon yara-la si bi jan suu, a lenni la yaraa deenba si jan suu. ⁵ Wia ŋaa nii-la si jon yari-falaa deenba ne a pila. U ne saa jon u Diŋ-zɔŋ-la ma hela le di la wuo jin ari la jan keŋ yari-falaa deenba u teen.

⁶ Nii wiaa bua-na kala le la nyuŋ yie nyaase ne. La si keŋ yaraa deenba la miisin le, la bi la Tiina Yesu kpaga. ⁷ La bi Kirisito ka na, ama la laa u wiaa dii a tutou. ⁸ La nyuŋ nyaasa ne, la saa cho di la lii dunia deen le a mu la Tiina Yesu teen. ⁹ Nii wiaa, di la ne he dunia deen le, la cho di la ŋaa wiaa di u tuɔŋ tutore ne. Di la ne mu u teen maa, ŋii titia ne la jan ŋiŋaa, ¹⁰ bee wiaa la kala jan mu chin Kirisito sipaan duu dii la sariya. Kirisito jan tin nuu-kala mage ŋii u si tima mage dunia deen le. Di ŋ ne faa ŋaa wu-zɔŋɔɔ, u jan jon wu-zɔŋɔɔ tin. Di ŋ ne fa ŋaa wu-bɔŋɔɔ maa, u jan jon wu-bɔŋɔɔ tin.

A tiŋ Kirisito wiaa, la di Wia dii nanɔŋsun

¹¹ Laa fá Wia nɛ. Nii nɛ tii la bul u wiaa pipi niaa, di ba birima lii ba haacheba ɛ a ku to Wia. Wia nɛ jinŋ nii la si naga. Mi saa jima ari ma tuɔbiinaa ɛ ma jinŋ nii la si naga nɛ. ¹² Nii nɛ tii la bi che di la dage la titia ma teen, ama laa che di ma bul wutitii-la ma si jima a mu tigɛla ɛ. Di ma nɛ ŋaa nii, ma jan wuo bul wiaa a pi nialin si si baa to Wia aŋ ken tuɔ-bomun. ¹³ Ma biina ari laa nyaase nɛ ari la síi bul wialin? Di la níi nyaasu, Wia wiaa nɛ tii, ama di la nyun níi tinŋ maa, ma wiaa nɛ tii. ¹⁴ Kirisito chola nɛ, u chonu-la nɛ kenla kaa titinŋ. La saa seye ari nuu-kala wiaa nɛ ni-bala suu, a tinŋ nii wiaa u nage nuu-kala suba nɛ. ¹⁵ Nuu-kala wiaa nɛ tii Kirisito suu. U si suba nii, nialin si tou ɛ a ken miisinŋ, u maga di ba ŋinŋaa wialin síi tɔre u tuɔŋ, aŋ sí ba titia tuɔtɔre wiaa ŋaa, a tinŋ u si suu ba wiaa aŋ sii suunŋ ɛ.

¹⁶ Nii wiaa, a lii jinŋ kaa mumu la bi che la beŋ niaa ari dunia niaa síi beŋ niaa nii. Bua dɔŋɔ ɛ, la faa beŋ Kirisito ari niaa síi beŋ dɔŋɔ nii, ama leeɛ la bira buu beŋ ari la fa síi benu nii. ¹⁷ Nii wiaa di nuu-kala nɛ laa Kirisito wiaa dii, ba di Kirisito ŋaa kubala nɛ. Wia kenu birime ni-falii nɛ. Wu-binia-la kala bálá nɛ. Wu-falaa nɛ suomi u miisinŋ ɛ. ¹⁸ Wu-falaa deenba kala lii Wia teen nɛ. Wia to Kirisito ɛ nɛ a len ba di niaa sinŋ. Tinŋtimii-la Wia si jonɔ pila nɛ ŋla: di la mu bula pi niaa di ba kɔ, di ba di Wia sinŋ. ¹⁹ Wia to Kirisito ɛ nɛ a wuo ŋaa ba di dunia niaa kala sinŋ. Wia na dunia ari ba ken haache nɛ, ama u fába nennige a jon ba haacheba-la a cheba. Wia nɛ si la bula pi niaa ari la di Wia sima nɛ leeɛ. ²⁰ A tinŋ nii wiaa Kirisito naasinŋ ɛ nɛ la chinŋ a bubul wiaa deenba a pipi niaa. Wia tola ɛ nɛ a bula pima di ma kɔ u teen. A tinŋ Kirisito wiaa laa sulma di ma kɔ, di ma di Wia sinŋ. ²¹ Kirisito fa bi

haache kene, ama a tinŋ la wiaa, Wia lenɛ u suu a nage haache tiina. Wia ŋaa nii di la wuo to Kirisito ɛ a ken tuɔ-pula u teen.

6

¹ Tinŋtimii-la la síi tinŋ, la di Wia kala níi tinŋ. Nii wiaa laa sulma, ma sí lenɛ di Wia lahɔrimɔ-la u si kene ma teen ŋaa wu-peiba. ² Wia titia bul wiin deen u tenin tuɔŋ. U si, “Bua-la ɛ mi si cho nɛ mi jegile nii ma teen.

Mi pɛma ɛ nɛ.

Tapulii-la maa mi si cho, mi laama ta nɛ.”

Má bee na, jinŋ nɛ ŋaa tapulii-la Wia síi che duu laama ta. ³ La bi che di la jon kun-kala gere nuu-kala wonbiinŋ ɛ di ba sí wu-bɔŋ kala biinu a mu tige tinŋtimii-la la síi tinŋ ɛ. La ŋaa Wia tinŋtinnaa nɛ. ⁴ Nii wiaa wii-na kala la síi ŋaa ɛ, la yie dage ari la ŋaa ni-titiiba nɛ. La yie nina heen nɛ a na wu-yiriba kala ma ɛ, ama la yie faasa nyalime nɛ. ⁵ Ba yie ŋmoola a kenla tɔ dia, niaa ŋaa taaweɪ la nyun, la yie faasa titinŋ nɛ, la bi don pin, losun ma kenla. ⁶ La yie dage ari la ŋaa Wia tinŋtinnaa nɛ, bee wiaa la bi disinninŋ kene. La jinŋ wiaa nɛ, a ken kenyiri, a ken zile, a ken Wia Din-zon-la maa, a cho niaa ari Wia si chola nii. ⁷ La yie bul wutitii nɛ a ken dol-la Wia si pila a kaa titinŋ, a ken tuɔ-pula ma Wia sipaan. Tuɔ-pula-la nage huonunŋ nɛ la si vɔ laale la na-diinŋ ari la na-gua nisaa ɛ a kaa ŋaa siri di la pɔ la titia ɛ. ⁸ Niaa dɔŋsunŋ ka pila jirima, ka dɔŋsunŋ ma tutuusɛla. La hariŋ niaa dɔŋsunŋ bibesɛla ɛ, ka dɔŋsunŋ ma bul wu-bɔŋɔɔ a titigɛla ɛ. Ba biina ari laa nyise niaa nɛ, ama wutitii nɛ la bubul. ⁹ Nuhuobiinee bila jinŋ, ama Wia-na jinla nɛ. Niaa biina ari la suba nɛ, ama Wia teen la weye nɛ. Baa dɔgisɛla nɛ, ama ba bila kpua. ¹⁰ La tuɔŋ yie chei nɛ, aŋ ka la jujuɔɛ. La ŋaa summoo nɛ, ama la yie pɛ niaa ɛ di ba ma kuori Wia

teenj. La bi kuŋ-kala keŋe, ama la ne tii kuŋ-kala.

¹¹ Ma Kōrinti niaa, la chaasa bul wutitii ne a pima. La bi wii-kala kaa fifaama. ¹² La choma ne, ma ne bila cho, nii ne tii ma bi che di la mal dōŋo. ¹³ Ma nage mi biirin ne. Nii ne tii mii bul wiaa ŋla a pipima. Má leŋ ma tuōŋ pulle a chola.

Pōol chagile nialinj si laa Yesu wiaa dii a mu tige nialinj si bi Wia wiaa laa dii le

¹⁴ Ma sí ma titia kaa mere nialinj si bi Yesu wiaa laa dii le. Ni-zōŋŋo ari ni-bōŋŋo bi maga di ba mere dōŋo le. Pulumuŋ ari biriminj bi jaŋ wuo guoli dōŋo le. ¹⁵ Kirisito ari Sitaani bi jaŋ wuo keŋ nii-bala, nii titia ne nii-la ma si laa Yesu wiaa dii ari nii-la si bi u wiaa laa dii, ma bi jaŋ wuo tuto dōŋo. ¹⁶ La ŋaa Wia-la si weye dia ne, u hela le. Nj bi jaŋ wuo juu Wia-dia a kpaare vuiaa dime. Nla ne Wia titia bul u teninj tuōŋ. U sí, “Mi jaŋ heba le

a vivilli ba tuōŋ.

Mi ne jaŋ ŋaa ba Wia,
di ba ma ŋaa mi niaa.

¹⁷ Nii wiaa má liise ma titia nialinj si bi Yesu wiaa laa dii tuōŋ,
a hoŋ ma dunđuŋ.

Ma sí kialinj si keŋ disinninj didigu.
Ma ne ŋaa nii, ma jaŋ wuo ko mi teenj.

¹⁸ Mi jaŋ ŋaa ma Nyimma
di ma ma ŋaa mi nanualaa ari mi toloo.”

Wii-jaribako ne bul nii.

7

¹ Mi naanbii-kpianaba, Wia si folo bul di u jaŋ ŋaa wiaa deenba kala pila, má leŋ di la liise la titia disinj-na kala le. Di la ne bi disinj kala ŋaa, nii jaŋ dage ari wutitii, la sene fifa Wia ne.

Wialinj si ŋaa Pōol tuōŋ tōre

² Má chaasa pulle ma tuōŋ pila. La bi wii ŋaa cheima, la bi ma nyuŋ ma cheye, la bira bima gura maa. ³ Mi si bul wiinj deenj, u bi naga ari mi

si di ma cheye ne, bee wiaa mi laa sipaanj bula pima ari la choma ne. Nii wiaa, di miisinj ne, la kala jaŋ keŋu, di suuŋ ma ne, la kala jaŋ suu. ⁴ La nyuŋ nyaasa ma wiaa ne. A tinj ma wiaa ne tii la bibigisi la titia le. Mi kala ne ŋaa tuōtōru. La na heŋ ne kinkeŋ, ama mi tuōŋ faasa tōre ne.

⁵ La si paala ku juu Masidoonia tinteenj, la bi wiesee na. Wiaa juula woruŋ. La yaraa le la na heŋ, la tuōbiinaa le wiaa wiwalimela woruŋ. ⁶ Nii ne la naanbie kubala baa yire Taatis ko la teenj. U si ko nii, la tuōŋ tōre ne woruŋ. Wia ne pila tuōtōruŋ deenj. U ne yie ŋaa nialinj tuōŋ si cheye na tuōtōruŋ. ⁷ U si ko nii dunđuŋa dee bi leŋe la tuōŋ tōre. U bula pila ari ma keŋu woruŋ, u ma tuōŋ tōre. U bira bula pila ari ma cho di ma nami, a bira bula pila ari wii-la mi si bula pima ŋaa ma tuōŋ faasa chei ne, a bira bula pila ari ma cho mi wiaa ne. Nii wiaa mi tuō-chei-la miira birime tuōtōruŋ ne. ⁸ Tenj-la mi si ŋmuŋsa pima leŋe ma tuōŋ cheye ne. Di ma tuōŋ ne cheye maa, mi-na tuōŋ bi cheye. Di ma tuōŋ ne fa cheye a tinj tenj-la wiaa, mi jima ari ma tuōŋ bi jaŋ chei a dieni.

⁹ Ama leele mi tuōŋ tōro ne, bee wiaa ma birima lii ma haacheba le. Ma sí to Wia ne tii ma tuōŋ chei nii, ama ma saa bi tele. ¹⁰ Di Wia ne leŋe nuu tuōŋ chei a tinj u haacheba wiaa, u tiina yie birima lii u haacheba-la le ne. Di u ne ŋaa nii, Wia laau ta. Ama di nuu tuōŋ ne cheye ari dunia niaa tuōŋ si cheye nii, u tiina bi jaŋ keŋ miisinj Wia teenj. ¹¹ Má bee na heŋ-la ma si na a tinj ma sí che di ma to Wia wonbii-la wiaa. Leele ma fiese siinj ne a didage ari ma bi wii cheye. Ma na baaninj ne a tinj wu-bōmo-la ma si ŋaa wiaa. Fawulluŋ keŋma. Ma chomi ne a fiese siinj di ma nami. Ma ŋaa siri di ma dōgise nialinj síi ŋaa wu-bōŋŋo ma tuōŋ. Ma daga ari ma bi wii-kala cheye. ¹² Nii wiaa tenj-la mi si ŋmuŋsa, u bi naga ari nii-la si ŋaa wiaa chei ne

tii mi n̄mun̄sɛ. Mi bira bi n̄mun̄sa pi nii-la si na hɛɛŋ a tiŋ ba si ŋaa wii-la cheiu lɛ. Ama mi n̄mun̄sa nɛ di ma dage Wia sipaan̄ ari ma chola nɛ. ¹³ N̄ii wiaa la tuɔŋ piŋ di-bala nɛ. Taatis si kɔ ma teen̄, ma leŋe u tuɔŋ tɔrɛ nɛ woruŋ. U tuɔbiinaa ma piŋ di-bala. N̄ii nɛ leŋe la ma tuɔŋ tɔrɛ. ¹⁴ Mi bigisi mi titia lɛ nɛ u sipaan̄ a tiŋ ma wiaa. Ama ma bi leŋe hiisij diimi. N̄ii nɛ wialij kala la si bula pi Taatis a tigema lɛ ma ku ŋaa wutitii. Wialij kala la si bula pima sɛnɛ ŋaa wutitii nɛ. ¹⁵ Taatis titia choma nɛ woruŋ. U na ŋii ma s̄i to Wia niij wialij. Ma fá fawulluŋ aŋ kenu woruŋ, a zizilu woruŋ. ¹⁶ Mi tuɔŋ tɔrɛ nɛ, bɛɛ wiaa mi ŋaa ma yarida nɛ kin̄kɛŋ.

8

Wia niaa maga di ba pɛ nialij sii to Wia lɛ

¹ La naan̄biirin̄, laa chɛ di ma jin̄ Wia si pɛ nialij si laa Yesu wiaa dii aa hilimi Masidoonia tin̄teen̄ kala lɛ ŋii. Wia doluŋ lɛ, niaa deen̄ba tin̄ tin̄-zɔŋŋɔɔ nɛ. ² Ba faasa na hɛɛŋ nɛ woruŋ. Hɛɛ-la magiseba nɛ woruŋ. Niaa deen̄ba fa ŋaa summoo nɛ, ama a tiŋ tuɔtɔru-la wiaa ba si kɛnɛ, kialij mua ba si kɛnɛ, ba joŋo dii zile niaa lɛ. Ba joŋba kpikpaa nialij si bi kɛnɛ biri biri. ³ Mi jaŋ wuo bula pima ari niaa deen̄ba, ba joŋ ku-dan̄ nɛ pila di la joŋo pi nialij si ŋaa summoo a guoli Wia niaa tuɔŋ Jerusalem lɛ. Ba bira wasa joŋ a kii ŋii nɛ a pɛ pila, aŋ hoŋ ari na-hillin̄. ⁴ Ba chaasa faasa sulla nɛ woruŋ di la piba won̄biin̄ di ba ma wuo joŋ kiaa pipe Wia nialij lɛ. ⁵ La fa bi yiɛla di ba jaŋ wuo pa a mage ŋla. Ba laa sipaan̄ joŋ ba titia a pi Wia nɛ. U ŋii harin̄ lɛ nɛ ba s̄i la ma niij wiaa. Wia tuɔtɔruŋ lɛ nɛ ba ŋaa ŋii. ⁶ Taatis nɛ suomo laa kiaa deen̄ba ma teen̄. N̄ii wiaa laa sulu, u si suomo ŋii, duu wuo kaa mu dɛrɛ ma teen̄. ⁷ Ma bi kuŋ-kala chɛ kika. Ma faasa kɛŋ yarida. Ma wuo Wia

wiaa bubul nɛ woruŋ. Ma faasa kɛŋ wu-jimin̄, a fiɛɛ siin̄ di ma pɛ niaa lɛ, aŋ faasa chola maa. Laa chɛ di ma faasa kɛŋ zile nɛ a pɛ Wia nialij lɛ.

⁸ Mi bima fuga di ma joŋ kiaa pipi niaa. Niaa dɔŋsuŋ fiɛɛ siin̄ nɛ a cho di ba ŋaa kiaa kpikpaa niaa. N̄ii nɛ tii mii chɛ di ma ma dage ari wutitii, ma sɛnɛ cho niaa nɛ. ⁹ Ma jima, la Tiina Yesu fa kɛŋ zile nɛ. Aŋ ka duu ku tuu dunia, u fa kɛŋ kiaa nɛ woruŋ Wia-jaŋ lɛ, ama a tiŋ ma wiaa u kɛŋ u titia kaa ŋaa summu dunia lɛ. U ŋaa ŋii di ma wuo tou lɛ nɛ a kuori. ¹⁰ Mi kɛŋ wii nɛ di mi bul a tige wiin̄ deen̄ lɛ. Diimin̄ nɛ ma suomi di ma kiesɛ kiaa pipi nialij si ŋaa summoo a guguoli Wia niaa tuɔŋ Jerusalem lɛ. Ma nɛ laa sipaan̄ a kiesɛ kiaa di ba kaa mu pi Wia nialij. N̄ii wiaa má ŋaa mu na u diderin̄. ¹¹ Ma fa ŋaa siri nɛ di ma kiesɛ kiaa pipi nialij si hɛ Jerusalem lɛ. Lɛɛɛ kialij ma si kiesa, má joŋo piba di la jin̄ ari ma ŋaa wii-la ma fa s̄i chɛ di ma ŋaa nɛ. Má piba a mage ŋii kala ma si kɛnɛ. ¹² Di nuu nɛ ŋaa siri duu joŋ kuŋ pi nuu, nii-la u si chɛ duu joŋ ku-la pa jaŋ laa ku-la kala u si joŋo pu, ama u bi jaŋ laa a kii ŋii. ¹³ Ma si joŋ kialij pi nialij, mi bi si di ba nɛ miira kɛŋ kiaa a yuge a ninii sima, aŋ ka di ma nɛ miira nina hɛɛŋ. ¹⁴ Wii-la mi s̄i chɛ nɛ ŋla, di ma kɛŋ kiaa mage dɔŋɔ. Bua deen̄ lɛ ma kɛŋ kiaa yuge nɛ, aŋ ka ba bi kuŋ kɛnɛ. N̄ii wiaa, má pɛba lɛ di ba na kialij ba s̄i chɛ. U harin̄ lɛ, di nialij ma nɛ ku kɛŋ kuŋ, ba ma jaŋ pɛma lɛ di ma kɛŋ kialij ma s̄i chɛ. ¹⁵ Ŋla nɛ ba bul Wia tenin̄ tuɔŋ. Ba bula ari nialij kala si faasa paa boroboro-la si lii Wia-jaŋ ku tuu, ari nialij kala si paa mua mua, ba kala yie kaa kpaa a mage dɔŋɔ nɛ.

Pɔɔl tin̄ Taatis duu mu na Kɔrin̄ti niaa

¹⁶ Mii lɔlle Wia nɛ kin̄kɛŋ ari u si leŋe Taatis choma ari mi ma si choma ŋii. ¹⁷ U bi naga ari la si tin̄

Taatis duu ku laa kialinj ma teenj ne tii u kɔ. U ma fa paala cho duu kɔ ma teenj ne. ¹⁸ La naanbii dɔnj ma ne to Taatis harij kukɔ. Nialinj kala si laa Yesu wiaa dii aa hilimi jimu ne a tinj u sii bul Wia wu-zɔmɔ-la wiaa. ¹⁹ Nii ma dundunja dee. Nialinj si laa Yesu wiaa dii aa hilimi tasi-la kala le ne liisu duu pela le di la lilaa kialinj a pipe Wia niaa le. Nii daga ari la nja siri ne di la peba le, di Wia yirinj yire. ²⁰ Nii wiaa la bi che di nuu-kala wuo na wu-bɔnj kala a bul, a mu tige kialinj la sii che di la kaa kpaa Wia niaa le, bɛɛ wiaa kialinj nja ku-danj ne. ²¹ La bul nii, bɛɛ wiaa wii-na kala la sii nja le, laa che duu nja wu-zɔnj ne Wia ari nuhuobiinee pege. ²² La naanbii dɔnj ma ne to ba harij kukɔ. Wii-kala le la magisu ne a na ari u kenj wutitii. Leele u paala chaasa fiɛɛ siinj ne worunj, bɛɛ wiaa u kenj yarida ma le worunj. ²³ Taatis-na nja mi tinjinni dɔnj ne. La duu kala ne tima pipima. Ka la naanbiiri-la-na, baa nja nialinj si laa Yesu wiaa dii aa hilimi tasi-la kala le tinjdaaraa ne. Baa tinj Kirisito tinjinja ne duu yirinj yire. ²⁴ La laa sipaanj bul ma wiaa piba ne, a bigisi la titia le a tinj ma wiaa. Ma dage nialinj si laa Yesu wiaa dii aa hilimi tasi-la le ari wialinj la si bula a tigema le nja wutitii ne. Ma pe lenj di ba jinj ari ma choba ne.

9

¹ U bi maga di mi bul di ma jonj kiasa pipi Wia niaa si he Jerusalem le, ² bɛɛ wiaa mi paala jinj ari ma nja siri ne di ma nja nii. Nii wiaa ne tii mi bibigisi ma wiaa a pi Wia nialinj si he Masidonia tinjteenj le. Mi bula piba ari nialinj si he Akaaya tinjteenj le nja siri harij jina-la di ba pe Wia niaa le. Ma si fiɛɛ siinj nii, ma leje niaa yuge ne a ma cho di ba pe jonj kiasa pipi nialinj. ³ Mi laa sipaanj titinj mi naanbiirinj deenba di ba kɔ ma teenj, di ma wasa kenj ma titia ari kialinj ma sii che di ma paa, ari mi si bul ma wiaa nii piba, di wialinj mi

si bula a tigema le si pei nja. La laa ma wiaa dii worunj a bula piba ari ma janj che kialinj bil. ⁴ Di ba ne to kɔ a na di ma bi kialinj che bil, hiisinj janj diila, a diima maa a tinj nii wiaa. ⁵ Nii ne tii mi biine duu maga di mi tinj mi naanbiirinj deenba di ba laa sipaanj kɔ mi le, di kialinj ma si bula ari ma janj jonjo pe Wia niaa le, di ma jonjo he dɔnjɔ le, ka di mi-na kɔ. Nii janj dage ari ma titia tuɔtorunj le ne ma nja nii. Mi bi maa fuge di ma nja nii.

⁶ Ma si wiinj deenj yu. Di η ne jonj ku-doho mua duu, kialinj η si janj kunj bi janj yuge, ama di η ku-doho ne yuga di η jonjo duu, η janj kunj kiasa yuge. ⁷ Nuukala dolunj si mage nii, u maga duu tia a mage nii ne. U maga duu pulle u tuɔnj a pi kialinj, anj si saka saka nja. U bi maga duu biine ari baa fugu ne duu pi kialinj. Nuukala maga duu tia kiasa ari u tuɔtorunj le, bɛɛ wiaa Wia cho niila sii pa ari tuɔtorunj ne. ⁸ Ma si yu ari Wia kenj dolunj. U janj wuo faasa pima kunj-kala ma sii che. U janj paala faasa pima di ma kaa wase ma titia anj ka, a kenj ku-kaanaa ma pe ma dɔnsunj tinjja le. ⁹ Nla ne ba bul Wia teninj tuɔnj. Ba si,

“Zile tiina yie jonj kiasa jaase ne a pi summoo. U zile bi derɛ.”

¹⁰ Wia ne yie jonj ku-doho a pi paara. U ne pi niaa kudiilee maa. Nii wiaa u janj pima kiasa a lenj di ba punja pe bua-na kala le. U si leje ma kiasa punja pipe nii, u janj lenj di ma ma kenj zile kinjenj. ¹¹ Wia janj lenj di ma faasa kenj kiasa. Di ma ne kenj kiasa worunj, ma ma janj faasa kenj zile kinjenj. Di ba ne laa kialinj ma si jonjo piba, ba janj denne Wia. ¹² Kialinj ma si jonjo pi Wia nialinj, ma piba ba ku-cheelee ne nii. Nii wuo lenj niaa yuge a denne Wia duu yirinj yire. ¹³ Kialinj ma si jonjo piba daga nii ma si naga ne. A tinj ma wiaa, niaa janj yuge a denne Wia, bɛɛ wiaa ma nii Wia wu-zɔmɔ-la si tige Kirisito le a tutoba maa. Nii dundunja ma dee. Ba janj denne Wia

a tiŋ kialin ma si joŋo dii zile, ba di nialin kala ɛ. ¹⁴ Ba yie sul Wia pipima ne a cho di ba nama, beɛ wiaa tiŋtiŋ-zoŋ ne Wia tiŋ ma teen. ¹⁵ Laa lolle Wia a tiŋ wu-bal-bal-la u si joŋo pila pei.

10

Pɔɔl bul wiaa a tige tiŋtiŋŋaa u si timaa pi Wia

¹ Mi-na Pɔɔl titia nii che di mi bul wii pima. Mii sulma a tiŋ Kirisito wiaa. U siaa ne fiela, ka u bira ken kenyiri maa. Ama niaa doŋsuŋ si, di mi ne he ma teen, mi yie pui ne gbele gbele, ama di mi tuo ma teen, mi nyuŋ yie duori ne wengem. ² Di mi ne ko ma teen, ma si leŋe di mi dage wu-duoruŋ, beɛ wiaa mi ŋaa yarida ari mi fa jaŋ wuo dage wu-duoruŋ a pi nialin si biina ari la ŋaa wiaa a ninage dunia niaa sii ŋaa nii. ³ La he dunia ma le ne a yuyuo laalin, ama la bi yuo a ninage nii dunia niaa sii yuo laalin. ⁴ La laali-yuori kaaa bi dunia kaaa ŋaa, ama ba lii Wia teen ne a faasa ken doluŋ, a wuo yigi dii-duoruŋ a lulo. ⁵ Nialin si ken nii-doluŋ a ken wiaa kaa lere, a ken ba titia ma kaa yuyuge, ba bi la sipaan wuo chin. La yie keseba di ba ku jin Wia. La bira leŋ ba ken ba tuobiinaa kala a to Kirisito niin wiaa. ⁶ Di ma ne sene tuto Kirisito niin wiaa woruŋ, nii-na la jaŋ ŋaa siri a dogise nialin si bi u niin wiaa ka to.

⁷ Má suri ma siaa woruŋ. Di nuu ne biina ari u ŋaa Kirisito nuu ne, u tiina maga duu jin ari la ma ŋaa Kirisito niaa ne. ⁸ Di mi ne faasa bigisi mi titia le mua a mu tige dol-la Wia si joŋo pila, la bi wii cheye, beɛ wiaa Wia joŋo pila di la kaa wasema ne. U bi si di la kaa cheima. Nii wiaa hiisin bi jaŋ wuo kenmi. ⁹ Mi bi che di ma biine ari mi yie ŋmunse tenniŋ pipima di mi joŋ fawulluŋ a hema ɛ. ¹⁰ Mi jima ari ma doŋsuŋ yie bul di wialin mi si yie ŋmunse mi tenniŋ tuoŋ a piba, ba dolie ne aŋ pe hei, ka mi titia ŋaa ni-pugu.

Di mi nii bul Wia wiaa maa, mi yie nage ari mi bi wu-buluŋ jin. ¹¹ U maga di ni-yiriba-la jin ari wialin la si yie bul tenniŋ tuoŋ, di la ne bi kpaga, di la ne kpaga maa, wialin titia ne la jaŋ bul. ¹² La bi che di la biine ari la di niaa doŋsuŋ mage doŋo ne. La bira bi che di la ken la titia mimagise nialin sii dage ba titia. Di niaa deenba nii pagise doŋo a ken ba titia mimagise doŋo, ba bi wu-jimin kene.

¹³ La bi jaŋ faasa bigisi la titia le a kieli, ama la jaŋ bigisi mage nii Wia si joŋo pila, u ne leŋe la ku bul u wiaa pima. ¹⁴ Nii wiaa, di la ne ku bul Wia wiaa pima, la bi ŋaa kikieli, beɛ wiaa la ne ŋaa nialin si laa sipaan ken Kirisito wu-zomɔ-la kaa ko bula pima. Di la ne fa bi ma teen ko, aŋ bibigisi la titia le nii, la fa naga la bigisi la titia le a kikieli ne. ¹⁵ La bi la titia le bigisi a kikieli a tiŋ tiŋtimii-la niaa doŋsuŋ sii tiŋ. Ama la laa dii ari ma si waa ma yarida le nii, tiŋtimii-la la si jaŋ tiŋ ma teen ma jaŋ puŋa pe. ¹⁶ Di nii ne china, la jaŋ wuo bul Wia wu-zomɔ-la lere-la si paala kielima mu sipaan. La bi che di la bibigisi la titia le lee-la nuu doŋ sii tiŋ u tiŋtiŋŋaa. ¹⁷ Wia tenniŋ wiaa tuoŋ ba si, nii-la kala sii bigisi u titia le, u maga duu bibigisi a mu titige Wia doluŋ le ne. ¹⁸ Nii-la sii biinu ari u maga di Wia liisu duu tima pupu, Wia bi jaŋ liise tiina, ama Wia titia yie liise nii-la kala u sii che duu tima puu ne.

11

Pɔɔl bul wiaa a tige nialin si nyia wiaa bul ari ba ne ŋaa Yesu nanzɔɔba

¹ Mii sulma di ma ken kenyiri a nii mi teen. Di mii bul wu-toɔ maa, má jegile nii mi teen. ² Wia tuoŋ sii wiima le nii, nii titia ne mi ma tuoŋ wiwiima ɛ. Ma nage ha-tolo-la si bi disinniŋ kene ne mi joŋo pipi bala. Ma bala ne ŋaa Kirisito. ³ Ama fawulluŋ kenmi ne, beɛ wiaa

ma bi jaŋ wuo to Kirisito ari tuɔ-bala. Ari dimiŋ si nyise Hawa ari u wu-jimiŋ nii, nii titia ne baa nyisema maa di ma sí Kirisito to ari tuɔ-bala ari wutitii. ⁴ Mii bul ŋla, bee wiaa di nuu doŋ ne bira ko ma teen a bira bul wu-tanii a mu tige Yesu le, koo di ma ne bira na diŋ-wogo aŋ leŋ Wia Diŋ-zoŋ-la ta, koo di ma ne bira nii wu-wogo maa, ma yie via Wia wu-zomɔ-la ta ne aŋ sei wu-wogusu-la lima lima. ⁵ Mi biina nanzoɔ deenba si joŋ ba titia ari ba ne kii nuu-kala, ba bimi le kpia. ⁶ Ama di mi ne paala bi wiaa wuo bul maa, mi jiŋ wiaa ne. La chaasa bul wiaa deenba pima ne.

⁷ Bua-la le mi si bul Wia wu-zomɔ-la pima, mi bi kuŋ-kala laa ma teen. Mi keŋ mi titia muuri ne di ma wuo yuge. Ma biina mi si ŋaa nii, u ŋaa wu-boŋ nee? ⁸ Nialiŋ si laa Yesu wiaa dii aa hilimi a he tasiŋ doŋsuŋ le ne faa pimi kialiiŋ mi fa síi che bua-la le mi si he ma teen a titiiŋ. ⁹ Bua-la le mi fa si he ma teen, di mi níi che kuŋ-kala, mi ha bi bula pima kuŋ-kala di ma pemi le. La naanbiiri-la fa si he Masidoonia tiŋteen le ne faa pimi kialiiŋ kala mi fa síi che. Mi fa bi cho di mi laa kuŋ-kala ma teen. Mi saa bi che di mi laa kuŋ-kala ma teen. ¹⁰ Mi keŋ Kirisito wutitii-la ne. Ama mi jaŋ bigisi mi titia le a leŋ di Akaaya tiŋteen kala nii wii-la. ¹¹ Bee ne tii mi bul nii? Ma biina ari mi bima cho nee? Ai, Wia titia jima ari mi choma ne.

¹² Mi síi tiŋ mi tiŋtiŋŋaa aŋ bi kuŋ-kala ka che ma teen nii, mi ha jaŋ ŋiŋaa nii. Niaa doŋsuŋ he dime a bibigisi ba titia le ari la di ba ne to weŋ-bala a titiiŋ tiŋtiŋŋaa. Mii che di mi ŋaa nii, di ba sí wuo na woŋbiin a bul nii. ¹³ Niaa deenba nyia wiaa ne ari ba ŋaa Kirisito nanzoɔba ne. Ba bira nyise niaa ne ba tiŋtiŋŋaa le. Ba yie fugi a keŋ ba titia birime ari ba ŋaa Kirisito nanzoɔba ne. ¹⁴ U nii saa bi wu-kpuŋkpere wii ŋaa, bee wiaa Sitaani ma keŋ u titia a nage duu ŋaa Wia tiŋdaaru ne si keŋ

pulumuŋ ko dunia. ¹⁵ U saa bira bi wu-kpuŋkpere wii ŋaa di Sitaani tiŋtinnaa ne keŋ ba titia ŋaa a nage nialiŋ si keŋ tuɔ-pula a tima pipi Wia. Ba si tima mage nii, nii ne Wia jaŋ dogiseba a mage.

Pɔɔl si na heeŋ nii a tiŋ u si ŋaa Yesu nanzoɔ

¹⁶ Má leŋ di mi bira bula pima ari nuu-kala sí biina ari mi ŋaa niyaari ne. Ama di ma níi che di ma joŋmi ari mi ŋaa niyaari, mi jaŋ wuo bigisi mi titia le muapilii. ¹⁷ Wialiŋ mi síi bul, niyaari wiaa ne mii bul. Mii bigisi mi titia le ne. Mi jima Kirisito bi jaŋ bigisi u titia le nii. ¹⁸ Niaa yuga a bibigisi ba titia le a tiŋ dunia kiaa wiaa. Nii wiaa mi ma jaŋ bigisi mi titia le. ¹⁹ Ma keŋ wu-jimiŋ ne a wuo sisei wialiŋ niyaaraa síi bul. ²⁰ Di nuu ma ne keŋma birime u yosuŋ, koo di u ne keŋ ma kiaa kala lilaa, koo di u níi gurema, koo di u ne leŋe ma ŋiŋaa wialiŋ u síi che, koo u ne fallema, ma yie toŋe ma niin ne. ²¹ Hiisiŋ keŋmi ne a tiŋ wiin deen mi síi che di mi bul le. La-na fa bi doluŋ kene di la ŋaa wiaa deenba ma le. Ama di nuu níi bigisi u titia le a tiŋ wii wiaa, mi ma jaŋ wuo bigisi mi titia le a tiŋ wii-la wiaa. Ama mi haa bul wiaa ari niyaari ne. ²² Ba ŋaa Hiiburu timma nee? Mi ma ŋaa doŋo ne. Ba ŋaa Iziral timma nee? Mi ma ŋaa doŋo ne. Ba ŋaa Abiraham doho niaa maa, mi ma ŋaa doŋo ne. ²³ Ba ŋaa Kirisito tiŋtinnaa maa, mi ma ŋaa doŋo ne. Mi ne paala kiiba. Mi ne paala fiŋe siin a tiŋ kiŋkeŋ. Ba keŋmi kaa to dia a yuge ne. Ba si ŋmoomi, mi bi u niin jiŋ. Mi fa si ka mua di mi suba maa, mi biba ma niin jiŋ. Mii bul wiaa deenba kala ari mi nyuŋ tuo. ²⁴ Naanŋsiin bunɔŋ ne Juu tiŋŋaa keŋmi a viire ari kpaasa naanŋsiin mara ari fii ari nibi. ²⁵ Naanŋsiin butori ne ba joŋ chiba a viiremi. Bua kubala le ba yagemi ari tabiaa. Mi si juu liin daborusuŋ a viireŋ, butori ne liin daborusu-la chei liin tuɔŋ,

chee dön mi he liinj tuön wiiheye ari titañj kala a ninerike di mi lii. ²⁶ Mi si venee venj wonbiinj nii, mi na heej ne woruj. Mi na heej lii-libisiñ tuön. Mi na heej gaaraa ma nisiñ le. Mi na heej mi titia niaa nisiñ le, mi na heej nialiñ si bi Juu tinñaa ñaa nisiñ le, mi na heej ta-balaa le, mi na heej giri-bine ma tuön, mi na heej mugibaliñ tuön, mi na heej nialiñ si nyia wiaa ari ba ñaa la naañbiiriñ nisiñ le. ²⁷ Mi tima ne a faasa tiñ woruj a na heej. Tapulaa yuga mi si bi dön pina, losuj ari lii-nyuasuj ma keñmi, mi paala bi kudiilee kene di mi dii, a keñ yaribiree, waariñ kpumi. ²⁸ Di mi ne paala lej wiaa deejba kala ta, mi yie bibiine wiaa dönusun ne. Tapulii-na kala nialiñ si laa Yesu wiaa dii aa hilimi leree kala, ba wiaa ne mi yie bibiine. ²⁹ Di nuu ne bi doluj kene, mi ma bi doluj kene. Di ba nyise nuu duu ñaa wubonj maa, mi tuön yie faasa chei ne.

³⁰ Di mi nii che di mi bigisi mi titia le maa, mi jañ bigisi mi titia le a tiñ kialiñ si daga ari mi bi doluj kene. ³¹ Wia si ñaa la Tiina Yesu Nyimma, u yiriñ jañ yire deej deej. U jima ari mi bi wiaa nyia. ³² Mi fa si he Damaasikas le, bua-la le di baal kubala baa yiyire Ariitas ne dii ba kuoruj. Nii ne kuoro Ariitas pi niila si chinj tinñee-la kuori-baliñ nyuj wonbiinj di ba pö tañ-la boiñniñ a keñmi. ³³ Ama ba jonmi a he sim-baliñ tuön, a jonmi to tokoro ta jeñ hariñ. Nii ne mi wuo lel u nisiñ le, u chemi ka.

12

Pööl na wiaa ari duosoo tuön

¹ Mi si bigisi mi titia le, nii bi jañ pemi le, ama mi ha jañ bigisi mi titia le a bul wialiñ Wia si leñe mi na ari duosoo tuön, ari wialiñ u si jonjo dagemi. ² Mi jin baal kubala fa si laa Kirisito wiaa dii. U jisiñ fii ari banese ne ñla Wia si guu jonju kaa jil u jañ di-bolii-la, a dagu wiaa

yuge, añ miira kenu kaa ku tuu ta. Di Wia jonj u dima ne koo u yaraa kala ma ne, mi bi jin. Wia ne jima. ³ Mi jima ari baala deej Wia guu jonju kaa jil Wia-jañ di-zonj-la ba sii yire Paradaas ne. Di Wia jonj u dima ne koo u yaraa kala ne, mi bi jin. Wia ne jima. ⁴ Wialiñ u si nia, nuhuobiinee paala bi jañ wuo bulba. U bi maga di ba bulba maa. ⁵ Mi jañ bigisi baala deej le, mi-na bi mi titia le wuo bigisi. Ama di mi nii bigisi mi titia ma le, mi jañ bigisi mi titia le a mu tige kialiñ si daga ari mi bi doluj kene le. ⁶ Di mi nii che di mi bigisi mi titia le maa, mi bi jañ bul wu-yaayasij. Mi jañ bul wutitiiba. Ama mi bi jañ wuo bigisi mi titia le, di nuu-kala si wuo na wonbiinj a biine ari mi kii nii mi si maga a tiñ wialiñ ba si na mi teenj, koo a tiñ wialiñ ba si nia di mii bul le. ⁷ Wu-kpunjkerisi-la kala Wia si jonjo dagemi fa jañ wuo ñaa di mi bigisi mi titia le. Di mi si wuo na wonbiinj a bigisi mi titia le, u naga kuj ne ba jonjo tömi. U wiwii ari soonj si to niaa u wiwii nii. U fa naga Sitaani ne tiñ ku-la duu ko mi teenj a walimemi di mi si wuo na wonbiinj a bigisi mi titia le. ⁸ Mi yaraa sii wii nii, nii ne mi sul Wia naansiñ butori duu lej di mi yaraa fiele. ⁹ Nii ne Wia bula pimi a bul, “Mi zile yuga kinkeñ ñ teenj, nii wiaa nialiñ si bi doluj kene ba titia le, mi yie jonj doluj piba ba kaa titiñ mi tinññaa a dere.” Nii wiaa mi tuön töro ari mi si bi doluj kene mi titia le. Mi saa jañ bigisi mi titia le a tiñ mi si bi doluj kene wiaa, di Kirisito dolla wuo hemi le a titiñ. ¹⁰ Nii-na a tiñ Kirisito wiaa mi tuön töro ari mi si bi doluj kene mi titia le. Ba yie tutuusela. La yie nina heej ne. Ba yie to naasiñ dudogisela. La yie nina wu-yiriba kala ma le. Di mi bi doluj kene, Wia pimi u doluj.

Korinti niaa wiaa wii Pööl

¹¹ Mii bul wiaa ari mi ñaa ni-yaari ne. Ma ne saa fugemi he nii le.

Ma ne fa maga di ma bibesemi le. Mi jima ari mi bi nuu n̄aa, ama nan̄zɔɔba-la si jon̄ ba titia ari ba ne kii nuu-kala, ba bimi kpia. ¹² Mi nyalima ne woruŋ a wuo tin̄ ma teen̄. Wialin̄ kala mi si n̄aa, wu-magilaa ari wu-kpuŋkperisi-la ari wialin̄ kala mi si n̄aa Wia Diŋ-zɔŋ-la doluŋ le daga ari mi sene n̄aa Kirisito nan̄zɔɔ-titii ne. ¹³ Wialin̄ mi si n̄aama le, ba titia ne mi n̄aa nialin̄ si laa Yesu wiaa dii aa hilimi lee-kala le. Wii-la dun̄duŋa mi si bi n̄aama le ne n̄la: Mi bima walima di ma pimi kialin̄ mi s̄ii che. Mi saa sulma di ma jon̄ wiin̄ deen̄ chemi.

¹⁴ Tori ne n̄la mi si n̄aa siri ne di mi ku nama. Di mi ne kɔ, mi bi jan̄ walimema di ma pimi kuŋ-kala. Mi bi ma kuŋ-kala ka che. Ma titia ne mi chiche, b̄ee wiaa han̄biisin̄ bi jan̄ wuo che kiaa bil ba nyimmaba ari ba naan̄ba le. Ama han̄biisin̄ nyimmaba ari ba naan̄ba ne maga di ba che kiaa a bil ba biirin̄ le. ¹⁵ A tin̄ ma wiaa mi paala faasa cho ne di mi keŋ kuŋ-kala mi si kene ari mi doluŋ a tima pima. N̄ii wiaa, di mi ne choma kin̄ken̄, u maga di ma ma chomi ne, ama ma bimi cho kin̄ken̄. ¹⁶ U n̄aa wutitii ne ari mi bima walima di ma pimi kuŋ-kala, ama ma bula ari mi nyisema laa ma kiaa ne. ¹⁷ Mi tin̄ n̄aa ne ba kɔ ma teen̄. Ma biina ari mi tin̄ba di ba ku laa ma kiaa nee? ¹⁸ Mi ne tin̄ Taatis duu kɔ ma teen̄. La naan̄bie dɔŋɔ ma ne to u harin̄ kukɔ. Taatis si kɔ ma teen̄, u girima laa ma kuŋ nee? Wii-kala la s̄ii n̄aa le, la di Taatis niin̄ n̄aa kubala ne. La kala ka to weŋ-bala ne.

¹⁹ Wialin̄ kala la s̄ii bul, ma jan̄ biine ari laa bul n̄ii di la laa la titia ma teen̄ ne. N̄ii dee. La he Kirisito le ne aa bul wialin̄ Wia sipaan̄. Mi naan̄bii-kpianaba, laa bul wiaa deen̄ba kala di la wuo pema le di ma waa wialin̄ ma si laa dii le. ²⁰ Fawulluŋ keŋmi ne di ŋ bi pɔɔ mi jan̄ ku nama, di mi si cho di ma nage n̄ii, di ma bi n̄ii naga, ma ma

jan̄ na di mi ma bi n̄ii ma si cho naga. Mi boye ka jon̄ ari mi ne kɔ, mi jan̄ nama di maa yuo yuosuŋ, a keŋ yaribierin̄, a nina baanin̄ dɔŋɔ nyuŋ, a to ma tuɔtɔre wu-n̄aalaa, a chichei dɔŋɔba yirin̄, a gigaa dɔŋɔ harin̄, a keŋ siiduon̄, a bi nii-bala kene. ²¹ Mi fá fawulluŋ di mi ne bira kɔ ma teen̄, Wia jan̄ len̄ di mi tuɔŋ chei ma nyuŋ a tin̄ ma haacheba wiaa. Ma ha bi birima liiba le. N̄iaa yuga a he ma tuɔŋ a n̄aa haache wiaa, aa n̄aa disinnin̄, aa n̄aa wu-liilin̄, a gollo chiche n̄iaa haalaa, a bi birima liiba le. Di mi ne kɔ ma teen̄, mi jan̄ yel a tin̄ ma haacheba wiaa.

13

Pɔɔl bira chagile Kɔrin̄ti n̄iaa a chusleba

¹ Naan̄siin̄ butori ne n̄la mi s̄ii kɔ ma teen̄ di mi nama. Di mi ne kɔ, di ma kuŋ-kala ne biina ari u dɔŋɔ tiina n̄aa wii chei u chiche u bul u teen̄, u maga di u keŋ siada tin̄n̄aa balia koo batori. ² Mi si kɔ ma teen̄ liamin̄ le, mi kpurise nialin̄ si n̄aa haache digilaa ne. Mii che di mi bira kɔ ma teen̄ torimuŋ le n̄la, n̄ii ne mi chiche di mi bira kpurise ba digilaa, ari di mi ne kɔ, mi bi jan̄ taba. ³ Maa che di ma jin̄ ari Kirisito h̄emi le ne a bubul wiaa. Ma ma jan̄ na di u keŋ doluŋ ne ma teen̄, a wuoma maa wii-kala le. ⁴ Ba kpaasu mere daagesee nyuŋ a nage ari u fa bi doluŋ kene. Ama Wia doluŋ le u sie a keŋ miisin̄. La he Kirisito le ne. N̄ii wiaa la bi doluŋ kene la titia le. Kirisito si weye n̄ii a keŋ miisin̄ Wia doluŋ le, n̄ii titia ne la ma jan̄ keŋ miisin̄ Wia doluŋ le a titin̄ ma teen̄.

⁵ Má beŋ ma titia le a pe mimagise ma titia, a na di ma ne chin̄ ma yarida naan̄ le. Ma bi jin̄ ari Yesu Kirisito h̄ema le nee? Di ma ne bi jin̄ duu h̄ema le, n̄ii-na ma tele ne n̄ii. ⁶ Mi keŋ yiela ari ma jan̄ na di la-na bi tele. ⁷ La sul Wia pipima di ma sí wii-kala n̄aa chei. U bi naga ari laa che di la dage ari la-na

ɲaa woruɲ nɛ, ama di ma nɛ paala biine ari la tele maa, laa che di ma wuo ɲiɲaa wialɲ sɪi to wonɲbiɲ nɛ, ⁸ bɛɛ wiaa la bi jaɲ wuo lii wutitii-la hariɲ. Ama la chin wutitii-la lɛ nɛ. ⁹ Di la nɛ bi doluɲ kɛnɛ maa, la yie jujuɔsɛ nɛ a tiɲ dol-la ma si kɛnɛ wiaa. Wii-la la si sul Wia chiche nɛ, di ma yarida wasa dol Kirisito wiaa lɛ. ¹⁰ Lɛɛɛ mi tuo ma teen, ɲii nɛ tii mi ɲmuɲsɛ tenɲ pipima. Di mi nɛ kɔ ma teen, mi che di mii dage dol-la la Tiina Wia si joɲo pimi ma teen. U joɲ dol-la pimi di mi kaa pɛma lɛ nɛ di ma wasa dol. U bi si di mi kaa cheima.

¹¹ Mi naanɲbiirin, mi tenɲ diderin nɛ ɲla. Ma jaɲ hɔɲ woruɲ. Má kɛɲ ma titia woruɲ, má jegili wii-la mi si bula pima, má kɛɲ nii-bala dɔɲɔ lɛ, má ɲaa sima dɔɲɔ teen. Di ma nɛ ɲaa ɲii, Wia-la si cho niaa jaɲ hɛ ma teen a lɛɲ di ma hɔɲ ari yarifiɛlaa. ¹² Má kɛɲ tuɔ-bala a guori dɔɲɔ a chuchuɔɛ dɔɲɔ. ¹³ Wia niaa kala chuɔɛma.

¹⁴ Laa sul la Tiina Yesu Kirisito duu lahɔrimɔ hɛma lɛ, di la Nyimma Wia ma choma, ka di Wia Diɲ-zɔɲ-la ma lɛɲ di ma ɲaa kubala. Ami.

TEN-LA PÓOL SI N̄MUNSA PI GALIISIA NIAA

¹ Mi-na Póol n̄ n̄munse teniŋ deen aa pi ma nialiŋ si laa Yesu wiaa dii aa hilimi Galiisia tiŋteen̄ l̄. La Nyimma Wia n̄ chise Yesu Kirisito suuŋ l̄. Ba n̄ liisemi di mi ŋaa ba nan̄zɔɔ. Nuhuobiinee dee bimi liisa.

² La di la naan̄biiri-la si h̄e daha n̄i chuɔlema.

³ La Nyimma Wia ari la Tiina Yesu Kirisito lah̄rimɔ l̄, ma jaŋ h̄oŋ ari yarifielaa. ⁴ Kirisito Yesu suu la wu-b̄oŋɔɔ wiaa n̄, duu liisela wu-b̄omɔ-la si h̄e dunia l̄ l̄eɛl̄. U to la Nyimma Wia tuɔt̄orun̄ l̄ n̄ a ŋaa ŋii pila. ⁵ Wia yiriŋ jaŋ yire l̄eɛl̄ a kaa mu wuu. Ami.

Wia won̄bii-wogo tuo

⁶ Ma bi diene aŋ via nii-la si yirema Kirisito lah̄rimɔ l̄, a bira tuto Wia won̄bii-wogo. Wii-la ŋaa wu-kpun̄kpere mi l̄. ⁷ Wutitii n̄, Wia won̄bii-wogo kala bira tuo. Mi bul wiin̄ deen̄, b̄eɛ wiaa niaa yuga a h̄e dime aa walimema a chiche di ba ken̄ Kirisito wu-z̄omɔ-la kaa birime. ⁸ Ama di la n̄e ku bul wu-wogusu, koo Wia tiŋdaara n̄e lii wia nyuŋ a ku bul wu-wogusu, a ken̄ Kirisito wu-z̄omɔ-la la si bula pima kaa birime, Wia jaŋ kalibe h̄eba l̄. ⁹ La laa sipaan̄ bul wiin̄ deen̄ n̄, aŋ bira bubul u titia l̄eɛl̄ ŋla. Di nuu-kala n̄e bul Wia won̄bii-wogo pima, ba di wialiŋ la si bula pima bi kubala ŋaa, u maga di Wia kalibe h̄eu l̄.

¹⁰ Ma biina ari mi bul wiin̄ deen̄ a chiche di mi laa yiriŋ Wia teen̄ koo niaa teen̄ n̄e? Ma biina ari mii che di niaa zizilmii? Di mi n̄i che niaa zizilmi, mi fa bi jaŋ ŋaa Kirisito tiŋtinna.

Póol daga ŋii Yesu Kirisito si yiru duu ku ŋaa u nan̄zɔɔ.

¹¹ Mi naan̄biirin̄, má len̄ di mi bul wiin̄ deen̄ pima. Wia wu-z̄omɔ-la mi si bula pima bi nuhuobiine teen̄ lia. ¹² Nuhuobiinee dee bi bula pimi, nuhuobiinee dee bimi daga. Ama Yesu Kirisito n̄e joŋo dagemi. ¹³ Nialiŋ bula pima ŋii mi fa si naga bua-la l̄ mi fa s̄ii to Juu tiŋŋaa Wii-chuɔluŋ won̄biin̄. Ma jin̄ ŋii mi fa si to naasiŋ a d̄ogise nialiŋ si laa Yesu wiaa dii aa hilimi. Mi ŋaa mi kukeri kala di mi chei ba tiŋtiŋŋaa. ¹⁴ La Juu tiŋŋaa Wii-chuɔluŋ won̄biin̄ l̄, mi n̄e fa jin̄ wiaa kii mi d̄oŋsuŋ tiŋŋaa jesin̄ kala. Mi fa joŋ mi nyuŋ kala a h̄e wialiŋ kala la naabalimaba si dagela n̄. ¹⁵ Ama ka ba-na lulmi, Wia liisemi di mi tima pu. U lah̄rimɔ l̄ n̄e u ŋaa ŋii mi l̄. ¹⁶ U tuɔt̄orun̄ l̄ n̄e u dagemi u Bie Yesu Kirisito, di mi wuo bul u wu-z̄omɔ-la a pi nialiŋ si bi Juu tiŋŋaa ŋaa. U si ŋaa ŋii, mi bi nuu-kala teen̄ mua duu dagemi. ¹⁷ Bira mi bi Jerusalem mua di mi na nialiŋ si laa sipaan̄ ŋaa Wia nan̄zɔɔba mi l̄. Ama mi mu tiŋtee-la ba s̄ii yire Ariibia n̄e, a lii dime a miira mu ta-bal-la ba s̄ii yire Damaasikas.

¹⁸ Jisiŋ batori n̄e kiele, ka mi-na mu Jerusalem di mi na Piita, nii-la ba si kaa yire Kiifas. Mi si mu dime, mi h̄oŋ u teen̄ tapulaa fii ari ban̄oŋ n̄e. ¹⁹ Mi si h̄oŋ dime, mi bi Yesu nan̄zɔɔ kala na see Jeems, la Tiina Yesu ŋaana. ²⁰ Wialiŋ mi si n̄mun̄saa pima, Wia teen̄ ba ŋaa wutitiiba n̄e. Mi bi nyia. ²¹ Ŋii n̄e mi sii dime, a mu Siiria ari Siliisia tiŋteen̄. ²² Bua deen̄ kala l̄ nialiŋ kala si laa Yesu wiaa dii aa hilimi Judiya tiŋteen̄ l̄, ba ha bimi jin̄. ²³ Ba ta nii niaa s̄ii bul mi wiaa n̄e a bul a tigemi l̄, “Nii-la fa si to naasiŋ a dud̄ogisela n̄e l̄eɛl̄ bul Wia wu-z̄omɔ-la wiaa u fa s̄ii che duu chei.” ²⁴ Ba denne Wia worun̄ a tiŋ mi wiaa.

2

Yesu nan̄zɔɔba-la sei Póol si bul Wia wiaa a pi nialiŋ si bi Juu tiŋŋaa

ηaa teen

¹ Jisin fii ari banese si kiele, la di Banabas bira miira mu Jerusalem. La ken la naanbie Taatis to la harin mu. ² Mi si mu lee-la, Wia ne dagemi mi mu. La si mua, la di nialin si laa Yesu wiaa dii kuhiasin hilime. Nii ne mi bula piba wialin mi fa si bula pipi nialin si bi Juu tinjaa ηaa a tige Wia wu-zomɔ-la. Mi bul nii piba di tintimii-la mi fa si tima an haa tin sɪ pei ηaa. ³ Taatis, sii to mi harin. U fa ηaa Giriik tiina ne, ama ba buu fuga duu keru u penin. ⁴ Ari nii kala, niaa donsun fa bula di ba keru Taatis penin. Niaa deenba fa fugo ari ba ma laa Yesu wiaa dii ne a ηaa la naanbiirin. Ba fa ku guoli la tuon di ba na ari laa to Juu tinjaa naabalimaba wonbii-la ne koo la biba to. La si laa Yesu Kirisito wiaa dii nii, ba faa che ba na di la liise la titia Juu tinjaa naabalimaba wonbiin le. Ba fa cho di la to Juu tinjaa naabalimaba wonbii-la ne a ηaa yosi u le. ⁵ La bi seye muapilii maa, di wutitii-la Wia wu-zomɔ-la si daga sɪ chei ma teen. ⁶ Mi jan bul ari nialin si ηaa nihiasin Wia niaa tuon bi wii bula di mi dage a pe Wia wu-zomɔ-la le mi si jima. Ama niaa deenba di-chinin bi wii ηaa mi teen. Wia bi niaa kaa pore. ⁷ Nihiasin deenba na ari Wia liisemi di mi bul u wu-zomɔ-la a pi nialin si bi Juu tinjaa ηaa, ka di Piita ma bul wu-zomɔ-la a pi Juu tinjaa. ⁸ Wia ne liise Piita a pu dolun duu bul wu-zomɔ-la a pi Juu tinjaa. Nii titia ne u yiremi ma di mi bul u wiaa a pi nialin si bi Juu tinjaa ηaa. ⁹ Jeems ari Piita ari Jon si ηaa Wia niaa tuon nihiasi-la na ari wutitii, Wia ne liisemi di mi tin tintin-fiemin deen. Nii ne ba ken la di Banabas he ba tuon, la kala ken nii-bala. Ba bula ari la di Banabas jan mu bul Wia wu-zomɔ-la nialin si bi Juu tinjaa ηaa teen, ka ba ma bul wu-zomɔ-la Juu tinjaa teen. ¹⁰ Wii-la ba si bula pila dunɔna ne, di la sɪ summo-la si he ba tuon wiaa yu. Mi ma seye ari mi

jan liliisi ba wiaa.

Pool kpurise Piita digilaa

¹¹ Ama bua kubala Piita sii ko Antioch. Mi lii u harin a chaasa bul u teen niaa tuon ari u cheye ne. Wii-la si tii mi bul u cheye ne ηla: ¹² U si he Antioch le, Jeems tin niaa ba ma ko Antioch. Ba si ko, ba na ari Piita ari nialin si bi Juu tinjaa ηaa an laa Yesu wiaa dii, di ba kala ne pe donɔ le didii kiaa. Piita si na nialin Jeems si tima, u liise u nisin nialin si bi Juu tinjaa ηaa le, ba di ba bira bi kiaa ka dii. Piita fifa nialin si si u maga di ba keru nialin si bi Juu tinjaa ηaa an laa Yesu wiaa dii penee ne. Nii ne tii u ηaa nii. ¹³ Nii ne Juu timma-la ku-kaana-la ma paala to ba fawul wiaa, ari Piita si ηaa nii. Banabas ma paala to ba fawul wu-ηaala-la le. ¹⁴ Mi si na ari ba bi wutitii-la Wia wu-zomɔ-la si daga ka to, nii ne mi bula pi Piita ba kala sipaan a bul, "N ηaa Juu tiina ne, an ka η wu-ηaala nage nii-la si bi Juu tiina ηaa. Ee ne saa η jan wuo ηaa a fuge nialin si bi Juu tinjaa ηaa di ba ηaa wialin Juu tinjaa sii ηaa?"

Yarida dunɔna ne jan tii di la ken tuɔ-pula Wia teen

¹⁵ Wutitii ne, ba si lulla, la ηaa Juu tinjaa ne. Nialin si bi Juu tinjaa ηaa si ηaa wu-bomɔ-la, la bi baa ηaa. ¹⁶ Ama la jima ari nuu nii to wialin Moosis fa si bile di niaa tuto, u nii bi jan wuo len di tiina ηaa tuɔ-pul tiina Wia sipaan. Ama di nuu ne laa Yesu Kirisito wiaa dii, u dunɔna ne jan wuo len duu tiina ηaa tuɔ-pul tiina Wia teen. Nii titia ne la ma laa Yesu Kirisito wiaa dii, di Wia len di la ηaa tuɔ-pul tinjaa u teen, a tin yarida-la la si kene Kirisito le. Di nuu nii to wialin Moosis si bile, u nii bi jan wuo len di u ken tuɔ-pula Wia teen. ¹⁷ La sii che di la to Kirisito le di Wia len di la ηaa tuɔ-pul timma, la na ari la nage haache timma ne si bi wialin Moosis si ηmunsa bil ka to. Ma saa biina ari Kirisito ne len la ηjaa haache? Ai, u dee!

18 Wialinj Moosis fa si bile di la tuto, di mi ne viaba ta an bira suomi tutoba, u nii daga ari mi nna haache diire ne. 19 Wialinj Moosis fa si bile di la tuto, u titia ne leje mi suu. Ama u nii nna mi suu Moosis wialinj le a wuo kenj miisij Wia teenj. 20 Mi si kenj miisij Wia teenj nii, la di Kirisito kala ne ba kpaasa mere u daa-gese nyunj nii. Ama miisi-la mi si kene, u bi mi teenj lia, u lii Kirisito teenj ne. Mi si laa Wia Bie wiaa dii ne tii mi wuo kenj miisij deenj mi si kene dunia deenj le. Mi bi lahɔrimɔ-la Wia si kene la teenj via. 21 Wia Bie Yesu ne chomi, a jonj u miisij a yɔɔ suunj mi wiaa. Ama di nuu ne janj wuo to wialinj Moosis fa si bile le a kenj tuɔ-pula u teenj, suu-la Kirisito si suba nna pei ne.

3

Yarida koo wialinj Moosis si bile

1 Ma Galiisia ni-yaaraa deenba! Kubee ne nyisema? La si ko ma teenj, la dagema worunj nii Yesu si suu daa-gese nyunj, ma jinj u bubuɔnj. 2 Má lej di mi piesema wiinj deenj: Wia si jonj u Din-zɔnj-la dii zile ma le, u nna nii a tinj ma sii to wialinj Moosis fa si bile di niaa tuto, koo a tinj ma si nii Wia wu-zɔmɔ-la a laaba dii ne tii? 3 Bee ne tii ma yaare kinjenj nla? Wia Din-zɔnj-la le ne ma suomi a kenj miisij deenj Kirisito le. Ma saa che di ma na u diderinj ne ma titia dolunj lee? 4 Ma na wiaa yuge, anj ka ba kala nna pei ma teenj koo? Ai, mi biina ba bi pei nna. 5 Wia jonj u Din-zɔnj-la a dii zile ma le, anj pe njnaa wu-kpunjkerisij ma teenj. Ma biina ma sii to wialinj Moosis si bile ne tii u wuo njnaa nii, koo ma si nii Wia wu-zɔmɔ-la a laaba dii ne tii u njnaa nii?

6 Wia teninj tuɔnj ba bula ari Abiraham nna Wia yarida ne, nii ne tii Wia lej u kenj tuɔ-pula u teenj. 7 Nii wiaa nialinj kala si laa Wia wiaa dii nna Abiraham biirinj ne. 8 Wia teninj tuɔnj ba na wiinj deenj faafa kala ne

a bul di nialinj si bi Juu tinj nna nna, di ba ne nna Wia yarida, u janj lej di ba ma kenj tuɔ-pula. Wia na wiinj deenj ne, a bula pi Abiraham faafa kala a bul, “Nj le ne mi janj to a pe dunia niaa kala le.” 9 Abiraham nii wiinj deenj a laa dii. Nii ne Wia peu le. Nialinj ma kala si laa wiinj deenj dii, Wia peba ma le ari u si pe Abiraham le nii.

10 Nialinj sii che di ba to wialinj Moosis si bile a kenj tuɔ-pula, Wia kaliba heba le ne, bee wiaa Wia teninj tuɔnj ba bula ari nii-la kala si bi wialinj kala Moosis si njmunja bil ka to, Wia kaliba heu le ne. 11 Ama lee Wia chaasa dage nii-la kala sii to wialinj Moosis si njmunja bil bi janj wuo kenj tuɔ-pula Wia sipaanj, bee wiaa Wia teninj tuɔnj ba bula a bul, “Di nuu ne laa Wia wiaa dii, u janj nna tuɔ-pul tiina a kenj miisij Wia teenj.” 12 Yarida dee ba kaa tuto wialinj Moosis si njmunja bil di niaa tuto. Ba bul nii ne Wia teninj tuɔnj. Ba si, “Di nuu ne to wialinj kala Moosis si njmunja bil, wialinj u sii to janj nna u kenj miisij.” 13 Ama Wia si kaliba he nialinj si nii wialinj Moosis si njmunja bil anj biba wuo tuto, Kirisito liisela wiaa deenba le. Ba kpaasu mere daa-gese nyunj. Ba si nna nii, Wia kaliba heu le a tinj la wiaa ne, bee wiaa ba njmunje Wia teninj tuɔnj ari nii-la kala ba si kpaasa mere daanj nyunj, Wia kaliba heu le ne. 14 Wia fa si duu janj to Abiraham le ne a pe nialinj si bi Juu tinj nna nna ma le, a jonj u Din-zɔnj-la piba. U to Kirisito le ne a nna wialinj u fa si bula pi Abiraham duu janj nna. Di la ne laa Kirisito wiaa dii, u janj to la yarida le a jonj u Din-zɔnj-la pila.

Moosis nij-la bi wialinj Wia fa si bula pi Abiraham wuo chei

15 Mi naanbiirinj, wu-magisii ne mii che di mi dage. Di niaa balia ne vuura di ba nna wii a njmisa pi donjɔ, nuu-kala bi janj wuo chei wiila. Nuukala bi janj wuo nna wii pe wialinj ba si vuura bil le. 16 Wia ma

bil u niinj ne a pi Abiraham ari u doho nuu. U bi u doho niaa kala daga. Ni-bala ne u dage. Nii-la u si dage ne n̄aa Kirisito. ¹⁷ Wii-la mi si bula ne n̄la: Wia si bil n̄ii-la a pi Abiraham, u n̄aa jisinj zɔ-banese ari mara ari fii ne, aŋ ka Moosis-na bil wialinj di niaa tuto. N̄ii wiaa Moosis si bil wialinj bi jan wuo chei wialinj Wia si laa sipaanj bul. ¹⁸ Wii-la Wia si si u jan jonjo pi Abiraham, u bi wialinj Moosis si bile le lia. Duu ne lii wialinj Moosis si bile le, u naga ari Wia bi u niinj bile pi Abiraham. Ama Wia ne jonj u Dinj-zɔŋ-la pila a tinj wialinj u fa si bula pi Abiraham.

¹⁹ N̄ii ne saa wialinj Moosis si bile di niaa tuto bubuɔŋ ne beɛ? Moosis si bil wialinj di niaa tuto pe dage n̄ii haache si naga ne. Wialinj he dime n̄ii a mu yi bua-la le Abiraham doho nii-la si kɔ. U le ne Wia si u jan to a pe niaa le. Wialinj Moosis fa si bile, Wia tinjdaaraa ne kaa ku tuu pu. Moosis ne saa n̄aa Wia ari niaa sipaa-tooro n̄ii. ²⁰ Di ni-wogusunj balia n̄ii che di ba bil niinj a n̄aa wii, see sipaa-tooru he ba pege. Ama Wia si n̄aa ni-bala, u bi maga duu kenj sipaa-tooru.

Wii-la si tii Moosis bil n̄ii-la pila

²¹ Wialinj Moosis si bile, ba saa kenj wii-la Wia si si u jan n̄aa pi Abiraham chei neɛ? Ai, di wialinj Moosis si bile ne faa pi niaa miisinj, n̄ii-na u fa maga di nialinj s̄ii toba kenj tuɔ-pula ne. ²² Ama Wia teninj tuɔŋ ba bula ari dunia niaa kala n̄aa haache timma ne. Wia bul n̄ii duu wuo jonj ku-la wiaa u fa si bula a pi nialinj si laa Yesu wiaa dii a tinj ba yarida-la wiaa.

²³ Ka di bua-la-na yi di la wuo n̄aa Yesu Kirisito yarida, wialinj Moosis fa si bile nyagela bil ne. ²⁴ N̄ii wiaa wialinj Moosis fa si bile ne faa pɔla, a wuo ku yi bua-la le Kirisito si kɔ, di la wuo n̄aa yarida a kenj tuɔ-pula Wia sipaanj. ²⁵ Leele Kirisito si kɔ n̄ii, wialinj Moosis fa si bile bira bila wuo nyaga bibil. ²⁶ A tinj yarida-la

ma si kene Yesu Kirisito le ne tii, ma kala n̄aa Wia biirinj n̄ii. ²⁷ Ma nialinj kala ba si fo Wii-chuɔle liinj Kirisito dolunj le, ma kala nage Kirisito ne. ²⁸ Leele, la bira bi niaa kaa pupɔre. Di n̄ n̄aa Juu tiina koo di n̄ bi n̄aa, di n̄ n̄aa yonj koo di n̄ tii n̄ titia, di n̄ n̄aa haal koo baal, ma kala n̄aa kubala ne Kirisito Yesu teenj. ²⁹ Di ma di Kirisito ne n̄aa kubala, n̄ii-na ma n̄aa Abiraham doho nuu ne. N̄ii-na Wia si si u jan n̄aa wii-la a pi Kirisito, Abiraham doho nii-la, u jan n̄aa pima maa.

4

¹ Wii-la mi si jan bul ne n̄la: Bile si jan dii dia duu nyimma ne suba, di bile ne muuro, ba yie n̄in̄aa wiaa bile le ari u n̄aa yonj ne, ka u ne paala tii kialinj kala maa. ² Niaa ne yie bibenu a didagu wiaa deenj deenj, u ku waa a mu yi bua-la le u si jan dii u nyimma dia. ³ N̄ii ne la ma fa nage. La fa si bi Yesu yarida n̄aa, la faa to wialinj bunbunj nialinj s̄ii to. ⁴ Ama bua-la titia si yie, Wia tinj u bie. Haal ne lulu. U ma faa to Juu tinj n̄aa naabalimaba wonbii-la ne. ⁵ U n̄aa n̄ii duu wuo laa nialinj fa s̄ii to Juu tinj n̄aa wonbii-la a ta ne, di ba di la kala wuo n̄aa Wia biirinj. ⁶ A tinj la si n̄aa Wia biirinj ne tii u jonj u Bie Dinj-zɔŋ-la ku hela le. Dinj-zɔŋ-la si he la tuɔŋ, u yie n̄aa la kenj Wia kaa yire “la Nyimma”. ⁷ N̄ii wiaa ma kunj-kala bira bi yonj n̄aa. Ma n̄aa Wia biirinj ne. Ma saa si n̄aa u biirinj n̄ii, Wia jan jonj kunj-kala u si kene a pima.

Pɔɔl si chil Galiisia niaa wiaa n̄ii

⁸ Ama bua dɔŋɔ, ma fa bi Wia jinj. Ma faa to vuiaa ne a n̄aa ba yosunj. ⁹ Ama leele ma si ku jinj Wia n̄ii, koo mi jan bul ari Wia ku jinjma ne, beɛ ne saa tii ma cho di ma birime a bira tuto wialinj bunbunj nialinj fa s̄ii to, wialinj si bi dolunj kene di ba wuo laama ta? Beɛ ne tii ma saa cho di ma bira tutoba a n̄aa ba yosunj? ¹⁰ Ma yie benj ari tapulaa kii dɔŋɔ,

chenşin ma kii dɔŋɔ, bua dɔŋɔ kii dɔŋɔ, jisin ma kii dɔŋɔ. ¹¹ Ma leŋe fawullun kenmi ne ari tintimii-la mi si tin ma teen ŋaa pei ne.

¹² Mi naanbiirin, mii sulma, má nagemi. Mi si nagema nii, má ma nagemi. Ma bi wii-kala ŋaa cheimi.

¹³ Ma jima, bua-la le mi si bul Wia wu-zɔmɔ-la pima, mi faa wiile ne.

¹⁴ Ari mi si ŋaa puwuol ma kala, ma bimi via, a bimi bee guune maa. Ama ma kenmi worun ari mi ŋaa Wia tinđari ne. Ma kenmi worun ari Yesu Kirisito ne. ¹⁵ Ma si sei Wia wu-zɔmɔ-la, ma tuɔŋ tɔɔ ne worun. Tuɔɔrun deen saa ŋaa pei nee? Mi titia jan wuo bul wiin deen. Di ma ne si wuo, ma fa jan wuo chaare ma siaa pimi. ¹⁶ Mi saa ŋaa ma diŋdɔŋ ne a tin mi si bul wutitii-la pima?

¹⁷ Nialin sii dage Juu tinŋaa wonbiila, ba tuɔŋ wiima le ne worun, ama ba tuɔbiinaa bi zɔŋ. Ba tuɔbiinaa kala ne di ba ken ma di mi pore dɔŋɔ le, di ma tuɔŋ wiiba le ari ba tuɔŋ sii wiima le nii. ¹⁸ U ŋaa wu-zɔŋ ne di la tuɔsaa nii wii dɔŋɔ le di mi ne he ma teen koo lee-na kala, ama u maga di ba ŋaa tuɔ-wii-zɔmɔ ne. ¹⁹ Mi biirin, ma wiaa wiimi ne worun, ari haala si yie chiche duu lul u luorun wiwii nii. Ma wiaa jan wiwiimi le nii, see di ma birime a nage Kirisito si nage nii. ²⁰ Mi fa cho di mi he ma teen ne lele, a wuo jin wii-la mi si jan bul nuu-kala teen. Ma wiaa kperimi ne worun.

Pɔɔl bul Heega ari Saara wiaa

²¹ Má dagemi, ma nialin si cho di ma ha to wialin Moosis si bile le, ma bi ba bubuɔŋ jin? ²² Wia tenin tuɔŋ ba bula ari Abiraham fa lul biirin balia ne. Dɔŋɔ ŋaa u haala titia bii ne, dɔŋɔ ma fa ŋaa Abiraham ha-yomo bii. ²³ Abiraham ha-yon-la si lul bile, nuhuobiine wonbiin le ne ba to a lulu. Bile Abiraham haala titia si lula, Wia ne bula ari ba jan lulu. ²⁴ Wiin deen nage niirin balia ne Wia bil. Yon-la yirin ne fa Heega. U biirin ŋaa yosi ne. Heega

nage wialin Wia si jonɔ pi Moosis ne, peel-la nyun ba sii yire Saana ne.

²⁵ Heega nage Saana peel-la ne. Peel-la he Ariibia tinteen le ne. Heega nage tan-la ba si kaa yire Jerusalem lele. U tuɔŋ niaa ŋaa yosi ne.

²⁶ Ama Jerusalem dɔŋɔ ne Wia-jan le. U ne tii u titia. U ne ŋaa la naan.

²⁷ Wia tenin tuɔŋ ba si,

“Má len di ha-pirin juuɔse.

Ŋ-na nii-la luorun ha si bi wii na, chiesi ari tuɔɔrun, bee wiaa ha-pirin jan lul biirin kii haal-la sii lul.”

²⁸ Mi naanbiirin, la-na nage Abiraham bie Aizik ne. Wia fa si leŋe ba lul Aizik nii, nii titia ne Wia len ba lulla maa. ²⁹ Abiraham biirin balia tuɔŋ ku-la ba si to nuhuobiine wonbiin a lul dɔgisɛ bile ba si lula Wia dolun le. Nii titia ne ba dudɔgisɛla ma lele.

³⁰ Bee ne ba bul Wia tenin tuɔŋ? Ba bula, “Kiri yon-la ari u bie ta, di ba lii ŋ dia le, bee wiaa yomo bie bi jan wuo pe haal-la si tii u titia bie le di ba dii ba nyimma dia, duu ne suba.” ³¹ Nii wiaa mi naanbiirin, la bi ha-yon-la biirin ŋaa. La ŋaa haal-la si tii u titia biirin ne.

5

Kirisito laala ta ne di la tii la titia

¹ Kirisito laala ta ne di la tii la titia. Má saa chin kpan kpan, a pɔ di nuu-kala bira sí ma kaa ŋaa yosi.

² Má jegile nii. Mi-na Pɔɔl ne bul wiin deen pipima. Di ma ne leŋe di ba keru ma penee, wii-la Kirisito si ŋaa pima ŋaa wu-peɪ ne. ³ Mi jan bira bul, di nuu-kala ne seye di ba keru u penin, u maga di tiina tuto wialin kala Moosis fa si bile ne.

⁴ Ma nialin sii to wialin Moosis si bile aa walime di ma ken tuɔ-pula Wia sipaan, ma keru ma titia ta ne Kirisito teen. La Tiina Yesu zile-la ne ma via nii. ⁵ Ama Wia Diŋ-zɔŋ-la dolun le, la-na laa dii a ken yiɛlaa ari la jan ken tuɔ-pula Wia sipaan.

⁶ Di la di Kirisito ne ŋaa kubala, di la keru la penee koo di la bi kere, u

bi wii kenε. Wii-la si n̄aa siifian̄ wii nε, ma si laa Wia wiaa dii a cho n̄aa maa. ⁷ Ma faa n̄aa woruŋ nε. Kubεε nε saa nyisema di ma sí wutitii-la to? ⁸ Wia nε yirema, u bima nyisa di ma leŋ wutitii-la. ⁹ Si-buruŋ muapilii nε ba yie joŋo hε boroboro munuŋ si yuga λ, aŋ ka u sii puɔrε. ¹⁰ Mi ha keŋ yarida nε ma λ. La di ma kala n̄aa kubala nε Wia teen̄. Nii wiaa mi jima ari ma bi jaŋ to won̄bii-tanii. Mi saa laa dii ari Wia jaŋ d̄ogise nii-la yiri-na kala sí walimema. ¹¹ Mi naan̄biirin̄, di mi nε haa bul ari u maga di ma keru ma penee nε, aŋ ka di Wia-na laama ta, bεε nε tii ba haa to naasiŋ dud̄ogisemi? Di mi nε fa si di nuu-kala maga duu keru u peniŋ, n̄ii-na mi fa bi jaŋ na hεeŋ a tiŋ mi síi bul Yesu si suu daa-gεε-la nyuŋ wiaa. ¹² Nialiŋ kala síi walimema, mi fa cho di ba lii ma tuɔŋ nε a mu feri ba titia.

¹³ Ka ma-na mi naan̄biirin̄, Wia yirema nε di ma tii ma titia. Ma saa si tii ma titia n̄ii, ma sí leŋe di ma joŋ n̄ii a to ma titia tuɔt̄ore wu-ŋaalaa λ. Ama má cho d̄oŋo a tima pipa d̄oŋo. ¹⁴ Má n̄aa n̄ii, bεε wiaa wialiŋ Moosis fa si bile di n̄aa tuto, ba tuɔŋ wu-nyuŋ nε ŋla: “Cho ŋ d̄oŋo tiina ari ŋ si cho ŋ titia n̄ii.” ¹⁵ Ama di ma wu-ŋaalaa nε nage бага k̄iaa di ma gura keŋ d̄oŋo didii, má p̄o ma titia λ, di n̄ii dee ma jaŋ kpu d̄oŋo d̄ere.

Má to Wia Diŋ-z̄oŋ-la λ a keŋ miisin̄

¹⁶ Ama wii-la mi síi che di mi bula p̄ima nε ŋla: Má to Wia Diŋ-z̄oŋ-la niin̄ λ aŋ via ma titia tuɔt̄ore wu-ŋaalaa, ¹⁷ bεε wiaa la titia tuɔt̄ore wu-ŋaalaa bi Wia Diŋ-z̄oŋ-la wu-ŋaalaa cho. Wia Diŋ-z̄oŋ-la wu-ŋaalaa ma bi la tuɔt̄ore wu-ŋaalaa cho. La tuɔt̄ore wu-ŋaalaa ari Wia Diŋ-z̄oŋ-la saa n̄aa d̄ind̄om̄o nε, n̄ii wiaa, wii-la la síi che la n̄aa, la buu wuo n̄aa. ¹⁸ Ama di ma níi to Wia Diŋ-z̄oŋ-la niin̄ λ, juu tin̄ŋaa naabalimaba fa síi to wialiŋ bira bima wuo. ¹⁹ La tuɔt̄ore wu-ŋaalaa

chaasa chin̄ nε. Di nuu nε toba, u yie chiche han̄tolibiisin̄, aa n̄aa disin̄niŋ, aa n̄aa wu-liilin̄, ²⁰ aa kpaare vuiaa, aa n̄aa hil wiaa, aa bere n̄aa, aa hihe yuosuŋ, aa keŋ yaribierin̄, a keŋ baaniŋ, a chil u d̄un̄duŋa wiaa, a keŋ d̄oŋo pup̄ore, a lili d̄oŋo hariŋ, ²¹ a keŋ had̄oruŋ, a nyua sinin̄ a bubugi, a goll̄o nyua sinin̄ vuiaa yirin̄ λ. Mi laa sipaan̄ kpurise ma digilaa nε. Mi saa bira kpurise ma digilaa nε ari nialiŋ síi n̄aa wiaa deen̄ba bi jaŋ wuo juu Wia kuorii-la tuɔŋ. ²² Ama Wia Diŋ-z̄oŋ-la yie n̄aa la cho n̄aa nε, a keŋ tuɔt̄oruŋ, a fiela h̄oŋ som, a keŋ kenyiri, a keŋ zile, a n̄in̄aa wu-z̄oŋŋo, a chin̄ la yarida λ, ²³ a fiela la siaa, a keŋ la titia woruŋ. Kisin̄ d̄oŋ bira tuo si jaŋ wuo bul di ŋ leŋ wiaa deen̄ba. ²⁴ Nii wiaa, nialiŋ si laa Kirisito wiaa dii, ba titia tuɔt̄oruŋ λ nε ba suu. Ba bira bi ba tuɔt̄ore wu-ŋaalaa λ ka to. ²⁵ Di Wia Diŋ-z̄oŋ-la nε hela λ, u maga di la tuto u niin̄ λ nε. ²⁶ Ma sí leŋe di la cho di la bibigisi la titia λ, a sí leŋe di la n̄aa di la d̄oŋsuŋ tin̄ŋaa baaniŋ sisii, a sí yaribierin̄ keŋ d̄oŋo λ.

6

Má n̄aa wu-z̄oŋŋo a pi nuu-kala

¹ Mi naan̄biirin̄, di ma d̄oŋo nε juu haache λ, ma nialiŋ síi to Wia Diŋ-z̄oŋ-la niin̄ λ, má dagu n̄ii u si jaŋ to a miira lii u haacheba λ. Má chagilu, a sí u λ kp̄ia. Ma si n̄aa n̄ii, má beŋ ma titia nyuŋ woruŋ, di Sitaani sí wuo nyisema maa, di ma juu haache. ² Di ma kuŋ nε juu wii, má p̄eu λ. Di ma níi n̄aa n̄ii, maa to Kirisito niin̄ nε. ³ Di nuu nε biina ari u n̄aa nuu nε, u bi nuu-kala n̄aa, uu nyise u titia nε. ⁴ Má leŋ di nuu-kala beŋ u titia wu-ŋaalaa λ a na duu to won̄biin̄ nε koo u bi won̄biin̄ to. Duu to won̄biin̄, u jaŋ wuo bigisi u titia λ a tiŋ u wu-ŋaalaa λ a sí u titia kaa magise u d̄oŋsuŋ tin̄ŋaa, ⁵ bεε wiaa nuu-kala maga duu chuŋ u titia chuga nε.

⁶ Nii-la ba sí dage Wia niin wiaa, duu ne keŋ kuŋ-kala, u maga duu ŋaa pi nii-la sí dagu ne.

⁷ Ma sí ma titia nyisu. Nuukala bi Wia wuo moŋ. Ku-la ŋ si duo, u titia ne ŋ jaŋ kuŋ. ⁸ Di nuukala ne to u tuotore wu-ŋaalaa hariŋ, u wu-ŋaalaa le ne Wia jaŋ to a dogisu. Ama di nuu ne to Wia Diŋ-zoŋ-laniiŋ, Wia jaŋ joŋ miisi-la si bi dere a timu. ⁹ Nii wiaa, ma sí leŋe di la lol wu-zoŋŋoo ŋaaniiŋ le. Di la ne ŋaa wu-zoŋŋoo a lol aŋ nyalime, di bua-la ne yie, Wia jaŋ tinla. ¹⁰ Nii wiaa, di la ne wuolo, la ŋiŋaa wu-zoŋŋoo nuukala le, a wasa nyan la di naliŋ kala si laa Wia wiaa dii a ŋaa kubala.

Chagilin ari Chuɔlaa

¹¹ Ma na mi ŋmunsuŋ si barima nii. Mi titia nisiŋ ne mi kaa ŋmunse teniiŋ deen a pipima. ¹² Naliŋ síi che di ba dage ba titia le ari baa to Juu tinŋaa woŋbiiŋ, ba níi fugema di ma keri ma penee. Ba laa dii ari Kirisito suu daa-geŋe nyuŋ ba wiaa ne. Ba saa jima ari ba si laa dii nii, niaa jaŋ to naasiŋ dogiseba. Ba saa bi nii cho, nii ne tii ba fugema di ma keri ma penee. ¹³ Naliŋ titia si keri ba penee, ba bi wialiŋ Moosis fa si bile ka to. Baa che di ma keri ma penee di ba wuo bibigisi ba titia le ari ma maa to Juu tinŋaa woŋbii-la ne.

¹⁴ Ama mi-na, mi jaŋ bigisi mi titia le ari la Tiina Yesu Kirisito si suu daa-geŋe-la nyuŋ duŋduŋa wiaa. A tin u si suu nii, u nage ari la duu kala ne suba. Nii wiaa, mi ta jia ne dunia kiaa le. Dunia kiaa ma ta jiami le. ¹⁵ U bi wii kene di la keri la penee koo di la bi kere. Wii-la si ŋaa siifian wii ne, di la birime a keŋ mii-falii-la.

¹⁶ Naliŋ kala si to wiin deen, Wia jaŋ fába nennige a leŋ di ba hoŋ ari yarifielaa, ba di Wia niaa kala. Ba ne ŋaa Iziral tinŋaa titia Wia teen.

¹⁷ A lii jiniŋ a kaa mumu, nuukala bira sími walimu. Fufuunu-la mi si kene mi yaraa le, ba níi dagu ari mi ŋaa Yesu nuu ne.

¹⁸ Mi naanbiirin, la Tiina Yesu Kirisito lahoŋimo le, ma jaŋ hoŋ ari yarifielaa. Ami.

TEN-LA PÓOL SI N̄MUNSA PI EFESIS NIAA

¹ Mi-na Póol ne n̄munse tenin̄ deen̄ a pipi ma Wia nialin̄ si he Efesis le a chin̄ wialin̄ ma si laa dii le a mu tige Kirisito Yesu le. Wia tuótórun̄ le ne u liisemi di mi n̄aa Kirisito Yesu nan̄zoo.

² La Nyimma Wia ari la Tiina Yesu Kirisito lahórimo le, ma jan̄ hōj ari yarifielaa.

Wia si to Kirisito le a pela le

³ Má leñ di la denn̄e Wia. U ne n̄aa la Tiina Yesu Kirisito Nyimma. U to Kirisito le ne a pela le wii-na kala le u Din̄-zōñ-la dolun̄ le. Wii-na kala u si kaa pela le lii u jan̄ ne. ⁴ U to Kirisito le a liisela ne, ka u-na suomo n̄aa dunia. U liisela di la wuo ken̄ tuópula u sipaan̄, di ba sí cheerin̄ kala jōño pila. ⁵ Ka di u-na n̄aa dunia, u laa sipaan̄ biina jin̄ ari u jan̄ to Yesu Kirisito le ne a leñ di la n̄aa u biirin̄. U si chola nii, nii ne tii u fa biine nii. U tuótórun̄ le ne u n̄aa nii. ⁶ U n̄aa nii di la wuo dennu, a leñ di u yirin̄ yire, a tin̄ u si fála nennige. U Bii-schoolun̄ le ne u to a pela le. ⁷ La si mere Kirisito le nii, u jōñ u chalin̄ jaase a tin̄ la wu-bōññoo chimin̄, di Wia jōñ la wu-bōññoo chela. Wia zile yuga ne kin̄ken̄ la teen̄. ⁸ Nii ne tii u n̄aa nii pila. U fála nennige. ⁹ Wia pila wu-jimii-na kala di la wuo jin̄ wialin̄ kala u si biina ari u jan̄ n̄aa pila bubuōñ. Wiaa deen̄ba fa faa ne. Nuu-kala fa biba jin̄. Ka u leele leñ la jin̄ wialin̄. Kirisito le ne u to a n̄aa nii. ¹⁰ U n̄aa nii di bua-la ne yie, duu to Kirisito le a ken̄ kuñ-kala he dōño le ne, kialin̄ si he Wia-jan̄ ari kialin̄ si he tin̄teen̄ kala.

¹¹ U to Kirisito ma le ne a jōñ kiaa billa le di la tiiba. Faafaa kala ne u biine nii. U yie n̄aa wii-kala u tuótórun̄ le ne. ¹² U n̄aa nii di la nialin̄ si laa sipaan̄ jōñ la yielaa he

Kirisito le, di la wuo leñ di u yirin̄ yire. ¹³ Ma nialin̄ si bi Juu tin̄n̄aa n̄aa, ma ma nii Wia wialin̄ si n̄aa wutitiiba ne. Yesu wu-zōmō-la wiaa ne nii. Ba ne wuo laala ta. Ma ma laa u wiaa dii ne. Ma si laa u wiaa dii nii, Wia jōñ u Din̄-zōñ-la hema le ne, ku-la u fa si si u jan̄ jōño pi nialin̄ si laa u wiaa dii. U magilin̄ ne nii. ¹⁴ Wia Din̄-zōñ-la u si jōño hela le sene daga ari wutitii, maachie la jan̄ dii ku-dañ-dañ-la Wia si n̄aa billa le. Nla n̄aa di la wuo leñ duu yirin̄ yire ne.

Póol chuole Wia a pi Efesis niaa

¹⁵ Mi nii nii ma si laa la Tiina Yesu wiaa dii ari nii ma si cho Wia niaa maa. ¹⁶ Nii wiaa ne tii, di mi nii chuole Wia-na kala, mi bi ma wiaa yu. Mi yie liisi ma wiaa ma ne a chuole Wia pipima bua-na kala. ¹⁷ Mi yie sul Wia, la Tiina Yesu Kirisito Nyimma, nii-la si ken̄ yirin̄ maa, duu pima wu-jimin̄, a bira ken̄ u titia ma kaa dagema u Din̄-zōñ-la dolun̄ le di ma wuo jimu. ¹⁸ Wia si yirema di ma wuo juu u kuorii-la tuōñ nii, mii sulu duu wuo pulle ma tuōñ di ma wuo jin̄ ku-la ma sí yielu nagisin̄, a bira jin̄ kialin̄ ma di Wia niaa kala si jan̄ dii ba zōmun̄. ¹⁹ Mi biraa sulu di u wuo leñ di ma jin̄ u dolun̄ si yuga mage nii, nialin̄ si laa u wiaa dii teen̄. U yie to u dol-bal-la le ne a tin̄ u tin̄tin̄n̄aa. ²⁰ Dol-la titia ne u kaa chise Kirisito suun̄ le a leñ u hōj Wia seme Wia-jan̄ le, ni-duōñ di-hōnun̄. ²¹ U ne kii nuu-kala si ken̄ dolun̄ a biben̄ niaa dunia deen̄ le. U ne ken̄ yirin̄ a kii nuu-na kala si ken̄ yirin̄ dunia deen̄ le ari dunia-la si jan̄ bira ko le. ²² Wia jōñ kuñ-kuñ-kala dolun̄ a he Kirisito nisin̄ le ne, a bira leñ u n̄aa nialin̄ si laa Yesu wiaa dii aa hilimi kuhian̄ maa. ²³ Nialin̄ si laa Yesu wiaa dii aa hilimi ne n̄aa Yesu yaraa. Kirisito ne bira n̄aa nii-la si jōñ u dolun̄ he dunia lee-na kala.

2

Wia to Kirisito le a leñ la ken̄

miisinj

¹ Ma fa naga ari ma suba ne a tinj ma wu-bɔŋŋɔɔ ari ma haacheba wiaa. ² Ma faa ŋaa wu-bɔŋŋɔɔ ne a ŋiŋaa ma tuɔtɔre wiaa, bua-la le ma fa sii to Sitaani dunia deenj le. Sitaani ne leŋe nialinj si bi Wia niinj wiaa ka to ŋiŋaa wu-bɔŋŋɔɔ. ³ La kala kala ne faa to la tuɔtɔre wu-ŋaalaa harinj a ŋiŋaa wu-lɔrunuj, a bira bibiine wu-bɔŋŋɔɔ. La fa sii ŋaa wiaa deenba, Wia fa na baaninj ne la nyunj, ari u fa si na baaninj dunia niaa nyunj nii. ⁴ Ama Wia chola ne kinkeŋ a fifála nennige, nii ne tii u leŋ la di Kirisito kala keŋ miisinj. [U si fála nennige ne tii u laala ta.] ⁵ Bua-la le la fa si ŋaa haacheba ne a fa bi miisinj kene a tinj la haacheba-la wiaa, u laala ta. A tinj u si chola ne tii u ŋaa nii. ⁶ U bira chise la di Kirisito Yesu kala suunj le ne, a leŋ di la di Kirisito Yesu kala ŋaa kubala a hɔŋ Wia-jaŋ le. ⁷ U to Kirisito le ne a leŋ la keŋ miisinj, duu wuo dagela maachie nii u si chola ari nii u si faasa fála nennige. ⁸ Wia lahɔrimɔ ne tii u laama ta, a tinj ma si laa u wiaa dii. U bi naga ma titia si keŋ dolunj ne tii Wia laama ta, u ŋaa nii pima chɔgita ne. ⁹ U bi naga ma tinjin-zɔŋŋɔɔ wiaa ne tii u laama ta. Nii wiaa nuu-kala bi maga duu bibigisi u titia le. ¹⁰ Wia ne ŋaala. U ŋaala di la to Kirisito Yesu le ne a ŋaa wu-zɔŋŋɔɔ. U ŋaa wu-zɔŋŋɔɔ deenba billa le di la ŋiŋaaba.

Nuhuobiinee kala ŋaa kubala ne Kirisito teenj

¹¹ Ma nialinj si bi Juu tinjŋaa ŋaa, ma sí yu ari Juu timma-la fa si keri ba penee ka yire ma nialinj si keŋ peŋ-purunj ne. Nialinj si keri ba penee fa keri ba yaraa seme dɔŋɔ ne a ta. ¹² Ma bira sí yu ari bua kubala le ma fa bi Kirisito jinj. Ma di Iziral tinjŋaa fa bi kubala ŋaa. Wialinj Wia fa si bula ari u jaŋ ŋaa pi u niaa, ma-na fa bi jaŋ naba. Ma fa bi kuŋ-kala ka yiele, ma bira bi Wia ma kene dunia le. ¹³ Ma di Wia pege

fa bolie ne, ama leele Kirisito jonj u chalinj jaase la wiaa ne, di la di Wia kpage dɔŋɔ. ¹⁴ U ne keŋ nialinj si ŋaa Juu tinjŋaa ari nialinj kala si bi Juu tinjŋaa ŋaa he dɔŋɔ le ba sinj a ku ŋaa kubala. U ne keŋla he dɔŋɔ le la bira bi diŋdɔmɔ ŋaa. ¹⁵ U si suba nii, u leŋe wialinj Moosis fa si bile di niaa tuto, ba bira bi dolunj kene. U ŋaa nii di nialinj si ŋaa Juu tinjŋaa ari nialinj si bi Juu tinjŋaa ŋaa kala tou le ne a wuo sinj, a ŋaa kubala maa. U ne leŋe ba sinj. ¹⁶ Kirisito si suu daageese nyunj nii, u leŋe ba diŋdɔnnula dɔre ne. U si ŋaa nii, u leŋe ba kala balia tou le a ŋaa kubala ne, a keŋ ba di Wia he dɔŋɔ le ba sinj. ¹⁷ Kirisito ne kɔ a bul Wia wu-zɔmɔ-la a pi nialinj pege fa si bolie ari Wia, ari nialinj ma fa si kpage Wia kala, a bula piba di ba sinj a keŋ nii-bala. ¹⁸ La kala keŋ u Diŋ-zɔŋ-la ne. U dolunj le ne la kala jaŋ to a mu Wia teenj.

¹⁹ Ma saa bira bi nuhuɔraa ŋaa, a bi duura bibaare maa. Ma di Wia niaa kala ŋaa kubala ne a he Wia dia le. ²⁰ Ma nage dia-la Wia si saa ne. Wia nanzɔɔba ari nialinj síi bul wiaa, Wia Diŋ-zɔŋ-la dolunj le, ba ne ŋaa dia-la geŋtine. Kirisito Yesu titia ne ŋaa tiebii-duo-la ba si kaa bil dia-la geŋtine. ²¹ U ne chage dia-la kala bil u ku ŋaa Wia-dia, la Tiina Yesu dia-la. ²² Ma di Kirisito si ŋaa kubala nii, ma di Wia niaa dɔŋsunj kala ne u kaa saa Wia-dia deenj, dime ne Wia leŋ u Diŋ-zɔŋ-la jujuu.

3*Pɔɔl bul Wia wu-zɔmɔ-la a pi nialinj si bi Juu tinjŋaa ŋaa*

¹ Ba keŋ mi-na Pɔɔl to dia a tinj Kirisito Yesu wiaa ne. Mi bira he sarika le a tinj ma ma nialinj si bi Juu tinjŋaa ŋaa wiaa ne. Nii wiaa ne tii mi yie sul Wia pipima. ² Mi jima ari ma ma nii nii Wia si fámi nennige a liisemi di mi tinj tinjiminj deenj ma teenj. ³ Tenj-la mi fa si ŋmunsa pipima mi bul wiaa mua, a dage nii Wia si keŋ wialinj fa si faa

a kaa dagemi. ⁴ Di ma ne karime ten-la, ma jan na nii Wia si leje mi jin wialin fa si faa a tige Kirisito le. ⁵ Wia fa bi leje di nuu-kala jin wiaa deenba, ama leele u jono dage u nanzoba-la si ken tuo-pula, ari nialin sii bul wiaa, Wia Din-zon-la dolun le. U leje u Din-zon-la ne jon wialin dageba. ⁶ Wialin ne nla: Wia to Kirisito Yesu wu-zom-la le ne a len Juu tinjaa ari nialin ma si bi Juu tinjaa naa kala ken torun kialin Wia si naa billa le. Leele ba kala naa Kirisito yaraa seme donjo ne a tin Wia wu-zom-la wiaa. Ba ma jan pe dii kialin Wia si to Kirisito Yesu le a bul di u jan jono pila.

⁷ Wia leje mi naa u tintinnu ne, di mi bul Yesu wu-zom-la a pi niaa. U lahormo le ne u dii zile mi le a jon u dolun pimi mi kaa titin. ⁸ Wia niaa tuon kala, mi ne naa ba ku-bie, an ka u fami nennige a liisemi di mi bul Wia wiaa a pi nialin si bi Juu tinjaa naa, di ba wuo jin ari Kirisito ken kiaa ne worun. Nuukala bi ba niin wuo jin. ⁹ Wia ne nii-la si ta kun-kala. U ne leje mi bul wiaa deenba kala a pi niaa, di ba wuo jin wialin u sii che duu naa a mu tige kialin kala u si jono faa faafa kala le. ¹⁰ Wia ka che duu to nialin si laa Yesu wiaa dii aa hilimi le, a len Wia bii-zonjo ari Wia bii-bonjo kala si he wia nyun le ku jin Wia si ken wu-jimin nii kinken. ¹¹ Wia fa bine faafa kala ne duu naa wiaa deenba. Ama leele u to la Tiina Yesu Kirisito le ne a len di wialin sene ku naa wutitii. ¹² La si laa u wiaa dii nii, la bi jan fifa fawullun. La jan ken nyu-duon a mu u sipaan. ¹³ Mi saa sulma di ma si leje di ma tuon chei a tin mi sii na heen nii wiaa. Mi sii na hee-la jan len di ma laa yirin.

Pool bira sul Wia a pi Efesis niaa

¹⁴ Di mi ne bine wialin Wia si naa pila, mi yie tuu kpirimi la Nyimma Wia sipaan ne. ¹⁵ U ne he doho kala yirin, kialin kala si he Wia-jan ari kialin kala si he tinteen le. ¹⁶ U si

ken yirin kinken nii, mii sulu duu len di u Din-zon-la pima dolun ma tuosaa le. ¹⁷ Mi bira sulu di ma wuo laa Kirisito wiaa dii worun, duu wuo he ma tuosaa le a len di ma chin kpan kpan a cho niaa. ¹⁸ Mi bira sulu duu pima dolun, di ma di u niaa kala wuo jin nii Kirisito si faasa choma kinken kinken, di ma ku jin chonula jalin ari u lunun ari u duomun kala. ¹⁹ Ama nuu-kala bi jan wuo jin Kirisito chonula si mage nii. U ne kii wialin kala la si wuo jin. Mii sul Wia duu len di ma ma ken ku-zom-la kala u si kene.

²⁰ U dol-la u si kaa titinla le, mii sulu duu len di dol-la faasa titin la tuosaa le. U ne jan wuo naa kiaa yuga kii kialin kala la si sulu chiche ari wialin kala la sii biinu. ²¹ Ma len di la nialin kala si laa Yesu wiaa dii aa hilimi to Kirisito Yesu le, a len di u yirin yire a lii leele a kaa mu wuu.

4

Kirisito pila dolun di la naa kubala u teen

¹ Ba ken mi-na Pool to dia a tin la Tiina Yesu wiaa. Ma nialin Wia si yira, mii sulma di ma len di ma wu-naalaa jon wonbiin ari Wia sii che nii. ² Ma len di ma siaa tuu tinteen, a pe ken ma titia muuri, a ken kenyiri, a jon wiaa chiche donjo, a tin ma si cho donjo wiaa. Ma len ma naa kubala ³ Wia Din-zon-la le. Ma si leje di kun-kala kenma pore donjo le. Ma ken donjo worun a fiela hon som. ⁴ A tin Kirisito wiaa, la kala naa kubala ne. Wia Din-zon-la si hela le, ma naa kubala ne. Wia si yirela nii, la kala yiele wu-bala ne. ⁵ La kala Tiina naa kubala ne. Wialin la si laa dii ma naa kubala ne. Wii-chuele lii-bala ne la kala fo. ⁶ La kala Wia ari la kala Nyimma naa kubala ne. U ne kii kun-kun kala. U he kun-kala le ne a titin, a he ma ma tuosaa le. ⁷ Kirisito pela kun-kala le ne a jon kiaa pila ari u sii che nii. ⁸ Ba nmunse Wia tenin seme donjo a bul,

“U si yuo dii u dindɔŋɔɔ dɛɛ, u jil Wia-jaŋ aŋ joŋ doluŋ pi niaa di ba kaa titiŋ.”

⁹ Di la nɛ si ari u jil Wia-jaŋ nɛ, nii daga ari u laa sipaaŋ lii Wia-jaŋ nɛ a ku tuu tiŋteen. ¹⁰ Nii-la titia si ku tuu tiŋteen, u nɛ bira jil Wia-jaŋ nii a kielɛ lere-la kala si hɛ wia nyuŋ, duu keŋ kuŋ-na kala doluŋ. ¹¹ Dol-la u si joŋo pi niaa, u nɛ ŋla: U pi niaa dɔŋsuŋ doluŋ di ba wuo ŋaa Yesu nanzɔɔba, a leŋ dɔŋsuŋ ma ba wuo bubul wiaa, Wia Diŋ-zɔŋ-la doluŋ lɛ, a leŋ dɔŋsuŋ maa di ba wuo gollo bubul Wia wiaa a pi niaa. Dɔŋsuŋ ma bibenɛ nialiŋ si laa Yesu wiaa dii, ka dɔŋsuŋ ma didage nialiŋ si laa Yesu wiaa dii. ¹² U pila doluŋ deenɛ di Wia niaa wuo kaa tiŋ Wia tiŋtiŋŋaa, a wuo pɛ nialiŋ si laa Yesu wiaa dii aa hilimi lɛ di ba waa wialiŋ ba si laa dii Kirisito teen. ¹³ U pela lɛ nii a kaa mu yi bua-la lɛ la kala si jaŋ wuo ku chiŋ wialiŋ la si laa dii lɛ, a wuo ku jiŋ Wia Bie si nage nii, a ku ŋaa ni-duoru Wia wiaa lɛ, a wuo ku nage Kirisito si nage nii wii-kala lɛ. ¹⁴ Nii-na la bira bi jaŋ ŋaa hanɓiisi Wia wiaa lɛ. La bi jaŋ mu sipaaŋ aŋ miire hariŋ maa a tiŋ wu-wogo-la la si nia a tige Wia wiaa lɛ. La bi jaŋ to nialiŋ sɛi nyia wiaa aŋ pɛ nyinyise niaa, di ba joŋ wialiŋ ba si laa dii ta. ¹⁵ Ama u maga di la cho dɔŋɔ a bul wutitii bua-na kala. Di la nɛ ŋaa nii, la jaŋ wuo waa Wia wiaa lɛ a ku nage Kirisito si nage nii. Nialiŋ si laa Yesu wiaa dii aa hilimi nage nuhuobiine nanɗaasiŋ nɛ. Kirisito nɛ ŋaa nyuŋ. ¹⁶ U si ŋaa la kala nyuŋ nii, di nanɗaasi-la kala nɛ mere dɔŋɔ lɛ a titiŋ ba tiŋtiŋŋaa woruŋ, yara-la jaŋ waa. La wasa keŋ yarida aa cho dɔŋɔ woruŋ.

Mii-falii-la la si kɛnɛ Kirisito teen

¹⁷ Wia doluŋ lɛ mii che di mi bul wii nɛ pima ari siifesiŋ. Wialiŋ nialiŋ si bi Wia jiŋ sɛi ŋaa aŋ bibiine, ba ŋaa wu-peiba nɛ. Ma-na bira sɛi

wialiŋ ŋaa. ¹⁸ Birimiŋ to ba wu-jimiŋ nɛ. Ba bi jaŋ wuo na miisi-la Wia si joŋo pi niaa, bɛɛ wiaa ba bi wii-kala jiŋ, aŋ keŋ tuɔ-hɛɛŋ maa. ¹⁹ Ba joŋ hiisiŋ chɔmɔ nyua nɛ, aŋ joŋ ba titia hɛ wu-liiliŋ ŋaaniŋ lɛ, aa hihieniɛ di ba gollo ŋaa disiŋ-na kala. ²⁰ Nii dee Kirisito dagema. ²¹ Ma nii Yesu wiaa nɛ. Ba dagema u wiaa ma nɛ. Wialiŋ kala saa ŋaa wutitiiba nɛ. ²² Ma fa si nage nii bunɓunɓun-la, má joŋu ta. Ba fa nyisema a cheima nɛ. ²³ Má leŋ di Wia keŋ ma tuɔbiinaa kala birime di ba ŋaa ku-falia. ²⁴ Ma tuɔbiinɛ-falia-la nage Wia si nage nii nɛ. Wia nɛ joŋo pima. Nii wiaa, má to ma tuɔbiinaa deenɓa hariŋ, di ma sɛnɛ keŋ tuɔ-pula Wia sipaaŋ a sɛi disinniŋ ma keŋ.

²⁵ Nii wiaa, ma bira sɛi wiaa nyinyia. Má leŋ di nuu-kala bul wutitii a pi u dɔŋɔ tiina, bɛɛ wiaa la kala nage nanɗaasiŋ nɛ a ku mere dɔŋɔ lɛ a ŋaa kubala. ²⁶ Di ma nɛ na baaniŋ, ma sɛi leŋe di ma baanɓ-la leŋ di ma juu haache lɛ. Ma bira sɛi leŋe di ma na baaniŋ di wia tuu juu. ²⁷ Ma sɛi leŋe di Sitaani na wonɓiiniŋ a nyisema di ma ŋaa haache. ²⁸ Nii-la kala fa sɛi gaa, u maga duu leŋ gaariŋ, aŋ keŋ u nisaa faasa tiŋ tiŋtiŋ-zɔŋɔɔ a wuo na ku-la kala u sɛi che u titia lɛ, aŋ wuo pɛ summoo ma lɛ. ²⁹ Ma sɛi leŋe di wu-bɔŋ kala lii ma niiniŋ lɛ. Má bul wu-zɔmɔ-la sɛi juu niaa digilaa bua-la lɛ si maga, a leŋ di wialiŋ ma sɛi bul pɛ nialiŋ lɛ sɛi jegili wialiŋ. ³⁰ Ma sɛi leŋe di Wia Diŋ-zɔŋ-la tuɔŋ chei. U nɛ Wia joŋo hema lɛ. U ŋaa magiliŋ ma lɛ a dage ari Wia jaŋ laama ta tapulii-la Kirisito sɛi jaŋ miira kɔ. ³¹ Má joŋ wu-bɔŋɔɔ ŋaaniŋ kala ta. Di nuu nɛ ŋaa wii juuma lɛ, ma sɛi joŋo hɛ ma tuɔŋ lɛ. Ma sɛi teru, ma sɛi baaniŋ na. Ma sɛi goŋ ŋaa niaa nyuŋ. Ma sɛi niaa yiriŋ chichei. Ma bira sɛi wu-bɔŋ kala kala ŋaa. ³² Ama má keŋ zile dɔŋɔ lɛ, a fifá dɔŋɔ nenniŋe. Má joŋ wiaa chiche dɔŋɔ, ari Wia si to Kirisito lɛ a joŋ ma wu-bɔŋɔɔ kala

chema nii.

5

Ma he Kirisito pulumun tuon

¹ Ma n̄aa Wia bii-chooloo ne. Nii wiaa, má chichesi Wia wu-ŋaalaa.

² Má cho don̄o ari Kirisito si chola nii a suu la wiaa. U jon̄ u titia a pi Wia. Ba kpuu ari ba si yie kpu pusun̄ a nyiga pi Wia nii, u suor̄a sin̄.

³ Ma si n̄aa Wia niaa nii, u maga di ma liise ma titia ha-chorun̄ ari ba-chorun̄ wu-ŋaalaa le, a bira liise ma titia disinnin̄ kala le, a sí niaa kiaa lilaa. ⁴ Ma sí wu-liilin̄ ari wu-toonun̄ ma bubul. Ma sí sisii-toonun̄ ma sii. U bi maga di Wia niaa n̄n̄aa wiaa deen̄ba. Ama u maga di ma lulolle Wia ne bua-na kala le. ⁵ U maga di ma jin̄ worun̄, ari nialin̄ sí n̄aa ha-chorun̄ ari ba-chorun̄ wiaa ari nialin̄ sí n̄aa disinnin̄, ari nialin̄ si ken̄ niaa kiaa lilaa, niaa deen̄ba kala bi jan̄ dii kialin̄ Wia si n̄aa bil u niaa le, u-na Wia ari Kirisito kuorii-la tuon̄. ⁶ Ma sí leŋe di nuu-kala bul wu-toonun̄ a nyisema. Wiaa deen̄ba ne leŋe Wia baaniŋ sisii nialin̄ si bi u niin̄ ka to nyun̄. ⁷ Nii wiaa, má liise ma titia ni-yiri deen̄ba le. ⁸ Bua kubala le ma ma fa he birimin̄ tuon̄ ne, ama la Tiina Yesu leŋe ma leele he pulumun̄ tuon̄ ne. Nii wiaa, má leŋ di ma wu-ŋaalaa nage nialin̄ si he pulumun̄ tuon̄ sí n̄aa nii. ⁹ Pulumun̄ tuon̄ wu-ŋaalaa zom̄o ne a pe n̄aa wutitiiba, aa to Wia won̄biin̄. ¹⁰ U maga di ma gunne wialin̄ ma si jan̄ n̄aa di la Tiina Yesu tuon̄ t̄ore ne. ¹¹ Birimin̄ tuon̄ wu-ŋaalaa-la niaa sí n̄aa, má liise ma titia ba le. Niaa don̄sun̄ he birimin̄ tuon̄ aa n̄aa wu-bon̄ŋoo ne. Ama má jon̄ ba bubuon̄ ta a leŋ niaa jin̄ wialin̄ ba sí n̄aa bi zon̄. ¹² U paala ken̄ hiisin̄ ne di la bul wialin̄ ba si luoraa n̄aa. ¹³ Kun̄-na kala ne he pulumun̄ tuon̄, ba yie nau ne. Kun̄-kala sí chaane ken̄ pulumun̄ ne. ¹⁴ Nii wiaa ne tii ba bul, “Ma nialin̄ si pin̄ don̄ a nage ma suba, má

sii don̄ le. Kirisito jan̄ chaana hema le.”

¹⁵ Nii wiaa, má p̄o ma titia le ari ma wu-ŋaalaa le. Ma sí ni-yaaraa nagu. Má n̄aa wiaa a nage nialin̄ si ken̄ wu-jimin̄. ¹⁶ Tapulaa deen̄ba niaa n̄aa wu-bon̄ŋoo ne. Nii wiaa bua-na kala le di ma ne na won̄biin̄, má n̄aa wu-zon̄ŋoo aa bul wu-zon̄ŋoo. ¹⁷ Ma sí yaaru, u maga di ma jin̄ wii-la sí t̄ore la Tiina Wia tuon̄ aa n̄aaba. ¹⁸ Ma sí sinin̄ nyua bubugi. Di niaa ne nyua sinin̄ bugi, ba yie n̄n̄aa wu-liilin̄ ne. U jan̄ cheima. Ama má leŋ di Wia Din̄-zon̄-la hema le a titin̄. ¹⁹ Di ma ne ku hilimi a bul wiaa pipi don̄o, má yiyii yiilaa ba sí yire Saams a didenne Wia, a yii yiila-la don̄sun̄ maa sí dage Kirisito wiaa. Ma tuon̄ ma le má yii yiilaa a didenne la Tiina Kirisito. ²⁰ Bua-na kala le ari wii-na kala le, má lolle la Nyimma Wia. Má to la Tiina Yesu Kirisito le a n̄aa nii.

Haalaa ari baalaa mele si maga duu nage nii

²¹ La sí fá la Tiina Kirisito wiaa nii, u maga di la tuto don̄oba niin̄ wiaa ne. ²² Haalaa, má tuto ma balaba niin̄ ari ma sí to Kirisito nii. ²³ Haalaa maga di ba n̄aa nii ne, beŋe wiaa baalaa ne ken̄ dolun̄ haalaa nyun̄ ari Kirisito si ken̄ dolun̄ nii nialin̄ si laa u wiaa dii aa hilimi nyun̄, ka ba n̄aa u yaraa. U ne saa bira n̄aa ba Laataara. ²⁴ Nialin̄ si laa Yesu wiaa dii aa hilimi sí to Kirisito niin̄ wiaa nii, nii titia ne haalaa ma maga di ba tuto ba balaba niin̄ wiaa. ²⁵ Baalaa, má cho ma haalaa, ari Kirisito si cho nialin̄ si laa Wia wiaa dii aa hilimi nii, u suu ba wiaa, ²⁶ a piise ba disinnin̄ ta, a fo ba wu-bon̄ŋoo kala ma ta ari liin̄, a tin̄ Wia niin̄ wialin̄ ba si nia wiaa. ²⁷ U n̄aa nii di nialin̄ si laa u wiaa dii aa hilimi, di ba wuo zon̄ kin̄ken̄, a tutul u teen̄, a sí wu-bon̄ kala ken̄ muapilii maa, a bira sí n̄maamu muapilii maa, a sí wu-bon̄ kala yiri ma n̄aa, a n̄aa nialin̄ si

bi disinnij kenε Wia sipaan a sí wii-kala n̄aa chei. ²⁸ Yesu sí cho nialinj si laa u wiaa dii aa hilimi nii, nii titia nε u maga di baalaa cho ba haalaa, ari ba si cho ba titia nii. Baal-la kala si cho u haala, u cho u titia nε. ²⁹ Nuukala bi u titia bere, ama u cho u titia a biben u titia nyun worun, ari Kirisito sii ben nialinj si laa u wiaa dii aa hilimi nyun nii. ³⁰ Kirisito yie n̄aa nii, bεε wiaa la ma n̄aa u nan̄daasin nε a mεre u yaraa ε. ³¹ Wiinj deen wiaa nε tii baala yie len u nyimma ari u naan, ka ba di u haala mεre d̄on̄o ε a ken chal-bala. ³² Wu-kpun̄kpere deen n̄aa wu-bal nε a faa. Kirisito ari nialinj si laa u wiaa dii aa hilimi wiaa nε mi bubul nii. ³³ U saa nage nii nε ma ma ε. U maga di nuukala cho u haala ari u si cho u titia nii, u maga di haala ma pi u bala jirima nε.

6

Pɔɔl bul han̄biisin ari ba nyimmaba ari ba naan̄ba wiaa

¹ Han̄biisin, u maga di ma tuto ma nyimmaba ari ma naan̄ba niinj. Nii n̄ii to Wia won̄biinj. ² Má zizil ma nyimmaba ari ma naan̄ba ari ba si bul nii Wia teninj tuon̄. Wialinj Wia si dage niaa di ba tuto, ba tuon̄ deen nε ken̄ time. ³ Di ma n̄ii zil ma naan̄ba ari ma nyimmaba, Wia jan̄ pema ε di ma na di-zomun̄, a ken̄ mii-dudun̄ dunia deen ε. ⁴ Ma nyimmaba, ma sí ma biirin̄ walimu kin̄ken̄ di ba baan̄inj sisii ma nyun̄. Má ben̄ba a dageba worun̄, duu nage ari Wia titia nε dageba won̄biinj ba tuto.

Pɔɔl bul yosun̄ ari ba tin̄n̄aa wiaa

⁵ Ma yosun̄, má tuto nialinj si tiima niinj dunia deen ε. Má zizilba a fifába. Má ken̄ wutitii a tutoba ari Kirisito nε ma tuto. ⁶ Má si leje di ma tin̄n̄aa ben̄ma an̄ ka ma-na titinj worun̄, a sí che di ma tin̄ di ba besema ε. Ama má tin̄ ari ma timaa pi Kirisito nε a ken̄ tuo-bala, aa n̄aa wialinj Wia si cho. ⁷ Má ken̄

tuot̄orun̄ titinj ma tin̄tin̄n̄aa, ari ma tima pipi Kirisito nε, nuhuobiine dee ma timaa pa. ⁸ Ma jin̄ di nuu nε tin̄ tin̄tin̄-zon̄, la Tiina Wia jan̄ jon̄ ku-zon̄ a timu, di tiina n̄aa yomo koo u tii u titia nε. ⁹ Ma nialinj ma si ken̄ yosun̄, má ken̄ba worun̄, ma síba walimu. Ma jin̄ ari ma kala tiina n̄aa kubala nε a hε Wia-jan̄. La kala n̄aa kubala nε u teen̄. U bila kaa p̄ore.

Kialinj Wia si jon̄o pila di la kaa yuo Sitaani

¹⁰ Wii-la mi síi che mi bul, u wu-kaaninj nε n̄la: Mii che di ma ken̄ dolun̄ la Tiina Wia teen̄ a wasa kenu worun̄. U jan̄ wuo pima dolun̄ deen̄. ¹¹ Sitaani ken̄ wu-jimin̄ kin̄ken̄ aa nyise niaa. Ama má ken̄ ma titia worun̄ a yuo laa ma titia Sitaani teen̄. Ma nage laali-yuoroo nε. Má laale laali-yuori genni-la kala Wia si jon̄o pima. ¹² Ama la bi naga nialinj síi yuo nuhuobiinee. Laa yuo Sitaani ari u haritooroo nε, ari kun̄-kala si ken̄ dolun̄ nialinj si hε birimin̄ tuon̄ teen̄. Dunia deen̄ ari dol-bom̄o-la kala si hε wia nyun̄, ba nε laa yuo. ¹³ Nii wiaa, má laale laali-yuori kiaa Wia si jon̄o pima, di tapulii-la wu-bon̄n̄on̄ síi che di ba n̄aama ε, di ma wuo n̄aa siri a china gberε. ¹⁴ Má chin̄ kpan̄ kpan̄, má len̄ di wutitii-la ma si nia nage ma laali-yuori damere a v̄on̄ ma tin̄a ε, a len̄ di tuo-pula nage ma h̄on̄-gerinj a to ma harinj ari ma sipaan̄ kala, ¹⁵ a len̄ di Yesu wu-zom̄o-la n̄aa ma laali-yuori nen̄ten̄n̄εε. Yesu wu-zom̄o-la pε niaa ε ba h̄on̄ ari yarifielaa. ¹⁶ U nii harinj ε nε má len̄ di ma yarida dol a nage h̄on̄-la laali-yuoroo si jon̄o kere ba boyε. Di ma nε n̄aa nii, ma jan̄ wuo kere laa ma din̄don̄ hen̄n̄εε kala u si jon̄o a yuoma. Hen̄n̄εε deen̄ba bieru a nage nyinin̄ síi bieru nii nε. ¹⁷ Wia si laama ta nii, u maga duu nage nyun̄-chuulo nε di ma jon̄o chu, an̄ jon̄ tokobii-la si hε Wia Din̄-zon̄-la teen̄ a kori a yuo laalin̄. Tokobii-la nε n̄aa Wia wiaa. ¹⁸ Má len̄ di Wia Din̄-zon̄-la pima dolun̄ di ma chuole

Wia bua-na kala le a sulu wii-wii-kala. Ma síi ñaa ñii, má pɔ woruŋ a sí don diegu, aŋ pɛɛɛ, aa chuole Wia pipi Wia niaa maa. ¹⁹ Má sul Wia pimi maa di Wia pimi nyu-duoŋ, a wuo dagemi ñii mi si jaŋ to a bul Yesu wu-zomɔ-la fa si faa a pi niaa. ²⁰ Mi síi bul Kirisito wu-zomɔ-la aa pi niaa ñii, ñii ne tii ba keŋmi kaa he chorumɔɔ. Má sul Wia pimi di mi wuo bul Wia wiaa ari nyu-duoŋ, ari mi si maga di mi bul ñii.

Wu-kaanin

²¹ Mii che di ma jin mi si nage ñii ne, a bira jin tintimii-la mi síi tin. Mi naanbii-chooluŋ Tikikas si ñaa la Tiina Yesu tintinni-titii, u jaŋ bul mi wiaa kala, ²² di ba wuo leŋ di ma nyuŋ nyaase. Ñii ne tii mi timu ma teen.

²³ La Nyimma Wia ari la Tiina Yesu Kirisito jaŋ leŋ di la naanbiiri-la kala si laa Yesu wiaa dii hoŋ ari yarifiɛlaa, a keŋ yarida, a cho donɔ. ²⁴ Nialiŋ si cho la Tiina Yesu Kirisito a kaa mu deŋ deŋ, Wia jaŋ fá niaa deŋba kala nennige.

TEN-LA PƆOL SI N̄MUNSA PI FILIPA NIAA

¹ Mi-na PƆol ari Timoti ne n̄munse teniŋ deen̄ aa pi Wia niaa kala si he Filipa le a laa Yesu Kirisito wiaa dii. La n̄aa Yesu Kirisito t̄ntinnaa ne. ² Laa n̄munse teniŋ deen̄ a pipi nialiŋ si laa Yesu wiaa dii aa hilimi nihiasiŋ ari nialiŋ si pe nihiasi-la le.

La Nyimma Wia ari la Tiina Yesu Kirisito lahorimɔ le, ma jaŋ hɔŋ ari yarifielaa.

PƆol chuɔle Wia pipi Filipa niaa

³⁻⁴ Bua-na kala le di mi ne liisi ma wiaa, mi yie chuɔle Wia pipima ne. Mi yie lollu a mu tige ma wiaa ari tuɔtoruŋ ne. ⁵ Mi yie lolle Wia a tiŋ nii ma si pemi le mi bul Wia wu-zomɔ-la a pi niaa. Ma pemi le a lii tapulii-la ma si nii Wia wu-zomɔ-la a kaa kɔ jiniŋ. ⁶ Mi laa dii ari Wia si pema le ma tiŋ t̄ntiŋ-zomɔ-la nii, u jaŋ pema le di ma tima mu yi tapulii-la la Tiina Yesu Kirisito si jaŋ kɔ. ⁷ Mii biine ma wiaa ne woruŋ. U n̄aa wonbii ne di mi n̄aa nii, beɛ wiaa Wia fá la di ma kala nennige. A tiŋ Wia wu-zomɔ-la wiaa ne ba keŋmi kaa tɔ dia. Bua deen̄ le la kala dii dansia a mu tige Wia wu-zomɔ-la le duu n̄aa wutitii, a leŋ u chin̄ kpaŋ kpaŋ. Wiaa deen̄ba kala le ma pemi le ne woruŋ. ⁸ Mii biine ma wiaa ne woruŋ. Wia ne n̄aa mi dansia ari wiin̄ deen̄ le. Chonu-la mi si choma lii Kirisito Yesu teen̄ ne. ⁹ Mii sul Wia duu leŋ di ma cho dɔŋɔ, di chonu-la wasa yuge kin̄keŋ, a biraa sulu duu pima wu-jimiŋ di ma wuo jin̄ wii-na kala ma sí n̄aa bubuɔŋ. ¹⁰ Wu-jimii-la jaŋ leŋ di ma liise wu-zɔŋɔɔ a pi ma titia. Di ma ne n̄aa nii, ma jaŋ wuo liise ma titia disinniŋ le, a sí wii-kala n̄aa chei a mu yi tapulii-la Kirisito si jaŋ kɔ. ¹¹ Ma si keŋ tuɔpula Wia sipaan̄ nii, ma jaŋ wuo to Yesu Kirisito le a wasa n̄aa tuɔ-pul

wu-n̄aalaa. Di ma ne n̄aa nii, niaa jaŋ denne Wia duu yiriŋ yire.

PƆol si duu jaŋ joŋ u titia bil a mu tige Kirisito t̄ntiŋn̄aa wiaa

¹² Mi naan̄biiriŋ, mii che di ma jin̄ ari wialiŋ si n̄aami le leŋe wu-zomɔ-la mi sí bul wasa mu sipaan̄ ne. ¹³ Nialiŋ sí beŋ nialiŋ ba si kaa tɔ dia ari nuu-kala jima ari Kirisito wiaa ne tii ba keŋmi kaa tɔ dia. ¹⁴ Mi si he dia-la le pe la naan̄biiriŋ dɔŋsuŋ le ba wasa chin̄ la Tiina Yesu wialiŋ ba si laa dii le woruŋ. Ba bira keŋ nyu-duoŋ a bubul Wia wiaa, aŋ bi fawulluŋ ka fá.

¹⁵ Mi jima ari niaa dɔŋsuŋ ka bul Kirisito wiaa a pipagise ne ari yari-bieriŋ, aŋ pe n̄aa yuo-heereɛ. Ama dɔŋsuŋ ma keŋ ba tuɔbiin̄-zɔŋɔɔ a bubul Kirisito wiaa. ¹⁶ Nialiŋ sí to ba tuɔbiin̄-zɔŋɔɔ le a bubul Kirisito wiaa chomi ne. Ba jima ari Wia ne liisemi di mi bul u wu-zomɔ-la a pi niaa. ¹⁷ Nialiŋ si bul Kirisito wiaa a pipagise yie to ba titia tuɔtoruŋ le ne. Ba bi wutitii keŋe. Mi si he dia le nii, ba chiche di mi na heeŋ a yuge. ¹⁸ Ama mi-na teen̄ u bi wii-kala keŋe. Di tuɔbiin̄-zɔŋɔɔ ne koo di tuɔbiin̄-bɔŋɔɔ ne ba kaa bul, mi tuɔŋ tɔɔ ne ari ba sí bul Kirisito wiaa.

¹⁹ Mi tuɔŋ ma jaŋ tore a mumu. Mi jima ari ma chuɔle Wia pipimi ne. Nii wiaa a tiŋ ma Wii-sula ari Yesu Kirisito Diŋ-zɔŋ-la le, mi jima ba jaŋ liisemi ta. ²⁰ Wii-la mi sí che kin̄keŋ ari wii-la mi sí yiele ne n̄la: Mi bi jaŋ kɔ di mi n̄aa wii a mu tige t̄ntimii-la mi sí tiŋ di hiisiŋ diimi, ama a suomi jiniŋ a kaa mu, bua-na kala le, mi jaŋ keŋ nyu-duoŋ a bul Wia wiaa. Di mi ne weye koo di mi ne suba, mi jaŋ joŋ mi titia bil a mu tige Kirisito t̄ntimii-la wiaa, duu yiriŋ yire. ²¹ Mi-na teen̄, di mi ne keŋ miisiŋ, mi kenu Kirisito teen̄ ne. Di mi ne suba maa, mi jaŋ na nyuuruŋ u teen̄. ²² Di mi ne he mi miisiŋ le, mi jaŋ faasa tiŋ, di ni-dan̄ nii Wia niin̄ wiaa. Di mi ne bira suba maa, mi jaŋ na nyuuruŋ. Mi bi jin̄

ba ku-la mi si jan liise. ²³ Mi he wiaa deenba balia pege ne. Mi fa cho ne woruŋ di mi sii dunia deen le a mu Kirisito teen. U ne kpia mi si jan he dunia deen le. ²⁴ Ama u jan naa wu-zoŋ a pima di mi ne he mi miisin le. ²⁵ Mi laa wiin deen dii ne ari mi jan he ma teen dunia deen le, di mi wuo pema le di ma waa a mu tige wialin ma si laa dii le, an pe ken tuotoŋ ba le. ²⁶ Nii wiaa, di mi ne miira ko ma teen, ma jan na wonbiin a denne Yesu Kirisito a tin mi wiaa.

²⁷ Má len di ma wu-ŋaalaa tuto Wia wu-zomɔ-la mi si bula pima a tige Kirisito le. Di ma ne naa nii, di mi ne he ma teen koo di mi ne tuo, mi jan wuo nii ari ma faasa chin ne kpan kpan a ken nii-bala, a len di ma tuobiinaa ku pe doŋo le, a faasa he doluŋ a pipe doŋo le a mu tige Wia wu-zomɔ-la ma si laa dii le. ²⁸ Ma sí len di fawulluŋ kenma a mu tige ma diŋdoŋo le. Wiin deen chaasa dageba ari ba jan lel, ama Wia jan laa ma-na ta. ²⁹ Ma-na, Wia ne pima wonbiin di ma laa Kirisito wiaa dii an pe na heen a tin u wiaa. ³⁰ Laal-la ma si na di mii yuo bunbuŋ, a bira nii di mi haa yuo, ma ma jan wuo yuou.

2

Kirisito si ken u titia muuri, Wia jon yiri-balin pu

¹ Di Kirisito pema le ma miisin le, a pema le di ma doŋsuŋ ma nyusuŋ nyaase, a pema le ma cho doŋo di ma tuosaa pin di-bala, a len di Wia Diŋ-zoŋ-la he ma tuosaa le a titin, a pema le di ma fifá ma doŋsuŋ tinŋaa nennige, ² nii wiaa má ken tuo-bala, a wasa cho doŋo, a ken nii-bala, nii jan wuo len di mi tuon faasa toŋe. ³ Wii-na kala ma sí naa le, ma sí ma titia tuotoŋ to, a ma sí ma titia ma le bibigisu. Ama má len di ma siaa fiele doŋo nyuŋ, a beŋ di niaa doŋsuŋ yuga kiima. ⁴ Di nuu ní naa wii, u sí naa chiche duu pe u dunduŋ

le. Ama ú naa chiche duu pe nuu-kala le ne. ⁵ Ma maga ma nage nii Yesu Kirisito si naga ne ma tuobiinaa le. ⁶ U fa ken Wia nagisin ne, ama u fa bi biina duu fuge u titia duu di Wia mage doŋo. ⁷ Ama u titia tuotoŋ le, u jon u Wia nagisin ta an ku tima pi Wia. Ba si lulu, u ku nage nuhuobiine, ⁸ a ken u titia muuri, a to Wia niin a mu yi bua-la le u sí suu. Ba paala kpaasu mere daa-gese nyuŋ ne u suu. ⁹ A tin wiin deen le Wia chisu a kenu kaa jil Wia-jan, a pu yiri-la si yuga kii yiri-na kala. ¹⁰ Nii wiaa Yesu doluŋ le, kialin kala si he Wia-jan ari kialin si he tinŋeen ari leleŋ-jan, ba kala jan tuu kpirimi u sipaan a chuolu. ¹¹ Nuukala jan suri u niin a bul ari Yesu Kirisito ne naa u Tiina. Di wiin deen ne naa, la Nyimma Wia yirin jan yire.

Má chaane a nage cheŋwulaa dunia le

¹² Nii wiaa mi naanbii-chooloo, má tuto mi niin ari ma fa sí to nii bua-la le mi fa si he ma teen. Lele mi tuo ma teen, ari nii kala ma ha to mi niin. Wia laama ta ne, ama má fá fawulluŋ, an ken ma titia muuri, a titin, an na ku-la Wia si si u jan joŋo pima. ¹³ Má naa nii, bee wiaa, Wia he ma teen bua-na kala le a kenma a titin ne. U jan naa ma tuotoŋe wii di ma ní naa wialin u sí che.

¹⁴ Di ba ne si di ma naa wii, ma sí kaa lere, di ma ní naa, ma sí wiaa gurimu. ¹⁵⁻¹⁶ Di ma ne tin ma tinŋinaa woruŋ, ma jan naa tuo-pul timma a sí wii-kala chei. Ma jan bira naa Wia biirin a he haache diiree ari ni-bonŋo tuon dunia deen le. Nii wiaa, u maga di ma tuto Wia niin wialin si pima miisin, di ma wuo chaane niaa deenba tuon, ari cheŋwulaa si chaane nii wia nyuŋ. Di ma ne naa nla, mi jan wuo bese mi titia le a mu tige mi tinŋimii-la kala mi si tima, tapulii-la la Tiina Yesu Kirisito si jan ko. Nla ne jan dage ari tinŋimii-la kala mi si tima

bi pei n̄aa. ¹⁷⁻¹⁸ A tin̄ ma si laa Wia wiaa dii, ma nage puna-la ba si yie kpu a pi Wia. Di ba paala kpumi a tin̄ wu-zɔŋŋɔɔ ma si n̄aa Wia sipaan̄, mi n̄aa siri ne di mi suu. Nii leŋe mi tuɔŋ tɔre ma nyun̄ nii. Má leŋ ma ma tuɔŋ tɔre mi nyun̄.

Pɔɔl bul Timoti ari Epafodaatis wiaa

¹⁹ Mii yiele ari la Tiina Yesu dolun̄ le mi jan̄ tin̄ Timoti duu kɔ ma teen̄ leele. Duu ne kɔ ma teen̄ an̄ miira ku bul ma wiaa pimi, mi tuɔŋ jan̄ tɔre. ²⁰ U dun̄duŋ ne nii-la si chil ma wiaa ari mi ma si chil ma wiaa nii. ²¹ Niaa dɔŋsun̄ chil ba titia wiaa ne. Ba bi Yesu Kirisito wiaa chila. ²² Ma ma titia jin̄ nii Timoti si naga ne. U pemi le bubul Wia wu-zɔmɔ-la a nage bie si yie pe u nyimma le ba titin̄ nii ne. ²³ Di mi ne ku jin̄ nii wialin̄ si nage mi teen̄, mi jan̄ timu duu kɔ ma teen̄. ²⁴ Ama mi wii-wii-kala he Wia teen̄ ne. Mi jima u bi jan̄ dieni ka di mi titia kɔ ma teen̄.

²⁵ Mi bee na ari u maga di mi tin̄ la naan̄bie Epafodaatis duu kɔ ma teen̄ ne. U n̄aa mi tintinni dɔŋ ne an̄ pe n̄aa mi laali-yuori dɔŋ ma. Ma ne timu u kɔ mi teen̄ a pemi le ari wii-la mi sii che. ²⁶ U faa biine ma wiaa ne di u ku nama, ama u tuɔŋ cheye a tin̄ ma si nia ari u bi yarifiɛlaa kene. ²⁷ Wutitii, u wiila ne, a fa ka mua duu suba, ama Wia fáu nennige a leŋ u duori. Di Epafodaatis ne fa suba, mi tuɔŋ fa jan̄ faasa chei. Ama Wia fámi nennige a bi leŋe u suu. ²⁸ Nii wiaa mi siin̄ faasa fiɛɛ ne kin̄keŋ duu kɔ ma teen̄ ne, di ma nau di ma tuɔŋ bira tɔre, di mi ma tuɔŋ bira tɔrɔ. ²⁹ Nii wiaa, la Tiina Yesu dolun̄ le, má laau worun̄ ari tuɔtɔrun̄. Má pipi ni-yiri deen̄ba jirima. ³⁰ A mu tige Kirisito tintin̄n̄aa wiaa, u jon̄ u miisin̄ bil, u fa ka mua duu suba. U n̄aa nii duu wuo pemi le, bee wiaa ma titia faa che di ma pemi le ne an̄ bi wuo pe.

3

Pɔɔl bi u nyun̄ jon̄o he wialin̄ nuhuobiinee sii n̄aa ba yaraa le

¹ Mi naan̄biirin̄, wii-la wu-kaanin̄ mi sii che mi bula pima ne n̄la: Má jujuɔɛ la Tiina Wia sipaan̄. Mi laa sipaan̄ bul wiin̄ deen̄ ne pima ne, an̄ bira chiche di mi bul u titia n̄la. Mi bi jan̄ kɔ di mi lolɔ ari wii-la bulun̄. Wialin̄ jan̄ pema le di ma sí wu-bɔŋ kala juu.

² Má pɔ ma titia le ari nialin̄ si n̄aa wiaa ari vahin̄ sii n̄aa nii, a pɔ ma titia ni-bɔŋ wu-n̄aalaa le. Má keŋ ma titia ari nialin̄ si pesema le di ma keri ma penee. ³ La ne paala chaasa n̄aa nialin̄ si sene keri ba penee, bee wiaa la-na to Wia Din̄-zɔŋ-la niin̄ le ne aa chuɔle Wia. Nii wiaa, laa juɔɛ Kirisito Yesu teen̄ ne. La-na sipaa tuo wialin̄ niaa sii n̄aa ba yaraa le. ⁴ Mi-na ne paala maga di mi keŋ nyu-duon̄ a tin̄ wialin̄ niaa sii n̄aa ba yaraa le. Di nuu-kala ne biina ari u jan̄ wuo jon̄ u nyun̄ a he wialin̄ nuhuobiinee sii n̄aa ba yaraa le, mi-na jan̄ paala wuo bul ari mi kii tiina ne. ⁵ Ba si lulmi, tapul-chorimun̄ cheŋ ne ba keri mi penin̄. Mi n̄aa Iziral tiina titii ne, a lii Benjamin̄ doho. Mi naan̄ ari mi nyimma n̄aa Hiiburu timma ne. Di Juu tin̄n̄aa naabalima won̄bii-la ne maa to, mi n̄aa Farisii tiina ne. ⁶ Mi faa to Juu tin̄n̄aa naabalimaba won̄bii-la ne ari siifiɛsin̄, a to naasin̄ dudɔgise nialin̄ si laa Yesu wiaa dii aa hilimi. Di nuhuobiine ne fa jan̄ wuo keŋ tuɔ-pula a tin̄ u sii to Juu tin̄n̄aa naabalimaba won̄bii-la, mi jan̄ bul ari mi n̄aa ni-pula ne. Mi fa sii to won̄bii-la, mi bi wii n̄aa chei. ⁷ Mi fa biina, wiaa deen̄ba kala mi fa si to jan̄ keŋ nyuurun̄, ama a tin̄ Kirisito wiaa mi bene ba n̄aa pei ne. ⁸ Mi si ku jin̄ mi Tiina Yesu Kirisito, mi bene ari mi tele ne wiaa deen̄ba le. Mi chaasa jin̄ ari u ne keŋ nyuurun̄ a kii wiaa deen̄ba kala mi fa sii to. A tin̄ Yesu wiaa mi jon̄ wii-kala yuo ta ne. Mi bene ari ba kala

nage nisurunɛ nɛ. Mi ɲaa ɲii di mi wuo na nyuurunɛ nɛ Kirisito teenɛ, aɲ pɛ kɛɲ u tuɔ-pula-la,⁹ di la di Kirisito kala ɲaa kubala. Tuɔ-pula-la mi si kenɛ, u bi mi titia lɛ lia, u saa bira bi wialinɛ Moosis si ɲmunɛsa bil di niaa tuto ma lɛ lia. Ama lɛɛɛ mi si laa Kirisito wiaa dii, ɲii nɛ tii mi kɛɲ tuɔ-pula u teenɛ. Tuɔ-pula deen-na lii Wia teenɛ nɛ. Wia joɲo pi nuu-kala si laa u wiaa dii nɛ.¹⁰ Wii-la kala mi sii che nɛ ɲla, di mi jinɛ Yesu Kirisito, a wuo jinɛ u dol-la si lii u teenɛ a tinɛ u si sii suunɛ lɛ, a wuo na hɛɛ-la yiri u si na a suu.¹¹ ɲii lɛ nɛ mi ma titia jinɛ ari mi janɛ suu aɲ sii suunɛ lɛ.

U maga di la hɛ la nyunɛ kala wialinɛ si hɛ la sipaanɛ

¹² Wiaa deenɛba mi si bula, mi ha biba na dɛrɛ, mi ha bi ni-pula ma ɲaa. Mi ha hɛ dime nɛ a yuyuo di mi dii ku-la mi si janɛ na Yesu teenɛ. Yesu Kirisito paala laa sipaanɛ yuo diimi nɛ a tiimi.¹³ Mi naanɛbiirinɛ, mi paala biina ari mi ha bi ku-la na, ama mi joɲ mi nyunɛ kala hɛ wu-bala lɛ nɛ di mi ɲaa. Mi yu wialinɛ si hɛ harinɛ, aɲ hɛ mi dolunɛ kala di mi na wialinɛ si hɛ mi sipaanɛ.¹⁴ ɲii wiaa mi fa joɲ mi sipaanɛ tuule nɛ a mumu di mi na ku-la Wia si janɛ to Yesu Kirisito lɛ a joɲo pimi u janɛ lɛ.¹⁵ U maga di nialinɛ kala si waa Kirisito wiaa lɛ bibiine wiinɛ deenɛ. Di ma dɔɲsunɛ ma nii sei wii dɔɲ, Wia janɛ dagema wutitii-la.¹⁶ Wii-la si maga di la ɲaa nɛ ɲla, má lenɛ di la mu sipaanɛ a tuto wialinɛ titia la fa sii to a ku yi lɛɛɛ.

¹⁷ Mi naanɛbiirinɛ, má kala chichesii mi wu-ɲaalaa. Naa-buasula si maga di ma tuto nɛ laa dagema. ɲii wiaa, má tuto nialinɛ si laa ma sipaanɛ.¹⁸ Mi laa sipaanɛ bul wiaa pima a tige nialinɛ dɔɲsunɛ lɛ, aɲ ka lɛɛɛ-na sii-liirinɛ paala yuori mi siala lɛ nɛ ka mii bul. Kirisito suu daagesee nyunɛ ba wiaa, ama nialinɛ wu-ɲaalaa daga ari ba bi wii-la u si ɲaa kaa titinɛ. A tinɛ ɲii wiaa ba di Kirisito ɲaa dindɔɲ nɛ.¹⁹ U diderinɛ ba janɛ mu juu Wia nyininɛ. Ba tuutore wu-ɲaalaa lɛ nɛ baa to. Ba siinɛ yie fiɛɛ

hiisi wiaa lɛ nɛ. Ba yie bibiine dunia kiaa dunɛɲa wiaa nɛ.²⁰ Ama lana ɲaa Wia-janɛ niaa nɛ. La hono gberɛ la Tiina Yesu Kirisito duu lii Wia-janɛ ko nɛ. U nɛ ɲaa la Laataara.²¹ Duu nɛ ko, u janɛ kɛɲ u dol-la a kaa birime la yaraa deenɛba si janɛ pua, di ba nage u titia yara-la si bi pua. Dol-la nɛ u kaa bibenɛ kun-kala. U janɛ joɲ u dolunɛ a ɲaa wiinɛ deenɛ, a joɲ kun-kala a hɛ u naasinɛ bubuɔɲ a bibenɛ.

4

Pɔɔl chagile Filipa niaa

¹ ɲii wiaa mi naanɛbiirinɛ, mi choma nɛ kinɛɲ, mi yie bibiine ma wiaa nɛ. A tinɛ ma wiaa, mi tuɔɲ toro worunɛ, mi nyunɛ duori. ɲii-na, mi naanɛbii-kpianaba, má chinɛ la Tiina harinɛ kpanɛ kpanɛ.

² La dihaalaa Yuoodia ari Sintiki, mii sulma janɛ-janɛ di ma sinɛ a tinɛ la Tiina Yesu wiaa.³ ɲ-na mi tintinni dɔɲ, mii che di ɲ pɛ haalaa deenɛba lɛ, ka di Kilement ari mi tintinni dɔɲsunɛ kala ma pemi lɛ di la hɛ la dolunɛ kala a mu tige Wia wuzomɔ-la wiaa di ba mu sipaanɛ. Niaa deenɛba kala yiraa nɛ hɛ miisinɛ ten-la tuɔɲ Wia si bile.

⁴ Má jujuɔɛ Wia sipaanɛ bua-na kala. Mi janɛ bira bula pima di ma jujuɔɛ Wia sipaanɛ.⁵ Má lenɛ di ma siala fiɛɛ nuu-kala teenɛ. Má ɲɲaa ɲii, bɛɛ wiaa bua-la lɛ la Tiina Yesu si janɛ miira ko kpaga nɛ.⁶ Ma sí lenɛ di kun-kala wiaa wiwalimema, ama di ma nii chuɔɛ Wia, má sulu a chiche ku-la kala ma sii che, aɲ pɛ lollu.⁷ Di ma nii ɲaa ɲla, Wia janɛ pima yarifiɛlaa. Yarifiɛla-la janɛ lenɛ di ma tuɔɲ ari ma tuɔbiinaa kala pinɛ di-bala, Yesu Kirisito dolunɛ lɛ.

⁸ Mi naanɛbiirinɛ, wii-la diderinɛ nɛ ɲla: Má ɲɲaa wialinɛ si ɲaa wutitiiba, wialinɛ si kɛɲ yirinɛ, wialinɛ sii to wonɛbiinɛ, wialinɛ si bi wii-wii-kala kene, wialinɛ si dage di ma cho niaa, ari wialinɛ si zomɔ niaa sipaanɛ. Má joɲ ma nyunɛ kala hɛ

wu-zõññõ ñaaniñ ðe, aa ñaa wiaa di niaa bibesema ðe. ⁹ Wialin kala mi si bula pima, ari wialin kala mi si dagema, ari wialin kala ma si nia di mii bul, ari wialin kala ma si gunna mi teen, má kenba kaa tin tintinñaa. Di ma ñe ñaa ñii, Wiala síi pi niaa yarifielaa jan len di ma hõñ ari yarifielaa.

Põõl lõlle Filipa niaa ari ba si pẽu ðe ñii

¹⁰ Mii juõse ñe kinken Wia teen, bæe wiaa læle ma daga ari ma faa biine mi wiaa ñe. Faafaa-la kala ma faa biine mi wiaa ñe. Ama wonbiin ñe ma bi na di ma wuo dage chonula ma si kene a pimi. ¹¹ U bi naga ari mi che kun ka ñe tii mii bul wiin deen, bæe wiaa mi gunne wiaa yuge ñe mi miisin ðe. Di mi ken kun koo di mi bi kun kene, mi tuõñ yie tõõ ñe. ¹² Mi jin ñii u si naga a pimi ñe, di mi ñe ken kun koo di mi ñe bi kene. Mi gunne wiin deen ñe bua-na kala koo lee-na kala. Di mi võõ koo di losun kenmi, di mi ken kiaa yuge koo di mi ñe ken mua, mi sipaa tuo. ¹³ Mi jan wuo ken mi titia worun wiaa deenba kala ðe, bæe wiaa Kirisito ñe pimi dolla.

¹⁴ Ama u ñaa wu-zõñ ñe ma síi pemi ðe. Bua-la ðe wiaa si juumi, ma pemi ðe ñe. ¹⁵ Ma Filipa niaa, ma titia jima worun ari mi si suomo bubul Wia wu-zõmõ-la ma teen, ma pemi ðe ñe. Mi si lii Masidoonia tinteen maa, ma ha pemi ðe ñe. Nialin kala si laa Yesu wiaa dii aa hilimi, ba kun-kala bimi ðe pẽ, see ma dunduña ñe pemi ðe ari moribiee. ¹⁶ Mi fa si he Tesalonaaka tan-la ðe, ma pemi ðe yuge ñe. ¹⁷ U bi naga ari mi yie chiche di mi laa kiaa ñe ma teen, ama mi cho di mi na ari ma time wasa yuge Wia teen ñe. ¹⁸ Ma si tin Epafodatis, u ken kialin ku pimi, læle mi ken kun-kala mi síi che ñe. Kialin paala yuge ñe. Kialin ma si jõõõ pimi, ba nage kiaa ba si yie kpu pi Wia, u laaba, ka u tuõñ tõõ ba nyun ñe. ¹⁹ Wia-la mi si timaa

pa ken kun-kala ñe, u jan to Yesu Kirisito ðe a pima kun-kala ma síi che a yuge. ²⁰ La Nyimma Wia yirin jan yire bua-na kala ðe a kaa mu wuu. Ami.

Chuõlaa

²¹ Mii chuõle nialin kala si to Yesu Kirisito ðe a ñaa Wia niaa. La naanbiiri-la kala ma si laa Yesu wiaa dii a he daha, ba maa chuõlema. ²² Wia niaa kala si he daha ka chuõlema. Nialin ma si laa Yesu wiaa dii a he kuori-bal-la ba síi yire Siiza dia ðe ka chuõlema.

²³ La Tiina Yesu Kirisito lahõrimõ ðe, ma jan hõñ ari yarifielaa.

TEN-LA PƆOL SI N̄MUNSA PI KOLSI NIAA

¹ Mi-na PƆol si n̄aa Yesu Kirisito nan̄zɔɔ Wia si liisa, ari Timoti, la kala naan̄bie, laa chuɔle ma Kolosi niaa.

² Mi n̄mun̄se tenin̄ deen̄ a pipi ma-na Wia niaa si n̄aa naan̄bii-titiiba-la Kirisito teen̄. La Nyimma Wia lah̄orimɔ le u jan̄ p̄ema le a len̄ di ma h̄on̄ ari yarifiɛlaa.

PƆol lolle Wia Kolosi niaa wiaa

³ Bua-na kala la n̄ii chuɔle Wia aa pima, la yie lollu, u-na, la Tiina Yesu Kirisito Nyimma, ⁴ b̄ee wiaa la nia ari ma sei Kirisito Yesu niin̄ a cho Wia niaa kala n̄e. ⁵ Maa n̄aa n̄ii a tin̄ ma s̄ii yieɛ kialiñ si pin̄ ma sipaan̄ Wia-jan̄ le. ⁶ Ma nii wiin̄ deen̄ bua-la ma si n̄ii Wia wu-zɔmɔ-la si n̄aa wutitii. Epafiras n̄e bula pima. Wia wu-zɔn̄ɔɔ deen̄ba tin̄ tin̄tin̄-zɔn̄ɔɔ n̄e leree yuge dunia le. Niaa yuga laaba dii, ba pun̄ lere-la ari ba si pun̄ n̄ii ma le. Ba pun̄ n̄ii ma le a suomi bua-la le ma si jegile nii wu-zɔmɔ-la a sene jin̄ n̄ii Wia si p̄ema le u lah̄orimɔ le. ⁷ Ma gunne wiaa deen̄ba Epafiras teen̄ n̄e, la nichoolii-la si n̄aa la tin̄tinni dɔn̄ɔ Wia tin̄tin̄n̄aa le. U n̄aa Kirisito tin̄tinnitii n̄e la nyun̄. ⁸ U n̄e bula pila ari ma si cho dɔn̄ɔ Wia Din̄-zɔn̄-la dolun̄ le.

⁹ A lii tapulii-la la si nii wiin̄ deen̄, la chuɔle Wia pipima a bi len̄. Laa sul Wia aa pima duu len̄ di ma sene jin̄ wii-la u s̄ii che di ma n̄aa, a ken̄ wu-jimin̄ ari digilin̄ jegilee Wia Din̄-zɔn̄-la si pima. ¹⁰ U jan̄ len̄ di ma wu-n̄aalaa kala chin̄ Wia won̄biin̄ le, duu tuɔn̄ t̄ore ma nyun̄ a len̄ di ma tin̄ tin̄tin̄-zɔn̄ɔɔ, tin̄tin̄-yiriba kala le, duu ken̄ doho, di ma ku jin̄ Wia worun̄ a waa p̄e. ¹¹ Wia jan̄ pima dolun̄ a mage n̄ii u si dolie, di ma wuo ken̄ piina ari kenyiri ma

tuɔtɔrun̄ le. ¹² Má lolle Wia ari u si len̄e di maachie ma ma si jan̄ wuo p̄e dii kialiñ u si n̄aa bil u niaa le Wia kuorii-la tuɔn̄. ¹³ U laala Sitaani nisin̄ le, a ken̄la kaa mu h̄e u bii-choolun̄ kuorii-la le di u biben̄la. ¹⁴ U n̄e Wia jon̄o tin̄ la haacheba chimin̄ a jon̄ la haacheba chela.

Kirisito ken̄ dolun̄ wii-kala le

¹⁵ Kirisito n̄e nage Wia-la nagisin̄ kala kala, nii-la la si bi na. U n̄e kii kun̄-kala u si n̄aa. ¹⁶ U le n̄e Wia to a n̄aa kun̄-kun̄-kala si h̄e wia nyun̄ ari tin̄teen̄, kialiñ la s̄ii na ari kialiñ la si bi na kala, a p̄e Wia bii-zɔn̄ɔɔ ari bii-bɔn̄ɔɔ kala le. U le n̄e u to a n̄aa kiaa kala. Ba h̄e dime u yirin̄ le. ¹⁷ U n̄e laa sipaan̄ h̄e dime, ka kun̄-kala-na h̄e dime. U n̄ii ben̄ kiaa kala ba chin̄ ba di-chinaa. ¹⁸ U n̄e n̄aa nialiñ si laa Yesu wiaa dii aa hilimi kuhian̄ aa ben̄ba. Ba nage u yaraa, u n̄e n̄aa ba nyun̄. U n̄e suomo bil Wia niaa gentine, b̄ee wiaa u n̄e n̄aa bun̄bun̄ nii-la si laa sipaan̄ sii suun̄ le nialaa kala si suba le. Nii wiaa u n̄e ken̄ dolun̄ wii-kala le. ¹⁹ Wia cho di Yesu nage u-na Wia nagisin̄ kala kala. ²⁰ U le n̄e Wia to ba di kun̄-kala sin̄, kialiñ si h̄e wia nyun̄ ari kialiñ si h̄e tin̄teen̄ le kala. Bua-la u si suu daa-geɛɛ nyun̄, u chalin̄ jaase. U chal-la jaasin̄ n̄e len̄e Wia ari kialaa kala si h̄e dime tuɔsaa fiɛle dɔn̄ɔ nyun̄.

²¹ Ma di Wia siaa fa bi dɔn̄ɔ na a tin̄ ma wu-bɔmɔ-la n̄aanin̄ ari ma tuɔbiin̄ lɔrunu-la wiaa. ²² Ama l̄eeɛ Wia n̄aa ma duu sin̄ a tin̄ Kirisito suun̄ le, duu ken̄ma kaa kɔ Wia sipaan̄ ari tuɔ-pula, duu sima nyan̄. ²³ Kirisito jan̄ n̄aa n̄la pima, di ma ken̄ yarida-la naan̄ le a chin̄ kpan̄ kpan̄, aa yieɛ wialiñ ba si n̄mun̄sa Wia tenin̄ tuɔn̄. Ma nii Wia wu-zɔn̄ɔɔ deen̄ba ba si bula pi niaa leree yuga n̄e. Mi-na PƆol ma ku n̄aa Wia tin̄tin̄naa dɔn̄ɔ aa bul Wia wiaa.

Tin̄timii-la PƆol si tima pi nialiñ si laa Yesu wiaa dii aa hilimi

²⁴ Lɛɛɛ mi tuɔŋ tɔɔ hɛɛ-la lɛ mi si na a pima. Hɛɛ-la jan pɛ dɛɛ, ari Kirisito si si mi jan na hɛɛŋ pi nialin si laa u wiaa dii aa hilimi. U niaa ŋaa kubala nɛ, a nage u yaraa si ŋaa kubala nii. ²⁵ Mi ku ŋaa ba tinntinnu dɔŋ. Wia nɛ liisemi di mi tin tinminin deen a pima, di mi bul Wia niin wiaa kala a pima. ²⁶ Wia niin wiaa fa faa nɛ. Wia jonɔ faa la naabalimaba tinteen lɛ faafaa kala a ku yi bua deen lɛ. Ama lɛɛɛ Wia jonɔ dage u niaa nɛ. ²⁷ Ba nɛ Wia liise di ba jin wialaa si zomɔ nii kinken, ka u fa jonɔ faa. Lɛɛɛ u dage ba si mage nii nialaa si bi juu tinŋaa ŋaa tuɔŋ. Wialin nɛ daga ari Kirisito hɛ ma tuɔŋ lɛ. Nii wiaa maa yiele di ma kpaa u yiri-bal-la Wia-jan lɛ. ²⁸ U wiaa nɛ la bula pipi niaa. Laa kpurise nuu-kala digilaa, aa dage nuu-na kala ari wu-jimii-na kala, di la wuo ŋaa ba waa dɛɛ Kirisito wiaa lɛ. ²⁹ Nii wiaa mi faasa hɛ mi dolun kala a titin, ari Wia si jon u dol-bal-la pimi di mi kaa titin nii.

2

¹ Mii che di ma jin nii mi si hɛ dolun a faasa tima pima a pɛ Wia nialaa si hɛ Laadisiya lɛ, ari Wia nialaa dɔŋsun kala ha si bimi naa. ² Mii che di ba ken bɔi-duon a tin chonun si wuo kenba hɛ dɔŋɔ, di ba wuo jin wu-faali-la kala kala worun a dɛɛ si tige Kirisito lɛ a laa dii. ³ Wu-jiminin kala hɛ u teen nɛ. U dunɔŋa nɛ wuo ŋaa la sɛnɛ ku jin wiaa a ken wu-jiminin.

⁴ Mi bul nii pipima di nuu-kala si wuo nyisema ari nii-sima. ⁵ Mi tuo ma teen, ama mii biine ma wiaa ari mi hɛ ma teen, aa juɔsɛ ma si ŋaa Yesu yarida a chin kpan kpan, a fiɛɛ ma yaraa.

Mii-zɔŋ-la la si kenɛ Kirisito teen

⁶ Ma si sɛye ari Yesu Kirisito nɛ ŋaa ma Tiina, maa len di wii-na kala ma sii ŋaa lɛ, duu nage ma duu ŋaa kubala nɛ. ⁷ Maa len di ma

naapoloo suusa juu-u worun, di ma wuo gunne u wiaa worun a wuo chin ma yarida lɛ, ari ma si gunne nii di ma ŋaa. Maa ma pɛ a faasa lolle Wia worun.

⁸ Ma si leŋe di nuu-kala yuo diima di ma tou. Baa dagema nuhuobiine wu-jiminin, a nyisema ari wialaa si bi bubuɔsaa kenɛ. Ba to nuhuobiinee naabalima wenin a dage di-suomun wiaa nialin sii to. Wiaa deenba bi Kirisito teen lia. ⁹ Wia nagisinin kala kala hɛ Yesu nuhuobiine yara-la lɛ nɛ. ¹⁰ Ma duu si ŋaa kubala, ma bi kun-kala cheɛ ka. U nɛ kii Wia bii-bɔŋɔɔ ari Wia bii-zɔŋɔɔ ari Wia tinɔaraa kala. U nɛ kenba dolun aa benba. ¹¹ Ma di Kirisito si ŋaa kubala, u naga ari u kerin ma penee nɛ. U bi naga nuhuobiinee kerin. U nɛ ŋaa ma wuo len ma faafaa wu-kenɛ-la si bɔmɔ a ta. ¹² Wii-chuɔle liin ba si foma, u naga ma di Kirisito kala nɛ ba jonɔ hugi. Wia dol-bal-la wuo chise Yesu suun lɛ. A tin ma si laa wiin deen dii, ma duu kala nɛ sii suun lɛ. ¹³ Ma faafaa wu-kenɛ ari ma haacheba nɛ leŋe ma naga ari ma suba. Ama Wia si leŋe Yesu sii suun lɛ, ma ma ken miisinin. U jon la haacheba kala a chɛla. ¹⁴ La chei u niin wialaa kala u si ŋmunsa, ka u bi leŋe la tel. Kirisito si suu daa-gɛsɛɛ nyun nɛ kpu wialaa la si ŋaa ta. ¹⁵ U liise Sitaani ari Wia bii-bɔŋɔɔ kala dolun. U kenba muuri ni-dan tuɔŋ. U si suu daa-gɛsɛ-la nyun ŋaa u juɔsɛ ba nyun, ari niila sii juɔsɛ u ni-yuo-diilee nyun nii.

¹⁶ Ma si leŋe di ba bil kisinnin pima a tin kudiilee koo ku-nyualaa koo tapulaa lɛ a jon cheerin pima. ¹⁷ Kisinnin deenba naga ku-la si jan ko daaliiminin nɛ. Ku-la titia nɛ ŋaa Kirisito. ¹⁸ Ma si leŋe di nuu-kala jon cheerin pima a pesema lɛ di ma ken ma titia a muuri, a chuchuɔle Wia tinɔaraa. Niaa deenba ken wialin ba si na a nage duosoo tuɔŋ a kaa lɛɛ. Ba bi wii-kala ŋaa an bibigisi ba titia lɛ. Ba yie ŋaa nii a tin ba si yie biine ba yaraa wiaa

nɛ. ¹⁹ Ba bi Kirisito ɛ mɛrɛ, nii-la si ɲaa la nyun. U nɛ ɲaa Wia niaa waau ɛ ari Wia sɪi che ɲii. Ba waau ɛ ari nuhuobiine yaraa hangbeli-susugusun ari poloo si mɛrɛ dɔŋɔ ɛ a waa ɲii, aŋ ka nyun ɲaa ba dolun tiina.

²⁰ Ma di Kirisito si suba ɲii, u maga di ma liisɛ ma titia di-suomun wiaa, niaa fa sɪi to. ɲii wiaa, ma sɪi ma titia joŋo to kisinnin ɛ a nage ari ma haa to dunia wonɓiin nɛ. Kisinni-la nɛ ɲla: ²¹ Ma sɪi kiaa dɔŋsun kpagu, ma sɪi kiaa dɔŋsun dii, ma sɪi kiaa dɔŋsun digu. ²² Ma sɪi kudiile-la kisinni-la to. Kudiile-la ma sɪi dii, ba jan dɛrɛ ma yaraa ɛ. Nuhuobiinee nɛ dage kisinnin deenba. ²³ Ba daginnin deenba yie nage ba keŋ wu-jimin. Ba yie dage di niaa to ba-na Wii-chuɔle wonɓiin, a bul di ba muuri ba titia, aa dɔgise ba yaraa. Daginnin deenba bi jan wuo ɲaa di niaa len ba yaraa wu-chooloo a ta.

3

¹ Ma di Kirisito kala si sii suun ɛ nɛ ɲii, maa che wialaa si he Wia-jan, lee-la Kirisito si hoŋ u kuori-kpasa ɛ Wia sɛmɛ. ² Ma joŋ ma nyun kala he wialin si he Wia-jan ɛ, aŋ sɪi ma nyun joŋo he dunia wiaa ɛ, ³ bɛɛ wiaa u naga ma suba nɛ. Ka ma miisin faa Kirisito ɛ. U nɛ he Wia teen. ⁴ Kirisito nɛ ɲaa la miisin. Bua-la ɛ u si jan miira ko, niaa jan na ma duu kala di maa kpaa u yiri-bal-la.

Ma kpu dunia wialaa si hema ɛ a ta

⁵ U maga di ma kpu dunia wialaa kala si hema ɛ a ta nɛ. Ba nɛ ɲla: Ba-chorun ari ha-chorun wu-ɲaalaa, disinnin ɲaanin, wu-liilin ɲaanin, wu-bɔŋɔɔ biinin, tuɔ-lun wuɲaalaa. Tuɔ-lun wuɲaalaa-na paala nage vuiaa kpaarin nɛ. ⁶ Wia jan dɔgise nialaa [si bi u niin seye] aŋ ɲiɲaa wiaa deenba. ⁷ Ma ma fa he nialaa tuɔŋ nɛ a venɛɛ ɲaa wiaa deenba. ⁸ Ama leeɛ u maga di ma joŋ wiaa deenba kala ta. Ba nɛ ɲla:

Baanin nanin, baanin fiisin, wu-bɔŋɔɔ ɲaanin niaa ɛ, hari-gaarin, wu-liilin bulun. ⁹ Ma sɪi wiaa nyia a pi dɔŋɔ, bɛɛ wiaa ma joŋ ma faafaa wu-bɔmɔ-la ma fa sɪi ɲaa ta nɛ ¹⁰ aŋ leeɛ tuto wu-kenɛ-la si zomɔ. Wia ɲaa ma waa wu-kenɛ deenba tuɔŋ di ma wuo jin u wiaa worun a ku nage u titia nagisin. ¹¹ Niaa deenba tuɔŋ u bi wii kenɛ di ma ɲaa juu tinɲaa koo ma bi juu tinɲaa ɲaa, di ma kerɪ ma penɛ koo ma bi ma penɛ kere, di ma ɲaa nuhuɔraa koo ni-gollo baaraa, di ma ɲaa yosun koo di ma tii ma titia, Wia niaa tuɔŋ wu-nyun nɛ ɲaa Kirisito.

¹² Wia liisɛma a len ma ɲaa u niaa. U choma. ɲii wiaa, ma len di maa fa niaa nennige a keŋ zile, a keŋ ma titia muuri, a ɲaa chim, a keŋ kenyiri. ¹³ Ma keŋ piina ari kenyiri ma dɔŋsun teen. Di ma keŋ wii ari dɔŋɔ maa, ma joŋo che dɔŋɔ. La Tiina si joŋ ma haacheba chema, ma ma joŋo che dɔŋɔ ɲii. ¹⁴ Wu-nyun nɛ ɲla: Ma cho dɔŋɔ. Chonun nɛ jan pima dolun di ma wuo kaa ɲaa wiaa deenba kala worun. ¹⁵ Ma hoŋ ari yarifiɛlaa a keŋ nii-bala Kirisito si pima. Wia yirema di ma hoŋ ɲii a tin ma si ɲaa kubala. Ma lolle Wia ¹⁶ a len di wialaa kala Kirisito si bula he ma tuɔŋ worun. Ma kpurise dɔŋɔba digilaa aa dage dɔŋɔ ari wu-jimin. Ma yii yiila-la si he Wia tenin tuɔŋ, ari Wia niaa yiilaa dɔŋsun, ari yiilaa Wia Din-zɔŋ-la si dagema. Ma yii ɲii a pi Wia a lolle ma tuɔsaa ɛ. ¹⁷ Wialin kala ma sɪi ɲaa ari wialaa kala ma sɪi bul, ma ɲaa ba kala la Tiina Yesu dolun ɛ a lolle la Nyimma Wia u dolun ɛ.

Wia niaa si maga baa ɲaa ɲii dɔŋɔba ɛ

¹⁸ Haalaa, ma to ma balaba niin a tin ma sɪi to Wia. ¹⁹ Baalaa, ma cho ma haalaa, ma sɪi ba nyun teru. ²⁰ Hanɓiisin, ma to ma naanba ari ma nyimmaba wii-na kala ɛ, ɲii niu tore Wia tuɔŋ. ²¹ Nyimmaba, ma sɪi ma biirin walimu kinkeŋ di ba yaraa

yuore. ²² Yosun, má to nialaa si n̄aa ma tin̄naa dunia le wii-na kala le. Ma sí leje di ma tin̄ worun̄ bua-la le ma tin̄naa sí ben̄ma dun̄dun̄, a sí che di ma tin̄ di ba besema le. Ama má tin̄ ari tuo-bala a tin̄ ma síi fá Wia. ²³ Tin̄timii-la kala ma síi tin̄, má tin̄ ari tuo-bala a nage ma tima pipi Wia ne, nuhuobiinee dee. ²⁴ Ma sí yu ari Wia jan̄ tin̄ ma time, kialin̄ u si bil u niaa le Wia-jan̄ le. La Tiina Kirisito ne ma tin̄ tin̄tin̄na-la a pipa. ²⁵ Wu-bon̄ n̄inaaraa ma jan̄ laa ba time a mage ba wu-bom̄o-la ba si n̄aa le. Wia sipaan̄ tuo nii-la n̄ si n̄aa le.

4

¹ Yosun̄ tin̄naa, má to wutitii a jon̄ mage nii si maga a pi ma yosun̄, an̄ sí yu ari ma ma ken̄ Tiina ne Wia-jan̄ le.

² Má chuole Wia bua-na kala a sí len̄, a p̄o ma titia le, aa lolle Wia.

³ Má pe chuole Wia pipila maa, di Wia wuo suri won̄biin̄ pila di la wuo bul Kirisito wialaa fa si faa, ⁴ a polli worun̄ nii mi si maga di mi bul. Ba wiaa ne tii ba ken̄mi to dia.

⁵ Di ma he nialaa si bi Yesu niin̄ to tuon̄, má ken̄ ma titia a jin̄ won̄biin̄-la ma si jan̄ to. Bua-na kala le di ma ne na won̄biin̄, má bul wiaa piba an̄ pe n̄aa wu-zon̄n̄o. ⁶ Má len̄ di ma wu-bulaa kala sin̄ a ken̄ bubuosa, di ma wuo jin̄ nii ma si jan̄ to a wuo chaare nuu-kala wiaa siaa pu.

Chuolaa

⁷ Tikikas jan̄ bul mi wiaa kala pima. U n̄aa la naan̄bii-choolii ne, a n̄aa Wia tin̄tinni-titii, a n̄aa la tin̄tinni don̄o ma Kirisito tin̄tin̄na le. ⁸ Mii timu di ma jin̄ nii la si naga, di u wuo n̄aa di ma nyun̄ nyaase. ⁹ Ba di Oniisimas mii tin̄. U ma n̄aa la naan̄bii-titii-la la si cho ne a ma lii ma jan̄. Ba jan̄ bul wii-na kala si n̄aa daha a pima.

¹⁰ Arisitaakis ka chuolema. La duu kala ne ba kaa to dia. Maak-la si n̄aa Banabas naan̄bie maa chuolema. Mi laa sipaan̄ dagema

wialin̄ ma si jan̄ n̄aa le. Duu ne ko, má kenu worun̄. ¹¹ Yesu ba síi yire Jasitis ma si duu chuolema. Niaa deen̄ba batori dun̄dun̄a ne n̄aa mi tin̄tinni-don̄sun̄ a lii Juu timma-la si n̄aa Yesu yarida tuon̄, a pemi le aa bul Wia kuorii-la wiaa. Ba n̄aa mi tuon̄ fiele. ¹² Epafiras ma si lii ma jan̄ chuolema. U ma n̄aa Yesu Kirisito tin̄tinni-la don̄o ne aa tin̄ u tin̄tin̄na. U yie chuole Wia pipima ari siifesiin̄, di ma waa dere Wia wiaa le a jin̄ worun̄ wialin̄ kala Wia síi che di ma n̄aa. ¹³ Mi jan̄ wuo bula pima nii u si faasa he u dolun̄ kala a tima pima, ari nialin̄ kala si he Laadisiya ari Hiirapolis le. ¹⁴ Luuk, dokito-la la si cho ari Dimas ka chuolema. ¹⁵ Má chuole niaa deen̄ba mi si che di mi diise a pima: La naan̄biiri-la si he Laadisiya le, Nimifa ari nialin̄ si laa Yesu wiaa dii aa hilimi u dia le. ¹⁶ Di ma karime ten̄in̄ deen̄ a pi ma niaa dere, má len̄ di ba ma karime ten̄-la a pi Wia nialaa si he Laadisiya le. Ka má ma laa mi ten̄-la Laadisiya niaa teen̄ a ma karime ma tuon̄. ¹⁷ Má bula pi Akipas duu he u dolun̄ kala an̄ tin̄ Wia tin̄timii-la worun̄ u si jon̄o pu duu tin̄.

¹⁸ Leele mi-na Pool titia ní n̄mun̄se aa chuolema. Ma sí mi wiaa yu ari ba tomi dia. Wia jan̄ pema le ari u lah̄orimo.

**TEN-BUNBUN-LA PƆƆL SI
NMUNSA PI
TESALONAAKA
NIAA**

¹ Mi-na Pɔɔl ari Silivaanas ari Timoti ne nmunse tenin deen a pipi nialin si laa Yesu wiaa dii aa hilimi a he Tesalonaaka le a naa la Nyimma Wia ari la Tiina Yesu Kirisito niaa. Wia jan pema le di ma hon ari yarifelaa.

*Pɔɔl lalle Wia a mu tige
Tesalonaaka niaa le*

² La yie chuɔle la Nyimma Wia pipima kala ne. Di la nii chuɔle Wia, la yie lulollu ne a tin ma wiaa. ³ La yie liliisu nii ma sii tin u tintinɔaa a tin ma si laa Yesu wiaa dii le, ari nii ma si cho niaa, ari nii ma si ken yielaa la Tiina Yesu Kirisito le. ⁴ Mi naanbiirin, la jima ne ari Wia choma ne worun, nii ne tii u liisema di ma naa u niaa. ⁵ Bua-la le la si bul Wia wu-zomɔ-la a pima, u bi naga ari wu-bulun dunɔɔna ne la ku bula pima. La si he ma teen, Wia wu-zomɔ-la fa ken dolun, ka Wia Din-zon-la ma fa he la teen. Wialin ma si nia juu ma digilaa ne worun. La si he ma teen, ma na la mele fa si nage nii ne. Ma wiaa ne tii la ken la titia worun nii. ⁶ Ma to la wu-naalaa harin ne a to la Tiina Kirisito maa. Ma si laa wialin dii nii, ba dogisema worun, ama Wia Din-zon-la lehe ma juuɔse wialin le. ⁷ A tin wiin deen wiaa nialin kala si laa Yesu wiaa dii a he Masidoonia ari Akaaya tinteen chebema le ne. ⁸ La Tiina Wia wialin ma si nia lii ma le ne a teeli Masidoonia ari Akaaya tinteen kala le. U nii dunɔɔna ma saa dee, lee-kala baa bul wiaa a mu tige Wia wialin ma si laa dii le. Nii wiaa u bira bi maga di la bul ma wiaa pi nuu-kala. ⁹ Niaa yie bubul nii ma si kenla worun bua-la le la si ko ma teen. Ba yie bul ari nii ma si via ma vuiaa ta an birima to Wia. U

ne weye, u ne naa Wii-titii-la. ¹⁰ Maa gberɛ u Bie Yesu duu lii Wia jan ko. U ne Wia chise suun le. U ne jan laala ta tapulii-la Wia baanin si jan sii nuhuobiinee nyun.

2

*Tintimii-la Pɔɔl si tima
Tesalonaaka le*

¹ Mi naanbiirin, la fa si ko ma teen nii, ma jima u fa bi pei naa. ² An ka la ko ma teen Tesalonaaka le, la fa laa sipaan na heen ne. Ba dogisela worun Filipa tan-la le. La si che la bul Wia wu-zomɔ-la a pima maa, niaa yuga a lii la harin. Ama Wiala la si tima pipa pila nyu-duon la wuo bul u wu-zomɔ-la a pima maa. ³ La bi ma teen ko di la ku bul wialin si bi wutitii naa a pima. La bira bi tuobiin-bonɔɔ ma kaa ko. La bi maa nyisa ma. ⁴ Wia na ari la naa nititiba ne. Nii ne tii u liisela di la bul u wu-zomɔ-la a pi niaa. Wialin la sii bul, la fa bi che di la bul di niaa tuon tore la nyun. Ama laa che di Wia tuon tore wialin la sii bul le ne. U nii ben la tuobiinaa. ⁵ Ma saa jima ari la si ko ma teen, la bi nii-sima ne kaa ko. La bi ko di la bul kanfugi wiaa a laa ma kiaa. Wia ne naa la siada tiina. ⁶ La bi ma teen ko di ma niaa koo niaa donsun zizilla. La si naa Kirisito nanzooba nii, la fa jan hon ma nyun a gberema. ⁷ Ama la bi nii naa. La lehe la siaa fiele ma teen ne, ari haala si yie biben u biirin nyun nii. ⁸ La si ku choma worun, la jon la titia kala a pima ne, la bi Wia wu-zomɔ-la dunɔɔna bula pima. La naa nii, bee wiaa la di ma kala mal don ne kinken kinken.

⁹ La naanbiirin, ma jin nii la fa si faasa tin a na heen bua-la le la fa sii bul Wia wu-zomɔ-la aa pima. La tin wiiheye ari titanin kala ne, di la si ma nyun hon a gberema. ¹⁰ Ma di Wia kala jan naa la siada tinnaa ari la fa si he ma nialin si laa Yesu wiaa dii teen, la wu-naalaa kala fa to Wia

won̄biin̄ n̄e a ɲaa wutitii. La bi wii-kala ɲaa chei. ¹¹ La si h̄e ma teen̄, la k̄eɲma, ari han̄biisin̄ nyimma si yie k̄eɲ u han̄biisin̄ ɲii n̄e. Ma jin̄ ɲii la si chagile ma kuɲ-kala di ma wuo to wutitii-la a wuo leɲ ma nyuɲ nyaase. La bira sulma ¹² di ma leɲ di ma m̄eɛ z̄oɲ Wia sipaan̄. Wia n̄e yirema di ma ku juu u kuorii-la tuɔɲ aɲ p̄e na u tula.

¹³ A tin̄ wiin̄ deen̄ wiaa, la yie lul̄l̄le Wia n̄e bua-na kala. La si k̄eɲ Wia wialin̄ ku bula pima maa, ma laaba a seiba n̄e. Ma bi biina ari ba ɲaa nuhuobiine wiaa, ama ma seiba ari ba sene ɲaa Wia wiaa n̄e. Ma nialin̄ si laa Yesu wiaa dii, Wia niin̄ wiaa deen̄ba leɲ ma chin̄ kpan̄ kpan̄ wialin̄ ma si laa dii le.

¹⁴ Mi naan̄biirin̄, ma ma ku nage nialin̄ si laa Yesu wiaa dii aa hilimi aa to Yesu Kirisito, a h̄e Judiya tin̄teen̄ le. H̄eɛ-la ba si na, u titia n̄e ma ma na. Juu tin̄ɲaa si d̄ogise ba tuɔɲ nialin̄ si laa Yesu wiaa dii Judiya tin̄teen̄ le ɲii, ɲii n̄e ma ma na h̄eɛɛ ma taɲ niaa nisin̄ le. ¹⁵ Juu tin̄ɲaa deen̄ba n̄e kpu la Tiina Yesu ari nialin̄ fa s̄ii bul wiaa, Wia Diɲ-z̄oɲ-la doluɲ le. Ba to naasin̄ d̄ogisela maa. Wia tuɔɲ bi ba nyuɲ t̄oɔ. Ba hosi nuu-kala nyuɲ. ¹⁶ Ba paala pugila, di la s̄i Wia wiaa bula pi nialin̄ si bi Juu tin̄ɲaa ɲaa di Wia laaba ta. Wu-b̄om̄o-la ba si ɲaa, ba tuɔɲ wu-b̄omuɲ n̄e ɲla. Ama l̄eɛɛ Wia baan̄in̄ sii ba nyuɲ n̄e.

P̄ool bul duu cho duu miira mu na Tesalonaaka timma-la

¹⁷ Mi naan̄biirin̄, la si p̄ore d̄oɲo le, u bi diene, ka laa biine ma wiaa. La si bi maa na ɲii, ɲii n̄e la faa che la ku nama ari siifiesin̄. ¹⁸ Min̄a P̄ool titia paala nerike nerike n̄e di mi bira ku nama, ama Sitaani t̄o la won̄biin̄. ¹⁹ La yielaa hema le n̄e. La tuɔɲ t̄ore ma nyuɲ. Di la Tiina Yesu n̄e miira k̄o, a tin̄ ma wiaa la jaɲ bigisi la titia le. ²⁰ Ma n̄e laa yirin̄ pila. A tin̄ ma wiaa la yie jujuose n̄e.

3

¹ La si walima ka di la ku nama, ɲii n̄e la biine ari u jaɲ pela le di la n̄e h̄oɲ Aten̄ taɲ-la le, ² aɲ tin̄ la naan̄bie Timoti duu ku nama. U tima pipi Wia n̄e aa bul Wia wu-z̄om̄o-la si tige Kirisito le n̄e a pima. U pema le di ma chin̄ wialin̄ ma si laa dii le woruɲ a wuo leɲ ma nyuɲ nyaase. ³ Ma s̄ii na h̄eɛɛ ɲii, u jaɲ pema le di nuu-kala boye s̄i juoɲ a mu tige h̄eɛ-la ma s̄ii na le. Wia n̄e liisela la na h̄eɛ-la. ⁴ La fa si h̄e ma teen̄, la laa sipaan̄ bula pima ari la jaɲ na h̄eɛɛ. Wialin̄ la si bula pima ku ɲaa wutitii n̄e. L̄eɛɛ ma naba n̄e.

⁵ Mi si nyalima l̄ol di mi ku nama, ɲii n̄e mi tin̄ Timoti di mi jin̄ ɲii ma si china a mu tige wialin̄ ma si laa dii le. Mi fá fawulluɲ ari Sitaani jaɲ magisema a ɲaa di ma joɲ wialin̄ ma si laa dii ta. Di ma n̄e ɲaa ɲii, tin̄timii-la la si tima ma teen̄ jaɲ ɲaa p̄ei. ⁶ Ama l̄eɛɛ Timoti si lii ma teen̄ k̄o, u k̄eɲ wu-z̄oɲ n̄e ku bula pila. U bula pila ari ma chin̄ wialin̄ ma si laa dii le n̄e a cho niaa maa. U bira bula pila ari ma yie liliisi la wiaa n̄e woruɲ bua-na kala le, a fa cho di ma nala, ari la ma s̄ii cho di la nama ɲii. ⁷ Mi naan̄biirin̄, laa na h̄eɛɛ n̄e ka wiaa wiwalimela. Ama la si nia ari ma chin̄ ma yarida le ɲii, la tuɔɲ pin̄ di-bala n̄e. ⁸ Di ma n̄e chin̄ ma yarida le, l̄eɛɛ-na la na wiese n̄e.

⁹ La bi jaɲ wuo l̄olle Wia a mu d̄ere a tin̄ ma wiaa. La yie jujuose Wia sipaan̄ n̄e a tin̄ ma wiaa. ¹⁰ Laa sul Wia n̄e woruɲ titan̄in̄ ari wiiheye kala di la wuo ku nama, a wuo pema le di ma na kialin̄ si ka a tige ma yarida le. ¹¹ Laa sul la Nyimma Wia ari la Tiina Yesu di ba che won̄biin̄ pila di la k̄o ma teen̄. ¹² La biraa sul la Tiina Yesu duu pema le di ma wasa cho d̄oɲo, di ma cho d̄oɲo kin̄k̄eɲ a cho nuu-kala, ari la si choma ɲii, ¹³ aɲ bira sulu duu leɲ di ma k̄eɲ doluɲ ma tuɔɲ le, a k̄eɲ tuɔ-pula la Nyimma Wia sipaan̄, a s̄i wii-kala k̄eɲ tapulii-la la Tiina Yesu ari u niaa si jaɲ miira k̄o.

4

Wialin sí tǝre Wia tuɔŋ

¹ Mi naanbiirin, wialin mi sí che di mi bul wu-kaanin ne ɲla: Laa sulma la Tiina Yesu dolun le di ma len di ma mele zɔŋ, di Wia tuɔŋ tǝre ma nyun. Ma na ɲii la fa sí ken la titia ma teen. Ma gunne meli-zɔŋ-la la teen. Ma mele si zɔŋ ɲii, má ɲaa ɲii a pipe. ² Ma jin wialin la Tiina Yesu si joŋo pila di la ma joŋo dagema. Má to wiaa deenba. ³ Wialin sí tǝre Wia tuɔŋ ne ɲla, di ma sí disinnin ken. U cho di ma liise ma titia ha-chorun ari ba-chorun wu-ɲaalaa le. ⁴ Nuukala maga duu to Wia wonbiin le a jaa haala, di Wia tuɔŋ tǝre. Duu ne to ɲii, nuukala jan ziluu a na duu bi disinnin kala kene wiin deen le. ⁵ Ma sí ma tuɔtǝre wu-ɲaalaa le to a gollo chiche haalaa ari nialin si bi Wia jin sí ɲaa ɲii. ⁶ Bira nuukala sí wii ɲaa chei u doŋo tiina a tige u haala le. La chaasa bula pima ne faafaa kala ari Wia jan dogise nialin si ɲaa disinnin a tige haalaa le. ⁷ Wia bila liisa di la ɲinaa wuliin, ama u liisela di la ɲaa tuɔ-pul timma ne. ⁸ Nii-la kala si via wialin mi si bula, nuhuobiine dee tiina via, Wia ne u via ɲii, nii-la si joŋ u Din-zɔŋ-la pima.

⁹ Mi naanbiirin, u bi maga di mi ɲmunse tenin a bula pima ɲii ma si jan cho doŋo, beɛ wiaa Wia titia dagema ɲii ma si jan cho doŋo ne. ¹⁰ Wutitii, ma paala cho nialin kala si laa Yesu wiaa dii a he Masidoonia le ne. Mi naanbiirin, la saa sulma di ma wasa cho niaa kii ɲii. ¹¹ La laa sipaan bula pima di ma he ma dolun kala a fiela hoŋ, a biben ma titia tintinɲaa nyun a wuo nina ma kucheele. ¹² Di ma ne ɲaa ɲii, nialin si bi Wia wiaa laa dii jan zizilma. Ma bi jan hoŋo gberɛ nuu duu pima ma kucheele.

¹³ Mi naanbiirin, laa che di ma jin wutitii-la a mu tige nialin si suba le, di ma tuɔŋ sí faasa chei a nage nialin

si bi kuŋ-kala ka yiele tuɔŋ si chei ɲii. ¹⁴ La si laa dii ari Yesu suba ne an sii suun le, ɲii titia ne la ma laa dii ari Wia jan chise nialin si laa Yesu wiaa dii an suu.

Yesu jan chise nialin si laa u wiaa dii suun le

¹⁵ La Tiina Yesu dagela ɲla: La nialin si laa Yesu wiaa dii a he la miisin le tapulii-la la Tiina Yesu si jan miira ko, la bi jan laa nialin si suba sipaan a mu Yesu teen. ¹⁶ Bua kubala la Tiina Yesu jan lii Wia-jan a ku tuu dunia. Bua-la le niaa jan nii duu faasa kpia goŋ. Wia tinɲaara kuhian ma jan kpia, ka di ba ɲmuu Wia nyile-la maa. Nialin kala si laa Kirisito wiaa dii an suu, u jan laa sipaan chiseba di ba sii suun le. ¹⁷ La nialin si he la miisin le, u jan kesela kaa pe nialin u chisa suun le, di la kala cheŋ la Tiina Yesu duonbilingbaanaa tuɔŋ wia nyun. La jan he la Tiina teen a kaa mu wuu. ¹⁸ Má bul wiaa deenba a pi doŋo di ma tuɔsaa pin di-bala.

5

Má ɲaa siri a gberɛ tapulii-la la Tiina Yesu si jan miira ko

¹ Mi naanbiirin, u bi maga di mi ɲmunse a bula pima a dagema tapulii-la ari bua-la le wiaa deenba si jan ɲaa, ² beɛ wiaa ma titia jima worun di la Tiina Yesu níi ko tapulii-la, u jan di-ma le, ari gaara si yie guu ko ɲii titanin. ³ Bua-la le niaa si jan biine ari lerin fiela ne di wii-kala tuo, wahala jan guu a juuba. Nuukala bi jan wuo fá lel. U jan nage ari haala si ken luorun, u luorun sii a wiwiiu le duu lul.

⁴ Ama mi naanbiirin, ma-na tuo birimin tuɔŋ. Ma sí lenɛ di bua-la guu ku di-ma le, ari gaara si yie juu gaa niaa kaa a di-ba le ɲii. ⁵ Ma kala ɲaa nialin si he pulumun tuɔŋ ne. La tuo titanin, la tuo birimin tuɔŋ. ⁶ Nii wiaa, u bi maga di la pin doŋ ari nialin si bi la Tiina gberɛ sí ɲaa ɲii. Ama u maga di la wei a ken

la titia wii-na kala ɛ. ⁷ Titanjɛn nɛ niaa pipinj donj. Titanjɛn ma nɛ niaa nyua sininj bubugi. ⁸ Ama la-na hɛ pulumun tuɔn nɛ, njii wiaa u maga di la kɛn la titia wii-na kala ɛ nɛ. Wialinj la si laa dii ari la si cho niaa njii, má lej di ba nage kiaa la si jonjo to la boisinj. La síi yiele di Wia laala ta njii, má lej duu nage hɔɔn nyun-chuulo di la chu, ⁹ bɛɛ wiaa Wia bila liisa duu na baaninj la nyun. Ama u liisela duu to la Tiina Yesu Kirisito ɛ nɛ a laala ta. ¹⁰ La wiaa nɛ tii u suu, njii wiaa, di la nɛ suba koo di la nɛ weye, la kɛn miisinj u teenj. ¹¹ A tinj wiinj deenj wiaa, má nɛa di ma donsun tinjɛn nyun nyaase, a pipe donjo ɛ di ma wasa nɛa Wia yarida. Wialinj titia nɛ ma nɛa lɛɛɛ.

¹² La naanbiirinj, nialinj la Tiina Kirisito si liisa di ba titinj ma teenj an pɛ nɛa nihiasinj ma teenj aa dagɛma Wia wiaa, u maga di ma zizilba. ¹³ Má zizilba a choba worunj a tinj tintimii-la ba síi tinj wiaa. Má hɔn sɔm a nɛa sima donjo ɛ.

¹⁴ La naanbiirinj, laa sulma di ma kpurise yariwii tinjɛn digilaa, a pɛ fawulubaa ɛ di ba kɛn boi-duonj, a pɛ nialinj si bi faasa chinj Wia wiaa ɛ. Má kɛn kenyiri ari niaa deenjba kala. ¹⁵ Di nuu nɛ nɛa u donjo tiina wu-bɔn, u bi maga duu ma nɛa wu-bɔn-la a timu. Ama bua-na kala ɛ, má njɛn wu-zɔnɔɔ donjo ɛ ari nuu-kala ɛ. ¹⁶ Má jujuɔsɛ bua-na kala ɛ ¹⁷ a chuchuɔɛ Wia bua-na kala ɛ. ¹⁸ Wii-na kala ɛ, má lolle Wia. Ma si laa Yesu Kirisito wiaa dii njii, njla nɛ Wia cho di maa nɛa.

Pɔɔl chagile Tesalonaaka tinjɛn a chuɔɛba

¹⁹ Wia Din-zɔn-la tintinjɛn nage nyininj. Ma síu disu. ²⁰ Ma sí wialinj ba si bula Wia Din-zɔn-la dolunj ɛ via. ²¹ Ama má magise wii-kala na, a liise ku-la si zɔmɔ a kenu worunj. ²² Má liise ma titia wu-bɔn kala ɛ. ²³ Mii sul Wia-la síi pi niaa yarifiɛlaa duu lej di ma wasa kɛn tuɔ-pula. U janj benj ma tuɔbiinaa ari ma yaraa kala a liisɛma wu-bɔn-na kala ɛ, di

ma wuo nɛa ni-zɔnɔɔ a sí disinninj kɛn, a mu yi tapulii-la la Tiina Yesu Kirisito si janj kɔ. ²⁴ Nii-la si yirema nɛa Wutitii Tiina nɛ, u janj benjma.

²⁵ La naanbiirinj, má ma sul Wia pila. ²⁶ Má guori donjo a chuɔɛ la naanbiiri-la kala worunj.

²⁷ Mii kpurise ma digilaa Wia dolunj ɛ di ma karimɛ teninj deenj a pi la naanbiiri-la kala.

²⁸ La Tiina Yesu Kirisito lahɔrimɔ ɛ, u janj pɛma ɛ.

TEN-LIA-LA PƆƆL SI N̄MUNSA PI TESALONAAKA NIAA

¹ Mi-na PƆƆl ari Silivaanas ari Timoti n̄ n̄munse teniŋ deenŋ pipi ma nialinŋ si laa Yesu wiaa dii aa hilimi Tesalonaaka le, a ŋaa la Nyimma Wia, ari la Tiina Yesu Kirisito niaa.

² La Nyimma Wia janŋ pema le a lenŋ ma hɔŋ ari yarifiɛlaa u dolunŋ le, ari la Tiina Yesu Kirisito dolunŋ le.

Tapulii-la Yesu si janŋ miira kɔ, nialinŋ si na hɛɛŋ u wiaa, ba tuɔŋ janŋ tɔɛ

³ Mi naanbiirinŋ, ma wasa chinŋ ma yarida le a wasa cho dɔŋɔ kinŋen kinŋen. Ma si ŋaa nii, u ŋaa la tintimii n̄ di la lɔlle Wia a pima. ⁴ Di la n̄ bul ma wiaa nialinŋ si laa Yesu wiaa dii aa hilimi leree dɔŋsunŋ, la yie bigisi la titia le a tinŋ ma wiaa, b̄ɛ wiaa ba si to naasinŋ dɔgisema, ma na hɛɛŋ, aŋ ka ma nyalime a chinŋ ma yarida naanŋ le.

⁵ Ma si na hɛɛŋ a tinŋ Wia kuorii-la wiaa n̄, Wia to wutitii-la a liisema ta, a lenŋ di ma wuo juu u kuorii-la tuɔŋ. ⁶ Ama u janŋ dɔgisema nialinŋ si dɔgisema mageŋ nii kala ba si dɔgisema mageŋ. ⁷ U janŋ pila wiese a pima ma wiese. Wiinŋ deenŋ janŋ ŋaa bua-la le la Tiina Yesu si janŋ kɔ ari u tinŋdaara-la. Ba n̄ kenŋ dolunŋ. ⁸ U si janŋ kɔ, u janŋ nageŋ nyin-gelinŋ a dɔgisema nialinŋ si bi Wia jinŋ ari nialinŋ si bi Wia wu-zɔmɔ-la si tige la Tiina Yesu le ka to. ⁹ Wia janŋ dɔgisema di ba suu. Suu-la bi janŋ d̄ɛɛ. Ba bi janŋ wuo mu la Tiina Yesu teenŋ. Ba bira bi janŋ wuo na u tula ari u dolunŋ. ¹⁰ Tapulii-la u si janŋ kɔ, Wia niaa kala janŋ pu yirinŋ. Nialinŋ kala si laa u wiaa dii ma janŋ zizilu. Ma ma janŋ h̄ɛ ba tuɔŋ, b̄ɛ wiaa ma laa wialinŋ la si bula pima dii n̄.

¹¹ A tinŋ wiinŋ deenŋ wiaa la yie chuɔle Wia pipima bua-na kala le n̄. La sul Wia duu lenŋ di ma wuo

juu u kuorii-la tuɔŋ, a lenŋ di ma wuo ŋinŋaa wu-zɔmɔ-la ma si cho, a wuo chinŋ ma yarida naanŋ le a mu d̄ɛɛ. La sulu duu ŋaa nii u dolunŋ le. ¹² La bira sul Wia di la Tiina Yesu yirinŋ toma le a yire, di ma ma laa yirinŋ u teenŋ. Wiinŋ deenŋ janŋ ŋaa la Nyimma Wia ari la Tiina Yesu Kirisito lahɔrimɔ le.

2

Di Yesu n̄ kɔ, u janŋ nyage wu-bɔŋŋɔɔ kuoru-la a ŋmuure

¹ Mi naanbiirinŋ, mii che di mi bul la Tiina Yesu Kirisito si janŋ miira kɔ wiaa n̄ a pima. Duu n̄i kɔ, u janŋ lenŋ la hilimi a chemu. ² Nii wiaa, ma s̄i lenŋ di ma tuɔbiinaa guu vugime koo di ma bɔye jonŋ di nuu n̄ si ari tapulii-la Yesu si janŋ kɔ yie n̄. N̄ bi pɔɔ nuu janŋ lii ma tuɔŋ a bul di Wia Din-zɔŋ-la bula pu ari Yesu kɔ n̄, koo nuu s̄i bul Wia wiaa ma janŋ wuo bul nii pima, koo niaa janŋ nyia wiaa bul ari la n̄ n̄munsa pima ari Yesu kɔ n̄. ³⁻⁴ Ma s̄i lenŋ di nuu-kala nyisema wonbii kala le. Tapulii-la bi janŋ yi, see di niaa sisii a ŋaa taawei a via Wia. Nii hariŋ le ni-bɔŋŋɔɔ kuoro, nii-la Wia si janŋ jonŋ h̄ɛ nyininŋ le, janŋ kenŋ u titia kaa dagema. U n̄ ŋaa nii-la si lii Wia hariŋ a kenŋ u titia a kaa yuga kii Wia ari kuŋ-kala nuhuobiine s̄i chuɔlu. U janŋ juu hɔŋ Wia-dia tuɔŋ a bul ari u n̄ ŋaa Wia. ⁵ Ma bi liise yi ari mi si kɔ ma teenŋ, mi bul wiaa deenba pimaa? ⁶ Wii n̄ tii ni-bɔŋŋɔɔ kuoru-la ha bi kɔ. Ma jinŋ wii-la si tii n̄. Ama di bua-la n̄ yie, ni-bɔŋŋɔɔ kuoru-la janŋ kɔ.

⁷ Niaa paala ŋinŋaa taawei n̄ aa via Wia, ama ba bi nii ŋaa niaa nina. Nuu n̄ h̄ɛ dime a kaa bil. Nii-la si kenŋ wialinŋ bil di ba s̄i ŋaa, see di u surisa a pi wonbiinŋ, ⁸ ka di ni-bɔŋŋɔɔ kuoru-la-na kɔ. Bua-la le la Tiina Yesu janŋ miira kɔ ari u tula, a puuse u niinŋ pelinŋ a kpu wu-bɔŋŋɔɔ kuoru-la. U tula-la janŋ nyage wu-bɔŋŋɔɔ kuoru-la a ŋmuure. ⁹ Ni-bɔŋŋɔɔ kuoro janŋ kenŋ Sitaani dolunŋ

a kɔ. U jaŋ nyise niaa ari wu-magilaa ari wu-kpuŋkperisiŋ. ¹⁰ U jaŋ keŋ wu-boŋ-na kala kaa kɔ a nyise nialiŋ si jaŋ lel, beɛ wiaa ba via di ba cho wutitii ne di Wia laaba ta. ¹¹ Ba si via wutitii-la nii, Wia piba woŋbiin ne di ba tuto wu-nyiarin hariŋ. ¹² Nii-la kala si bi wutitii-la cho aŋ cho wu-boŋŋɔɔ, Wia jaŋ dii u sariya a joŋ cheerin pu a leŋ duu suu.

¹³ La naaŋbiirin, la yie lolle Wia pipima bua-na kala le, ma nialiŋ la Tiina Yesu si cho. Buŋbuŋ kala ne Wia liisema duu laama ta. Wia to u Diŋ-zɔŋ-la doluŋ le duu leŋ di ma ŋaa tuɔ-pul timma a tin ma si laa wutitii-la dii wiaa. ¹⁴ Wia wu-zɔmɔ-la la si bula pima, Wia tou le ne a yirema. Wia yirema di ma ku to keŋ la Tiina Yesu Kirisito tula-la ne. ¹⁵ Nii wiaa mi naaŋbiirin, má chin wutitii-la le la si dagema ari wialiŋ la si ŋmuŋsa pima.

¹⁶ La Tiina Yesu Kirisito ari la Nyimma Wia lahorimo le, u chola a wuo ŋaa la tuɔŋ piŋ di-bala aa mu wuu, di la wuo yiyiele ku-zɔŋŋɔɔ. ¹⁷ Laa sulu duu leŋ di ma nyuŋ nyaase, a pima doluŋ di ma ŋiŋaa wu-zɔŋŋɔɔ aa bul wu-zɔmɔ-la maa.

3

Pɔɔl bula pi niaa di ba chuɔle Wia pu

¹ Mi naaŋbiirin, wialiŋ mi sí che di mi bul u diderin ne ŋla: Má chuɔle Wia pila di la Tiina niin wiaa wuo teeli lee-na kala a laa yirin, ari u si laa yirin nii ma teen. ² Má bira chuɔle Wia a pipila, di Wia wuo liisela ni-boŋŋɔɔ nisiŋ le, beɛ wiaa niaa kala dee bi Wia niin wialiŋ laa dii. ³ Ama la Tiina Yesu keŋ zile. U jaŋ pima doluŋ a liisema Sitaani nisiŋ le. ⁴ La Tiina Wia leŋe la ŋaama yarida, la saa laa dii ari wialiŋ la si bula pima, maa ŋaaba ne. La bira laa dii ari ma jaŋ keŋ nii naaŋ le aa mu. ⁵ Mii sul la Tiina Wia duu leŋ di ma wuo jin ma tuɔŋ le ari u choma woruŋ. Mii sulu duu

leŋ di ma wuo keŋ kenyiri Kirisito doluŋ le.

Nuu-kala bi maga duu keŋ yari-wiin

⁶ Mi naaŋbiirin, la Tiina Yesu Kirisito doluŋ le, la bula pipima di ma liise ma titia nialiŋ si he ma tuɔŋ a keŋ yariwiin le, nialiŋ si bi wialiŋ la si bula pima ka to. ⁷ Ma titia jima ari u maga di ma ŋaa wialiŋ titia la sí ŋaa. La si kɔ ma teen, la fa bi yariwiin kene. ⁸ La fa bi nuu-kala kudiilee die di la bi tiina time. La tima ne woruŋ siifesiŋ, a na heeŋ wiiheye ari titaŋin kala di la wuo nina la ku-cheele, di la sí hoŋo gberɛ ma kuŋ-kala aa che kiaa ma teen. ⁹ La si ŋaa nii, u bi naga ari la bi woŋbiin kene di la laa kiaa ma teen ne. Ama la faasa tin nii di ma wuo to la naa-buasun ne. ¹⁰ La fa si he ma teen, la bula pima di nuu-kala ne bi tintinŋaa ka tin, u bi maga duu dii kudiilee. ¹¹ La nia ari yariwii tinŋaa he ma tuɔŋ. Ba bi tintimii ka tin, see di ba joŋ ba niin he niaa wiaa le. ¹² La Tiina Yesu Kirisito doluŋ le la bula pi niaa deenba aa kpurise ba digilaa ne di ba keŋ ba titia woruŋ a tin tintinŋaa a wuo na ba titia kudiilee didii. ¹³ Ama la naaŋbiirin, ma sí lol wu-zɔŋŋɔɔ ŋaaniŋ le.

¹⁴ Di nuu ne he ma tuɔŋ a bi wialiŋ la si bula pima tenin deen tuɔŋ ka to, má jin u tiina a liise ma titia u le, a leŋ di hiisiŋ kenu. ¹⁵ Ma sí wiaa ŋiŋaau le ari u ŋaa diŋdɔŋ ne. Ama má leŋ ari u ŋaa ma naaŋbii ne aŋ kpurise u digilaa.

Wu-kaaniŋ

¹⁶ Laa sul la Tiina Kirisito, nii-la si keŋ yarifielaa, duu pima yarifiela-la bua-na kala le. La Tiina Kirisito pe ma kala le.

¹⁷ Mi-na Pɔɔl titia ne ŋmuŋse ari mi nisiŋ aa chuɔlema. Mi venɛɛ ŋaa nii mi tenniŋ kala le, a dage nii ari mi ne ŋmuŋse tenin deen. ŋla ne mi yie ŋmuŋse ten-la le. Mii chuɔlema.

¹⁸ La Tiina Yesu Kirisito lahõrimõ læ,
ma jaŋ hõŋ ari yarifielaa.

TEN-BUNBUN-LA PÓOL SI N̄MUNSA PI TIMOTI

¹ Mi-na Póol ne n̄munse tenin deen̄. La Tiina Wia ari Kirisito Yesu tuótórun̄ le ne ba liisemi di mi n̄aa Kirisito Yesu nan̄zoo. Wia ne laala tita. Kirisito Yesu le ne laa yiele.

² Mi n̄munse tenin deen̄ a pipi n̄-na Timoti ne. A tin̄ n̄ si laa Kirisito wiaa dii le, n̄ n̄aa mi bii-titii ne. La Nyimma Wia ari la Tiina Kirisito Yesu lahórimo le, ba jan̄ fáñ nennige a len̄ di n̄ hōñ ari yarifielaa.

Má pō ma titia le a mu tige nialin̄ s̄ii dage wu-nyiarin̄ le

³ Bua-la le la fa si he Efesis le, mi bula pin̄ di n̄ hōñ dime, an̄ ka di mi mu Masidonia tin̄teen̄. Mi bula pin̄ di n̄ hōñ dime a wuo p̄e Wia niaa le. Niaa dōñsun̄ ne he dime aa nyiseba. Ba bi wutitii jon̄oo dageba. Mi bula pin̄ di n̄ bula pi niaa deen̄ba di ba len̄ ba wu-nyiar̄i wialin̄. ⁴ Mii che di mi bira bula pin̄ di n̄ bula piba di ba sí ba sun̄sogulo-la jon̄o he ba nyun̄ le, an̄ sí ba naabalimaba doho niaa wiaa si duomo nii diisu. Wiaa deen̄ba yie n̄aa niaa ken̄ niidolun̄ ne. Nii-dolun̄ ma bi jan̄ p̄eba le di ba n̄aa Wia yarida a laa wii-la dii u s̄ii che duu n̄aa pi u niaa.

⁵ Mi bul̄ nii pin̄ di n̄ bula piba di ba cho ba dōñsun̄ tin̄n̄aa ari tuó-pula, a len̄ di ba tuóbiinaa chesi, a bira len̄ di ba yarida wasa dol worun̄.

⁶ Niaa dōñsun̄ via wiaa deen̄ba ne an̄ miiraa bul̄ wu-yaayasin̄. ⁷ Moosis fa n̄munse wialin̄ bil di niaa tuto ne. Niaa deen̄ba fa cho di ba dage wiaa deen̄ba a pi niaa, ama ba titia bi wialin̄ ba si n̄munsa bubuon̄ jin̄. Ba bi wialin̄ ma ba síi bul̄ chaasa jin̄.

⁸ La jima ari wialin̄ Moosis si n̄munsa bil di niaa tuto, ba zom̄o ne, di niaa ken̄ba kaa titin̄ ari ba si dage nii. ⁹ U bira maga di la jin̄ ari wialin̄ Moosis fa si n̄munsa bil

di niaa tuto, u bi n̄munsa pi tuó-pul tin̄n̄aa. Ama ba n̄munsa pi nialin̄ s̄ii chei Wia nin̄ wu-bulaa ne. U bira n̄munsa pi ni-bōññoo, ari nialin̄ si bi Wia ka fá, ari haache diiree, ari nialin̄ si bi Wia ka to, ari nialin̄ s̄ii kpu ba nyimmaba ari ba naan̄ba, ari ni-kpuuraa. ¹⁰ Ba bira n̄munse wiaa deen̄ba a pi ba-liilin̄ ari ha-liilin̄ ne, ari baala-la si gollo tuu ba dōñoba bubuó-niiree, ari nialin̄ si gollo paa niaa biirin̄ a kaa faa lel. Ba bira n̄munse wiaa deen̄ba a pi wu-nyiaraa ari dan̄sia wu-nyiaraa, ari nialin̄ si bi Wia won̄bii-titii-la ka to. ¹¹ Wialin̄ mi si dagema lii Wia wuzom̄o-la tuon̄ ne, u si jon̄o pimi di mi bula pima. Wia ne ken̄ yirin̄ dunia le.

Póol lolle Wia a mu tige nennige-la u si kene u le

¹² Mii lolle la Tiina Kirisito Yesu, b̄ee wiaa u ne bene di mi maga di mi bul̄ u nin̄ wiaa pi niaa. Nii ne tii u liisemi di mi tima pu. U ne pimi dolun̄ di mi wuo titin̄ tin̄timin̄ deen̄.

¹³ Bun̄bun̄ kala ne paala mi bul̄ wu-bōññoo u le a to naasin̄ tutuusuu maa. Ka Kirisito ha fámi nennige a liisemi di mi timaa pu. Bua-la kala le mi fa s̄ii n̄aa nii, mi fa bi jin̄ wii-la mi s̄ii n̄aa. Mi fa bi u wiaa laa dii maa. Nii ne tii mi faa n̄aa nii. ¹⁴ An̄ ka la Tiina Wia ha p̄emi le kin̄ken̄ kin̄ken̄ a len̄ mi n̄aa Kirisito Yesu yarida, an̄ p̄e chou. ¹⁵ Mii che di mi bul̄ wiin̄ ne pima. U n̄aa wutitii ne. U saa maga di nuu-kala jin̄ wii-la. U ne n̄la: Kirisito Yesu ku tuu dunia ne duu laa haache diiree ta. Mi ne saa paala n̄aa ba tuon̄ ni-bomun̄. ¹⁶ An̄ ka Kirisito Yesu ha fámi nennige, mi-na nii-la si chaasa n̄aa wu-bōññoo a kii nuu-kala. U n̄aa nii a tomi le a dage niaa nii u si ken̄ kenyiri. Nii le ne niaa dōñsun̄ jan̄ to u harin̄ a laa u wiaa dii, a ken̄ miisi-la si bi dere.

¹⁷ Má len̄ di la denne la Nyimma Wia an̄ p̄e zilu a kaa mu wuu. U ne nii-la si dii kuorun̄ a kaa mu deen̄ deen̄. U-na bi suu. Niaa ma buu ka na. U dun̄dun̄a ne n̄aa Wia. Ami.

¹⁸ Timoti, mi bii, mii che di mi bul wii ne a piŋ. Nialin sii bul wiaa, Wia Diŋ-zoŋ-la dolun le fa bul wiaa a tigeŋ le. Si wialin yu. N nage laali-yuoru ne. Len di wialin ŋaa ŋ laali-yuori kiaa, di ŋ kaa wuo yuo laalin worun. ¹⁹ Di ŋ nii yuo laal-la, chin ŋ yarida naan le a len di ŋ tuobiinaa chesi. Niaa doŋsun bira bi ba tuobiinaa lee to, nii ne tii ba jon ba yarida ta. ²⁰ Haminiiyas ari Alekizanda ma he niaa deenba tuon ne. Nii ne mi jonba he Sitaani nisin le duu dogiseba, di ba gunne wu-jimin, di ba bira si Wia jonho tuusu.

2

Wonbii-la Wia niaa si maga di ba to a chuchuele Wia

¹ Siifan wii ne mii che di mi laa sipaan bula pima. U ne ŋla: Ma chuele Wia an pe susulu duu pima kialin ma sii che. Ma chuele Wia a pipi ma doŋsun tinŋaa maa, an pe lulollu. Ma bira chuele Wia a pipi nuu-kala. ² Ma chuele Wia pipi kuoroo ari nialin si ken dolun ma le, di la wuo hon som ari yarifielaa, a wuo tuto Wia a ŋŋaa wialin kala sii to Wia wonbiin. ³ U nii zomc ne a tutore la Laataara Wia tuon. ⁴ U cho duu laa nuu-kala ta ne di ba wuo jin wutitii-la si lii u teen. ⁵ U saa maga di nuu-kala jin ari Wia ŋaa Wii-bala ne. Ni-bala ne he Wia ari nuhuobiine pege duu kenba kaa he doŋc le. Nii-la ne ŋaa Kirisito Yesu. U titia ku ŋaa nuhuobiin ne. ⁶ U jon u miisin yoo suun duu laa nuu-kala ta. U ne dagela nii ari bua-la yie ne, di Wia laa nuu-kala ta. ⁷ Nii ne tii Wia liisemi di mi ŋaa u nanzoo a wuo heele bul wiaa deenba a pi nialin si bi Juu tinŋaa ŋaa, an pe dageba di ba laa wialin dii a jin wutitii. (Wutitii ne mii bul, mi bi wiaa nyia.)

⁸ Di ma ne ku hilimi lee-na kala di ma chuele Wia, mii che di baalaa ne chuchuele Wia, baala-la si jon ba titia a pi Wia a bi disinnin kene, di

ba ne ken ba nisaa jee a chuele Wia. Di ba nii chuele Wia, u bi maga di ba nina baaniŋ. U bi maga di ba bibiine yuosun wiaa maa. ⁹ Mii che di haalaa ma fiele ba siaa an pe ken wu-jimin nii ba sii laale ba genniŋ le. Genni-la ba si jan laale di niaa bibagise ba yaraa, ma siba laalu. Ma si len di niaa to ba nyusun voonun le aa bagisema, koo ma si selime digilinkpenŋin ari banzaliba-la sii tul he di niaa bibagisema. ¹⁰ Ama ma len di niaa bibagise haalaa a tin ba wu-zomc-la le. Nii jan dage ari baa to Wia ne. ¹¹ Haalaa maga di ba fiela hon ne a gugunne Wia wiaa, a ken ba titia muuri, a tuto nialin si ken dolun ba le hariŋ. ¹² Mi bi haalaa wonbiin pa di ba didage baalaa, koo di ba ken baalaa dolun a bibenba. U maga di ba hon som ne. ¹³ Wii-la si tii ne ŋla: Wia fa laa sipaan ta Adam ne an-na ta Hawa. ¹⁴ Sitaani ma bi Adam nyisa. Hawa ne u nyise u juu haache le a chei Wia niin wiaa u si bula piba. ¹⁵ Ari nii kala haala-la si jan na heen biirin lullun le, Wia jan peba le. Ama u maga di ba laa Wia wiaa dii a cho niaa, aa ŋaa wialin sii tere Wia tuon, a len di ba siaa fiele.

3

Wia niaa tuon kuhiasin si maga di ba nage nii

¹ Mi biraa che di mi bul wiin ne a piŋ. Wiin deen ŋaa wutitii ne. U maga di niaa sei wii-la. Di nuu ne fiese sii aa che duu ku ŋaa Wia niaa kuhian, tintin-fian ne u chiche nii. ² Nii wiaa di nuu ne ŋaa Wia niaa kuhian, u tiina maga duu len di u wu-ŋaalaa kala zoŋ ne, di niaa si u yirin wuo chei. U maga duu jaa ha-bala dunjun ne. U maga di u siaa fiele. Uu wuo ken u titia worun di niaa pupu jirima. U bira maga duu wuo laa nuuora ma bibil u dia le a wuo didage Wia niaa worun. ³ U bi maga duu ŋaa si-nyuaru, a si baan tiina ma ŋaa. Ama u maga

duu n̄aa ni-chim-chim n̄e a sí yuusu h̄eeru ma n̄aa. U bira bi maga duu cho moribiee k̄in̄k̄eñ. ⁴ U maga di u wuo beñ u dia n̄aa nyuñ woruñ n̄e. Bira, u maga duu wuo leñ di u han̄biisin̄ tuto u niin̄ a zizilu wii-kala le, ⁵ b̄e wiaa di nuu n̄e bi u dia n̄aa nyuñ wuo biben̄, u bi nialin̄ si laa Yesu wiaa dii aa hilimi nyuñ ma wuo beñ. ⁶ Di nuu n̄e ha bi Yesu wiaa laa dii a dieni, u bi maga di u tiina ku n̄aa Wia n̄aa kuhian̄. Di u tiina n̄e ku n̄aa nialin̄ si laa Yesu wiaa dii aa hilimi kuhian̄, u jan̄ dage u titia. Duu n̄e n̄aa n̄ii, u jan̄ tel ari Sitaani si tele n̄ii. ⁷ Wia n̄aa kuhian̄ maga duu n̄aa ni-zoñ n̄e nialin̄ si bi Wia ka chuol̄e teen̄. Di n̄ii dee n̄aa jan̄ wuo chei u yirin̄, di Sitaani to n̄ii le a bere k̄enu.

Nialin̄ sí p̄e Wia n̄aa kuhiasin̄ le

⁸ Nialin̄ sí p̄e Wia n̄aa kuhiasin̄ ma le, ba maga di ba ma keñ meli-zoñ n̄e, a sí nii-sima keñ a nyinyise n̄aa. U bi maga di ba faasa nyua sin̄in̄ koo di ba cho moribiee k̄in̄k̄eñ. ⁹ U maga di ba keñ tuobiin̄-zoñ n̄e a laa Wia niin̄ wiaa dii. Wialin̄ fa faa n̄e. L̄e l̄e Wia joño dagela. ¹⁰ U bira maga di Wia n̄aa n̄e laa sipaan̄ a beñ nialin̄ sí che di ba p̄e Wia n̄aa kuhiasin̄ le, a na di ba maga koo di ba bi maga di ba tin̄ tin̄in̄ n̄aa deen̄ba. Di ba maga, má leñ di Wia n̄aa tuoseba di ba p̄e Wia n̄aa kuhiasin̄ le. ¹¹ Haalaa maa sí p̄e Wia n̄aa kuhiasin̄ le, u maga di ba keñ meli-zoñ n̄e a sí n̄aa harin̄ ma gigaa. U maga di ba fiele ba siaa a p̄e keñ wutitii wii-na kala ba sí n̄aa le. ¹² Baalaa sí p̄e Wia n̄aa kuhiasin̄ le, u maga di ba jaa ha-bala-bala n̄e. U maga di ba wuo biben̄ ba han̄biisin̄ ari ba dia n̄aa kala nyuñ n̄e woruñ. ¹³ Di nialin̄ sí p̄e Wia n̄aa kuhiasin̄ le ní tin̄ ba tin̄in̄ n̄aa woruñ, n̄aa jan̄ zizilba. Ba jan̄ wuo keñ nyuduon̄ a bul wialin̄ ba si laa dii a tige Kirisito Yesu le.

¹⁴ Mii che di mi ku nama n̄e l̄e l̄e. Ama mi bi jin̄ di mi jan̄ dieni koo di mi bi jan̄ dieni an̄-na k̄o. N̄ii wiaa,

mi n̄mun̄se tenin̄ deen̄ pipima ¹⁵ di ma jin̄ ari Wia n̄aa mele si maga duu nage n̄ii. Wia n̄aa n̄e n̄aa nialin̄ si laa u wiaa dii aa hilimi. Wia-la si weye n̄e tiiba. Ba chin̄ wutitii-la le Wia si dageba n̄e. ¹⁶ Wutitii-la Wia si dagela sene n̄aa wu-bal n̄e. Wii-chuol̄-la la sí to fa fáa n̄e. L̄e l̄e Wia n̄e joño dagela. U n̄e n̄la:

Wia birime nuhuobiine n̄e a ku tuu dunia.

Wia Din̄-zoñ-la ma dage duu n̄aa Tuo-pul Tiina n̄e. Wia tin̄daaraa ma nau.

Niaa bul u wiaa dunia seme-na kala le.

Dunia n̄aa laa u wiaa dii n̄e, an̄ ka Wia joñu kaa jil Wia-jan̄. U si k̄enu kaa jil Wia-jan̄, u laa yirin̄ n̄e.

4

Pool bul wiaa a tige wu-nyiar̄i kerichiba le

¹ Wia Din̄-zoñ-la paala chaasa bul ari bua-la jan̄ yi di n̄aa d̄oñsun̄ joñ ba yarida ta. Ba jan̄ to ni-b̄oñ n̄e sí nyise n̄aa, a bira to wialin̄ Sitaani sí dagu. ² Ba fugo didage Wia wiaa n̄e, ama ba n̄aa wu-nyiar̄a n̄e. Ba tuobiinaa l̄oñ n̄e k̄in̄k̄eñ k̄in̄k̄eñ. ³ Ni-yiriba-la yie dage ari u bi maga di n̄aa jijaa haalaa, a bira kikise kudiilee d̄oñsun̄ maa ari namii-yiriba. Ama Wia n̄e ta namia ari kudiilee deen̄ba di n̄aa didii. Nialin̄ si laa Yesu wiaa dii a jin̄ wutitii, ba jan̄ wuo diiba. Ama Wia si peba le n̄ii ba na kudiile-la, u maga di ba laa sipaan̄ a lolu n̄e an̄-na dii. ⁴ Kuñ-na kala Wia si ta zoñ n̄e, u bi maga di n̄aa kikiseba. U maga di la lolle Wia n̄e an̄-na dii kialin̄ kala. Wia teen̄ ba zoñ n̄e, ⁵ b̄e wiaa Wia tenin̄ tuon̄ ba bula ari kudiile-la zoñ n̄e. La si chuol̄e Wia n̄ii an̄-na dii kudiile-la, ba bi disinn̄in̄ kene Wia teen̄.

Pool bula pi Timoti duu faasa tin̄ Wia tin̄in̄ n̄aa woruñ

⁶ Di n̄ n̄e joñ wiaa deen̄ba a dage n̄ d̄oñsun̄ tin̄ n̄aa si laa Yesu wiaa dii,

η jan wuo ηaa Kirisito Yesu tintinni-zɔŋ, η jan ηaa nii-la si laa wialin dii a joŋo he η nyuŋ le, a keŋba kaa titin bua-na kala le. Wia niin wialin ne ηaa wu-zɔmɔ-la la si dagin. La laa dii, η maa toba ne. ⁷ Ama pɔ di η sɪ sunsɔgulo-la si bi Wia wonbiin ka to gunnu. Viaba ta. Keŋ η titia woruŋ, a gunne wiaa a keŋ doluŋ Wia wonbiin le. ⁸ N jan wuo ηaa wiaa mua di η yaraa wuo keŋ doluŋ. Ama di η ne to Wia wonbiin le, wii-la jan peŋ le di η na miisin dunia deen le. Di η ne suba maa, η jan keŋ miisi-la si bi deŋe. ⁹ Wii-la mi si bula ηaa wutitii ne. U maga di η ma sei a laa wialin dii ne. ¹⁰ Laa yiele Wia-la si weye le ne. Nii ne tii laa loo a faasaa tin woruŋ. Wia ne ηaa nuu-kala Laataara, a saa wasanyan nialin si laa u wiaa dii.

¹¹ Chaasa bul wiaa deenba a pipi niaa di ba ηinaa an pe didageba wialin maa. ¹² N ηaa hanbie ne, ama sɪ leŋe di nuu-kala bee guguunuŋ. Leŋ di η wu-ŋaalaa ηaa di niaa na ari wialin kala η si bula ηaa wutitii ne di baa to η naa-buasun. Leŋ di ba na di η cho niaa. Leŋ di ba na di η keŋ yarida a keŋ tuɔ-pula maa. ¹³ Má hilimi a kikarime Wia wiaa a didage ba bubuɔsaa maa, an pe bubul Wia wiaa pipi niaa, an ka di mi-na kɔ. ¹⁴ Sɪ Wia Din-zɔŋ-la ku-la via, ku-la u si joŋo dii zile η le. Nialin si laa Wia wiaa dii, kuhiasin ne joŋ ba nisaa a dan-η le η laa ku-la. Nialin sɪ bul wiaa, Wia Din-zɔŋ-la doluŋ le bul u wiaa pin ne. ¹⁵ U maga di η ηinaa wiaa deenba ne. Joŋ η nyuŋ kala heba le di nuu-kala wuo na η si he doluŋ wialin le a mu sipaan ηii. ¹⁶ Pɔ η titia le a to wialin sɪ to Wia wonbiin, a dage niaa maa di baa ηaa ηii. Di η nɪi ηaa ηii, η jan laa η titia ta ari nialin sɪ jegilee nii wialin η sɪ bul.

5

Nii si maga di nialin si laa Yesu wiaa dii aa hilimi ηinaa dɔŋɔ le

¹ Sɪ nii-la si ηaa nihian le kpia, ama chaasa bul wiaa pu, a zilu ari u si ηaa η nyimma dɔŋɔ tiina ηii. Bul wiaa a pi baala-la η si hia ari ba si ηaa η ηaanaa dɔŋsun tinηaa. ² Bira bul wiaa a pi ha-nihiasin ari ba si ηaa η naanba, a bira bul wiaa a pi hanɔlibiisin maa ari ba si ηaa η dihaalaa. Di η ne ηaa ηii, pɔ η sɪ disinnin keŋ.

³ Yo-haalaa si bi niaa kene di ba bibenba, zizilba a pipeba le. ⁴ Ama di yo-haal-la ne keŋ biirin koo nihee, u maga di ba laa sipaan ηaa wii-la Wia si si di ba ηaa ne ba dia niaa teen a wuo tin ba niaa ari ba naabalimaba chimin, beŋ wiaa ηii nɪi toŋe Wia tuɔŋ. ⁵ Haal-la si chaasa ηaa yo-haal-titii a bi nuu-kala kene duu benu, u ne joŋ u yielaa kala a he Wia le aa sul Wia duu peu le buana kala le, titanin ari wiiheye kala. ⁶ Ama yo-haal-la sɪ to u titia tuɔtoŋe wu-ŋaalaa le, u-na paala nage u suba ne an wei, Wia teen u bi miisin kene. ⁷ Chaasa bul wiaa deenba a pi Wia niaa, di ba sɪ wu-cheeli kala keŋ niaa teen. ⁸ Di nuu-kala ne bi u naanbiirin nyuŋ beŋ a wasanyan u dia niaa titia, u yarida ηaa pei ne. Nii-la si bi Yesu wiaa laa dii an biben u naanbiirin nyuŋ, u ne kpia tiina.

⁹ Sɪ yo-haal kala yirin ηmuŋsa he yo-haal-la tuɔŋ, see u tiina yi jisin mahin batori. U tiina maga duu jaa ba-bala dunɔŋ ne. ¹⁰ U maga di u wu-ŋaalaa ma zɔŋ, ka niaa zizilu ari ηii u si diese u biirin, a kiken nuhuɔraa woruŋ u dia le, aa huɔre Wia niaa woruŋ u dia le, aa pe nialin si juu wahala le, a joŋ u titia he wu-zɔŋŋɔɔ ηaanin le. ¹¹ Ama sɪ yo-haal-la si ηaa hanɔlibiisin yirin ηmuŋsa he yo-haal-la tuɔŋ. Di ba nɪi tin Kirisito tintinηaa an joŋ harin yia Kirisito, aa che ba ηaa ba titia tuɔtoŋe wu-ŋaalaa, baa che di ba jaa balaba ne. ¹² Di ba ne ηaa ηii, ba via wii-la ba fa si laa sipaan bul di ba jan ηaa pi Kirisito ne. Di ba ne ηaa ηii, Wia jan dɔgiseba. ¹³ Nii dunɔŋ ma dee. Ba bira bi sei di ba

tiŋ tiŋtiŋŋaa aŋ ɔllɔ tuto di-niirin. Di-bomun nɛ, ba yie gigaa niaa harin a jon ba niin hiɛ niaa wiaa lɛ a bul wialin si bi maga di ba bul. ¹⁴ Nii wiaa, mi jan bul di yo-haala-la si ŋaa hanɔlibiisin, di ba jaa balaba a lulul biirin a bibenba, a titin ba dia tiŋtiŋŋaa. Di ba nɛ ŋaa nii, la diŋdomɔ Sitaani bi jan wuo na wonbiin a bul wu-bɔŋ kala a tigela lɛ. ¹⁵ Yo-hanɔlibiisin dɔŋsun paala via Kirisito nɛ aŋ miira tuto Sitaani. Nii nɛ tii mi bul nii. ¹⁶ Ama haalna kala si laa Yesu wiaa dii, di yo-haalaa nɛ hɛ u dia niaa tuɔŋ, u maga duu beŋ ba nyun nɛ. U bi maga duu jonba pi nialin si laa Yesu wiaa dii aa hilimi di ba bibenba. Nialin si laa Yesu wiaa dii aa hilimi, ba maga di ba biben yo-haala-la si bi niaa kɛnɛ di ba bibenba nɛ.

¹⁷ Wia niaa nihiasi-la sii tiŋ ba tiŋtiŋŋaa worun, u maga di nialin si laa Yesu wiaa dii aa hilimi zizilba nɛ. U bira maga di ba zizil ba tuɔŋ nialin si faasa bul Wia wiaa aŋ pɛ didage niaa lɛ, ¹⁸ bɛɛ wiaa ba bula ŋla nɛ Wia tenin tuɔŋ. Ba si, “Di nɛɛŋ nii ŋmoo miaa pin, u bi maga di ŋ vɔɔ u niin to duu si dii.”

Ba bira ŋmunsa ari tiŋtinna maga duu laa u time nɛ. ¹⁹ Di nuu nɛ jon cheerin a pi nialin si laa Yesu wiaa dii aa hilimi ba kuhiasin, si jegile nii tiina teen, see di niaa balia koo batori ŋaa wii-la danɛ. ²⁰ Wia niaa nihiasin kala saa sii ŋaa haache, bul ba teen nialin si laa Yesu wiaa dii aa hilimi sipaan. Di ŋ ŋaa nii, fawullun jan kɛŋ ni-kaanaa. ²¹ Mi bul nii pin Wia ari Kirisito Yesu ari Wia tinɔaraa Wia si liisa sipaan nɛ. Mii suluŋ ari siifisin di ŋ to wiaa deenba, a si niaa kaa pɔrɛ wii-na kala ŋ sii ŋaa lɛ. Jonba ba kala ŋaa ni-bala ŋ teen. ²² Fiele ŋ siaa a pɔ di ŋ si pese liise nuu a jon ŋ nisaa danu lɛ duu tiŋ Wia tiŋtiŋŋaa. Di tiina nɛ ŋaa haache wii, ka ŋ liisu, ŋ ma jan pɛ juu u haache-la lɛ. Si disinnin ŋaa wiin deen lɛ.

²³ Bira si liin dunɔun nyua. Ama nyunyua sinin mua mua, a tiŋ ŋ luorun si yie wiwii bua-na kala wiaa.

²⁴ Di niaa dɔŋsun nɛ ŋaa haache, ba haacheba yie ku lii pulumun lima lima nɛ. Ba haacheba-la saa jan dage ari ba jan dii niaa deenba sariya. Ama di niaa dɔŋsun nɛ ŋaa haacheba, ŋ bi jan jin ba wiaa see tapulii-la ba si jan dii ba sariya.

²⁵ Nii titia nɛ di niaa dɔŋsun nɛ ŋaa wu-zɔŋŋɔɔ, niaa yie naba lima lima. Niaa dɔŋsun wu-zɔŋŋɔɔ ma yie faa nɛ. Ama cheɛ dɔŋ nɛ ba jan chaasa lii pulumun tuɔŋ.

6

Wu-nyiari kerichiba ari wutitii kerichiba

¹ Nialin kala si ŋaa yosun, u maga di ba zizil nialin si yɔɔba nɛ. U maga di ba ŋaa nii di nuu-kala si wonbiin na a wuo bul wu-bɔŋ kala a mu tige Wia yirin lɛ, koo a mu tige wialin la sii dagema lɛ. ² Yosula si kɛŋ nihiasin ba laa Yesu wiaa dii, u bi maga di ba mimaase ba tiŋŋaa a tiŋ ba kala si laa Yesu wiaa dii lɛ. U paala chaasa mage di ba tiŋ tiŋtiŋŋaa worun nɛ a piba, bɛɛ wiaa nialin si laa Yesu wiaa dii, ba nɛ yosu-la cho.

Di ŋ nii dage Wia wiaa, dage wiaa deenba kala pi niaa, a chaasa bul wialin kala a piba. ³ Nii-la kala si bi wutitiiba-la la Tiina Yesu Kirisito si bul daga aŋ dage wu-tanii, wialin si bi la Wii-chuɔlun wonbiin ka to, ⁴ u tiina kɛŋ u titia duu yuge nɛ, ari u jin wiaa aŋ bi wii-kala jin. U cho wu-kaa-lerin kinken kinken, a ŋŋaa gon wialin si bi siifian wiaa ŋaa lɛ. Nii jan len di nialin sii jegile nii ba teen, di ba kɛŋ yaribierin. Ba yuyuo dɔŋɔ a tutuuse dɔŋɔ, a bibiine wu-bɔŋŋɔɔ dɔŋɔ lɛ. ⁵ Niaa deenba nyun bira bi tiŋ. Nii nɛ tii ba yie kɛŋ wiaa lilere nii. Ba bira bi wutitii ma jin. Ba biina ba jan chuɔle Wia nɛ a na moribiee. ⁶ Wutitii, di niaa nɛ chuɔle Wia aŋ len di ba tuɔŋ tore kialin ba si kɛnɛ nyun, nii jan wuo

peba le woruŋ, ⁷ bee wiaa la si ko dunia, la bi kuŋ-kala kaa ko. Nii wiaa, di la ne suba, la bira bi kuŋ-kala kaa lii dunia le aa mu. ⁸ Di la ne keŋ kudiilee ari genniŋ, u maga la leŋ di ba magela ne. ⁹ Ama nialiŋ si cho di ba keŋ kiaa dunia deen le, Sitaani yie nyiseba he bere le ne. Ba cho di baa to ba tuotore wu-ŋaalaa le ne, wiaa deenba jaŋ dogiseba. Ba yie lere niaa tuu tinteen a chichei ba kala ne woruŋ. ¹⁰ Di niaa ne cho moribiee, wu-bonŋ kala yie ŋiŋaaba le ne. Moribiee chonuŋ ne ŋaa wu-bonŋ kala naaluno. Niaa donsuŋ jon ba yarida ta ne a tin ba si cho moribiee wiaa. Ba keŋ ba titia mu he heen le ne nii.

Pool chagile Timoti

¹¹ Ama ŋ-na si ŋaa Wia tintinnu, si wiaa deenba kala ŋaa. Leŋ di ŋ siin fiese di ŋ ŋiŋaa wialiŋ si ŋaa wutitiiba a tuto Wia wonbiin, a chin ŋ yarida naan le, a cho niaa, a keŋ kenyiri, a keŋ ŋ titia muuri niaa sipaan. ¹² He doluŋ kinkeŋ a faasa chin ŋ yarida naan le, a nage niaa si yie fa a keŋ donjo kii nii. He doluŋ di ŋ wuo laa miisi-la si bi dere. A tin miisin deen wiaa ne Wia yirin. Nii ma dunduŋa dee. Ama bua-la le ŋ si ku laa Yesu wiaa dii, a wuo bubul nii niaa sipaan, ŋ chaasa bula piba di ŋ laa wialiŋ si ŋaa wutitii dii ne. ¹³ Mii suluŋ Wia sipaan ari Kirisito Yesu ma sipaan di ŋ to wialiŋ kala mi si bula pin. Wia ne jon miisin a pi kuŋ-kala. Kirisito Yesu ma ne ŋaa nii-la fa si chin u yarida naan le Ponsos Paalit sipaan, nii-la fa si chin Rom kuori-balin nyuŋ Judiya tinteen le, a wuo bul wutitii a pu. ¹⁴ He doluŋ an to wiaa deenba ari tuo-bala, di niaa si wuo jon cheerin pin. Keŋ nii naan le a kaa mu yi tapulii-la la Tiina Yesu Kirisito si jaŋ miira ko. ¹⁵ Wia jaŋ leŋ duu ko bua-la le u si bene duu maga duu ko. U dunduŋa ne ŋaa Wii-balin sii ben kuŋ-kala. U ne ŋaa kuori-balin a keŋ kuoro kala doluŋ. U ne keŋ doluŋ duu leŋ di nuu-kala

tuonŋ tore. ¹⁶ U dunduŋa ne bi suu. U he puluŋ-bal tuonŋ ne. Nuukala bi dime wuo mu. Nuukala ha buu na, nuu ma kala saa buu wuo na. U maga di niaa kala zizilu ne. U ne keŋ doluŋ dunia le a kaa mu wuu. Ami.

¹⁷ Bula pi nialiŋ si keŋ kiaa dunia deen le di ba si bee guguune nialiŋ si bi kuŋ kene, a si ba yielaa kala jon he kialin le, bee wiaa nuu-kala bi jaŋ wuo jin u dia si jaŋ chin nii. Ama u maga di baa yiele kialin si he Wia teen ne. U ne keŋ zile a jon kuŋ-kala a pila di la kaa ninii sima. ¹⁸ Bula pi nialiŋ si keŋ kiaa di ba wu-zonjo ma mage kialin ba si kene. Leŋ di ba keŋ zile a ŋaa siri di ba ŋaa kiaa pipi niaa, di ba kala ninii sima. ¹⁹ Nii ne ba jaŋ wuo ŋaa a che kiaa a bil ba titia le Wia-jaŋ le di ba wuo na kialin nyuuruŋ maachie. Nla ne ba jaŋ wuo laa miisi-la si ŋaa mii-titii.

²⁰ To, Timoti, po woruŋ a tin ŋ tintimii-la Wia si jon he ŋ nisin le. Si nialiŋ sii ŋaa gon le pe, nialiŋ si bul wialiŋ si bi Wia wonbiin ka to a keŋba kaa lere. Nialiŋ sii ŋaa nii yie nyia wiaa a bine wu-jimii ne nii. ²¹ Niaa donsuŋ to wu-jimin deen le ne a jon ba yarida ta.

Wia lahrimo le ma jaŋ hon ari yarifielaa.

TEN-LIA-LA PƆƆL SI N̄MUNSA PI TIMOTI

Ten-lia-la PƆƆl si n̄munsa pi Timoti

¹ Mi-na PƆƆl n̄ n̄munse tenin deen̄. Mi n̄aa Yesu Kirisito nan̄zɔɔ n̄. La Tiina Wia tuɔɔrun̄ l̄ n̄ u liisemi di mi n̄aa u nan̄zɔɔ. Wia bula pila di u to Yesu Kirisito l̄ n̄ a jon̄ miisin̄ pila. U tin̄mi n̄ di mi bul miisin̄ deen̄ wiaa a pi n̄aa.

² Mi n̄munse tenin̄ deen̄ a pipi n̄-na Timoti. N̄ n̄aa mi bii-choolii n̄. La Nyimma Wia ari la Tiina Yesu Kirisito lah̄rimɔ l̄, ba jan̄ f̄an̄ nennige a len̄ di n̄ h̄on̄ ari yarifielaa.

PƆƆl bula pi Timoti duu chin̄ wialin̄ l̄ u si laa dii

³ Mii l̄lle Wia kin̄ken̄. Mi si tima pi Wia nii, mi tuɔbiinaa yie chesi n̄. Nii titia n̄ mi doho n̄aa ma fa tima pipi Wia. Bua-na kala l̄ di mi n̄i chuɔle Wia, mi yie liliisi n̄ wiaa n̄.

⁴ Mi liise yi ari bua-la l̄ mi si sii n̄ teen̄, n̄ faa yel n̄. Nii n̄ tii mi cho di mi ku nan̄ ari siifiesin̄, di mi tuɔn̄ faasa t̄ɔre worun̄. Mi tuɔbiinaa yie h̄ n̄ teen̄ titan̄in̄ ari wiih̄eȳe kala n̄.

⁵ Mi liise yi nii n̄ si laa Wia wiaa dii ari siifiesin̄. N̄ nahima Lowis ari n̄ naan̄ Yunis n̄ laa sipaan̄ laa Wia wiaa dii. Mi jima ari n̄ ma chin̄ nii l̄ n̄. ⁶ Wia jon̄ kun̄ n̄ a dii zile n̄ l̄. U n̄aa nii n̄ bua-la l̄ mi si jon̄ mi nisin̄ dan̄-n̄ l̄. Mii liisin̄ di n̄ bira ken̄ ku-la worun̄. ⁷ Wia bi u Din̄-zɔn̄-la jon̄o hela l̄ di la fifá fawullun̄, ama duu pela l̄ di la wuo ken̄ dolun̄ n̄ la miisin̄ l̄, a bira cho n̄aa, a p̄e ken̄ la titia worun̄.

⁸ Di n̄ n̄i bul la Tiina Yesu wiaa pipi n̄aa, sí len̄e di hiisin̄ kenin̄ a tin̄ Yesu wiaa. Bira sí len̄e di hiisin̄ kenin̄ a tin̄ mi ma wiaa. Kirisito wiaa n̄ tii ba ken̄mi t̄o dia. Ama sei di la kala na h̄een̄ a tin̄ Yesu wu-zɔmɔ-la wiaa. Wia dolun̄ si h̄en̄

l̄ nii, nii n̄ tii n̄ wuo na h̄een̄ nii. ⁹ Wia n̄ laala ta a yirela di la n̄aa u n̄aa. U bi naga di Wia to la wu-zɔn̄ɔɔ l̄ n̄ a laala ta. U titia tuɔɔrun̄ l̄ n̄ u fála nennige a laala ta. Yesu Kirisito l̄ n̄ u to a n̄aa nii pila. U jima ari u jan̄ n̄aa nii pila faafaa kala n̄, ka dunia-na suomi. ¹⁰ L̄ēlē la Laataara Kirisito Yesu s̄enē k̄o dunia. U si k̄o nii, la wuo na Wia zile wiaa si nagē nii n̄. Kirisito si k̄o, u kpu suun̄ dolun̄ kala n̄. U bul wu-zɔmɔ-la pila a to nii l̄ dagela ari u n̄ pila miisin̄, a bira dagela di la n̄ suba maa, la jan̄ bira sii a ken̄ miisi-la si bi d̄ere. ¹¹ Yesu wu-zɔmɔ-la wiaa n̄ tii Wia liisemi di mi n̄aa u nan̄zɔɔ, a len̄ mi bul wiaa deen̄ba a pipi n̄aa a didageba. ¹² Mi síi bul nii len̄e mi nina h̄een̄ n̄. Ama hiisin̄ bimi k̄enē a tin̄ h̄ē-la mi si na wiaa. Mi jin̄ nii-la mi síi to n̄. Mi si jon̄ mi titia h̄e u nisin̄ l̄ nii, mi laa dii ari u jan̄ wuo ben̄mi worun̄ halii a kaa mu yi tapulii-la Kirisito Yesu si jan̄ miira k̄o. ¹³ Wialin̄ kala mi fa si dagin̄, ba n̄aa wutitiiba n̄. Chin̄ wialin̄ l̄ a tutoba. La di Kirisito Yesu si n̄aa kubala nii, h̄e dolun̄ an̄ chin̄ n̄ yarida naan̄ l̄, a cho n̄aa maa. ¹⁴ Wia Din̄-zɔn̄-la hela l̄ n̄. Wia jon̄ wutitii h̄e n̄ nisin̄ l̄ n̄. Ben̄ wutitii-la u Din̄-zɔn̄-la dolun̄ l̄.

¹⁵ N̄ jima ari bua-la l̄ mi fa si h̄e Esia tin̄teen̄ l̄ n̄aa kala n̄ fa viami, Fijilas ari Homojinis ma fa h̄e n̄aa deen̄ba tuɔn̄ n̄. ¹⁶ Ama baal-la ba síi yire Onisiif̄ɔɔs, u n̄ p̄emi l̄ worun̄ a n̄aa mi nyun̄ faasa nyaase. Ba si ken̄mi kaa t̄o dia nii, hiisin̄ fa buu k̄enē a tin̄ mi wiaa. La Tiina Wia jan̄ fáu nennige, ba di u dia n̄aa kala. ¹⁷ U si ku tuu Rom l̄, lee-la ba si t̄omi dia, u suomo chichemi ari siifiesin̄ an̄-na ku nami. ¹⁸ Wia jan̄ len̄ di la Tiina Kirisito fáu nennige sariya ch̄e-diilin̄. N̄ ma jin̄ nii u si faasa p̄emi l̄ n̄ bua-la l̄ mi fa si h̄e Efesis l̄.

Pɔɔl bula pi Timoti duu ɲaa laali-yuori-zɔmun

¹ N-na mi bii Timoti, mii che di ɲ keɲ doluɲ. Dol-la lii Kirisito Yesu teen ɲɛ. U laħorimɔ wiaa ɲɛ tii ɲ keɲ doluɲ deen. ² Mi si bul Wia wiaa piɲ, niaa yuga ɲɛ a fa he dime a pe nii. Bul wiaa deenba ɲ si nia a pi nialin si keɲ wutitii. Niaa deenba saa jan bira wuo bul wialin a pi ba dɔɲsun tinɲaa maa. ³ N si ɲaa Kirisito Yesu laali-yuori-zɔmun, ɲaa siri di la diɲ kala na heɲ. ⁴ Laali-yuoru kala si he u tintinɲaa le a titin, u yie chiche duu tin ɲii di nii-la si jonu tintinɲaa le, duu tuɔɲ tɔre ɲɛ. Nii wiaa u yie bi che duu tin tintimii dɔɲ kala a pe tintimii-la u sii tin le. ⁵ Bira na fifaari-la sii fá, u bi jan wuo fá a laa u time, see di u to wialin ba si bile pi fifaaraa ba tuto le. ⁶ Bira na ba-paari-la si faasa titin ɲɛ maga duu laa sipaan dii бага kufalaa. ⁷ Bibiine wiaa deenba mi sii bul. La Tiina Yesu jan pen le di ɲ wuo jin wiaa deenba kala bubuɔɲ.

⁸ Jon Yesu Kirisito wiaa he ɲ nyun le. U fa ɲaa Devit doho nuu ɲɛ. U si suba, u bira sii suun le ɲɛ. Wia wu-zɔmɔ-la mi si bula pima ɲɛ dage wiaa deenba. ⁹ A tin Yesu wu-zɔmɔ-la wiaa, mi na heɲ. Ba dɔgisemi a nage mi ɲaa ni-bɔɲ ɲɛ. Ba keɲmi vɔɔ ɲɛ. Ama ba bi jan wuo keɲ Wia niin wiaa vɔɔ bil. ¹⁰ A tin Yesu wu-zɔmɔ-la wiaa mi nyalime wii-kala ɲɛ. A tin nialin Wia si liisa wiaa ɲɛ mi ɲaa ɲii, di Yesu Kirisito wuo laaba ta. U si laaba ta ɲii, ba jan na Wii-balin doluɲ a kaa mu deen deen.

¹¹ Wii-la mi sii che di mi bula pima ɲaa wutitii ɲɛ. U ɲɛ ɲla:

Di la di Yesu kala ɲɛ suba,
la duu kala ɲɛ jan sii a keɲ
miisin.

¹² Di la ní na heɲ an nyalime hee-
la,

la duu kala jan dii kuoruɲ.
Koo di la ɲɛ si la bi Yesu jin,
u ma jan bul di u bila jin.

¹³ Di la ɲɛ bi wutitii ka to,
u-na ha keɲ wutitii,

bee wiaa u bi jan wuo nyise u
titia.

Pɔɔl bula pi Timoti duu ɲaa tintinni-titii Wia tintinɲaa le

¹⁴ Bula pi nialin si laa Yesu wiaa dii di ba liliisi wiaa deenba woruɲ, a sulba di ba bira sí wiaa kaa lilere. N si bul ɲii, len di Wia ɲɛ ɲaa ɲ siada tiina. Ma si keɲ wiaa lilere ɲii, u ɲii bi nuu-kala leɛ pe, ama u yie len nialin sii jegili wialin titel ɲɛ. ¹⁵ Di ɲ ɲɛ mu Wia teen di ɲ dage ɲii ɲ si tin ɲ tintinɲaa, he ɲ doluɲ kala duu wuo na ari ɲ ɲaa tintinni-titii si bi hiisin ka fá, a bira len duu wuo na ari ɲ dage wialin si ɲaa wutitiiba ɲɛ woruɲ. ¹⁶ Di niaa ɲɛ ɲaa gon aa bul wialin si bi bubuɔɲ keɲɛ, wialin si bi Wia wonbiiɲ ka to, liise ɲ titia nialin le. Wiaa deenba ba sii bul yie kikiri niaa ɲɛ ba jon hariɲ yia Wia. ¹⁷ Wialin ba sii daga jan teeli a nage naawiilin si yie keeri ɲii a dii nanpilin kala. Niaa balia ɲɛ he niaa deenba tuɔɲ aa dage wiaa deenba. Ba yiraa ɲɛ Haminiyas ari Faliitis. ¹⁸ Ba len wutitii wonbii-la ɲɛ an bul ari bua-la le niaa si jan suu an sii suun le paala kieli ɲɛ. Ba si dage ɲii ɲaa nialin dɔɲsun si laa Yesu wiaa dii jon ba yarida ta ɲɛ. ¹⁹ Ama dia gentin-duo-la Wia si bile pi u niaa, u bi jan wuo jigisi. Wialin ba si ɲmunsa heu le ɲɛ ɲla: “La Tiina Wia jin nialin si ɲaa u niaa ɲɛ.” Ba bira ɲmunsa ari u maga di nii-la kala si si u ɲaa Wia nuu ɲɛ, duu len wu-bɔɲɲɔɔ ɲaanin.

²⁰ Niaa nage gbanɲi-la si he niaa diisin le ɲɛ. Dɔɲsun ɲaa selime gbanɲin, dɔɲsun ɲaa taasi-gbanɲin, dɔɲsun ma ɲaa gbanɲin, dɔɲsun ma ɲaa heɲsin. Dɔɲsun ba yie jon bil ɲɛ a kaa didii kiaa che-zɔɲɲɔɔ, an keɲ dɔɲsun ma kaa didii kiaa tapulii-na kala. ²¹ Nii wiaa di nuu ɲɛ liise u titia wu-bɔɲɲɔɔ le, u jan nage gbanɲi-la ba si kaa didii kiaa che-zɔɲɲɔɔ. Nii-la si nage ɲii ɲaa tuɔ-pul tiina ɲɛ u kuhian teen. U jan wuo peu le woruɲ. U kuhian jan len duu

titin̄ tin̄tin̄-zon̄-na kala. ²² N̄ s̄ī yiēle wiin̄ deen̄, liisē η̄ titia wu-bom̄o-la lē bapuōsaa ari ha-toloo si yiē cho di baā η̄aa. Ama loo chichē di η̄ ken̄ tuō-pula a wuo chin̄ η̄ yarida naan̄ lē, a pē cho niaa a lēn̄ di ma di niaa ken̄ nii-bala. Ma di nialin̄ si ken̄ tuō-pula, sul Wia duu pēba lē, má kala loo chichē wiaa deen̄ba. ²³ Ama liisē η̄ titia nialin̄ s̄ī lērē wu-yaaraa lē. N̄ jima ari wiaa deen̄ba yiē lēn̄ niaa suomo yuyuo d̄on̄ō nē. ²⁴ Nii-la si tima pipi la Tiina Wia, u bi maga duu yuyuo yuosun̄. U maga duu ken̄ zile nē nuu-kala lē, a wuo didagē niaa worun̄, an̄ pē ken̄ kenyiri. ²⁵ Di η̄ n̄ī dagē wiaa a pī nialin̄ si bi η̄ harin̄ china, lēn̄ di η̄ siaa fiēlē. N̄ bi p̄ōō, Wia jan̄ lēn̄ di ba na won̄biin̄ a wuo birima lii ba haachēba lē a ku jin̄ wutitii-la. ²⁶ Ba si η̄aa η̄ii, ba jan̄ bira wasa ken̄ wu-jimin̄ a ken̄ ba titia liisē Sitaani beré-la lē. U fa ken̄ba ba tuto u tuot̄orun̄ lē nē.

3

Bua-la dunia si jan̄ derē kpaga nē

¹ Timoti, jin̄ bua-la lē dunia si jan̄ derē kpaga nē. Bua deen̄ lē wiaa jan̄ kperi. ² Niaa jan̄ cho ba titia an̄ pē cho moribiee. Ba jan̄ bibigisi ba titia lē, ba siaa bi jan̄ sus̄u nuu-kala maa, ba jan̄ tutuusē niaa maa. Ba bi jan̄ tuto ba nyimmaba ari ba naan̄ba niin̄. Ba bira bi jan̄ jin̄ zile. Ba bi jan̄ ken̄ tuō-pula ma Wia sipaan̄. ³ Ba bi jan̄ cho niaa. Ba bira bi jan̄ sei di ba di niaa η̄aa sima. Ba jan̄ chichēi niaa yirin̄ maa. Ba bi jan̄ ken̄ ba titia. Ba jan̄ terē. Ba jan̄ berē wu-zon̄ kala. ⁴ Ba jan̄ η̄aa zen̄bē timma, ba bi jan̄ ken̄ tuobiinaa. Ba jan̄ ken̄ sii-duon̄. Ba bi jan̄ cho Wia. Ba tuot̄orē wiaa dundun̄a nē ba jan̄ cho di baā η̄aa. ⁵ Ba yiē chuchuōlē Wia nē niaa tuon̄, ama ba wu-η̄aalaa yiē dagē ari ba bi Wia dolun̄ jin̄. Liisē η̄ titia niaa deen̄ba tuon̄. ⁶⁻⁷ Wu-nyiari tin̄η̄aa deen̄ba d̄on̄sun̄ yiē juu niaa diisin̄ nē a nyinyisē ha-ni-yaaraa. Wu-bon̄η̄oō nyagē haala-la bil. Ba to

ba tuot̄orē wu-η̄aalaa lē. Tuot̄orē wu-η̄aalaa-la yuga nē. Di nuu-kala n̄ī chē u dagē haalaa deen̄ba, ba yiē jegile n̄ī u teen̄ a chichē di ba gunnē wu-jimin̄, ama ba bi wutitii kala wuo gunnē.

⁸ Baalaa balia nē fa hē dimē. Ba yiraa nē Janis ari Jan̄bas. Ba fa bi Moosis harin̄ china. Ba si bi Moosis harin̄ china η̄ii, η̄ii titia nē baalaa deen̄ba ma bi wutitii-la harin̄ china. Niaa deen̄ba nyun̄ bi tin̄. Ba bi ba yarida naan̄ lē wuo chin̄. ⁹ Ama niaa deen̄ba bi jan̄ wuo η̄aa η̄ii a mu sipaan̄, bēē wiaa nuu-kala jan̄ na di ba η̄aa ni-yayaasē. N̄ii titia nē nialin̄ ma fa na Janis ari Jan̄bas fa si yaara η̄ii.

P̄ool chagilē Timoti

¹⁰ Ama η̄-na to wialin̄ mi s̄ī dagē nē, an̄ bira to mi wu-η̄aalaa maa. N̄ na mi wu-η̄aalaa si nagē η̄ii, a na wii-la mi s̄ī chē dunia lē, a bira na η̄ii mi si chin̄ mi yarida naan̄ lē, a bira na mi si ken̄ kenyiri ma η̄ii. N̄ na mi si cho niaa maa, a bira na η̄ii mi si ken̄ nyalima. ¹¹ N̄ na η̄ii ba si to naasin̄ d̄ogisemi nē ari η̄ii mi si na hēen̄. N̄ ma jin̄ η̄ii mi si na hēen̄ nē An̄tiok ari Ikooniam ari Lisita tin̄teen̄ kala lē nē. Ba si to naasin̄ d̄ogisemi η̄ii nē, ka mi nyalimē. Ama mi Tiina Wia liisemi nē ba kala lē. ¹² Nuu-kala s̄ī chē duu to Wia won̄biin̄ a lēn̄ di ba di Kirisito Yesu η̄aa kubala, niaa jan̄ to naasin̄ d̄ogisu. ¹³ Ama ni-bon̄η̄oō ari nialin̄ s̄ī nyisē niaa jan̄ wasa η̄in̄aa wu-bon̄η̄oō. Ba jan̄ nyisē niaa an̄ pē nyinyisē ba titia maa. ¹⁴ Ama η̄-na hé̄ dolun̄ an̄ chin̄ wialin̄ η̄ si gunna naan̄ lē, wialin̄ η̄ si laa dii di ba η̄aa wutitii. Síba jon̄ō ta. N̄ jin̄ nialin̄ si dagin̄ wialin̄ nē worun̄. ¹⁵ A suomi η̄ han̄biirin̄ kala lē a kaa mu, η̄ jin̄ Wia tenin̄ nē. U bi disinnin̄ ken̄ē. U nē wuo dagin̄ Kirisito Yesu wiaa a bira lēn̄ η̄ laa u wiaa dii duu laan̄ ta. ¹⁶ Wia tenin̄ kala lii Wia teen̄ nē. Wia nē jon̄ u Din̄-zon̄-la a hē niaa lē ba wuo η̄mun̄seba. Wia ten̄-la wuo

dage niaa wutitii won̄biin̄. Di nuu ne ɲaa wii chei, u wuo dagu wii-la u si ɲaa chei a jon̄ cheerin̄ pu, a bira wuo dagu won̄bii-la si maga duu tuto, a wuo dagu ɲii u si jan̄ wuo ɲaa a keɲ tuɔ-pula Wia sipaan̄ a mu sipaan̄. ¹⁷ N̄la ne jan̄ wuo pe nii-la si tima pipi Wia le, duu si wii-kala ɲaa chei, a ɲaa siri duu tin̄ tin̄tin̄-zon̄-na kala.

4

¹⁻² Mii sulun̄ di ɲ bul Wia wiaa. Naa siri di ɲ bul bua-na kala a jon̄ ɲ nyun̄ kala heba le. Di niaa ɲaa siri di ba jegili, koo di ba bi siri ɲaa, ɲ-na bul. Bul wiaa ba teen̄ an̄ kpiaba le, a bira ɲaa di ba nyun̄ nyaase. N̄ sii ɲaa ɲii, keɲ ken̄yiri a didage niaa worun̄. Mi si sulun̄ ɲii, Wia ari Kirisito Yesu ne ɲaa la siada tin̄ɲaa. Yesu ne ɲaa nii-la si jan̄ dii niaa kala sariya. Nialin̄ si weye ari nialin̄ si suba kala ne u jan̄ dii ba sariya. U ne jan̄ miira ko dunia a dii kuorun̄. N̄ii ne tii mii sulun̄. ³ Naa wialin̄ mi si si di ɲ ɲaa a tin̄ wialin̄ si jan̄ ɲaa le. Bua kubala jan̄ yi, niaa bi jan̄ jegili wutitii-la ba si jan̄ dageba. Ama ba jan̄ to ba titia tuɔɔrun̄ le. Ba jan̄ che a keɲe kerichiba a yuge. Niaa deen̄ba jan̄ dageba wialin̄ ba si cho di baa nii. ⁴ Ba bi jan̄ cho di ba nii wutitii-la. Ba jan̄ jon̄ harin̄ yia wutitii-la an̄ cho di baa nii sun̄soguloo. ⁵ Ama ɲ-na he dolun̄ a keɲ ɲ titia worun̄ wii-na kala le. Di heɲ ne juun̄ maa, nyalime. N̄ si ɲaa Wia tin̄tin̄nu ɲii, bul Yesu wu-zomɔ-la a pi niaa. Tin̄ ɲ tin̄timii-la kala worun̄ a kaa mu.

Pɔɔl bul wiaa a tige u titia le

⁶ Bua-la le mi si jan̄ suu a lii dunia le, u yie ne. ⁷ Mi yuo laali-zon̄-la ne worun̄. Mi fa mi fanin̄ dere ne. Mi chin̄ mi yarida naan̄ le ne. ⁸ Leele mii gberɛ mi time ne. La Tiina Wia jan̄ jon̄ time deen̄ pimi tapulii-la tuɔ-pul timma-la si jan̄ sii suun̄ le. U ne ɲaa sariya diiri-titii. Mi dun̄duɲa dee u jan̄ jon̄ time-la pa, ama nialin̄

kala si chou a gberɛ la Tiina Kirisito duu miira ko dunia, ba ma jan̄ laa time deen̄.

⁹ He dolun̄ an̄ ko mi teen̄ lima, ¹⁰ beɲ wiaa Dimas viami ne. U cho dunia kiaa ne. N̄ii ne tii u viami ta an̄ mu Tesalonaaka. Kiresikeɲ ma mu Galiisia, Taatis ma mu Dalimeesa. ¹¹ Luuk dun̄duɲa ne he mi teen̄. Di ɲ ne ko mi teen̄, pe keɲ Maak kaa ko. U jan̄ wuo ɲaa wiaa yuge a pimi. ¹² Mi tin̄ baal-la ba sii yire Takikas ne u mu Efesis. ¹³ Di ɲ nii ko, pe keɲ mi geri-la ari mi tenni-la kaa ko. Mi jon̄ pi baal-la ba sii yire Kaapis a he Turɔwas le ne. Tenni-la ba si keɲ pusun̄ purun̄ kaa ɲaa ne mi wasa chiche. ¹⁴ Libiri kubala ba sii yire Alekizanda dogisemi ne worun̄. U si ɲaami ɲii, Wia jan̄ kpuse u purun̄. ¹⁵ Po ɲ titia ari libiri-la le. La si bul Wia niin̄ wialin̄ pi niaa, u lii la harin̄ ne. ¹⁶ Bua-la le mi si laa sipaan̄ bul wiaa di mi laa mi titia, bua-la le ba sii dii mi sariya, nuu-kala bi mi harin̄ china. Ba kala viami ta ne. Mii sul Wia duu si ba dogisu a tin̄ wialin̄ ba si ɲaa. ¹⁷ Ama Wia chin̄ mi harin̄ a pimi dolun̄ mi wuo bul Wia niin̄ wialin̄ kala kala. Mi bul wialin̄ a pi nialin̄ si bi Juu tin̄ɲaa ɲaa ma ne ba kala nii. Wia liisemi ni-bon̄ɲoo nisin̄ le. ¹⁸ Wia jan̄ liisemi wu-bon̄ɲoo kala le. U jan̄ ben̄mi worun̄ a keɲmi joiin̄ kaa mu he u kuorii-la tuɔɔ Wia-jan̄ le. Wia yirin̄ jan̄ yire bua-na kala le, a kaa mu wuu. Ami.

Chuɔlaa

¹⁹ Chuɔle Pirisila ari Akuila pimi, a chuɔle Onisiiforɔs ari u dia niaa kala maa. ²⁰ Irasitas tuo mi teen̄. La si jon̄ won̄biin̄, u ka Korin̄ti le ne, an̄ ka mi len̄ Turɔfimɔs ma Miliitas le. U faa wiile ne. N̄ii ne mi len̄u dime. ²¹ He dolun̄ an̄ ko, ka di yibiinin̄-la juu. Nialin̄ ba sii yire Yubulas ari Pudɛɲs ari Laanis ari Kilaadia, ba maa chuɔlun̄, ari nialin̄ kala si laa Yesu wiaa dii.

²² Wia jan̄ len̄ di ma duu hon̄un̄ zon̄. U lahɔrimɔ le u jan̄ pen̄ le.

TEN-LA PÓOL SI N̄MUNSA PI TAATIS

¹ Mi-na Póol n̄ n̄munse tenin deen aa pi n̄-na Taatis. Mi n̄aa Wia tintinnu n̄e a n̄aa Yesu Kirisito nan̄zoo maa. Wia n̄e liisemi di mi p̄e nialin u si liisa l̄e di ba wasa chin̄ ba yarida naan̄ l̄e, a wuo jin̄ wutitii-la s̄ii to Wia won̄biin̄. ² Nialin̄ s̄ii to Wia won̄biin̄ deen̄, baa yiele ari ba jan̄ ken̄ miisi-la si bi d̄ere. Wia fa bul wiaa a tige miisin̄ deen̄ faafaa kala n̄e, ka dunia-na suomi. Wia bi wiaa ka nyia, u jan̄ n̄aa wii-la. ³ Bua-la l̄e Wia si cho n̄e, u jon̄ wii-la a dagela u Wu-zom̄o-la tuon̄. Nii n̄e la Laataara Wia jon̄ wiin̄ deen̄ a h̄e mi nisin̄ l̄e di mi laa bula pi niaa.

⁴ Mi-na Póol n̄e n̄munse tenin̄ deen̄ a pipi n̄-na Taatis. A tin̄ la kala si laa Yesu wiaa dii nii, n̄ nage mi bii-titii n̄e. La Nyimma Wia ari la Laataara Yesu Kirisito lah̄orim̄o l̄e, n̄ jan̄ hon̄ ari yarifielaa.

Wia niaa tuon̄ nihiasin̄ si maga di ba nage nii

⁵ Mi len̄in̄ Kiriiti l̄e di n̄ wuo wase wialin̄ fa si maga si ba n̄aa n̄e. Mi bula pin̄ maa di n̄ liise Wia niaa tuon̄ nihiasin̄ tan̄-na kala l̄e. Nialin̄ si maga di n̄ liise n̄e n̄la: ⁶ Má ben̄ di ba mele zom̄o, di ba sí wu-cheeli kala ken̄ niaa teen̄. U maga di nii-la ken̄ ha-bala n̄e, ka u biirin̄ ma kala laa Wia wiaa dii a ken̄ meli-zon̄, a sí wu-liilin̄ n̄aa, a sei kuhiasin̄ niin̄ wiaa, a sí wu-cheeli kala ken̄ niaa teen̄. ⁷ Nii-la s̄ii ben̄ Wia niaa n̄aa Wia tintinni-kuhian̄ n̄e. U bi maga duu ken̄ wu-cheelee niaa teen̄. U bira bi maga duu didage u titia, a sí baan̄ tiina koo si-nyuaru koo nii-jigi tiina koo nii-la si cho moribiee kin̄ken̄ n̄aa. ⁸ U maga duu ben̄ nuhuora a worun̄ u dia l̄e a cho duu n̄aa wu-zon̄ho a pipi niaa. U maga duu jin̄ u titia kenin̄ n̄e a n̄aa ni-titii. U maga duu n̄aa ni-pula a wuo ken̄ u

titia a h̄e don̄o l̄e worun̄. ⁹ Ba si dagu Wia niin̄ wialin̄ si n̄aa wutitii nii, u maga duu ken̄ba worun̄, duu wuo dage u don̄sun̄ tin̄n̄aa wutitii-la u si gunna. Duu n̄e n̄aa nii, u jan̄ wuo dage nialin̄ s̄ii bul wiaa chichei wutitii-la la s̄ii to.

¹⁰ Nialin̄ si laa Wia wiaa dii yuga bi che di ba tuto nihiasin̄ niin̄ wu-bulaa. Ba n̄aa wu-bul deen̄ deen̄ timma n̄e. Baa nyise niaa n̄e. Niaa deen̄ba tuon̄ niaa yuga a n̄aa Juu timma n̄e aa che di nialin̄ kala si laa Yesu wiaa dii ker̄i ba pen̄ee. ¹¹ U maga di ma bula piba di ba len̄ wialin̄ ba s̄ii dagu, bee wiaa ba s̄ii dage wialin̄ si bi maga di baa dage nii, ba n̄aa niaa jon̄ wialin̄ ba si laa dii a ta n̄e. Moribiee wiaa n̄e tii baa dage wialin̄. ¹² Kiriiti niaa tuon̄ vugira bul wiaa a mu tige u niaa l̄e. U bula ari Kiriiti niaa kala n̄aa wu-nyiaraa n̄e a n̄aa ni-bom̄o, luobii tin̄n̄aa, an̄ p̄e ken̄ yariwiin̄ maa. ¹³ Wii-la u si bula n̄aa wutitii n̄e. Nii wiaa, faasa kpiaba l̄e di ba chin̄ wutitii-la ba si laa dii l̄e kpan̄ kpan̄. ¹⁴ Bira bula piba di ba sí Juu tin̄n̄aa naabalimaba wiaa si nage sun̄soguloo nii, a sí nialin̄ si via wutitii-la harin̄ to. Wutitii-la lii Wia teen̄. ¹⁵ Ni-zomun̄ teen̄ kuñ-kala zom̄o n̄e. Disin̄ timma-la si bi Wia wiaa laa dii teen̄ kuñ-kala n̄aa kubon̄ n̄e. Ba tuon̄ lor̄o, ba tuobiinaa kala bi chese. ¹⁶ Baa bul ari ba jin̄ Wia n̄e, ama ba wu-ñaalaa daga ari ba bi Wia jin̄. Ba wu-ñaalaa lor̄o, ba bi nialin̄ niin̄ wiaa ka nii, ba bi wu-zon̄ kala ka n̄aa.

2

Wutitii-la si maga di la tuto

¹ Ama n̄-na Taatis didage wutitii-la n̄e. ² Bula pi ba-nihiasi-la si h̄e ma tuon̄ di ba len̄ di ba siaa fiele, a ken̄ meli-zon̄, a ken̄ ba titia worun̄, a jin̄ wialin̄ ba si laa dii worun̄, a cho niaa, a ken̄ kenyiri. ³ Bula pi ha-nihiasi-la ma di ba n̄aa wialin̄ si daga ari baa to Wia won̄biin̄ n̄e. U bi maga di ba gigaa niaa harin̄ koo

di ba ɲaa si-nyuaraa. Bula piba di ba didage wialin si zomɔ, ⁴ di ba wuo dage ha-toloo ma di ba cho ba balaba ari ba biirin, ⁵ a wuo ken ba titia worun, a sí wu-liilin ɲɲaa, a beɲ ba dia niaa worun, a ken zile, a tuto ba balaba niin worun, di nuu-kala sí wuo bul wu-bɔɲ kala a tige Wia wu-zomɔ-la ɛ. ⁶ Bul ɲii titia a pi bapɔsaa maa di ba ma ken ba titia worun. ⁷ Ɗ-na titia Taatis, wii-na kala ɲ sí ɲaa ɛ, leɲ di niaa na ɲ wu-ɲaalaa si zomɔ di ba tuto. Wialin kala ɲ sí dagu, leɲ di ba na ari ɲ ken wutitii ari siifesiɲ. ⁸ Wialin kala ɲ sí bul, bul ari tuɔɔrun, di nuu-kala sí wuo kaa lere. Di ɲ ne ɲaa ɲii, ɲ diɲɔɲɔɔ bi jan na wonɲiin a bul wu-bɔɲ kala a tigela ɛ. ⁹ Bula pi yosun ma di ba tuto nialin si tiiba niin ɛ, a ɲaa wialin kala si maga di ba tinɲaa tuɔɲ tɔre ba nyun. U bi maga di ba laa wiaa bubul ba teen. ¹⁰ Ba sí ba tiinaba kiaa gigaa. Wialin kala ba sí ɲaa, u maga di ba leɲ di nialin si tiiba laaba dii ari ba ken wutitii. Di ba ne ɲaa ɲii, ba jan wuo leɲ di nuu-kala jin ari la Laataara Wia wu-zomɔ-la ɲaa wutitii ne.

¹¹ La Tiina Wia laɲorimɔ guu chaane ne. Uu che duu to ɲii ɛ ne a laa nuu-kala ta. ¹² Wia wu-zomɔ-la dagela di la sí wu-bɔɲɔɔ ɲaa, a sí la titia jonɔ he dunia wiaa ɛ, a jima ken la titia, a ken wutitii, a tuto Wia wonɲiin dunia deen ɛ. ¹³ La si he dunia deen ɛ ɲii, laa gberɛ tapulii-la la Laataara Yesu Kirisito, nii-la si ɲaa Wia, jan kɔ ari u tula. Laa yiele tapulii-la ne. La tuɔɲ ma jan tɔre duu ne kɔ. ¹⁴ La wiaa ne tii u suu, duu laala ta la haacheba ɛ a piise la disinnin ta, di la ku ɲaa tuɔ-pul timma u sipaan. Uu che di la ɲaa nialin si jon ba nyun he wu-zɔɲɔɔ ɛ. ¹⁵ Wia si jon dol-la pin, kenu a bul wiaa deenba. Chaasa bul wiaa pi nialin ɲ sí dagu. Di ba ɲaa wii chei, dageba. Sí leɲe di nuu-kala bee guunun.

3

Maa ɲaa wu-zɔɲɔɔ bua-na kala ɛ

¹ Bula pi Wia niaa di ba jon ba titia pi nialin si ken dolun ba ɛ ari nialin sí beɲba a tutoba, a ɲaa siri di ba ɲaa wii-na kala si zomɔ. ² Bula piba di ba sí wu-bɔɲ kala bula a tige nuu-kala ɛ. U bi maga di ba cho yuosun, ama u maga di ba dii nanɔɲsun ne a leɲ di ba siaa fieɛ nuu-kala teen, ³ beɛ wiaa la ma titia fa ɲaa ni-yaara ne, a fa bi Wia niin to. La fa kerɪ Wia wonɲii-la ta ne a ɲaa wu-bɔɲɔɔ ne. La fa to la tuɔɔre wu-ɲaalaa hariɲ ne. La fa cho di niaa juu wu-bɔɲɔɔ a fa ken yaribierin dɔɲɔ ɛ. Niaa fa berɛla, la ma fa berɛba. ⁴ Ama la Laataara Wia dage ɲii u si ken zile ari ɲii u si cho niaa. ⁵ U laala ta. U bi naga ari la si ɲaa tuɔ-pul timma ne tii u laala ta. Ama u sí fá niaa nennige ne tii u laala ta. U laala ta ne, beɛ wiaa ba fola Wii-chuɔle liin Wia Diɲ-zɔɲ-la dolun ɛ. Ɗii dage ari Wia bira wasa lulla ne, la ken mii-falin u teen. ⁶ Wia to la Laataara Yesu Kirisito ɛ ne a jon u Diɲ-zɔɲ-la a hela ɛ worun. ⁷ U laɲorimɔ ɛ u ɲaa ɲii di la ken tuɔ-pula u sipaan, a wuo ken miisi-la si bi dere, wii-la la sí yielu ɛ. ⁸ Wiin deen sene ɲaa wutitii ne. Mii che di ɲ paala chaasa bul wiaa deenba, di nialin si laa Wia wiaa dii, di ba ɲaa siri di ba ɲaa wu-zɔɲɔɔ bua-na kala ɛ. Wiaa deenba ɲaa wu-zomɔ ne. Ba jan wuo pe niaa ɛ.

⁹ Má leɲ ni-yaari wu-kaa-lerin, a sí ma naabalimaba gentine si duomo diisu. Ma sí yuosun he a sí dɔɲɔ yuo a tin wialin Moosis fa si ɲmunsa bil di niaa tuto ɛ. Ba ɲaa wu-peiba ne, ba bi nuu ɛ pe. ¹⁰ Di nuu he ma tuɔɲ aa che duu ken ma nyusun yage dɔɲɔ, yiru a kpurise u digilaa. Di u ne via an ɲɲaa, bira yiru a lere u digilin ɛ lia, an liise ɲ nisin u ɛ. ¹¹ Nii-la sí ɲaa ɲii via wutitii-la ne aa ɲaa haacheba maa. U wu-ɲaalaa jan dii u titia sariya.

Wu-kaanij

¹² Di mi ne tinj Atimas koo Tikikas duu kɔ η teenj, hɛ dolun aŋ kɔ mi teenj Nikopolis ɛ, bɛɛ wiaa mi biina mi jaŋ hɔŋ dime waariŋ cheŋsi-la tuɔŋ. ¹³ Di Ziinas sariya didiiri-la ari Apɔlɔs nii venj ba wonbiin, pɛba ɛ worun. Piba ku-la kala ba sii che. ¹⁴ Lenj di la niaa ma gunne di ba ŋiŋaa wu-zɔŋŋɔɔ a wuo pipe nialin si maga di ba pɛ ɛ. U maga di ba tinj tintinj-zɔŋŋɔɔ duu keŋ doho.

¹⁵ La di nialin kala si hɔnɔ, laa chuɔlun. Chuɔɛ nialin kala si laa Yesu wiaa dii a chola. Wia jaŋ pɛma kala ɛ worun.

TEN-LA PÓOL SI N̄MUNSA PI FALIIMÓJ

¹ Mi-na Póol ari la naanbie Timoti ne n̄munse tenin deen a pi n̄-na Faliimój. N̄ ne n̄aa la nanđonchoolun, a bira n̄aa la đonđo tiina la tinđin̄n̄aa le. Ba ken̄mi t̄o dia a tin̄ Yesu Kirisito wiaa.

² La bira n̄munse tenin deen a pipi nialin̄ si laa Yesu wiaa dii aa hilimi n̄ dia le, a bira n̄munse tenin deen a pipi la dihaala Afia ari la dibaala Akipas. Akipas n̄aa la laali-yuoroo đonđo ne Kirisito tinđin̄n̄aa le.

³ La Nyimma Wia ari la Tiina Yesu Kirisito lah̄rim̄o le, ma jan̄ h̄on̄ ari yarifielaa.

Póol l̄lle Wia a mu tige Faliimój le

⁴ Bua-na kala le di mi n̄i chūle Wia, mi ma yie l̄lle Wia a pipin̄ ne. ⁵ Mii nii n̄ii n̄ si cho Wia n̄iaa, ari n̄ii n̄ si laa la Tiina Yesu Kirisito wiaa dii. N̄ii ne mii l̄lle Wia ne a tin̄ n̄ wiaa. ⁶ N̄ si bul wialin̄ a pi n̄iaa đonsun̄ n̄ii, mi yie sul Wia a pipin̄, di n̄ii jan̄ len̄ di la jin̄ wu-z̄on̄-na kala la si na Kirisito teen̄. ⁷ Mi naan̄biichoolii, n̄ sí cho Wia n̄iaa worun̄, n̄ii n̄aa mi ma tūon̄ t̄ore kin̄ken̄, mi nyun̄ ma nyaase, bēe wiaa n̄ lēje Wia n̄iaa tūon̄ pin̄ di-bala ne.

Póol sul Faliimój duu ken̄ Oniisimas worun̄

⁸ La di Kirisito si n̄aa kubala, mi fa jan̄ ken̄ dolun̄ di mi chaasa dagin̄ wii-la si maga di n̄ n̄aa. ⁹ Mi-na Póol ne paala chin̄ Yesu Kirisito naasin̄ le a n̄ lēle he sarika le a tin̄ u wiaa. N̄ii ne tii mi fa jan̄ wuo chaasa fugun̄ di n̄ n̄aa wii-la si maga di n̄ n̄aa. Ama mi si chon̄ n̄ii, mi jan̄ sulun̄ di n̄ n̄aa wii-la ari tūtorun̄. ¹⁰ Wii-la ne n̄la: Mii sulun̄ a tin̄ mi bie Oniisimas wiaa. U naga ari mi titia bie ne, bēe wiaa, mi lē ne u to a laa Yesu wiaa dii bua-la le mi si he sarika le. ¹¹ Bua

kubala le u fa he n̄ teen̄ ne an̄ bi tin̄timii kala tima pin̄. Ama lēle, duu ne k̄o n̄ teen̄, u jan̄ wuo n̄aa wiaa yuge a pin̄, a len̄ mi ma tūon̄ t̄ore. ¹² Mi jan̄ len̄ u miira k̄o n̄ teen̄ ne a nage mi titia Póol fa si k̄o n̄ teen̄ n̄ii. N̄ii wiaa, k̄enu worun̄ ari n̄ fa si jan̄ ken̄mi n̄ii. ¹³ Mi fa cho duu he mi teen̄ ne. Mi ha si he sarika le n̄ii a tin̄ Yesu wu-z̄om̄o-la wiaa, u fa jan̄ wuo p̄emi le ari n̄ fa si jan̄ p̄emi le n̄ii. ¹⁴ Ama mi bi che di mi fugun̄ di n̄ p̄emi le. Mii che di n̄ to n̄ titia tūtorun̄ le ne a p̄emi le. N̄ii wiaa mi bi jan̄ n̄aa wii-kala see di n̄ sēye.

¹⁵ Oniisimas si lii n̄ teen̄, u bi diene, ama u jan̄ miira k̄o n̄ teen̄ lēle. Duu ne miira k̄o, u jan̄ he n̄ teen̄ deen̄ deen̄. ¹⁶ Oniisimas n̄aa n̄ yomo ne an̄ lēle miira k̄o n̄ teen̄. Ama lēle u kii yomo. U n̄aa la naan̄bii-titii si laa Yesu wiaa dii. Mi cho u wiaa worun̄. N̄ ma jan̄ chou worun̄, ari u si n̄aa n̄ yomo ari n̄ naan̄bie kala ne la Tiina Yesu teen̄. ¹⁷ Di n̄ ne bene di mi n̄aa n̄ nanđon̄fian̄, duu ne miira k̄o, k̄enu worun̄ ari n̄ fa si jan̄ ken̄mi n̄ii. ¹⁸ Duu ne n̄aa wii cheyin̄, jon̄o cheu a tin̄ mi wiaa. Duu ne dii n̄ chimin̄ maa, mi jan̄ tin̄in̄. ¹⁹ Mi-na Póol, mi titia nisin̄ ne n̄munse tenin̄ deen̄ a pipin̄. Mi jan̄ tin̄in̄. Sí yu ari mi-na Póol le ne n̄ to ken̄ miisin̄ Yesu teen̄. N̄ii wiaa mi ne laa n̄ miisin̄ ta. ²⁰ Mi naan̄bii, mi saa sulun̄, p̄emi le wiin̄ deen̄ le. La Tiina Yesu Kirisito dolun̄ le, len̄ di mi tūon̄ t̄ore.

²¹ Mi laa dii ari mi si n̄munse wiin̄ deen̄ pin̄, n̄ jan̄ n̄aa wii-la mi síi che. Mi jima ari n̄ jan̄ paala n̄aa kii n̄ii. ²² Pē che dia a n̄aa siri bilmi le, bēe wiaa mii yiēle ari ma si chūle Wia pipimi n̄ii, Wia jan̄ laa ma kala sulaa a len̄ di mi miira k̄o ma teen̄.

Póol ari n̄iaa đonsun̄ chūle Faliimój

²³ Baal kubala ma ne he daha. Baa yirē Epafiras. Ba k̄enu t̄o dia a p̄emi le a tin̄ Yesu Kirisito wiaa ne. Uu chūolun̄. ²⁴ Maak ari

Arisitaakis ari Dimas ari Luuk, ba ma ŋaa mi tiŋtinni-dɔŋsun nɛ. Ba maa chuolun.

²⁵ La Tiina Yesu Kirisito lahorimo le, ma jaŋ hoŋ ari yarifiɛlaa.

TEN-LA BA SI NMUNSA PI HIIBURU TINŊŊAA

Wia Bie ne kii Wia tinɗaaraa

¹ Faafaa-la Wia bul wiaa pi la naabalimaba a yuge ne. Wonɓie-la u si to bul wiaa piba ma yuga ne. U to nialin fa sii bul wiaa, Wia Din-zon-la dolun le ne a bul wiaa deenɓa piba. ² Ama leele tapulaa deenɓa, u to u Bie le ne a bul wiaa pila. U leɗe u Bie deen ne ken kuɗ-kala dolun. Wia sii che duu ɗaa dunia, u leɗe u Bie ne ɗaa. ³ Wia si ken tula-la, u ne u Bie ma ken. Nii Wia si naga, nii titia ne u ma nage. Wialin u sii bul ken dolun. Dol-la ne u kaa beɗ kuɗ-kala si he dunia le. U si ku tuu dunia, u piise niaa disinnin ta ne. U si ɗaa nii dexe, u jila hon Wia seme, ni-duon di-honun. ⁴ U ne kii Wia tinɗaaraa kala. Yiri-la u si laa Wia teen, u ma ne kii yiri-la Wia tinɗaara-la si laa.

⁵ Wialin Wia si bula a tigeu le ne ɗla:

“N ɗaa mi Bii ne,
mi ne lulun jinin.”

U saa bira bula a tigeu le:

“Mi jan ɗaa ɗ Nyimma,
ɗ ma jan ɗaa mi Bii.”

Wia tinɗaari bee le ne Wia ha bul wiin deen? Ba kuɗ-kala le dee Wia bul wiin deen. ⁶ Bua-la le u si leɗe u Bie ku tuu dunia, u bira bula a bul, “Wia tinɗaaraa kala jan tuu kpirimi u sipaan a chuolu.”

⁷ Wialin Wia si bula a mu tige u tinɗaaraa le ne ɗla: U si,

“Mi leɗe mi tinɗaaraa nage pelin
ari nyin-gelin ne.”

⁸ Ama u si bul wiaa a tige u Bie le, ɗla ne u bul: U si,

“N kuoron jan he dime a kaa mu
deen deen.”

Wia tuo-pul kaa ne jan ɗaa ɗ
kuori-daantiga di ɗ kaa beɗ ɗ
niaa.”

⁹ “N cho wutitiiba ne a kii wu-nyiarin.

Nii ne tii ɗ Nyimma Wia liisin
di ɗ yuga kii ɗ donsun tinɗaa a
bibenɓa.”

¹⁰ Wialin ba bira si bula a tige u Bie le ne ɗla: Ba si,

“La Tiina, ɗ ne ta tinteen bunɓun-
la,

a ta wia nyun maa.

¹¹ Wia nyun ari tinteen kala jan lel,
ama ɗ-na jan he dime.

Ba kala jan birime ku-binaa a
kose, ari gennin sii kose nii.

¹² Ba jan nage gerin di ɗ kaa kpen.

N jan kenɓa kaa birime, ari geri-
zon-la si yie birime nii. Di u
zomun ne lia, u bira bi ku-falii
ɗaa.

Ama ɗ-na bi jan ko di ɗ birima. N bi
jan ko di ɗ hiesa.”

¹³ Wialin Wia bira si bula pu ne ɗla:
U si,

“Ku hon mi seme, ni-duon di-honun,
see mi yuo dii ɗ dindonɗoo kala
dexe.”

Wia tinɗaari bee le ne Wia ha bul
wiin deen? Ba kuɗ-kala le dee Wia
bul wiin deen. ¹⁴ Wia tinɗaara-la
kala ɗaa Wia tinɗinnaa ne. Wia yie
tinɓa ba mu pe nialin u sii che u laa
ta le ne.

2

Yesu ne ɗaa la Laataara

¹ A tin wiin deen wiaa, u maga di
la ken wialin la si nia worun, a si
harin miiru. ² Wialin Wia tinɗaaraa
fa si bula pi Iziral tinɗaa fa dolie ne
worun. Di nuu ne fa bi baa to, koo di
nuu ne fa chei ba kuɗ, ba yie dogisu
ne worun. ³ Wia sii che duu laala ta,
nii ɗaa wu-bal ne a kii wialin Wia
tinɗaara-la si bula. Di la ne bi wii-
la seye, wii-kala bira tuo duu laala
ta, see duu dogisela. La Tiina Yesu
ne laa sipaan bul wii-la. Nialin ma
si nii wii-la bula pila ne. ⁴ Wia ma
titia daga ari wii-la ba si bula ɗaa
wutitii ne. U dage u dolun a ɗaa wu-
kpunkperisin ari wu-magilaa kala.
Wia ma to u tuotonun le ne a leɗ niaa

keŋ doluŋ, di ba tiŋ ba tiŋtiŋŋaa u Diŋ-zɔŋ-la doluŋ le.

⁵ U bi naga Wia joŋ tiŋtee-falii-la si jaŋ kɔ a he Wia tiŋdaaraa nisiŋ le ne di ba biben. Tiŋtee-falii-la wiaa ne la bulaa pima. ⁶ Wia teniŋ tuɔŋ seme doŋɔ ba bula,

“Bee kuŋ ne nuhuobiine ŋaa ŋ bibiine u wiaa, bee kuŋ ne nuhuobiine bie ma ŋaa ŋ bibenu?”

⁷ Ŋ si ta nuhuobiine, ŋ leŋe Wia tiŋdaaraa kiiu mua ne, ama ŋ leŋe nuhuobiine ne keŋ yiriŋ ari doluŋ.

⁸ Ŋ joŋ kuŋ-kala ne a he u nisiŋ le u biben.”

Ŋ si joŋ kuŋ-kala he nuhuobiine nisiŋ le nii, ŋ leŋe u keŋ ba kala doluŋ ne. Ama lee le la na di nuhuobiine ha bi kuŋ-kala ka beŋ. ⁹ La na ari Wia fa leŋe Wia tiŋdaaraa ne kii Yesu mua. Ama lee le Wia leŋe Yesu yuge a keŋ yiriŋ maa, bee wiaa u na heeŋ ne a suu. Wia lahorimo le ne u fa ŋaa nii, duu wuo laa nuhuobiinee kala nyuŋ a suu.

¹⁰ Kialiŋ si he dunia le, Wia ne ŋaaba a tiiba maa. U sii che di u biiriŋ yuge a kɔ u teen, u leŋe ba sipaa-laara chaasa na heeŋ ne woruŋ duu sene wuo laaba ta. ¹¹ Nii-la si piise niaa disinniŋ ta, ari nialiŋ disinniŋ u si piisa ta, ba kala nyimma ŋaa kubala ne. Nii ne tii u ŋaa nii a wuo yire ba kala u naanbiiriŋ, ka hiisiŋ buu kene. ¹² Wialiŋ Yesu si bula pi Wia ne ŋla:

“Mi jaŋ yire ŋ yiriŋ mi naanbiiriŋ teen.

Nialiŋ si hilime aa chuɔluŋ tuɔŋ mi jaŋ denniŋ.”

¹³ U bira bula,

“Mi jaŋ laa ŋ wiaa kala dii,”

a bira bul,

“Nami ari ŋ biiri-la kala ŋ si joŋo pimi.”

¹⁴ Biiri-la Wia si joŋo pi Kirisito keŋ chaliŋ ari yaraa ne. Nii titia ne Kirisito ma keŋ chaliŋ ari yaraa duu suu a wuo yuo dii Sitaani, nii-la si keŋ suuŋ doluŋ, ¹⁵ a wuo laa niaa

ta, nialiŋ sii fá suuŋ a ŋaa suuŋ yosi ba miisiŋ kala le. ¹⁶ Nii wiaa u bi naga ari u kɔ duu pe Wia tiŋdaaraa le ne, ama u kɔ duu pe Abiraham doho niaa le ne. ¹⁷ Nii ne tii u birime nuhuobiine a ma nage u naanbiiri-la, ba wii-wii-kala le. U ŋaa nii duu wuo ku ŋaa nialiŋ si tima pipi Wia niaa nyuŋ kuhian u naanbiiriŋ tuɔŋ ne a wuo fába nennige, a wuo ŋaa ni-titii, a wuo pe nialiŋ le Wia wonbiiŋ le, a wuo leŋ di Wia joŋ u baaniŋ u fa si kene a tiŋ niaa haacheba wiaa ta. ¹⁸ U titia na heeŋ ne woruŋ. Sitaani ma fa magisu. Nii wiaa u jaŋ wuo pe nialiŋ Sitaani sii magise le.

3

Yesu ne kii Moosis

¹ Nii wiaa mi naanbiiriŋ si bi disinniŋ kene Wia sipaan, Wia ne yirela di la kɔ u teen. U saa maga di ma joŋ Yesu wiaa he ma nyuŋ le. U ne ŋaa Wia nanzɔɔ a ŋaa nialiŋ si kpu pusuŋ pipi Wia kuhian maa, wonbii-la la sii to le. ² U to nii-la si liisu niŋ woruŋ ne a tima pu, ari Moosis fa si to Wia niŋ nii a tima pi Wia niaa. ³ La jima ari nii-la si saa dii-zomuŋ ne maga duu laa yiriŋ a kii dia-la u si saa. Nii titia ne yiri-la Yesu si laa ne yuga kii Moosis yiriŋ. ⁴ Dia-na kala si he dime, nuu ne saa. Ama kialiŋ kala si he dime, Wia ne ŋaa. ⁵ Moosis fa ŋaa tiŋtinni-titii ne Wia niaa kala tuɔŋ a tima pipiba. U ne fa bul wiaa piba a tige wialiŋ si jaŋ kɔ le. ⁶ Ama Kirisito-na fa ŋaa Wia Bii ne, a ŋaa ni-titii a tima pipi Wia niaa. Di la ma ne keŋ nyu-duoŋ a tiŋ kialiŋ la sii yielu wiaa, la ma jaŋ wuo ŋaa u dia niaa.

Nii la si jaŋ ŋaa a na wiese Wia teen

⁷ Nii wiaa, Wia Diŋ-zɔŋ-la bula pila ari,

“Jiniŋ, di ma ne nii Wia yiikoro,

⁸ ma sí siiduon keŋ, ari nialiŋ fa si lii Wia hariŋ giriŋ tuɔŋ si keŋ siiduon nii.

Bua-la ɛ nɛ ba magisemi a ŋaa mi na baaniŋ.

⁹ Lee-la ma naabalimaba magisemi nɛ woruŋ, a na mi wu-ŋaalaa jisiri mahiri balia.

¹⁰ Nii wiaa nɛ mi baaniŋ sii niaa deenba kala nyuŋ. Nii nɛ mi bul,

‘Ba tuobiinaa yie ŋaa ba yenŋi nɛ, ba bi mi niiri wiaa ka to.’

¹¹ Nii nɛ mi na baaniŋ a ŋmiese a bul,

‘Mi bi jaŋ piba di-honuŋ di ba hono wiesi da.’ ”

¹² Mi naanbiiriŋ, má pɔ ma titia ɛ di ma tuon nuu sí wu-bon biinu. Di u nɛ ŋaa nii, u bira bi jaŋ laa Wia wiaa dii. U jaŋ jon hariŋ yia Wia-la si weye. ¹³ Ama má pɛ dono ɛ tapulii-na kala a lii jiriŋ a kaa mumu, di wu-bonho sí wuo nyise ma kuŋ-kala a wuo ŋaa di ma ŋaa siiduo wiaa Wia sipaan. ¹⁴ Wialiri la si laa dii bunbun, di la nɛ kenba nii a kaa mu wuu, la di Kirisito kala jaŋ ŋaa kubala. ¹⁵ Wialiri ba si bul Wia teniri tuon nɛ ŋla:

“Jiriŋ, di ma nɛ ko di ma nii Wia yiikoro, ma sí siiduon ken ari nialiri fa si lii Wia hariŋ si ken siiduon nii.”

¹⁶ Kubɛɛba nɛ nii Wia yiikoro an lii Wia hariŋ? Nialiri fa si to Moosis hariŋ a lii Ijipiti tinteen ɛ nɛ ŋaa nii. ¹⁷ Kubɛɛba nɛ fa leŋe Wia baaniŋ sii ba nyuŋ jisiri mahiri balia? Nialiri fa si bi u niiri wiaa to ɛ nɛ leŋe u baaniŋ sii. Ba nɛ u leŋ ba suu giriŋ tuon nii. ¹⁸ Kubɛɛba ɛ nɛ Wia ŋmiesa hɛ ari ba bi jaŋ na wiese-la u fa sii che u jon pi u niaa? Nialiri fa si bi Wia niiri wiaa ka to ɛ nɛ u bul nii. ¹⁹ La na ari ba si bi Wia wiaa laa dii nɛ tii ba bi wiese-la wuo na Wia fa sii che u jon pi u niaa.

4

¹ Wia lɛɛɛ bula pila ari la jaŋ wuo ko u teen a na wiese. Nii wiaa má leŋ di la ken la titia woruŋ duu

sí wuo na di la donsun ŋaa wiaa chei. Di la nɛ ŋaa wiaa chichei, la bi jaŋ na wiese u teen. ² Wia wuzomɔ-la ba si bula pila, ba fa bula pi la naabalimaba ma nɛ. Ama ba bi wialiri laa dii. Nii wiaa wialiri biba ɛ pɛ. ³ La nialiri si laa wialiri dii jaŋ wuo mu Wia teen a na wiese-la ari Wia si bul nii. U si,

“Mi na baaniŋ, nii nɛ tii mi ŋmiese ari
ba bi jaŋ na wiese-la mi fa sii che mi jon pi piba.”

Ama la jima ari bunbun-la Wia si ŋaa dunia dɛɛ, u tin u tinŋŋaa kala dɛɛ nɛ. ⁴ Wialiri ba si bula Wia teniri tuon a tige che-pemiri cheŋ nɛ ŋla: Ba si,

“Wia si ŋaa dunia dɛɛ, u wiese nɛ che-pemiri cheŋ.”

⁵ Lee-la titia Wia bira bula,
“Ba bi jaŋ na wiese mi teen.”

⁶ Nii-na niaa donsun jaŋ na wiese-la. Ama nialiri si laa sipaan nii Wia wuzomɔ-la bi wiese-la na, bɛɛ wiaa ba bi wialiri ba si nia to. ⁷ Nii nɛ Wia bira liise tapulii kubala. Tapulii-la nɛ ŋaa jiriŋ. U to la naabalima Devit ɛ nɛ a bul wiiri deŋ. U si,
“Jiriŋ, di ma nɛ ku nii Wia yiikoro, ma sí siiduon ken.”

⁸ Bua-la ɛ ba naabalima Josua fa si ŋaa Iziral tinŋaa sipaa-laara, u biba wiese pa. Di u nɛ fa piba wiese, Wia fa bira bi jaŋ bul tapulii don wiaa. ⁹ Nii wiaa, tapulii don nɛ hɛ dime, Wia niaa si jaŋ wiesi. ¹⁰ Nii-la kala si na wiese Wia teen, u tiina leŋ u tinŋŋaa nɛ an wiesi, ari Wia ma si tin u tinŋŋaa dɛɛ an wiesi nii.

¹¹ Má saa leŋ di la hɛ don u na wiese-la Wia sii che duu jon pila. Nialiri fa si bi u niiri wialiri to, ba bi wiese-la na. Di la ma nɛ bi u niiri wialiri ka to, la ma bi jaŋ na wiese-la. ¹² Wia niiri wiaa weye a ken niiri a kii sia niiriŋ balia kala sii dii nyagaga. U yie wuo too juu nuhuobiine, a ken u dima ari u miiriŋ kaa pɔɛ dono ɛ. U yie wuo jiriŋ nuhuobiine tuon ari u tuobiinaa kala. ¹³ Kuŋ-kala tuo si jaŋ wuo ken

u titia faa Wia teen. Wia na kuŋ-kala ne, u teen ba kala he pulumun tuon ne. U jan len di la dage la wu-ŋaalaa kala a pu.

Yesu ne ŋaa nialin si tima pipi Wia niaa nyun kuhian

¹⁴ Yesu ne ŋaa Wia Bie a bira ŋaa nialin si tima pipi Wia niaa nyun ba tuon kuhian. U ne ŋaa kuhiasila tuon kuhian maa. U si tin u tintinŋaa dere, u jil wia nyun a mu Wia teen. La kuhian si yuga nii, ma len di la ken wialin la si laa dii worun. ¹⁵ Yesu bi nage nialin si kpu pusun pipi Wia kuhiasin si bi niaa nennige ka fa nii. U ne wuo fala nennige a jin wialin sii walimela, bee wiaa ba ma walimu ne. Sitaani paala magisu ne, ama u bi wu-bon kala ŋaa. ¹⁶ Nii wiaa ma len di la ken nyu-duon a wuo yi lee-la Wia si hono, duu wuo fala nennige. Di la ne juu wii-kala, u jan fala nennige a pela le.

5

¹ Nialin si kpu pusun pipi Wia kuhian-na kala, ba yie liisu niaa tuon ne. U he nuhuobiine ari Wia pege a laa kiaa pipi Wia, an pe kpu pusun a piise niaa disinnin tita. ² U siaa yie fiele niaa nyun ne worun, nialin sii ŋaa wu-bonŋoo an bi jin, ari nialin si yenje Wia wonbii-la le, bee wiaa u ma titia yie ŋaa wiaa chichei ne. ³ A tin nii wiaa ne u yie kpu pusun pipi Wia a tin u titia haacheba wiaa, di Wia piise u disinnin ta, a bira kpu pusun pipi Wia maa a tin ni-kaana-la kala wiaa, di Wia piise ba ma disinnin ta. ⁴ Nu-kala bi jan wuo liise u titia a titin tintimin deen. Wia ne yie liise tiina ari u fa si liise Eron nii. ⁵ Nii titia ne Kirisito ma bi u titia kaa yuge duu tin tintimii-la nialin si kpu pusun pipi Wia kuhian sii tin. Ama Wia ne liisu. Wii-la Wia si bula pu ne nla: U si,
“N ŋaa mi Bii ne,
jinin mi ne lulun.”

⁶ Wia tenin tuon seme dono maa u bula,

“N nage nii-la fa si kpu pusun pipi
Wia dono ba sii yire

Melikizedeki ne.

N jan tima pipi Wia niaa nyun a kaa mu deen deen.”

⁷ Yesu fa si he u miisin le dunia deen le, u chuole Wia a faasa yel siiliirin a sul Wia, u-na nii-la si jan wuo laa u miisin ta duu si suu. Yesu seye duu ŋaa wialin sii tere Wia tuon ne, nii ne tii Wia laa u Wii-sula. ⁸ Yesu fa ŋaa Wia Bii ma ne, ama u na heen ne worun. U si na heen nii, u ku jin nii u si jan ŋaa a to Wia nin worun. ⁹ U si to Wia nin kala dere, u ku ŋaa nialin kala ma sii to u nin sipaalaara, a laaba ta a kaa mu deen deen. ¹⁰ Nii ne Wia liisu duu ŋaa nialin si tima pipi Wia niaa nyun kuhian, a tima pi Wia ari Melikizedeki fa si tima pi Wia nii.

Ma waa Wia wiaa le, an si harin jono yia Wia wu-zom-la

¹¹ La ken wiaa yuge ne di la bul a tige wiin deen le. La bi jin nii la si jan wuo bul wii-la di ma jin u bubuon, bee wiaa leele ma digilaa kparima ne. Ma bi wialin bubuon wuo jin lima lima. ¹² Ma si nii Wia wu-zom-la, u diene ne. U fa maga di ma ne didage niaa, ama ma bira che nuu ne duu didage Wia nin wialin ma si nia bunbun. U naga maa che yilin ne di ma wase. Ma ha bi ku-duorun wuo didii. ¹³ Bii-mulo ne yie wiwase yilin, u bi ku-duorun wuo didii. Nii titia ne ma ma nage. Ma ma ha bi wu-duorun wuo jinin. Wialin ba si dagema jan len di ma ken tuo-pula Wia sipaan. ¹⁴ Nihian ne wuo ku-duorun didii. Nialin si waa dere Wia wiaa le nage nihiasin ne. Nii ne tii ba yie wuo jin wu-bonŋoo ari wu-zonŋoo pege, bee wiaa ba venee ŋaa wu-zonŋoo ne.

6

¹ Nii wiaa la si wuo jin bunbun wialin ba si bula pila a tige Kirisito le

nii, u maga di la kiele mu sipaan ne a wuo waa dere Kirisito wiaa le. Ma si leŋe di la bira suomo bubul wialin la si jan naa a birima lii la haacheba-la le, an leŋ la wu-bomɔ-la la fa sii naa. La bira bi che di la suomo bul nii la si jan to a laa Wia wiaa dii. ² La ma bira bi che la bul nii ba si jan fola Wii-chuoŋe liin, ari nii ba si jan jon nisaa danla le, ari nii niaa si jan suu an sii suun le, ari nii Wia si jan dii niaa sariya a jon cheerin pi donsun a kaa mu deen deen, a bira jon miisin pi donsun ma a kaa mu deen deen. ³ Di Wia ne seye, la jan kieli bunbun wialin an mu sipaan. ⁴ Di Wia ne wuo suri niaa siaa di ba wuo jin u wiaa, a wuo laa wialin si lii Wia teen dii, a bira ken u Din-zon-la maa, ⁵ a wuo nii Wia niin wiaa a jin ari u niin wialin zomɔ ne kinken, a bira wuo na Wia kuorii-la si jan ko dolun si mage nii ba miisin le leele nla, ⁶ di ba ne jin wiaa deenba kala an bira jon harin yia Wia wu-zomɔ-la, ee ne ba jan bira naa di ba birima lii ba haacheba le, an bira ko Wia teen? Ba bira bi jan wuo miira ko Wia teen. U saa naga ari ba bira wasa kpaase Wia Bie mere daa-gesee nyun ne. Ba si naa nii, ba bira leŋe hiisin diiu ne niaa tuon. ⁷ Di duonun ne nii he tinteen le, tintee-la yie wuo nyua duon lii-la. U si nyua lii-la nii, kiaa wiwase lee-la. Nialin sii pere lee-la ma nina kiaa worun. Tintee-la zomɔ piba ne. Wia ne pe tintee-la le. ⁸ Ama di yan ari sosun dundun nii nyu lee-la, nii-na tintee-la bi zomɔ pi nialin. Wia via tintee-la wiaa ne. Ba jan chaane nyinin he duu dii buru.

⁹ Laa bul wiaa deenba kala, ama ma-na, la nanɔn-chooloo, ma-na kpia ne. Ma bi tintee-loru-la wiaa la si bula naga. La naa yarida ari Wia jan laama ta, ¹⁰ bee wiaa Wia ken wutitii. U bi jan bee kieli tintimii-la ma si tima pu. A tin u wiaa ma cho u niaa ne a tima pipiba, an haa titin nii. ¹¹ La saa cho di ma kun-kala fiese siin aa yiele kialin ma si

jan na, a jin worun ari ma sene jan naba, a ken nii naan le a mu dere. ¹² La bi che di ma ken yariwiin. Nii ne tii la bul nii. Laa che di ma to nialin si laa Wia wiaa dii faafaa naabuusun ne. Niaa deenba chin wialin ba si laa dii le ne a nyalima nii halii, a wuo na kialin Wia fa si bula piba ari ba jan na.

Wialin Wia si bula sene naa ne

¹³ Faafaa-la Wia bil u niin a pi Abiraham an nmiese. Kun-kala fa tuo a yuga a kii u-na Wia duu nmiese. Nii ne u nmiese u titia. ¹⁴ U nmiesa a bul, "Wutitii, mi jan pen le a leŋ di n doho niaa pun." ¹⁵ Nii ne Abiraham ken kenyiri a wuo nyalime, a sene na wii-la Wia fa si bula pu ari u jan na. ¹⁶ Ama di nuhobiinee nii che di ba nmiese, ba yie nmiese ku-la si kiiba ne. Di ba ne ken wii ma kaa lilere, ba yie nmiese ne. Di ba ne nmiesa, wii-la sene chin. ¹⁷ Wia fa bula pi u niaa ari u jan jon kiaa piba. U fa sii che di ba chaasa jin ari u bi jan ken u niin birime, ama u sene jan jon kialin piba, u nmiesa dan ne. ¹⁸ Wia saa naa wiaa balia ne. U si wuo bul wii-la an pe nmiese nii, wiaa deenba baliamin bira bi jan ko di ba birima, bee wiaa Wia bi wiaa nyia. U bul wiaa deenba a pi la nialin si fa mu Wia teen, di la laa la titia dime ne. U bul nii pila di la nyun nyaase ne a tin kialin Wia si bula ari u jan naa pila wiaa, a ken kialin la sii yielu worun. ¹⁹ La sii yiele kialin nii, la jan wuo nyire la boye a chin wialin la si laa dii le worun, a wuo juu Wia di-zon-la, lee-la patiisa-balin fa si kere. Ni-peiba bi lee-la wuo juu. ²⁰ Yesu ne naa nialin si tima pipi Wia niaa nyun a kaa mu wuu, ari baal kubala ba faa yire Melikizedeki fa si naa nialin si tima pipi Wia niaa nyun kuhian a kaa mu wuu nii. Yesu ne laa sipaan juu di-zon-la a tin la wiaa, di la ma wuo to u harin a juu lee-la.

7

Ba bul wiaa a tige Melikizedeki le, nii-la si kpu pusun pipi Wia

¹ Baal-la ba si yiru Melikizedeki, u fa ŋaa taŋ kubala kuoru ne aŋ fa pe ŋaa nii-la si kpu pusun pipi Wii-jaribako. Taŋ-la yirin ne Selem. Bua kubala Melikizedeki cheŋ Abiraham duu mu yuo laalin dii tintee doŋsun kuoroo aŋ kuko. Nii ne u sul Wia pu duu peu le. ² Nii ne Abiraham keŋ kialin u si paa laal-la le a kaa kpaaleree fii, a joŋ doŋo pu. Melikizedeki yiri-la bubuon ne kuoru-la si keŋ tuo-pula Wia sipaan. Baal-la ne bira ŋaa Selem kuoro maa. Selem kuoro bubuon ne, kuoru-la si keŋ u niaa hoŋ som. ³ Melikizedeki fa bi nyimma kene, u bi naan ma kene. Nuukala fa bi u doho jin, a bi bua-la ba si lulu ari bua-la u si suba ma jin. Ama u fa nage Wia Bii ne. U ŋaa nii-la si tima pipi Wia niaa nyun a kaa mu wuu.

⁴ Ma jaŋ na di u fa ŋaa ni-bal ne. La naabalima Abiraham fa si lii laalin ko, u paala kpaal kaa pu ne. ⁵ Baal doŋ ma ne fa he dime. U yirin ne fa Liivai, u biirin ne fa ŋaa nialin si kpu pusun pipi Wia doho niaa. Wialin Moosis fa si ŋmuŋsa bil di niaa tuto tuoŋ ba bula ari Abiraham doho niaa kala keŋ ba kaa kpaaleree fii fii, a joŋ doŋo pi ba naanbie Liivai ari u biirin. La jima ari Liivai doho niaa ari Iziral tinŋaa doŋsun kala ŋaa Abiraham doho niaa ne. Ama Wia haa bul nii ne. ⁶ Melikizedeki fa bi Liivai doho nuu ŋaa aŋ pe laa kpaalin Abiraham teen, aŋ sul Wia pu duu peu le. Ka Wia ma fa ta niin ne Abiraham teen. ⁷ Ni-balin ne yie sul Wia duu pe nibie le. Wii tuo ba si jaŋ kaa lere a tige wiin deen le. ⁸ Liivai nialin si laa kpaalin deen, ba-naa suu ne. Ama Melikizedeki si laa kaa Abiraham teen, u-na bi jaŋ suu. Ari jinin u ha weye ne. Ba bul nii ne Wia tenin tuoŋ. ⁹⁻¹⁰ Bua-la le Liivai naabalima Abiraham si cheŋ Melikizedeki a keŋ kaa kpaal pu di ba ha bi Liivai lula.

Leele u yie lilaa kaa u niaa teen ne. Ama Abiraham fa si joŋ kaa pi Melikizedeki nii, la jaŋ wuo bul ari Liivai ma fa joŋ kaa puu ne, bee wiaa u ŋaa Abiraham doho nuu ne.

¹¹ Wia si joŋ u niin a pi Moosis, bua-la le ne Liivai biirin suomo tin tin timii-la nialin si kpu pusun pipi Wia sii tin. Di tin timii-la fa pe Iziral tinŋaa le di ba chaasa ŋaa ni-zom, nii-na u bira bi maga di nuu doŋ si nage Melikizedeki ko aa tin nialin si kpu pusun pipi Wia tin tinŋaa. Ama Wia si nuu doŋ jaŋ ko (a pe Iziral tinŋaa le). U-na bi jaŋ lii Eroŋ doho niaa tuoŋ. ¹² Di ba ne liise nuu a bul di u doho niaa dun duna ne kpu pusun pipi Wia, aŋ bira liise nuu si bi u doho niaa tuoŋ lia, see di ba keŋ wialin ba sii to ma kaa birime. ¹³ La Tiina Kirisito wiaa ne baa bul nii. U ma lii doho doŋ tuoŋ ne. Nuukala ha bi doho deen tuoŋ lia a ŋaa nii-la si kpu pusun pipi Wia. Nuukala jima ari Yesu lii Juda doho niaa tuoŋ ne. ¹⁴ Ama bua-la le Moosis fa si bul wiaa a tige nialin si jaŋ kpu pusun pipi Wia le, u bi bula ari ba liise nuu si lii Juda doho niaa tuoŋ.

Yesu ne ŋaa nii-la si tima pi Wia niaa nyun deen deen

¹⁵ Nuu doŋ si tima pipi Wia niaa nyun si folo ko ŋla a nage Melikizedeki, wiaa deenba kala chaasa chin ne. ¹⁶ U tiina si ku ŋaa nii-la si tima pipi Wia niaa nyun nii, u bi naga ari u doho wii ne. U bira bi naga ari wialin ba si ŋmuŋsa bil di niaa tuto ne daga ba liisu. Ama u miisin dolun le ne ba liisu. U jaŋ he dime deen deen. U bi jaŋ suu. ¹⁷ Wia bula pu a bul, “N nage Melikizedeki ne. N jaŋ chin la nyun a tima pipi Wia a kaa mu deen deen.” ¹⁸ Nii wiaa ba joŋ wialin Moosis fa si ŋmuŋsa bil di niaa tuto ta ne. Ba bira bi bubu kene, ba bi jaŋ wuo pe nuu le. ¹⁹ Wialin Moosis fa si ŋmuŋsa bil di niaa tuto bi jaŋ wuo len di nuu-kala wuo chaasa ŋaa ni-zon. Ba si joŋ wu-binaa ta,

wu-falaa ne he dime la tuto. Wu-falaa deenba le ne laa yiele. Ba suri wonbiin pila ne, di la wuo ko Wia teenj.

²⁰ Wia nmiessa ne a danj wu-falaa deenba le u si bula pila. ²¹ Di ba ne fa liise nialinj si kpu pusunj pipi Wia, Wia bi nmiessa he, anj ka ba titinj ba tintinjnaa. Ama la Tiina Wia si liise Yesu, u nmiessa ne a bul, "Mi bi janj kenj mi niinj birime." U bira bula, "N ne nja nii-la si timaa pimi Wia niaa nyunj a kaa mu wuu." ²² Wia ta niinj ne u niaa teenj. Yesu ne u kaa ta nji-la. Wii-la u si bula ne kpia wialinj Moosis fa si nmunja bil di niaa tuto. Nii daga ari u nja wutitii ne.

²³ Bunbunj nialinj fa si kpu pusunj pipi Wia fa yuga ne, bee wiaa ba faa suu ne. Ba sii suu nii, ba bi tintimii-la wuo tinj deenj deenj. ²⁴ Ama Kirisito-na janj nja nii-la si tima pipi Wia niaa nyunj a kaa mu wuu, bee wiaa u bi suu. ²⁵ Nii wiaa, u janj wuo laa nialinj si tou le a ko Wia teenj ta. U janj wuo laaba ta, bee wiaa u janj he dime bua-na kala a sul Wia pipiba duu peba le.

²⁶ Yesu si nja nialinj si tima pipi Wia niaa nyunj kuhianj nii, u nja wuzonj ne a pila. Yesu bi disinj kene, u bi wii-kala cheye. U chaasa nja ni-zonj ne. U kenj u titia pore ne haache tinjnaa le. Wia kenu nja nibal. U si he Wia-janj le nii, u yuga kii kunj-kunj-kala si he dime. ²⁷ Nialinj fa si kpu pusunj pipi Wia kuhiasinj fa yie kpu pusunj tapulii-na kala ne. U fa maga di ba kpu pusunj a tinj ba titia haacheba wiaa ne, anj bira kpu donsunj ma a tinj niaa haacheba wiaa. Yesu-na bi nii nja. U bi pusunj kpua a tinj u titia haacheba wiaa. U liise sarika bala ne a pi Wia a tinj niaa haacheba wiaa. U titia miisinj ne u kaa liise sarika-la. ²⁸ Ba yie to wialinj Moosis fa si nmunja bil di niaa tuto le ne a liise niaa di ba nja nialinj si kpu pusunj pipi Wia kuhiasinj. Nialinj ba si liisa fa kenj haache ne. Ama wii-la Wia si bula a tige u Bie Yesu le to harinj ne a

ko. Wia nmiessa ne an-na liise Yesu duu nja nialinj si tima pipi Wia niaa nyunj kuhianj. U chaasa nja ni-zonj ne a kaa mu wuu. U bi janj ko duu kenj disinninj.

8

Yesu ne timaa pi Wia la nyunj

¹ Wii-la kala la sii bul wu-nyunj ne nja. La kenj nialinj si tima pipi Wia niaa nyunj kuhianj ne. U ne he Wia-janj a honj Wii-jaribako seme, ni-duonj di-honunj. ² Wia di-zonj-la le ne u he a titinj. Wia-dia titia ne nii. Lee-la nuhuobiine dee bi saa. La Tiina Wia ne saa. ³ Di ba ne liise nialinj si kpu pusunj pipi Wia kuhianj-na kala, ba yie liisu duu laa kaaa pipi Wia ne, anj pe kpu pusunj ma pupu. Nii wiaa u maga di nialinj si tima pipi Wia niaa nyunj kuhianj deenj ma jon kunj ne a pi Wia. ⁴ Di u ne saa fa he dunia le, u fa bi janj nja nii-la si kpu pusunj pipi Wia, bee wiaa nialinj si he dunia le a kpu pusunj pipi Wia, ba nii to wialinj Moosis fa si nmunja bil di niaa tuto anj njinaa. ⁵ Niaa deenba si kpu pusunj pipi Wia kuhiasinj tinj ba tintinjnaa ne Wia-dia tuonj dunia deenj le. Ba sii tinj tintinjnaa nii, baa chesi Wia di-zonj-la wiaa ne nii. Wia di-zonj-la titia dee. Moosis fa si nja siri duu he lebinj, Wia fa bul wiaa pu ne. U si, "He lebi-la duu nage ku-la mi si daginj peel-la nyunj." ⁶ Tintimii-la Kirisito sii tinj ne yuga kii tintimii-la bunbunj niaa si tima, bee wiaa Wia tou le ne a ta nji-falinj a pi u niaa. Nji-falii-la ne kpia bunbunj nji-la Wia si ta u niaa le, bee wiaa wii-la Wia si bula bi janj ko di u ta da. ⁷ Bunbunj Wia ta niinj ne u niaa teenj. Di wialinj faa pe u niaa le di ba nja ni-zomjo Wia teenj, Wia fa bira bi janj ta nji donj u niaa teenj.

⁸ U na di bunbunj wialinj bi u niaa le pe di ba wuo nja ni-zomjo, nii ne u bira bul, "Tapulii kubala mi janj bira ta nji donj mi niaa Iziral tinjnaa teenj, ari Juda doho niaa le."

- 9 Mi si jaŋ ta n̄ii-la, u bi jaŋ nage
 buŋbuŋ n̄ii-la mi fa si ta ba
 naabalimaba teen
 bua-la ɛ mi si keŋba kaa lii
 Ijipiti tinŋteen.
 Ba fa bi mi n̄ii-la ɛ to,
 n̄ii ne tii mi joŋ hariŋ yiaba.
- 10 Wialin la Tiina Wia fa si bula ne
 ŋla: U si,
 “Tapulii kubala ne jaŋ yi di mi
 ta niin mi niaa Iziral tinŋaa
 teen.
 Mi jaŋ leŋ di ba jin mi niin wiaa
 woruŋ, a joŋo he ba nyuŋ
 ari ba tuoŋ kala ɛ.
 Di mi ne ŋaa n̄ii, mi jaŋ ŋaa ba Wia,
 di ba ma ŋaa mi niaa.
- 11 Bua deen ɛ nuu-kala bira bi jaŋ
 dage u doŋo tiina
 koo u naanbii n̄ii u si jaŋ ŋaa a
 jinmi.
 Nuukala jaŋ jinmi,
 hanbiisin ari kuhiasin kala.
- 12 Mi jaŋ fába nennige a joŋ ba
 haacheba a cheba.
 Mi bira bi jaŋ liliisi ba wu-
 boŋŋoo.”
- 13 Wia si bul n̄ii-falii-la wiaa n̄ii, u
 si di buŋbuŋ ku-la ŋaa ku-binii ne.
 Ku-la kala saa si diene ŋaa ku-binii
 ne, u maga di ba joŋo ta ne.

9

Yesu ne timaa pi Wia la nyuŋ Wia- jaŋ ɛ

1 Buŋbuŋ-la Wia fa ta niin ne a
 pi u niaa. N̄ii-la fa keŋ woŋbiee ne
 ba to a chuchuoɛ Wia. Ba fa he
 lebin ne a chuchuoɛ dime. 2 Lebi-
 la fa keŋ leree balia ne, tegeɛ ari
 sipaan. Tegeɛ lebi-la ɛ ne chaanin
 fa chin koruŋ nyuŋ. Teebul ma fa
 he dime. Boroboro-la ba si yie kaa
 mu bil Wia sipaan ma fa dan teebul
 nyuŋ tegeɛ lebi-la ɛ ne. Lee-la yirin
 ne fa lee-la si bi disinnin kenɛ, 3 a
 kiele juu lebi-la sipaan, ba fa keŋ
 patiisa ne a kaa keɛ. Lee-la yirin ne
 fa lee-la si chaasa pulle a bi disinnin
 kenɛ. 4 Selime koruŋ ne fa he lee-la.
 Dime ne ba yie nyige tii-kelin suora
 si sima a pipi Wia. Daga kubala

ma ne fa chin dime. Selime tou
 kala. Selime pupoin ne fa he daga-
 la tuoŋ. Pupoi-la tuoŋ ne ba fa joŋ
 boroboro-la si lii Wia-jaŋ ku tuu a
 he. Eroŋ daa-la si toso ma fa he
 daga-la tuoŋ ne. Tabii-taala-la ɛ Wia
 fa si ŋmunse u niin wialin he, u ma
 fa he dime ne. 5 Daga-la nyuŋ, ba
 me Wia tinŋdaaraa sii tul, a bil ba ma
 chin. Ba keŋ ba kinkesin kaa jere to
 Wia kuori-kpasa-la nyuŋ, lee-la u si
 hoŋo aa fá niaa nennige, a joŋ ba
 haacheba a cheba. Leeɛ la bi jaŋ
 wuo bul wiaa yuge a tigeɛba ɛ.

6 Di ba ne bil kialin kala deɛ,
 nialin si kpu pusun pipi Wia, ba yie
 juu tegeɛ lebi-la di ba tin tinŋtimii-la
 si maga di ba tin. 7 Ama nialin si kpu
 pusun pipi Wia kuhian dunɗunɗa ne
 yie juu lebi-la sipaan. U ma saa yie
 juu lee-la bala ne jina kala. U yie
 keŋ chalin ne a kaa juu pi Wia, a
 tin u titia haacheba ari nialin kala
 haacheba wiaa. 8 A tin wiin deen
 wiaa Wia Din-zoŋ-la chaasa dage
 ari woŋbii-la ba si to juuu lebi-la
 sipaan, ba ha bi suro, beɛ wiaa tegeɛ
 lebi-la ha he dime ne. 9 Tegeɛ lebi-la
 nage dunia deen ɛ la si he ne. U bi
 jaŋ dieni. Tegeɛ lebi-la ɛ ne ba yie
 joŋ kaa pipi Wia an pe kpu pusun
 pupu. Wialin ba si yie ŋaa lebi-
 la tuoŋ, ba bi jaŋ wuo pe nialin si
 keŋ kialin ko, di ba tuobiinaa chesi.
 10 Wiaa deenba dage kudiilee ari
 ku-nyualaa wiaa dunɗunɗa ne. Ba
 bira dage ari ba si jaŋ fufo ba yaraa
 disinnin a kaa mu yi bua-la ɛ Wia si
 jaŋ keŋ wu-falaa ko ne.

11 Ama Kirisito ko ne leeɛ a ŋaa
 nialin si tima pipi Wia niaa nyuŋ
 kuhian. Wii-la u si kaa ko ne zomo
 a kii buŋbuŋ wialin. U si ko n̄ii, u
 juu lebi-la sipaan si bi disinnin kenɛ,
 lee-la ne zomo kinkeŋ a kii buŋbuŋ
 ku-la. Nuhuobiine dee bi saa. U
 bi dunia deen kuŋ ŋaa. 12 Kirisito
 juu lebi-la sipaan bala dunɗunɗa ne.
 U bi buuna koo ne-pasin chalin kaa
 juu dime. Ama u keŋ u titia chalin
 ne kaa juu, a joŋ chal-la a tin la
 haacheba chimin, a laala ta a kaa

mu wuu. ¹³ Bunɓun ba fa yie jon buuna koo ne-bele chaliɗ ne a fo niaa disinniɗ ta. Di nuu ne ɗaa disinniɗ, ba yie jon ne-pasa-la ba si kpua a nyige ne a pi Wia, a kenɗ u tuɔruɗ kaa mise nialiɗ a piise ba disinni-la ta. ¹⁴ Di wiaa deenba ne wuo piise niaa disinniɗ ta, ɗii-na Kirisito chaliɗ ma jan wuo paala piise niaa disinniɗ ta a kii buunaa koo nesinɗ chaliɗ. Kirisito fa bi disinɗ kala kene. Wia Diɗ-zon-la dolun le, u jon u titia pi Wia, a suu a tin la wiaa. U jan wuo len di ma tuɔbiinaa chesi di ma si wu-bonɗ biinu, ka di ma wuo tima pipi Wia, Wia-la si kenɗ miisinɗ.

¹⁵ Kirisito ne he Wia ari nuhuobiine pege. U le ne Wia to a ta nii-falii-la u niaa teenɗ. Wia ɗaa ɗii di nialiɗ kala u si yira wuo na kialin u si si u jan jonɗo piba Wia-jan le. Kialin jan he dime a kaa mu wuu. Leele Kirisito suba ne. U suu ɗii duu wuo laa niaa haacheba ta ne, nialiɗ si ɗaa haache bua-la le ba fa sii to bunɓun wialiɗ Wia si ta u niaa teenɗ. ¹⁶ Di nuu ne si duu ne suba, nuu don ne jan dii u kiaa, di tiina ne ha bi suba, nii-la bi jan wuo dii kialin, see di kialin tiina suba. ¹⁷ Di kiaa tiina ne weye, nii-la u si si u jan dii u kiaa bi jan wuo dii kialin, see di u suba. ¹⁸ Nii titia ne Wia jon chaliɗ ta bunɓun nii-la. ¹⁹ Moosis si ɗmuɗse wialiɗ bil di niaa tuto, di u ne ku dageba wialiɗ a ku dere-na kala, u yie kpu ne-pasinɗ ari buunaa ne, a laa chaliɗ a ɗaa liin guoli. U yie che pie-pun-fiesinɗ ari pipaa-suɔrusunɗ a voo a he donɗo le, a kaa yuu chala, a mise he ten-la le u si ɗmuɗsa, aɗ pe ɗaa mise nialiɗ maa. ²⁰ Di u ne ɗaa chal-la mimise nialiɗ, ɗla ne u yie bul: U si, “Chal-la Wia si jonɗo ta niinɗ ma teenɗ ne ɗla.” ²¹ Nii titia ne u yie ɗaa chal-la mise lebi-la ari gbanɗi-la kala ba si kaa titinɗ Wia tinɗinɗaa lebi-la tuonɗ. ²² Wutitii, wialiɗ Moosis si ɗmuɗsa bil di niaa tuto, tuonɗ chaliɗ ne ba yie kaa fo kiaa jesinɗ kala disinniɗ ta. Di ba ne

bi kunɗ chalinɗ liisa, Wia bi jan wuo jonɗ nuu-kala haacheba a cheu.

Yesu suu bala ne niaa nyun duu laa haacheba ta

²³ Kialin si he lebi-la tuonɗ nage kialin si he Wia-jan ne. U maga di ba kenɗ pusunɗ chaliɗ chese kiaa deenba disinniɗ ta. Ama kialin titia si he Wia-jan le, u maga di ba che kula si zomɗo kii pusu-la chaliɗ ne a piise ba disinniɗ ta. ²⁴ Kirisito juu Wia di-zon-la titia ne. Lee-la u si jua, nuhuobiine dee bi ɗaa. Nialiɗ si ɗaa lebi-la, baa chesi Wia di-zon-la ne. Ama Kirisito juu Wia-jan titia ne. U juu lee-la duu wuo mu Wia teenɗ a chinɗ la nyunɗ. ²⁵ Nialiɗ si kpu pusunɗ pipi Wia kuhiasinɗ yie juu lebi-la sipaanɗ si bi disinniɗ kene jina jina ne, a pe kenɗ pusunɗ chaliɗ kaa juu a pi Wia. Chal-la ba si yie kaa juu, ba titia chaliɗ dee. Ama Kirisitona si juu lee-la, u bi naga ari u jan venee juu dime jina-na kala ne a jon u titia a pipi Wia. ²⁶ Duu ne faa ɗaa ɗii, u fa jan na heenɗ jina-na kala a lii dunia di-suomunɗ a kaa ko ari jininɗ kala. Ama u si china mage ɗla, dunia diderinɗ kpaga ne. Nii ne u ko bala duu jon u titia a pi Wia a suu, a laa niaa haacheba ta. ²⁷ Bala ne nuu-kala jan suu. Nii harin le Wia jan dii u tiina sariya. ²⁸ Nii titia ne ba kpu Kirisito balá duu wuo laa ni-dan haacheba ta. U jan bira ko. Duu ne ko, u bira bi jan laa niaa haacheba ta, ama u jan laa nialiɗ ta, nialiɗ si ɗaa siri aa gberu.

10

¹ Wialiɗ Moosis fa si ɗmuɗsa bil di niaa tuto laa sipaanɗ ne, ka wu-zomɗo-la-na to harin ko. Wialiɗ Moosis fa si ɗmuɗsa bil nage wu-zomɗo-la ne, ama wu-zomɗo-la titia dee ɗii. Ba nage wu-zomɗo-la daaliiminɗ ne. Nii wiaa pusu-la ba si yie kaa ku kpu pipi Wia jina-na kala, ba bi jan wuo len di nialiɗ si kenɗ pusu-la kaa ko ɗaa ni-zomɗo-la si bi disinɗ kala kene. ² Di pusu-la ba si yie kaa mu kpu pipi Wia ne fa wuo len nialiɗ si kaa ko

ɲaa tuɔ-pul timma, ɲii-na ba fa bira bi jaŋ kpukpu pusuŋ deenba jina-na kala. Di ba ne fa wuo piise nialin disinnin tita, ɲii-na ba fa bira bi jaŋ bibiine di ba ken haache kala. ³ Ama ba si yie kpu pusu-la pipi Wia jina-na kala, ba yie liliisi ba haacheba ne, ⁴ bee wiaa nesin ari buunaa chalin bi jaŋ wuo laa niaa haacheba ta.

⁵ Nii ne tii Kirisito bul wiaa deenba a pi Wia bua-la le u si ku tuu dunia. U si,

“N-na bi pusu-la ba si yie kaa ku pin ka che, aŋ bira bi pusu-la ma ba si yie kpu a nyige pin ka che.

Ama ɲ liisemi ne di mi jon mi titia kala a pin.

⁶ Ba si yie kpu pusu-la a nyige pipin, aŋ kpu pusu-la doŋsun maa a piise ba disinnin tita, ɲ tuɔŋ bi ba kala nyuŋ tore.

⁷ Nii ne mi bul, ‘Mi Tiina Wia, mi ko ne di mi ɲaa wialin si tore ɲ tuɔŋ. Mi ko ne di mi ɲaa wialin ba si ɲmuŋsa bil ɲ tenin tuɔŋ a tigemi le.’ ”

⁸ Wialin Moosis fa si ɲmuŋsa bil di niaa tuto ne daga di ba kpu pusuŋ pipi Wia, a bira jon kiaa pupu, a bira kpu pusuŋ a nyiga pi Wia, a kpu doŋsun maa a piise niaa disinnin tita. Ama Kirisito bula di Wia bi ɲii cho. U tuɔŋ ma bi ba nyuŋ toro. ⁹ Nii ne ka u bira bul, “Mi ko ne di mi ɲaa wialin si tore ɲ tuɔŋ.” U si bul ɲii, u via bunbun wialin ta ne, aŋ miira suomo bil wu-falia. ¹⁰ Kirisito si ɲaa Wia tuɔtoru wii-la a jon u titia kala a pu a tin la wiaa, ɲii ne leŋe la bira bi disinnin kene. U si suu ɲii, u jon u titia pi Wia balá ne. U bira bi jaŋ ko duu ɲaa ɲii.

¹¹ Nuu-kala si kpu pusuŋ pipi Wia yie chin u lerin ne a titin u tintinɲaa tapulii-na kala, a vene kpu pusuŋ pipi Wia tapulii-na kala. U si yie kpu kiaa deenba a pipi Wia, ba bi jaŋ wuo laa niaa haacheba ta. ¹² Ama Kirisito suba a jon u titia a pi Wia bala ne duu laa niaa haacheba ta. U

si ɲaa ɲii dere, u jil Wia-jaŋ a hoŋ Wia seme, ni-duon di-honun. ¹³ U jaŋ hoŋ dime halii, see di u yuo dii u diŋdoŋɲoo kala dere. ¹⁴ U si jon u titia a pi Wia balá ɲii, u leŋe nialin ba si piise ba disinnin ta ɲaa tuɔ-pul timma ne u teen a kaa mu wuu. ¹⁵ Wia Diŋ-zon-la ma ɲaa wialin la sii bul dansia. ¹⁶ U si,

“Di tapulii doŋ ne yie, mi jaŋ ta mi niin ba teen.

Mi jaŋ leŋ di ba jin mi niin wialin, a jonba he ba tuɔbiinaa ari ba nyuŋ kala le.”

¹⁷ U bira bula,

“Mi bira bi jaŋ liliisi ma haacheba ari ma wu-bonɲoo kala.”

¹⁸ Di Wia ne jon la haacheba-la kala a chela, u bira bi maga di la kpu pusuŋ a pi Wia a tin la haacheba wiaa.

Má ken nyu-duon a kpage Wia

¹⁹ Nii wiaa, mi naanbiirin, la jaŋ wuo ken nyu-duon a juu Wia di-zon-la, bee wiaa Yesu jon u chalin a jaase la wiaa ne. ²⁰ Wonbii-falii ne Yesu suro pila. Wonbii-la u si suro pila le ne la jaŋ to a juu Wia di-zon-la, a laa miisin Wia teen. Bua-la le Yesu fa si bi suba, ɲii ne patiisa-bal ne fa kere lebi-la sipaan. Ni-peiba bi dime wuo juu. Nii titia ne la fa bi Wia di-zon-la wuo juu. Ama lele Yesu suba ne, ba ken patiisa-bal-la bege pila la wuo to juu Wia di-zon-la. ²¹ La folo ken nialin si tima pipi Wia kuhian ne, u biben Wia niaa. ²² Nii wiaa, má leŋ la ken nyu-duon a laa wiaa deenba dii ari tuɔ-bala, a mu Wia teen. Wia chese la tuɔŋ ne, a chese la tuɔbiin-bomɔ-la kala ta. Ba bira bi jaŋ wiwalimela. U ken lii-zomuŋ ne fola. La bira bi disinnin kene. ²³ Nii wiaa, wialin la si laa dii, má leŋ di la yiele wialin, a chin ba le kpan kpan, a sí begilu mua maa, bee wiaa Wia ken wutitii ne. Kialin u si si u jaŋ jonɔ pila, la laa dii ari la jaŋ naba. ²⁴ Nii wiaa, má leŋ di la cho doŋɔ, a ken doŋɔ ari siifisin, a pe doŋɔ le, aa ɲaa wu-zonɲoo doŋɔ le. ²⁵ La si

yie hihilimi nii, niaa dɔŋsun yie via ne. Ma sí nii ŋaa. Ama má len di la haa hilimi a pipe dɔŋɔ le di la to Wia ari siifiesin, bee wiaa tapulii-la la Tiina Yesu si jan miira ko kpage ne.

²⁶ Di la ne ku jin wutitii-la an viau ta a ŋinaa wu-bɔŋŋɔɔ, kuŋ dɔŋ bira tuo ba si jan wuo kpu a pi Wia a piise la disinnin ta. ²⁷ Ama la jan fá fawullun, bee wiaa Wia jan dii la sariya. U jan jon cheerin a pila, a jonla he nyinin le, nyin-la jan faasa didii kinken. Nyin-la jan dii Wia dinɔŋŋɔɔ kala derɛ. ²⁸ Di nuu-kala ne chei wialin Moosis fa si ŋmunsa bil di niaa tuto, an ka di niaa balia koo batori ne he dime a ŋaa wii-la u si ŋaa chei dansia, ba yie kpu tiina ne. Ba yie bi u nennige ka fá. ²⁹ Di ba ne fa yie ŋaa ŋla, ee ne saa ba jan ŋaa nii-la si bee guune Wia Bie ari u tuo kuŋ-kala? Tiina bira ken Yesu chal-la Wia si jonɔ ta niin u niaa le kaa chei ne. Chal-la ne Wia fa kaa chese tiina disinnin kala ta u ku ŋaa tuo-pul tiina. Di tiina bira tuuse Wia Din-zɔŋ-la fa síi peu le, u maga di ba dɔgisu a kii nialin si chei wialin Moosis fa si ŋmunsa bil di niaa tuto.

³⁰ La jin Wia ne. U si,
 “Mi jan jon wu-bɔmɔ-la niaa síi
 ŋaa dɔŋɔ le a tinba.”
 Nuu dɔŋ bira si,
 “Wia jan dii u niaa sariya.”

³¹ Di ŋ ne juu Wia-la si weye nisin, u jan lɔɔ pin.

³² Má liise mu yi bua-la le Wia si suri ma siala, ma ku laa Yesu wiaa dii. Bua-la le ma na heen ne worun an nyalime. ³³ Bua dɔŋɔ ba yie tuusema a dɔgisema niaa tuon. Bua dɔŋɔ ma ba kenma guoli nialin ba fa síi dɔgise tuon a dɔgisema maa. ³⁴ Ba ken niaa dɔŋsun si laa Yesu wiaa dii a to dia ne. Ma si na nii, ma tuon cheye ne. Ba bira fuga laa ma kiaa. Ba si ŋaa nii, ma bi wii-kala bula. Ama ma tuon tɔɔ ne, bee wiaa ma jima ari ma ne ken kialin si zomɔ kii dunia deen kialin ba si kaa laa ma teen. Kialin-na jan he dime

deen deen. ³⁵ Nii wiaa ma síi lenɛ di ma nanɔdaasin yuɔɔɛ. Di ma ne chin ma yarida le a síi len, ma time yuga ne Wia teen. ³⁶ U maga di ma ken ken yiri a wuo ŋaa wialin Wia síi che di maa ŋaa. Di ma ne ŋaa nii, ma jan na kialin u si si u jan jonɔ pima. ³⁷ U si,

“Muapulii nii-la Wia si liisa jan miira ko.

U bi jan dieni.

³⁸ Nialin kala si ŋaa tuo-pul tinŋaa Wia teen maga di ba haa ŋaa Wia yarida ne. Di ba ne ŋaa nii, ba jan ken miisin Wia teen.

Ama di ba ne via Wia ta,
 u tuon bi jan tɔɔɛ ba nyun.”

³⁹ Wia jan dɔgise nialin si yenne an viau ta. Ama la-na tuo niaa deenba tuon. La ŋaa Wia yarida ne a wuo laa la miisin.

11

Bunbun nialin fa si laa Wia wiaa dii nii

¹ Di ŋ ne laa Wia wiaa dii, ŋ yie jin ari kialin ŋ síi yielu Wia teen, ŋ jan naba. N jan jin ari kialin ŋ siin si bi na senɛ he dime ne. ² Bunbun nialin fa si laa Wia wiaa dii, Wia tuon tɔɔɛ ba nyun ne. ³ La laa Wia wiaa dii, nii ne tii la jin ari Wia ne ŋaa dunia, u bi kuŋ-kala kaa ŋaa dunia. U niin ne u kaa suro bul wiaa, an ka kuŋ-kuŋ-kala-na he dime. Dunia kiaa deenba la síi na, ba fa tuo, Wia lenɛ ba lii kialin la si bi na tuon ne.

⁴ Naanbiirin balia ne fa he dime. Dɔŋɔ yirin ne Ebil, dɔŋɔ ma yirin ne Keen. Ba kala balia jon kiaa pi Wia ne. Ama Ebil-na fa laa Wia wiaa dii ne. A tin nii wiaa, Wia laa kialin u si jonɔ pu. Wia tuon tɔɔɛ ba nyun a kii Keen kialin u si jonɔ pu. Nii ne Wia len Ebil ŋaa tuo-pul tiina u sipaan. Ebil suba ma ne, ama a tin u fa si laa Wia wiaa dii nii, u ha bul wiaa pipila ne.

⁵ Baal kubala ma ne fa he dime baa yire Inok. U ma fa laa Wia wiaa dii ne. U bi suba, an ka Wia jonɔ kaa jil

Wia-jaŋ. Nuu-kala bira buu na. Wia titia ne joŋu kaa jil Wia-jaŋ. Wia tuoŋ fa tɔre u nyuŋ ne, ka u-na joŋu kaa jil Wia-jaŋ. ⁶ Di nuu ne bi laa dii ari Wia he dime, Wia tuoŋ bi jaŋ tɔre u tiina nyuŋ. Nii-la kala sii che duu ko Wia teen, u maga duu laa sipaan laa dii ari Wia he dime ne, a bira laa dii ari nii-la kala si bee chiche Wia, u tiina jaŋ laa u time Wia teen.

⁷ Baal kubala ma ne fa he dime baa yire Nowa. U fa laa Wia wiaa dii ne. Nii ne Wia bula pu duu saa liiŋ daboro di ba di u dia niaa juu, bee wiaa uu che di u kpu dunia niaa kala kala ne. (Wia si bul wii-la u diene, aŋ ka wii-la-na ŋaa.) Nii ne Nowa sei a saa liiŋ daboro-la ba di u dia niaa juu, aŋ ka Wia leŋ liiŋ ku to dunia ni-kaanaa kala ba suu. Ama Nowa ari u dia niaa bi suba. Nowa si laa Wia wiaa dii ne tii u ku ŋaa tuo-pul tiina a joŋ cheeriŋ a pi ni-kaana-la kala ne.

⁸ Baal kubala ma ne fa he dime baa yire Abiraham. U ma fa laa Wia wiaa dii ne. Wia bula pu duu lii u jaŋ le a mu tiŋteen doŋo, di u jaŋ joŋ lee-la a pi ba di u doho niaa. U to Wia niŋ le a lii u jaŋ le a mumu lee-la. U fa bi lee-la u sii mu jiŋ. ⁹ U si yi tiŋtee-la Wia si si u jaŋ joŋo pu, u hoŋ dime a ŋaa nuhuɔru tiŋtee-la le. U bie Aizik ari u nihiŋ Jekɔb ma fa hoŋ lee-la titia ne a ŋaa nuhuɔraa. Ba fa he leŋŋee ne a juuu. Wia fa bula ari u jaŋ joŋ tiŋtee-la pi ba kala ne. ¹⁰ Abiraham faa che duu juu taŋ-la Wia titia si bil u gentine a saa ne. Taŋ deen ne jaŋ he dime deen deen a mumu. Nii ne tii u sei a ŋaa nuhuɔru tiŋteen doŋo le. ¹¹ Nii titia ne Abiraham haala Saara ma laa Wia wiaa dii. Abiraham ari u haala kala fa hiesa ne woruŋ, ka Wia wuo peba le ba lul bie. Saara jima ari Wia keŋ wutitii ne. Nii wiaa u laa dii ari u jaŋ na ku-la Wia si si u jaŋ joŋo pu. ¹² Abiraham fa hiesa ne woruŋ a bi biiriŋ wuo lulul. Nii ne aŋ ka u lul bii-bala, ama u bii-bala-la le ne u doho to puŋ. Ba yuga kieli. Ba yuga ari cheŋwulaa si yuga

nii, koo hagila si yuga nii mugi-balin niŋ ne.

¹³ Niaa deenba kala laa Wia wiaa dii ne aŋ-na suu. Kialiŋ Wia si si u jaŋ joŋo piba, ba biba na. Ba naba ari ba he di-bolii, ama ba laa dii ari maachie ba jaŋ naba. Nii wiaa ba na kialiŋ ne. Ba bira jima ari ba ŋaa nuhuɔraa ne dunia deen le aŋ ta hoŋ tiŋtee doŋo le. ¹⁴ Niaa deenba faa che ba titia leriŋ ne di ba hoŋ. Nii ne tii ba bul wiaa deenba a mu tige ba titia le nii. ¹⁵ Ba bira bi tiŋtee-la le ba si lia wiaa ka biine. Di ba ne faa biine u wiaa, ba fa jaŋ che worbiŋ a miira mu lee-la. ¹⁶ Ama ba faa che di ba hoŋ tiŋtee-la si zomo kii tiŋteyee doŋsuŋ. Wia-jaŋ ne nii. Wia titia ne saa jaŋ-la a piba. Nii ne tii ba wuo yire Wia yiriŋ, ka hiisiŋ bi Wia kene.

¹⁷ Abiraham laa Wia wiaa dii ne. Nii ne Wia magisu duu na nii u yarida si maga. Wia bula pu duu keŋ u bie Aizik a kpu a pu. U sei a ŋaa siri duu kpu Aizik a pu. Abiraham bie kala ne fa Aizik. ¹⁸ Wia fa bula pi Abiraham a tige Aizik le duu jaŋ tou le a leŋ di u doho niaa puŋ. ¹⁹ Abiraham fa jima ari Wia jaŋ wuo chise u bie suuŋ le. Nii ne u ŋaa siri duu kpu u bie a pi Wia. U si ŋaa siri nii maa, u nage u kpua ne. Nii ne Wia ma chise Aizik suuŋ le a joŋu pi Abiraham. ²⁰ Aizik ma fa laa Wia wiaa dii ne. Nii ne tii u sul Wia pi u biiriŋ Jekɔb ari Iso, di Wia peba le maachie. ²¹ Jekɔb ma laa Wia wiaa dii ne. U suuŋ si kpaga ne, u ma sul Wia duu pe u nihee Josef biiriŋ le. U tige u daantiga ne a chuɔle Wia piba. ²² Josef ma fa laa Wia wiaa dii ne. Nii wiaa u suuŋ si yie, u bul wii a mu tige Iziral tiŋŋaa le aŋ-na suu. U bula di Iziral tiŋŋaa jaŋ lii Ijipiti tiŋteen le maachie a bira mu ba tiŋteen. U bira bula piba di ba nii mu, ba pe joŋ u ku-suuŋ kaa mu hugi lee-la.

²³ Moosis naaŋ ari u nyimma ma fa laa Wia wiaa dii ne. Ijipiti kuoro fa bula pi Iziral tiŋŋaa di ba kpu ba bii-mulo-na kala si ŋaa hanbolibie.

Ama ba bi ŋii ŋaa. Ba si lul Moosis, ba na duu ŋaa bii-zɔŋ nɛ. Ŋii nɛ ba joŋo faa cheŋsiŋ batori. ²⁴ Moosis si ku waa dɛrɛ, u ma fa laa Wia wiaa dii nɛ. U bi sɛyɛ di ba kɛnu yirɛ kuoro Feero tolo bii. ²⁵ Moosis via ku-zɔmɔ-la kala u fa si jaŋ na Feero teen. U fa bi che u to wu-bɔŋŋɔɔ ŋaaniŋ a ninii sima aŋ via u niaa ta. Ijipiti niaa fa sɛi dɔgise Wia niaa ŋii, u ŋaa siri di ba di ba kala nɛ na hɛɛŋ. ²⁶ Moosis ŋaa siri di ba dɔgisu duu na hɛɛŋ nɛ a tiŋ Kirisito-la wiaa, nii-la Wia si liisa. U jima ari hɛɛ-la kala u si jaŋ na a tiŋ u wiaa kɛŋ time nɛ, a kii ku-zɔmɔ-la ma kala u si jaŋ na Ijipiti tiŋteen lɛ. U ŋaa siri duu laa time-la Wia si jaŋ joŋo pu maachie nɛ. ²⁷ Moosis fa laa Wia wiaa dii nɛ, ŋii nɛ tii u lii Ijipiti tiŋteen a mu hɔŋ tiŋteen dɔŋɔ lɛ. U jima ari Ijipiti kuoro jaŋ na baaniŋ u nyuŋ, ama u bi u wiaa biina. U na hɛɛŋ nɛ, ama u nyalima aŋ beŋ Wia lɛ, Wia-la u si bi wuo na. ²⁸ Moosis ma fa laa Wia wiaa dii nɛ, ŋii nɛ tii u dage Iziral tiŋŋaa ba diisiŋ kielin gbiele-la. U leŋe ba kpu pusun, a kɛŋ chaliŋ taa ba borusun kala. Ba si ŋaa ŋii, Wia tiŋdaari-la u si tima duu ku tuu a kpu Ijipiti tiŋŋaa bi-bunbun-na kala Ijipiti tiŋteen lɛ, u ku tuu a kpuba aŋ kielii Iziral tiŋŋaa ta.

²⁹ Iziral tiŋŋaa ma fa laa Wia wiaa dii nɛ. Ba fa si lii Ijipiti tiŋteen lɛ a ku yi mugi-fiaŋ-la niin, Wia leŋe u kpaa balia nɛ ba ven u tuɔŋ a chol. Ba ven u tuɔŋ a nage ba sɛi ven tiŋtee-hilin lɛ nɛ. Ama Ijipiti timma-la fa sɛi kiriba si kɔ a walime di ba chol, muga-la ku tɔba. Ba kala suu. ³⁰ Bua dɔŋɔ Iziral tiŋŋaa ma fa laa Wia wiaa dii nɛ. Ba ŋaa wialiŋ Wia si dageba ba ŋaa, a vene golli kɛrɛ-la si kɛrɛ taŋ-la ba sɛi yirɛ Jerikɔ tapulaa balipe. Ba si ŋaa ŋii a dɛrɛ, Jerikɔ kɛrɛ-la tel wuru. ³¹ Haal kubala ma nɛ fa hɔŋ Jerikɔ lɛ, u yirin nɛ Reehab. U fa ŋaa ha-chɔruŋ nɛ. Ama u laa Wia wiaa dii nɛ. Ŋii nɛ u laa nialiŋ Iziral tiŋŋaa si tima di

ba ku luɔrɛ bee na Jerikɔ tiŋteen si nage ŋii. A tiŋ ŋii wiaa Iziral tiŋŋaa si ku yuo dii taŋ-la, ba bi haal-la kpua. Ama ba kpu u jaŋ nialiŋ kala si bi Wia wiaa laa dii nɛ.

³² Wiaa dɔŋsun hɛ dime mi faa che di mi bul. Ama di mi fa bul Gidian, Beerak, Samson, Jefita, Devit, Samuel ari nialiŋ fa sɛi bul wiaa, Wia Diŋ-zɔŋ-la dolun lɛ wiaa, mi fa bi jaŋ wuo bula dɛrɛ. Ba yuga kieli. ³³ Niaa deenba kala fa laa Wia wiaa dii nɛ. Ŋii nɛ ba tuɔŋ dɔŋsun yuo dii tiŋteyee dɔŋsun aŋ laa ba kiaa. Ba to wutitii-la Wia sɛi che nɛ. Ba na kialin Wia si si u jaŋ joŋo piba. Naachigee fa sɛi che di ba chan ba niaa dɔŋsun, ba yuoba. Naachigela biba wuo. ³⁴ Nyinin ma bi ba dɔŋsun wuo. Wia liiseba ni-bɔŋŋɔɔ nisin lɛ di ba sɛba kpu. Ba fa bi dolun kɛnɛ, ama Wia nɛ piba dolun ba wuo ŋaa wiaa. Ba ku ŋaa bɔi-duon tiŋŋaa a yuo laalin a dii. Ba yuo a dii tiŋteyee dɔŋsun, ba laali-yuoro fɔ lɛl. ³⁵ Haalaa biirin si suba, Wia chiseba suun lɛ nɛ. Niaa dɔŋsun ma fa hɛ dime ba viireba kpu. Niaa deenba fa bi che di ba joŋ hariŋ yia Wia aŋ laa ba miisin. Ba fa jima di ba nɛ suba maa, Wia jaŋ chiseba suun lɛ a joŋ miisi-la si zɔmɔ a kii dunia deen kua a piba. ³⁶ Dunia niaa mɔŋ dɔŋsun nɛ. Ba viire dɔŋsun ma ba yaraa biele. Ba vɔɔ dɔŋsun maa ari chɔrumɔɔ aŋ kɛnba tɔ dia. ³⁷ Ba yage dɔŋsun ari tabiaa, a kɛŋ dɔŋsun keri balia balia, aŋ kpu dɔŋsun ma ari tokobiee. Ba dɔŋsun faa laale piesee ari buunaa jɛŋŋɛ nɛ. Ba fa bi ba wu-cheeli kala na. Ba dɔgiseba, ba na hɛɛŋ. ³⁸ Dunia deen fa bi zɔmɔ pi nialiŋ. Ŋii nɛ ba lii niaa tuɔŋ a faa golle tiŋtee-hilin tuɔŋ ari peelee nyuŋ. Ba faa bu-buɔsun ari buɔsun tuɔŋ nɛ.

³⁹ Wia tenin tuɔŋ ba bul niaa deenba wiaa worun. Ba kala fa laa Wia wiaa dii nɛ. Ama kialin Wia si si u jaŋ joŋo piba, ba biba na. ⁴⁰ Wia fa sɛi che duu joŋ ku-zɔŋ-la a piba ŋii, u faa biine la ma wiaa nɛ. U faa

che di la di ba kala ŋaa ni-zomɔ ne woruŋ duu wuo joŋ ku-la pi la kala.

12

Má to Yesu naa-buasun

¹ La paala na di bunbun nialin si sei Wia niin wialin yuga ne. Ba chin la seme-na kala ne a gollila. Ba ni na wialin kala la sí ŋaa. La si laa Wia niin wiaa nii, u naga laa fá a pipagise ne a mumu Wia-jaŋ. La sí fá nii, má len di la joŋ kuŋ-kala si nyagela bil a ta. U maga di la len wu-bonɔɔ ŋaanin a wuo nyalime a fá mumu sipaan. ² La sí fá nii, u maga di la ben Yesu le ne, bee wiaa u ne laa sipaan sei wialin la si laa dii a nyalime mu, a na ba diderin. U fa jima ari u jaŋ na heen, ama u bi wiila u si laa dii len ta, bee wiaa u jima ari u si ŋaa nii, Wia jaŋ len duu tuon tɔre. Nii ne tii u sei ba kpaasu mere daa-gese nyun. U si dii hiisin nii, u sipaa tuo. U si na hee-la a dere, u jil Wia-jaŋ a leele hon Wia seme, ni-duon di-honun.

³ Má biine Yesu wiaa. U na heen ne woruŋ ni-bonɔɔ nisin le. Ama u nyalima chin u yarida naan le ne. Di ma ne biine u wiaa, ma nanndaasin bi jaŋ yuore. Ma bi jaŋ joŋ wialin ma si laa dii ta. ⁴ Ma si laa Yesu wiaa dii nii, ma di wu-bonɔɔ ní loo. Ama wu-bomɔ-la ha bima wuo. Ama ma si via wu-bomɔ-la a na heen nii, ma chalin ha bi jaasa. ⁵ Nyunyaase wialin Wia si bula pima, ma yua nee? Wia bul wialin pi u biirin ne. U si,

“Mi bii, di Wia ní che duu dagin wonbiin, jegile nii woruŋ.

Duu ne dogisin maa, sí len di ŋ tuon chei.

⁶ Wia cho u bii-na kala ne, nii ne tii u dudogiseba nii.

Nuu-na kala Wia si bene u ŋaa u bii, u yie dogisu ne.”

⁷ Di Wia ní dogisin, sei u niin. U jima ŋ ŋaa u bii ne. Nii ne tii u dogisin. N ha na bii-na kala duu nyimma buu dagee? ⁸ Wia yie didage u biirin kala ne. Di u

bima daga, u naga ari ma tuo u biiri, ma ŋaa manɔaa-biiri ne. ⁹ La nyimmaba si lulla, ba yie dagela ne, la ma zizilba. Nii-na u maga di la ma to la Nyimma Wia woruŋ a wuo ken miisin. ¹⁰ La nyimmaba si lulla la ken miisin, ba yie dagela jisin banmene ne. Ba tuotore wiaa ne ba yie dagela la tuto. La Nyimma Wia titia ma dagela ne. Uu che duu pela le ne, nii ne tii u didagela nii. Wia bi disinnin kene. Uu dagela di la ma nage nii u si naga ne. ¹¹ Buala le Wia sí dagela nii, la tuon yie chei ne, bee wiaa wialin u sí dagela heye pila. Ama di la ne seye duu dagela, nii jaŋ pela le maachie. Di la ne nyalima a mu sipaan nii, wialin jaŋ len di la ŋaa tuo-pul timma Wia teen, a fiela hon som ari yarifielaa.

Má pɔ ma titia le di wu-bon kala sí ma pege juu

¹² A tin wiin deen wiaa, má joŋ ma nisaa ta an len di ma nanndaasin polli. ¹³ Wutitii-la ma si nia, má kenu kaa titin a wuo mumu sipaan. Di ma ne ŋaa nii, ma jaŋ wuo pe nialin si he ma tuon a laa Wia wiaa dii an bi dolun kene wialin le. Ma jaŋ wuo peba le di ba chin ba yarida le a sí begilu. ¹⁴ Má he ma dolun kala an loo chiche di ma di nuu-kala ken nii-bala, a bira loo chiche di ma sí disinnin ken. Di ma ne bi disinnin kene, ma jaŋ wuo na Wia. Nuu-kala si ken disinnin bi jaŋ wuo nau. ¹⁵ Wia si fála kala nennige nii, má pɔ di nuu-kala sí harin joŋo yia nennige-la u sí fála le. Má pɔ ma titia le di wu-bon kala sí ma pege juu di ma ken disinnin Wia sipaan. ¹⁶ Nii wiaa má pɔ ma titia le di ma tuon nuu-kala sí ni-bon ŋaa, a bira pɔ di ma tuon nuu-kala sí u titia tuotore wu-ŋaalaa ma le to an via Wia wonbiin ta. Baal kubala ne fa he dime baa yire Iso. U fa ŋaa u nyimma bii-hian ne, ama u ŋaa wu-bon ne u si joŋ u hiasin yalle an laa kaaa dii. ¹⁷ U nii harin le ne Iso tuon chei u si ŋaa nii. U faasa yel a sul u

nyimma duu sul Wia pu duu peu le. Ama Wia biu le pe. U bi wii-la u si bula wuo kaa birime.

¹⁸ Má kɔ Wia teen ne. Ma naa-balimaba fa kɔ peelin deen teen ba sí yire Saana ne. U saa bi naga ari peelin deen teen ne ma kɔ. Ba si ku yi peel-la, Wia bula piba di ba sí peel-la digu. Ba na nyin-gelin duu lii peel-la le, a bira na di peel-la kala tɔ birimin ne lim. Ba nii pel-bal maa duu lu lee-la. ¹⁹ Ba nii nyillin ba sí nmuu, a nii nuu yiikoro maa sí bul wiaa. Ba si nii yiikori-la, nii ne ba fá fawullun a bul di yiikori-la bira sí wiaa bula piba. ²⁰ Wii-la u si bula pi nialin heye ne a piba. U fa si di puna koo kun-kala ne digi peel-la, u maga di ba yagu ari tabiaa ne a kpu. Wiin deen fa heye ne nialin teen. Nii ne tii ba bul nii. ²¹ Wialin nialin si na leje ba kala fá fawullun, nii ne tii Moosis ma titia chichel a bul, “Mii fá fawullun ne.” ²² Ama ma nialin si laa Yesu wiaa dii, má ku yi peel-la ba sí yire Zaayon ne. Má ku yi tan-la ba sí yire Jerusalem a he Wia-jaŋ le ne. Wia-la si weye jaŋ ne nii. Wia tinɔaraa bui buiba bui ma hilimi lee-la ari tuɔɔrun. ²³ Lee-la ne nialin Wia si laa sipaan laa ta he. Wia ma titia he dime ne a naa nii-la si jaŋ dii nuu-kala sariya. Wia nialin si suba ma he dime ne, nialin u si leje ba naa tuɔ-pul tinɔaa u sipaan. ²⁴ Má kɔ Yesu ma teen ne. U ne he Wia ari nuhuobiine pege. Wia tou le ne a ta nii-falin nuhuobiine teen. U ne suba a jon u chalin jaase a pi nuu-kala. U chal-la-na faasa tin ne a pela le. U bi Ebil chalin naga. Ebil chalin-na fa jon cheerin pi nii-la si kpuu ne.

²⁵ Má jegile nii wialin Yesu sí bul. Ma síba via ari Iziral tinɔaa si via wialin Moosis fa si bula piba, Wia dogiseba ne. Nii wiaa, di la ne via wialin Yesu Kirisito si bula, Wia jaŋ dogisela a kii nii u si dogise Iziral tinɔaa. ²⁶ Iziral tinɔaa fa nii Wia yiikoro ne. U yiikoro leje tinteen kala zigili ne. Leele nla Wia bula

pila ari u jaŋ len di tinteen bira zigili, ama tinteen dunɔna dee. Wia nyun ari tinteen kala ne jaŋ zigili. ²⁷ U si bula duu jaŋ bira len di tinteen zigili ken bubuon ne. U bubuon ne nla: Wia jaŋ len di dunia deen kialin u si naa zigili. U jaŋ kenba kaa birime, ka kialin si bi wuo zigili-na he dime. ²⁸ Wia jon tintee-la si bi wuo zigili ne a pila. Nii wiaa, má len di la fáu a lolu, an pe chuchuolu ari siifesiŋ. ²⁹ U maga di la fá Wia a chuolu, bee wiaa u nage nyin-gelin ne a didii kiaa.

13

Nii la si jaŋ naa di Wia tuon tɔre

¹ Ma nialin si laa Yesu wiaa dii, ma si cho donɔ nii, má ken nii naan le. ² Má he dolun a biben nuhuɔraa worun ma diisin le. Naa donsun laa nuhuɔraa bil ba diisin le, an bi jin di nuhuɔra-la donsun naa Wia tinɔaraa ne. ³ Ma donsu-la ba si kaa tɔ dia, má liliisi ba wiaa. Ba si kenba tɔ dia nii, má liliisi ba wiaa a nage ma kala ne ba kaa tɔ dia nii. Ma donsu-la ba si to naasin dogise maa, má liliisi ba ma wiaa a nage ma kala ne baa dogise nii. Má naa nii, bee wiaa ma ma he ma miisin le ne a naa kubala. ⁴ Ma nialin si jaa haalaa, má ken ma haalaa worun. Haalaa maa, má ma ken ma balaba worun. Baalaa, ma sí ma haalaa via koo ma sí ma donsun haalaa gollo chiche. Ma sí wu-liilin naa, bee wiaa Wia jaŋ dii nialin sí naa wu-liilin sariya. Nialin ma si via ba haalaa ta, Wia jaŋ dii ba sariya. ⁵ Ma sí faasa cho moribiee kinken. Ku-la kala ma si kene, má len di ma tuon tɔre ba nyun. Nla ne Wia bul u tenin tuon. U si, “Mi bi jaŋ viama ta. Mi bi jaŋ kɔ di mi lii ma harin.” ⁶ A tin nii wiaa, la jaŋ wuo bul ari nyu-duon, “Wia ní pemi le.

Mi bi jaŋ fá fawullun.

Bee ne niaa chiche di ba naami?

Nuhuobiine bi wii-kala wuo naami le.”

⁷ Má liisi ma kuhiasin wiaa. Ba ne bul Wia wiaa pipima. Má biine a mu yi nii ba si laa Wia wiaa dii a chinj nii le a mu suu. Má to ba naa-buasun a chinj nii le. ⁸ Yesu Kirisito si nage nii, u bi jan ko duu birima. Faafaa u si nage nii, nii ne u haa nage ari jininj kala. Maachie maa, nii titia ne u jan nage. ⁹ Ma sí leŋe di niaa doŋsunj keŋ wu-tania ku dagema. Niaa deenba, baa bul kudiilee wiaa ne. Wialinj ba síi che di ba dagema bi jan pema le. Wialinj biba ma titia le pe. Ama u maga di ma to Wia. U lahorimo le ma jan keŋ dolunj. ¹⁰ La nialinj si laa Yesu wiaa dii ma to keŋ lee-la ba si kpu kiaa pila. Ba kpu Kirisito daagee-la nyunj a tinj la wiaa ne. U si suu nii, u che kudiilee ne pila la kaa kpa a didii. Nialinj síi to wialinj Moosis si ŋmuŋsa bil di niaa tuto aa tinj tinjŋaa lebi-la tuonj, ba bi kudiilee deenba wuo dii. ¹¹ Di nialinj si kpu pusunj pipi Wia kuhianj níi che duu piise niaa disinninj ta, u yie kpu pusunj ne a keŋ chalinj kaa juu Wia-dia-la sipaanj a gaare koru-la nyunj. Ama pusu-la ba si kpua, ba yie nyige ta taŋ-la jeenj harinj ne.

¹² Nii ne tii Yesu ma na heenj Jerusalem jeenj harinj duu wuo jonj u titia chalinj a piise niaa disinninj ta, di ba ŋaa ni-zomɔ Wia teenj. ¹³ Yesu dii hiisinj ne worunj taŋ-la jeenj harinj, nii wiaa má leŋ di la mu lee-la a dii hiisi-la titia. ¹⁴ La he dunia le ne, ama la bi lee kene dunia deenj le. Ama la-na, laa gberɛ taŋ-la si jan lii Wia-janj ko ne. ¹⁵ Nii wiaa la nialinj si wuo suri la niinj a bul ari la jinj Wia, má leŋ di la to Yesu Kirisito le a dennu bua-na kala le, a leŋ di u yirinj yire. ¹⁶ Bua-na kala má ŋaa kukeri a ŋinŋaa wu-zonjɔɔ doŋɔ le. Kialinj ma si kene, má ŋaa pipi doŋɔ. Di ma níi ŋaa nii, Wia tuonj janj tɔre ma nyunj.

¹⁷ U maga ma tuto ma kuhiasin niinj a jonj ma titia a piba. Má ŋaa nii, bɛɛ wiaa ba níi beŋma. Maachie ba ne janj dagee nii ma si tinj ma tinjŋaa a pi Wia. Di ma ne to

ba niinj le, ba janj tinj ba tinjŋaa worunj ari tuotɔrunj. Ama di ma ne bi ba niinj to, ba tuonj janj chei ma nyunj. U nii saa bi janj pema le.

¹⁸ Má sul Wia pila bua-na kala. La jima la tuobiinaa kala chese ne Wia teenj. Wii-na kala la síi ŋaa le, la yie chiche di la keŋ wutitii ne aa ŋaa wialinj. ¹⁹ Mii sulma di ma fiase siinj a sul Wia pimi, di Wia pimi wonjbiinj di mi ko ma teenj lima.

Teninj wu-bulunj diderinj

²⁰ Mii sul Wia duu pema le. U ne pi nuu-kala yarifielaa. U ne chise la Tiina Yesu Kirisito suunj le. Yesu Kirisito nage pie-daari-duo ne aa beŋ u niaa nyunj worunj. U chalinj ne Wia jonj a ta niinj la teenj. Wii-la u si ŋaa bi janj lel. ²¹ Mii sul Wia duu pima ku-zonj-na kala di ma wuo kaa ŋinŋaa wialinj kala síi tɔre u tuonj. Wia to Yesu Kirisito le ne a ŋaa wiinj deenj pima. Má leŋ di la dennu a leŋ di u yirinj yire a kaa mu wuu. Ami.

²² Mi naanbiirinj, mii sulma di ma jegile nii wialinj mi si bula pima. Wu-kuu-bie ne mi ŋmuŋsa pima nii. ²³ Mii che di ma jinj ari la naanbie Timoti ba fa si kaa to dia, ba liisu ne. Duu ne bi diene anj ko mi teenj, la duu kala janj ko ma teenj. ²⁴ Má chuɔle ma nihiasinj ari Wia niaa kala a pila. La tuonj nialinj si lii Itali tinjteenj maa chuɔlema. ²⁵ Wia lahorimo le ma janj honj ari yarifielaa.

TEN-LA JEEMS SI N̄MUNSA

¹ Mi-na Jeems si ɲaa Wia ari la Tiina Yesu Kirisito tiɲtinna, mii chuɔlema Juu tiɲɲaa kala si laa Yesu wiaa dii a pisa a he nialin si bi Juu tiɲɲaa ɲaa tuɔɲ.

Yarida ari wu-jiminj wiaa

² Mi naanbiirin, di wu-yiri-na kala ne juuma, má leɲ duu ɲaa ma tuɔɔru. ³ Di ma ní na heɛɲ wii le aɲ ha ɲaa Wia yarida, ma jaɲ wasa chin ma yarida le a keɲ kenyiri. ⁴ Má leɲ di ma wuo keɲ kenyiri a nyalima mu dɛɛ, di ma wuo ku ɲaa tuɔ-pul timma a sí kuɲ-kala che ka.

⁵ Wiaa deenba le, di nuu ne he ma tuɔɲ a bi wu-jiminj kene duu wuo jin wii-la u si jaɲ ɲaa, má leɲ di tiina sul Wia duu pu wu-jiminj. U keɲ zile a joɲ wu-jimii-la a pi nuu-kala si sulu. U bi ba kuɲ-kala ka kiri. ⁶ Ama di ɲ ne sul Wia duu pin kuɲ, laa dii ari u jaɲ ɲaa wii-la pin. Sí tuɔbiinaa balia keɲ ari u jaɲ ɲaa koo u bi ɲaa. Nii-la kala si sul Wia chiche kuɲ aɲ keɲ tuɔbiinaa balia, u nage lii-pelin si he fuoɲ tuɔɲ ne. Pelin yie ɲmobu a kaa mu sipaan, aɲ bira ɲmoo kɔ harin maa. ⁷⁻⁸ Nii-la kala si keɲ tuɔbiinaa balia a bi wu-bala le china wii-kala u sí ɲaa le, u tiina sí yielu ari la Tiina Wia jaɲ joɲ kuɲ-kala pu.

Nialin si ɲaa summoo ari nialin si keɲ kiaa wiaa

⁹ Nii-la si bi lee kene dunia le nialin si laa Yesu wiaa dii tuɔɲ, má leɲ duu tuɔɲ tɔɛ ari Wia si pu lerin. ¹⁰ Nii-la ma si ɲaa kiaa tiina nialin si laa Yesu wiaa dii tuɔɲ, má leɲ duu ma tuɔɲ tɔɛ ari Wia si kenu kaa muuri. U bi jaɲ dieni aɲ suu, a nage yaɲ si yie fiile u bí dieni aɲ hihil nii. ¹¹ Bɛɛ wiaa, wia yie pɔɛ, lerin faasa lin. U wuliminj ɲaa yaɲ-la hil. U fiilaa yuori. U zomun lel. Nii-la si

keɲ kiaa ma nage ɲii ne. U ha jaɲ titin u tiɲtinɲaa aɲ suu kage.

¹² Wia jaɲ pe nii-la wiin si jua le, aɲ ka u wuo nyalime a chin u yarida le. U si wuo nyalime ɲii, Wia jaɲ joɲ miisi-la si bi dɛɛ a timu, miisi-la u si si u jaɲ joɲo pi nialin kala si chou.

ɲii la si jaɲ ɲaa di wii ne juula le

¹³ Di nuu-kala ne juu wii, u bi maga di tiina bul ari Wia ne magisu. Nuukala bi Wia wuo nyise duu ɲaa wu-bɔɲ, u titia ma bi nuu-kala ka nyise duu ɲaa wu-bɔɲ. ¹⁴ Tuɔbiin-bɔmɔ-la si he nuu tuɔɲ ne yie nyise nuu-kala duu ɲinɲaa wu-bɔɲɲɔ. Tuɔbiin-bɔmɔ-la ne yie kenu yenɲi. ¹⁵ Duu ne seye duu to tuɔbiin-bɔmɔ-la le, ba yie ɲaa u juu haache le. Haache-la yie ku yuge. Duu ne ku yuge lerin kala, u yie ɲaa nii-la suu.

¹⁶ Mi naanbii-kpianaba, ma sí ma titia nyisu. ¹⁷ Ku-zɔɲ-na kala lii Wia teen ne. U ne ta kialin kala si he wia nyun le a chaane. Ama di ba ne jua, biriminj yie he dime. Wia titia bi ɲii naga. U bí birime. ¹⁸ U tuɔɔrun le ne u laa sipaan bul u niin wiaa si ɲaa wutitii a pila di la wuo tutoba, di Wia wuo ɲaa di la ɲaa u biirin. U ɲaa ɲii di la wuo ɲaa u bunbun biirin, ka di ku-kaanaa-na tuto.

La sí nii wiaa ɲii ari la sí ɲaa wiaa ɲii

¹⁹ Ma jin wiaa deenba kala ne. ɲii wiaa, má leɲ di nuu-kala ɲaa lima a jegilee nii wiaa niaa teen worun. Di ma ní che ma bul wiaa maa, má fiile aɲ-na bul. Di ma che ma na baanin maa, ma sí guu na, ²⁰ bɛɛ wiaa nii-la sí na baanin bi jaɲ wuo ɲaa wialin sí to wonbiin Wia teen. ²¹ ɲii wiaa, má liise ma titia wu-bɔɲ wu-ɲaalaa le a via wu-bɔmɔ-la kala si gollima. Má keɲ ma titia muuri Wia sipaan a sei Wia niin wialin u si dagema. Má laa he ma tuɔɲ le. Wialin keɲ dolun a wuo laama tita.

²² Ama u maga di ma tuto wialin Wia si si di ma ɲinɲaa ne. U bi maga di ma ninii wialin dunɲun. Di ma ní

nii wialin an bibaa n̄aa, maa nyise ma titia n̄e. ²³ Di nuu-kala n̄e nii wialin an bibaa n̄aa, u nage nia si jon beenantire a bee na u nagisin n̄e. ²⁴ U yie ben a na u titia beenantire-la tuon. Di u n̄e surisa lii, u yu nii u si naga. ²⁵ U nage nii n̄e wialin Wia si leŋe ba n̄mun̄sa bil di niaa tuto tuon n̄e. Wiaa deen̄ba kala n̄e zom̄o kin̄ken̄. Wu-nyiarin̄ bi guolo. Ba wuo laa niaa tita n̄e. Di nuu n̄e na wiaa deen̄ba, a nyalima n̄aa wialin u si na, a bí yu an haa n̄aa mumu, Wia jan̄ p̄eu l̄e wialin kala u síi n̄aa l̄e.

²⁶ Di nuu n̄e jon u titia ari u to Wia n̄e, an bi u titia kene ari wialin u síi bul l̄e, uu nyise u titia n̄e. U Wii-chuolun̄ ma n̄aa p̄ei n̄e. ²⁷ La Nyimma Wia won̄biiñ tonun̄ u si daga ari u n̄aa won̄bii-titii n̄e n̄la: Má mu nina biisinsin̄ ari yo-haala-la síi na heen̄ a p̄e pipeba l̄e, an liise ma titia dunia niaa wu-n̄aalaa l̄e di ba disinnin̄ síma digu.

2

Má p̄o di ma sí niaa kaa pup̄ore d̄on̄o l̄e

¹ Mi naan̄biirin̄, l̄e l̄e ma laa la Tiina Yesu Kirisito wiaa dii n̄e, u-na yiri-balin̄ Tiina. Nii wiaa u bi maga di ma jon niaa d̄on̄sun̄ jirima an ben d̄on̄sun̄ maa, ma siaa bibaa s̄u, a ken̄ niaa pup̄ore nii. ² Má len̄ di la jon ari niaa balia n̄e ku juu lee-la nialin̄ si laa Yesu wiaa dii si hilime. D̄on̄o ken̄ kiaa a laale geri-z̄on̄on̄o a jon selime nenii-piraa a kpiere u titia. D̄on̄o ma n̄aa summu a ma laale geri-k̄osum̄o. ³ Nii n̄e ma ken̄ nii-la si laale geri-z̄on̄on̄o worun̄ a pu di-h̄on̄-z̄omun̄ u h̄on̄, an bula pi nii-la si laale geri-k̄osum̄o duu h̄on̄ tin̄teen̄ koo duu chin̄ dime. ⁴ U nii z̄om̄o n̄e? Di ma n̄e n̄aa nii, ma tuobiinaa bi wu-bala l̄e china, maa p̄ore niaa n̄e nii. Ma yie ken̄ ma tuobiin̄-l̄orunu-la n̄e a laa niaa wiaa jijn̄ a didageba, a ken̄ba p̄ore d̄on̄o l̄e. U nii bi z̄on̄. ⁵ Mi naan̄bii-kpianaba, má jegile nii mi teen̄. Nialin̄ si n̄aa

summoo dunia deen̄ l̄e n̄e, Wia tuose di ba laa u wiaa dii a juu Wia kuorii-la, lee-la u si si nialin̄ si chou jan̄ juu. Ba jan̄ juu a sen̄e kuori. ⁶ Ama ma bi worun̄ ka n̄aa, ma si yie n̄aa wiaa juuu summoo l̄e nii. Na, kiaa tin̄n̄aa n̄e yie gurema a didii dolun̄ ma ma l̄e a yie fuga ken̄ma mu sariya didiilin̄. ⁷ Ba yie chichei yiri-z̄on̄-la Wia si jon̄o h̄e pima.

⁸ Ba n̄mun̄se Wia tenin̄ tuon̄ a bul n̄la n̄e: “Cho n̄ d̄on̄o tiina ari n̄ si cho n̄ titia nii.”

Di ma n̄e sen̄e to niin̄ deen̄, ma n̄aa worun̄ n̄e. La Kuoro Wia n̄e jon niin̄ deen̄ pila. ⁹ Di ma n̄e ken̄ niaa pup̄ore a jujon̄ d̄on̄sun̄ jirima, an ka ma siin̄ bi d̄on̄sun̄ s̄u, maa n̄aa haache n̄e. Wialin̄ Wia si leŋe ba n̄mun̄sa bil di niaa tuto daga ari ma tele n̄e. ¹⁰ Di nuu n̄e paala tuto wialin̄ kala ba si n̄mun̄sa bil di niaa tuto an̄ chei ba tuon̄ wu-bala maa, u naga u chei wialin̄ kala n̄e nii Wia sipaan̄. ¹¹ Wia-la si si di ma sí niaa haalaa che, u titia n̄e si di ma sí niaa kpu. Di ma n̄e bi niaa haalaa che an̄ kpukpu niaa, ma ha chei Wia niin̄ wialin̄ u si bile n̄e. ¹² Di ma níi bul wiaa an̄ p̄e n̄in̄aa wialin̄, má liise yi ari Wia jan̄ to ma wu-bulaa ari ma wu-n̄aalaa l̄e n̄e a dii ma sariya. U jan̄ to wialin̄ l̄e n̄e u si leŋe ba n̄mun̄sa bil di niaa tuto a dii ma sariya. Wiaa deen̄ba n̄e laa niaa tita. ¹³ Di nuu n̄e bi niaa nennige ka fá, Wia ma bi jan̄ fá tiina nennige buala l̄e u si jan̄ didii niaa sariya. Ama nii-la si fá niaa nennige bi jan̄ fá wii-kala sariya-la che-diilin̄.

Nii la si jan̄ dage ari laa n̄aa yarida

¹⁴ Mi naan̄biirin̄, di nuu n̄e si u laa Wia wiaa dii n̄e an̄ bi wialin̄ Wia si cho ka n̄aa, u nii z̄om̄o? Duu yarida nage n̄la, ma biina Wia jan̄ laau ta koo? ¹⁵ Má len̄ di la jon̄ ari ma naan̄bie bi geri-z̄on̄on̄o kene a bi u niin̄ kudiilee wuo na dii. ¹⁶ Nii n̄e ma bula pu a bul, “Wia jan̄ pen̄ l̄e a

piŋ kialin ŋ sɪi che.” Di ma ne ŋaa ŋii aŋ bi seye di ma peu le ari kialin u sɪi che, u ŋii zomoo? ¹⁷ Nii wiaa, di nuu ne si u laa Wia wiaa dii aŋ bi wialin Wia si cho ka ŋaa, u yarida-la ŋaa pei ne.

¹⁸ N bi poo nuu doŋ jaŋ he dime a bula piŋ ari u laa Wia wiaa dii ne. Doŋo ma bul duu maa ŋaa wu-zoŋŋoo ne. Duu ne bul ŋla, mi jaŋ piesu a bul, “Di ŋ ne bi wu-zoŋŋoo ŋaa aa pe ŋ yarida le, ee ne ŋ jaŋ wuo dagemi ari ŋ sene laa Wia wiaa dii nee? Mi-na ŋaa wu-zoŋŋoo ne a dagine ŋii ari mi sene laa Wia wiaa dii ne.” ¹⁹ N jima ari Wii-bala ne he dime koo? Di ŋ ne jin ŋii, u ŋaa wu-zoŋ ne. Ama si yu ari jin-boŋŋoo ma jin ŋii le ne, ŋii ŋaa fawulluŋ kenba, ba chichel. ²⁰ Bee ne tii ma yaare ŋla a biine di nuu jaŋ wuo laa Wia wiaa dii aŋ bi wu-zoŋŋoo ŋaa pipe? Má leŋ di mi dagema ari nuu ne si u laa Wia wiaa dii ne aŋ bi wu-zoŋŋoo ŋaa pipe u yarida-la le, u yarida-la ŋaa pei ne. ²¹ Má liisi la naabalima Abiraham wiaa. Bee ne tii Wia leŋ Abiraham wuo ŋaa tuo-pul tiina u sipaan? Wii-la si tii ne ŋla: U to Wia niin, Wia si bula pu duu ken u bie Aizik a kaa mu kpu a pu. Nii ne u sii ken Aizik mu di u kpu a pu. ²² Abiraham laa Wia wiaa dii ne a faa ŋaa wialin maa Wia si cho. U ŋaa wu-zoŋŋoo a pe u yarida-la le. Nii ne u yarida sene wasa su. ²³ U si ŋaa ŋii ne, wialin ba fa si ŋmuŋsa Wia tenin tuoŋ ku ŋaa wutitii. Ba fa ŋmuŋsa ari Abiraham laa Wia wiaa dii, ŋii ne tii Wia leŋ u wuo ŋaa tuo-pul tiina u sipaan. Nii wiaa ne niaa paala kenu yiyire Wia naŋdoŋ. ²⁴ Nii daga ari wialin nuu sɪi ŋaa ne yie tii Wia leŋ u wuo ŋaa tuo-pul tiina u sipaan. U si laa Wia wiaa dii dunduŋa-la dee bi tii. ²⁵ Nla titia ne u fa nage Rehab ma le. U fa ŋaa ha-choruŋ ne. Iziral tinŋaa tinɗaraa si ko u teen, u kenba woruŋ. Ba sɪi che di ba luora lii fá viiri, u dageba wonbii-tanii ne ba to a fá lel ba diŋdoŋŋoo nisin le. A tin u si ŋaa

ŋii wiaa, Wia leŋ u wuo ŋaa tuo-pul tiina u sipaan. ²⁶ Di nuhuobiine ne bi wiese kene, u bi wei. Nii-la saa si laa Wia wiaa dii aŋ bi wu-zoŋŋoo ŋaa pipe u yarida-la le, u tiina ma nage ŋii ne. U yarida-la ŋaa pei ne.

3

La nendelimiŋ si nage ŋii

¹ Mi naanbiirin, ma tuoŋ, ma si chiche di ma yuge a wiwalime di ma didage ma doŋsuŋ tinŋaa si laa Yesu wiaa dii, bee wiaa ma jima di ba ní dii dunia niaa sariya, ba jaŋ faasa dii la nialin sɪi dage niaa sariya ne a kii la doŋsuŋ tinŋaa. ² La kala yie ŋaa wiaa piperiki ne. Di nuu ne bi wiaa bula piperiki, u bi wii-kala kene. U wuo ken u titia ne wialin kala u sɪi ŋaa le. ³ Na jaaba, di nuu ní che duu dagu, u yie joŋ jaaba niin koŋ ne a he jaaba niin le. Koŋ-la le ne u yie ken, a didage joo-la u mumu lee-la kala u sɪi che duu mu. ⁴ Bira na liin daborusuŋ maa. Ba ŋaa kubalaa ne. Peli-duoŋ yie lu a kaa ven. Ama daanyi-bie ne he dime. Nii-la si ken liin daboro-laa ven, u yie ken daanyi-bie-la a kaa dage a ŋaa u mumu lee-la kala u sɪi che. ⁵ Nii ne nuhuobiine nendelimiŋ ma nage. U bi wii-kala maga aŋ bubul wubalaa. Ma jima ari nyin-gelin ma bi yuge aŋ jaŋ wuo chol giri-balin a diiu kala.

⁶ Nuhuobiine nendelimiŋ ma nage nyinin ne. U jaŋ wuo ŋaa wu-boŋ kala si he dunia le. U ŋaa la yaraa seme doŋo ne. Ama u wu-boŋŋoo u si yie ŋaa yie chen la yaraa kala ne u chei. U yie chol nyinin ne a dii ŋii halii nuhuobiine miisin kala le. Nyin-la yie lii Sitaani lerin ne a chol. ⁷ Nuhuobiine ken pusun kala dolun ne: Baga kaa ari diibiisin, ari kialin kala sɪi tuuri tinteen, ari liin tuoŋ kaa. U kenba kala dolun ne. ⁸ Ama nuu-kala bi nendelimiŋ dolun kene duu kaa bil duu ŋaa fululu. U ŋaa ku-boŋ ne a ken huon-la sɪi kpu niaa. ⁹ La yie ken la nendelimee ne a kaa didenne Wia

si n̄aa la Tiina a n̄aa la Nyimma maa, aŋ bira keŋ neŋdelime-la titia a kaa tutuuse la doŋsun tiŋŋaa maa Wia si n̄aa ba nagu. ¹⁰ N̄ii-la titia la si kaa denne Wia, u titia ne la kaa tuuse n̄aa. La naan̄biirin, u bi maga di n̄la n̄ŋaa. ¹¹ Lii-bul-sii-bala bi jaŋ wuo bul lii-zomun̄ ari lii-lorun̄ kala. ¹² Tutogo ma bi jaŋ wuo neŋ babilaa. Chichueŋ ma bi jaŋ wuo neŋ tutogo nan̄bilaa. N̄ii titia ne lii-la si nage yisin̄ ma bi jaŋ wuo birime lii-zomun̄.

Wu-jimii-la si lii Wia teen si nage n̄ii

¹³ Ma tuon̄ nialin̄ si keŋ wu-jimin̄, ma siaa ma suri, u maga di ma n̄ŋaa wu-zon̄ŋoo ne a keŋ ma titia muuri, a dage n̄ii ari ma sene keŋ wu-jimin̄ ne. ¹⁴ Ama di ma ne faasa keŋ yaribierin̄ doŋo le, a chil ma dun̄duŋa wiaa, aŋ didage ma titia ari ma keŋ wu-jimin̄, maa nyia ne. ¹⁵ Wu-jimin̄ deen̄ yiri bi Wia teen̄ lia. U n̄aa dunia wii ne a lii dunia n̄aa tuobiinaa le ari Sitaani teen̄. ¹⁶ Di n̄aa ne faasa keŋ yaribierin̄ doŋo le a chil ba titia wiaa dun̄duŋa, ba jaŋ keŋ nii-liaba, a yuyuo doŋo, a n̄ŋaa wu-bon̄ŋoo yuyuge. ¹⁷ Ama wu-jimii-la si lii Wia teen̄ zom̄o kin̄keŋ. Wu-bon̄ kala tuo u le. Nii-la kala si keŋ wu-jimin̄ deen̄, yie hoŋ ne som a kiker̄e yuosun̄, a keŋ zile. U yie jegilee nii n̄aa niin̄ wiaa. U yie fifa n̄aa nennige ma ne worun̄. U yie n̄ŋaa wu-zon̄ŋoo ne. U bi tuobiinaa balia ma kene a bi nii-sima ma kene. ¹⁸ Nan̄jejeeree yie hoŋ som ne aŋ pe n̄aa ma le di ba ma hoŋ som, a n̄ŋaa wialin̄ Wia si cho.

4

La to Wia harin̄ koo la to dunia n̄aa harin̄?

¹ Be ne ma yie guraa yuo doŋo? Wii-la si tii ne n̄la: Ma chil ma titia tuotore wiaa ne ma tuon̄ le a chiche di maa n̄aa wu-bon̄ŋoo, n̄ii ne tii. ² Ma cho di ma keŋ kiaa aŋ bi baa na, n̄ii ne tii ma cho di maa kpu doŋo aŋ

laa. Ma yie hihiene kialin̄ aŋ bi wuo na. N̄ii ne tii ma guraa yuo doŋo n̄ii. Wii-la si tii ma bi kialin̄ ma si cho kene ne n̄la: Ma bi Wia sul duu jon̄o pima. ³ Bua doŋo ma le ma yie sene sulu a chiche kiaa. Ama ma yie keŋ tuobiin̄-bon̄ŋoo ne a sul. N̄ii ne tii ma bi laa. ⁴ Ma nage haala bira si bi u bala niin̄ ka to ne. Ma bi jin̄ ari nii-la kala si jon̄ u nyun̄ kala he dunia kiaa le n̄aa Wia din̄doŋ ne? Wutitii, nii-la kala si jon̄ u nyun̄ he dunia kiaa le birime Wia din̄doŋ ne. ⁵ Ma biina wialin̄ ba si dage Wia tenin̄ tuon̄ bi bubun̄ kene? Ba n̄mun̄sa ari Wia faasa cho di u dun̄duŋa ne tii la kala. Di la bi seye duu tiila, u didii hadorun̄. ⁶ Ama Wia fala nennige worun̄ a pipela le di la jon̄ la titia kala a pu. N̄ii ne tii ba n̄mun̄se Wia tenin̄ tuon̄ ari Wia via nialin̄ sii bigisi ba titia le aŋ pipe nialin̄ si keŋ ba titia muuri le. ⁷ N̄ii wiaa, ma jon̄ ma titia a he Wia nisin̄ le. Ma jon̄ harin̄ yia Sitaani, u jaŋ fa lel. ⁸ Ma surisa mu kpage Wia, u ma jaŋ ku kpage ma. Ma son̄ ma nisaa liise wu-bon̄ŋoo n̄aanin̄ le a pulle ma tuon̄, a bira si tuobiin̄-lorun̄ biinu, be wiaa ma keŋ tuobiinaa balia balia ne. ⁹ Ma leŋ di ma tuon̄ chei. Ma yel sii-liirin̄. Ma leŋ di ma tuotorun̄ birime tuo-cheen̄. ¹⁰ Ma keŋ ma titia muuri Wia sipaan̄. Di ma ne n̄aa n̄ii, u jaŋ keŋma chuule.

Ma po ma si ma doŋsun tiŋŋaa wiaa laa jin̄

¹¹ Mi naan̄biirin̄, ma si ma doŋsun tiŋŋaa yirin̄ chei. Nii-la kala si chei u doŋo tiina yirin̄ koo u bul u teen̄ maa a bul duu cheye ne, u naga tiina ma bul wu-bon̄ ne a tige wialin̄ Wia si leŋe ba n̄mun̄sa bil di n̄aa tuto le ne, a bul ari ba bi zon̄. Di nuu ma ne bira bul di wialin̄ bi zon̄, u ma bira bi wialin̄ to. U miira jon̄ u titia ari u yuga ne a kii wialin̄ Wia si leŋe ba n̄mun̄sa bil. ¹² Wia dun̄duŋa ne keŋ dolun̄ duu bil wiaa pi n̄aa di ba tuto. U dun̄duŋa ma ne jaŋ wuo dii n̄aa sariya. U ne jaŋ wuo laaba ta, u ne

jan bira wuo jon cheerin piba a naa di ba suu. Kubee ne kama maa, di ma chichei ma donsun tinnaa yirin?

Má pɔ ba-bii-bal wiaa njaanin

¹³ Bee na ma nialin si yie bul ari maachie ma jan mu tan deen a yalle bayalin a yi jina a na nyuurun, ma paala bi chiemin wiaa jin. ¹⁴ Ma miisin bi kun-kala naa. U nage burun si yie to ne chichuon, ka muapilii wia pɔse u lel. ¹⁵ U fa maga di ma bul ari Wia ne seye di la ken miisin, la jan naa nla. ¹⁶ Ama ma haa nmoo ma boye le ne aa dage ma titia. U nii bi zon. ¹⁷ Di nuu ne jima ari wii ne maga duu naa ka u via duu naa wii-la, u naa haache ne.

5

Wii-la si jan naa nialin si ken kiaa le

¹ Ma nialin si ken kiaa, má jegile nii mi teen. Máa nmoo niin! Bua kubala nii ko, bua-la le ma jan faasa na heen. ² Ma ku-dan-la suomo chichei ne. Mɔgulun ma suomo didii ma gennin. ³ Ma selime kiaa ari ma moribii-biin ma kala ne sua. Kialin si sua nii daga ari ma bi worun naa. Ma kialin si sua nii, nii titia ne ma yaraa ma jan pua a nage nyinin ne die. Læle dunia kpage diderin ne, an ka ma-na ha paa kiaa fifaa. U bubuon ne be? ⁴ Ma gure nialin maa, ma si naa ba tin ma bagisin le ne. Ba nii naa gon ma le. Gon-la juu la Tiina Wia digilaa ne, nii-la sii ben dunia kun-kala. ⁵ Ma si he dunia le, ma nii sima a naa ma tuɔɔre wiaa. Ma si dii kiaa a waa a nere nii, ma nage nesin ba si diasa ba nere di ba kpu ne. Di ba ne dii ma sariya, ba jan jon cheerin pima di ma suu nii titia. ⁶ Ma bi worun naa, ma si jon cheerin pi nialin si bi wii cheye, ka ma kpuba. Ka ba bi wii naa di ba laa ba titia.

Má ken keniyiri a chuchuoɔe Wia

⁷ Mi naanbiirin, má ken keniyiri a gberɛ chee-la la Tiina Yesu si jan miira ko. Má na paara, u si ken

keniyiri nii. U yie gberɛ duon-puso. Duonun nii, u duu kiaa, a bira ken keniyiri a gberɛ gbanchaan-duonun le u kiaa wase, u ta. ⁸ Má naa kukeri a ma ken keniyiri nii. Má nyage ma boye worun, be wiaa tapulii-la la Tiina Yesu si jan miira ko ka kpage ne. ⁹ Mi naanbiirin, ma sí wiaa gurimu don le, di Wia sí ma sariya dii a jon cheerin pima. Na nii-la si jan dii la sariya ne chin boinniin a naa siri duu juu nii. ¹⁰ Mi naanbiirin, má na nialin sii bul wiaa, la Tiina Wia Din-zon-la dolun le. Ba na heen worun an ha ken keniyiri. Má naa kukeri an ma to ba naa-buasun a ma ken keniyiri. ¹¹ Wia pe nialin si wuo nyalime nii a mu dere le worun. Má bira na nii baal kubala ba sii yire Job si na heen an nyalime nii. U hee-la harin le la Tiina Wia pe le a len u nii sima. Wutitii, la Tiina Wia ka fála nennige kinken kinken.

¹² Mi naanbiirin, siifan wiin ne mii che mi bula pima. U ne nla: Di ma ne si ma jan naa wii, ma sí nmiesu. Ma sí wia nyun kun nmiesu, ma sí tin teen kun ma nmiesu, koo ma sí kun-kala nmiesu. Di ma ne seye, u maga di ma bul, "Oo, la seye ne." Di ma ne bira bi seye maa, u maga di ma bul, "Ai, la bi seye," an sí nmiesu. Di ma ní naa nii, Wia bi jan jon cheerin pima bua-la le u si jan dii ma sariya.

¹³ Di nuu ne he ma tuon aa na heen, má len duu chuɔle Wia a sulu duu pe le. Di nuu ma ne he ma tuon, u tuon tɔre, má len duu yi yiilaa a denne Wia. ¹⁴ Di nuu ma ne he ma tuon a wiwile, má len duu yire nialin si laa Yesu wiaa dii aa hilimi ba tuon kuhiasin di ba ko u teen a chuɔle Wia pu. Ba sii chuɔle Wia nii, má len ba loge nuun a tisu, an sul Wia pu la Tiina Yesu dolun le. ¹⁵ Di ba ne laa dii ari Wia jan sene naa wii-la ba si sulu chiche, u jan len di nii-la sii wiilu duori a ken dolun. Di u ne naa haacheba maa,

Wia jaŋ joŋ ba kala cheu. ¹⁶ Nii wiaa, má dage ma titia haacheba a pi doŋo a sul Wia a pipi doŋo, di Wia wuo ŋaa di ma bira keŋ doluŋ a duori. Di tuo-pul tiina ne sul Wia, u Wii-suluŋ yie faasa keŋ doluŋ ne. Duu ne sul Wia a chiche wii, wii-la yie sene ŋaa ne. ¹⁷ Má na baal kubala baa yire Ilaaja. U ma fa nage la ne. U faasa sul Wia ari siifesiŋ di duonuŋ sí nii. Duonuŋ sene bi nia jisŋ batori ari cheŋsiŋ balidu. ¹⁸ Nii hariŋ le ne u bira sul Wia a chiche duonuŋ. Nii ne Wia leŋ duonuŋ nii, ba duu kiasa, ba kala wase.

¹⁹ Mi naaŋbiiriŋ, di ma tuoŋ nuu ne faa to wutitii le aŋ bira leŋ wutitii-la, ka nuu doŋ bira kenu kaa miira ko u tuto wutitii-la, ²⁰ u tiina si ŋaa nii pe haache tiina-la le u leŋ u wu-boŋŋoŋo ŋaaniŋ aŋ miira ko a tuto wutitii-la. U jaŋ laa tiina miisiŋ pu. Wia jaŋ chese nii-la haacheba kala ta. U bira bi jaŋ liliisi.

Mi teniŋ dideriŋ ne nii.

TEN-BUNBUN-LA PIITA SI N̄MUNSA

¹ Mi-na Piita si ɲaa Yesu Kirisito nanɲɔɔ, mi ne ɲmunɲe teniɲ deenɲ a pipi ma nialiɲ kala si laa Yesu wiaa dii aɲ tiɲ heen wiaa a piɲe a he Pɔɲtos le, Galiisia, Kapadoosia, Esia, ari Bitiinia tiɲteen kala le. ² Faafaa kala ne la Nyimma Wia biine ari u maga di ma ɲaa u niaa, ɲii ne tii u liisema a joɲ u Diɲ-zɔɲ-la a hema le, di ma ɲaa tuɔ-pul timma u teenɲ a tuto Yesu Kirisito niɲ. U ne joɲ u chaliɲ jaase ma wiaa di ma sí disinniɲ kenɲ Wia teenɲ. La Tiina Wia laħorimɔ, yarifielaa jaɲ yuge ma teenɲ.

Wialiɲ la sí yielu

³ Má leɲ di la denne Wia, nii-la si ɲaa la Tiina Yesu Kirisito Nyimma. U fála nennige kinɲenɲ. ɲii ne tii la wuo kenɲ mi-faliɲ deenɲ, beɲ wiaa Yesu Kirisito suba aɲ sii suuɲ le ne. La saa yiele ari la jaɲ kenɲ miisi-la si bi dere. ⁴ La maa yiele ari la jaɲ dii ku-zɔmɔ-la Wia si ɲaa bil u niaa le u jaɲ le. Kialiɲ bi jaɲ pua, ba bi jaɲ chei maa, ba zɔmuɲ ma bi jaɲ lii. ⁵ A tiɲ ma si laa u wiaa dii ɲii, Wia beɲma ne. Di dunia ne ku didere, u jaɲ dage niaa ɲii u si laama ta. ⁶ Kialiɲ ma si jaɲ na Wia teen leɲe ma tuɔɲ faasa tore. Leele ɲla-na ma tuɔɲ cheye ne, beɲ wiaa heen juuma ne. Ama ma jima ari hee-la si juuma, u bi jaɲ dieni. ⁷ Hee-la jaɲ leɲ di niaa wuo na ari wialiɲ ma si laa dii-na sene ɲaa wutitiiba ne. Ba zɔmɔ a kii selime si zɔmɔ ɲii. Selime ɲaa dunia niaa ku-chooli ne. Ba yie joɲo cho ne a yugile di ba na u sene ɲaa selime nee? ɲii titia ne ma ma nage. Ba magisema ɲii di Yesu Kirisito ne miira kɔ tapulii-la, niaa jaɲ denne Wia a zizilu duu yiriɲ yire a tiɲ wialiɲ ma si laa dii wiaa. ⁸ Ari ma ha si bi Yesu Kirisito na ma kala,

ma ha chou ne. Ma si buu na ma ha, ma laa u wiaa dii ne. ɲii wiaa, ma tuɔɲ tore kinɲenɲ kinɲenɲ ne. Ma paala bi ma tuɔɲruɲ wuo didage. ⁹ A tiɲ ma si laa Yesu wiaa dii ɲii, ɲii ne tii Wia laama ta.

¹⁰ Nialiɲ fa sí bul wiaa, Wia Diɲ-zɔɲ-la doluɲ le fa bul wu-zɔmuɲ deenɲ Wia si jaɲ joɲo pima wiaa ne. Ba fa gbilli Wia teniɲ tuɔɲ ari siifesiɲ di ba na ɲii Wia si jaɲ laa u niaa ta. ¹¹ Yesu Kirisito Diɲ-zɔɲ-la fa si heba le, u ne bula piba ɲii Kirisito si jaɲ na heenɲ, ka di niaa-na zizilu. ɲii ne ba ninerike di ba na bua-la le wiaa deenɲba si jaɲ ɲaa ari ɲii ba si jaɲ ɲaa. ¹² Wia joɲo dageba ari ma wiaa ne tii ba faa bul wiaa deenɲba, ba titia wiaa dee. Leele nialiɲ si bul Wia wu-zɔmɔ-la pipima, ba dagema bunɲuɲ wiaa deenɲba kala ne. Wia Diɲ-zɔɲ-la si lii Wia-jaɲ ku tuu heba le ne piba doluɲ deenɲ. Wia tiɲdaaraa ma fa cho di ba na wiaa deenɲba.

ɲii Wia niaa si maga di ba nage

¹³ ɲii wiaa, má leɲ di ma tuɔbiinaa pe doɲo le a kenɲ ma titia wii-na kala le. Má joɲ ma yielaa kala he ku-la Wia si jaɲ joɲo pima bua-la le Yesu Kirisito si jaɲ miira kɔ. ¹⁴ Má tuto Wia niɲ. Bua-la le ma fa si bi Wia iɲ, ma faa to ma tuɔtoɲe wu-ɲaalaa le ne. Ma bira síba to. ¹⁵ Wia bi disinniɲ kene aɲ yirema. ɲii wiaa, má ma sí disinniɲ kenɲ wii-na kala ma sí ɲaa le, ¹⁶ beɲ wiaa ba ɲmunɲa faafaa kala ne ari Wia si, “Ma sí disinniɲ kenɲ, beɲ wiaa mi ma bi disinniɲ kene.”

¹⁷ ɲ si kenɲ Wia yire ɲ Nyimma duu peɲ le, liise yi ari duu ní dii niaa sariya, u biba kaa pɔre. U yie tiɲ nuu-kala ɲii nii-la si tima mage. Má saa fáu a leɲ di ma wu-ɲaalaa zɔɲ dunia deenɲ le. ¹⁸ Ma kala jima ari Yesu Kirisito tiɲ ma chiminɲ a liisema wu-peiba ɲaaninɲ le. Ma naabalimaba faa ɲaa wu-peɲ deenɲba ne. U bi naga ari kialiɲ sí chei a nage selime koo moribiee ne

u joŋo yɔɔma. ¹⁹ Ama Yesu Kirisito chaliŋ titia ne u joŋo tiŋ ma chiminŋ. Moribiee bima wuo yɔɔ. Yesu nage pie-bie ne ba si liisa di ba kpu a pi Wia. U ŋaa Pie-bii-zɔŋ ne a bi wu-bɔŋ kala keɛ. ²⁰ Bunbunŋ kala, ka di Wia-na ŋaa dunia, u liise Yesu Kirisito ne duu tou le a laa dunia niaa ta. Dunia si ku kpage derinŋ, Wia leŋ u ko ma teenŋ duu laama ta. ²¹ Má tou le a laa Wia wiaa dii ne. U ne chise Yesu suunŋ le a pu yirinŋ di ma yarida ari ma yiɛlaa kala he Wia le.

²² A tiŋ ma sí to wutitii wonɔbiinŋ le ŋii, ma piise ma disinninŋ kala ta ne. Ma si ŋaa ŋii, ma sene cho ma naanɔbiiri-la si laa Wia wiaa dii. Nii wiaa, má keŋ ma tuɔŋ ari ma dolunŋ kala a wasa cho dɔŋɔ. ²³ U naga ba wasa lulma ne a tiŋ Wia niinŋ wiaa si pi niaa miisinŋ. Ba ne pima mii-falinŋ. Ba bi jaŋ pua, ba jaŋ he dime a kaa mu wuu. U bi nage nuhuobiine sí suu ne pima miisinŋ deenŋ. Ama Wia-la si bi suu ne pima. ²⁴ Ba ŋmunɔse Wia teninŋ tuɔŋ a bul, “Nuhuobiine kala nage yaŋ ne. U zɔmunŋ kala nage ya-fiilaa ne. Yaŋ-la hil, ka ya-fiilaa ma yuori. ²⁵ Ama Wia niinŋ wialinŋ jaŋ he dime a kaa mu wuu.” Wia niinŋ wialinŋ ne ŋaa wu-zɔmɔ-la ba si bula pima.

2

Piita bul wiaa a tige tabiinŋ si keŋ miisinŋ

¹ Ma si keŋ mii-falinŋ ŋii, má liise ma titia wu-bɔŋ kala le, a sí niaa nyinyisu, a sí kanfugi timma ŋaa. Ma sí yaribierinŋ keŋ, a sí niaa hariŋ gigaa. ² Ama u maga di ma nage bii-mullunŋ ne aa che yilinŋ di ba wase a waa. U maga di ma ma chiche Wia niinŋ wialinŋ ari bii-mullunŋ sí che yilinŋ ŋii. Di ma níi che Wia wiaa ŋii, ma jaŋ waa worunŋ ba le, a mu yi tapulii-la Wia si jaŋ laama ta. ³ Má ŋaa ŋii, beɛ wiaa ma titia jima ari la Tiina Wia keŋ zile ma teenŋ.

⁴ Nii wiaa, má ku kpage la Tiina Kirisito, nii-la si nage tabii-la si keŋ miisinŋ. Niaa viau ta, ama Wia ne liisu u ŋaa ku-zɔŋ u teenŋ. ⁵ Di ma ne kpagu, ma ma titia jaŋ nage tabia-la si keŋ miisinŋ. Nii wiaa, má leŋ di Wia keŋma saa u dia, lee-la u Diŋ-zɔŋ-la si jaŋ he. Wia liisema di ma sí disinninŋ keŋ a laa niaa nyunŋ a tima pupu, ari nialinŋ fa si laa niaa nyunŋ a kpu pusunŋ pi Wia ŋii. Wia cho di ma to u Diŋ-zɔŋ-la le ne a tima pu ari ma tuɔŋ kala, a tiŋ Yesu Kirisito wiaa. ⁶ Ba ŋmunɔse Wia teninŋ tuɔŋ a bul,

“Wia si, mi joŋ tabiinŋ ne a bil Zaayɔŋ le,
tabii-duo-la mi si jaŋ kaa bil mi dia gentine.

Mi liise tabii-la ne, u zɔmɔ pimi. Nii-la kala si laa u wiaa dii, hiisinŋ bi jaŋ dii u tiina.”

⁷ Ma nialinŋ si laa u wiaa dii, u ŋaa ku-zɔŋ ne ma teenŋ. Ama ba ŋmunɔse Wia teninŋ tuɔŋ a tige nialinŋ si bi u wiaa laa dii le,

“Tiebie-la dii-saaraa si via,
Wia leŋ u ku ŋaa tiebii-duonŋ ba si joŋo bil dia gentine.”

⁸ Ba bira ŋmunɔsa ari niaa jaŋ gere tabii-la a tel.

Tabii-la ŋaa bunŋ ne.

Ba jaŋ tel, beɛ wiaa ba via Wia niinŋ wialinŋ ne. Wia bul faafaa ne ari ba jaŋ ŋaa ŋii.

⁹ Ama Wia liisema di ma ŋaa u niaa, a laa niaa nyunŋ a tima pipi ma Kuoro. Wia titia ne tiima. Ma ne ŋaa nialinŋ Wia si liisa di ma ŋaa u niaa. U yirema di ma wuo bul wu-kpunɔkperisi-la kala u si ŋaa a pi niaa ari ŋii u si liisema biriminŋ tuɔŋ a kaa ku juu u pulunŋ-jalii-la tuɔŋ. ¹⁰ Bunbunŋ-la ma fa bi kunŋ-kala ŋaa, ama leeɛ ma ŋaa Wia niaa ne. Wia fa bima nennige fá, ama leeɛ u fáma nennige ne.

Wialinŋ si maga di ma nialinŋ si laa Yesu wiaa dii ŋiŋaa

¹¹ Mi naanɔbii-kpianaba, ma jima ma ŋaa nuhuɔraa ne a bi dieni dunia deenŋ le. Nii wiaa, mii sulma,

má liise ma titia ma tuotore wu-
 ŋaalaa ɛ, bɛɛ wiaa ma tuotore wu-
 ŋaalaa bi jaŋ sei di ma ŋaa wialin sɪ
 tore Wia tuon. ¹² Ma si guoli nialin
 si bi Wia wiaa laa dii tuon, má ken
 ma titia worun, di ba sí wonbiin na
 a bul ari ma ŋaa ni-bomɔ nɛ. Di ba
 níi bul ma ŋaa wu-bonɔɔ maa, má
 len di ba na wu-zomɔ-la ma síi ŋaa,
 a denne Wia duu yirin yire tapulii-
 la u si jaŋ dii niaa sariya. ¹³ A tin
 la Tiina Yesu Kirisito wiaa, má sei
 nialin si ken dolun aa benma dunia
 deen ɛ. Má zizil ma tinteen kuori-
 balin, nii-la síi ben nuu-kala, ¹⁴ a
 bira zizil nialin kuori-balin síi liisa
 di ba laa u nyun. Ba yie dudogise
 nialin síi ŋaa wu-bonɔɔ, an bibese
 nialin síi ŋaa wu-zonɔɔ ɛ. ¹⁵ Wia
 tuotorun nɛ ŋla, di maa ŋaa wialin
 síi to wonbiin a wuo len di ni-yaara-
 la si bi wii jin, di ba sí wii wuo bul
 a tigema ɛ. ¹⁶ Ma tii ma titia nɛ, nii
 wiaa má hon ari nialin si tii ba titia,
 an sí len di nii ŋaa di ma ŋaa wu-
 bonɔɔ. Ama má ŋaa wialin si jaŋ
 dage ari ma ŋaa Wia tintinnaa nɛ.
¹⁷ Má zil nuu-kala. Má cho nialin
 ma si laa Yesu wiaa dii a ŋaa ma
 naanbiirin. Má fá Wia a zizil ma
 kuori-balin.

Má to Yesu naa-buasun

¹⁸ Ma nialin si ŋaa tintinnaa a
 timaa pi niaa, má tuto ma nihiasin
 niin a zizilba bua-na kala ɛ. Di ba
 ken zile koo di ba nɛ tere ma teen,
 má pipiba zile. ¹⁹ Di nuu nɛ bi wii
 cheye ka baa dogisu, a tin u síi to
 Wia nii, di tiina nɛ nyalima a na hɛɛ-
 la, u ŋaa worun nɛ Wia teen. ²⁰ Di
 ŋ nɛ ŋaa wu-bon di ba dogisun, ka
 ŋ wuo dii kenyiri nii ɛ, u bi maga
 di ŋ chiche di ba lollun. Ama di ŋ
 níi ŋaa wu-zon, ka di baa dogisun a
 tin wu-zon-la wiaa, di ŋ nɛ nyalima,
 Wia tuon jaŋ tore ŋ nyun. ²¹ Wia
 paala yirema di ma na hɛɛn. Má liisi
 ari Yesu Kirisito titia ma na hɛɛn nɛ
 ma wiaa a dagema nii ma si jaŋ to
 u naa-buasun. ²² U bi wu-bon kala
 ŋaa. U bi wu-nyari kala nyia. ²³ Ari

niaa si tuusu ma kala, u biba laa
 tuuse. Ari nii ba si dogisu kala ma,
 u bi bula bul duu ma jaŋ dogiseba.
 U ta jon wii-kala a hɛ Wia nisin le
 nɛ, nii-la si jaŋ ken wutitii a dii niaa
 sariya. ²⁴ Yesu Kirisito titia nɛ laa la
 haacheba a chun, ba kpaasu mere
 daa-geseɛ nyun di la jon hariŋ yia
 haache a ŋinaa tuɔ-pul wiaa. Ba
 viiru, chalin lii u yaraa ɛ. U nii len
 la nyanyalaa kala dɛre la yaraa ɛ.
²⁵ Ma fa nage piesee si yenɛ nɛ,
 ama lɛɛɛ ma miira kɔ Pie-daari-la,
 nii-la si ben ma miisin pima.

3

Haalaa ari ba balaba si maga di baa ŋaa nii donɔ ɛ

¹ Ma haalaa, má len di ma siaa tuu
 tinteen ma balaba teen. Di haala
 donɔ ken bala si bi Wia wu-zomɔ-la
 laa dii, u bala-la jaŋ wuo birima lii u
 wu-ŋaalaa ɛ a laa Wia wu-zomɔ-la
 dii a tin u haala mele si zomɔ wiaa,
 di haal-la nɛ paala bi Wia wu-zomɔ-
 la bula pu maa. ² Di ma ŋaa nii, ba
 jaŋ na ma mele si zomɔ ari nii ma síi
 fá Wia. ³ Ma sí bibiinu nii ma si jaŋ
 lilaale kpieraa a zon nii, ari nii ma si
 jaŋ vɔɔ ma nyun duu zon, a sí selime
 kun-kala jonɔ hɛ ma yaraa ɛ di ma
 zon, a sí biine nii ma si jaŋ lilaale
 geri-zonɔɔ. ⁴ Ama má len di ma
 zomun lii ma tuon nɛ. Má hon som
 a ken ma titia muuri. Zomun deen
 yiri-na bi lel. U nɛ bira ken nyuurun
 ma Wia teen. ⁵ Faafaa haala-la faa
 kpierɛ ba titia nii nɛ a jon ba nyun
 ari ba yielaa kala hɛ Wia ɛ a ken ba
 siaa tuu tinteen ba balaba teen. ⁶ Nii
 nɛ haal-la ba síi yire Saara ma fa to
 u bala Abiraham niin a kenu yiyire
 u tiina. Di ma níi ŋaa wialin síi to
 wonbiin a sí len di fawullun kenma
 wii-kala ɛ, ma ŋaa Saara biirin nɛ.

⁷ Ma baalaa maa, má len di ma
 mele zon a ken ma haalaa worun.
 Ma jima di ma dolie kiiba nɛ. Nii
 wiaa, má pipiba zile, bɛɛ wiaa Wia
 nɛ pi ma kala miisi-la si bi dɛre. Di
 ma nɛ ŋaa nii, wii-kala bi jaŋ wuo

ku he ma di Wia pege a chei ma Wii-chuolun.

Ma sí wu-bon jono tin wu-bomun chimin

⁸ Wii-la mi sí che di mi bul wu-kaanin ne nla: Má kala ken tuobiin-bala ne, má fifá dono nennige, a cho nialin kala si laa Yesu wiaa dii, a ken zile dono le, a ken ma titia muuri dono teen. ⁹ Ma sí wu-bon jono tin wu-bomun chimin. Di nuu ne tuusema, ma sí tuusa tin, ama má sul Wia duu pe tiina le, bee wiaa Wia ma liisema ne duu pema le. ¹⁰ Ba nmunse Wia tenin tuon a bul,

“Di nuu-kala ní che duu nii sima dunia deen le
a ken tuotrun,
tiina sí wu-bonjoo bubul,
a sí wiaa ma nyinyia.

¹¹ Tiina miire wu-bonjoo naanin le,
a ninna wialin sí to wutitii wonbiin,
a fiere siin di ba tuosaa fiere dono nyun,

¹² bee wiaa Wia siaa kala he nialin síi naa tuo-pul wiaa le ne,
a wuoli u digilaa maa a ninii ba Wii-sulun.

Ama Wia jon u harin yia ni-bonjoo ne.”

¹³ Di ma ne fiere siin di ma wuo ninna wu-zonjoo, kubee ne jan wuo naa wu-bon ma le? ¹⁴ Di ba ní dogisema maa a tin ma tuo-pul wu-naalaa le, Wia jan pema le. Nii wiaa, ma sí nialin sí dogisema fá, a sí ma titia ma wiwalimu. ¹⁵ Ama ma tuon le má fifá Kirisito a len duu naa ma Tiina. Bua-na kala le, di nuu ne piesin duu jin wii-la si tii n laa Yesu wiaa dii, naa siri a to wii-la naasin pu. N sí fá Wia nii, bul wii-la ari siifielaa. ¹⁶ Bua-na kala le, má len di ma tuobiinaa chesi, di ma wu-naalaa dage ari maa to Kirisito ne. Di ma ní naa nii, hiisin jan dii nialin síi chei ma yirin. ¹⁷ Di u ne naa Wia tuotrun di ma na heen a tin ma síi naa wialin síi to wutitii wonbiin wiaa, u ne kpia ma si naa

wialin si bi wonbiin ka to a na heen. ¹⁸ Yesu Kirisito titia suu la haacheba wiaa ne, duu wuo liisela la haacheba le. U naa nii bala dunjun ne. U ne fa naa tuo-pul tiina a suu haache tinnaa wiaa, duu wuo kenla kaa mu Wia teen. Nuhuobiinee ne kpu u yaraa, ama Wia len u dima wei a ken miisin. ¹⁹ Nii harin u ni-dima le u mu bul Wia wu-zomola a pi ni-dinsi-la ba si kaa to dia. ²⁰ Niaa deenba ne fa via di ba to Wia niin wiaa bua-la le Nowa fa síi kpaase liin dabori-bal-la. Bua deen le Wia fa ken kenyiri a gbigberaba di ba ku juu liin daboro-la, ka ba via. Bua-la le niaa chori dunjun ne fa juu liin dabori-bal-la, a duori lii-la, a lii a laa ba miisin. ²¹ Lii-la tuon ba si duoro lii nage ba si fo niaa Wii-chuole liin ne. Di ba ne fon Wii-chuole liin, u bi naga ari n yaraa disinnin ne ba chese ta nii. Ba si fon Wii-chuole liin nii, u naga la yie sul Wia duu to Yesu Kirisito le si sii suun le a chese la tuosaa di ba zon. ²² U ne lii dunia le a jil Wia-jan a hon Wia seme, ni-duon di-honun. U ne ken dolun a biben Wia tin daaraa ari kun-kun-kala si ken dolun a he Wia-jan le.

4

Má len faafaa wu-naalaa

¹ A tin Kirisito titia si na heen nii, má ken ma titia a naa siri di ma na hee-la yiri u si na, bee wiaa ni-la kala si na heen, haache bira buu wuo. ² Ma si he ma mii-kaanin deen le, ma bira sí ma tuotore wu-naalaa le to, ama má tuto Wia tuotrun le. ³ Bunbun-la kala le ma faa naa wialin nialin fa si bi Wia jin síi naa ne. Má len wialin. Ma faa to ma tuotore wu-naalaa harin ne aa naa wu-liilin, a chil ma titia wiaa, a faa nyua sinin bubugi, a fa faasa didii kaaa, a yie gollo nyunyua sinin, a faa kpaare vuiaa maa. Vui-kpaarin bi Wia wonbiin ka to. ⁴ Nialin si bi Wia jin naa wu-bonjoo kinken. Leele ma bira bi nii naa. Niaa deenba si

na nii, u ɲaaba wu-kpun̄kpere, ɲii wiaa ne ba tutuusema. ⁵ Ama tapulii kubala, ba jaŋ dage wialin̄ kala ba si ɲaa a pi nii-la si ɲaa siri duu dii ni-weyee ari ni-suunuŋ kala sariya. ⁶ ɲla wiaa ne tii Kirisito bul Wia wu-zom̄-la a pi nialin̄ si suba maa, di ba diŋsin̄ keŋ miisin̄ ari Wia si keŋ miisin̄ ɲii. Wia paala dii ba sariya dunia deen̄ le ari u si dii niaa kala sariya ɲii. Ama u bul Wia wu-zom̄-la a pi nialin̄ si suba, di ba diŋsin̄ wuo keŋ miisin̄.

ɲii nialin̄ si laa Wia wiaa dii si maga di ba ɲiŋaa doŋo le

⁷ Bua-la dunia si jaŋ dere kpaga ne. ɲii wiaa má keŋ ma titia woruŋ di ma siaa fiele, di ma wuo chuchuele Wia. ⁸ Wii-la si ɲaa siifian̄ wiin̄ ne ɲla: Má he ma dolun̄ kala a faasa cho doŋo. Di ma ne cho doŋo, ma jaŋ tuto wialin̄ ma doŋsun̄ tin̄ɲaa si ɲaa cheima le. ⁹ Má keŋ zile a huhuore doŋo woruŋ ma diisin̄ le, a sí wiaa gugurimu.

¹⁰ Wia joŋ dolun̄ pi nuu-kala duu kaa tin̄ tin̄tin̄-yiri-yiriba ne. ɲii wiaa nuu-kala keŋ wii-la Wia si joŋo pu a kaa pipe u doŋsun̄ tin̄ɲaa le. ¹¹ Di Wia ne pi nuu-kala dolun̄ duu wuo bubul wiaa, má puu won̄biin̄ duu wuo bubul wialin̄ si lii Wia teen̄. Di nuu ne tima pipi niaa, ú keŋ dol-la Wia si joŋo pu a tima pipiba. Má ɲaa ɲii di niaa wuo to Yesu Kirisito le a bibese Wia, duu yirin̄ yire wii-na kala le. U ne nii-la si keŋ dolun̄ ari yirin̄ a kaa mu wuu. Ami.

Hee-la nialin̄ si laa Wia wiaa dii sí na

¹² Mi naan̄bii-kpianaba, ma sí leŋe di hee-la ma si faasa nina, duu ɲaa wu-kpun̄kpere ma le. Wiaa deen̄ba kala ka magisema ne. Ma sí leŋe di wiin̄ deen̄ ɲaa wu-falii ma teen̄. ¹³ Hee-la Kirisito si na, má ma na hee-la titia ne. ɲii wiaa má jujuose. Tapulii-la Kirisito ne ko ari u tula, ma jaŋ faasa juose. ¹⁴ Di ba ní tuusema a tin̄ Kirisito wiaa, Wia

jaŋ pema le, bee wiaa Wia Din̄-zoŋ-la si keŋ dolun̄ hema le ne. ¹⁵ Má si wu-bon̄ɲoo ɲaa di niaa dogisema. Ma kuŋ-kala sí heen̄ na a tin̄ u si kpu niaa wiaa, koo u si ɲaa gaaru wiaa, koo u si ɲaa wu-bon̄ɲoo wiaa, koo u si ɲaa wu-heeru wiaa. ¹⁶ Ama nii-la kala sí na heen̄ a tin̄ Kirisito wiaa, u sí leŋe di hiisin̄ ken̄u. U maga di tiina denne Wia, bee wiaa niaa jima ari uu to Kirisito ne. ¹⁷ Bua-la Wia si jaŋ dii dunia sariya yie ne. U jaŋ laa sipaan̄ a suomi Wia niaa le. Duu ne saa suomiba le, ee ne saa u jaŋ nage nialin̄ si bi Wia Wuzom̄-la ka to le?

¹⁸ Ba ɲmun̄se Wia tenin̄ tuon̄ a bul, “U ɲaa wu-haa ne ari ɲ ɲaa tuo-pul tiina Wia sipaan̄, duu laan̄ ta. Ee ne saa u jaŋ nage nialin̄ si bi Wia jin̄ a ɲiŋaa wu-bon̄ɲoo?”

¹⁹ ɲii wiaa, má leŋ di nialin̄ sí na heen̄ a tin̄ Wia tuotorun̄ wiaa ɲiŋaa wialin̄ sí to Wia won̄biin̄. U maga di ba joŋ ba titia kala a he Wutitii Tiina-la si ɲaaba, nisin̄ le.

5

Má beŋ Wia nialin̄ woruŋ u si joŋo he ma nisin̄ le

¹ Mi keŋ wii ne di mi bula pi ma nialin̄ si ɲaa Wia niaa nihiasin̄. Mi ma ɲaa Wia niaa nihian̄ doŋ ne. Mi titia siin̄ na hee-la Kirisito si na ne. ɲii titia ne mi ma jaŋ na tula-la Kirisito si jaŋ na bua-la le u si jaŋ miira ko. ɲla ne tii mii sulma ² di ma beŋ Wia nialin̄ u si joŋo he ma nisin̄ le, ari pie-daaraa si beŋ ba piesee nyun̄ ɲii. Ma sí leŋe duu nage ari baa fugema di ma beŋba, ama má beŋba ari ma titia tuotorun̄. Má cho tin̄timii-la, aŋ sí time-la ma sí laa hariŋ to, bee wiaa u bi maga di ma keŋ yaribierin̄ aa che moribiee. ³ Ma sí dolun̄ kaa beŋ niaa deen̄ba Wia si joŋo he ma nisin̄ le. Ama má leŋ di ba na ari ma mele zom̄, di ba tuto ma naa-buasun̄. ⁴ Di ma ne ɲaa ɲii, tapulii-la Yesu Kirisito si jaŋ miira ko, nii-la si ɲaa Pie-daaraa kala kuhian̄, u jaŋ joŋ ku-la si zom̄

a kii kuŋ-kala pima. U-na bi jaŋ chei. ⁵ Ma bapuosi-biisiŋ, má joŋ ma titia he ma nihiasiŋ nisiŋ le. Má kala keŋ ma titia muuri ma doŋɔba teen. Má liisi ari Wia teniŋ tuoŋ ba bula, “Wia lii nialiŋ sí bigisi ba titia le hariŋ ne, ama nialiŋ si keŋ ba titia muuri, uu peba le ne.”

⁶ Nii wiaa, má keŋ ma titia muuri Wia teen. U ne keŋ doluŋ a wuo beŋma. Di bua-la ne yie, u jaŋ leŋ di ma ŋaa ni-balaa. ⁷ Wii-la kala sí walimema, má joŋo he Wia nisiŋ le, beŋ wiaa u ní beŋma. ⁸ Má leŋ di ma siaa fiele aa po ma titia le woruŋ. Ma diŋdoŋ-la Sitaani, uu gollima ne a nage naachigiŋ si gollo yele chiche kudiilee, aa che duu keŋ ma doŋɔ dii. ⁹ Má via Sitaani aŋ keŋ wialiŋ ma si laa dii kpaŋ kpaŋ. Ma jima ari nialiŋ ma si laa Wia wiaa dii a ŋaa ma naaŋbiiriŋ a he dunia seme-na kala, ba maa na heeŋ ne. ¹⁰ Heeŋ deen ma sí na bi jaŋ dieni. U nii hariŋ le, Wia-la si keŋ zile kiŋkeŋ kiŋkeŋ a yirema di ma ma na tula-la Kirisito si kene a kaa mu wuu, u ne jaŋ keŋma wasa kii, a leŋ di ma chaasa chin ari doluŋ. ¹¹ Wia ne keŋ doluŋ a kaa mu wuu. Ami.

Chuɔlaa

¹² Mi ne leŋe Silivaanas ŋmuŋse teniŋ deen pipima. Mi jima ari u ma ŋaa la naaŋbii-titii ne. Wu-kuubie ne mi ŋmuŋse pima di mi ŋaa di ma nyuŋ nyaase ne. Wutitii ne, mi bula pima nii Wia si pela le. Nii wiaa má chin wiaa deenba le kpaŋ kpaŋ. ¹³ Nialiŋ si laa Yesu wiaa dii aa hilimi Babiloŋ le, nialiŋ Wia si liisa di ba ŋaa u niaa ari u si liisema ma nii, ba maa chuɔlema. Mi bie Maak maa chuɔlema. ¹⁴ Má guori doŋɔ a chuɔle doŋɔ, a dage ma si cho doŋɔ nii.

Ma nialiŋ kala si laa Yesu wiaa dii, ma jaŋ hoŋ ari yarifielaa.

TEN-LIA-LA PIITA SI N̄MUNSA

¹ Mi-na Saamɔŋ Piita n̄ n̄mun̄s̄e teniŋ deen̄ pipima. Mi n̄aa Yesu Kirisito tiŋtinnu n̄e a n̄aa u nan̄zɔɔ maa. Mi n̄mun̄s̄e teniŋ deen̄ pipi ma nialin̄ ma si laa Yesu Kirisito wiaa dii ari la ma si laa u wiaa dii nii. La di ma kala n̄aa tuɔ-pul timma n̄e a tiŋ Wia ari la Laataara Yesu Kirisito wiaa.

² Wia lah̄rimɔ le yarifiɛlaa jan̄ yuge ma teen̄, a tiŋ wu-jimii-la ma si ken̄e a mu tige Wia ari la Tiina Yesu le.

Má len̄ di ma m̄le zɔŋ di Wia wuo tiŋma

³ U dolun̄ le Wia wuo pila kun̄-kala la s̄ii che la miisin̄ le, di la wuo kaa n̄aa wialin̄ kala s̄ii to Wia won̄biin̄, di la wuo jin̄ Wia, nii-la si yirela di la wuo na u tula ari u zɔmun̄ kala.

⁴ Wiaa deen̄ba n̄e n̄aa wu-bal-la u fa si si u jan̄ n̄aa pila. Wialin̄ zɔmɔ kin̄ken̄ la teen̄. U jon̄ wiaa deen̄ba pila di la wuo liise la titia wu-bɔmɔ-la dunia niaa s̄ii to ba tuɔtɔre wu-n̄aalaa le a n̄in̄aa, ka di la ku nage nii Wia si naga. ⁵ A tiŋ ma si laa Yesu wiaa dii nii, má he dolun̄ di ma m̄le zɔŋ. Má len̄ di ma wu-jimin̄ puŋa pipe ma m̄eli-zɔŋ-la le. ⁶ Má to ma wu-jimii-la le a ken̄ ma titia worun̄. Ma si ken̄ ma titia worun̄ nii, má ken̄ kenyiri. Ma si ken̄ kenyiri ma nii, má pe ken̄ nyalima. Ma si ken̄ nyalima nii, má n̄in̄aa wialin̄ s̄ii to Wia won̄biin̄, ⁷ a pe ken̄ zile ma naan̄biiri-la kala teen̄, an̄ pe choba maa. ⁸ Di ma n̄e n̄aa wiaa deen̄ba a yuyuge, ba jan̄ pe wialin̄ ma si jima a mu tige la Tiina Yesu Kirisito le, a len̄ di ma n̄aa nialin̄ Wia si jan̄ kaa titin̄ u tiŋtiŋn̄aa. ⁹ Nii-la kala si bi wiaa deen̄ba ka n̄aa, u tiina n̄aa nyulun̄, a nage nii-la si na u naasin̄ bubuɔŋ dun̄dun̄a an̄ bi di-bolii na, b̄e wiaa u tiina paala yu ari Yesu fa ch̄es̄e

u bun̄bun̄ haacheba-la u si n̄aa ta n̄e. ¹⁰ Nii wiaa mi naan̄biirin̄, mii sulma ari Wia si yirema a liisema nii, má he dolun̄ a chin̄ wiaa deen̄ba le worun̄. Di ma nii n̄aaba, ma bi jan̄ lii Wia won̄biin̄ le. ¹¹ Di ma n̄e chin̄ worun̄, ma jan̄ jin̄ ari ma jan̄ wuo juu la Tiina ari la Laataara Yesu Kirisito kuorii-la tuɔŋ. U kuorii-la jan̄ he dim̄e deen̄ deen̄.

¹² Nii wiaa n̄e tii bua-na kala le mi yie liliisima a mu tige wiaa deen̄ba le. Ma paala jin̄ wutitii-la n̄e a chin̄ u le worun̄. ¹³ Mi ha si he mi miisin̄ deen̄ le, u n̄aa wu-zɔŋ n̄e di mi liliisima wiaa deen̄ba di ma s̄iba yu, ¹⁴ b̄e wiaa mi jima ari mi bi jan̄ dieni dunia deen̄ le. La Tiina Yesu Kirisito titia dagemi wiin̄ deen̄ n̄e. ¹⁵ Mi saa che di mi n̄e suba maa, di ma wuo liliisi wiaa deen̄ba bua-na kala le.

Piita si duu titia n̄e na Yesu u miisin̄ le

¹⁶ La bula pima nii la Tiina Yesu Kirisito si kɔ dunia ari dolun̄. Wii-la la si bula pima bi nage sun̄sɔguloɔ wu-jinnaa si sɔgulo. La titia siin̄ n̄e na Yesu Kirisito tula. ¹⁷ Bua-la le la Nyimma Wia si jon̄ dolun̄ ari tula pu, la nii yiikoro duu lii wia nyun̄, Wii-jaribako yiikoro n̄e. U fa si, “Mi Bii-choolun̄ n̄e n̄la, mi tuɔŋ tɔre u nyun̄.” ¹⁸ Bua-la le yiikori-la fa si bul̄ nii di Yesu n̄e fa he peel-la si bi disinn̄in̄ ken̄e nyun̄. ¹⁹ Nialin̄ fa s̄ii bul̄ wiaa, Wia Diŋ-zɔŋ-la dolun̄-la le ma fa bula ari wiaa deen̄ba jan̄ n̄aa. Má jegile niiba, b̄e wiaa wialin̄ ba si bula nage chaan̄in̄ n̄e a chaane birimin̄ tuɔŋ halii tan̄ mu pul. Bua-la le chaan̄in̄ deen̄ jan̄ pulle a nage nanyualun̄ a he ma tuɔŋ. ²⁰ U maga di ma laa sipaan̄ jin̄ ari wialin̄ ba si n̄mun̄sa bil̄ Wia teniŋ tuɔŋ, nialin̄ fa s̄ii bul̄ wiaa, Wia Diŋ-zɔŋ-la dolun̄ le n̄e bulba. Nii wiaa nuu-kala bi jan̄ wuo ken̄ u titia wu-jimin̄ a dage wialin̄ bubuɔŋ. ²¹ Wii-la si tii n̄e n̄la: Wialin̄ ba si bula bi ba titia tuɔbiinaa le lia. Ama Wia Diŋ-zɔŋ-la

ne ku he ba tuonj a lenj ba bul wialinj
Wia si jonjo piba.

2

Wu-nyari kerichiba si nage nii

¹ Bunbun wu-nyiaraa ku nialinj si laa Wia wiaa dii tuonj, a fugiba ari baa bul wiaa, Wia Din-zonj-la dolunj le ne. Nii titia ne wu-nyari kerichiba janj ku he ma tuonj a luora didagama wialinj si janj cheima a paala bul ari ba bi la Tiina Kirisito jinj, nii-la si laaba ta. Ba si njaa nii, u bi janj dieni, ka di Wia dogiseba di ba suu. ² Njaa janj yuge a to ba harinj a njjaa wu-liili-la wu-nyari kerichiba-la sii njaa. Ba wu-nyaalaa janj lenj di njaa bul wiaa a chichei Wia wonbii-titii-la la sii to. ³ Wu-nyari kerichi deenba janj kenj tuo-lununj. Ba janj kenj nii-sima a nyinyisema a lilaa ma kaaa maa. Faafaa kala ne Wia dage ari u janj dii njaa deenba yiri sariya a dogiseba maa. U bi janj dieni ka di Wia dogiseba di ba mu suu.

⁴ Bunbun kala ne Wia tinjaaraa donsunj fa njaa haache. Ba si njaa nii, Wia biba lenje pei. U keseba a jonba yuo he Wia nyininj tuonj. Ba kenj chorumoo vooaba a lenj ba pinj biriminj tuonj. Ba janj he dime a kaa mu yi tapulii-la Wia si janj dii dunia njaa sariya. ⁵ Bua-la le Nowa fa si he u miisinj le, nialinj kala fa sii njaa wu-bonjoo, Wia fa biba lenje pei. U lenje liinj pelle paa ni-bonjoo deenba kala, anj lenj Nowa ari u njaa balipe dunjunj. Nowa fa bula pi nialinj di baa njaa wialinj sii to Wia wonbiinj. ⁶ Bua-la le tasi-la balia ma fa he dime. Ba yirinj ne Sodom ari Gomora. Ba njaa fa sii njaa wu-bonjoo, Wia fa dogiseba ne. U fa jonj nyininj ne a nyigeba, ba kala dii buru anj ka tuorunj dunjuna. Wia dage nii ari u janj dogise nialinj kala si bi u wonbiinj ka to. ⁷ Baal kubala ba faa yire Lot ma fa honj Sodom ari Gomora tinteenj ne a fa njaa tuo-pul tiina. U dunjuna ne Wia kaa liise

tasi-la tuonj. Ni-bomola wu-nyaalaa fa chei u tuonj worunj. ⁸ Lot fa si honj ni-bomola tuonj, u yie na anj pe nii wu-bomola kala ba fa sii njaa tasi-la tuonj tapulii-na kala. Wiaa deenba ne lenje u tuonj viisi, bee wiaa u-na fa njaa tuo-pul tiina ne. ⁹ Wiaa deenba kala dagela ari Wia jinj wonbii-la u si janj to a laa tuo-pul tinjaa ta, di Sitaani si wuo magiseba di ba njaa wu-bonj. Ba bira dagela nii Wia si janj njaa a dogise ni-bonjoo maa a kaa mu yi tapulii-la u si janj dii dunia njaa sariya. ¹⁰ Ba tuonj, Wia janj faasa dogise nialinj sii njaa wu-liilinj ari nialinj si bi che di ba jonj ba titia a he Wia nisinj le.

Wu-nyari kerichi deenba bi nuu-kala ka fa, anj pe kenj nyu-duonj maa a njjaa ba tuotore wiaa. Nii ne tii ba yie tuuse Wia tinjaara-la si kenj yirinj a he Wia-janj le. ¹¹ Wia tinjaara-la ne kenj dolunj a kii wu-nyari kerichi deenba. Ama Wia tinjaara-la biba ka tuuse, a bi cheerinj ma jonjo pi njaa deenba Wia sipaanj. ¹² Wu-nyari kerichi deenba yie njjaa wiaa ari pusunj si bi wu-jiminj kene sii njaa nii ne. Ba yie nage pusunj njaa si yie diese di ba kese a kpu ne. Ba yie bubul wu-bonjoo ne a titige wialinj ba si bi jinj le. Ba si jonj cheerinj pi njaa donsunj nii, nii titia ne Wia janj jonj cheerinj piba di ba suu. ¹³ Wu-bomola ba sii njaa njaa le nii, nii titia ne Wia janj jonj wu-bomola a tinjba. Ba si cho di baa nii sima, ba paala golle wiheye ne a njjaa wu-liilinj deenba. Ba sii njaa nii, njaa yie chichei ma yirinj a jonj hiisinj hema le. Ba yie guoli ma tuonj ne ma kala didii kaaa, ama ba yie lii ma harinj a njjaa ba wu-liilinj. ¹⁴ Bua-na kala le di ba ne na haal, ba yie cheu ne ba tuonj le. Ba-na bi lol ari wu-bonjoo njaaninj. Ba yie nyinyise nialinj si bi Wia wiaa le china kpanj kpanj di ba njaa haache. Ba njaa tuolunj timma ne. Wia kaliba heba le ne. ¹⁵ Njaa deenba via Wia wonbiinj ne a yenji. Baa to bunbun baal kubala harinj ne baa yire Beelam. U nyimma

yirin nɛ fa Biɔ. A tinj moribiee wiaa Beelam fa via Wia wiaa anj tuto wu-bonjɔɔ harinj. ¹⁶ U si via njii, Wia daju a lenj Beelam kakumo bul wiaa a nage nuhuobiine, a pugu duu si wu-yaayasinj naa.

¹⁷ Wu-nyiaraa kerichi deenba nage lii-bulo si hila nɛ. Ba bira nage duonunj si tina, anj ka pelinj naa kiri u bi nia nɛ. Niaa deenba, Wia jan jonba he birinj-la si bi dɛrɛ tuɔɔ.

¹⁸ Ba yie faasa njinaa gonj a bubul babii-bal wiaa si bi bubuɔɔ kenɛ. Ba yie kenj nii-sima a nyinyise nialinj si humo liise ba titia nialinj si bi wutitii jinj lɛ. Ba yie che di ba nyise niaa deenba di baa naa wu-liili-la kala ba sii naa. ¹⁹ Ba yie nyinyiseba a bul di ba nɛ to ba harinj, ba janj tii ba titia. Ama wu-nyiaraa deenba paala bi ba titia tii. Ba nɛ wu-bonjɔɔ yosunj, bɛɛ wiaa di nuu-kala nɛ lenj di wii malu, di u nɛ bi wii-la wuo lenj, u yie ku naa wii-la yonj nɛ. ²⁰ Di niaa nɛ ku jinj ari la Tiina Yesu Kirisito nɛ laaba ta ba haacheba lɛ, di ba nɛ liise ba titia dunia kialinj si yie lenj baa naa haache lɛ, di ba nɛ bira lenj di wiaa deenba malba a kenj dolunj ba lɛ, niaa deenba diderinj nɛ janj bɔmɔ kii bua-la lɛ ba ha si bi wutitii-lanj jinj. ²¹ Wiinj deenj janj naaba lɛ, bɛɛ wiaa ba jonj harinj yia wialinj Wia fa si si di ba tuto a kenj tuɔ-pula u teenj. U fa janj kpia di ba nɛ fa bi wutitii-la wonjbiinj jinj, ama ba jimɔ nɛ anj jonj harinj yia wialinj Wia fa si bula piba di baa naa. Wiaa deenba bi disinninj kenɛ. ²² Wiinj deenj si naa niaa deenba lɛ daga ari namaga-la niaa sii magu naa wutitii nɛ. Ba si, "Vaha yie tuɔsɛ nɛ anj gura paa dii. Ba yie fo toonj ma liinj, ka u bira mu njmoo vichɔɔɔ."

3

Tapulii-la la Tiina Yesu si janj mi-ira kɔ

¹ Mi nanjɔɔ-kpianaba, mi tenjliaminj nɛ njla mi si njmunsa pipima. Mi tenni-la baliaminj tuɔɔ, mi bul wiaa liliisima di ma wuo to Wia

ari tuɔbiinj-zɔɔnjɔɔ. ² Mi bul wiaa deenba di mi liisima wialinj nialinj fa sii bul wiaa, Wia Dinj-zɔɔ-la dolunj lɛ si bula faafaa ari ba janj ku bal, di ma siba yu. Má pɛ liliisi wialinj la Tiina Yesu fa si to ma nanjɔɔba lɛ a bula pima. U nɛ la Laataara. ³ Mii che di ma laa sipaanj jinj ari bua-la lɛ dunia si janj ku kpage diderinj, nisieree janj to ba tuɔtɔrɛ wu-naalaa lɛ a sisierima lɛ. ⁴ Yesu fa si dage ari u janj miira kɔ, ba janj piesela di "Nii nɛ u he? Che bɛɛ nɛ saa u janj bira kɔ?" Ba janj bira bul di bua-la lɛ nialinj si laa sipaanj laa Yesu wiaa dii si suba a kaa kuko bua deenj lɛ, kuɔ-kuɔ-kala bi birima, ba kala ha nage ari Wia si naaba njii dunia di-suomunj. ⁵ Nialinj sii bul wiaa deenba chaasa jinj kialinj kala Wia si naa nɛ, ama ba bi che di ba sei ari faafaa kala dunia fa tuo a kaa mu yi bua-la lɛ Wia si bul wiaa, ka wia nyunj ari tinjteenj kala-na ku he dime. Tinjteenj fa he liinj tuɔɔ nɛ, ka Wia kaa pɔrɛ u pinj u dunjɔɔ, ka liinj ma pinj u dunjɔɔ. ⁶ Lii-la titia nɛ Wia jonj to bunjɔɔ dunia-la, u kala chei. ⁷ Wia bira bula ari u janj lenj di nyininj dii tinjteenj ari wia nyunj kala si he dime lɛ lɛ njla. Ama ba janj he dime halii, di tapulii-la Wia si janj dii dunia niaa sariya ku yi. Nialinj si bi u niinj wiaa ka to, Wia janj jonj cheerinj piba di ba suu.

⁸ Ama mi nanjbii-chooloo, ma si wiinj deenj yu, ari Wia teenj tapul-bala nage jisinj bui nɛ, ka jisinj bui ma nage tapul-bala. ⁹ Niaa dɔɔnsunj biina ari Wia fiela nɛ ari wialinj u si si u janj naa lɛ. U bi fiela, ama u kenj kenyiri nɛ a tinj ma wiaa, bɛɛ wiaa u bi che di ma kuɔ-kala lel. Uu che di nuu-kala birima lii u haacheba lɛ nɛ. ¹⁰ Ama tapulii kubala la Tiina Yesu janj kɔ. Tapulii-la u janj guu kɔ a di niaa lɛ, ari gaara si yie kɔ a di niaa lɛ njii. Bua-la lɛ nuu-kala janj nii huuri-bal kubala wia nyunj. Duu nɛ naa, wia nyunj janj lel, ka kuɔ-kala si he wia nyunj ma janj njmiere nyininj tuɔɔ a nyiige, ka di tinjteenj kuɔ-kala ma dii nyininj.

¹¹ Ma si jima ari dunia kala jan lel nii, εε ne ma biina ari u maga di ma meε nage? U maga di ma jon ma titia kala a pi Wia ne, a si disin kala ken, a tuto u wonbii-la. ¹² Ma sii gberε tapulii-la la Tiina Yesu si jan ko nii, ma pe pipesi, di ma naa wii-na kala ma si jan wuo naa di tapulii-la yima lima. Tapulii-la ne wia nyun jan nmieε nyinin tuon a nyiige. Ka kun-kala si he wia nyun ma jan nmieε nyinin a lel. ¹³ Faafaa-la Wia bula ari u jan naa wia nyu-falii ari tintee-falii. Lee-la u niaa jan njaa tuo-pul wiaa. Wiaa deenba ne laa gberε.

¹⁴ Nii wiaa mi naanbiirin, ma sii gberε di ma na wiaa deenba, ma fiεε siin a len di ma meε zon, di tapulii-la ne yie, di Wia si cheerin kala jon pima, ka di ma di Wia sin. ¹⁵ Mi naanbiirin, u maga di ma jin ari la Tiina Yesu ken kenyiri ne. U naa nii duu wuo laama ta ne. Wiaa deenba titia ne la naanbii-choolun Pool ma bul tenni-la kala ε u si nmunsa pima. Wia ne pu wu-jimin deen u kaa bul wialin. ¹⁶ Wialin u si bula u tenni-la ε, ba donsun heyε. Niaa bi ba bubuosa jin. Nialin ma si bi wiaa jin ari nialin si bi wialin ba si laa dii ε china kpan kpan yie ken wialin kaa birime wu-wogusu, ari ba si yie ken Wia tenin wiaa seme donsun kaa birime nii. Ba sii naa nii, Wia jan dogiseba ba suu. ¹⁷ Mana mi naanbii-kpianaba, ma paala jin ari wu-nyiaraa deenba jan ko. Nii wiaa, ma po ma titia ε di nialin si bi Wia nin ka to si wuo nyisema di ma to ba wu-nyiar-la harin, an jon wialin ma si laa dii a chin ba nyun ta. ¹⁸ Ma to la Tiina Yesu Kirisito a kaa mu, nii-la si naa la Laataara. Di ma ne naa nii, u jan pema ε worun a len di ma wasa jimu. U yirin ne niaa jan yire leεle a kaa mu wuu. Ami.

TEN-BUNBUN-LA Jɔɔŋ SI N̄MUNSA

Wii-la si ku ŋaa nuhuobiine

¹ Mi-na Jɔɔŋ ŋmunɔse teniŋ deen pipima a tige wii kubala le ne. Wii-la fa he dime bunbun kala ne a ken miisiŋ. La nii u yiikoro a ken la siasa ma nau a chaasa benu, a ken la nisaa ma digu. ² Wii-la si ku ŋaa nuhuobiine, la nau ne a ŋaa u dansia, a bul u wiaa pipima. Wii-la ne ŋla: Miisi-la si bi derɛ. U fa he la Nyimma teen ne a ku lii la teen la nau. Yesu Kirisito ne nii. ³ U fa si he la teen nii, la na wialiŋ u si ŋaa a nii wialiŋ maa u si bula. Wialiŋ la si na an nii maa, ba ne la bulaa pima, di ma wuo juu la tuɔŋ di la kala ken nii-bala. La di la Nyimma Wia ari u Bie Yesu Kirisito ken nii-bala ne. Laa che di ma ma ken nii-bala nii ne. ⁴ Laa che di ma tuɔŋ faasa tɔre ne woruŋ, nii ne tii la ŋmunɔse wiin deen pipima.

Wia ne ken pulumuŋ

⁵ Wialiŋ Wia Bie si dagela a tige Wia le, ba ne ŋla: Wia ne ken pulumuŋ. Birimiŋ tuo Wia le. ⁶ Di la ne si la duu ken nii-bala an ka laa ŋaa birimiŋ tuɔŋ wiaa, laa nyia ne. La wu-ŋaalaa ari la wu-bulaa kala bi wutitii kene. ⁷ Ama di la ne ŋaa pulumuŋ tuɔŋ wiaa a he pulumuŋ tuɔŋ, ari Wia si he pulumuŋ tuɔŋ nii, nii-na la di la doŋsuŋ tinŋaa kala ken nii-bala ne. Di la ne ŋaa nii, Wia Bie Yesu chaliŋ ma jan chese la wu-bɔŋŋoo kala ta. ⁸ Di la ne si la bi wu-bɔŋŋoo ŋaa, laa nyise la titia ne. La bi wutitii kene. ⁹ Ama di la ne seye ari laa ŋaa wu-bɔŋŋoo a dage la wu-bomɔ-la a pi Wia, u jan wuo jon la haacheba a chela a chese la wu-bɔŋŋoo kala ta. Wia ken wutitii. Nii ne tii u jan wuo ŋaa nii. ¹⁰ Ama di la ne si la bi wu-bɔŋŋoo ŋaa, la ken

Wia yire wu-nyiaru ne. La bi u niin wiaa laa he la tuɔŋ.

2

Kirisito chij la hariŋ a pipela le

¹ Mi biiriŋ, mi ŋmunɔse wiin deen pipima di ma bira si wu-bɔŋŋoo ŋaa, ama di la kuŋ-kala haa ŋaa wu-bɔŋŋoo, la ken nuu si chij la hariŋ. U jan sula laala u Nyimma teen. Tuɔ-pul Tiina Yesu Kirisito ne nii. ² U ne jon u miisiŋ a yoo suuŋ la wu-bɔŋŋoo wiaa, di Wia jon u baaniŋ ta u fa si kene a tin la wu-bɔŋŋoo wiaa, an jon la wu-bɔŋŋoo a chela. La dunɔŋa wu-bɔŋŋoo wiaa dee, dunia kala wu-bɔŋŋoo wiaa ne. ³ ŋla ne la jan wuo to jin woruŋ ari la jin Wia: Di la ne to wialiŋ kala Wia si dage niaa di baa to, nii daga ari la sene jin Wia ne. ⁴ Di nuu ne si u jimu, ka u via wialiŋ u si dage niaa di baa to, tiina ŋaa wu-nyiaru ne, u bi wutitii kene. ⁵ Ama nii-la kala sii to u niin wiaa, u ne nii-la si sene cho Wia kinken. Di la ne to u niin wiaa nii, la jan wuo to jin ari la di Wia sene ŋaa kubala ne. ⁶ Nii-la kala si si ba di Wia ŋaa kubala, u maga di u tiina wu-ŋaalaa nage Yesu Kirisito wu-ŋaalaa ne.

Nialiŋ sii ven pulumuŋ tuɔŋ si nage nii

⁷ Mi bii-chooloo, wii-la mi sii che mi ŋmunɔsa pima leele, u bi wu-falii kala ŋaa Wia si dagema di maa to, u ŋaa wu-binii-la ma fa si nii bunbun kala ne. Wu-binii-la ne Wia niin wialiŋ ba si dagema. ⁸ Ama u saa naga ari wu-falii ne mi si ŋmunɔsa pipima, beɛ wiaa wiin deen ku ŋaa wutitii Kirisito miisiŋ le ari ma ma miisiŋ le. Bua deen le birimiŋ ka lel ne, an ka pulumuŋ ha faasa chaane pir. ⁹ Nii-la kala si si uu ven pulumuŋ tuɔŋ an bere u doŋo tiina, u ha he birimiŋ tuɔŋ ne. ¹⁰ Ama nii-la kala si cho u doŋo tiina, uu ven pulumuŋ tuɔŋ ne. Wii-kala bira tuo si jan ŋaa u siera tel. ¹¹ Ka nii-la kala si bere u doŋo tiina, u tiina ven

birimiŋ tuoŋ ne. U bi jin lee-la kala u sii mu. Birimiŋ ŋaa u siaa bi na.

¹² Mi biiriŋ, a tiŋ Yesu wiaa ne Wia joŋ ma wu-bɔŋŋɔɔ a chema. Nii ne tii mi ŋmuŋsa pipima. ¹³ Mi nyimmaba maa, ma jin Nii-la fa si he dime bunbun kala ne. Nii ne tii mi ŋmuŋsa pipima maa. Ma bapuɔsaa maa, ma leeɛ yuo dii Sitaani ne, nii ne tii mi ŋmuŋsa pipima maa. Mi biiriŋ, ma ma jin la Nyimma Wia ne, nii ne tii mi ŋmuŋsa pipima maa. ¹⁴ Mi kuhiasiŋ maa, ma jin Nii-la fa si he dime bunbun kala ne, nii ne tii mi ŋmuŋsa pipima. Ma bapuɔsaa maa, ma ma keŋ doluŋ, Wia niin wiaa ma he ma tuoŋ le. Ma leeɛ yuo dii Sitaani ne, nii ne tii mi ŋmuŋsa pipima.

¹⁵ Ma si dunia kiaa cho. Nii-la kala si cho dunia kiaa, u bi la Nyimma Wia cho. ¹⁶ Ŋ tuɔtɔre wu-ŋaalaa ari ŋ siin wu-chooloo ari kialin si ŋaa niaa bibigisi ba titia le, ba kala bi la Nyimma Wia teen lia. Ba ŋaa dunia kiaa ne. ¹⁷ Dunia ari kialin kala si he dime nuhuobiine cho, ba kala jan dere. Ama nii-la si ŋaa wialin Wia si cho, u jan keŋ miisi-la si bi dere.

Kirisito diŋdɔŋ-balin

¹⁸ Mi biiriŋ, dunia diderin kpaga ne. Ma nia ari Kirisito diŋdɔŋ-balin jan ko. Bua deen le Kirisito diŋdɔŋŋɔɔ paala yuge ne a ko. Nii wiaa, la jima ari dunia diderin kpaga ne. ¹⁹ Ba lii la tuoŋ ne, ama la di ba fa bi kubala ŋaa. Di la di ba ne fa ŋaa kubala, ba ma fa ha jan he la tuoŋ. Ama ba lii la tuoŋ ne di la jin ari la di ba bi kubala ŋaa. ²⁰ Ama ma-na jin wutitii, bee wiaa Kirisito joŋ u Diŋ-zɔŋ-la hema le ne. ²¹ U bi naga di mi ŋmuŋsa pipima a tiŋ ma si bi wutitii-la jin. Ama mi ŋmuŋsa pipima a tiŋ ma si jin wutitii-la ne. Ma ma jima ari wunyiari tiina bi wutitii kene. ²² Kubee ne saa ŋaa wu-nyiari tiina? Nii-la si si Yesu dee bi Kirisito ŋaa, nii-la Wia si liisa, u dee bi wu-nyiari tiina ŋaa? Nii-la kala saa si via la Tiina

Wia ari u Bie, u tiina ne ŋaa Kirisito diŋdɔŋ-balin. ²³ Nii-la kala si via Wia Bie, u bi u Nyimma ma jin. Nii-la ma kala si sei Wia Bie, u ma jin u Nyimma ne. ²⁴ Má len di wialin kala ma si nia bunbun he ma tuoŋ a kaa mu. Di wiaa deenba ne he ma tuoŋ a kaa mu, ma di Wia Bie jan ŋaa kubala a kaa mu. Ma di u Nyimma ma jan ŋaa kubala a kaa mu. ²⁵ Wii-la Kirisito titia si bula duu jan ŋaa pila ne ŋla: U si u jan joŋ miisi-la si bi dere a pila.

²⁶ Mi ŋmuŋse wiin deen pipima a mu tige nialin sii che di ba nyisema le ne. ²⁷ Ama Kirisito joŋ u Diŋ-zɔŋ-la hema le ne. Diŋ-zɔŋ-la si hema le nii a kaa mu, ma bira bi nialin dɔŋsuŋ naga, nialin sii che di niaa didageba. U Diŋ-zɔŋ-la hema le a dagema wii-kala ne. Wialin kala u sii dagema ŋaa wutitiiba ne, wunyiari dee. Má saa len di ma di Kirisito ŋaa kubala a kaa mu, ari u Diŋ-zɔŋ-la si dagema nii.

²⁸ Mi biiriŋ, di ma ŋaa nii a kaa mu, la jan keŋ nyu-duoŋ chee-la Kirisito si jan miira ko. Hiisin bi jan keŋla di la faa. ²⁹ Ma si jima ari Kirisito ne keŋ wutitii, ma saa jan jin ari nuu-kala si keŋ wutitii, u tiina ŋaa Kirisito bii ne.

3

Wia biiriŋ si nage nii

¹ Ma na nii la Nyimma Wia si chola. U chola kieli, nii ne tii u keŋla yiyire u biiriŋ. Wutitii, la sene ŋaa u biiriŋ ne. Dunia niaa bi Wia jin, nii ne tii ba bila ma jin nii. ² Mi bii-chooloo, leeɛ la ŋaa Wia biiriŋ ne. Ama Wia ha bi chaasa daga pulle nii la si jan nage. Ama wii-la la si jima ne ŋla: Bua-la le Kirisito si jan ko, la ma jan nage u si nage nii, bee wiaa la jan nau u si nage nii kala. ³ Nii-la kala sii yiele wiin deen le, u jan liise u titia wu-bɔŋ wu-ŋaalaa le, aŋ keŋ u titia pulle duu keŋ tuo-pula, ari Kirisito si keŋ tuo-pula nii.

4 Nii-la kala si ɲaa wu-bomun, u chei wialin Wia si leɲe ba ɲmunsa bil ne di niaa tuto. Di nuu ne ɲaa wu-bon, u chei wialin ne. 5 Ma kala jima ari Kirisito ko duu laa la wu-bonɲoo ta ne. U-na bi wu-bon kala ɲaa. 6 Di nuu ari Kirisito ne ɲaa kubala, u tiina bi wu-bonɲoo ɲaa. Ama nii-la kala ha sii ɲaa wu-bonɲoo, u tiina bi Kirisito jin. U siaa ma ha bi u nyun pollo. 7 Mi biirin, ma si leɲe di nuu-kala nyisema wiaa deenba le. Nii-la kala si ɲaa wutitiiba, u tiina ɲaa tuɔ-pul tiina ne, ari Kirisito si ɲaa Tuɔ-pul Tiina nii. 8 Ama nii-la kala ha sii ɲaa wu-bonɲoo, u ɲaa Sitaani tiina ne. Sitaani ɲaa wu-bonɲoo bunbun kala ne a kaa ko ari jinin kala. Wii-la si tii Wia Bie ko dunia ne ɲla: U ko duu chei Sitaani tinɲina ne. 9 Nii-la kala si ɲaa Wia bii-lulii, u tiina bi wu-bonɲoo ɲaa, beɛ wiaa u laa u wu-ɲaalaa kala ne a kaa mu. Wia si ɲaa u Nyimma nii, u bi wu-bon wuo ɲinaa. 10 ɲla le ne ma jan wuo a to jin Wia biirin ari Sitaani biirin. Nii-la kala si bi wutitiiba ɲaa, koo nii-la kala si bi u donɔ tiina cho, u tiina bi Wia bii ɲaa.

Má cho donɔ

11 Wii-la ma si nia bunbun kala ne ɲla: U maga di ma cho donɔ. 12 U bi maga di la nage Keen. U fa ɲaa Sitaani tiina ne a kpu u ɲaana. Beɛ ne tii u kpuu? Keen faa ɲaa wu-bonɲoo ne, an ka u ɲaana fa ɲinaa wu-zonɲoo. Nii ne tii u kpuu. 13 Mi naanbiirin, ma si leɲe duu ɲaa wu-kpunkpere ma le di dunia niaa ne berema. 14 La-na cho la donsun tinɲaa ne. Nii ne tii la jin ari la lii suun bua le ne a ken miisi-la si bi dere. Nii-la kala si bi niaa cho ha he suun bua le ne. 15 Nii-la kala si bere u donɔ tiina, u ɲaa ni-kpuuru ne. Miisi-la si bi diderin kene, ma jima ari ni-kpuura buu kene. 16 Kirisito jon u miisin yoo suun la wiaa, a dagela nii u si chola kinken. La ma saa maga di la ma cho la donsun

tinɲaa nii ne a jon la miisin a yoo suun ba wiaa. 17 Di nuu ne ken kiaa worun an na u donɔ tiina u juu wii a chiche kiaa, ka u ken tuɔ-heen a bi u nennige fá, ee ne u jan wuo bul duu cho Wia ne? 18 Mi biirin, ma si leɲe di la ken niin dunɲona cho donɔ. Má len di la to wutitii wonbiin a ɲinaa wu-zonɲoo, di la wu-ɲaalaa dage ari la sene cho donɔ ne.

19 Di la nii ɲaa nii, la jan wuo to nii le jin ari laa to wutitii wonbiin ne a wuo na wiese Wia teen. 20 Di la tuobiinaa ne ha wuo dage ari la cheye ne, la jima ari Wia ne yuga kii la tuobiinaa a jin wii-kala. 21 Mi naanbiirin, di la tuobiinaa ne bi daga ari la cheye ne, la jan ken nyuduon Wia sipaan a wuo na wiese. 22 Nii wiaa, di la ne sul kun-na kala u teen, u jan jonɔ pila, beɛ wiaa laa to wialin u si leɲe ba ɲmunsa bil di niaa tuto ne aa ɲaa wialin sii tore u tuon. 23 U bira dagela di la ɲinaa ɲla ne: Di la laa u Bie Yesu Kirisito wiaa dii a cho donɔ, ari u si dagela nii. 24 Nuuna kala sii to wialin Wia si dagela di laa to, u tiina he Wia teen ne a kaa mu. Wia ma he u teen a kaa mu. ɲla le ne la jan to jin ari Wia he la teen ne: U jon u Din-zon-la hela le ne.

4

Wia Din-zon-la dolun si nage nii

1 Mi bii-chooloo, di niaa ne si di ba ken dolun a wuo bul wiaa, Wia Din-zon-la dolun le, ma si guu laa dii ari baa bul wutitii ne. Má laa sipaan magiseba na ari ba sene ken Wia Din-zon-la dolun ne aa bul wiaa. Beɛ wiaa nialin si nyia wiaa a bul di baa bul wiaa, Wia Din-zon-la dolun le, ba yuga ne a he dunia le. 2 ɲla le ne ma jan to a wuo jin di nuu ne ken Wia Din-zon-la dolun: Nii-la kala si laa Yesu wiaa dii a sei duu ne ɲaa Kirisito, nii-la Wia si liisa, a bira sei duu ku ɲaa nuhobiin ne a ku tuu dunia, u tiina ne sene ken Wia Din-zon-la dolun. 3 Nii-la kala si bi nii bula a tige Yesu le, u bi

Wia Diŋ-zɔŋ-la dolun kenɛ. Dol-la u tiina si kenɛ ɲaa Kirisito diŋdɔŋ-balin dolun nɛ. Ma nia ari Kirisito diŋdɔŋ-balin deen jan kɔ dunia. U dolun nɛ saa paala hɛ dunia lɛ lɛɛɛ. ⁴ Mi biirin, ma nɛ ɲaa nialin Wia si tii. Ma nɛ lɛɛɛ ken dolun a kii nialin si nyia wiaa a bul di baa bul wiaa, Wia Diŋ-zɔŋ-la dolun lɛ nɛ, bɛɛ wiaa Wia Diŋ-zɔŋ-la si hɛma lɛ nɛ ken dolun a kii dol-la dunia niaa si kenɛ. ⁵ Nialin si nyia wiaa a bul di baa bul wiaa, Wia Diŋ-zɔŋ-la dolun lɛ, ba hɛ dunia nisin lɛ nɛ a bubul dunia wiaa. Nii nɛ tii dunia niaa jegilee nii ba teen. ⁶ Ama la-na ɲaa nialin Wia si tii nɛ. Nii-la kala si jin Wia, u tiina ma jegilee nii la teen nɛ. Nialin ma si bi Wia jin, ba bi la teen jegili. Nla lɛ nɛ la jan wuo to jin wutitii tinɲaa ari wu-nyiaraa.

Wia si cho niaa nii

⁷ Mi bii-chooloo, má leŋ di la cho dɔŋɔ. Di la nɛ cho dɔŋɔ, u lii Wia teen nɛ. Nii-la kala si cho niaa ɲaa Wia bii-lulii nɛ a jin Wia. ⁸ Nii-la ma kala si bi niaa cho, u bi Wia jin, bɛɛ wiaa chonun ɲaa Wia kun nɛ. ⁹ Nla nɛ Wia dagela ari u si chola: U jon u Bii-bala duu ku tuu dunia, di la tou lɛ a ken miisi-la si bi dɛɛ. ¹⁰ Nla nɛ chonun nage: U bi naga la nɛ laa sipaan cho Wia, ama Wia nɛ laa sipaan chola. U tin u Bie u ku tuu suu la wiaa, di Wia jon u baanin ta u fa si kenɛ a tin la haacheba wiaa, a jon la haacheba chela. ¹¹ Mi bii-chooloo, Wia si chola nii, u maga di la ma cho dɔŋɔ. ¹² Nu-kala ha bi Wia naa. Di la nɛ cho dɔŋɔ, Wia hɛ la teen nɛ a kaa mu. Di u nɛ hɛ la teen nii, la jan cho Wia ari la dɔŋsun tinɲaa kinɛn.

¹³ U jon u Diŋ-zɔŋ-la hela lɛ duu didagela. Nii lɛ nɛ la to jin ari la hɛ Wia teen nɛ, Wia ma hɛ la teen nɛ a kaa mu. ¹⁴ La titia na a ɲaa siada di Wia ta u Bie duu ku tuu ɲaa dunia niaa Laataara. ¹⁵ Nu-kala si wuo bul ari Yesu nɛ ɲaa Wia Bie, Wia hɛ tiina teen nɛ a kaa mu. U

tiina ma hɛ Wia teen nɛ a kaa mu. ¹⁶ Nii nɛ la titia jin a laa dii ari Wia si chola nii. Chonun ɲaa Wia kun nɛ. Nii-la kala si cho Wia ari niaa a kaa mu, u tiina hɛ Wia teen nɛ a kaa mu. Wia ma hɛ u tiina teen a kaa mu. ¹⁷ Di la nɛ cho Wia ari niaa kinɛn, la jan nage nii u fa si naga dunia lɛ. Di la nɛ ɲaa nii, la jan ken nyu-duon tapulii-la Kirisito si jan dii dunia niaa sariya. ¹⁸ Nii-la si cho Wia ari niaa, u tiina bi fawullun ka fá. Di la nɛ cho Wia ari niaa kinɛn, chonu-la kiri fawullun ta nɛ. Di la nɛ haa fá fawullun ari Wia jan dɔgisela, la ha bi Wia ari niaa cho kinɛn. ¹⁹ Wia nɛ laa sipaan chola. Nii nɛ tii la ma wuo cho Wia ari niaa. ²⁰ Di nuu nɛ si u cho Wia nɛ an bɛɛ u dɔŋɔ tiina, u ɲaa wu-nyiaru nɛ. U si wuo na u dɔŋɔ tiina an buu cho, nii-na u bi Wia u si bi wuo na ma cho. ²¹ Wia bula pila ari nii-la kala si chou, u maga duu cho u dɔŋɔ tiina ma nɛ.

5

Wia biirin jan ken dolun a wuo dunia

¹ Nii-la kala si laa dii ari Yesu nɛ ɲaa Kirisito, nii-la Wia si liisa, u ɲaa Wia bii nɛ. Nii-la kala ma si cho nuu, u cho nii-la bie ma nɛ. ² Di la nɛ cho Wia a tuto wialin u si dagela di la ɲinɲaa, la jan wuo jin ari la ma cho Wia biirin nɛ. ³ Di la ní to wialin u si dagela di la ɲinɲaa, nii jan dage ari la cho Wia nɛ. U bi hei a pila di la to wiaa deenba, ⁴ bɛɛ wiaa Wia bii-lulii kala jan ken dolun a wuo dunia ari u kiaa kala. La si ɲaa Wia yarida-la nɛ pila dolun deen. ⁵ Kubɛɛ nɛ saa ken dolun duu wuo dunia ari u kiaa? See nii-la kala si laa dii ari Yesu nɛ ɲaa Wia Bie.

Kialaa batori si ɲaa Yesu dansia

⁶ U-na Yesu Kirisito nɛ kɔ dunia. U si hɛ dunia lɛ, u to liin ari chalin kala lɛ nɛ a lii. Liin dunɲa lɛ dee u to. U to chalin ma lɛ nɛ, bɛɛ wiaa ba ken liin a fou Wii-chuɔlɛ liin. U bira suu, u chalin ma jaase. ⁷ Wia Diŋ-zɔŋ-la

ɲaa wiaa deenba dansia. U-na keŋ wutitii. ⁸ Kiaa batori ne saa ɲaa u dansia tinɲaa. Wia Diŋ-zoŋ-la ari lii-la ari u chal-la. Ba kala keŋ nii-bala ne. ⁹ Di nuu ne ɲaa wii siada tiina, la yie sei wii-la ne. Ama di Wia ne ɲaa wii siada tiina, u ne ɲaa siifian wiin a kii nuhuobiine si si wii-la ɲaa wutitii ne. Wia saa ɲaa u Bie siada tiina ne. Wialin kala u si bula a tige u le ɲaa wutitii ne. ¹⁰ Nii-la kala si laa Wia Bie wiaa dii, u tiina jima u tuoŋ le ari wialin Wia si bula a tige u le ɲaa wutitii ne, a ɲaa wiaa deenba dansia. Ama nii-la kala si bi Wia laa dii, u keŋ Wia yiyire wu-nyiaru ne, beɛ wiaa u bi wii-la u si bula a tige u Bie le laa dii. ¹¹ Wii-la Wia si bula ne ɲla: duu pila miisi-la si bi dere ne. Miisi-la he u Bie teen ne. ¹² Nii-la kala si he Wia Bie teen keŋ miisi-la ne. Nii-la kala ma si bi Wia bile teen he, u ma bi miisi-la keɛ.

La jaŋ wuo jin ari la keŋ miisi-la si bi dere

¹³ Mi ɲmunse wiin deen pipima di ma nialin si laa Wia Bie wiaa dii ma wuo jin ari ma keŋ miisi-la si bi dere ne. ¹⁴ La ma jima ari la ne sul kuŋ-kala Wia teen, la jaŋ wuo keŋ nyuduon a sul, beɛ wiaa la jima ari ku-la u si cho duu joŋo pila, u jaŋ jegile nii la teen. ¹⁵ Di la ne saa jima ari la ne sul kuŋ-kala u teen, u ne yie jegile nii la teen, ɲii-na la ma jima ari u yie joŋ ku-la la sii che pila ne.

¹⁶ Di nuu-kala ne na u doŋo tiina duu ɲaa wu-boŋɲoo, u maga di tiina sul Wia puu ne di Wia joŋ u miisin cheu. Mi bul ɲla a tige nialin si ɲaa wu-boŋo-la le si bi maga di ba suu le ne a tin ba wu-boŋo-la wiaa. Wu-boŋɲoo doŋsun he dime. Di nuu ne ɲaaba, u tiina jaŋ suu. Di nuu ne saa ɲaa wu-boŋɲoo deenba, mi bi si di ma sul Wia duu joŋ u miisin cheu. ¹⁷ Wu-boŋ kala ɲ si ɲaa, ɲaa haache ne. Ama wu-boŋɲoo ɲaa daban daban ne. Di ɲ ne ɲaa ba doŋsun, ɲ bi jaŋ suu a tin ba wiaa.

¹⁸ La jima ari Wia bii-lulii kala bi wu-boŋɲoo ɲaa. Wia Bie ne yie bibenu. Sitaani buu wii-kala wuo ɲaa.

¹⁹ La ma jima ari la ɲaa Wia bii-lulia ne. Ni-kaana-la-na kala si he dunia le he Sitaani nisin le ne.

²⁰ La bira jima ari Wia Bie ne ko a suri la siaa di la wuo jin Wii-titii-la. La di Wii-titii-la ɲaa kubala ne. La di u Bie ma ɲaa kubala, beɛ wiaa Wia Bie ari Wia ma ɲaa kubala ne. U ne ɲaa Wia titia. U ne joŋ miisi-la si bi dere pila. ²¹ Mi biirin, má liise ma titia vuiaa le.

TEN-LIA-LA JƆƆŋ SI N̄MUNSA

¹ Mi-na nihian̄ n̄ n̄mun̄s̄e tenin̄ deen̄ aa pi n̄-na haal-la Wia si liisa, ari n̄ biirin̄, nialin̄ mi si sen̄e cho worun̄. Mi dun̄dūŋa dee n̄e choma n̄ii, la di nialin̄ kala si ku jin̄ wutitii-la n̄e choma. ² La choma n̄ii a tin̄ wutitii-la si h̄ela l̄e. U saa jan̄ h̄ela l̄e a kaa mu.

³ La Nyimma Wia ari u Bie Yesu Kirisito lah̄orim̄o l̄e, ba jan̄ fála n̄enige, a len̄ di la h̄on̄ ari yarifielaa, a p̄ela l̄e di la sen̄e to wutitii l̄e a cho d̄on̄o.

U maga di la cho d̄on̄o

⁴ Mi tuon̄ tor̄o kin̄ken̄ mi si na ari n̄ biirin̄ d̄on̄sun̄ to wutitii-la l̄e, ari la Nyimma Wia si si laa to n̄ii. ⁵ Haal, mii sulun̄ di n̄ to wii-la d̄on̄o Wia fa si bula pila bun̄bun̄ kala. U bi wu-falii kala n̄aa. U n̄e n̄la: U maga di la cho d̄on̄o. ⁶ Di la níi to wialin̄ ba si n̄mun̄sa bil di niaa tuto, n̄ii jan̄ dage ari la sen̄e cho Wia ari niaa n̄e. Wii-la Wia fa si bula pila bun̄bun̄ kala n̄e n̄la: di la cho d̄on̄o.

⁷ Niaa yuga a h̄e lee-kala dunia l̄e di ba nyise niaa. Niaa deen̄ba bi seye ari Yesu Kirisito ku n̄aa nuhuobiin̄ n̄e a ku tuu dunia. Nuukala si nage niaa deen̄ba n̄aa ni-nyiseru n̄e a n̄aa Kirisito din̄d̄on̄-bal maa. ⁸ Má p̄o ma titia l̄e a sí len̄ di tin̄timii-la ma si tima, duu chei. Ama má tin̄ n̄ii di Wia wuo jon̄ ma time kala a pima. ⁹ Nii-la kala si bi wialin̄ Kirisito dun̄dūŋa si daga ka to an̄ dage wiaa d̄on̄sun̄ pipe wialin̄ l̄e, u tiina bi Wia teen̄ h̄e. Ama nii-la kala síi to wialin̄ Kirisito si daga dun̄dūŋ, u tiina h̄e Wia ari u Bie kala teen̄ n̄e. ¹⁰ Di nuu-kala n̄e k̄o ma teen̄ a bi wiaa deen̄ba dage, ma sí len̄e di tiina bira juu ma dia. Ma paala síu chuolu. ¹¹ Di nuu-kala n̄e chuolu a

kenu worun̄, u ma n̄aa u d̄on̄o tiina n̄e a p̄eu l̄e a n̄in̄aa wu-b̄on̄n̄o.

Wu-kaanaa

¹² Mi ken̄ wiaa yuge n̄e mi síi che di mi bula pima. Ama mi bi che di mi n̄mun̄s̄e ba kala tenin̄ tuon̄. Mii che di mi titia ku yi ma teen̄ n̄e a bula pima. Bua-la mi tuon̄ jan̄ faasa tor̄e.

¹³ N̄ dihaala Wia si liisa, u biirin̄ ka chuolun̄ worun̄.

TEN-TORI-LA ƆƆŋ SI N̄MUNSA

¹ Mi-na nihian̄ n̄ ɲmun̄se tenin̄ deen̄ pipi ɲ-na Gayas, mi nan̄ɔŋ-la mi si sen̄e cho worun̄.

² Mi nan̄ɔŋ-choolii, mi jima ari ma di Wia h̄onun̄ z̄om̄. Nii titia n̄e mi yie chūɔle Wia pipin̄ di ɲ ken̄ dolun̄ ɲ yaraa ma le. ³ La naan̄biirin̄ lii won̄biin̄ ku bula pimi ɲii ɲ s̄i to wutitii. Ba bula ari ɲ wu-ɲaalaa n̄e dage ɲii. U ɲii ɲaa mi tūɔŋ t̄ɔre kin̄ken̄. ⁴ Wii-kala bi len̄e mi tūɔŋ t̄ɔre kin̄ken̄ a mage mi si nia ari mi biirin̄ ka to wutitii won̄bii-la.

ƆƆŋ bese Gayas le

⁵ Mi nan̄ɔŋ-choolii, ɲɲ ɲaa worun̄ ɲ si yie pipe ɲ d̄ɔŋsun̄ tin̄ɲaa le si laa Yesu wiaa dii a ken̄ba worun̄, di ba n̄e ɲaa nuhūɔraa maa. N̄ɲ to won̄biin̄ worun̄ n̄e. ⁶ Ba bul ɲ wiaa a pi la nialin̄ si laa Yesu wiaa dii aa hilimi. Ba bul ɲii ɲ si cho niaa. U maga di ɲ ma he dolun̄ a pipeba le ari kun̄-kala ba s̄i che di ba kaa ven̄ won̄biin̄. N̄aa ɲii si jan̄ len̄ di Wia tūɔŋ t̄ɔre, ⁷ b̄e wiaa ba lii ba diisin̄ le di ba tin̄ Kirisito tin̄tin̄ɲaa n̄e. Ba via di ba laa kun̄-kala nialin̄ si bi Wia wiaa laa dii teen̄ n̄e. ⁸ U maga di la nialin̄ si laa Wia wiaa dii n̄e p̄e niaa deen̄ba le. Di la n̄e ɲaa ɲii, la jan̄ wuo ɲaa ba d̄ɔŋsun̄ tin̄ɲaa a peba le wutitii tin̄tin̄ɲaa le.

Daȳɔt̄ifis bi worun̄ ɲaa

⁹ Mi laa sipaan̄ ɲmun̄se tenin̄ a pi ma nialin̄ si laa Yesu wiaa dii aa hilimi. Ama baal kubala ba s̄i yire Daȳɔt̄ifis he ma tūɔŋ a faa cho duu ɲaa ma kuhian̄. U jon̄ harin̄ yia wii-la mi si bula n̄e. ¹⁰ Di mi n̄e k̄ɔ, mi jan̄ bula pima wialin̄ kala u s̄i ɲaa. U yie gaa mi harin̄ a chichei mi yirin̄. Nii ma dun̄dun̄a dee. La naan̄biiri-la si ɲaa nuhūɔraa, di ba n̄e k̄ɔ, u biba worun̄ ken̄, aŋ bira p̄ɔ nialin̄

ma s̄i che di ba ken̄ba worun̄, di ba s̄i ɲii ɲaa. U yie kiriba dia-la le, lee-la nialin̄ si laa Yesu wiaa dii si yie hilimi.

¹¹ Mi nan̄ɔŋ-choolii, s̄i nialin̄ s̄i ɲaa wu-b̄ɔŋɔɔ chesu. Ama chiches̄i nialin̄ s̄i ɲaa wu-z̄ɔŋɔɔ. Nii-la kala s̄i ɲaa wu-z̄ɔŋɔɔ ɲaa Wia biilulii n̄e. Nii-la ma kala s̄i ɲaa wu-b̄ɔŋɔɔ, u tiina bi Wia jin̄. ¹² Baal-la ma ba s̄i yire Dem̄iitias ɲaa ni-z̄ɔŋ n̄e. Nuukala bubul u wiaa worun̄. U wu-ɲaalaa ma titia dage ɲii u s̄i to wutitii le ɲii. Mi maa bul u wiaa worun̄. Ma jima ari wialin̄ kala mi s̄i bul ɲaa wutitii n̄e.

Chūɔlaa

¹³ Mi ken̄ wiaa yuge n̄e mi s̄i che di mi bula pin̄. Ama mi bi che di mi ɲmun̄se ba kala tenin̄ tūɔŋ. ¹⁴ Mii che di mi titia ku yi-ɲ n̄e l̄eɛle, di la h̄on̄ɔ bul wiaa.

¹⁵ N̄ jan̄ h̄on̄ ari yarifiɛlaa. N̄ nan̄ɔŋsun̄ kala si he daha ka chūɔlun̄. N̄ ma chūɔle la nan̄ɔŋsun̄ kala si he dime pila.

TEN-LA JUUD SI N̄MUNSA

¹ Mi-na Juud n̄ n̄mun̄s̄e tenin̄ deen̄. Mi n̄aa Yesu Kirisito t̄int̄innu n̄e a n̄aa Jeems n̄aana maa. Mi n̄mun̄s̄e tenin̄ deen̄ a pipi n̄ialin̄ Wia si yira, n̄ialin̄ la Nyimma Wia si cho, n̄ialin̄ Yesu Kirisito s̄ii ben̄ di ba h̄on̄ s̄om̄.

² Wia jan̄ fáma nennige woruñ a len̄ di ma na yarifielaa kin̄ken̄, a na nii u si choma kin̄ken̄ kin̄ken̄.

Juud bul wiaa a tige n̄ialin̄ si bi wutitii kene an̄ dage n̄iaa.

³ Mi nan̄d̄on̄-chooloo, mi fa cho di mi n̄mun̄s̄e tenin̄ p̄ima n̄e, a bul wiaa a tige nii Wia si laa la di ma kala ta l̄e. Nii n̄e mi na di u maga di mi n̄mun̄s̄e tenin̄ deen̄ a sulma di ma kala luloo woruñ a tin̄ wialin̄ la si laa dii wiaa. Wia jon̄ wialin̄ h̄e u n̄iaa nis̄in̄ l̄e bala n̄e. ⁴ Mi bul wiin̄ deen̄ pipima, b̄ee wiaa n̄iaa d̄on̄sun̄ luora juu ma tuon̄ n̄e. Ba bi Wia won̄biin̄ ka to, nii wiaa Wia jan̄ d̄ogiseba a len̄ di ba suu. Wia tenin̄ tuon̄ ba bul fafaa kala n̄e di Wia jan̄ n̄aa nii pi n̄ialin̄ si b̄om̄o. Ba n̄aa ni-b̄om̄o n̄e aa bul ni-pipili wiaa. Wia si fála nennige a laala ta, ba to nii a ken̄ Wia wu-z̄om̄o-la kaa birime ba ku n̄aa wu-liili wiaa. Ba yie bul ari ba bi la Tiina Yesu Kirisito jin̄, nii-la si n̄aa la kala kala Kuhian̄.

⁵ Ma jin̄ wiaa deen̄ba kala mi s̄ii che di mi bula p̄ima n̄e, ama mii che di mi liliisima n̄e, di ma jin̄ ari bua-la l̄e Wia si ken̄ u n̄iaa kaa lii Ijipiti tin̄teen̄ l̄e, n̄ialin̄ d̄on̄sun̄ bira bi u wiaa laa dii, nii n̄e u k̄puba. ⁶ Ma sí yu ari Wia d̄ogise u tin̄daaraa ma n̄e. Ba n̄e fa ken̄ doluñ a biben̄ leree n̄e, ka ba lii lee-la ba si h̄on̄o a bi dime h̄on̄o. Nii n̄e Wia ken̄ba h̄e ch̄orum̄o a bil birimin̄ tuon̄ lim. Ba jan̄ h̄e dime a kaa mu wuu, see di tapulii-la Wia si jan̄ dii n̄iaa sariya

ku yi. ⁷ Bira Wia d̄ogise tasi-la ba s̄ii yire Sodom ari Gomora ari ta-bala-la kala si golli lee-la. Nialin̄ fa si h̄e tasi-la tuon̄ faa n̄aa wu-liilin̄ ari disinnila nuhuobiinee paala si bi maga di ba n̄aa. Wia jon̄ba h̄e nyin̄-la l̄e s̄ii dii deen̄ deen̄, u bi dise. Wia che di la na nii a sí wu-b̄on̄hoon̄ n̄aa n̄e.

⁸ Nialin̄ si luora ku h̄e ma tuon̄, ba wu-n̄aalaa nage bun̄bun̄ nialin̄ Wia si d̄ogisa n̄e. Ba n̄e yie bibiine wu-b̄on̄hoon̄ ba tuon̄ l̄e, a to nii l̄e a n̄in̄aa wu-liilin̄. Ba via Wia doluñ kala an̄ tutuuse Wia tin̄daaraa jon̄hoon̄. ⁹ Bua kubala Wia tin̄daaraa kuhian̄ ba s̄ii yire Maakil, ari Sitaani fa ken̄ Moosis ku-suun̄ wiaa yuyuo d̄on̄o. Ba si n̄aa nii, Maakil bi wii-kala bula chei Sitaani tuon̄, ama u ta bul n̄e ari la Tiina Wia jan̄ d̄ogisu. ¹⁰ Ama n̄iaa deen̄ba si juu ma tuon̄, ba yie tutuuse nialin̄ ba si bi ba wiaa jin̄. Ba wu-n̄aalaa nage pusun̄ si bi wu-jimin̄ kene s̄ii n̄aa nii n̄e. Wialin̄ ba s̄ii n̄aa jan̄ len̄ di Wia d̄ogiseba di ba suu. ¹¹ U jan̄ l̄oro piba. Wialin̄ Keen̄ fa s̄ii n̄aa, ba n̄e ba maa n̄aa nii. Baal kubala fa h̄e dime, baa yire Beelam. U via won̄bii-titii-la an̄ n̄in̄aa wu-b̄on̄hoon̄ a laa moribee. Nii titia n̄e n̄iaa deen̄ba ma n̄in̄aa. Baal kubala ba fa s̄ii yire Kora ma fa via Moosis niin̄ an̄ suu, nii titia n̄e nialin̄ wiaa la si bula ma via Wia niin̄. Ba ma jan̄ suu. ¹² Di ma nialin̄ si cho d̄on̄o n̄e hilime di ma dii kiaa, n̄iaa deen̄ba yie guoli ma tuon̄ n̄e. Ba nage nan̄chuosun̄ n̄e aa chei ma kudiile-la. Di ba ní dii kiaa, ba dun̄duña wiaa n̄e ba yie chil. Ba nage duonun̄ si yie tin̄ duu nii, ka pelin̄ n̄aa kiri u bi n̄ia. Ba bira nage tiisi-la si maga di ba nen̄ bua-la si yie di ba nen̄, ka ba bi nene n̄e. Ba ta h̄e dime pei n̄e, ba jan̄ huro churiba di ba suu. ¹³ N̄iaa deen̄ba nage liipelin̄ si dolie n̄e, u yie n̄moo liin̄ u gugulimi a n̄moo disinnin̄ kaa mu liin̄ niin̄. Ba bira nage cheñwulaa si yie churi a mu juu seme d̄on̄o birimin̄ tuon̄ lim. Ba jan̄ h̄e dime a kaa mu wuu.

¹⁴ Baal kubala ne ba fa sí yire Inok fa bul niaa deenba wiaa, Wia Diŋ-zoŋ-la doluŋ le, faafaa kala ne. U fa ŋaa Adam nihiliere-liere balipe ne. U si, “Má bee na, la Tiina Wia kɔ ne a keŋ u tiŋdaaraa bui fii fiiba kaa kɔ. Ba-na bi disinniŋ keŋe.

¹⁵ Wia kɔ duu dii nuu-kala sariya, a joŋ cheeriŋ pi ni-bɔmɔ-la kala a tiŋ wu-bɔmɔ-la ba si ŋaa, ari wu-bɔmɔ-la kala ni-bɔŋŋɔɔ deenba si bula a tige Wia le.” ¹⁶ Niaa deenba yie gugurime wiaa, ba tuɔŋ bi kuŋ-kala nyuŋ tɔre, baa to ba tuɔtɔre wu-ŋaalaa hariŋ a keŋ ba-bii-baliŋ a keŋ nii-sima a nyise niaa lilaa ba kiaa.

Juud si chagile niaa nii

¹⁷ Ama mi nanɔɔŋ-chooloo, má liliisi wialiŋ la Tiina Yesu Kirisito nanzooba si bula pima ari ba jaŋ ku ŋaa. ¹⁸ Ba bula pima ari dunia dideriŋ, ni-sieree jaŋ kɔ. Ba yie tuto ba tuɔtɔre wu-ŋaalaa hariŋ a ŋiŋaa wu-bɔŋŋɔɔ. ¹⁹ Ni-yiri deenba jaŋ keŋma pɔre dɔŋɔ le a ŋiŋaa wiaa ari dunia niaa sí ŋaa nii. Wia Diŋ-zoŋ-la tuo ba le. ²⁰ Ama ma-na, mi nanɔɔŋ-chooloo, wialiŋ ma si laa dii lii Wia teen ne. Nii wiaa, má keŋba woruŋ a waaba le, a to Wia Diŋ-zoŋ-la le a chuchuɔle Wia. ²¹ Wia si choma nii, má chinŋ nii le kpaŋ kpaŋ, a gberɛ la Tiina Yesu Kirisito duu kɔ, nii-la si jaŋ fáma nennige a pima miisi-la si bi dere. ²² Nialiŋ si keŋ tuɔsaa balia, má bul Wia wiaa piba di ba laa dii. ²³ Nialiŋ si yenŋe di ba juu Wia nyiniŋ, má lere liiseba nyiŋ-la tuɔŋ. Má fába nennige, ama má chichel a keŋ ma titia di wu-bɔmɔ-la ba sí ŋaa ba yaraa le sí ma chol.

²⁴ Má lenŋ la zizil Wia. U ne keŋ doluŋ, u jaŋ wuo pema le di ma sí wu-bɔŋŋɔɔ ŋaa, a sí wii-kala chei u sipaŋ, di ma wuo na u zɔmuŋ a wuo chinŋ u sipaŋ a jujuɔse. ²⁵ U dunɔŋa ne ŋaa Wia, u ne to la Tiina Yesu Kirisito le a laala ta. Má denu a pu yiriŋ, u ne keŋ doluŋ a

tii kuŋ-kala aa beŋba maa, a lii di-suomuŋ kuko leele a kaa mu deen deen. Ami.

WIALIN WIA SI JONO DAGE JƆƆŊ A MU TIGE YESU KIRISITO LE

¹ Wiin deen ne Wia jono pi Yesu Kirisito duu jono dage u tintinnaa, di ba jin wialin si jan n̄aa l̄ēle. Wia tin u tin̄daara u k̄o u tintinna JƆƆŊ teen a bul wialin pu. ² Nii ne JƆƆŊ sei Wia wialin ari wialin kala Yesu Kirisito si bula, ari wialin kala u si na, a n̄aa wiaa deenba siada tiina. ³ Nialin si karime wiaa deenba di niaa nii ari nialin si jegile nii wiaa deenba a laa he ba tūsaa le a tutoba, Wia jan peba ma le, bee wiaa bua-la wiaa deenba si jan n̄aa k̄paga ne.

JƆƆŊ chūle nialin si laa Yesu wiaa dii a he Esia le

⁴ Mi-na JƆƆŊ ne n̄mun̄se tenin deen a pipi nialin si laa Yesu wiaa dii aa hilimi tasin balipe-la si he Esia tin̄teen le. Wia lah̄orim̄o le, u jan len di ma h̄on ari yarifīlaa. U ne n̄aa nii-la si he dime, nii-la fa si he dime faa faa kala ari nii-la si jan k̄o. Wiaa deenba ma lii Wia Din̄sin balipe-la si chin̄ Wia kuori-kpasa-la sipaan ne. ⁵ Ba lii Yesu Kirisito teen ne. U ne n̄aa ba siada tiina a ken̄ wutitii. U ne suba. U ne bira n̄aa niila si laa sipaan sii suun le. U ne ken̄ dunia kuoroo kala dolun. Má len di la dennu u si chola nii a jon u chalin a jaase, a liisela haacheba le. ⁶ U ne len̄e la duu kala dii kuorun a timaa pi Wia, nii-la si n̄aa u Nyimma. U ne ken̄ yirin ari dolun a kaa mu wuu. Ami. ⁷ Má bee na, u jan to duon̄bilingbaanaa tuon̄ kuko. Nuukala jan nau. Nuukala si jon kua tobu jan nau. Ni-yiriba kala si he dunia le jan yel a tin u wiaa. Wiin deen n̄aa wutitii ne. Ami.

⁸ La Tiina Wia si, “Mi ne n̄aa Alifa ari Omega. Mi-na Wii-jaribako, mi ne n̄aa nii-la si he dime ari nii-la fa

si he dime faafaa kala ari nii-la si jan k̄o.”

Wialin JƆƆŊ si na ari duosoo tuon̄

⁹ Ma naan̄bie JƆƆŊ ne n̄mun̄se tenin deen a pipima. A tin̄ Yesu Kirisito wiaa ne ba to naasin̄ d̄ogisela. Ama la nialin si na hee-la nii a tin u wiaa, la ma jan juu Wia kuorii-la tuon̄. Hee-la kala le la ken̄ kenyiri ari nyalima. Mi fa bul Wia wiaa ne an̄ pe n̄aa Yesu Kirisito siada tiina. Nii wiaa ne tii ba ken̄mi kaa mu tin̄tee kubala baa yire Patim̄os. Liin̄ gollo chu tin̄tee-la kala. ¹⁰ La Tiina Wia tapulii kubala ne Wia Din̄zon̄-la dolun ku hemi le worun. Nii ne mi nii nuu yiikori-bal mi harin̄ a nage ba s̄ii n̄muu nyillin̄ nii. ¹¹ Nii ne yiikori-la bula pimi a bul, “N̄mun̄se wialin kala n̄ s̄ii na, a jono tin di ba kaa mu pi nialin si laa Yesu wiaa dii aa hilimi tasin balipe-la si he Esia tin̄teen le. Ba ne n̄la: Efesis ari Simiina, Pegamom, Taataya, Saadis, Filadelfia ari Laadisiya.”

¹² Nii ne mi miira daase harin̄ di mi na nii-la s̄ii bul wiaa mi teen. Mi si daasa, mi na korun̄un ba si yie jon̄ chaanaa a didan̄ ba kiaa balipe, a kala n̄aa selime. ¹³ Ka nuu chin̄ ba tutuobaanin̄ a nage Nuhuobiine Bie, a laale geri-dudun̄, ka u ken̄ selime damere a kaa v̄ōo u boye. ¹⁴ U nyun̄ ari u nyu-punaa kala pulle a nage kun̄kun̄un. U siaa kala nage nyin̄-gelin̄. ¹⁵ U naasin̄ ma nage ba si jon̄ h̄on̄ he nyinin̄ le u fīese nii. U yiikoro ma nage lii-balin̄ s̄ii pelli gbul gbul. ¹⁶ Ka u kori chen̄wulaa balipe u na-diin̄ nisin̄ le, tokobiin̄ lii u niin̄ le a ku lii. U niirin̄ balia kala didii nyagaga. Ka u siaa kala tutul a nage wii-p̄osun̄ si faasa p̄ose nii.

¹⁷ Mi si nau nii, mi tuu tel u sipaan a pin̄ dime chim a nage di mi suba. Nii ne u jon u na-diin̄ nisin̄ dan̄mi le an̄ bula pimi, “S̄i fawullun̄ fá, mi ne n̄aa nii-la fa si he dime bun̄bun̄ ari nii-la si jan he dime dunia diderin̄. ¹⁸ Mi ne n̄aa nii-la si weye. Mi fa suba ne, ama l̄ēle mi weye ne a kaa

mu wuu, mi bira bi jan suu. Mi ken suun ari lelee dolun maa. ¹⁹ Lelee nmunse wialin n si na, wialin si he dime ari wialin si jan naa harin. ²⁰ Wialin n si na naa wu-faalia ne. Chenwula-la balipe n si na mi na-diin le ari korunu-la ba si yie jon chaanaa a didan ba kaaa balipe ken bubuon ne. Chenwulaa balipe-la ne naa Wia tin্দaaraa sii ben nialin si laa Yesu wiaa dii aa hilimi a he tasi-la balipe-la si he Esia tin্দteen le. Korunu-la ba si yie jon chaanaa a didan ma ne naa nialin si laa Yesu wiaa dii aa hilimi tasin balipe-la si he Esia tin্দteen le.

2

Wialin ba si nmunsa pi Efesis niaa

¹ Mi-na nii-la si kori chenwula-la balipe mi na-diin nisin le aa ven korunu-la ba si yie jon chaanaa a didan balipe tuon, mi ne tin tin্দaarin deen di ba kaa mu pi Wia tin্দaari-la sii ben nialin si laa Yesu wiaa dii aa hilimi Efesis le.

² Mi jin ma wu-naalaa ne. Mi jin tin্দimii-la ma sii tin ne. Wii-kala le ma dii kenyiri ne a nyalime worun. Mi jima ma di ni-bononoo bi dono le wuo. Naaa donsun nyia wiaa ari ba naa Wia nanzoba ne. Ma yie magise niaa deenba a na di baa nyia ne. ³ Mi jima ari ma ken kenyiri ne aa nyalime. Ma na heen a tin mi wiaa an ha bi lol. ⁴ Ama wii ne mi ken arima. Ma fa si chomi nii bunbun-la, ma bira bimi nii cho. ⁵ Nii wiaa, mii che di ma jin wii-la le ma si tele ne. Ma birime a ninna wialin ma fa sii naa bunbun-la ne. Di nii dee, mi jan ku paa ma koru-la, see di ma birima lii ma wu-naalaa le aa naa bunbun wialin. ⁶ Ama ma bere Nikolaata niaa wu-naalaa ne. Mi ma bere niaa deenba wu-naalaa le. ⁷ Digilaa tin্দnaa, ma wuoli ma digilaa a nii wialin Wia Din-zon-la si bula pi nialin si laa Yesu wiaa dii aa hilimi lee-kala Esia le. Nii-la kala si wuo yuo dii Sitaani, mi jan len duu

dii tia-la nenee sii pi niaa miisin a he Wia-jan le.

Wialin ba si nmunsa pi Simiina niaa

⁸ Mi bira bula pin di n nmunse wiaa deenba a pi Wia tin্দaari-la sii ben nialin si laa Yesu wiaa dii aa hilimi Simiina le. Wiaa deenba lii mi-na nii-la fa si he dime bunbun ne. Mi jan he dime a kaa mu dunia diderin. Mi ne suba an bira sii suun le.

⁹ Bula pi nialin si laa Yesu wiaa dii aa hilimi Simiina le di mi jin wialin sii walimeba ne, a jin ari ba naa summoo ne (ama Wia teen, ba naa kuoroo ne). Naaa donsun he dime aa chei ma yirin. Naaa deenba ken ba titia ari ba naa Juu timma ne an bi Juu timma naa. Baa to Sitaani harin ne. ¹⁰ Muasuaa ma nialin si he Simiina le jan na heen worun, ama ma si fawullun fa a tin hee-la wiaa. Ma bee na, Sitaani naa siri ne duu ken ma donsun to dia a magisema. Hee-la jan yi tapulaa fii. Di ba nii che di ba kpuma maa, ma-na ha chin ma yarida naan le. Di ma ne naa nii, mi jan jon mii-zomun pima Wia-jan le. ¹¹ Digilaa tin্দnaa, ma wuoli ma digilaa a nii wialin Wia Din-zon-la si bula pi nialin si laa Yesu wiaa dii aa hilimi lee-na kala Esia le. Nii-la kala si wuo yuo dii Sitaani, duu ne suba, u bira bi jan suu liamin.

Wialin ba si nmunsa pi Pegamom niaa

¹² Mi bira bula pin di n nmunse wialin pi Wia tin্দaari-la sii ben nialin si laa Yesu wiaa dii aa hilimi tan-la ba sii yire Pegamom le. Mi ne nii-la si kori tokobiin, u niirin balia kala didii nyagaga. Bula piba di mi ne bul wiaa deenba.

¹³ Mi jin lee-la ma si he ne. Dime ne Sitaani dii kuorun. Ma ha ken mi yirin worun a naa mi yarida. Ma dono tiina Antipas faa bul mi wiaa aa pi niaa. U fa naa mi siada tiina titii ne. Nii ne ba kpua. Ba kpua lee-la Sitaani si he ne. ¹⁴ Ma

naa kukeri ne, ama wiaa banmene ne ma naa chei. Niaa dɔnsun he ma tuɔŋ a tuto wialin baal-la ba sii yire Beelam fa sii dagu. U ne dage kuoru kubala baa yire Balak duu nyise Iziral tinnaa di ba didii vuiiaa kiaa an pe ninaa wu-liilin. ¹⁵ Niaa dɔnsun he ma tuɔŋ a ma tuto wu-bomɔ-la Nikolaata timma-la sii dagu. ¹⁶ Nii wiaa, má birima lii wialin le, di nii dee mi jan ko leele a ken mi niin wu-bulaa si nage tokobiin, a kenma yuo laalin. ¹⁷ Digilaa tinnaa, má wuoli ma digilaa a nii wialin Wia Din-zɔŋ-la si bula pi nialin si laa Yesu wiaa dii aa hilimi Esia tinteen le. Nii-la kala si yuo dii Sitaani, mi jan jon kudiile-la si he Wia-jan a pu, a jon tabii-pula ma a pu. Mi jan nmunse yiri-falin a he tabii-la le. Yiri-la nuu-kala bi jan jimu, see nii-la si laa tabii-la dundunja.”

Wialin ba si nmunsa pi Taataya niaa

¹⁸ Mi bira bula pin di n nmunse tenin deen a pi Wia tinndaari-la sii ben nialin si laa Yesu wiaa dii aa hilimi tan-la ba sii yire Taataya le. Mi-na Wia Bie ne bul wiaa deenba. Mi siaa nage nyin-gelin ne, ka mi naasin ma nage hoon ba si chese u faasa tutul.

¹⁹ Bula piba a bul di mi jin ba tinntinnaa ne. Mi jin nii ma nialin si he Taataya le si cho niaa, ari nii ma si ken yarida, ari nii ma sii pe niaa le. Mi jin nii ma si ken kenyiri aa nyalime wii-kala le. Mi jima ari tinntinna-la ma sii tin harin ne kpia bunbun tinntimii-la ma fa si tima. ²⁰ Ma naa kukeri, ama wiaa banmene ne ma naa chei. Haal kubala ne he ma tuɔŋ aa dage wu-bonɔɔ, ka ma buu kire. Haal-la ba sii yire Jezebel ne nii. Haala deen ken u titia ari uu bul Wia wiaa, Wia Din-zɔŋ-la dolun le. Uu nyia ne. Uu dage mi niaa di ba ninaa wu-liilin an pe didii vuiiaa kiaa ne. ²¹ Mi pi haala deen wonbiin duu birima lii u haacheba le ne, ka u via an ninaa

wu-liilin. ²² Nii wiaa, má bee na, mi jan len duu wiile worun a pin. Nialin ma kala sii tou a ninaa wu-bomɔ-la, mi jan len di ba ma faasa na heen, see di ba birima lii ba wu-nyaala-la le. ²³ Mi saa jan nmoo nialin sii to u harin kpu. Di mi ne naa nii, nialin kala si laa Yesu wiaa dii aa hilimi jan jin ari mi jin nuu-kala tuobiinaa ne. Nuu-kala si tima mage nii, nii ne mi jan timu. ²⁴ Ama niaa dɔnsun he ma tuɔŋ Taataya le a bi wialin haala deen sii dagu ka to. Niaa dɔnsun kenba kaa yire Sitaani wu-luore bulaa ne. Ma biba to. Mi bi jan voo chugi-yunoo chunma. Wiin deen dundun ne mii che di mi bula pima: ²⁵ Wutitii-la ma si kene, má kenu worun a mu yi tapulii-la mi si jan ko. ²⁶ Nii-la kala si wuo yuo dii Sitaani an pe ken mi wu-dagaa, a titin mi tinntinnaa a kaa mu yi u miisin diderin, mi jan pu dolun duu biben dunia niaa kala. ²⁷ Tiina jan biben dunia niaa ari kpaasa. U jan viviireba ari ba si yie nmoo pupoin nii u yere muno muno. Dol-la titia mi Nyimma si jon pimi, u titia ne mi jan jon pu. ²⁸ Mi jan len di tiina tutul a nage nanyualun sii tul nii. ²⁹ Digilaa tinnaa, má wuoli ma digilaa a nii wialin Wia Din-zɔŋ-la si bula pi nialin si laa Yesu wiaa di aa hilimi Esia tinteen le.

3

Wialin ba si nmunsa pi Saadis niaa

¹ Mi bira bula pin di n nmunse wiaa deenba a kaa mu pi Wia tinndaari-la si ben nialin si laa Yesu wiaa dii aa hilimi Saadis le. Bula piba a bul di mi-na Tiina si ken Wia Dinsin balipe-la an pe ken chenwulaa balipe-la ne bul wiaa deenba piba.

Mi jin ma Saadis niaa tinntinnaa kala ne. Ma laa yirin ari ma weye ne, ama ma suba ne. ² Má sii don le an po di ni-kaanaa si ka, di ba ken dolun a si suu. Má naa nii, bee wiaa tinntimii-la ma sii tin bi Wia

kpaga. ³ Má liise yi wialin ma si nia an laa maa. Má kenba worun an birima lii ma haacheba le. Di ma ne bi don le sie, mi jan luora ko ari gaara. Ma bi jan wuo jin bua-la mi si jan ko ma teen. ⁴ Ari nii kala ni-titiiba banmenε ne ha he Saadis le. Niaa deenba bi disinnin kenε. Ba ne jan laale geri-pullun a to mi harin, beε wiaa ba magee nii ne. ⁵ Nii-la kala si wuo yuo dii Sitaani, u tiina jan laale geri-pullun. Mi bi jan kpu u yirin ta miisin ten-la tuon. Mi jan suri mi niin a yire u yirin mi Nyimma Wia ari u tin daaraa sipaan. ⁶ Digilaa tinnaa, má wuoli ma digilaa a nii wialin Wia Din-zon-la si bula pi nialin si laa Yesu wiaa dii aa hilimi Esia tinteen le.

Wialin ba si nmunsa pi Filadelfia niaa

⁷ Nmunse wiaa deenba kaa mu pi Wia tin daari-la sii ben nialin si laa Yesu wiaa dii aa hilimi Filadelfia le. Mi ne nna Tuo-pul Tiina ari Ni-titii ma, mi ne kori Devit tan-la boribiin. Duu ne suro, nuu-kala bi wuo kaa to, duu ne bira kaa to ma, nuu-kala bi wuo suri.

⁸ Mi jin ma tintinnaa ne. Má bee na, mi ken boro kaa suri ne a pima. Nuukala bi wuo kaa to. Mi jima ari ma dolun bi yuge, ama ma haa to mi niin wiaa a bi mi yirin kaa faa. ⁹ Má bee na, mi jan len di nialin sii to Sitaani a nyia wiaa bul ari ba nna Juu tinnaa an bi Juu timma nna, mi jan len di ba ku tuu kpirimi ma sipaan, di ba jin ari mi choma ne. ¹⁰ Muapilii mi jan len di dunia niaa kala na heε. Ba jan magiseba worun. Ama mi bi jan len di ma juu heε-la le, beε wiaa ma to mi niin wiaa ne a ken kenyiri ari nyalima maa. ¹¹ Mii ko ne leεε. Má faasa ken ku-la ma si kenε, di nuu-kala si ma time kaa laa ma teen. ¹² Nii-la kala si wuo yuo dii Sitaani, mi jan len duu birime jebiin a he Wia-dia tuon. U-na bi jan ko duu lii Wia-dia tuon. Mi jan nmunse Wia yirin a heu le, a nmunse Wia-jan yirin

ma heu le. Jan-la ne nna Jerusalem falii-la si lii Wia-jan ku tuu. Mi ma jan nmunse mi titia yiri-falin a heu le. ¹³ Digilaa tinnaa, má wuoli ma digilaa a nii wialin Wia Din-zon-la si bula pi nialin si laa Yesu wiaa dii aa hilimi Esia tinteen le.

Wialin ba si nmunsa pi Laadisiya niaa

¹⁴ Mi bira bula pin di n nmunse wiaa deenba kaa mu pi Wia tin daari-la sii ben nialin si laa Yesu wiaa dii aa hilimi Laadisiya tan-la le. Mi ne nna nii-la ba sii yire “Ami”, a nna siada-titii maa, nii-la le Wia si to a nna dunia, mi nii bul wiaa deenba.

¹⁵⁻¹⁶ Mi jin tintimia-la ma si tin ne. Ma nna tolo tolo ne. Ma bi fiela, ma bira bi lin maa. Mi fa cho di ma fiela koo di ma lin. Ama ma nna tolo tolo ne. Ma bi fiela, ma bira bi lin maa. Nii wiaa mi jan puusema ta. ¹⁷ Ma yie bigisi ma titia le a bul di ma ken kiaa ne, ma bira bi kun-kala che kika. Ama ma bi jin ari ma nna summoo a nna nisusu timma a nna nyulima an ken yaribiree maa. ¹⁸ Nii wiaa mi bula pima di ma yoo selime-la ba si chese di ma wuo kuori a yoo geri-pullun maa a laale a to ma yaribiree di hiisin sima ken niaa tuon. Má yoo nuun ma a he ma siaa a wuo nina. ¹⁹ Di nialin mi si cho ne nna wii chei, mi yie dageba ne a kenba bil wonbiin le. Nii wiaa, má fiεε siin a birima lii ma haacheba le. ²⁰ Má bee na, mi chin boinniin ne aa nmoo. Nii-la kala si nii mi yiikoro a ken boro suri, mi jan ku juu u teen, di la duu kala dii kiaa. ²¹ Nii-la si wuo yuo dii Sitaani, mi jan puu wonbiin duu pe hon mi kuori-kpasa nyun ari mi ma si wuo yuo dii Sitaani nii a pe hon mi Nyimma kuori-kpasa nyun nii. ²² Digilaa tinnaa, má wuoli ma digilaa a nii wialin Wia Din-zon-la si bula pi nialin si laa Yesu wiaa dii aa hilimi lee-kala Esia tinteen le.

4

Baa denne Wia Wia-jaŋ le

¹ Wiaa deenba kala si ŋaa hariŋ, mi beŋ wia nyuŋ a na di Wia-jaŋ boro suro. Nii ne mi nii yiikori-la fa sii bul wiaa mi teen bunbun-la a nage nyile. U bira bula pimi a bul, “Ko daha di mi dagiŋ wialiŋ si jaŋ ŋaa wiaa deenba hariŋ.” ² Bua-la le di Wia Diŋ-zoŋ-la ku hemi le, nii ne mi beŋ a na Wia-jaŋ a na Wia kuori-kpasa-la duu chin dime, ka nuu hoŋ u nyuŋ. ³ Nii-la fa si hoŋ kuori-kpasa-la nyuŋ tutul a nage tabiin sii tul a nage jinalia, ari tabiin si fiɛsa a nage chaliŋ. Ka duoŋsia golli kuori-kpasa-la chu. Duoŋsia-la fa nage tabiin si nage jɔgɔ-liin ne. ⁴ Nii ne mi na kuori-biisin kpasinnin mara ari banese di ba golli kuori-kpasa-la. Nihiasin mara ari banese hoŋ ba nyuŋ a laale geri-pulluŋ, a chu selime kuori-nyuŋ-chuuluŋ. ⁵ Nii ne ka kpasa-la lerin liligise a nage duonuŋ sii ligise nii, ka yikoro ma doŋ, a nage duonuŋ sii kpia a lii kpasa-la lerin. Nii ne ka nyin-daasin balipe ma didii nyinin kuori-kpasa-la sipaan. Nyin daasi-la ne ŋaa Wia Diŋ-zomɔ-la balipe. ⁶ Ka kuori-kpasa-la sipaan kuŋ pin a nage mugibalin si tul nii pal pal, a pulla nage duoŋ-tabiin.

Ka kiasa banese si weye golli kuori-kpasa-la chu a keŋ sii-kene, sipaan ari hariŋ kala. ⁷ Kialiŋ banese-la doŋɔ nage naachigin, doŋɔ ma nage ne-bele, doŋɔ ma siaa a nage nuhuobiine, doŋɔ ma nage kachuun sii fil. ⁸ Kialiŋ kuŋ-kala keŋ kinkeŋ balidu balidu ne. Ba bira keŋ siaa sipaan ari hariŋ kala. Titanin ari wiiheye kala ba yie yiyii yiilaa, ba bi tore. Yiila-la ba sii yii ne ŋla:

“Wii-jaribako, ŋ ŋaa Tuɔ-pul Tiina ne,
 ŋ ne nii-la fa si he dime faafaa kala, ari nii-la si he dime, ari nii-la si jaŋ ko.”

⁹ Kialiŋ si weye yii yiilaa a denne nii-la si hoŋ kuori-kpasa-la nyuŋ. Ba

yie lolu a yiyire u yirin maa. Nii-la si hoŋ kuori-kpasa-la nyuŋ jaŋ he dime a kaa mu wuu. ¹⁰ Bua-na kala kialiŋ banese-la si weye ne yii yiilaa, nihiasin mara ari banese-la ma yie tuu kpirimi a chuɔle nii-la si hoŋ kuori-kpasa-la nyuŋ a he dime a kaa mu wuu. Ba yie suri ba kuori-nyuŋ-chuuluŋ a bil kpasa-la sipaan aŋ yiyii yiilaa a bul,

¹¹ “La Tiina Wia, u maga di la chuoluŋ,
 u maga di la dennin a yiyire ŋ yirin,
 ŋ ne Doluŋ Tiina. Ŋ ne ta kuŋ-kala,
 ŋ tuɔtoruŋ le ne ŋ taba ba he dime.”

5

Ba joŋ teŋ-chuoluŋ a pi Pie-bie

¹ Nii ne ka mi na di nii-la si hoŋ kuori-kpasa-la nyuŋ, duu kori teŋ-chuoluŋ u na-diin nisin le. Ba ŋmunse teŋ-la tuɔŋ ari hariŋ kala a mere, aŋ keŋ kiasa balipe kaa magile. ² Nii ne mi na Wia tinɔdaari-duo kubala duu faasa heeli a bul, “Kube ne jaŋ wuo lere kialiŋ ba si kaa mere teŋ-la aŋ beŋ teŋ-la?” ³ Ama mi bi nuu-kala na si jaŋ wuo lere teŋ-la. Nuukala tuo Wia-jaŋ le, nuukala tuo tinteen ma le, nuukala tuo leleɛ-jaŋ ma si wuo lere teŋ-la beŋ. ⁴ Mi si bi nuu-kala na si wuo lere teŋ-la beŋ, mi faasa yel. ⁵ Nii ne nihiasi-la mara ari banese-la doŋɔ bula pimi a bul di mi si yel, di mi bee na nii-la ba sii yire “Juda niasa tuɔŋ Naachigin”, u lii Devit doho niasa tuɔŋ ne, u ne wuo yuo dii Sitaani. Nii wiaa u jaŋ wuo suri teŋ-la a lere kialiŋ balipe-la ba si kaa mere.

⁶ Nii ne mi beŋ a na Pie-bie duu chin kuori-kpasa-la ari kialiŋ banese-la si weye ari nihiasi-la tutuɔbaanin. U si chin lee-la, u nage di ba fa kpua ne. U fa keŋ nyillin balipe ari siaa ma balipe. Sia-la balipe ne ŋaa Wia Diŋsin balipe Wia si ta ba ku tuu dunia seme-na kala. ⁷ Nii ne Pie-bie-la mu laa teŋ-la, nii-la si hoŋ kuori-kpasa-la nyuŋ na-diin

nisiŋ lɛ. ⁸ U si laa teŋ-la, kialin banɛsɛ-la si weye ari nihiasiŋ mara ari banɛsɛ-la, ba kala tuu kpirimi Pie-bie-la sipaan a chuolu. Nihiasi-la kala kori chenniŋ ari selime gbaŋsiŋ maa. Gbaŋsi-la su ari suoru-si-la ba si nyiga pi Wia. Wia niaa Wii-chuoluŋ nɛ ŋaa suoru-si-la. ⁹ Nii nɛ nihiasi-la ari kialin si weye ta ba yiili-falin aa yii,

“N nɛ wuo laa teŋ-la ba si mɛrɛ,
a lɛrɛ kialin ba si kaa magilɛ,

bɛɛ wiaa ba kpun nɛ. Ba si kpun nii,
ŋ jon ŋ chalin a yoo nuhuobi-
ine miisin a pi Wia.

Nialin ŋ si yobo lii ni-yiriba kala
tuon nɛ aa bul yiikori-yiriba,
a hɛ ta-yiriba ari tintee-yiriba
kala lɛ.

¹⁰ N lɛnɛ nialin ŋ si yobo, dii kuoron
nɛ a laa niaa nyun a tima pipi
Wia.

Ba jan beŋ tinteen kala.”

¹¹ Nii nɛ mi beŋ a na di Wia
tinɗaaraa bui buiba bui ku golli
kuori-kpasa-la ari kialin si weye ari
nihiasi-la. Mi nia di ba faa bul wii
nɛ. ¹² Wii-la ba fa sii bul ari yiikori-
balin nɛ ŋla:

“Pie-bie-la ba si kpua nɛ maga duu
keŋ dolun a biben niaa.

U nɛ maga duu keŋ kiaa, ari wu-
jimin, ari dolun kuŋ-kala lɛ.

U nɛ maga duu keŋ yirin, di niaa
dennu a chuolu.”

¹³ Nii nɛ ka mi nii kialin kala si hɛ
Wia-jaŋ, ari kialin kala si hɛ dunia
lɛ, ari kialin si hɛ lɛlɛɛ-jaŋ, ari kialin
kala si sage mugi-balin nyun, ari
kuŋ-na kala si hɛ dime di baa bul
wiaa. Ba si,

“Nii-la si hon kuori-kpasa-la nyun
ari Pie-bie-la,

ba nɛ wuo chuoleba a piba yirin
a denneba.

Ba nɛ maga di ba keŋ dolun kuŋ-
kala lɛ a kaa mu wuu.”

¹⁴ Nii nɛ kialin banɛsɛ-la si weye bul
di Ami. Nii nɛ nihiasi-la tuu kpirimi
a chuole Wia.

6

*Pie-bie-la keŋ kialin ba si kaa
magilɛ suri*

¹ Nii nɛ mi na di Pie-bie-la suri
kialin ba fa sii kaa magilɛ teŋ-la
donjo. Nla nɛ mi nii kialin si weye
banɛsɛ-la donjo duu bul wiaa. U
yiikoro nage duonun sii kpia nɛ. U
yiremi a bul di mi ko. ² Nii nɛ mi
bee na ja-pula di nuu hon u nyun a
kori ton. Ba jon kuori-nyun-chuulo
pu. U lii a yuo laalin dii lee-na kala.

³ Nii nɛ Pie-bie-la bira keŋ kialin
ba si kaa magilɛ teŋ-la ku-liamin kaa
suri. Nii nɛ mi bira nii di kialin
banɛsɛ-la si weye liamin tiina bira
yiremi a bul di mi ko. ⁴ Nii nɛ mi bee
a na jaaba donjo di u ku lii. Joo-la ŋaa
ja-fian nɛ a faasa fiɛsɛ, ka nuu hon u
nyun. Nii nɛ ba pi tiina wonbiin duu
keŋ yuosun kaa ko dunia, di niaa
yuyuo donjo a kpukpu donjo. Ba jon
tokobii-bal nɛ a hɛ u nisiŋ lɛ.

⁵ Pie-bie-la bira keŋ kialin ba si
kaa magilɛ teŋ-la ku-torimun kaa
suri. Nii nɛ kialin si weye, tori
tiina yiremi a bul di mi ko. Nii nɛ
mi na ja-bine di nuu hon u nyun
a kori saniya u nisiŋ lɛ. ⁶ Nii nɛ
mi nii yiikoro si nage nuu yiikoro.
Yiikori-la lii kialin banɛsɛ-la si weye
tutuobaanin nɛ. Nii nɛ tiina bul, “Ba
jan yalle folimiaa gbaŋa kubala, a yi
che-bala tintinna si yie laa u time
mage nii, ka di miaa gbaŋsiŋ batori
ma yi che-bala tintinna time. Ama
nuun ari siniŋ, ba-na wii tuo.”

⁷ Nii nɛ Pie-bie-la bira keŋ kialin
ba si kaa magilɛ teŋ-la nesemin kaa
suri. Nii nɛ kialin banɛsɛ-la si weye
nesemin tiina yiremi a bul di mi
ko. ⁸ Nii nɛ mi beŋ a na jaaba di
nuu hon u nyun. Joo-la nagingin lii.
Nii-la si jila yirin nɛ suun, ka lɛlɛɛ-
jaŋ tuto u hariŋ. Nii nɛ Wia piba
dolun di ba kpu nuhuobiinee kala
si hɛ dunia sesi-la banɛsɛ donjo. Ba
jan keŋ tokobii-la a kpu donsun, di
losun ma kpu donsun. Nyanyalaa
ari бага kiaa ma kpu donsun.

⁹ Pie-bie-la si keŋ kialin ba si kaa magile teŋ-nŋ-la kaa suri, ŋii ne mi bee na nialin ba si kpua diŋsin di ba he Wia-dia koru-la bubuŋ, lee-la ba si yie nyige ku-suŋ-sin a pipi Wia. Nialin ba si kpua faa bul Wia wiaa ne a fa ŋaa la Tiina Kirisito siada tinŋaa maa, ŋii ne tii ba kpuba. ¹⁰ Nii ne ba ŋmoo niin vil vil aa bul, “La Tiina Wii-jaribako, ŋ ŋaa Tuŋ-pul Tiina ne a keŋ wutitii maa, bua bee le ne ŋ jaŋ dii nialin si kpula sariya a doŋise nialin si he dunia le a tin la wiaa?” ¹¹ Nii ne Wia jon geri-pula a pi ba kuŋ-kala aŋ bula piba di ba gbera a wiesi muapilii, see di ba kpu ba tintinni doŋsun ari ba naanbiiri-la doŋsun a mage ŋii u sii che.

¹² Pie-bie-la si keŋ kialin ba si kaa magile teŋ-du-la kaa suri, mi bee na di tinteen faasa zigili. Nii ne wii-pŋsun kala biri lim ari cheŋ-birimin, cheŋ-pula ma fiase a nage chalin. ¹³ Ka cheŋwulaa lii wia nyun a ku tuu tinteen, ari ta-faan pelin si yie ŋaa tutogo yuori ŋii. ¹⁴ Nii ne wia nyun kala lel a nage ba si yie keŋ boŋo chuoli ŋii. Peel-na kala ari lee-na kala liin si gollo chu, ba kala sii ba leree. ¹⁵ Nii ne dunia kuoroo, ari ni-balaa, ari laali-yuori-hiasin, ari nialin si keŋ kiasa, ari nialin si keŋ dolun, ari nuu-kala, yosun ari nialin kala si tii ba titia, ba kala fá juu faa bu-buŋsun ari peeli-pegisin le. ¹⁶ Nii ne ba yiyire pee-le ari busu-la a bul di ba tele toba le, di Pie-bie-la ari nii-la si hoŋ kuori-kpasa-la nyun siaa siba na. Baa fá Pie-bie-la si na baaniŋ ne. ¹⁷ Ba bul ŋii, bee wiaa tapulii-la Wia si jaŋ na baaniŋ dunia niaa nyun yie ne. Nuukala bi Wia sipaan wuo chin.

7

Iziral tinŋaa tuŋ nialin ba si magila

¹ Wiaa deenba kala harin, mi na Wia tindaaraa banese di ba chin tinteen langorunun banese-la le. Ba fa keŋ dunia langorunu-la banese

kala, di pelin sí lu dunia le. Tinteen ari mugi-balin ari tiisin kala bi jaŋ na pelin. ² Nii ne ka mi na Wia tindaara doŋo duu to wii-pŋsun le aa jil wia nyun, a kori ku-la Wia-la si weye si kaa magile u niaa. Nii ne u faasa yire Wia tindaara-la banese Wia fa si piba dolun di ba chei tinteen ari mugi-balin. ³ Nii ne u bula pi Wia tindaaraa banese-la a bul, “Ma sí tinteen koo mugi-balin koo tiisin chei, see di la magile la Tiina Wia tintinnaa ba tillin le.” ⁴ Nii ne ba dage nialin Wia si magile ba niin pimi. Ba ŋaa bui bui zolo ari mahin balia ari banese ne. Niaa deenba lii Iziral ni-yiriba tuŋ ne. ⁵ Niaa bui fii ari balia ne u magile Juda doho niaa tuŋ. Niaa bui fii ari balia ma lii Rubin doho niaa tuŋ. Niaa bui fii ari balia ma lii Gad doho niaa tuŋ. ⁶ Niaa bui fii ari balia ma lii Asa doho niaa tuŋ, Nafitali doho niaa tuŋ maa, niaa bui fii ari balia. Niaa bui fii ari balia ma lii Manaasi doho niaa tuŋ. ⁷ Niaa bui fii ari balia ma lii Simian doho niaa tuŋ. Niaa bui fii ari balia ma lii Liivai doho niaa tuŋ. Niaa bui fii ari balia ma lii Izakai doho niaa tuŋ. ⁸ Niaa bui fii ari balia ma lii Zebulun doho niaa tuŋ. Niaa bui fii ari balia ma lii Josef doho niaa tuŋ. U magile niaa bui fii ari balia ma Benjamin doho niaa tuŋ.

Ni-dan-la si denne Wia

⁹ U ŋii harin ne mi beŋ a na ni-dan-dan, nuu bi ba wuo diise. Ba lii dunia seme-na kala a lii tintee-yiriba, ari ni-yiriba, ari ta-yiriba, aa bul yikori-yiriba. Mi na di ba chin kuori-kpasa-la ari Pie-bie-la sipaan a laale geri-puldudosun, a kori abee pipaarin ba nisin le. ¹⁰ Ni-dan-la faasa ŋaa goŋ aa bul, “La Tiina Wia si hoŋ kuori-kpasa-la nyun ari Pie-bie-la, ba ne keŋ dolun di ba wuo laala ta.” ¹¹ Ka Wia tindaaraa kala china golli kuori-kpasa-la ari nihiasi-la ari kialin banese-la si weye. Nii ne Wia

tinɗaara-la tuu kpirimi kuori-kpasa-la sipaanɗa chuɔle Wia ¹² a bul, “Ami. La jan chuɔle la Tiina Wia a dennu aa lolu, bee wiaa u ne kenɗa dolun ari wu-jiminɗa a kaa mu wuu. Ami.”

¹³ Nii ne nihiasi-la donɗo piesemi a bul, “Kubeeba ne laale geri-pulduduusunɗa nii, nii ne ba lii?” ¹⁴ Nii ne mi bula pu a bul, “N ne jima, mi kuhianɗa.” Nii ne u bula pimi a bul, “Niaa deenɗa ne Wia liise hee-bal-la tuɗa. Ba chese ba genninɗa Pie-bie-la chalinɗa le, ba lii a pulle. ¹⁵ Nii ne tii ba chinɗa Wia kuori-kpasa-la sipaanɗa a tima pupu wiiheye ari titanɗa kala Wia-dia le. Nii-la si honɗa kuori-kpasa-la le ne jan kiese toba le. ¹⁶ Losunɗa bira bi jan kenɗa, lii-nyuasunɗa ma bi jan kenɗa, wii-pɔsunɗa bi jan kpuba, wulinɗa ma bi jan kenɗa. ¹⁷ Wii-kala bi jan naaba, bee wiaa Pie-bie-la si chinɗa Wia kuori-kpasa-la sipaanɗa ne jan bibenɗa ba nyunɗa, ari pie-daara si yie benɗa u piesee nyunɗa nii. U ne jan kenɗa kaa mu lii-bulo leriɗa, lii-la sii pi niaa miisinɗa. Wia ma jan fiise ba sii-liirinɗa ta.”

8

Pie-bie-la kenɗa ten-kaaninɗa suri

¹ Nii ne Pie-bie-la suri kialinɗa ba si kaa magile ten-la balipe-la ku-kaaninɗa. U si suro dere, Wia-jan kala naa fuu a yi magina kubala. ² Nii ne anɗa ka mi na Wia tinɗaaraa balipe-la si yie chinɗa Wia sipaanɗa. Ba piba nyillinɗa balipe. ³ Wia tinɗaara donɗo ma ku chinɗa koru-la seme a kori selime gbanɗa-la ba si yie jonɗa ku-suo-sinɗa he, a nyiga pi Wia. Nii ne ba pu ku-suo-zonɗo yuge, duu kaa guoli Wia niaa Wii-chuɔlunɗa le a nyige a pi Wia. U jan nyigu selime koru-la nyunɗa, ku-la si chinɗa kuori-kpasa-la sipaanɗa. ⁴ Nii ne ku-suo-si-la nyuɔsunɗa ari Wia niaa Wii-chuɔlunɗa lii Wia tinɗaara-la nisinɗa le a mu Wia teenɗa. ⁵ Nii ne Wia tinɗaari-la jonɗa selime gbanɗa-la a chaane nyininɗa korunɗa nyunɗa, a he gbanɗa-la tuɗa, a jonɗo yuo u ku tuu tinɗeenɗa. Nii ne

duonunɗa kpikpia gonɗa anɗa liligise, ka tinɗeenɗa zizigili.

Wia tinɗaara-la nmuu nyillinɗa

⁶ Nii ne Wia tinɗaaraa balipe-la si kenɗa nyillinɗa balipe-la naa siri di ba nmuu.

⁷ Wia tinɗaari-la bunɗunɗa kua nmuu u nyile. Nii ne duonɗa-tabiaa ari nyininɗa guoli chalinɗa le ku tuu tel tinɗeenɗa. Ba si tele nii, tinɗeenɗa ari tiisinɗa ari yanɗa sen-tori-la kubala dii nyininɗa.

⁸ Nii ne Wia tinɗaari-la liaminɗa tiina ma nmuu u nyile. U si naa nii, ba jonɗa kunɗa a nage peel-balinɗa sii dii nyininɗa a yuo ta u tuu mugibalinɗa tuɗa. ⁹ U si ku tuu nii, mugibalinɗa sen-tori-la kubala fiise a nage chalinɗa. Kialinɗa kala si kenɗa miisinɗa a he lii-la sen-tori-la kubala tuɗa suu. Liinɗa daborusu-la si he lee-la ma chei.

¹⁰ Nii ne Wia tinɗaari-tori-la ma nmuu u nyile. U si nmuu nii, chenɗwul-bal kubala lii wia nyunɗa, a chaane a nage nyinɗa-daanɗa, a ku tuu tel fuonunɗa ari lii-bullunɗa sen-tori-la kubala le. ¹¹ Chenɗwul-la yirinɗa ne kuhaanɗa. U si heye nii, lii-la tuɗa u si tele ma he. Lii-la si heye nii, ni-danɗa la si nyua lii-haa-la, ba suu.

¹² Nii ne Wia tinɗaari-nese-la ma nmuu u nyile. U si nmuu nii, wii-pɔsunɗa sen-tori-la kubala cheye, chene ma sen-tori-la kubala chei, chenɗwulaa sen-tori-la kubala ma chei. Ba pulumunɗa kala lel leriɗa kala biri. Lee-la pulunɗa tuo wiiheye ari titanɗa kala.

¹³ Nii ne mi benɗa a na kachuunɗa duu fil di-bolii wia nyunɗa le aa nmoo niin vil vil. U sii fil nii, u yel a bul, “Nialinɗa si he tinɗeenɗa le, ba jan na heenɗa. Bua-la le Wia tinɗaari-kaana-la batori si jan nmuu ba nyillinɗa, nialinɗa jan na hee-la.”

9

¹ Nii ne Wia tinɗaari-nonɗa-la ma nmuu u nyile. U si nmuu nii, mi na chenɗwulunɗa duu lii wia nyunɗa a ku tuu tel tinɗeenɗa. Ba jonɗa buɗtuolunɗa boribiinɗa pu. ² Nii ne u suri

buotuo-lunji-la boro. U si suro dere, nyuɔsun lii buotuo-lunji-la tuɔŋ a nage nyin-balin nyuɔsun, a to pulumun ari wii-pɔsun kala ba biri. ³ Nii ne hɔbɔsun to nyuɔsu-la tuɔŋ ku lii a tuu tinteen. Wia piba dolun dunia le ba wuo len niaa na heen, a nage nuɔmaa si yie din niaa ba nina heen nii. ⁴ Wia biba wonbiin pa di ba dii yan koo tiisin koo kialin si nyu tinteen le. Ama u piba wonbiin di ba dogise nii-la kala Wia magilin si tuo u tile le. ⁵ Wia bi hɔbɔsu-la wonbiin pa di ba kpu niaa deenba, ama di ba dogiseba cheŋsin banɔŋ. Nii ne u dogiseba a nage nuɔmun si yie din niaa u wiwii nii. ⁶ Bua-la le niaa jan chiche di ba suu, ama ba bi wuo suu.

⁷ Hɔbɔsu-la fa nage janin ne ba si kpiera di ba kaa mu laalin. Ba chu kiaa si nage selime nyun-chuulun ne. Ba siaa ma nage nuhobiinee siaa. ⁸ Ba keŋ nyu-punaa ma ne. Ba duomo a nage haala nyu-punaa. Ba nyilaa ma nage naachigee nyilaa ne. ⁹ Ba yaraa horun nage hɔŋ ba si yie jonŋo to boye a kaa yuo laalin. Ba kinkeŋ ma njaa gon, ari janin si yuga aa lere torukoba a fá mumu laalin. ¹⁰ Ba bubuɔ-dosun nage nuɔmun fila. Dol-la kala ba fa si kene di ba kaa dogise niaa cheŋsin banɔŋ-la kala fa he ba bubuɔ-dosula le ne. ¹¹ Wia tinɔdaari-la fa si kori buotuo-lunji-la boribiin ne fa naa ba kuoro. Juu tinɔnaa yiikoro le baa yiru Abadɔŋ ne. Giriik tinɔnaa ma yiikoro le baa yiru Apoliyɔŋ ne.

¹² Bunbun hee-la ba si jan na ne nii. Ama kiaa balia ne ha ka.

¹³ Nii ne Wia tinɔdaari-du-la nmuu u nyile. U si nmuu nii, mi nii nuu yiikoro duu lii koru-la si chin Wia sipaan semɛ. ¹⁴ Nii ne yiikori-la bula pi Wia tinɔdaari-du-la si kori nyile-la a bul, "Len di ba puri Wia tinɔdaaraa banese-la ba si vɔbɔ Yufiretis fuo-la le a ta." Wia fa vɔbɔ a bil a gberɛ tapulii-la ari chene-la ari jina-la u fa sii che u kpu dunia niaa. ¹⁵ Nii ne ba puriba ta di ba kpu dunia niaa sesi-la batori dɔŋɔ. ¹⁶ Nii ne ba

dagemi nalin si jil janin niin pimi. Ba fa yi bui bui buiba zɔ-balia. Ba kala fa jil janin ne a naa siri di baa mu yuo laalin. ¹⁷ Mi si naba ari duosoo tuɔŋ, nla ne ba nage: Nalin si jil jani-la laale hɔɔ-horun ba si yie jonŋo to boisin a kaa yuo laalin ne. Kialin dɔŋsun nage diiwolinbine yaraa, dɔŋsun fiɛɛ a nage nyinin, dɔŋsun ma nage jiribiin. Jani-la nyusun nage naachigee nyusun ne. Nii ne nyinin ari nyuɔsun ari jiribiin lilii ba niirin le. ¹⁸ Kiaa deenba batori ne Wia len di ba ku kpu dunia niaa tuɔŋ sesi-la batori dɔŋɔ. Nyinin ari nyuɔsun ari jiribiin ne nii. ¹⁹ Jani-la dolun kala fa he ba niirin ari ba bubuɔ-dosun le ne. Ba bubuɔ-dosu-la nage dinnaa ne a keŋ nyusun. Kiaa deenba ne ba kaa pire niaa.

²⁰ Dunia ni-kaana-la nyanyal-bɔŋɔɔ deenba si bi kpua, ba ma ha bi birima lii ba haache wu-ŋaalaa le. Ba haa to Sitaani ne a kpikpaare vuiaa. Selime ari hɔŋ ari kolii ne ba kaa me vuia-la dɔŋsun, dɔŋsun ma naa tabiaa, dɔŋsun ma naa tiisin ne. Vuia-la bi wuo na, ba bi wiaa ma nii, ba bira bi wuo viven maa. ²¹ Niaa deenba faa kpu niaa ne. Ba faa naa hil wiaa, aa naa wu-liilin, an gigaa maa, an bi sei di ba birima lii wu-bɔŋɔɔ deenba le.

10

Wia tinɔdaari-la si kori ten-chuolie-la

¹ Nii ne ka mi bira na Wia tinɔdaari-duo kubala duu lii Wia-jan a ku tuu. Duonbilinbaanaa tɔu kala, ka duonsia vɔɔ u nyun le. U siaa tutul a nage wii-pɔsun. U naasin ma nage tii-balaa sii dii nyinin. ² Ka u kori ten-chuolie-bie u nisin le. Ba kaa polli. Nii ne u jon u na-diin naan a dan mugi-balin nyun, a jon u na-gua naan maa a bil tinteen. ³ Nii ne u faasa kpia gon bogi bogi a nage naachigin sii naa gon nii. U si kpia gon nii, duonun kpia. Duonun si kpia nii, ba fa naa kiaa balipe

a kpikpia goŋ. ⁴ Bua-la ɛ duonun si kpia, mi faa che di mi ŋmunse wialin bil. Nii ne nuu yiikoro lii wia nyun a bula pimi a bul, "Len di wialin duonun si kpia bul, di ba he ŋ tuon. Si ŋmunsa bil." ⁵ Nii ne ka mi na Wia tinɗaari-la, nii-la naan dono si chin mug-balin nyun, ka dono ma chin tinɗee-hilin, duu ken u na-diin nisin kaa yia wia nyun. ⁶ Nii ne u ŋmieɛ Wia, u-na nii-la si he dime a kaa mu wuu, nii-la si ta wia nyun ari kialin kala si he wia nyun, ari tinɗeen ari kialin kala si he dime, ari mug-balin, ari kialin kala si he u tuon. U ŋmieɛ a bul, "Bua-la ɛ la sii jegilu, u yie ne." ⁷ Ama tapulii-la Wia tinɗaari-pe-la si jan ku ŋmuu u nyile, Wia wu-faalia-la u fa si dage u tinɗinnaa, nialin sii bul wiaa, Wia Din-zon-la dolun ɛ, ba kala jan ŋaa.

⁸ Nii ne mi bira nii yiikori-la titia si lii wia nyun a bul wiaa pimi. U si, "Mu a laa ten-bie-la ba si suro, Wia tinɗaari-la nisin ɛ, nii-la naan dono si chin mug-balin nyun, ka dono ma chin tinɗeen ɛ." ⁹ Nii ne mi mu Wia tinɗaari-la teen a sulu duu jon ten-bie-la pimi. Nii ne u jon ten-bie-la pimi an bula pimi di mi joŋo chan, di u jan sin mi niin ɛ a nage tuun, ama mi luorun ɛ u jan hei. ¹⁰ Nii ne mi laa ten-bie-la Wia tinɗaari-la nisin ɛ a joŋo chan. U sima a nage tuun ne mi niin ɛ, ama u si tuu mi luorun, mi luorun kala heye ne. ¹¹ Nii ne ba bula pimi a bul, "N jan bira bul wiaa, Wia Din-zon-la dolun ɛ a tige tayiriba ɛ, ari tinɗee-yiriba, ari nialin sii bul yiikori-yiriba, ari kuori-yiriba yuge ma ɛ."

11

Wia siada tinɗaa balia-la

¹ Nii ne ba jon daa-magisin a nage daantiga a pimi, an bula pimi di mi sii a magise Wia-dia ari koru-la si he u tuon, an diise nialin kala sii chuole Wia dime, ² ama di mi si Wia-dia-la kaala-na magisu, bee wiaa ba jon lee-la pi nialin si bi juu tinɗaa ŋaa,

di ba ŋmoo u jebii-la lo, a nuose Wia lee-la cheŋsin mahin balia ari balia. ³ Nii ne ka Wia si u jan pi u siada tinɗaa balia-la dolun di ba wuo bul wiaa u Din-zon-la dolun ɛ, tapulaa bui ari zo-balia ari mahin batori, an baage tuo-cheri geri-bosunun.

⁴ Niaa deenba balia nage tia-la ba sii yire Oliv ne. Ba ne bira nage korunun ba si yie jon chaanaa a didan balia-la si chin la Tiina Wia sipaan, nii-la si tii tinɗeen. ⁵ Nyinin jan lii ba niin a dii nuu-kala sii che duu dogiseba. Di nuu-kala nii che duu walimeba, nyinin jan diu. ⁶ Wia piba dolun di ba wuo kiri duonun, duu si nii tapulia-la ba sii che di ba bul wiaa, Wia Din-zon-la dolun ɛ. Wia bira piba dolun di ba wuo ŋaa di liin kala birime chalin. Ba jan wuo len di nyanyalaa juu dunia niaa ɛ, mage nii kala ɛ ba si cho. ⁷ Di ba ne dii Wia dansia dere, bage kun jan lii buotuo-lunji-la tuon ku lii. Ku-la jan yuo kpuba. ⁸ Ba ku-suunun jan pin ta-bal-la wonbiin ɛ. Ta-bal-la bomo nage Sodom koo Ijipiti tinɗeen ne. Ta-bal-la ɛ ne ba kpaase la Tiina daa-geseɛ nyun. ⁹ Nyiriba a lii ta-yiriba, ari nialin sii bul yiikori-yiriba a lii tinɗee-yiriba kala jan ben ba ku-suunun tapulaa batori ari lebi. Ba bi jan sei di ba paaba hugi. ¹⁰ Dunia niaa, tuon jan tore ari ba si kpu niaa balia-la. Ba jan gbigbieli a sisieri dono ɛ a didii zile dono ɛ, bee wiaa wialin niaa deenba balia fa sii bul, Wia Din-zon-la dolun ɛ, ba fa ken dunia niaa banja ɛ ne. ¹¹ Ama tapulaa batori ari lebi cheɛn Wia pi niaa deenba balia miisin, ba sii chin ba naasin ɛ. Nialin kala si naba, fawullun kenba worun. ¹² Nii ne ba nii nuu yiikoro duu lii Wia-jan a bula pi niaa balia-la a bul, "Ma ku jil daha." U si bul nii dere, ba juu duonbilingbaanin tuon a jil Wia-jan. Ba dindonon bibenba, ka ba jijil. ¹³ Bua-la titia ɛ tinɗeen faasa zigili. Tan-la seme dono kala tel, ba niaa bui balipe suu. Leree

fii fii sesi-la kubala ne nii. Fawullun ken ni-kaanaa, ba denne Wia, nii-la si he Wia-jaŃ le.

¹⁴ Hee-lia-la diderij ne nii, ama torimun jaŃ ko leele.

Wia tinđari-pe-la nmuu u nyile

¹⁵ Nii ne Wia tinđari-pe-la nmuu u nyile. U si nmuu nii, mi nii yikori-balaa di baa bul wiaa, Wia-jaŃ le. Ba si, "Dunia kuorii-la leele Ńaa la Tiina Wia ari Kirisito kuorii-la ne. La Tiina Wia jaŃ dii kuorun a kaa mu wuu." ¹⁶ Nii ne nihiasij mara ari banese-la si hoŃ ba kuorikpasinnij nyun Wia sipaan, ba kala tuu kpirimi a chuole Wia a bul,

¹⁷ "Laa lollun la Tiina Wia, Wii-jaŃ bako,

nii-la fa si he dime faafaa ari nii-la ha si he dime.

Leele-na Ń joŃ Ń dol-bal-la,

a suomi a biben dunia ne.

¹⁸ Dunia niaa fa hoso ne Ń nyun.

Ama bua-la Ń baanij si jaŃ sii ba nyun yie ne,

ka bua-la titia Ń si jaŃ dii nialin si suba sariya ma yie ne,

bua-la le Ń si jaŃ joŃ time a tin Ń tininnaa ma yie ne.

Nialin sii bul wiaa, Ń DiŃ-zoŃ-la dolun le, ari Ń niaa kala,

nialin sii fá Ń yirin, nihiasij ari hanbiisin kala,

Ń jaŃ time piba.

Leele Ń jaŃ dogise nialin si chei dunia, di ba mu suu."

¹⁹ Nii ne ba ken Wia-dia-la si he Wia-jaŃ, boro kaa suri a na dagá kubala u tuoŃ. Wialin Moosis fa si nmunsa bil di Iziral tinŃaa tuto, ba he daga deen tuoŃ ne. Nii ne duonun liligise lerin kala, ba ninii yikorusun, ka duonun kpikpia nmana nmana. TinŃeen zigili, ka duon-tabiaa faasa tuu titel.

12

Dimin ari haala yuo doŃo

¹ Nii ne ku-kpunkpere kubala ku lii wia nyun. Ku-kpunkpere-la nage haal ne a joŃ wii-posun a laale,

ari niaa sii laale gennin nii. Ka chene ma he u naasin bubuoŃ, aŃ ka u chu kuori-nyun-chuulo. Nyun-chuulo-la, chenwulaa fii ari balia ne ba kaa Ńaa. ² Haal-la fa ken luorun ne. U luorun wiwii, u faasa yiyel a wiwalime duu lul. ³ Nii ne ku-kpunkpere doŃo ma ku lii wia nyun. Ku-kpunkpere deen fa nage dimin si yuga kieli ne a kala fiene ari chalin. DiŃ-la fa ken nyusun balipe ne ari nyillin fii, a chu nyun-chuulun balipe. ⁴ U bubuo-doho yigi chenwulaa sesi-la batori doŃo lo ba ku tuu tel tinŃeen. AŃ ka diŃ-la mu chin haal-la fa sii walime duu lul sipaan a gberɛ, di haal-la ne lula, duu joŃ bile lin. ⁵ Nii ne haal-la lul hanbolibie, nii-la si jaŃ ben dunia niaa kala ari kpaasa. Nii ne Wia joŃ bile kaa mu u teen a len u hoŃ u kuori-kpasa nyun, ⁶ aŃ ka haal-la fá juu girin, lee-la Wia si wasa bilu le. U si he dime nii, Wia pu kudiilee tapulaa bui ari zo-balia ari mahin batori.

⁷ Bua deen le laalin sii Wia-jaŃ le. Wia tinđari-hian baa yire Maakil ari tinđaraa doŃsun suomi a yuyuo diŃ-la. Nii ne diŃ-la ari u haritooro maa yuo. ⁸ Ama Maakil niaa yuo dii diŃ-la ari u haritooro. Nii ne diŃ-la ari u haritooro bira bi di-honun kala kene Wia-jaŃ le. ⁹ Nii ne ba joŃ diŃ-la ari u haritooro a yuo ta ba lii Wia-jaŃ a ku tuu tinŃeen. U ne baa yire Sitaani, nii-la sii nyise dunia niaa kala. DiŃ-la fa he dime faafaa kala ne a lii dunia di-suomun.

¹⁰ Nii ne ka mi nii yikori-bal kubala a lii Wia-jaŃ a bul, "Bua-la Wia si jaŃ laa niaa ta yie ne. Bua deen le ne Wia laa u dolun ari u kuorun. Kirisito, nii-la Wia si liisa, ma laa u dolun ne, beɛ wiaa nii-la si joŃ cheerin pi la naanbiirin, ba joŃu yuo ta ne. U fa joŃ cheerin piba Wia sipaan wiiheye ari titanin kala.

¹¹ Ba yuo dii Sitaani a tin Pie-bie-la chalin wiaa, ari Wia ninij wialin ba fa si bula pipi niaa. Ba fa Ńaa siri di ba kpuba a tin Wia wialin le ne.

12 Ma nialin si he Wia-jaŋ, má len di ma tuŋ tŋre. Ama ma nialin si he tinteen le ari nialin si he mugi-balin le, ma jaŋ na heeŋ. Sitaani ku tuu ma teen ne a faasa keŋ baaniŋ, bee wiaa u jima ari u bira bi dieni, ka di ba laa u dolun.”

13 Diŋ-la si na di ba jonu yuo ta, u ku tuu tinteen, nii ne u kire to haal-la si lul hanbolibie-la hariŋ.

14 Nii ne Wia jon kachuun kinkeŋ pi haal-la, duu wuo fil a juu girin tuŋ a kage diŋ-la le. Nii ne u mu lee-la Wia si wasa bilu le. Dime ne, u jon kudiilee pu jisin batori ari lebi.

15 Nii ne liin lii diŋ-la niin le a nage fuon, a kire to haal-la hariŋ duu pelle jonu. 16 Ama tintee-hilin ku pe haal-la le a jon fuo-la si lii diŋ-la niin le kala a nyua. 17 Nii ne diŋ-la na baaniŋ haal-la nyun a mu duu keŋ haal-la biirin dŋsun a yuo laalin. Haal-la biirin ne ŋaa nialin si nii Wia niin wiaa a tutoba, a didii Yesu danŋsia, a bul u wiaa a pipi niaa. Nii ne diŋ-la mu chin mugi-balin niin.

13

Ku-la si nage diŋ-la ari бага kua

1 Nii ne mi na бага kua dŋŋ duu lii mugi-balin tuŋ a ku lii. U fa keŋ nyusun balipe ne, u nyillin ma fa ŋaa fii. U fa chu kuori-nyun-chuulun fii u nyillin fii-la le. Yiri-la u fa si kene u nyusu-la le faa tuuse Wia jonŋoo ne. 2 Baga ku-la mi si na fa nage kpeye ne, aŋ ka u naasiŋ nage lugumun kiaa, u niin ma nage naachiŋ kua. Nii ne ku-la si nage diŋ-la jon u dolun kala ari u kuori-kpasa-la a pi бага ku-la. 3 Baga ku-la nyusun balipe-la dŋŋ fa keŋ naawiil-bal ne si maga duu suu, ka u bi suba. Ba si na naawiil-la duu fiela, u ŋaa dunia niaa kala wu-kpunkpere. Nii ne ba sii to u hariŋ. 4 Nii ne niaa tuu kpirimi diŋ-la sipaan a chuolu, bee wiaa u fa jon u dolun a pi бага ku-la ne. Niaa bira chuole бага ku-la. Nla ne ba piŋe dŋŋ a mu tige u le, “Kubee ne keŋ

dolun a nage ŋla? Kubee ne jaŋ wuo kenu yuo yuosun?”

5 Nii ne ba pi бага ku-la wonbiin u bul babii-bal wiaa a tutuuse Wia jonŋoo. Nii ne ba lenu u dii dolun cheŋsin mahin balia ari balia.

6 U yie tutuuse Wia ari u jaŋ-niaa jonŋoo. 7 Nii ne ba puu wonbiin ma u keŋ Wia niaa a yuo laalin,

a yuo diiba. Ba fa puu dolun u wuo ni-yiriba a lii ta-yiriba kala, ari nialin sii bul yiikori-yiriba a lii tintee-yiriba kala. 8 Nii-la kala si tuo miisin ten-la le a lii dunia di-

suomun, u ma jaŋ tuu kpirimi u sipaan a chuolu. Pie-bie-la ba si kpua ne tii ten-la. 9 Digilaa tinŋaa,

má wuoli ma digilaa a jegile nii wiin deen. 10 Di ba ne yuo laalin dii nuu a kenu kaa mu yosun lerin, u maga

duu mu ŋaa yon ne. Di ba ne jon tokobii a kpu nuu, ba jaŋ sene jon tokobii a kpu tiina maa. Nialin si laa

Wia wiaa dii maga di ba nyalime ne a chin wialin ba si laa dii le.

11 Nii ne mi bira na бага kua dŋŋ duu lii tinteen a kuu lii. U fa nage piŋe ne aŋ keŋ nyillin balia. Uu bul wiaa a nage ku-la si nage diŋ-la ne.

12 U ma keŋ dol-la bunbun бага ku-la si kene ne a wuo didii dolun u sipaan. U len dunia niaa kala tuu kpirimi a chuole bunbun бага ku-

la, ku-la fa si keŋ naawiil-bal-la, ka u fiela. 13 U ŋaa wu-magilaa a yuge. U paala len nyinin lii wia nyun ku tuu tinteen, nuu-kala na. 14 A tin wu-

magila-la ba si lenu u ŋaa bunbun бага ku-la sipaan, бага ku-la dŋŋ nyise dunia niaa a he, di ba jon kiaa me, kuŋ si nage bunbun бага ku-la,

ku-la ba si keŋ tokobiin keri, ka u wei. 15 Nii ne ba wuo len бага ku-liala pi ku-la ba si me wiese duu wuo

wiaa bubul. Nii ne u wuo len ba kpu nialin si bi бага ku-la ba si me ka chuole, 16 a bira len ba magile nuu-

kala, nihiasin ari hanbiisin, kuoroo ari summoo, nii-la kala si tii u titia ari nii-la kala si ŋaa yon. Ba magile ba na-diin nisaa le koo ba tillin le. 17 Nuukala bi kuŋ wuo yŋŋ a bi kuŋ-

kala ma wuo yalle, see di ba jon бага ku-la magilin, koo u yirin, koo u yiri-la si mage nii a he u tiina le. ¹⁸ Nuu-kala bi jan wuo jin wiin deen bubuon, see duu ken wu-jimin. Má len di nii-la si ken wu-jimin liisi a mu yi бага kun niin si mage nii. Di n diiseba, u nage nuhuobiine kialin ne. U kiasa niin naa zo-balidu ari mahin batori ari balidu ne.

14

Nialin sii yi yiili-falin

¹ Nii ne mi ben a na Pie-bie-la duu chin peel kubala nyun. Peel-la yirin ne Zaayon. Ba di niasa buiba zolo ari mahin balia ari banese ne fa chin peel-la nyun. Ba nmunse Pie-bie-la yirin ari u Nyimma yirin ne a he niasa deenba tillin le. ² Nii ne ka mi nii nuu yikoro duu lii Wia-jan. Yikori-la fa nage fuonun sii pelli ne gbul gbul, koo duonun sii kpia. Yikori-la mi si nia ma fa naga ari niasa sii duu chen ne. ³ Niasa deenba chin kuori-kpasa-la ari nihiasi-la, ari kialin banese-la si weye sipaan ne aa yii yiili-falii kubala. Nuu-kala bi yiilla wuo gunne, see nialin bui buiba zolo ari mahin balia ari banese-la dunduja. Niasa deenba ne Wia tuose dunia le a laaba ta. ⁴ Ba ne bi ha-chorumun harij to, an bi disinnin ma kene. Ba ni to Pie-bie-la harij lee-na kala u sii mu. Ba ne Wia laa sipaan liise nuhuobiinee tuon, di ba naa Wia ari Pie-bie-la tuo-pul tinjaa ⁵ a bi wiaa ka nya.

Wia tinjaaraa batori bul wiaa

⁶ Nii ne mi bira na Wia tinjaara dono duu fil wia nyun di-bolii. U fa kori Wia Wu-zomola ne, Wu-zomola si jan he dime a kaa mu wuu. U kaa mu bula pi nuu-kala si he dunia le tintee kala le, ari tan kala le, ari nialin sii bul yikori-yiriba kala, ari ni-yiriba kala le. ⁷ Nii ne Wia tinjaari-la bul ari yikori-balin a bul, "Má fá Wia a denne u yiri-balin, bee wiaa bua-la u si jan dii dunia niasa sariya yie ne. Má dennu,

u ne ta wia nyun ari tinteen ari mugi-balin ari lii-bulun kala."

⁸ Ka Wia tinjaari-lia-la ma tuto a bul, "Babilon tele, Babilon tele, tabal-la ba sii yire Babilon, u tele. U ne jon u wu-bonono a dage tintee kala ba njaa wu-bonono. Wu-bomola nage sinin si ken huon ne."

⁹ Nii ne Wia tinjaari-tori-la ma tuto ba harij, a ma bul wiaa ari yikori-balin. U si, "Di nuu-kala ne chule бага ku-la ari u nagisi-la ba si me bil, a laa magil-la u tile le koo u nisaa le, ¹⁰ Wia jan na baanin kinken u tiina nyun. Wia baanin nage sin-la si ken huon ne. Di niasa ne nyua, ba yie susuu ne. Ba jan jon nyinin ari jiribin a dogise tiina. Ba jan naa nii Wia tinjaara-la si bi disinnin kene ari Pie-bie-la sipaan. ¹¹ Nyinin ari jiribin jan diiba deen deen, nyin-la bi jan ko duu disa. Niasa deenba bi jan ko di ba na wiese wihye ari titanin kala. Niasa deenba si chule бага ku-la ari u nagisi-la ba si me bil a laa u yirin magil-la, ba bi jan na wiese."

¹² Bua deen le ne Wia nialin sii to Wia niin a laa Yesu Kirisito wiaa dii, u maga di ba nyalime ne. ¹³ Ka mi nii yikoro kubala duu lii Wia-jan aa bul, "Nmunse wiin deen: Nialin si laa la Tiina Yesu wiaa dii an suu, Wia jan peba le." Nii ne Wia Din-zon-la ma bul, "Wia sene jan pe niasa deenba le di ba wuo na wiese worun. Ba bira bi jan tin, bee wiaa tintrimii-la ba si tima ka to ba harij ne."

Ba ken siikoro a kaa kun kiasa

¹⁴ Nii ne mi bira ben a na duonbinbaan-pula, di nuu nage nuhuobiine bie a hon duonbinbaan-la nyun. U tiina chu selime kuori-nyun-chuulo ne an kori siikoro si ken niin worun. ¹⁵ Nii ne Wia tinjaari-la dono ma lii Wia-dia tuon ku lii, a faasa yire ari yikori-balin nii-la si hon duonbinbaan-la nyun a bul, "Ken n siikoro-la a kaa kun kiasa. Bua-la si maga di la kun

kiaa yie ne. Kialin kala si he dunia le si maga di ba kun, ba kala bia ne.”

¹⁶ Nii ne nii-la si hon duonbilingbaan-la nyun ken u siikoro-la viisi tinteen a kun tinteen kun-kala.

¹⁷ Nii ne Wia tindaara donɔ ma lii Wia-dia si he Wia-jaŋ a ku lii, a ma kori siikoro. Siikoro-la ma ken niin ne worun. ¹⁸ Nii ne Wia tindaara donɔ ma lii Wia-dia koru-la seme a ku lii. U ne naa Wia tindaari-la si ken nyinin dolun. Nii ne u yire nii-la si kori siikoro-la a bul ari yiikori-balin, “Ken η siikoro-la a kaa keritia-la ba sii yire vain-la jagisin, bee wiaa u nene-la bia ne.” ¹⁹⁻²⁰ Nii ne Wia tindaari-la ken u siikoro-la kaa viisi tinteen a keritia vain jagisi-la kala. Nii ne ba paa ba kala kaa mu he bua-la ba si luo, aa chage tii-nene-la liin ba si kaa naa sinin. Ta-balla jeen harin ne ba chage tii-nene-la. Ba si chageba, lii-la kala lii a birime chalin, a tuu pipelle tinteen a nage fuon. Namaga deen dage nii Wia si na baanin tinteen niaa nyun. Nii ne chal-la pelle a mage meel-daasin zo-balia, an pe jila yi a mage nuhuobiine boye.

15

Wia tindaara-la kori nyanyal-bonɔɔ balipe

¹ Nii ne mi bira na ku-kpunkpere donɔ wia nyun. U kenmi fawullun. Mi na Wia tindaaraa balipe di ba kori nyanyal-bon-yiriba balipe. Di ba ne yuoba he tinteen le dere, Wia baanin jaŋ fiele.

² Nii ne mi na kun, u yuga a nage mugi-balin sii tul nii pal pal a chuchol nyinin. Ka nialin si yuo dii бага ku-la ari u nagisi-la ba si me bil, ari u yirin magilin, mi naba di ba chin mugi-bal-la sii tul pal pal seme a kori chennin Wia si jono piba. ³ Nii ne ba yiyii yiilaa. Yiil-la donɔ, Moosis Wia tintinni-la ne laa sipaan yii, ka yiil-la donɔ ba yiyii a didenne Pie-bie-la. Yiil-la ba si yii ne nla:

“La Tiina Wia Wii-jaribako, wu-kpunkpersin ari tintin-balaa ne η titin.

N ken wutitii ne aa naa wutitii-iba.

N ne jaŋ dii kuoron a kaa mu wuu.

⁴ La Tiina Wia, kubee ne bi jaŋ fan? Nu-kala jaŋ fan an didenne η yiri-balin.

N dunɔna ne ken tuo-pula.

Dunia niaa kala jaŋ ku chuɔlun, bee wiaa nu-kala na ari η dii dunia niaa sariya ari wutitii ne.”

⁵ Mi si nii yiila-la dere, mi na Wia-dia-la tutuɔbaanin ba sii yire lee-la si bi disinnin kene, di ba suro. ⁶ Nii ne Wia tindaaraa balipe-la si kori nyanyal-bonɔɔ balipe-la lii dime ku lii. Ba laale geri-yuoli-zonɔɔ sii tul ne, kun-kala tuo u le, a jon selime damerisin a voo ba boisin le. ⁷ Nii ne kialin banese-la si weye donɔ jon selime gbanjin balipe a pi Wia tindaaraa balipe-la. Wia baanin fa su selime gbanji-la ne. U ne jaŋ he dime a kaa mu wuu. ⁸ Nii ne nyuɔsun to Wia-dia-la kala. Wia tula ari u dolun ne naa nyuɔsu-la he dime nii. Nu-kala bi Wia-dia-la wuo juu, see Wia tindaaraa balipe-la si jon nyanyal-bonɔɔ balipe-la kala yuo he tinteen le a dere.

16

Gbanjin balipe-la si ken Wia baanin

¹ Nii ne mi nii nuu yiikoro duu lii Wia-dia-la tuon. U bula pi Wia tindaara-la balipe ari yiikori-balin a bul, “Ma ken gbanjin balipe-la si ken Wia baanin kaa mu bisa he dunia le.”

² Nii ne Wia tindaari-la bunɔɔn tiina jon u gbanja-la Wia baanin si he u tuon, a kaa mu bisa he dunia le. U si bisa he dere, nii ne naawil-bonɔɔ sii suora ken nialin kala si ken бага ku-la magilin, an pe chuole u nagisin ba si me a bil.

³ Nii ne Wia tindaari-liamin jon u gbanja ari Wia baanin a kaa mu bisa

he mugi-balinɛ ɛ. Nii ne mugi-bal-la birime a nage nuhuobiine si suba chalinɛ. U si nɛa nii, kialinɛ kala si kenɛ miisinɛ a he mugi-bal-la tuɔn suu.

⁴ Nii ne Wia tinɛdaari-tori-la ma kenɛ u gbaɛa kaa mu a bisa he fuo-biisinɛ ari fuo-buloo ɛ. Ba kala birime chalinɛ. ⁵ Nii ne Wia tinɛdaari-la si kenɛ liinɛ dolunɛ ma bul wiaa. U si, “La Tiina Wia, ɛ kiasa sima ne di ɛ dɔgise dunia niaa. N ne Tuɔ-pul Tiina, ɛ ne nii-la fa si he dime faafaa kala ari nii-la si he dime lɛɛɛ.

⁶ Dunia niaa kpu ɛ niaa ari nialinɛ fa sii bul wiaa, ɛ Din-zɔn-la dolunɛ ɛ. Ba si nɛa nii ne tii ɛ nɛa chalinɛ piba di ba nyua. U maga di ba nyua ne.”

⁷ Nii ne mi nii nuu yiikoro duu bul wiaa. Yiikori-la lii koru-la nyunɛ ba fa si yie kpu pusunɛ a nyige a pi Wia ne. U tiina si, “Wutitii, la Tiina Wia Wii-jaribako, ɛ kenɛ wutitii, wutitii wonɛbiinɛ ne ɛ to a didii niaa sariya nii.”

⁸ Nii ne Wia tinɛdaari-nese-la jonɛ u gbaɛa a bisa he wii-pɔsunɛ ɛ. Nii ne wia faasa pɔse a nage nyininɛ, a nyinyige niaa. ⁹ Wii-pɔsunɛ si faasa pɔse a nyige niaa nii, ba na baaninɛ Wia nyunɛ a tutuuse u jonɛnɔo, bɛɛ wiaa ba jima u ne kenɛ dolunɛ nyanyal-yiri deenɛba kala ɛ. Ama ba bi birima lii ba haacheba ɛ di ba chuɔɛ Wia.

¹⁰ Nii ne Wia tinɛdaari-nɔn-la jonɛ u gbaɛa a bisa u tuɔn kiasa a he бага ku-la ɛ, lee-la u fa sii dii kuorunɛ. Nii ne biriminɛ to lee-la kala, ka nialinɛ kala si he dime ma yaraa bibieri, ba didinɛ ba nenɛdelimee. ¹¹ A tinɛ ba yara-la sii wii, ari ba naawiila-la wiaa, ba tutuuse Wia jonɛnɔo, nii-la si he Wia-jaɛ. Ama ba bi birima lii ba haacheba ɛ di ba chuɔɛ Wia.

¹² Nii ne Wia tinɛdaari-du-la jonɛ u gbaɛa ari Wia baaninɛ a bisa he fuo-bal kubala baa yire Yufiretis ɛ. Nii ne fuo-la kala hu. Fuo-la si hua, kuoro-la si lii taɛ seme wuo na wonɛbiinɛ a to fuo-naa-la tuɔn a kukɔ. ¹³ Nii ne mi na jin-bɔnɛnɔo batori di ba nage yinɛnaa. Dɔnɔo lii dinɛ-la ɛ,

dɔnɔo ma lii бага ku-la ɛ, dɔnɔo ma lii nii-la si nyia wiaa duu bul wiaa, Wia Din-zɔn-la dolunɛ ɛ. Ba lii ba niirinɛ ɛ a ku lii. ¹⁴ Jin-bɔnɛnɔo deenɛba batori lii Sitaani ɛ ne a yie ninɛa wu-kpunkperisinɛ. Ba ne gɔlle dunia kuoro kala teenɛ, a kenɛba he dɔnɔo ɛ baa nɛa siri di ba yuo laalinɛ. Tapul-bal-la Wii-jaribako si liisa di wiaa deenɛba kala nɛa, ba jaɛ yuo laal-la. ¹⁵ (Má bee na, mi jaɛ ko ari gaara si yie ko nii. Wia jaɛ pe nii-la kala si bi dɔnɛ pina aɛ po ɛ, nii-la kala si laale u gerinɛ, di niaa si u yaribiree na.) ¹⁶ Nii ne Wia kenɛ dunia kuoro-la a kaa mu hilimi lee kubala di ba yuo laalinɛ. Hiiburu tinɛnaa yiikoro ɛ baa yire lee-la Amagedɔnɛ.

¹⁷ Nii ne Wia tinɛdaari-pe-la jonɛ u gbaɛa, a jonɛ u tuɔn kiasa bisa he pelinɛ ɛ. Nii ne yiikori-bal kubala lii lee-la kuori-kpasa-la si china Wia-dia-la tuɔn a bul, “Wialinɛ diderinɛ yie ne.” ¹⁸ Nii ne duonunɛ liligise a kpikpia. Lerinɛ kala ninɛa gonɛ, ka tinɛteenɛ ma faasa zigili. Dunia si suomo, u ha bi nii zigile aɛ ka. ¹⁹ Tinɛteenɛ si zigili nii, u kenɛ ta-bal-la kaa kpaaleree batori, ka tinɛtee kala ta-balaa ma titel. Nii ne Wia liise mu yi Babilɔnɛ ɛ. U dɔgisu ne worunɛ a mu yi nii u si na baaninɛ u nyunɛ ɛ. ²⁰ Nii ne tinɛteye-la liinɛ fa si gollo chu, ba kala lel. Peelee ma kala lel. ²¹ Ka duonɛ-tabii-balaa si faasa yunɛ kinɛkenɛ a nage nɔmunɛ-tabiaa, ba lii wia nyunɛ ku tuu tel niaa nyunɛ ba susuu. Wii-la fa nɛa wu-lɔru ne. Nii ne ni-kaana-la tuuse Wia jonɛnɔo a tinɛ duonɛ-tabia-la wiaa.

17

Haala si hɔnɛ бага kunɛ nyunɛ

¹ Nii ne Wia tinɛdaaraa balipe-la si kori gbaɛsinɛ balipe-la, ba tuɔn kubala yiremi a bul, “Ko di mi daganɛ nii Wia si jaɛ dii ha-chorunɛ deenɛ si nɛa wu-liilinɛ worunɛ sariya. U ne hɔnɛ lee-la liinɛ si he a yuge. ² Dunia kuoro ari dunia niaa kala kenu nɛa

wu-liilin a kala bugi, a nage ba si nyua siniŋ.”

³ Nii ne Wia Diŋ-zŋ-la hemi le, ka Wia tinđari-la jonmi kaa juu giri kubala tuŋ. Nii ne mi na haal kubala dime duu hŋn бага kun kubala nyun. Baga ku-la kala fiesa ne. U yiraa fa yuga ne, yirala tutuuse la Tiina Wia. U fa ken nyusun balipe ne, ka u nyillin ma fa naa fii ne. ⁴ Haal-la laale geri-fian ari muŋun, a he selime ari tabiitulaa. U fa kori selime nyunyuala ne. Wu-bŋnŋŋ ari wu-liili-la u sii naa su nyunyuala-la, ⁵ ka ba nmunse yiri-kpunkpere a he u tile le. Yirila ba si nmunsa he u tile le ne nla, “Babilŋ naa ta-bal ne. Nialin kala si he dunia le aa naa wu-bŋnŋŋ, ari ha-chŋrumŋŋ kala, u ne naa ba naan.” ⁶ Nii ne ka mi na haal-la duu nyua Wia niaa ari nialin ba si kpua a tin Yesu wiaa ba chalin. Haal-la si nyua chal-la yuga nii, u bugi. Mi si nau nii, u naami wu-kpunkpere kinken kinken.

⁷ Nii ne Wia tinđari-la piesemi a bul, “Bee kun ne tii wiin deen naa wu-kpunkpere n le? Haal-la si jil бага ku-la si ken nyusun balipe ari nyillin fii-la naa ha-kpunkpere ne. Mi jan dagin u bubun. ⁸ Baga ku-la n si na ne fa he dime bunbun an bira tuo. U jan lii buŋtuo-lunji-la tuŋ ku lii a mu suu. Di dunia niaa dŋsun ne na бага ku-la, u jan naaba wu-kpunkpere, bee wiaa u fa he dime bunbun an bira tuo, an saa jan bira ko. Wiin deen jan naa nialin si he dunia le, ka ba yiraa tuo miisin ten-la Wia si nmunsa a chin dunia disuomun le. ⁹ Nii-la si ken wu-jimin ne jan wuo jin wiin deen bubun. Nyusun balipe-la naa peelee balipe ne. Ba nyun ne haal-la hŋn. Nyusun balipe-la ma naa kuoroo balipe ne. ¹⁰ Kuoroo balipe-la tuŋ banŋ ne suba, dŋŋŋ ne dii kuorun leele, an ka dŋŋŋ-la-na ha bi kuorun die. Di u ma ne ku dii kuorun, u bi jan he dime a dieni. ¹¹ Baga ku-la-na fa si

he dime an bira ku tuo, u ma naa kuoro ne. U pe balipe-la le ba naa chori, ama u fa he kuorie-la balipe tuŋ ne. U ma jan suu. ¹² Nyilli-la fii n si na naa kuoroo fii ne, ama bana ha bi kuorun die. Ba di бага kula jan dii kuorun, ama ba bi jan dii kuorun a dieni. ¹³ Kuoroo deenba kala ken nii-bala ne, a jon dol-la ba si kaa biben niaa a pi бага ku-la. ¹⁴ Ba di Pie-bie-la jan yuo dŋŋŋ, ama Pie-bie-la jan yuo diiba, bee wiaa u ne naa nialin kala si ben niaa kuhian, a ken kuoroo kala ma dolun. Ba di u haritooroo ne jan yuo diiba. Niaa deenba ne naa nialin Wia si yira an liise, ba naa ni-titiiba.”

¹⁵ Nii ne Wia tinđari-la bira dagemi lii-la ha-chŋrun-la fa si hŋn u nyun bubun. U bula di lii-la mi si na naa nuhuobiinee ari ni-dan si lii ta-yiriba ari tintee-yiriba kala aa bul yikori-yiriba kala. ¹⁶ Nyilli-la fii ma mi si na, ba di бага kula jan bere ha-chŋrun-la. Ba jan wuri ha-chŋrun-la kiaa ta duu ken yaribiree. Ba jan chan u namia an len di nyinin dii u hangbelee. ¹⁷ Wia naa ba ken nii-bala ne a ninnaa wii-la u si cho. Nii ne tii ba naa nii. Ba jon dol-la ba si kene a biben niaa a pipi бага kula. Ba jan biben ku-la, see di wialin kala Wia si bula naa dere. ¹⁸ Nii ne Wia tinđari-la bira bul di haal-la mi si na naa ta-bal ne. Ta-balin deen ken dolun a biben kuoro-la si he dunia le.

18

Babilŋ tele

¹ Wiaa deenba kala si naa bal, mi bira na Wia tinđara dŋŋŋ duu lii Wia-ŋan a ku tuu tinteen. U faasa ken dolun, ka u pulumun len dunia kala pulle. ² Nii ne u faasa yire a bul, “Babilŋ tele, ta-bal-la tele. Dime ne jin-bŋnŋŋ ari diibiisin ba si kise kala he. ³ Babilŋ niaa naa wu-bŋnŋŋ a yuge ne. Ba dage dunia niaa, ba ma ninnaa wu-bŋnŋŋ.

Dunia kuoroo ma kenba njaa wu-liilin. Dunia bayalaa ma to ba harin a njaa wu-bonjoo a nina moribee woruj.”⁴ Wia tinjaari-la si bul wiaa deenba dexe, mi bira nii nuu yikoro duu lii Wia-jaŋ aa bul,

“Mi niaa, má sii Babilon le,
di nii dee ma jaŋ pe njaa wu-
bomɔ-la ba sii naa.

Di ma ne naa nii, mi jaŋ pe
dogisema ari mi sii che di mi
dogise Babilon niaa nii.

⁵ Ba wu-bonjoo yuga ne Wia sipaan,
nii ne tii Wia ha bi ba wiaa yua.

⁶ Wialin ba si naama le, má ma jono
naaba le,

a tin ma chimin naansiin bulia.
Gbaŋa-la ba si kaa naa sinin pima
ma nyua,
má ma ken u titia a naa sinin
naansiin bulia piba di ba
nyua.

⁷ Ba yie ken ba titia yuge ne, a
nii sima, a bibese ba titia le,
nii wiaa má dogiseba woruj, di ba
na heen a yiyel,
di hee-la mage nii ba fa sii nii
sima.

Ba yie biine di ba nage kuoroo ne,
tuɔ-cheen bi jaŋ kenba a nage
yo-haala.

Ba bul ba bi jaŋ ko di ba yele da.

⁸ Nii wiaa ne tii nyanyal-bonjoo jaŋ
kenba che-bala len len.

Ba jaŋ yel ba niaa yoho, di
losun ma kenba, ka nyinin ma
diiba.

Wiaa deenba kala jaŋ naa,
bee wiaa la Tiina Wia ken dolun.
U jaŋ dii ba sariya.”

⁹ Nii ne dunia kuoro-la si to ba
harin a njaa ba-chorun ari ha-
chorun wunaalaa a pe ninii sima,
ba tuon jaŋ chei. Di ba ne na di
nyinin ka diiba, ba jaŋ nmoo niin
vil vil. ¹⁰ Di ba ne beŋ hee-la taŋ-la
niaa sii na, fawullun jaŋ kenba. Ba
jaŋ chin di-bolii a bibenu a bul, “Ou,
ou ta-balin deen, ta-bal-la ba sii yire
Babilon, u bi diene ka ba dogise u
niaa ba suu.”

¹¹ Dunia bayalaa yiyel Babilon
niaa wiaa, bee wiaa nuu-kala tuo a
biraa yoo ba kiaa. ¹² Kialin ba sii
yalle ne na: Selime, hoon, tabii-
tulaa, geri-yuoli-zonjoo, muɔlaa,

geripe-fula-fula biisin, geripe-fiesin,
ari daasi-la kala yallin si heye, ari
kialin kala ba si ken batun nyilaa
naa, ari kialin kala ba si ken daa-
la yallin si heye saa, ari kolin,
ari kialin ba si ken hoon naa, ari
lokunbuiaa. ¹³ Ku-suɔ-sin ba si
jono guoli kudiilee tuon u sin, tu-
laaliba, tii-kelin suora si sima, si-
duorun, nuun, mun-zomun, folim-
iaa, nesin, ari piesee, ari janin, ari
janin torukoba, ari yosun. ¹⁴ Nii
ne ba bira bul a tige taŋ-la niaa le,

“Ku-zomɔ-la kala ma fa sii hienu,
ma telba kala le, ma ku-zon-zon-na
kala ari ma sima-la kala ma fa sii
nii, ba bira tuo. Ma bira bi jaŋ ko
di ma naba.” ¹⁵ Bayalia-la kala fa
si yalle kiaa pi Babilon niaa a na
moribee, ba jaŋ fá fawullun a tin
hee-la wiaa Babilon niaa sii na. Ba
kala jaŋ chin di-bolii a faasa nmoo
niin a yele bubul, ¹⁶ “Ou, ou, ta-balin
deen fa zomɔ a ken ku-zonjoo maa.
U niaa fa lilaale geri-yuoli-zonjoo,
ari muɔlaa, ari geri-fiesin, a lilaale
selime ari tabii-tulaa. ¹⁷ U bi diene
ka kiaa deenba kala chei n teen.” Nii
ne nialin sii duori liin dabori-bala-
la sii ven mugi-balin tuon kuhiasin,
ari nialin sii tin daboro-la tuon, ari
nialin sii juu liin daborusun aa mu
leree, ari nialin kala si che kiaa
mugi-balin tuon di ba na moribee,

¹⁸ niaa deenba kala chin di-bolii ne a
biben. Ba na Babilon duu dii nyinin.
Nii ne ba nmoo niin a yel a bul,
“Ta bee ne fa nage ta-balin deen?”

¹⁹ Nii ne ba yel a naa hagila hihe
ba nyusun le a bul, “Ou, ou, ta-balin
deen le ne nialin kala fa si ken liin
daborusun to a jigi. Má bee na, u
bi diene ka kialin kala u fa si kene
chei. ²⁰ Ma nialin si he Wia-jaŋ le,
má juuɔse Babilon wiaa. Ma Wia
niaa ari Wia nanjooaba ari nialin fa
sii bul wiaa, Wia Din-zon-la dolun

le, má jujuose. Wia jon ma chimin a jonɔ tin Babilon ne.”

²¹ Nii ne Wia tinɔara dɔɔ, u dolie ne worun, u jon tabii-bal a jonɔ yuo he mugi-balin le. Tabii-la fa yuga a nage nomun ne. U si jon tabii-bal-la a yuo nii, u bul, “Nii titia ne ba jan naa Babilon. Ba jan jon Babilon, ta-bal-la a yuo ta ari dolun. U jan lel dunia le. ²² Ba bira bi jan nii cheɔ-duduuroo di baa du, nmulun nmiiraa ma bira bi jan nmunmuu. Saaraa ari geripe-yuoroo ma jan bira tuo u le. Niaa bira bi jan nunon munun u le. ²³ Chaanaa ma bira bi jan chaane u tuon. Baalaa ari haalaa bira bi jan jaa dɔɔ. Babilon bayalaa ne fa naa ni-balaa dunia deen le, an ka ba ken daalusun aa naa wubonɔɔ aa nyise dunia niaa kala. ²⁴ Babilon le ne ba kpu nialin fa sii bul wiaa, Wia Din-zon-la dolun le, a kpu Wia niaa maa, a bira kpu nialin dɔɔsun si he dunia le.”

19

Pie-bie-la ha-jaari gbiele

¹ Wiaa deenba kala si naa harin, nii ne mi nii gon Wia-jan le. Gon-la nage ni-dan yiikoro ne aa bul wiaa. Ba si, “Haleluya, la Tiina Wia ken dolun duu laala ta. U ne ken yirin ari dolun. ² Má len di la dennu, bee wiaa u ken wutitii ne a kaa dii niaa sariya. U dii ha-chorun-bal-la sariya. Ha-chorun-bal-la ne faa naa wu-liilin, a chei dunia niaa kala. U si kpu Wia tintinnaa nii, nii titia ne Wia ma dogisu.”

³ Nii ne ba bira heele bul, “Haleluya, nyin-la sii dii haal-la, u nyuɔsun ne jil wia nyun a kaa mu wuu.” ⁴ Nii ne nihiasin mara ari banese-la ari kialin banese si weye tuu kpirimi a chuole Wia. U fa hon u kuori-kpasa nyun ne. Nii ne ba bul, “Ami, Haleluya!” ⁵ Nii ne nuu yiikoro lii Wia kuori-kpasa-la seme a heele bul, “Ma Wia tintinnaa kala ari ma nialin kala sii fáu, nihiasin ari hanbiisin kala, má len di la

denne Wia. U ne tiila.” ⁶ Nii ne mi bira nii ni-dan yiikoro. Yiikori-la fa nage fuo-balaa sii pelli ne gbul gbul. U bira nage duonun sii kpia nmana nmana an pe liligise. Nii ne yiikori-la heele bul, “Haleluya, la Tiina Wia Wii-jaribako dii u kuorun ne. ⁷ Má len di la jujuose a yire u yiri-balin a dennu worun. Bua-la Pie-bie-la si jan jaa haala yie ne. Haal-la ma si jan jaau naa siri ne. ⁸ Ba jon geriyuoli-zon a laale haal-la. Geri-la tula zomɔ. Kun-kala tuo u le. Geri-yuoli-zon-la haal-la si laala naa Wia niaa tuo-pul wu-naalaa ne.”

⁹ Nii ne Wia tinɔari-la bula pimi a bul, “Nmunse wiin deen, ari Wia jan pe nialin ba si yira di ba ku gbieli Pie-bie-la ha-jaari gbiele a dii kudiilee dime.” Nii ne Wia tinɔari-la bula pimi a bul di Wia niin wutenne ne nii. ¹⁰ Nii ne mi tuu kpirimi di mi chuolu, ama u bula pimi di mi si nii naa, di la kala naa tintinnaa a tima pipi Wia, la di nialin kala sii to wialin Yesu si bula. Nii ne u bula pimi di mi chuole Wia. Di nialin kala sii bul wiaa, Wia Din-zon-la dolun le, wialin titia ne Yesu dage.

Ja-pula jijilli-la

¹¹ Nii ne mi na Wia-jan duu suro. Mi ben a na ja-pula di nuu jila. Nii-la si jila yirin ne Ni-tenne ari Wutitii Tiina. U dii niaa sariya ari wutitii, a ken wutitii ma yuo laalin. ¹² U siaa kala chuchol a nage nyin-gelin, an ka u chu kuori-nyun-chuulun a yuge. Ba nmunse u yirin he nyun-chuulu-la le. Nu-kala bi yiri-la jin see u titia. ¹³ U laale geri-la chalin si misa ne. Ba ken nii-la kaa yire Wia Niin Wiaa. ¹⁴ Wia-jan laali-yuoroo ma laale geri-fula-fula biisin ne. Ba ma jil ja-pulun a tuto u harin ne. ¹⁵ Nii ne tokobiin lii nii-la si jil jaaba niin le a ku lii, a ken niin worun nyagaga. Tokobii-la ne u jan kaa ta dunia niaa kala kpu. U jan ken kpaasa a kaa ben dunia niaa. La Tiina Wia Wii-jaribako ken baanin ne dunia niaa nyun. U baanin jan sii

ba nyuŋ woruŋ. Niaa chaliŋ jaŋ lii ari ba si yie chage tii-neneɛ liiŋ nii.

¹⁶ Ba ŋmuŋse u yiriŋ ne a he geriduduŋ-la u si laala le ari u naapuŋ le. U yiriŋ ne ŋla: “Kuoroo kala Kuoro ari la tiinaba kala Tiina.”

¹⁷ Nii ne aŋ ka mi na Wia tinɗaaru kubala duu chin wii-pɔsuŋ le. Nii ne u faasa yire diibiisi-la kala sii fil wia nyuŋ di-bolii di ba ku pe dɔŋɔ le a dii kudiile-la Wia si jaŋ joŋo piba. Kudiile-la jaŋ yuge lee-la. ¹⁸ U yireba di ba ku dii kuoroo namia, ari laali-yuori-hiasin namia, ari ni-duorun namia, ari janiŋ namia, ari nialiŋ si jila namia, ari nuhuobiine namia, nialiŋ si tii ba titia ari nialiŋ si ŋaa yosuŋ, ari nihiasiŋ ari hanbiisiŋ kala. ¹⁹ Nii ne mi na baga ku-la ari dunia kuoroo ari ba laali-yuoroo di ba hilime di ba yuo nii-la si jil jɔɔ-la ari u laali-yuoroo. ²⁰ Nii-la si jil jɔɔ-la ari u laali-yuoroo yuo dii baga ku-la a kenu. Ba bira keŋ nii-la si nyia wiaa ari uu bul wiaa, Wia Diŋ-zɔŋ-la doluŋ le. U ne fa ŋaa wu-magilaa baga ku-la sipaan a wuo nyise nialiŋ ba si keŋ baga ku-la yiriŋ magileba, ari nialiŋ sii chuɔle baga ku-la nagisiŋ ba si me bil. Ba joŋ niaa deenba baliamiŋ a yuo ta ba ku tuu juu Wia nyiniŋ, nyiŋ-la sii dii a nage jiribiŋ. ²¹ Ka nii-la si jil jɔɔ-la keŋ tokobii-la si lii u niŋ le kaa kpu ni-kaanaa. Diibiisiŋ loriki ba nanpiliŋ kala.

20

Nialiŋ si beŋ dunia niaa jisin bui

¹ Nii ne mi na Wia tinɗaara duu lii Wia-jaŋ a ku tuu tinɗeen, a kori buɔtuo-luŋii-la boribiŋ ari choruŋ-bal kubala. ² Nii ne u keŋ diŋ-la, diŋ-la fa si he dime buŋbuŋ, a vɔbu bil jisin bui. Diŋ-la ne ŋaa Sitaani. ³ Nii ne Wia tinɗaari-la joŋ diŋ-la a yuo he buɔtuo-la le a kaa tɔ, a magile buɔtuo-la niŋ, di nuu si wuo kaa suri. Ba keŋ diŋ-la kaa tɔ duu bira si dunia niaa nyisu, see di jisin bui-la

bala. Di jisin bui-la ne bala, ba jaŋ kenu puri muapilii.

⁴ Nii ne mi na kuori-kpasinniŋ di niaa hoŋ ba nyuŋ. Niaa deenba ne Wia piba doluŋ di ba dii dunia niaa sariya. Nii ne aŋ ka mi na niaa diŋsiŋ. Niaa deenba ne faa bul wutitii-la Yesu fa si daga a pi niaa, aŋ pee bul Wia niŋ wiaa. Nii ne ba kpuba a keru ba nyusuŋ. Niaa deenba-na fa bi baga ku-la ka chuɔle ne. Ba bi ku-la ba si me u naga maa chuɔle. Ba bi baga ku-la magiliŋ kene ba tilliŋ le koo ba nisaa le. Niaa deenba suba, ama ba sii suuŋ le di ba di Kirisito dii kuoruŋ a beŋ dunia niaa jisin bui. ⁵ Nialiŋ si laa sipaan sii suuŋ le ne ŋla. Nialiŋ si suba, ni-kaanaa bi jaŋ sii suuŋ le, see di jisin bui-la yie. ⁶ Nialiŋ si laa sipaan sii suuŋ le, ba bi disinniŋ kene. Wia jaŋ peba le. Niaa deenba suu bala ne. Ba bira bi jaŋ suu. Suu-lia-la ma bi jaŋ wuoba. Ba jaŋ chin Wia ari Kirisito sipaan a laa niaa nyuŋ a tima piba. Ba di Kirisito jaŋ beŋ dunia niaa jisin bui.

Ba joŋ Sitaani he nyiniŋ le

⁷ Di jisin bui-la ne kiele, ba jaŋ liise Sitaani sarika-la le. ⁸ U jaŋ ku lii a nyise dunia niaa si he tinɗeen seme-na kala le di ba yuo laaliŋ. Gɔg ari Magɔg niaa ne nii. Ba yuga a mage fuoŋ niŋ hagili-buŋbuguloo ne memɛ. ⁹ Gɔg ari Magɔg niaa jaŋ duure dunia kala a mu golli lee-la Wia niaa si he, ari taŋ-la Wia si cho. Nii ne nyiniŋ lii wia nyuŋ a ku tuu dii ba kala. ¹⁰ Sitaani ne nyise Gɔg ari Magɔg niaa he di ba yuo Wia niaa. Nii ne ba joŋu a yuo he nyiniŋ sii dii a nage jiribiŋ le. Baga ku-la ari nii-la si nyia wiaa ari uu bul wiaa, Wia Diŋ-zɔŋ-la doluŋ le, ma he dime. Ba jaŋ na heeŋ wiiheye ari titaŋiŋ kala a kaa mu wuu.

Ba dii dunia niaa sariya

¹¹ Nii ne ka mi na kuori-kpasi-bal ku-pula duu china. Nu ne hoŋ u nyuŋ. Nii ne mi na di tinɗeen ari wia nyuŋ kala lele nii-la siŋ le. Ba bira

bi lee kene. ¹² Nii ne ka mi na nialin si suba, nihasin ari hanbiisin kala, di ba chin kuori-kpasa-la sipaan. Nii ne ba suri tennin yuge, a bira suri tenin dono. Miisin tenin ne nii. Nialin si ken miisin Wia teen yiraa ne he u tuon. Tenni-la donsun le ne ba nmunse nuu-kala si he dunia le wu-naalaa he. Nuukala si naa wiaa mage nii ne, ba jan ben a timu. ¹³ Nii ne mugi-balin ken nialin kala si suu u tuon ku lii. Nialin kala ma si he lele-jan ari Wia nyinin tuon, ba kala ku lii. Nii ne ba ben tenni-la tuon a na wialin kala ba si naa dunia le a dii ba sariya. ¹⁴ Nii ne ba jon suun ari lele-jan a yuo he nyin-balla le. Nii-la kala si jan juu nyin-balla tuon, u suu-liamin ne nii. ¹⁵ Di nuu-kala yirin ne tuo miisin ten-la tuon, ba yie jonu yuo he nyin-balla tuon ne.

21

Wia-jan falii-la ari tintee-falii-la

¹ Nii ne mi na Wia-jan ku-falii ari tintee-falii. Bunbun kialaa kala dere ne. Mugi-balin kala tuo tintee-falii-la le. ² Nii ne mi na ta-falii-la Wia si naa di u lii Wia-jan a ku tuu tinteen. Tan-la baa yiru Jerusalem ne. U bi disinnin kene. Wia kpieru ari ba si yie kpier haala nii a kaa mu pi u bala. ³ Nii ne an ka mi nii nuu yikoro duu lii kuori-kpasa-la seme a faasa bul di ma bee na, lele Wia ko nuhuobiine teen ne. U jan hon ba tuon. Ba ne jan naa u niaa. U titia jan hon ba teen a njaa ba Wia. ⁴ U jan fiise ba sii-liirin kala ta. Ba bira bi jan suu, ba tuon bira bi jan chei. Ba bira bi jan yel a bira bi jan na heen, bee wiaa wu-binia-la kala bala ne.

⁵ Nii ne nii-la si hon kuori-kpasa-la nyun bul di ma bee na, mi naa kun-kala birime ku-falii ne. Nii ne u bira bula pimi di mi nmunse wiaa deenba u si bula, bee wiaa ba kala naa wutitii ne. Naa jan wuo laaba dii. ⁶ Nii ne u bula pimi a bul, "Wii-kala dere ne. Mi ne naa Alifa

ari Omega. Mi ne naa nii-la fa si he dime bunbun ari nii-la si jan he dime dunia diderin. Nii-la kala lii-nyuasun si kene, mi jan naa lii-la si pi niaa miisin pu pei. ⁷ Nii-la kala si wuo yuo dii Sitaani jan na kiaa deenba kala. Mi jan naa u Wia, u ma jan naa mi bii. ⁸ Ama nialin si naa fawuluba, ari nialin si bi yarida kene, ari disin naaraa, ari nikpuuraa, ari nialin sii naa wu-liilin, ari nialin si ken daalusun aa naa wubonon, ari vui-kpaaraa, ari nialin kala sii nyia wiaa, ba jan jonba he nyinin sii dii a nage jiribin. Ba jan suu suu-liamin nyin-la tuon."

Jerusalem falii-la

⁹ Nii ne Wia tindaaraa balipe-la si kori gbanin balipe-la si suo ari nyanyal-bomola balipe ku bula pimi di mi ko, duu dagemi haal-la Piebie-la si jan jaa. ¹⁰ Nii ne Wia Din-zon-la ku hemi le, ka u jonmi kaa jil peel-bal kubala nyun. U lenie ne worun. Nii ne u dagemi tan-la si bi disinnin kene baa yire Jerusalem. Wia len u lii Wia-jan kuu tuu tinteen. ¹¹ Tan-la pulle ari Wia si pulle nii, a tutul ari nanjkipachil-zonon n si bi na tete, a bira tutul ari tabiin si nage beenantire. ¹² Tan-la ken kere-bal kubala. U lenie ne worun a ken boinniirin fii ari balia a golli. Wia tindaaraa fii ari balia chin boye-la le, ka ba nmunse Iziral naabalimaba fii ari balia-la yiraa he boye-la le. ¹³ Tan-bubun ari tan-nyun ken boyee batori batori, tasesin ma ken batori batori. ¹⁴ Kere-la gentine ba bil tabiaa fii ari balia ne. Tabia-la le ba nmunse Piebie-la nanzoba fii ari balia-la yiraa ne heba le.

¹⁵ Wia tindaari-la si bul wiaa mi teen kori selime daan ne duu kaa magise ta-bal-la ari u boinniiri-la ari u keresin. ¹⁶ Tan-la jalin ari u duomun kala mage dono ne. Nii ne u magise tan-la ari selime daala duu naa meel-daasin bui ari zabanon. U duomun ari u jalin ari

u lenj̄n kala mage d̄oŋo ne. ¹⁷ Wia tin̄daari-la magise taŋ-la kere-la ma ne. U lenj̄n ŋaa naakielin mahin̄ batori ari fii ari balia ne. Nuhuobi-ine s̄ii magise kiaa, ŋii titia ne Wia tin̄daari-la ma magise. ¹⁸ Ba ken̄ tabii-pullun̄ ne saa kere-la, aŋ ka taŋ-la kala ŋaa selime, a kala chaane a nage beenantire. Kun̄-kala tuo u le. ¹⁹ Taŋ-la kere-la gentine-la tabiaa kala ŋaa tabii-zom̄o ne a tutul. Bun̄bun̄ kua yirin̄ ne jasipa, liamin̄ kua ma yirin̄ ne saafaya, torimun̄ kua ma yirin̄ ne aget, nesemin̄ kua ma yirin̄ ne emeralidi, ²⁰ noŋ kua yirin̄ ne onis, dumun̄ kua yirin̄ ne kaanelian̄, pemin̄ kua yirin̄ ne kirasolati, chorimun̄ kua ma ŋaa beril, nibimin̄ kua ma yirin̄ ne topas, fiimin̄ kua yirin̄ ne kirasopilis, fii ari kun̄ kua yirin̄ ne jasinis, ka fii ari baliamin̄ kua ne yirin̄ ne ametis. ²¹ Boye-la fii ari balia kala ŋaa tabii-tulaa ne. Boi-kala ŋaa tabii-tulii kubala ne. Taŋ-la won̄biin̄ ŋaa selime ne, kun̄-kala tuo u le a kala tutul ari beenantire.

²² Nii ne mi ben̄ taŋ-la tuoŋ a bi Wia-dia kala na dime. Taŋ-la niaa n̄ii chuole la Tiina Wia Wii-jaribako ari Pie-bie-la lee-kala. Ba Wia-dia ne ŋii. ²³ Taŋ-la bira bi wii-p̄osun̄ ari chene ka che, bee wiaa Wia tula ne ŋaa ba pulumun̄. Pie-bie-la ne ŋaa ba chaanin̄. ²⁴ U pulumun̄ le ne dunia niaa kala jaŋ ven̄. Ka dunia kuoroo kala jaŋ ken̄ ba ku-zoŋŋoo kaa juu dime. ²⁵ Ba bi jaŋ ken̄ taŋ-la boyee kaa to wiiheye. Titan̄in̄ paala tuo dime. ²⁶ Tin̄teyee niaa kala jaŋ ken̄ ba ku-zoŋŋoo ari ba kuori kiaa kaa juu dime, ²⁷ ama kun̄-kala si ken̄ disinnin̄, koo nii-la kala si ŋaa ni-boŋ, koo wu-nyiaru kala bi jaŋ juu taŋ-la, see nialin̄ Pie-bie-la si ŋmun̄se ba yiraa he miisin̄ ten̄-la le ne jaŋ juu dime.

22

¹ Nii ne Wia tin̄daari-la bira dagemi fuo kubala. Fuo-la liin̄ n̄ii pi niaa miisin̄. Lii-la kala pulla

chila chila a nage beenantire. Lii-la pelle lii Wia ari Pie-bie-la kuori-kpasa-la teen̄ ne, ² a pelle to ta-bal-la tutuobaanin̄, ka tiisi-la si ken̄ nenee s̄ii pi niaa miisin̄ chin̄ fuo-la cholun̄ balia-la kala. Tiisi-la yie nen̄ nen̄-yiriba, baa tore chene kala. Tiisi-la pipaarin̄ ne ba kaa vivaare tin̄teyela niaa. ³ Kun̄-na kala Wia s̄ii ŋmiesa heu le tuo ta-bal-la tuoŋ. Ama Wia kuori-kpasa ari Pie-bie-la kpasa jaŋ he lee-la, ka u tin̄tinnaa chuolu. ⁴ Ba jaŋ na u siaa, ka u yirin̄ he ba tillin̄ le. ⁵ Taŋ bi jaŋ biri dime. Ba bi chaanin̄ koo wii-p̄osun̄ pulumun̄ che dime. La Tiina Wia ne jaŋ ŋaa ba pulumun̄. Ba ne jaŋ ben̄ dunia a kaa mu wuu.

Yesu si duu jaŋ ko leele

⁶ Nii ne Wia tin̄daari-la bira bula pimi di wiaa deen̄ba ŋaa wutitii ne, di niaa jaŋ wuo laaba dii. Di la Tiina Wia, nii-la si joŋ u Diŋ-zoŋ-la a pi nialin̄ s̄ii bul wiaa, Wia Diŋ-zoŋ-la dolun̄ le ne timu duu ku bul wialin̄ si jaŋ ŋaa leele a pi u tin̄tinnaa. ⁷ Yesu si, “Má bee na, mi jaŋ ko leele.” Nialin̄ s̄ii to wialin̄ ba si bula Wia Diŋ-zoŋ-la dolun̄ le a he tenin̄ deen̄ tuoŋ, Wia jaŋ peba le.

⁸ Mi-na Joŋ, mi ne nii-la si nia aŋ pe na wiaa deen̄ba kala. Mi si nia aŋ naba ŋii, mi tuu kpirimi Wia tin̄daari-la sipaan̄, nii-la si dagemi wiaa deen̄ba kala, a chuolu. ⁹ Nii ne u bula pimi di mi sí ŋii ŋaa, di la kala ŋaa tin̄tinnaa a tima pipi Wia, la di nialaa kala s̄ii bul wiaa, Wia Diŋ-zoŋ-la dolun̄ le, ari nialin̄ kala s̄ii to wialin̄ si he tenin̄ deen̄ tuoŋ. U bula pimi di mi chuole Wia.

¹⁰ Nii ne u bira bula pimi di mi sí wiaa deen̄ba ba si bula Wia Diŋ-zoŋ-la dolun̄ le a he tenin̄ deen̄ le kaa faa. U bi jaŋ dieni, ka wialin̄ ba si bula ŋaa. ¹¹ Nii wiaa má len̄ di ni-boŋŋoo ken̄ ŋii naan̄ le a ŋiŋaa wu-boŋŋoo, di nialin̄ si ken̄ disinnin̄ ma ken̄ ŋii naan̄ le a ŋiŋaa disinnin̄, di ni-zoŋŋoo ma ken̄ ŋii naan̄ le a ŋiŋaa wu-zoŋŋoo, di tuo-pul tin̄ŋaa

ma keŋ nii naan le a ninaa tuo-pul wiaa.

¹² Yesu si, “Má bee na, mi jaŋ kŋ lɛɛɛ, mi jaŋ ku tiŋ nuu-kala. Nuu-kala si tima mage nii, nii titia ne u jaŋ laa u time. ¹³ Mi ne nna Alifa ari Omega, mi ne nna nii-la fa si he dime bunbun ari nii-la si jaŋ he dime dunia diderŋ. Mi ne nna di-suomun, mi ne nna di-dɛrŋ maa.”

¹⁴ Nialin sii to Wia wiaa, Wia jaŋ peba le di ba wuo na wonbiin a to ta-bal-la boiniree juu, a wuo dii tia-la sii pi niaa miisŋ nenɛɛ.

¹⁵ Ama ni-bŋŋŋŋ jaŋ chin taŋ-la jeŋ harŋ. Nialin wu-naalaa si nage vahŋ, ari nialin si keŋ daalusun a ninaa wu-bŋŋŋŋ, ari nialin sii nna wu-liilin, ari nialin sii kpu niaa, ari vui-kpaaraa, ari nialin kala si cho wu-nyariŋ aa nyia wiaa, ba kala jaŋ chin taŋ-la jeŋ harŋ.

¹⁶ Nii ne Yesu si, “Mi ne tiŋ mi tinɔara duu kŋ ma teen a bul wiaa deenba pi nialin si laa Yesu wiaa dii a hihilimi lee-na kala. Mi nna Devit dia niaa gentine ne an pe nna Devit doho nuu. Mi ne nna nanyualun.”

¹⁷ Nii ne Wia Din-zŋŋ-la ari haal-la Pie-bie-la sii che duu jaa bula pi niaa a bul, “Má kŋ. Nuu-kala si nia, má leŋ duu kŋ. Nuu-na kala lii-nyuasun si keŋɛ, uu kŋ. Nii-la kala si cho duu nyua lii-la sii pi niaa miisŋ an sŋ kun-kala tiŋ, uu kŋ a nyua lii-la.”

Wu-kaanaa

¹⁸ Mi-na Jŋŋ che di nuu-kala si nii wiaa deenba ba si bula he tenŋ deen tuŋ, di ba keŋ ba titia worun ari wiaa deenba le. Di nuu-kala ne keŋ wii pe wiaa deenba le, Wia ma jaŋ jon nyanyal-bŋmŋ-la ba si daga tenŋ deen tuŋ a dŋgise u tiina. ¹⁹ Di nuu-kala ma ne liise wiaa deenba kun ta, Wia ma jaŋ liise u tiina ta. U bi jaŋ puu wonbiin duu na kialin ba si nmunsa he tenŋ deen tuŋ. U tiina bi jaŋ wuo dii tia-la sii pi niaa miisŋ nenɛɛ. U bira bi jaŋ juu taŋ-la Wia si liisa tuŋ maa.

²⁰ Nii-la sii dage wiaa deenba Wia si daga bul duu kŋ ne lɛɛɛ. La Tiina Yesu, kŋ. Ami.

²¹ La Tiina Yesu lahŋrimŋ le, Wia niaa kala jaŋ hŋŋ ari yarifiɛlaa. Ami.